

第一集

XXI
17


12

第一集

香豔叢書

國學扶輪社印行





HQ
1737
A75
v.1
序

嗚呼。詞傳硯北。歌絳樹之雙聲。夢到江南。賞休文之四曲。靡不落珠。璣於紙上。墜金粉於行間。蓋情之所鍾。正在吾輩。而纖不傷雅。易索解人。集中載孝綽之名姝。叙李波之小妹。羣雌粥粥。非奪壻於瑤光。往事沉沉。孰留痕於鰕墨。或玉鉤斜畔。弔勝國之遺蹤。或鞦韆圖中。譜盛朝之佳話。或刻潛英於紙帳。或喚踏搖於屏風。或片語解圍。絮散謝家之雪。或神鍼繡夜。錦飛織女之雲。事有可徵。言非無據。握來銀管。寫靖節之閒情。傾盡金壺。記東山之韻事。阿難往矣。誰將戒體。摩挲此豸娟。然剩有遺徽。髣髴嗟乎。十五王昌之句。忍俊不禁。三章河女之辭。哀情若訴。漫說風華流蕩。顏子或竟坐忘。須知比興溫柔。宣尼未經刪削。妄言妄聽。編者祇借古以鑑。今見智見仁。讀者毋玩華而喪實。

宣統元年十二月八日蟲天子序于國學扶輪社

凡例

一本集搜輯隨時不拘朝代先後今人亦間登一二多係可驚可喜
未經刊刻之作

一本集所選以香艷爲主無論詩詞樂府足以醉心蕩魄者一例采
入

一本集所刊均係海內藏書家秘本名人校訂本間有可疑處不敢
臆改以存其真 大雅諒之

香艷叢書一集目錄

卷一

鴛鴦牒

美人譜

花底拾遺

補花底拾遺

十眉謠

閒情十二憺

黛史

小星志

胭脂紀事

十美詞紀

卷二

悅容編

香天談藪

婦人集

卷三

續婦人集

艷體聯珠

侍兒小名錄

補侍兒小名錄

續補侍兒小名錄

妒律

卷四

三婦評牡丹亭雜記

龜台瑣瑣

潮嘉風月記

香艷叢書一集目錄終

香艷叢書

一集卷一

鴛鴦牒

新安程羽文蓋臣著

譚友夏曰。古今多少才子佳人。被愚拘父母板住。不能成對。齎情而死。乃悟文君。犇相如是。上上妙策。不知世人陰陽之契。有繾綣司總統。其長官號氤氲大使。冥數當合者。須鴛鴦牒下。乃成如此。卽咎有所歸。正不必致怨高堂也。春風在手。抹殺月下老人。隨舉彰彰缺陷者。各下一牒。爲千古九原吐氣。武嬰英華鮮顯。詔可催花。宜借配魏武帝。鎖之銅雀台上。無使播穢牝晨。卽以淫穢論。宜正配金海陵。兩雄旗鼓。頗足相當耳。

王昭君。淒情惋調。青塚難埋。宜配蘇子卿。旄落氈殘之餘。咻琵琶一曲。併可了塞外生子之案。

謝道韞。柳絮逸思。潘安仁。花封冶意。一則風高林下。一則美擅車中。移花就柳。

端不恨天壤于郎。

班氏昭淵深典瞻。宜正配鄭康成。六經爲庖厨。百家爲異饌。

薛濤巧偷鸚鵡色。借鳳凰空作風塵染。濫宜遠配張緒楊柳。魏收蝴蝶。舉止輕儇。恣其佻達。

蔡文姬靈心慧齒。辱跡穹廬。宜續配彌正平。以胡笳十八拍佐漁陽三搥鼓宮。

商迭奏悲壯互陳。

王韞秀挺勁孤卓。惜其稍有炎心。宜故配寒郊瘦島。以消之不然亦直配李長源。十六年宰相妻克善厥終。

鮑令暉清斲另巧。宜硬配庾信徐陵。庶可珊瑚鬪咽。琉璃鬪舌。

甄后玉固有香花亦解語。無奈雨妬風狂。塘上一行字字沉痛。宜奪配陳思王。慰此洛神癡賦。蒲生怨詩。

杭妓周韶澹遠瀟迴。有遺俗之思。宜操茶具。暫配陶學士。郵亭煮雪。而後念觀音般若經。終配蔡君謨鬪茗。

侯夫人尖酸宛惻。畢命梁下。宜鬼配薛道衡。燕泥飛禍。異事同傷。

江采蘋俊朗高潔。抱恨樓東。宜遙配孟浩然。林君復肆癡湖山。共對梅花索句。崔鶯鶯嬌憨淫冶。宜身配韓致光。李義山以香奩西崑諸艷筆。貌其柔柔款款。百世而下。又神配董解元。王實甫。關漢卿。謝其寫照。摹情令當時薄倖微之羞死。

蘇若蘭迴文一錦。暝截天孫。正索解人不可得。宜擇配楊德祖。共參曹娥碑陰雞肋話謎。

朱淑真圓音曲轉。因此鴛庸。宜任配蘇子瞻。秦少游晁無咎。陳季常黃山谷。王晉卿晏同叔。蘇子美柳耆卿輩。綺舌交酬。錦腸不斷。

班婕妤左九嬪。高厚渾朴。永巷索居。宜留配簡文帝。綱元帝。繹可以麗句陶情。規言贊理。

步非烟慧語誰聆。嬌花不賞。飄香墜粉。亦復何疑。宜遣配宋子京。助修唐書。倦則命酒酣歌。令天不曉。

花蕊夫人。短拈小摘。輕纖爲妖。宜近配徐鉉舒雅。李昊韋莊。韓熙載等。風流一代。不天斧斤。

遼蕭后。繼雅纏綿。焚椒最慘。宜聊配蜀主昶。唐主煜。頗諳情緣。且以宸葩。嬌美魚玄機。疎瘦亭亭。宜冷配張志和。嘲烟美水。不然亦乾配貫休齊己。以伴遂初。黃崇嘏。奇跡突出。千古難雄。宜合配鄉人司馬長卿。揚子雲。王子淵。李太白。同筮仕于大周。如意建元。爲牝朝雌相。

李清照。曠爽超越。播遷以還。貽羞牙儉。宜續配王十朋。謝希孟。米元章。陸務觀等。以金石剩錄。樂此桑榆。

曹比玉。風操遁上。守貞三十載。未免情枯。宜勸配楊廉夫。臥起小蓬萊。榜門不下一笛一琴。唱予和汝。

楊容華。鶯吭亮溜。鵲鵲非羣。宜卽配王子安。駱賓王。盧昇之。蜚聲振藻。不忝四家。

鄧王儀冲華。賦骨騷腸。顛危抑鬱。宜賜配文文山。共唱滿江紅。一曲氣吐爲虹。

張惠連。霞姿月韻。春夢樓高。宜聽配高則誠。馬東籬。鄭德輝。白仁甫。詹天游等。
節紅牙以度曲。

秦女子羅敷。陌上歌長。箏中聲遠。半誇半謔。傲睨侯王。宜配寧戚馮諼。與扣角
彈鋏嗣響。

漢津吏女娟。慷慨悠揚。胆與識並。宜配尹伯奇。介子推。以礪忠孝之助。

嚴幼芳。嬌啼嫩語。偏覺鐵中錚錚。宜配馬光祖。文及翁。以筆舌作中流之砥。

關盼盼。燕羽差池。空樓不暖。宜配白樂天。蹴綠銜紅。呢喃于桃夭柳驪之間。

李秀蘭。徐月英。談諧歌笑。機捷輓轡。或配張藉。王建。捧硯。或配盧仝。陸羽。煎茶。

或配劉伯倫。馬賓王。作酒佐。致逸趣。別事事咸宜。

鄭月流。英資秀拔。屈身傭販。琵琶亭一作情見乎詞。宜分配白傅。淚。鄭潛詩。東

籬曲。不使有老大商婦之歎。

李弄玉。鸞影早孤。哀憤成響。藏名隱語。不減驛字雞碑。宜巧配謝靈運。沈初明。

以離合諸作。慧解參微。破其岑寂。

光威哀姊弟三人。聯輝競綵。幾使棣萼無花。宜急配王勃。王勔。王劇。三株樹。錦披繡錯。合映一庭。

郭紹蘭。別淚成吟。傳情燕翼。宜送配王謝。共乘飛雲軒。偕老烏衣國裡。

劉采春。雖羅噴曲高。足敵元才子。然鱸魚不戀。半分葦叢。裴柔之之愛。宜奪配賀知章。一觴一咏。受賜鏡湖。

其餘名字未新者。不必另配有佳偶者。不可另配有節烈者。不敢另配。一仍舊牒而已。

(完)

美人譜

秀水徐 震秋濤著

蓋聞芙蓉別殿。曾居窈窕之姝。楊柳深閨。不乏輕盈之媛。然而偏長易獲。全美難臻。必欲性與韻。致兼優色與情。文並麗。固已歷古罕聞。曠世一見。故歌舞進。吳則寵冠蘇台。而烏喙獲行成之請。琵琶出塞。則魂銷漢帝。而畫工擣上罪之誅。此不惜傾城國。佳人難再得之歌。雖爲忘國解嘲。而亦見美人色之不易覲也。余夙負情癡。頗酣紅夢。雖淒涼羅袂。緣慳賈午之香。而品列金釵。花吐文通之穎。用搜絕世名姝。撰爲柔鄉韻譜。使世之風流韻士。慕豔才人。得以按跡生歡。探奇銷恨。又何必羨襄王之巫雨。想院肇之仙踪也哉。

美人艷處。自十三四歲。以至二十三。只有十年。顏色譬如花之初放。芳菲妖媚。全在此際。過此則如花之盛開。非不爛漫。而零謝隨之矣。然世亦有羨慕半老佳人者。以其解領情趣。固有可愛。而香銷紅褪。終如花色衰謝之後。祇有一種可憐之態耳。

古來美人有足思慕者共得二十六人。

西子 毛嫱 夷光 李夫人 卓文君

班婕妤 王昭君 趙飛燕 合德 蔡琰

二喬 綠珠 碧玉 張麗華 侯夫人

楊太真 崔鶯鶯 關盼盼 蘇蕙 非烟

柳姬 霍小玉 貞娘 朱淑真 花蕊夫人

古來名妓有足當美人之目者共得六人。

紅拂 李娃 薛濤 紫雲 蘇小小

琴操

古來婢妾有可爲美人之次者共得四人。

飄風 崇石婢 樊素 小蠻 俱白樂朝雲 東坡妾

美人遺跡有足令人銷魂者。

浣紗石 響屧廊 琴台 青塚 蒲東

燕子樓

蘇小墓

眞娘墓

一之容。

螭首

杏唇

犀齒

酥乳

遠山眉

秋波

芙蓉臉

雲鬢

玉筍

蕙指

楊柳腰

步步蓮

不肥不瘦長短適宜

二之韻。

簾內影

蒼苔履跡

倚欄待月

斜抱雲和

歌餘舞倦時

嫣然巧笑

臨去秋波一轉

三之技。

彈琴

吟詩

圍棋

寫畫

蹴鞠

臨池摹帖

刺繡

織錦

吹簫

抹牌

鞦韆

深諳音律

雙陸

四之事。

護蘭煎茶金盆弄月焚香咏絮

春曉看花撲蝶裁剪調和五味染紅指甲

鬪草教鸚鵡念詩

五之居。

金屋玉樓珠簾雲母屏象牙牀

芙蓉帳翠幃

六之候。

金谷花開畫船明月雪映珠簾玳筵銀燭夕陽芳草

雨打芭蕉

七之節。

珠衫綃帔八幅繡裙鳳頭鞋犀簪

辟寒釵玉珮鴛鴦帶明璫翠翹

金鳳凰錦襠

八之助。

象梳

菱花

玉鏡台

兔穎

錦箋

端硯

綠綺琴

玉簫

紈扇

毛詩

玉台香奩諸集

韻書

俊婢

金爐

古瓶

玉合

異香

名花

九之饌。

各色時果

鮮荔枝

魚鮓

羊羔

美醞

山珍海味

松蘿徑山陽羨佳茗

各色巧製小菜

十之趣。

醉倚郎肩

蘭湯晝沐

枕邊嬌笑

眼色偷傳

拈彈打鶯

微含醋意

(完)

花底拾遺小引

花者美人之小影美人者花之真身若無美人則花徒虛設耳然花則常有而美人不常有使既有花而復有美人吾知美人之于花必且休戚相關好惡相合殆所謂我與我周旋耳其可與相往還者在人則有三在物則有五曰郎曰小婢曰鄰姬皆人之屬也曰蝶曰蜂曰鶯曰鴛鴦曰鸚鵡皆物之屬也此外一切塵俗安可使闌入耶第思開闢之初造物者欲生百花以洩其華英之秘不知費幾許經營而始各臻其妙于色則有淺深濃淡之不同于香則有清濁重輕之各別于形狀則有尖圓單複之各極其致而且妖嬈其態豔冶其容卽下至鬚之多寡短長葉之大小奇正莫不皆有可觀而且不病于雷同不傷于怪誕造物一番苦心使非有美人焉爲之領畧而鑒賞之不幾虛費之無用之地哉吾輩鬚眉丈夫亦未嘗不與名花爲友然終是以人愛花固不若以花愛花之更爲親切而有味也則花之受愛於人又何如受愛於美人之爲浹洽而無間耶心齋張潮譔

卷一

一

集

花底拾遺

番禺黎遂球美周著

花事如羅虬張翊簡舉無遺矣。然而生香解語。顧影相憐。深院曲房。別饒佳致。道人讀書之暇。聊爲譜之。不必溺其文情。聊堪裁作詩骨。春朝姊妹爲嫩蕊乞晴。下珠簾寫種樹書。選芳名字小婢。戲拈榴瓣貼臂。作守宮砂。湖山背浴起落紅粘玉。金籠懸鸚鵡作花監。帶花春睡。惹浪蝶闌入紅綃。白衣稱簷蔔。避人入深叢。低枝罨髻。撝拾花事作佳謎。摘髮繫茉莉與郎。調鸚鵡舌。教誦百花詩。聞席上有詞人自摘新紅釵釘。紅袂護風。深夜疏燈刺蠹。着輕縠睡蕉陰石几納涼。樓人搖落緋桃成陣。薛濤箋榜移種事宜。郊遊遺失夜合。憂爲俗漢取得。臨謗草帖餐菊。粧樓上誤擲茶蘼。賺酸措大作情詩。花朝慵病強起。花時深閉小閣怕觸香烟。砌香篆作情字。恨春風吹散。暗祝桂花前。梨香下內集。碧紗牕下。摹疏影作刺繡譜。寒食後寫落花詩寄人。浴怪石待水仙開。

揀古今名姬與花名合者。編作列傳。製香藕。梳頭碎紅圍地。燒手炮。
紙片雜飛花。迸落。佩忘憂草。羞人喚作宜男。近枝頭。呵積雪。閒以綠絲。
碎桃自況。借郎書。拾殘紅點記。粧臺畔。雜置小盤松竹。誦郎詩。偷識竹。
下。燈下剪石菖蒲。歎素馨不得作牡丹比隣。唱小詞。餘聲繞。值花飛。
搗鳳仙。染甲彈箏。自撰根苗分種。晏起知有夜雨。忙出芳階。采相思豆。
令小婢傳情字。折蕨蕤作郵筒。芙蓉水蘸筆。自譜春容。踏青拜花田古。
冢。占花小婢報喜。姊妹夜集。各出名花共賭。卸粧後。杏黃衫子。襯玉簪。
花。罨繡榭。闌蘭。嗤郎麝氣。春病倩女巫。禳解戒林下紅粧。嚙指血。摘。
荷葉寫書。拆荷花。冒藕絲。纏臂。寫秋葉。凭闌細數。落花亂風時。一聲嬌。
怨。玉簪破。蕨蕤藏稚蝶。采百藥。勘方療春病。簡方采合歡藥。折花荆。
枝刺臂。玉暈微紅。新搆朱闌。勒名筆。顏題。小滿覓鄰。姬嫁杏。墮馬急挽。
垂楊。聞叢邊鈴索聲。低喚誰人。低聲誦。取紅花咒。閉丁香。菴雙跣。習內。
觀。掃檻外。待隣姬踐約。七夕懸素馨。燈乞巧。夜度芳徑。冒帶。胭脂徑。

上縱橫小展跡。傲燭。花製春釀。雨中架琉璃。覆並頭花。系綵縷束披
枝。霧裏捉迷藏。錯攬垂枝失足。俏步向園林。尋媚蝶。勅侍兒理枕畔殘
香。門譚花媒事。臉頰。綠陰深處。作鳥語賺人。摘花連雙蝶。送鄰姬。開盒
時。忽驚飛出。綠荷池自放鴛鴦。夢回失芍藥。知是郎至。竚立柳絮風前。
坐堦前。砌紅白春茵。嗔人行。就流紅送老蠻蛾。稱是薄倖事。扮壽陽粧。
考訂花名。怨枝上啼鶯。却惜花不敢驚起。水閣對荷池。繡佛浣灑莊嚴。
門草濕羅裙。玉蘭片學寫春詞。串結瑞香球。貽贈小郎。俏還粧閣喚
小婢。摘去刺衣蕪絮。嚼香蕊。剪花鬚。搗小鼓。催花作酒政。爲意中人緩
急。百蝶譜收藏桃花片。剪花日。檯婢發嬌嗔。縱郎衣綴吉祥草。謹行
滴葉上天泉。煮茗。脫繡鞋。挂花間代幄。簡曆日。覓種花佳期。揀寒梅檀
口輕呵。買古窰盤。卣作花金屋。胭脂花染脣。輒含毫寫相思字。雜佩贈
人。避人轉入深叢驚怯。曉晴滴上池水傳粉。纖手捧紅蓮供佛。觀落
紅有悟。皈命空王。扶留葉。雜木犀蕊結鴛鴦。檳榔包。覓桐花鳳。元日結

綵勝綴臘。贈郎稱是宮花。 紉蘭。 作齋供。采製春葩。 藝蘭月令。 裁芭

蕉簾。 花關待人濃葩隱面。 洗敗葉。裝作春燈。 春夜出茶。薜露酒。 飲次

澆與海棠。扈酒。 簪花簇髮。倩郎分理。 書帶草。作同心結。 明月疏陰。長嘆

曲逕避殘絲。 回腰逐飛絮。 玉指撥山茶。教開。 閒二三月。廢罷女紅。

結丁香菴。供事神女。 執磁瓶。自灌合歡。 消渴吸香露。 歌扇斥遊蜂。 金

丸彈破簇萼。 侍兒分部司栽灌。 拈花瓣。盛相思淚。 嘲花結子太早。 惜

過牆枝。入他人手。 放蓮瓣。喚作小船。 修竹裏。別建文房。 攜銀燭。探竊脂

巢處。 紗厨內。懸胆瓶。 對鏡比花發妒。 上鞦韆。飛紅如雨。 行酒觸繁英

有罰。 唾香脂。染損紅心。 摹蘭竹影學畫。 青絲一縷。繫狂蜂。 除夜硃砂

染柏葉。 結束上探蓮船。 串金剛子念珠。 花祥瑞。禱郎中甲。 藏冰水製

五色菊。

(完)

跋

黎忠愍公明季來廣陵。時值吾邑鄭超宗先生作黃牡丹會于影園。忠愍製七

律十首。奪得狀頭。口口口先生評。抑何榮也。茲花底拾遺百五十餘條。約束芬芳。平章佳麗。誠可謂入名花隊以藏身。現美人身而說法者矣。心齋居士題。

卷一

集

補花底拾遺

歙縣張 潮山來著

嶺南黎美周先生。著花底拾遺百五十餘則。約束芬芳。平章佳麗。現美人身。而說法。入名花隊。以藏身。眞令人豔動心魂。香生齒頰。竊效顰于西子。同避世之東方。補其缺略。空慚狗欲續貂。仿厥體裁。或者蠅能附驥云爾。

百花生日。約鄰姬共祝。藏花瓣裝繡枕。紉菰。製小旛倩郎書字。戲以松針柳線爲郎製荷衣。聞雨聲。命侍兒爲花張蓋。選佳花彩蝶入繡譜。夏月以蕉葉代簟臥。席草坐。晨起吸花梢露。選古人咏花詩。自繡梅花帳。收柳絮作茵褥。數花鬢。剡蓮房作茗碗。出巧思作花下朱欄。共郎考訂花譜。戲學鳥語。採百花可入藥者。蓮瓣書佛偈。纖指剡蓮房。送郎口內。製花菹。握蓮子教郎射覆。製小詞鐫竹上。散花供佛。調丹青諸彩。色染菊蕊。薛濤箋自寫藝蘭月令。梧葉落取製爐灰。搗花汁染詩箋。桐葉學書。嗔鳥啄含桃。剪桐葉作弓鞋樣。約鄰姬鬪草。

花露和粉傳面。中秋夜。豔裝種鶯粟。製花謎。倩郎簪花。荷葉貯水盥。
纖指。屑香瓣。實錦囊。爲郎製踏青鞋。擷花釀酒。折垂柳作同心結。
洗桐。紛五色紗囊貯花種。製菊苗柳芽作茗。坐桐陰待月。囑郎命奚。
奴採紅葉。課婢灌花。花下晚粧。教鸚鵡百花詩。拜花神。囑郎攀桂。
花露與兒洗面。浣花。搗鳳仙花汁和粉傳面。噴水潤莓苔。鄭花蕊賺。
金魚。燈下位置花影。縛花毬。

(完)

十眉謠小引

古之美人以眉著者得四人焉曰莊姜曰卓文君曰張敞婦曰吳絳仙莊姜螭首蛾眉文君眉如遠山張敞爲婦畫眉絳仙特賜螺黛由今思之猶足令人心醉而魂消也然莊與卓質擅天生而張與吳兼資人力二者不知爲同爲異春秋之世管城子尙未生莊姜之眉自非畫者第不知文君當日亦復畫眉否漢梁冀妻孫壽作愁眉啼粧顰齒笑折腰步京都人咸爭效之其後卒以兆亂眉之所繫如此大丈夫苟不能干雲直上吐氣揚眉便須坐綠牕前與諸美人共相眉語當曉粧時日爲染螺子黛亦殊不惡而乃俱不可得唯日坐愁城中雙眉如結顰蹙不解亦何憊也西湖徐野君先生風流倜儻爲文士中白眉所著十眉十髻兩謠摹寫盡致點染生姿捧讀一過今人喜動眉宇手不忍釋乃知名士悅傾城良非虛言也先生著作頗富其雁樓集久已傳播藝林予生晚不獲登其堂而浮太白以介眉壽僅從遺集中觀其妙製耳前輩風流可復見耶心齋張潮撰

卷一

一

一

集

十眉謠附十髻謠

錢塘徐士俊野君著

一鴛鴦

鴛鴦飛。蕩漣漪。鴛鴦集。戢左翼。年幾二八。尙無良愁殺。阿儂眉際。兩鴛鴦。

二小山

春山雖小。能起雲頭。雙眉如許。能載閒愁。山若欲雨。眉亦應語。

三五岳

羣峯參差。五岳君之。秋水之紋。波不爲高山之峨峨。岳之圖可取。負彼眉之長。莫頻皺。

四三峯

海上望三山。縹緲生煙采。移作對面觀。光華照銀海。銀海竭。三峰滅。

五垂珠

六斛珠。買瑤姬。更加一斛餘。買此雙蛾眉。借問蛾眉誰與並。猶能照君前後十。

二乘

六月稜

不看眉。只看月。月宮斧痕修後缺。才向美人眉上列。

七分梢

畫山須畫雙髻峰。畫樹須畫雙丫叢。畫眉須畫雙剪峰。雙剪峰何可擬。前梅梢後燕尾。

八煙涵

眉。吾語汝。汝作煙涵。儂作煙視。廻身見郎。旋下簾。郎欲抱儂。若煙然。

九拂雲

夢游高唐觀。雲氣正當眉。曉風吹不斷。

十倒暈

黃者檀。綠者蛾。曉霞一片當心窩。對鏡綰約覆纖羅。問郎暈澹宜倒麼。

鳳髻周文王時一名步搖髻

有髮卷然。倒挂么鳳。儂欲吹簫。凌風飛動。

近香髻 秦始皇時

香之馥馥。雲之烏烏。自然天生。膏沐何須。

飛仙髻 王母降武帝時

飛仙飛仙。降于帝前。回首髻光。爲霧爲煙。

同心髻 漢元帝時

桃葉連根。髮亦如是。蘇小西陵。歌聲相似。

墮馬髻 梁冀妻

盤盤髥髻。墮馬風流。不及珠娘。輕身墜樓。

靈蛇髻 魏甄后

春蛇學書。靈蛇學髻。洛浦凌波。如龍飛去。

芙蓉髻 晉惠帝時

春山削出。明鏡看來。一道行光。花房乍開。

坐愁髻隋煬帝時

江北花榮。江南花歇。髮薄難梳。愁多易結。

反綰樂遊髻唐高祖時

樂遊原上。草軟如綿。婀娜鬟多。春風醉眠。

開掃粧髻唐貞元時

隨意粧成。是名開掃。枕畔釵橫。任君顛倒。

(完)

跋

美人粧飾古今異。何古人塗額以黃。畫眉以黛。額之黃殊不雅觀。今人廢之。良是。第不如黛之色淺深濃淡。何若大抵當如佛頭青。然古又有粉白黛綠之云。則是黛爲綠色。數寸之面。五色陸離。由今思之。亦殊近怪。豈古人司空見慣。遂覺其佳。而不復以爲異耶。噫。古之眉不可得而見矣。所可見者。今之眉耳。余意畫眉之墨。宜陳不宜新。陳則膠氣解也。畫眉之筆。宜短不宜長。短則與纖指相稱。且不致觸于鏡也。鄙見如此。安能起野君於九泉而質之心齋居士題。

閒情十二憺

莆田蘇士琨聖孚著

憺仙

夫世外奇緣。非絕奇人不能遇也。奇人猶或不遇矣。惟奇人不能遇。其奇乃爲眞奇緣。絕世堪傾倒耳。桂樹幽幽。毛衣自綠。花源半笑。曉帶桃腮。月滿仙壇。彩鸞乘而飄舉。風清藍水。元霜盡而不歸。此絕奇緣。塵土何以堪此。問之蘇郎。當在碧落飛行處乎。

憺達

夫禪中之事業。庸人領之。窘如囚拘。達士輒然。以爲青眉之內。遠山之前。皆神奇所變化也。非通身是寶。不足與於斯。奇之絕者。其東方生乎。長劍割肉。一何勇也。朶細君頤。又何甘也。吐故納新。妙如弄丸。又何快也。若老彭之形贅。奉倩之神傷。皆未達趣。安知其旨。故曰至情無情者。其東方生乎。

憺奇

夫怒松生寒于半天。驚峯拔舞于遼迴。男兒之奇若是矣。獨不見曲欄疎竹。玉韻瀟空。半水龍泉。虹光飄斗乎。此又奇之奇矣。古來女流奇俠如政姊韓娥。奇識如阮新李姊。奇趣如紅拂柳姬。奇骨如紅線輩。皆是奔天震地。鬥月驚雷。世界未落。雙眼長青。目以女流不可就目以勇流亦不可直是床頭捉刀。奇流無二。嗚呼。盡令此間逐塵漢。吐舌死矣。

懽俊

人言俊不傷道。夫黃埃易老。白日睡眠。秋色伊人。久在水中。但患不俊耳。何傷道之有。琴心三弄。引度凌雲。紅拂一枝。臨風舞怪。自爾神俊。翻飛難禁。目空千古。此時縱大聖人大菩薩大阿羅漢。止有眉宇作聲。微微快笑。何敢一吐舌其傍乎。是爲眞俊。可喜也。

懽才

文章之事。寸心千古。倘慧業不具。且亦徒然。豈意得于修蛾長腕間哉。嬌霞解語。掩映秋水之神。落筆生波。澹蕩春山之黛。既已含毫發付。自笑東風矣。千載

而下。猶令人顧慕徘徊不能已。況夫把臂露初之會。同嘯星晚之前者。其情景富何如哉。倘爾不信。疎暉斜倚。悠影憐人。半笑風前。獨無聊賴。試想流水一葉。胡笳數拍。謝家雪清。錦字月明。怎容爾不一叫一眉清矣。

懽色

以貌取人。失之子羽。神物奇醜。何必爲容。然出塵遠體。總係仙才。好德如好色。非慧男子不至是。長卿之病渴。陶令之閒情。豈欺我哉。洛妃乘霧。江浦佩明。遇猶不可得。況可得而不好也。

懽飲韻

宇宙之間。凡物皆有韻。況閨房之秀乎。雖然。韻固難也。飲韵自難。張京兆之飲。飲於眉者也。楊毫暉之飲。飲于聲者也。虬髯客之飲。飲于髮者也。張君瑞之飲。飲于琴者也。留仙台之飲。飲于裙者也。司馬長卿之飲。飲于詩文臉際者也。飲如數子。始爲知趣。爲當行家矣。傍肉爲歡。愁愁無味。此俗觀也。

懽憐賞

夫同調相憐。滄洲不遠。况夫明月共分。不勞千里者。而無可憐哉。玉淨花明。妍無停趣。憐賞者何一而足焉。歡則千花聳笑。其神孃也。悶則峨眉積雪。其神秋也。舞則明霞水拂。其神俊也。流連歌詠。則環佩天風。其神遠也。陽台片雨。儘足洗醒。湘水一泓。總傳佳思。小中見大。自是至理。非戲論也。古來如竹皇之憐舞。楚伯之憐悲。元機之憐夜。李郎之憐駿。謝公之憐絮。中郎之憐絃。皆真可憐而真善憐也。快絕千古矣。

懽快境

夫明月流杵。名花醉露。神有悅暢。何得莽然。豈可以解語花月。不煩標位哉。故德曜宣姜。宜置之泉石。助其幽也。虞英源女。應置之洞天。飄其爽也。大家逸調。頓之牙厨。謝韞高談。遲之錦帳。舞淨腕于風前。弄玉扈于霞上。位置既佳。神韵自絕。何得尋常閨閣間哉。

懽惜別

快心相晤。千古一夕。何堪言別。然別固不免也。惟有別而佳情吐矣。俊胆傾矣。

紅淚落而碧空悲矣。離恨搖而情霞變矣。白雲在天。山陵悠而自出。王孫青草。漳河絃而曉飛。辛清婉切。怨滿上流。素臆迴文。玉關反駿。雖是絕興。翻爲千古。快興何可少哉。

懽風流

古謂人論之至者。不風流不至也。瀟湘竹淚。風流之魁矣。輾轉琴瑟。風流之最矣。犢鼻共滌。風流之聖也。飛星排闥。風流之神也。馬飽姬來。風流之快也。何時何處。不足風流者。特恨無真風流耳。楊畔喜天女之禪。碧紗熟江南之夢。銀瓶汲水。解渴文園。清露作花。暢懷元度。風流豈異價乎。雖然。必具真風流。識風流骨風流才者。乃足當之。非是者。甯枯坐學太常。勿憎俗趣可也。

懽佐侍

夫世外嬌姿。類有競爽。巫湘標映。蔚而成奇。安可令芙蓉一枝。秋江自冷哉。細題隨侍。亦各有宜。品清者宜倩婢。晚霞之擁新月也。品幽者宜鬆婢。輕風之吹奇韻也。品麗者宜淡婢。海棠之玉簪也。品遠者宜逸婢。蓮花之荷葉也。品嚴者

宜快婢。松柏之春風也。品濃者宜疎婢。艷夏之薌澤也。品俏者宜通秀婢。秋霜之菊韻也。荀香何粉。迭笑蘭堂。暮雨朝陽。映人淡適。亦一也。快。 (完)

閒情十二懶跋

是亦悅容編之類。而風期散朗。自見雅人深致。閒情一賦。寄托遙深。正不得輒以白璧微瑕。訾陶靖節也。乙丑仲春。震澤楊復吉識。

黛史

句曲張 芳菊人著

臨川章子大力。于坐睡食酒香五者。有疏焉。謂之曰史。猶雅言或佐之史也。坐睡食酒。皆有香以生其清微。而常于坐爲暱。坐獨事也。除神之庭。神將自明。餘三非能以獨爲事也。自他有耀。居一于對。居一于旁。居一于偶。值也。對言室也。旁言媵也。偶值言伎也。邇有患焉。多有患焉。邇則媒多。則落。媒敗吾守。落去吾事也。是故有取于黛。黛以遠爲其義者也。予故戲續一疏曰黛史。其目有六。曰厚別。曰養麗。曰靜娛。曰一儀。曰鍊色。曰禪通。男女之遇。有賓道焉。禮文繾綣。重之固之。香合燭出。取于昏夜。事如寐矣。黛則以明相見也。珠玉以心之。琴瑟以好之。朝日夕月以潔齊之。致恭于匱饋之間。而屏昵于裳帶之末。室事之所辦也。家事之所成也。不相辨也。而相辨也。是曰厚別。

倩以爲巧。盼以爲美。詩詠碩人。曲而盡矣。倩之巧盡。或傳諸聲。盼之美盡。或寓

諸容聲有逞焉。容有佚焉。巧美之得全者或寡矣。聖人惡其盡也。罕譬諸繪事。繪事猶人爲也。黨則幾于天事矣。倩盼之上。不示其巧。不見其美。而美巧之質。恒藉之以相全。其惟眉乎。眉之居首。居質于空有之間。而著文于髮頤之際。所謂無用之地也。閑靚而明惠者。善藏于無用。非倩與盼之所可盡。是故雅步以安目也。善睞以安眉也。眉目之間。而首之所以致清也。四末之所以致端也。喻其端清。不言而得矣。是曰養麗。

人生無歡。歡如家室。其頃焉耳。童穉之昵。不知其莊。農戍之睽。不知其厚。富貴之靡。不知其淡。貧老之瘁。不知其幽。今夫面首身之上也。手與足身之四末也。緩其結束。四末散弛。無有上也。但橫陳耳。一棄離之。其鄙滋甚。由是髡填以爲觀。瑳齒丹脣。形其豔。桂裳以爲粲。秀腰修領。見其都。若是者。猶常均之質也。今夫黨之爲娛也。春烟可懷。則歛裳修褰。夏草未歇。則約帶倚風。閑軒秋爽。則角茗讐書。曲室冬清。則然燈弄翰。妝台不借于鉛調。丈室無妨于花散也。故京兆之臙。可以由房。可以節色。不謂之昵。文君之遠。可以當壚。可以乘駟。不謂之靡。

是曰靜娛。

喜顰語默。黛之四儀。心止於所。可以有儀矣。故喜之守黛也。審顰之守黛也。審語默之守黛也。審喧景含蕙。黛之喜也。微雲拂漢。黛之顰也。朱絃拂袖。黛之語也。清月翳林。黛之默也。喜顰語默。無作也。而感諸黛。黛無作也。而感諸近侍。感諸同類。感諸君子矣。故息媯不言。強宰銷其蠱術。李妹善對。甯姬戡其囂風。是曰一儀。

夫圭窻之息。非有却扇之姿也。縫裳之嬪。非有出鏡之豔也。蹇修難託。自成其廣永矣。象服未施。自見其清揚矣。雖然。此猶以黛爲黛也。房敖之由其質彌端。其文彌婉。徐淑之裁翰。蘇蕙之陳圖。以手爲黛也。越人歌其山木。謝女詠其白團。以口爲黛也。雖然。此猶近于黛者之黛也。夫晦朔相望。以爲明者也。澤山無心。以爲咸者也。無所怠于其終禮。以爲之前矣。無所怨于其末恩。以爲之裏矣。恩禮不匱。無易悴之齡。是曰鍊色。

驚嶺之言。有色諸天。兼乎粗妙。形墜即欲。情超即禪。分界有三。本一境耳。如登

山然。曉則堆藍。曛則柴紫。當其漸遠。蒼蒼橫翠。已而遙辨。一抹雙螺。邈若雲霄。不知同在地上也。心無正音。宛成流濫。彼以故意。此以新姿。懟已生矣。薄已成矣。是故黛之爲質。僅有而已。有亦無也。何從執哉。知有之無。是曰禪通。

往予有食色觀刻之楚中海內見者。第以爲楚夾精言耳。意者觀與食色。猶二也。今復拈黛史。夫彼已不啻有雙眸觀我矣。若之何如馳而不知止也。子瞻云。不識廬山真面目。只緣身在此山中。以視解人。定不河漢。（完）

小星志

秣陵丁雄飛菡生著

江寧胡其毅致果刪訂本

易六五貫魚以宮人寵無不利。

詩。嘒彼小星。三五在東。肅肅宵征。夙夜在公。實命不同。嘒彼小星。維參與昴。

肅肅宵征。抱衾與裯。實命不猶。

衆妾進御於君不敢當夕見星而往見星而還因所見以起興言其所以如此者由於所賦

之分不同於貴者是以深以得御於君爲夫人之惠而不敢致怨於往來之勤也

禮行役以婦人。疏曰婦人能養人故許自隨

魏表。魏淮陽王孝友表曰。古諸侯娶九女。士有一妻二妾。晉令王侯官品一至

九。置妾各有數。所以陰教聿修。繼嗣有廣。而聖朝忽棄此數。將相多尙公主。王

侯亦娶后族。故無妾媵。習以爲常。婦人多幸。生逢今世。舉朝略是無妾。天下殆

皆一妻。設令人強志廣娶。則家道離索。身事迍邐。內外親知。共相嗤怪。凡今之

人。通無準節。父母嫁女。則教之以妬。姑姊逢迎。必相勸以忌。持制夫爲婦德。以

能妬爲女工。自云受人欺。畏彼笑我。王公猶自一心。以下何敢二意。夫妬忌之

心生則妻妾之禮廢。妻妾之禮廢則奸淫之兆興。臣之所以毒恨者也。請以王公第一品娶八通妻。以備九女稱事。二品備七。三品四品備五。五品六品則一妻二妾。限以一周。悉令充數。不充數。及待妾非禮。使妻妒。加捶撻。免所居官。其妻無子。不娶妾。斯則自絕。無以血食祖父。請科不孝之罪。離遣其妻。按律七出條內一曰

無子一曰妬

卿大夫不可無侍妾。此皆天理人情之至。不可以褻行目之也。聖賢之同于凡夫。在此。儒行之別於二氏。亦在此。然而漁色實士人之大戒也。與其漁於色也。孰與無二色。勢必不能無二。而念亦難於頓絕。則有品節限制之權焉。按禮古者五等諸侯。皆有八妾。降及于士。則一妻一妾。國朝之制。因之。藩國親王額設支俸之妾八人。郡王不得過四人。鎮奉國將軍不得過三人。則官僚當從郡王將軍之例。無疑也。士即大貴。妾不得踰三四人。侍婢不嫌倍之。庶人雖擁素封之業。置二妾猶不大違於禮。內則曰子有二妾。父母愛一人焉。子愛一人焉。是也。否則踰分矣。媵婢則可量寬其額。而過多亦導淫之囿也。

至於弱冠治經之士。褐未及釋。而一妻能治內事。則置妾乃荒業之端。待壯年艱嗣而議納妾。未晚也。媵婢則通房之所必須。而亦以少爲貴矣。然愚猶以爲傳家之道。子孫果能遠色貴德。尙矣。設有好佚遊好晏樂之氣質。則寧聽其漁於妾婢。而務禁其漁於外色。爲其上干國憲。而下比羣奸。此喪身忘家之本也。

儀禮名夫爲君。名正室爲女。君妾猶稱曰側室。婢之有子者曰婢妾。卽側室亦不得稱矣。故夫之臨妾也。以君道爲夫道。但有侍立而無侍坐。妻之臨妾也。以母道。衆姊道。與夫同席不命坐。與夫別席亦命坐。妾與子婦相參承。夫恒貴子婦而賤妾。以子婦有承桃之責。而妾則不祔於廟者也。妻則上妾而下子婦。以妾任事。夫之役。而子婦則事我者也。故妾侍夫側。嘗爲子婦作引導。侍妻側。則女若婦俱當以肩隨之體讓。妾亦有不必要者。宗子婦之長於父妾者是也。婢妾又下妾一等。而不得與嫡子之婦同班矣。蓋婢有子而附名於妾。仍婢也。夫亦以婢臨之而已。妻則爲夫爲子。當稍優其待而進之羣婢之上。然亦班於妾

後而不得如妾之命坐也。飲食寢處則當使之越羣婢班焉。卽無子而久御於夫者亦與之相上下可也。大概妻之待婢妾與夫待妾之體同。婢妾之待妾與妾待妻之體亦同。而先後進之間復有辨。媵婢先妾而進。又或先妾得子。雖壓於女君。不得如妾之同坐席隅。而聚於側室中。亦可以肩隨之體分左右。但當讓妾一肩。若後妾而進。則雖有子而難與妾比肩矣。妾有多體。而所生之子無貳體。子事所生之母。則不得與嫡母同體。妾與婢妾之臨其子也。亦不得與嫡母同。蓋祭食母之體於其間。以避尊也。古人寢榻之處。非妾不與。故雖多子亦不廢妾。意固以妾者接也。我可褻視之耳。

禮昏義。天子立六宮。三夫人。九嬪。二十七世婦。八十一御妻。鄭康成云。后當一夕。三夫人當一夕。九嬪當一夕。二十七世婦當三夕。八十一御妻當九夕。十有五日而周。梁國子博士清河崔恩撰三禮義宗。有后夫人進御之說。凡后夫人進御。自下而上十五日。徧象月初漸進至甚。法陰道也。婦人陰道晦明是其

所忌。故古之君人者。不以月晦及望御於內。晦者陰盛。望者爭明。故人君尤慎之。春秋傳曰。晦淫惑疾。明淫心疾。以辟六氣。故不從月之始。但放月之生耳。妾御八十一人。爲九夕。世婦二十七人。爲三夕。九嬪爲一夕。三夫人爲一夕。凡十四夕。后當一夕。爲十五夕。明十六夕。則后復御而下。亦放月以下漸就於微也。諸侯之御。則五日一遍。亦從下始。漸至於盛。其御則從姪娣而迭爲之。御凡姪娣六人。當三夕。二媵當一夕。凡四夕。夫人專一夕。爲五。故五日而遍。至六日。則還從夫人。如后之法。卿大夫有妾者。二妾共一夕。內子專一夕。士有妾者。但不得專夕而已。妻則專夕。凡七嬪以下。女御以上。未滿五十者。悉皆進御。五十則止。后及夫人。不入此例。五十猶御。故內則云。妾年未滿五十者。必與五日之御。則知五十之妾。不得御矣。卿大夫士妻進御之法。亦如此也。金生云。御妻妾有術。此語似非實。是蓋惟誠動物。妻妾間豈用術之地。然婦人女子。見偏性執。非假術以御之。不可有術。然後駕御安妥。歸於和洽。究竟亦是誠而已。一人處內不和。唐一菴勸之居外。有老僕問何故居外便得。和一菴

曰。其病根在此。情狎則易遷。凡人之情。令其可繼。一時用得。多後便不續。久則變。變則通。所以自防者。須吝情。吝情者。須疎迹。

夫之於妾。何以不言服。蓋惟情有輕重。難以預定。在人以義起之耳。甘泉先生爲蒯氏服九月。以其代妻事母久而慈子有成也。後之服妾者。擬之。禮記云。士妾有子而爲之總。無子則已。

胭脂紀事

香山伍端龍國開著

伍子病酒五羊。二客闖門。拉赴珠江之遊。舟中紅粧數人。每坐輒簇伍子。中一姬。口脂最鮮。伍子問曰。脂有法乎。曰。法則有之。而不可傳也。酒半酣。捨舟就岸。射骰子長林之下。伍子連負四五觥。罷去。散步亂葉中。見紙一角。拾而展之。則古本書也。其書葉心名紅暉閣逸攷。卽言胭脂事也。其文曰。秦子都。初名碧玉。汾陰人。晉禽吏秦植之女也。年十三。以冶色箸。人呼爲子都。子都曾遇道人至其家。拊之曰。此女不類人間。授以渥丹之法。使子都自汲汾水。注古鼎烹之。水既沸。道人袖出物少許。點沸湯中。忽嫋嫋凝紫烟。子都拂之。烟愈重。滿鼎作紫金色。子都因取綿絮覆烟上。烟盡入絮。遂藏以爲膏脣之飾。道人既去。子都乃時時集煙所。居不論遠近。咸就子都求紫烟。綿子都性嬾。散年二十不嫁人。以鬻胭脂供父母。又不耐水烹煎。凡求者止以齒嚼綿汁少許。各持歸。隨綿多寡。悉是紫煙之色。于是千里內外女子。俱來就子都呼胭脂師。後子都既老。面猶

桃花色。一夕水冲其廬。子都化去。不知所之。後人弗得其法。但向汾流汲水漬綿漬不成。則熾炭候其水盡。又不成。有黠女子曰。胭脂男女之艷色也。則擇日與男子交而後製之。終不成。乃相與立廟于汾水上。加子都號。爲紫府胭脂之神。每歲三月八月。諸女郎着紫衣。或紫裙。紫帶。紫冠。簪紫。髻用皆紫。設祭於廟。歌紫府之歌。以娛神。神來則有紫氣出於牲上。尋飛颺滿空。須臾牲醴花果盡變紫色。祭者以是爲驗。又各鑄小神像。事於私室。欲製胭脂。則先斫取桃枝煎水。遍洒屋兩楹。又斲桃枝寸許數千條。圍挿牆陰。禁雞犬勿使鳴吠。貢一盃紫琉璃於神前。禮拜之。又以桃葉自然汁刮其脣。少出血。乃將汾水置鼎內。遠者則用井華水。隨便點以紫色花。別沸湯溫之。長跪以待。稍瞑目。則化爲胭脂矣。然後入綿什襲藏之。其色如天半朝霞。後世胭脂之法。始於此也。伍子讀罷。眉舞色飛。自念紅暉閣一書。素不經見。其事又素所不聞。是時同舟有以博雅聞者。俱茫然不知。獨先時鮮脣一姬曰。儂固自有法也。欲製胭脂。先祭胭脂神。伍子曰。胭脂神爲誰。曰。胭脂神相傳出西川。卽紫姑也。祭之日。每歲正月十五。

至三月春盡日以前。連日祭之。先採新花及楊柳葉。仍煮桃葉湯滌器。懸一鏡以伺神來。來必於夜。燈光中視鏡有過影。卽禮拜之。旋取胭脂綿百二十章。逼以沸湯。令盡出其汁。又用赤金箔如胭脂數。眞珠末四分。大紅珊瑚末四分。血珀末三分。梅花冰片一分。和金箔擣爲泥。將所逼胭脂汁。入精細磁碗。分作二十分。又將金箔等。分作二十分。入胭脂汁內。攪勻置烈日下。候其稠。乃取胭脂綿縮取其汁。曬之極乾。用淨竹器盛之。下設冷泉水。水中點以時花之極芬者。一二朶于胭脂。移就朗月以吸月華。月初七至十四五。望後之月。雖佳勿取。滿八九日。又置烈日曬極乾。然後以絹素封固。次第取用。伍子曰。望後月卽不用者何。姬曰。望前乃生月。露下多成珠。物露之潤。其氣暖能發顏色。望後乃死月。露下少成珠。物露之始潤終枯。其氣澀不發顏色。伍子于是爽然起曰。合古今之說胭脂事。其盡于此乎。紅暉閣不見于書林。吾幸覩其殘缺。又得令製以暢其旨。一物雖微。其亦有天幸也。此法傳于閨閣麗事。不爲無功。獨惜我輩方在塵勞中。白駒赤電。冉冉悞人。況乎道德文章。未有涯涘。晝則竭胆力以赴精華。

暮則盡形容以供蕉萃。雖有秦碧玉在前。紫衣紫冠紛紜侍側。其奈潘郎之鬢何哉。舟興未終。搦管紀事。不醉死不休矣。

陳子明曰。胭脂卽燕支。又作焉支。又作闕氏。地名。花名。亦人名。古詩失我焉支山。使我嫁娶無顏色。唐宋朝有口脂面藥之賜。其法實出秦弄玉粉丹。偕簫史飛昇。秦子都想是弄玉後身。故名碧玉。非國開好事。不能盡此狡獪。衛嬾仙曰。唐天寶宮中。下紅雨。太真命宮奴各以碗杓承之。用染。自有天然色。艷千百年。後惜未有得以饋面者。今倩國開韵筆。傳出紫烟法。于人間。嬾嬛惜逸。此則余搜奇補之。

附記。女星旁有小星。名始影。婦女夏至夜候祭之。得好顏色。子都爲胭脂神。綠牕私室。亦當塑像配享。

胭脂記事跋

髻鬟有品粧台。有記泊平黛史眉。謠抽秘騁妍。更無微不入。惟是膏脣丹飾。尙少志述金閨缺典。應爲之首屈一指。得此記事。香艷彌絕。僕本恨人。亦不禁眉。

飛色舞丙申初秋震澤楊復古識

卷一

集

十美詞紀叙

偶于拾字僧筐中檢得一帙雖紙頁破碎而字跡尙未模糊且甚嫵媚中載小序一小傳十傳後各綴以詞題其首曰酒城漁叟著復有鄒樞字貫衡及松陵鄒氏家藏印章則鄒生者固吾邑人也中有陳圓圓一傳則與圓圓同時大約生于勝國天啟年間序末自著云辛酉初夏書則此書成于康熙二十年也觀其興致清狂文詞雅麗其爲風流才子無疑獨異旣少負雋才一時名盛卽事業未著而詩文可傳何近在同邑且未有知其姓字也時朝廷特開鴻博之科一時名士俱與其列以彼其才何獨見遺豈淡泊相遭放浪自得久矣置功名于度外乎且玩其詞意卽多感慨之情並無窮愁之語狎妓徵歌尋花問柳則家之素封可知生平著作要非無力付梓者何湮沒不彰一至于此因思天下之大人才何限顯揚什一淪落什九彰著什一湮沒什九有唐賜方干等數百人孤魂及第吾恐尙有抱孫山之泣者耳安得上天雨露大地作杯澆盡古今才子之墳則鄒生者亦得沾其餘瀝焉更有不可解者名士必悅傾城而佳

人難逢才子而若人生平奇遇不一而足巧蝴蝶天然其妻也如意天然其妾也年相若才相等使屋貯二嬌遊多名妓嘲風弄月惜玉憐香豈非千古福人千古快事乃一則貪利而賣一則母怒而遣遂以千載奇逢化爲千載恨事雖迂腐頭巾必不出此豈從來薄倖多出風流才子乎彼鄒生者幸而不解相思尙得於詩酒場歌舞隊縱橫徜徉終其餘生而所謂巧蝴蝶如意者流落天涯旋遭兵火竟不知所終矣可不惜哉因將原本手跡收藏別錄一通爲副其末一頁爲琵琶婦朱增傳詞曰瀟湘夜雨已汗漫破壞不可復讀姑闕之不以已意增補云己未仲冬同邑楊凌霄漫序

十美詞紀

吳江鄒 樞貫衡著

詠王獻之桃葉之歌。吟蘇子瞻柳綿之句。玉局詞人。猶迷水盼。金蓮學士。尙
冒蘭情。七賢亭琴酒宵陳。百美圖嬋娟曉起。霞粧星靨。攬菱鏡之春雲。金鳳
銀鵝。試舞衣之秋髮。翡翠樓前。競解紅鸞之珮。鴛鴦渚畔。時抽絳樹之簪。至
若遇花奴於小曲。譽重憐憐。逢蕊女於幽坊。名高盼盼。穉香箋而咏柳。酌粉
筆以題梅。謝秋娘之雅調。不肯送客淇間。霍小玉之風情。豈願數錢河上。欲
脫煙花之藉。思依龍鳳之賓。無何而梁園榛莽。金谷灰塵。烏衣燕子。飛入遠
近人家。凝碧優伶。散往尋常巷陌。宜春院風流雲散。猶存李白酒樓。走馬台
燼滅煙消。誰識盧仝茶館。文簫翠笛。俱歸山水清音。艷曲濃歌。都付漁樵新
話。揀殘編而書農譜。執禿管而寫牛經。瞻星望氣。誰爲識寶之英賢。擲果分
綃。翻憶憐才之窈窕。展三冬而抒采。續藻云乎哉。列十美以填詞。感慨係之
矣。辛酉初夏酒城漁叟自序

巧蝴蝶

余在襁褓卽外祖母撫育。十二歲外祖母憐余深夜讀書。無有伴者。乃命媒婆莊嫗以三十金買得徐氏一女。年十二。眉目秀麗如畫。以七夕來。呼爲阿巧。數日後。巧垂泣。告余母曰。我非徐氏女。乃某族之某房女也。余母大駭。卽命莊嫗召其母至。曰。我與汝家係至戚。豈可爲此事。若論中表。我與汝兄弟也。令愛與我之子女輩亦兄弟。遂備酒同拜。皆以兄弟相叙。巧敏慧。詩詞寓目。三遍卽熟。好畫蝴蝶。若有滴水在案。卽隨水畫蝴蝶形。閒則研朱砂。濾青花粉。買白箋描畫蝴蝶。到後園撲取活者。置室中。掩牕戶。以扇逐之。觀其飛舞之態。於是畫愈工。余母常以素綃製新樣裙。命之畫服之。風吹裙帶。蝶若翻舞。見者嘆絕。呼爲巧蝴蝶。一日與侍女海棠同宿。余作歌嘲之曰。巧蝴蝶。作盡風流業。若到花叢伴海棠。花神定有勾魂帖。巧因自嘲曰。巧蝴蝶。欲畫心終怯。高飛難近寶釵旁。低飛且隱湘裙摺。嗣後更不復畫。會東城伍學憲有公子字存敬者。中年少嗣。欲娶偏室。先於橫塘綵雲庄上。構造鴛鴦樓。雕甍畫棟。寫瀟湘綠綺牕。琪花玉

樹交映前後。以見金屋貯嬌之意。然後謁余父求巧。以二百金爲聘。余母厚備粧奩。如親生者。去後慰問不絕。曾以柿蒂綾一方。作小楷。備叙姊弟相依之義。風雨聯吟之情。後附意難忘詞三首。外有水晶圖書二枚。金陵色箋一匣。西洋白苾布一疋。水沉香三兩。遺余。余偏示兄弟。皆爲慘然。余以南京花綯一端。犀簪一枝。取桃花淺色絹。作小楷述舊意。和其詞韵答之。甲申乙酉歲。余兄弟避亂於鄉。明年歸城而音問疎矣。

借梁園金谷培瓊肌。珠作唾玉爲啼。道囊堂女婢。聰明侍鄭。槐扉根葉。窈窕名崔。蝶譜時窺。鳳毫輕點。巧奪滕王。孰與齊粉字。吟梅和雪。寫碧牋。咏柳帶煙題。曾共湘簾吹絮。倚簫選夢。多少事。說着眉低。青嶂隔。紺園迷。釭花夜笑。往恨重題。鵲渚遺簪。淚辭春閣。鳳樓鑲珮。影伴香溪。鴻音憑紙待尋踪。南浦橫塘待渡。踏遍雲堤。春風濃娜

如意

余年十五。外祖母以二十五金買一女。名如意。年十四。色態俱絕。外祖母於寢

室旁闢一小軒。俾余夜誦。女洗硯擁書。拂几掃榻。瑩潔一塵不到。余甚喜之。如是者一年。余偶於書中得西廂。有紅硃評點。余笥中有花間集。亦以硃筆批閱。余疑此處更無人到。出自誰手。乃呼女問之。女笑不答。余曰。此必汝所爲。吾觀汝。非尋常女也。曾讀書否。女曰。我南城織戶。陸氏女。七歲鬻於顧氏家。主憐我聰穎。命我入館伴讀。主母延女師訓諸姑。師姓沈。嘉興秀水人。工詩詞。盡心教我。以故詩詞頗曉。余曰。何又來此。女曰。主母以我長成。恐家主見留。乘家主赴杭。立命陳姬轉鬻於此。但家主恩深。不得一辭爲恨耳。乃嗚咽下。余因檢其篋中得詞。調生查子。詞云。粧罷倦臨帷。燕語鶯聲寂。誰與伴香。篋一卷。花間集。瑣細製芙蓉。旖旎薰安息。枉自足風流。沒個人憐惜。余笑之。含羞索去。及余十六歲。秋夜將半。酒微酣。呼女曰。我欲爲西江月詞。汝爲我聯去。因指燈曰。金粟初垂一穗。女卽曰。銅壺已報三更。余曰。梅花繡帳影搖燈。女曰。可是芳魂未定。聯未畢。外祖母以夜深催寢。女去。余亦睡。從此吟咏。或詩或詞。幾於盈篋。余長兄一日潛至余寢所。啓篋一見袖去。洩之於母。母大怒。呼余責曰。我望汝讀書。

汝但爲詩詞。狎昵奴婢。乃立命莊姬遣女去。適有杭宦娶妾許之。女臨別更無一言。惟以繡花汗巾。挽結數十。擲我而去。余悽惋至今。不能去懷。

紗牕夢未醒。簫聲斷。遙憶玉嬋娟。記美髮未齊。嫩鴉初握。步蓮堪印。小鳳新彎。銷魂處。流波傳細語。低翠掠煙鬟。薛氏校書。芙蓉養帛。崔家錄事。芝髓封編。草蕙蘭佳句。相鳴和巧。樣卵色魚箋。誰是多才情種。我見猶憐。嘆輕鴻甫就。銀屏生暖。彩鸞旋去。繡榻重寒。多少愁霜悲火。頭上心前。內家嬌。

陳圓

陳圓者。女優也。少聰慧。色娟秀。好梳倭墮髻。纖柔婉轉。就之如啼。演西廂。扮貼旦。紅娘脚色。體態傾靡。說白便巧。曲盡蕭寺當年情緒。常在予家演劇。留連不去。後爲田皇親。以二千金。酌其母。挈去京師。聞又屬之某王。寵冠後宮。入滇南終焉。

濃點啼眉。低梳墜髻。聲驟平康。苔翠氍毹。花紅錦毯。趁拍舞霓裳。雙文遺譜。風流誰解。卿能巧遞溫涼。香犀挽生綃。淡束。幾疑不是富場。星回斗轉。芳

筵已散。倦餘嬌。凭牙牀。玉版填詞。瓊簫和曲。粉脂尙殢紗牕。鈿車催去。燕台
程遠。鼓聲進。譟漁陽。風塵老。蠻烟遠隔。信音渺茫。永遇樂

卜賽

卜賽。金陵樂部伎也。工詩。好畫蘭。寓虎邱山塘白公堤側。幕而邀之者。香車畫
舫。不絕於道。常以金陵十竹齋小花箋。閨門白面圓筵。畫蘭邀余題詩。余信筆
題就。頗愜其意。每以十竹齋硃砂印色。及水沉香等贈余。不好華飾。不輕與人
狎。似良家婦。後爲杭宦取去。生一子。聞已爲顯宦矣。

清剪冰華。香團雪彩。淡絕秋娘風度。青粉牆頭。門對白堤雲樹。開曉幕。茉莉
來時。臨涼檻。木瓜馨處。展鵝箋。輕掃叢蘭。白瓷斟茗。篆烟午。堪憐江夢未
杳。曾草湘筵麗句。欣附芳譜。擬結同心。又值賦驪情苦。空撇下。萬卷霞綃。覓
西樓一塘春雨。問何年重見風流。小牕深夜語。綺羅香

沙才

沙才者。金陵歌院伎。家桃葉渡。風致淡雅。工詩。余赴南關。曾至其室。見其小軒

中位置花石。儿上有自評唐詩。及花間集。丹黃雜采。不忍釋手。後徙至蘇。寓虎邱山塘。常以閨門雲母箋。裁斗方吟小令。作蠅頭楷。贈余索和。余取宣德帑。以碎硃研粉。研光賦詩。一半兒十首答之。喜甚。藏之金陵紫檀鈿盒中。每見出。以示余。吟咏不置。余家每有小飲。必招之。彼必辭他客而來。後金陵院樂中有侵其舊居者。姥載女歸故曲。遂不復至蘇矣。

相台錄事。韋曲司書。仙藻憑纖手。冷金箋。削。魏毫嫩。常伴翰林千首。碧衫唾皺。早看盡閨門楊柳。賦小詞。題徧鮫綃。滿路颺香蕙。何意憐才。贈玖。寫回文。短幅春情先逗。微波暗溜。相憐處。爲我客前辭酒。傍奩未久。又鼓棹石城渡口。想到時。懶唱桃根。人似黃花瘦。解語花

梁昭

梁昭。吳門妓也。姿色絕麗。酒微酣。兩頰紅暈。望之如桃花士女。時吳門有徐六度曲。僉愛之。撥阮。汪君品玉簫。管伍吹管子。爲歌壇絕頂。昭師事徐六。學度曲。不逾年。精妙反過於徐。諸樂中。惟管子合曲最和協。而管伍之管。其細如縷。昭

動口簫管稍低於肉。聽之若只知有肉。而不知有簫管也者。而簫管精蘊。暗行於肉之中。偷聲換字。令聽者魂消意盡。虎邱中秋夜。勝會畢集。若昭等不來。皆以此夕爲虛度。後適一錢姓者。錢以事繫獄將死。昭殉身以報。投繯於尼巷。時人皆稱其烈焉。

荳蔻衣香。芙蓉笑譜。小立春風門巷。蜻蜓碧淺。魚子紅深。可體縠紋三兩。戶外亂擁雕輪。陪宴蘭皋。繫舟湖上。把瓊簫漫品錦箏微撥。遏雲聲響。還自結顧曲周郎。哀絲豪竹。心力盡消歌唱。誰知燕燕。不信鶯鶯。烈骨竟藏鴛帳。思守藁砧。又因金谷摧殘。墜樓悲壯。女丈夫櫬在吳門。堪與要離同葬。惜餘

春慢

李蓮

李蓮。吳門妓也。姿色纖麗。少有渴病。年十九。以患熱不出見客。常以小札招呂湘烟及余至其家。蓮靚粧艷服。迎坐小軒。設餚饌精美。行酒政遞花催板。竟夜無倦容。撥絃索唱西廂草橋驚夢。歌徹首尾。宛轉瀏亮。媽憐惜。不使之畢。而蓮

不顧也。是歲秋復招我二人。見其面龐消減。香腮印紅。仍具酒垂淚而言曰。我病已久。向之與君盡歡者。勉力以報知心。故不覺其憊也。今則不能矣。請君一訣。幸毋悲切。於是取絃索。歌新水令闋。氣短而止。持袂嗚咽不勝。逾數日逝矣。予作招商曲以挽之。湘烟賻之甚厚。至今言及猶悵悵云。

鴛樹凝愁。珠樓墮影。慘慘啼紅幽夢。扇冷桃花。把香車誰控。掩坊曲常自瓊梳懶掠。粉梳梅鈿膠凍。單鵲離鸞語。此生休弄。憶芳筵曾受憐憐重。扶衰體笑解春風韞。勉強撥施搗箏。苦霜颼吹送。葬西阮。近在眞娘塚。簫聲斷。零落歌紉鳳。問誰念小玉情眞。賦招魂是宋。拜星月慢

朱素

朱素者。北濠名妓也。色調稱絕。好酒。然不遇知心不飲也。余常結俠友數人。爲連夜飲。時有張孟恭。劉默生。呂湘烟。陸森玉等。而素亦與焉。素愛惠山雪酒。每飲必瓷壺屢易。坐客或有倦睡受罰者。而素卓然無惰容。後隨媽至杭。有李生往天竺遇素於湖心亭。素歛李生至家。備詢余等數人。李生歸述。蓋不勝欷歔。

云。

蛟宮一縷冰絲影。亭亭幻成嬌倩。梨夢方縈。梅粧初洗。迎入宜春歌院。相逢未晚。正茂苑新鶯。白隄清管。羯鼓催樽。竹林頽玉笑稽阮。雙紅豪思誰比。酒壇臨未久。離袂旋判。南內雲痕。西湖雨蹟。暗把吳綃偷染。零箏斷扇。念影伴無多。璧沉珠掩。欲賦閒愁。未吟先意。懶齊天樂。

羅節

羅節。金閨女優也。爲旦。色柔婉絕倫。媽以其年漸長。思得一富家兒爲破瓜計。節曰。我爲名優。嗣後以所得者。酌母正多。我終身事母。幸勿預。一日。節在余家演劇。卸杏色外衫於衣桁。余見其衣帶上繫小紫香囊。內有琥珀墜。素綃半幅。上書細字。辭義俱不可解。忙向余索去。自是年餘。節忽不見。媽徧求不得。思想成病。半載後。媽忽不見。方知其綃上所書密約也。珀墜贄物也。節之去。踐盟也。媽亦去。迎養也。節亦青樓中之異人矣。

縱流溫傍玉。評不到此真真。看鳳曲鶯喉。鳩驚燕舞。態盡花茵。步幄珊珊暗。

出似巫峯墜下一絲雲。料想蜂狂蝶驟。自應無處藏春。誰知歛恨與收欣。却早乞閒身。看仙杼梭霞。芳屏畫草。願事情人。蘭棹五湖歸去。迓慈幃。猶念舊時恩。鑲住花心柳性。莫教飄蕩風塵。木蘭花慢

題詞

樊舟附客

挑燈拂拭讀殘編。想見風流美少年。伴讀女中稱學士。締交院裏號書仙。焚香煮茗聯新句。妙舞清歌醉綺筵。莫道才人鮮遇合。如君何必怨蒼天。雲散風流未幾時。可憐姓氏已無知。美人題贈胭脂冷。才子文章錦繡迷。當日爭籠書壁句。而今誰唱定情詩。筆精墨妙長流落。拾得殘編費夢思。
又

琴川姪均


清詞麗句僅遺編。湮沒荒江歷百年。當日不知有柳七。今朝始識是坡仙。梨花同夢歸深院。桃葉行歌醉綺筵。回首昔時豪興處。埋名何必問蒼天。才華應自冠當時。遇合風流人共知。芍藥盈篇帛上裊。葡萄滿幅望中迷。聯吟繡閣填新曲。伴讀書齋製小詩。韵事却歸何處也。那堪千古繫人思。

十美詞紀跋

(完)

缺憾世界。可憾實繁。每讀非烟春夢諸傳記。趣於邑者累日。茫茫千古。何處
淚痕哉。天若有情天亦老。月如無恨月常圓。十美詞成。吾知離恨天中。又增一
重公案矣。甲午夏日同邑楊復古識





一集

H9
1737
1475
v.2

香艷叢書

一集卷二

悅容編

長洲衛泳懶仙訂

情之一字。可以生而死。可以死而生。故凡忠臣孝子。義士節婦。莫非大有情。人。顧丈夫不遇知己。滿腔真情。欲付之名節事功。而無所用。不得不鍾情于尤物。以寄其牢騷憤懣之懷。至婦人女子一段。不可磨滅之真。亦惟寄之以色事人一道。昔云士爲知己死。女爲悅己容。每感斯言。大抵女子好醜無定容。惟人取悅。悅之至而容亦至。衆人亦收國士之享。雖然。悅容者寄也。編悅容者寄所寄也。使索我以真。則余且爲扁舟五湖人矣。豈獨向空山續禪火哉。夫不身履其境而摹其事。調停愛護。欸則欲周。詞旨欲暢。設非曲解其情。了不可得。正如高唐一夢。想像自真。然猶不敢自匿。用以公之好事。爲閨中清玩之秘書。以見人生樂事。不必諱言帷房。庶女子有情。不致埋沒云爾。



隨緣

天地清淑之氣。金莖玉露。萃爲閨房。遇之者若前世。若夢中。瑟鳴鐵躍。劍合龍飛。一切關河歲月。都不能間隔。然非奇緣不遇。必欲得此麗容。而後加意。是猶謂秦漢以後無文。唐以外無詩也。要以隨其所遇。近而取之。則有其樂。而無其累。如面皆芙蓉。何必文君。眉皆遠山。何必合德。口皆櫻桃。何必樊素。腰皆楊柳。何必小蠻。足皆金蓮。何必潘妃。歌卽念奴。笑卽褒姒。顰卽西子。點額卽壽陽。肥者不失其爲阿環。瘦者不失爲飛燕。奇醜不失爲無鹽。當其怨。出塞之明妃也。當其恨。長門之阿嬌也。當其雲雨。巫山之神女也。他如稍識數字。堪充柳絮。高才畧減妬心。已有小星遺意。無才便爲德。大貞出于淫。皆當棄短取長。安知不買骨致馬。而天龍降于好畫者哉。

閨閣之事。古來不廢。則知婚姻非假第緣。自爲之合。非可強爲。則雖人而實天也。隨之一字。大有理解。

葺居

美人所居。如種花之檻。插枝之瓶。沉香亭北。百寶欄中。自是天葩故居。儒生寒士。縱無金屋以貯。亦須爲美人營一靚粧地。或高樓。或曲房。或別館。村庄。清楚一室。屏去一切俗物。中置精雅器具。及與閨房相宜書畫。室外須有曲欄。紆經名花掩映。如無隙地。盆盎景玩。斷不可少。蓋美人是花真身。花是美人小影。解語索笑。情致兩饒。不惟供月。且以助粧。

修潔便是勝場繁華當屬後乘

緣飾

飾不可過。亦不可缺。淡粧與濃抹。惟取相宜耳。首飾不過一珠一翠一金一玉。疏疏散散。便有畫意。如一色金銀簪釵行列。倒插滿頭。何異賣花草標。服色亦有時宜。春服宜倩。夏服宜爽。秋服宜雅。冬服宜豔。見客宜莊服。遠行宜淡服。花下宜素服。對雪宜麗服。吳綾蜀錦。生綃白苧。皆須褒衣闊帶。大袖廣襟。使有儒者氣象。然此謂詞人韵士婦式耳。若貧家女典盡時衣。豈堪求備哉。釵荆裙布。自須雅致。

花鈿委地無人收。方是真緣飾。

選侍

美人不可無婢。猶花不可無葉。禿枝孤蕊。雖姚黃魏紫。吾何以觀之哉。佳婢數人。務須修潔。時令烹茶澆花。焚香披圖展卷。捧硯磨墨等項。兼其命名。亦猶齋頭品具。可無佳稱乎。聊摘古青衣美名。以備擇用。如墨娥。綠翹。白苧。紅綃。紫玉。麗華。輕紅。雲容。曉粧。佛娥。輕娥。紅香等俱佳。一切花名。近屬濫套。所謂號俗子。不出山泉溪橋。敬愛仰慕也。必洗去。

待月抱衾選侍最工

雅供

閒房長日。必需欸具。衣廚食櫥。豈可溷入清供。因列器具名目。天然几。藤牀。小榻。醉翁牀。禪椅。小墩。香几。筆硯。彩箋。酒器。茶具。花罇。鏡台。粧盒。繡具。琴。簫。碁。枰。至于錦衾。紵褥。畫帳。繡幃。俱令精雅。陳設有序。映帶房櫳。或力不能辦。則蘆花被絮。茵布簾帟。帳亦自成景。

又須以蘭花爲供。甘露爲飲。橄欖爲餚。蛤蜊爲羹。百合爲齏。鸚鵡爲婢。白鶴爲奴。桐柏爲薪。薏苡爲米。方得相稱。

博古

女人識字。便有一種儒風。故閱書畫。是閨中學識。如大士像是女中佛。何仙姑像是女中仙。木蘭紅拂女中之俠。以至舉案提甕。截髮丸熊。諸美女遺照。皆女中之模範。閨閣宜懸。且使女郎持戒珠。執塵尾。作禮其下。或相與參禪。唱偈。說仙談俠。真可改觀。聖意。滌除塵俗。如宮閨傳。列女傳。諸家外傳。西廂玉茗堂還魂二夢。雕蟲館彈詞六種。以備談述歌咏。間有不能識字。暇中聊爲陳說。共話古今。奇勝紅粉。自有知音。

白首相看不下堂者。必不識一丁。博古者。未必占便宜。然女校書最堪供役。尋真。

美人有態有神。有趣有心。唇檀烘日。媚體迎風。喜之態。星眼微瞋。柳眉重暈。怒之態。梨花帶雨。蟬露秋枝。泣之態。鬢雲亂灑。胸雪橫舒。睡之態。金針倒拈。

繡屏斜倚。懶之態。長顰減翠。瘦靨消紅。病之態。惜花踏月爲芳情。倚闌踏徑爲閒情。小牕凝坐爲幽情。含嬌細語爲柔情。無明無夜。乍笑乍啼。爲癡情。鏡裡容月下影。隔簾形。空趣也。燈前目。被底足。帳中音。逸趣也。酒微醺。粧半卸。睡初回。別趣也。風流汗。相思淚。雲雨夢。奇趣也。神麗如花豔。神爽如秋月。神清如玉壺。永神困頓如軟玉。神飄蕩輕揚如茶香。如烟縷。乍散乍收。數者皆美人眞境。然得神爲上。得趣次之。得情得態又次之。至于得心難言也。姑蘇台半生貼肉。不及若耶溪頭之一面。紫台宮十年虛度。那堪塞外琵琶之一聲。故有終身不得而反得之一語。歷年不得而反得之邂逅。斷守追歡渾閒事。而一朝隔別。萬里繫心。千般愛護。萬種殷勤。了不動念。而一番怨恨。相思千古。或苦戀不得。無心得之。或現前不得。死後得之。故曰九死易。寸心難。

態之中。吾最愛睡與懶。情之中。吾最愛幽與柔。趣則其別者乎。神則其頓困者乎。心則却以不得爲大幸矣。客曰。癡心婦人。負心男子。其來也。一非日矣。負心吾不忍爲之。癡心又不能禁也。自此緣情深重。展轉愛戀。交互纏綿。流

浪生死海中。何時出頭。不若暫時籠鳥瓶花。點綴光景。到頭來各奔前程。大家不致担誤。何如何如。說至此。亦自知殺風景極矣。然不能不殺風景也。昔日袁中郎在天竺大士前祝曰。但願今生得壽夭。不生子。侍妾數十人足矣。極得此意。固知中郎自是慧人。然不可與俗人共賞鑒也。

及時

美人自少至老。窮年竟日。無非行樂之場。少時盈盈十五。娟娟二八。爲含金柳。爲芳蘭葢。爲雨前茶。體有真香。面有真色。及其壯也。如日中天。如月滿輪。如春半桃花。如午時盛開牡丹。無不逞之容。無不工之致。亦無不勝之任。至于半老。則時及暮。而姿或豐。色漸淡。而意更遠。約略梳粧。偏多雅韻。調適珍重。自覺穩心。如久嘗酒。如霜後橘。知老將提兵。調度自別。此終身快意時也。春日豔陽。薄羅適體。名花助粧。相携踏青。芳菲極目。入夏好風。南來香肌半裸。輕揮綉扇。浴罷湘簾共眠。幽韻撩人。秋來涼生枕席。漸覺欵洽。高樓爽月。窺牕恍擁嬋娟而坐。或共泛秋水。芙蓉映帶。隆冬六花滿空。獨對紅粧。擁爐接膝。別有春生。此一

歲快意時也。曉起臨粧。笑問夜來花事闌珊。午夢揭幃。偷覷嬌姿。黃昏着倒眠鞋。解至羅襦。夜深枕畔細語。滿床曙色。強要同眠。此又一日快意事也。時乎時乎不再來。惟此時爲然。

了此則日日受用。時時受用。以至一生受用。無半日虛度。都是不枉做了一世人。但一日也要有嗔怪時。方有趣。一年也要有病苦時。方有韻。一生也要有別離時。方有致。紅顏易衰。處子自十五以至二十五。能有幾年容色。如花自蓓蕾以至爛漫。一轉瞬耳。過此便摧殘剝落。不可睨視矣。故當及時。

晤對

焚香啜茗。清談心賞。者爲上。諧謔角技。携手閒玩。爲次。酌酒鋪肴。沈酣潦倒。爲下。

晤對何如遙對。同堂未若各院。畢竟隔水閒花。礙雲阻竹。方爲真正對面。一至牽衣連坐。便俗殺不可當矣。

鍾情

王子猷呼竹爲君。米元章拜石爲丈。古人愛物。尙有深情。倘得美人而情不摯。此淑眞所以賦斷腸也。故喜悅則暢導之。忿怒則舒解之。愁怨則寬慰之。疾病則憐惜之。他如寒暑起居。殷勤調護。別離會晤。偵訊款談。種種尤當加意。蓋生平忘形骸。共甘苦。徹始終者。自女子之外。未可多得也。

尾生抱橋柱。而女子終不至者。此最是有情人。若遂至同溺。便鍾情不深矣。

借資

美人有文韻。有詩意。有禪機。非獨捧硯拂箋。足以助致。卽一顰一笑。皆可以開暢元想。彼臨去秋波那一轉。正今時舉業之宗門。能參透者。文無頭巾氣。詩無學究氣。禪亦無香火氣。

招隱

謝安之屐也。稽康之琴也。陶潛之菊也。皆有托而成其癖者也。古未聞以色隱者。然宜隱孰有如色哉。一遇冶容。令人名利心俱淡。視世之奔蝸角。蠅頭者。殆胸中無癖。悵悵靡托者也。眞英雄豪傑。能把臂入林。借一個紅粉佳人作知己。

將白日消磨。有一種解語言的花竹。清宵魂夢。饒幾多枕席上煙霞。須知色有桃源。絕勝尋真絕慾。以視買山而隱者何如。

曰隱曰借。正所謂有托而逃。寄情適興。豈至沉溺如世之癡漢。顛倒枕席。牽纏油粉者耶。如此則不爲桃源而爲柳巷矣。不曰買山而隱。却要買山而埋矣。

達觀

誠意如好好色。好色不誠。是爲自欺者。開一便門矣。且好色何傷乎。堯舜之子。未有妹喜姐已。其失天下也。先于桀紂。吳亡越亦亡。夫差却便宜一個西子。文園令家徒四壁。琴挑卓女。而才名不減。郭汾陽窮奢極欲。姬妾滿前。而朝廷倚重。安問好色哉。若謂色能傷生者。尤不然。彭篯未聞鰥居。而鶴齡不老。殤子何嘗有室。而短折莫延。世之妖者病者。戰者焚溺者。札厲者相牽而死。豈盡色故哉。人只爲虛怯死生。所以禍福得喪。種種惑亂。毋怪乎名節道義之當前。知而不爲。爲而不力也。倘思修短有數。趨避空勞。勘破關頭。古今同盡。緣色以爲好。

可以保身。可以樂天。可以忘憂。可以盡年。

色空空色皆虛話。斬盡藤蘿我獨存。此悟得真身而觀有獨至也。癡女戀男。正無達觀。昔一妓被逼。苦吟曰。自嘆身爲妓。遭淫不敢言。此其觀身最爲高潔。充此一念。可證仙果。

(完)

悅容編跋

悅容編之載于快書者。易名鴛鴦譜。又有枕函小史評林本。首標長水天放生輯。俱不載撰人姓氏。因樹屋書影指爲梁溪葉文通所作。然亦擬議之辭。初無灼見。問攷綠牕女史。則署名吳下衛泳。其次序詳略。互有異同。究未知孰是也。今春購得懶仙枕中秘二冊。內有是編。因據以錄入叢書。懶仙字永叔。吳中韻士。順治甲午歲。嘗選刊古文冰雪携皆幽奇蒼古。味在鹹酸外者。甲辰仲春。震澤楊復吉識。

香天談藪

震澤吳雷發夜鐘著

洛陽人梨花開時。携酒其下。曰爲梨花洗粧。惜洗粧詩。未有出群之才。足以稱此。余嘗于花落時。聚而瘞之。襲以破硯。作葬花詩。曰。蝶拍鶯簧當輓歌。蠶房釀酒酌高坡。蓬窠埋後無人賞。負却春光奈爾何。幽香絕艷本難知。無限荒榛又蔽之。開亦枉然何況落。誰吟楚些吊湘纍。連袂成行覓斧斤。描空射影聚飛蟲。勞君百計戕佳麗。難損青山與白雲。

黃山谷曰。蘭似君子。蕙似士大夫。其一幹一花而香有餘者蘭也。一幹五七花而香不足者蕙也。愚觀前人皆謂蘭優蕙絀。然蘇郡鬻蘭甚賤。而蕙價有加。若所謂建蘭者。乃漳之蕙也。其值較蘭何啻數十倍。然則向所云果不足憑耶。抑古今或有不同耶。寔則漳之蕙。其香無以加也。

余少喜植花。蘭最易培。而勞莫甚于菊。然猶易得其性。惟蕙爲至難。人于蘭蕙總稱曰蘭。其香微有不同。而寔則二而一也。山谷比蘭于君子。而以

蕙爲士大夫。余謂二花先不當分。且士大夫獨不可爲君子乎。大抵蘭蕙皆可。比于君子。或在茅舍。或在玉堂。出處雖殊。而其品之高不改也。

香不在烟也。然烟自不可無。若憎烟而欲去之。香亦何從生乎。世有植蘭蕙者。剪除其葉。而獨留花。豈得謂之愛花者。大抵諸花皆以葉爲助。惟梅開時無葉。正是無可如何耳。

暑易傷人。李笠翁謂中元既過。當舉家相慶復生。余謂寒之中人。亦可畏也。過花朝亦當如是。

王荊公讀孟嘗君傳一篇。余嘗論之曰。責人易。責己難。荊公以南面制秦。責孟嘗君。不知爾時諸侯不能同心。其勢愈弱。將何以制強秦。若鷄鳴狗盜能救人主于危。方見平時待客之厚。一朝食報也。鷄鳴狗盜乃能報主。而人君委任之專。幾于壞有宋天下。且以全宋不能制一元昊。尙欲責人無已乎。

或曰。以一笑欲殺趙之美人。此躋者亦非庸庸者矣。愚謂觀人者。必于其樹立如何。假使躋者果感平原君之意。而有以報之。猶有說也。乃不聞其于邯鄲之

圍合縱之議。或致其身。或建一策。是其人不過知平原之惟恐失一士。而有挾以來言耳。縱肆狡獪。以成其殘忍之心。其罪不可勝誅。而毫無功之可贖。乃猶贊美之乎。美人之笑。斷無死罪。而平原君輕以所愛之頭。謝一庸惡之人。亦惟恐士心之不得已。覽者之妄。生于相脅。平原之殘。成于相畏。此皆可爲之痛恨者。而何足取之有。

晝間之境。紛紜變化。不能豫料。不堪追憶。至夢尤甚。豈天之顛倒生人。抑人之自爲顛倒乎。然余謂夢乃不可無者。所思之人。千里可以咫尺。客遊于外。有術可以遄歸。皆夢之功也。唐李昌符有中宵多夢。晝多眠之句。余有句云。避愁尋夢。夢偏稀。又云。昨宵夢斷。今堪續。又云。夢爲蝴蝶也。尋花。此雖晝閒所得。然安知非夢也。

夢每昏于醒時。此其常也。甚而晝間必不爲之事。夢中爲之矣。然夢有清于醒時者。晝或多欺。夢中則自覺其心而不欺也。人之一生。睡醒各半。是半生在夢中過也。若余之多病者。又豈止半生乎。半生之事。必有神司之。夢中亦有豐嗇。

悲歡一切所值之地。所接之人。各有不同。不可謂非半生之命也。若徒曰想日。因竟有毫無所想。絕無所因者。夢之所包。亦大矣哉。

夢飲花下。有舞者索詩。口吟應之。舉座叫絕。一碧衫少年。令舞者捧巨觥以進。曰。此乃紅玉杯也。聊潤詩腸。飲畢復斟。辭以不能。旁有美人衣繡綠者。曰。吾當代飲。爾卽歌此詞以侑觴。舞者揚袂而歌。少年執板。美人緩飲。舉座歡然。少年攀一花大如斗。簪余帽上。兩美人大笑。余遂醒。憶此詩猶未嘗忘也。追想夢境。花傍一亭。額曰思舊居。或曰。此卽吾子所書。亦紀其歲月乎。余惘恍不能答。遼懿德蕭皇后。抱千古之沉冤。令覽古者。人人悲憤。終不能解其故。雖乙辛孝傑。後皆誅戮。然何補于香消玉碎乎。世有以輪迴劫運解之者。吾仍欲搔首問天也。得後人憑吊。庶幾稍白萬一姑。以慰其幽魂。特恐彈入瑤琴。適令墮淚者。欲添江漲耳。余嘗有題回心院詞。後曰。象牀翠被。麝熏爐。頻剔銀缸。影尙孤。不用黃金遙買賦。清絃彈出付宮奴。又題十香詞。後曰。群小焚芝更刈蘭。倩誰芳艷吐毫端。喪心偏屬文人事。千載還應按劍看。

同一魚也。入釜鬻者無數。而金魚則畜之。同一鳥也。調酸醢者無數。而鶴則置之園中。畫眉之屬。則藏之籠內。而日飼之。然則文采聲音。其可忽乎。

靖節之宰彭澤。左司之守蘇州。未聞明記其善政。而共信其惠澤及民者。信之於其詩也。大抵鍾情山水。寄懷翰墨。其人處則必非俗人。出則必非俗吏。

虬仙詩曰。蓼岸蕩蘭橈。花深人未遇。鴛鴦正熟眠。回舟更尋路。此情仙也。

常熟馮定遠。班燈花句云。閨中有喜深深拜。旅邸無眠淺淺挑。顧粟園述崑山

吳修齡。及泥美人句云。公如反國甘爲塊。郎若封關定作泥。顧柳村述。二顧皆

崑山人。能詩。

余嘗有閨情小詩云。雨滴梧桐小院涼。移爐留住一簾香。夜深還候月光到。添得羅衣立畫廊。志葵弟在楚嘗書此詩於一童紈扇上。後此童來志葵處。屢索作者詩。復書閨情於小牋云。懶看燈花吐復蕙。鸚哥不語繡簾前。夜深枕上頻驚起。小婢無端夢語顛。童子持去。報以繡囊曰。金閨以贈作者。志葵叩以姓氏。再三不答。曰。屬不許言也。

香奩艷體。至王次回疑雨集而極。實度越溫李耳。食者每諱言之。且故譏其纖巧。有傷大雅。直登徒子耳。余酷愛其不由熟徑。仍入人心坎中。悉評跋之。丹鉛不啻再四。嗜癩之癖。恐莫余同矣。

構李夏宁枚。煜著海外遊草有綠茉莉說云。嶺南多茉莉。色白。獨瓊地色綠。綽約鮮妍。土人呼爲多情花。有中州人携牡丹求售至瓊者。花葉卽凋落。故土人歌有不求富貴愛多情之句。又云綠珠博白人。花所以變色爲綠。瓊種亦自博移來者。語非無徵。附記於此以俟解人。

汪研村沃有桃葉渡書所見云。楊花萬點因風起。畫船搖蕩春風裡。波回吹動綺羅香。有女如花隔牕紙。自研螺黛硯痕新。含睇拈毫笑。忽顰潤玉。傳王逸少簪花擬學衛夫人。却笑舟人歸去速。回頭簾幙藏深綠。錦纜日繫柳陰中。沉吟自製秦淮曲。王漁洋評。余小時有句云。不知何事牽農意。欲疊紅箋賦洛神。聊可印證。

康熙庚寅秋。客遊西湖。月夜至斷橋。不禁慟哭而返。余生平畏言斷橋。謂境遇

情緒無非此耳。因賦一絕。六橋楊柳飄零候。更有消魂是斷橋。行到此橋原不斷。斷腸人看淚如潮。抱病昭慶寺。有友人攜青樓以詩招飲。次韵謝之。曰。遊半西湖興未饒。一燈秋雨臥僧寮。雲遮寶塔貪看影。夢繞錢塘怯聽潮。半臂借君涼亦暖。六橋招我近偏遙。秦箏趙瑟心難動。况復河陽恨未消。

同邑姚魯望岱長貧工詩。以客授老而弱女棲霞幼嫺吟咏十七而夭。著有剪愁吟。臨終數日前寒夜不寐。口占云。半庭殘雪峭寒生。榻近梅花病亦清。冷夢未成燈自滅。疎鐘畫角一聲聲。夜永紗牕月下遲。無眠起坐强支持。意中多少難言事。盡在低聲喚母時。讀之殊堪腸斷。

在園雜志云。余守括州時。十二月下旬。雜花作蕊。梅花盛開。立春詩有挿瓶花影一蜂過之句。同人以爲太早。豈知四方風氣不同。無足爲異。至溫州十月小春。桃花杜鵑山凹如火。則早而又早矣。

文心雕龍。竹有生日。卽五月十三日。四民月令。是日謂之竹醉。栽竹多盛。山谷詩。夏栽醉竹餘千个。注是日竹醉宜栽竹。古今類傳。又月令。潮日種竹易。

活潮日八月十八日也。(同上)案兩日自應栽竹。而雨過卽移。記向南枝二語尤貴知之。

竹種甚多有見于書者。有未傳者。後各以其意名之。或略沿古。或從時。或隨地。不可勝計矣。愚謂可玩而兼可用可食。植物之美。無踰于竹。欲尋其倫。其蓮與菊乎。

珍珠船云。世稱三友。竹有節而嗇華。梅有花而嗇葉。松有葉而嗇香。惟蘭獨併有之。

愛才有上施者。如任華之於供奉拾遺。繁知一之於忠州刺史。是也。有下施者。如茂孝之於子遷。逋翁之於香山。是也。總之皆是具眼。皆是婆心。

范昭遠從西紀略曰。五月十九日蚤行。至舍勒烏孫少歇。前次黑河沿地卽青塚也。塚高二十丈餘。闊數十畝。塚前石虎二。石獅一。享殿遺址。尙有琉璃碧瓦。狼藉道左。頂有室。碎石砌其外。磁甃貫其中。云是喇嘛所爲也。塚旁有古柳。橫臥道中。老幹上伸。葱鬱舒秀。噫。青天碧海。塞外斜陽。白草黃沙。魂歸何處。征人

短歌用當長嘆。炎漢寧無出使臣。却教紅粉去蒙塵。琵琶不盡當年恨。萬里長城倚婦人。余爲和曰。運籌決勝足才臣。誰遣蛾眉靖塞塵。咫尺昭陽猶未識。那能遙選苧蘿人。

才女不年。古今最痛。余所見湘碧遺草。乃長洲袁雁亭刻其亡婦所著。婦郭氏名文蛾。字瓊媚。其遺草淡中帶艷。粉翠欲飛。康熙庚辰鶴栖老人爲作傳及序。而老易軒主人亦序其事。附以雁亭悼亡并諸家誄挽之作。余觀紅顏薄命。或遇人不淑。及得所耦而復齎其壽。其可悲悼。與才士之不遇將母同。每欲搜其類而彙之。以傳於後。聊補域中缺陷。而撫躬嗟嘆。殘紅碎錦。叢榛掩之。青衫如故。惟有淚洒蓉裳耳。

丁巳春杪遊靈芝菴。菴後土邱。呼曰小娘墳。俗傳沈萬三葬其女。穿塚甚多。欲後世莫辨眞葬處。此乃其一塚耳。古樹斜陽。令人不勝憑吊之感。因賦二絕。點點棲鴉樹影寒。鍾聲聊醒斷魂酸。玉魚^珠鳳藏何巧。疑塚纍纍似阿瞞。金谷無人吊季倫。蘭堂繡戶久飄塵。荒墳有女招提畔。誰解尋芳獨愴神。

明崇正中揚州名妓沈隱字素瓊。偕母遊西湖。卜居於樓外樓。樓本宋人所建。歌舞舊地也。嘗語人曰。但得一真才士。不復爲樓中人矣。一日尋蘇墓。見西冷橋上。一才子獨坐縱飲。狂歌自得。訊之。爲新安夏子龍也。負才使氣。傲岸不羈。瓊竟歸之。夏故揮霍家。赤貧。瓊甘焉。未幾。夏以痛飲傷肺卒。瓊視歛盡哀。遂盛妝飾。自序平生詩稿。題曰幽憤言。復成絕命詞三首。以紅絲自經於樞旁。余友鈕滄亭賦念奴嬌詞吊之曰。凭高長嘯。喚起耐雪梅魂。酌他紅友。檻外奇峰。留古色。一任癡雲浪走。青眼杯邊。白頭字裡。月濯章台柳。秋風太慘。花銷並蒂香藕。不堪破鏡尋鸞。縞衣拭淚。仍是描蛾手。三尺紅絲知我意。綰住黃墟佳耦。野塚雙鴛。遙天孤鶴。環珮西湖口。問今歌舞還學得素瓊否。余讀之有感。爰題二絕於其端曰。烟月蕭蕭冒柳枝。錢塘還記舊遊時。怨紅愁綠情誰寄。却見西湖輓玉詞。懷古無端有淚飄。青蛾化土不堪招。南屏鐘響風篁和。欲醒芳魂在六橋。

南雅一書。茗溪董江屏未所輯諸詩僧詩也。後附江屏之兄裘夏樵及江屏詩。

其序而跋之者。江屏父漏霜禪人南潛也。漏霜未出家時。著豐草菴詩集。而寶雲詩集。則皆爲僧以後詩。其中叩寂寞而求音。乃世俗所未能搜索者。

明萬歷中有官於浙者。忘其名。貪虛自縱。托其子捆載而歸。選勇士數人。督役夫而行。至莒中。見一翁策蹇至。相與談甚洽。抵暮過長林。翁忽曰。公子裝歸之物。皆非理所得。曷不假我以爲娛老之具。公子怒。諸勇士厲聲呼之。翁加鞭而前行。約半里許。飛一彈。中一勇士之指。諸勇士皆持兵欲與角。又數彈徧中其指。復躍至。謂役夫曰。隨我行。則生若。諸勇士悉投兵而拜。公子乃揮役夫去。悵然自失。反走訴於其父。乃令人廣捕。踰月。公子訪求技勇。偕遊西湖。見此翁行堤上。兩少年從之。公子命從者突出擒之。翁大笑。一少年略舉手而仆者三人。餘人遂不敢動。翁謂公子曰。姑至我舟中。小酌可乎。則畫舫泊於九溪。揖公子及群從登焉。酒肴之陳。非人世所易有。所言者。皆述生平賑貧卹困。鋤抑強暴之事。公子欲啟口。輒獻巨觥。酒酣。翁掀髯曰。爲我達尊公。無相覓也。呼童設筆硯。疾掃數行。携公子手登岸。共覽十八澗之勝。坐石上聽瀑聲。笑謂公子。

宜勉爲賢人。幹父之蠱。我欲將此水滌爾塵襟也。出一緘與別。謂一二日間。消息可到。勿以微物瑣瑣長者爲。公子歸語其父。開緘視之。則歷數其罪狀也。翼日。父子晨起。各云所臥之枕。截而爲兩。旁有白絹大書曰。官改前非。子改父惡。以枕代爾。尙其戒之。自此召還捕者。竦然自戢。父子俱得令名。

葉虞部仲韶有自撰年譜。吾黨葉庭方携來見示。此書始於明神宗之己丑。終於懷宗之癸未。乃未刻之書也。可以見虞部生平大略。爲儒者爲俠士爲詞客。爲情種。歷歷在目。栩栩欲生。而總之當以二字概之曰。愁人而已。

其叙四十八歲之春云。茗華盡白。靈腑恒摧。春花秋月。晝卷宵燈。靡非愉恍之端。祇是悽慘之緒。如韋蘇州云。暄涼同寡趣。朗晦俱無理矣。有二婢。一素韋。時年十九。一紅于。時年十八。雖周旋屏幃之間。有分感傷。無心消遣。並令及時適人。復聽其父自嫁。余不惟不取其值。凡平日爐匱奩具。余貧士故。非華美者。亦悉與之携去。各嫁士人爲妾云。

九月午夢堂集成。鷓鴣吹二卷。愁言一卷。返生香一卷。窈聞二卷。伊人思一卷。秦

齋怨一卷。岷雁哀一卷。彤奩續些一卷。百旻一卷。共九種。其鴛鴦夢一卷。後易之以靈護集爲十種云。

竊聞載於買愁集。余童時卽見之。惟瓊花鏡之板已敝。近始得見。古今靈異。殆少其倫。其略云。朱生名懋。字熙哲。淮陰人。善李少君之術。能招魂。如生人。繪以金粟影華法。當其磅礴丹青時。人皆得以目寓也。其法裝白帟於壁。以鏡對帟。凝神屏氣。先視鏡中。恍惚若覩。卽現帟上。又云。瓊章。從境中髣髴露形。卽帟上儼然在焉。隨二青衣女侍。亦爲冶麗。但寫瓊章方已。卽如游絲隨風飛散。不及運管矣。

瓊花鏡又云。瓊章今在緱山仙府。前身爲月府侍書。名寒簧。最初則軒轅時。王屋山小有清虛洞天。侍女名成璈。淮陰人。朱生則藉靈於圖籙。據寔於表象。舉其在世內遷流者言之。或亦一道不妨互參爾。

鏡內朱書有云。葉瓊章前身曹大家。天帝嘉其才藻。重其貞淑。召爲廣寒執節侍史。偶以節墜。誤碎玉笙。遂於唐時謫凡間。竹雙氏曰。在人間爲曹大家。在天

上僅爲執節侍史。何異蘇子卿爲典屬國也。此已爲理之不可解者。續竊聞中有乞泐菴大師寫瓊章影神而師甚難之之語。余覽至此。深痛惜之。及觀瓊花鏡所載。則方士朱生招入鏡中而寫其貌。庶稍慰耳。然具壇建醮。焚章書符。至四五次。乃得之。其亦難矣。

瓊章姊妹芳藻。聚於一家。昭齊所著愁言及蕙綢所作鴛鴦夢。皆擅才韻。世只盛傳瓊章。實鸞鳳也。然小紈之名。遜於紈紈小鸞者。則以昭齊瓊章之歿。而後世尤惜之耳。不幸之幸。是亦可以慰千古之悲者矣。

百旻遺草。虞部仲子世偁字聲期者。年十八而沒。所存詩文甚少。僦聘崑山顧咸建室女。聞訃守志。有奇節之褒。其附刻挽詞。兄世侄弟世俗世侗世儋姊妹蕙綢也。

靈護集虞部第三子世俗字威期者。以金陵鄉試不得志。鬱而成疾。未半載卒。年二十二。著述之存。較百草旻爲多。所列挽什。婦沈憲英字蘭枝。姊小紈字蕙綢。妹小繁字千瓔。時年十五。兄世侄字雲期。弟世侗字開期。世儋字遐期。世綰

字星期。時年十四。世鍾字工期。時年十二。玉香珠唾萃集一門。要皆足以墮千秋之淚者。

(完)

香天談藪跋

夜鐘先生著述甚富。身沒無後。日就散佚。茲編暨說詩膏肓。皆其高足弟陸文研覃於易簣前授予者。吉光片羽。歸然僅存。良足寶貴已。甲午夏日同邑楊復吉識。

卷二

集

婦人集

宜興陳維崧其年著

如皋冒
新城王士祿
西樵評

長平公主。孫承澤春明夢餘錄曰。公主名徽姬。明思宗女。周皇后產也。甲申之變。御劍親裁。傷頰及腕。越五宵旦。復甦。順治二年。上書。今皇帝。甚有音旨。書曰。幾死臣妾。跼蹐高天。髡縵空王。庶申罔極。先是。主議降大僕公子都尉周君名世顯。至是。詔求故劍。仍館我周君焉。尋薨。張晨長平公主誄曰。當扶桑上仙之日。距穠李下嫁之年。星燧初周。芳華未歇。又曰。公主葬彰義門之賜莊。禮也。明思宗田貴妃。維揚人。性明惠。沉默寡言。笑最得帝寵。吳偉業永和宮詞曰。貴妃明惠獨承恩。甲申李賊入燕。妃先一年薨。

長安女尼妙音。舊先帝時宮人也。國破後。出居民間。祝髮于北城之文殊菴。與海昌相國居址相近。常出入相國家。談宮中舊事。及甲申三月事。甚悉。言十九日夜漏欲盡。先帝徧召內人。命其出宮避賊。是時黃霧四塞。對面不相見。帝泣下沾襟。六宮皆大哭。又言宮中侍姬。都以青紗護髮。外施釵釧。自遭喪亂。香奩

寶鈿悉爲人奪。惟存青紗數幅。猶昭陽舊物也。吳江吳兆騫白頭宮女行云。長安女冠頭似雪。曳地黃紵縣百結。手執金經淚暗流。云是前朝舊宮妾。又云一托香台已十秋。每談遺事自生愁。室中漫禮金仙席。夢裏還隨玉輦遊。惆悵生年遘陽九。戒珠持徧甘衰朽。天家龍種尙飄零。賤妾蛾眉亦何有。晚樹沉沉禁苑斜。山川滿目思悲茄。傷心欲到扶風市。零落金箱憶漢家。

鄭姁故襄王宮人。遭亂爲沔陽漁人所得。常椎髻跣足。釣于黃金湖頭。獨著慘紅衫服。云是襄妃物也。（見董以寧楚遊聞見錄。張獻忠假楊嗣昌兵符破襄陽。事出倉卒。宮中無得免者。姁奉命往淩儀賓家。送生日銀綵。因匿藻井上獲免。又聞賊盡斫城中婦女纖趾。囊之酒間賭勝。姁之跣足。意或悼此。見原註）

姑蘇女子圓圓。（字畹芬）戾家女子也。色藝擅一時。如臯冒先生。嘗言婦人以姿致爲主。色次之。碌碌雙鬢。難其選也。蕙心紈質。澹秀天然。生平所覩。則獨有圓圓耳。崇禎末年。戚畹武安侯却置別室中。侯武人也。圓圓若有不自得者。李自成之亂。爲賊帥劉宗敏所掠。我兵入燕京。圓圓歸某王宮中爲次妃。（吳

縣葉襄贈姜垓百韻詩有云。酒壚尋卞賽。花底出圓圓。按卞賽亦金陵名妓。家伯兄有贈晚芬絕句。瀟湘一幅小庭收。菡萏香餘暮色幽。細細白雲生枕簟。夢圓今夜不知秋。秋水波迴春月姿。淡然遠岫學雙眉。清微妙氣輕嚙吸。谷裡幽蘭許獨知。

臨淮老妓某戚晚府中淨持也。後爲東平侯女教師。甲申京都失守。侯欲偵兩宮音息。而賊騎充斥。麾下將無一人肯行。伎奮然曰。身給事戚晚邸中。久宜往。遂易韞韉持七首。間關數千里。穿賊壘而還。戚晚蓋田貴妃長兄。東平侯劉澤清也。

金屋恭順侯（侯名吳維華）。姬人。父筆工也。幼穎悟。讀書善強記。侯寵之專房。一日。偶有他事失侯意。錮別室中。姬乃以小赫驪作書叙其辛楚。中有長生殿卷中人語。侯見之。不解所出。典籤某曰。此用玉環崔徽二事實也。侯大喜。卽日迎歸邸第。寵愛如初。（蘭陵鄒推官有金屋歌。歌長不載。

寇白門。南院教坊中女也。朱保國公娶姬時。令甲士五十。俱執絳紗燈。照耀如

同白晝。國初籍沒諸勳衛。朱肅室入燕都。次第賣歌姬自給。姬度亦在所遣中。一日謂朱曰。公若賣妾。計所得不過數百金。徒令妾落沙吒利之手。且妾固未暇卽死。尙能持我公陰事。不若使妾南歸。一月之間。當得萬金以報公度。無可奈何。縱之歸。越月果得萬金。按姬出後。復流落樂藉中。吳祭酒作詩贈之。有江州白傅之嘆。

顧夫人識局朗拔。尤擅畫蘭蕙。蕭散落託。哇徑都絕。固當是神情所寄。顧字橫波。合肥龔大中丞夫人。中丞名鼎孳。其尊拙齋集中。孤負香衾事早朝。及不知何福得消君諸絕。俱爲夫人咏也。

人目河東君風流放誕。是永豐坊底物。河東君姓柳。名是字如是。錢□□□□姬人。尙書築我聞室以居之。常于鴛湖舟中作百韻詩以贈柳。中有云。河東論氏族。天上問星躔。漢殿三眠貴。吳宮萬縷連。瑤光朝孕碧。玉氣夜生元。又云。纖腰宜蹴鞠。弱骨稱鞦韆。天爲投壺笑。人從爭博癡。又云。凝明嗔亦好。溶漾坐生憐。薄病如中酒。輕寒未拆絛。清愁長約略。微笑與遷延。君之風情與才藝。概

可見矣。

徐湘蘋（名燦）才鋒迥麗。生平著小詞絕佳。蓋南宋以來閨房之秀。一人而已。其詞娣視淑真。姒畜清照。至道是愁心春帶來。春又歸何處。又衰楊霜徧灞陵橋。何處是前朝等語。纏綿辛苦。兼撮屯田淮海諸勝。直可憑衿。（湘蘋海甯陳相國之遴賢配著拙政園詩餘初集。再錄其感舊二首。西江月 剪燭閒思往事。看花尙紀春游。侯門東去小紅樓。曾共翠蛾杯酒。聞說傾城尙在。可如舊日風流。忽忽彈指十三秋。怎不教人白首。水龍吟 合歡花下流連。當時曾向君家道。悲歡轉眼。花還如夢。那能長好。真箇而今。台空花盡。亂烟荒草。算一番風月。一番花柳。各自門春風巧。休嘆花神去杳。有題花錦箋香藁。紅英舒卷。綠陰濃淡。對人猶笑。把酒微吟。譬如舊侶。夢中重到。請從今秉燭。看花切。莫待花枝老。）

或于舊台城內見二絕句云。南朝天子一愁無。石子岡連元武湖。草綠離宮人不。到。日長惟勅阮佃夫。臨春閣外渺無涯。烽火連天動妾懷。十萬長圍今夜合。

君王猶自在秦。淮中有字畫爲苔蘚剝蝕。或以意補之。詞意淒婉。類宏光時宮人語。（宏光時懷寧阮大鍼方貴幸用事。詩中所云佻夫。意或指此。）

海昌彭幼玉（名炎）進士孫。適從姑也。遺集一卷。最新警。王十一曾以小密花牋書其銀河吹笙一詩。詩云。銀河吹徹玉笙遲。清漏迢迢睡覺時。巫峽雲歸俱是夢。鮫人淚滴盡成絲。霜衾抱月羞孤影。露葉驚風別故枝。王偶遺記末二句。幽思怨緒。政自使人不能終曲也。（王推官集中有舟中懷彭十駿孫時讀其從姑幼玉遺集一詩。詩曰。鳳脰燈寒共帝城。銀河小院語平明。蜀川消渴人如昨。洛水微波賦競成。寂寂武原春嶂遠。迢迢江浦暮潮生。謝娘柳絮班姬扇。欲向仙源上玉清。）

秣陵紀映淮有秋柳句云。棲鴉流水點秋光。世多誦之。（映淮字阿男。詩人紀映鍾妹也。漁洋山人秦淮雜詩云。十里清淮水蔚藍。板橋斜日柳毵毵。棲鴉流水空蕭瑟。不見題詩紀阿男。）

計孝廉（名果）婦吳夫人善排調。孝廉故貧士。嘗置一妾。夫人揶揄之曰。古

聞糟糠之妻。不聞糟糠之妾。如何。（見汪琬鈍菴說鈴）

吳江葉進士（名紹袁）三女。長昭齊。次蕙綢。三瓊章。俱有才調。而瓊章尤英。徹如玉山之映人。詩辭絕有思致。載午夢堂集中。（瓊章有侍兒名紅于）（天台泐大師序曰。汾河諸葉。葉葉交輝。中秀雙株。尤爲殊麗。）

桐城姚夫人（名維儀）無大師（方簡討以智法號無可）姑母也。酷精禪藻。其白描大士。尤工。所著清芬閣集。文章宏贍。亞于曹大家矣。

宗梅岑（名元鼎）母陳夫人。郡丞九室公（名輔堯）女。有婦德。兼工文詠。然唱隨外。不以示人。每有所作。梅岑欲受而錄之。輒不許。恐言之出于壺也。臨終。取生平所作盡焚之。故不傳一字。梅岑每言及。痛手澤之不存。猶嘆慕者久之。王吏部爲予言如此。

昭陽李夫人（字季嫺）游心元虛。託情道味。賦詩不多。殊復令人咨賞。可謂德音。（夫人一字元衣。女子所撰詩集五卷。文集一卷）

石城卞元文（名夢珏。女曰吳巖子（名山）夙擅詩歌西曲。諸女郎能音旨者。

靡不宗。卞後適廣陵劉孝廉。（孝廉名師峻）吳梅村西冷閨咏序曰：巖子著同聲之賦。元文賦嬌女之篇。辭旨幽閒。才情明惠。又曰：趙明誠金石之錄。卷軸無存。蔡中郎蠶白之辭。紙筆猶在。詩凡四首。今錄其二。五銖衣怯鳳凰雛。珠玉爲心冰雪膚。綠屨侍兒春被襖。紅牙小妹夜樗蒲。瓊牕日暖櫻桃賦。粉箴風輕蛺蝶圖。頻歛翠蛾人不識。自將書札問麻姑。石城楊柳碧城鸞。謝女詩篇張女彈。鸚鵡歌調銀管細。琅玕字刻玉釵寒。雙聲宛轉連珠格。八體穠纖倒薤看。閒整筆牀攤卷素棠梨。花發倚闌干。

黃比部（名永）與夫人浦氏（名映淥字湘青）伉儷最篤。一日鄒大（名祇謨）戲比部曰：君得母昔人所謂愛翫賢妻有終焉之志乎。比部曰：下官正復賞其名理。夫人有題周絡隱坐月浣花圖滿江紅一闋詞云：彼美人兮。宛相對。嫋嫋欲下。恰此夕月華如洗。花枝低亞。盼到圓時仍未滿。看當開半還愁謝。與花神月姊細商量。歸來罷。憐嫩藥。銀瓶瀉。迴清影。晶簾掛。奈晚妝猶怯。鏡臺初架。二十餘年芳草恨。兩三更後長吁夜。幾時將絡秀舊心情。呼兒話。附錄。

艾庵往事賀新郎詞一首。往事卿思否。十年來幾嗔幾喜。相偎相守。漫道悲歡如水去。提起心頭都有。卿自置一觴一缶。笑拔金釵閒指點。點樁樁。欲說還搖手。恐化作皤然叟。何妨憤憤居人後。更誇甚筆搖千字。胸盤二酉。對酒當歌。卿試舞長袖。離披紅溜。爲卿盡先生五斗。醉看諸兒盡繞膝。待長成五岳容吾走。卿好做尋山偶。（浦氏有詩名比部弟京婦巢氏淑只亦能詩）

玉蜂顧文康小女（名諶）亂後歸蘭陵董侍御。一日與弟姪輩讌集。小有唱和。顧因笑謂阿甯（名以甯侍御從姪也）曰。著紅鬪衫。弄虎邱浮圖。輒爲捉搦歌。新婦不如賢從。風日清佳。作曲室中語。爾時濯濯。賢從應亦不如新婦也。侍御循環言理。大加撫掌。（董以甯曰。家嬸以國破家亡。流離不偶。每吟舊事。不勝惋嘆。嘗有詩曰。舊婢僕來詢老母。嫁衣裳盡典空箱。每吟二句。輒爲泣下。未幾云逝。家侍御刻其遺集百餘篇。顏曰翰墨有遺蹟。）

金沙王朗學博次回（名彥泓）女也。學博以香奩艷體盛傳吳下。朗亦生而夙悟。詩歌書畫。靡不精工。尤長小詞。爲古今絕調。生平著撰甚多。兵火以來。便

成遺失。嘗于扇頭見其浪淘沙閨情三首云。幾日病淹煎。昨夜遲眠。強移心緒鏡臺前。雙鬢淡烟低髻滑。自也生憐。不貼翠花鈿。懶易衣鮮。碧油衫子褪紅邊。爲怯遊人如蟻擁。故揀陰天。一疎雨滴青簷。花壓重檐。繡幃人倦思懨懨。昨夜春寒眠不足。莫捲湘簾。羅袖護摻摻。怕拂粧奩。獸爐香倩侍兒添。爲甚雙蛾長翠鎖。自也憎嫌。二斜倚鏡台前。長歎無言。菱花蝕彩個人焉。分付侍兒收拾去。草拭紅裙。滿砌小榆錢。難買春還。若爲留住艷陽天。人去更兼春去也。煩惱無邊。三才致如許。眞所謂却扇一顧。傾城無色矣。又王吏部爲余言。夫人有春愁浣溪沙詞前段云。抱月懷風繞夜堂。看花寫影上紗牕。薄寒春懶被池香。□□愛詠之。抱月懷風四字。非溫尉章相不能爲也。綠肥紅瘦何足言警。又有詞云。昨夜睡濃兼好夢。一身春懶起還遲。亦是好句。(按朗適梁溪秦氏父彥泓任楚中學博。朗集唐以餞其行。中有君向瀟湘我向秦之句。可謂雅當。又有學繡青衣閒刺鳳。自把金針代補翎。毛空一詞。才思雕妍。殊爲巧妙矣。)

余嘗與諸賢品題閨秀。或謂鉛黛之餘。偏饒韻致。筆墨之外。別有寄托。當今那

得如許寧馨。余沉思久之。忽曰。噫。自有人。衆或嗤余爲騷。一吳語謂人不甚了者爲騷。夫銅鳴山應。理由冥契。陽回籥動。感豈人爲。士爲知己者死。女爲悅己者容。皆是物也。愚不可及。願從寧武。情至之談。豈諸賢所能尋味乎。向于董二書舍見矮箋數幅。寫會真詞曲。字法秀逸。如花臨風。後有題云。桃花便嫁東流水。不比楊花更化萍。全詩殊耐尋想。其印識爲采藥女郎云。得于童子手中。以炊餅易之者。

虞山吳永汝（字小法）母故某尙書姬也。七歲善琴箏。十歲工染翰。樂府詩歌一見卽能詮識。人有霍王小女之目。其母携之毘陵。十二而字余友鄒大。後爲雀角所阻。見其訣別詞有云。質如蒲柳。敢偶姬姜。年豈桑榆。忍甘駟儉。念一生其已矣。將九死以何之。其如夢令一闋曰。簾外一枝花影。月到花梢。陰冷夜坐穗燈消。寂寂小窗寒寢。夢醒夢醒。重把離愁細整。又蝶戀花半闋云。傷心只怕天公遠。好運何時。薄命應須轉。西鄰姊妹閒相勸。抽箋步入桐陰院。餘俱楚楚可誦。鄒大有惜分飛四十四闋。并製序以悼之。惜分飛序中有云。霍王小

女母號淨持。衛氏少兒。父名鄭季。清風細雨。無不訝其針神。綺月流雲。咸共欽其墨妙。直爲抒寫無遺。至云邯鄲才人。終歸厮養。左徒弟子。空賦嬌姿。金犢東西。不見台邊之柳。畫船南北。徒聞渡口之桃。則千古傷心。不獨我友爲然矣。會稽商夫人（祁撫軍彪佳夫人）以名德重一時。論者擬于王氏之有茂宏。謝家之有安石。（慈溪魏耕曰。撫軍居恒有謝太傅風。其夫人能行其教。故玉樹金閨。無不能咏。當世題目賢媛。以夫人爲冠。）

山陰王端淑（字玉映）意氣落落。尤長史學。父季翁（名思任）常撫而憐愛之。曰。身有八男。不易一女。（按山陰王家郎俱有鳳毛。季翁情鍾賢女。遂損譽兒之癖。）蕭山毛奇齡詩云。江南女士一代稀。王家玉映聲先知。著書不數漢時史。織錦豈憐機上詩。清暉閣中父書在。落筆爭開寫眉黛。吟成細雨滴口脂。行卽青簾繞裙帶。風流遺世姿獨殊。猗嗟四壁貧無如。牽蘿補屋愁不耐。天寒袖薄侵肌膚。只今兵革滿塗路。欲走西陵過江去。崎嶇宛轉進退難。祇恐行來更多誤。昨宵行李隘巷宿。繡帙香奩解書軸。今朝寂歷風雨來。令我停絃撫

心曲梧宮木落無復愁。清溪桃葉今難留。君行渺欲向何所。長江浩浩還東流。
秦淮董姬（字小宛）才色擅一時。後歸如皋冒推官（名襄）明秀溫惠與
推官雅相稱。居艷月樓。集古今閨幃軼事。薈爲一書。名曰奩艷。王吏部撰朱鳥
逸史。往往津逮之。（姬後夭。葬影梅菴旁。張明弼揭陽爲傳。吳綺兵曹爲誄。詳
載影梅菴憶語中。）

黃（名運泰）毛（名奇齡）撰越郡詩選一書。其凡例曰。閨秀則梅市一門。
甲於海內。忠敏擅太傅之聲。夫人孕京陵之德。閨中顧婦。博學高才。庭下謝家。
尋章摘句。楚纓趙璧。援婦誠以著書。卜客湘君。樂諸兄之同硯。其他巨室名姝。
香奩繡帙。董陶徐鄭。詠覽頗多。玉映靜因。流傳最久。編題姓氏。約十二家。閨閣
風流。莫此爲盛。識者以爲實錄云。（張楚纓名德蕙。適祁奕慶。朱趙璧名德蓉。
適祁奕喜。祁卜客名德瓊。祁湘君名德蒨。嘗見山陰徐緘詩云。箕子國中許小
妹。錦官城內王夫人。風流曠代不相接。筆陣一門驚有神。今觀諸祁才藻。以方
王許。似猶過之。楚纓鬪牌詩。難遣離懷白晝昏。紅牙牌裡強爭論。不因嬌

嬾無情緒。輸却金釵未敢言。趙璧和湘君詩。海棠枝上落輕紅。花片隨香

散碧空。但得與卿同轉側。不愁此夜逐春風。湘君夜坐詩。夏雨初晴後。長

空萬里。天花間吹玉笛。月下數金錢。宿燕驚猶熱。簷榴墮欲燃。齊紈裁自好。棄

置是何年。奕喜贈女弟湘君詩。深閨小妹動盈盈。盤內題詩早得名。初見

落梅能弄笛。還宜新月照彈箏。又云春光點點逐春江。春水悠悠渡夕陽。空留

匣琴千種恨。空留錦字三載香。匣琴錦字無消息。故將天壤怨王郎。

雲間章玉筐。名有湘。龍眠孫進士。名中麟。婦也。工才調。作詩寄姊云。

憶昔同在翠微閣。飛文聯句誇奇作。那知江海各天涯。青鳥無情雙寂寞。蘇合

房中愁索居。尺素遙傳錦鯉魚。爲問江淹五色筆。擬成團扇近何如。此詩亦何

減唐人韓君平也。玉筐著作。有澄心堂集。望雲集。姊瑞麟。妹玉璜。並擅詩名。妹

迴瀾。妹掌珠。俱以文章顯。荆隱君序曰。夫人之詩。其旖旎則月中楊柳。露下

芙蓉。其沉鬱則寒峰際霄。白雲不動。琉璃錦匣。聯翩劉氏之風流。翡翠筆牀。掩

映徐家之名勝。荆隱君夏瑗公先生女也。

虞山許太守夫人吳氏。霞有詩才。其梨花雙蝶一詩。世尤誦之。詩曰。如玉雙雙透瑣幃。鏡中斜見粉依稀。西施舞罷春衫冷。道韞詩成柳絮飛。影過杏梁朝日澹。夢醒巫峽片雲歸。梨花深院無人到。不是開籠放雪衣。太守名瑤。字文玉。夫人名綰。武進徐太守。名可先。夫人謝玉英。名瑛。詩名藉甚。性簡遠。蕭勝不嬰世務。太守之官後。夫人盡斥其橐中數千金。買青山莊居之。時於橋上憑欄小立。吟哦竟日。其風味如此。著有博依小草。近留心禪理。并詩亦不多作云。

武林顧若璞。黃少參。名汝亨。子婦也。早年稱未亡人。有綺才。所著湧月。王西樵曰。似臥月。軒稿行世。中有舅姑墓誌銘及外行狀。文章詳贍。學者矚之。孫女埈兒。法名智生。生而端麗。能詩歌小令。記其宮詞一首曰。長信宮中侍宴來。玉顏偏映夜光杯。銀箏彈罷霓裳曲。又報西宮侍女催。又咏雪一首云。霏霏玉屑點牕紗。碎碎瓊柯響翠華。乍可庭前吟柳絮。不知何處認梅花。清警殊甚。顧性喜學佛。歲癸巳病甚。父母痛之。女曰。金鎗馬麥。定業難逃。大人獨不聞。

之乎。且女特身痛耳。心無所苦。年十九天。又夫人子燦婦丁玉如字連璧。慷慨好大略。常於酒間與燦論天下大事。以屯田法壞爲恨。其言曰。邊屯則患戎馬。官屯則患空言。鮮實事。妾與子戮力經營。倘得金錢十二萬。便當北闕上書。請淮南北閒田墾萬畝。好義者出而助之。則粟賤而餉足。兵宿飽矣。然後仍舉鹽筴。召商田塞下。則天下可平也。其大言如此。西樵嘗言夫人臥月一集。中多經濟理學大文。率經生所不能爲者。其子婦丁繼母張氏。名姒音才學與夫人相亞。嘗作討逆闖李自成檄。詞義激烈。讀者如聽易水歌聲。惜未之見也。

劉夫人江西吉州劉忠烈公（忠烈諱鐸揚州知府天啓時爲魏奄所殺）女。王撫軍子次諧婦也。名淑。幼穎甚。能小詩。甲申鼎湖之變。夫人嘆曰。先忠烈與撫軍兩姓皆世祿。吾恨非男子。不能東見滄海君。借椎報韓。然願興一旅。從諸侯擊楚之弑義帝者。遂建義旗。適滇帥蠻兵精悍冠諸軍。聞夫人名請謁。夫人開壁門見之。旦日報謁。滇帥具牛酒於軍中。高宴極歡。然帥武人也。陰持兩端。又醉後爭長。語不遜。夫人怒。卽於筵前按劍欲斬其首。帥環柱走。一軍皆擐甲。夫

人擲劍笑曰。殺一女子何怯也。索帛筆從容賦詩一首。辭旨壯激。帥悔且懼。夫人曰。妾不幸爲國難。以至於此。然妾婦人也。願將軍好爲之。遂跨馬馳去。（見巢震林史缺文補）

長山劉節之（名孔和）青嶽相國（名鴻訓）之次子。讀書懷大略。慕陸渭南之爲人。所著有日損堂詩數百首。亦學放翁。明末棄諸生從戎。隸劉東平麾下。其婦鄒平王氏女亦善騎射。南渡時。節之與婦各將一軍。婦號令之嚴。過於節之。每相見。有孫權妹刀環風。節之亦敬憚之。後節之爲東平所戕。王間關北歸。爲尼。王吏部爲予筆述其事如此。

海鹽陳若蘭（名麟端）著閨詞一百首。中有云。垂柳依依綠影生。菱荷亭上設棋枰。局中彈出縱橫勢。笑問檀郎若個贏。又云。春閨三月養吳蠶。南陌攀桑滿竹籃。爲避行人回步急。不知髻上墮牙簪。又云。女伴相邀織綺羅。纖纖素手弄金梭。晚來尋取紅牙尺。較得工夫若個多。又云。閨中喜作道家粧。雲錦裁成綠羽裳。學戴星冠簪日月。侍兒齊綰髻雙雙。又云。一自檀郎赴玉京。殘燈挑盡淚

盈盈黃昏又值芭蕉雨。不管人愁滴到明。如此吟詠。去花蕊夫人何遠。（若蘭詩集有綠窗閒咏一帙）

康鄴（字湘雲）直隸邢台人。黃更生內子也。所著有臨風閣集。其菩薩蠻詞有云。徙倚聽疏鐘。臨眠愁殺儂。又玉樓春詞云。妾顏自愧石邊花。君心莫化花邊石。其警句多如此。載燃脂集中。西樵有贈更生詩云。殿前筆札凌雲賦。樓上鶯花織錦妻。蓋紀康之能文也。康又有小重山起句云。春雨蕭蕭杜宇愁。綺窗驚曉夢。蹙眉頭。亦致語也。

王吏部夫人張鄒平總憲文定公孫。亦擅詞賦。西樵官萊子時。嘗作寄內詩。萊子淹留我共君。滯人春月復秋雲。巡檐幾夜頻搔首。海國鐘聲已厭聞。夫人屬和末二句曰。海邊休恨還留滯。猶喜離鴻得共聞。後王官國博官貧不能攜家。每咏此。未嘗不嘆其有思也。

陶令則（名琬儀）雲間陸進士（名鳴珂）夫人也。有九日登高憶芳兒一詩云。有意登高去。遙看江水環。長江連合浦。何日夜珠還。（見雄縣馬之驢詩防初

集

吳中閨秀。贈海陵宮婉蘭一詩曰。雲髻偏宜試晚粧。石牀苔潤恰新涼。採蘭愛向花前立。贏得羅衣滿袖香。婉蘭宮進士（名偉鏐）女。歸余友。冒無譽（名褒）曲室唱酬。才情朗暢。伉儷之篤。亞於墳簞矣。婉蘭尤工畫墨梅。雪葉風枝。翛然有偃蹇瑤台之思。

仁和俞瓊英（名桂）詩文纔一十六篇。才思頗清綺。遇合抑塞。年二十而夭。其擬義山無題云。纔唱驪歌日漸曛。牽裳官道淚紛紛。紅英陌上花無主。錦翼雲中雁斷羣。玉鏡幾時還照影。金爐從此罷燒薰。聞知天上無離別。願得相攜駐白雲。江南古意云。江南三月花柳香。青春欲徂白日長。杏梁陰陰燕新乳。頡頏差池弄輕羽。美人午起自結束。曳鬟垂鬟手如玉。春草滿園蝴蝶飛。金鞍少年他日歸。中秋云。玉鏡澄清漢。金波蕩碧流。桂枝應欲謝。空倚最高樓。（錢塘毛先舒有閱俞瓊英集詩云。宋玉眞愁客。江淹本恨人。何當誦遺稿。霜髻又添新。）

錢塘女子陸么鳳。十四而善吟。嫁後夫遊學於外。陸頗愁思。秋閨晚思三首云。晚來疎雨過人頭。風靜羅衣颺不休。漫拾亂紅題小字。暗驚新句又悲秋。湖烟漠漠晚歸鴉。自掃楓香坐煮茶。一帶芙蓉寒映水。那知秋思屬兒家。翠黛宜顰不耐顰。病逢秋氣轉傷神。空堂莫掛疎簾起。黃菊丹花惱殺人。(毛先舒辨坻)嘉興黃皆令(名媛介)詩名噪甚。恒以輕航載筆格詣吳越間。余嘗見其僦居西冷段橋頭。凭一小閣。賣詩畫自活。稍給。便不肯作。(吳偉業題鴛湖閨咏四律。中有夫婿長楊須執戟之句。想黃所適定楊氏也。)

闕玉錢塘人。甲申之歲。生十三年矣。容貌端麗。又有倍年之覺。父母從小絕珍憐之。已父亡。獨與母暨兄嫂同居。宏光時徵選采女。誤爲賣菜傭所給。竟嫁其子。日令玉職爨炊煨豕。稍暇令鋤泥蒔灌。足去縑約。頭如蓬葆。面目黃黑。衣服泥污。玉悲甚。仰天慟哭而作歌。聞者莫不悲焉。未幾死。(歌曰。父生我兮。中道以逝。母煢煢兮。門衰瘁。兄嫂難與居兮。扶我如目中之塵沙。伊又遣此佻巧兮。胡罪我之實多。彼六禮之或已愆兮。曾貞女子口從。矧要予以桑中兮。夫豈其

爲予之匹。雙我獨有母。兮瘋思泣。血我父而有知。兮怒衝髮。我兄摩挲兄之金。兮骨肉相蔑。嫂旁睨之兮。笑言啞啞。我忽憤氣兮如雲。指漆室女以爲正兮。又告夫司命與湘君。曰予不愛一死兮。弗忍速阿母之下世。願死而有依憑兮。爲凶之厲。嗚呼哀哉。我終死兮。魂獨歸去。明告母兮。幽訴我父。匪我夙夜兮。胡然遭此行露也。縱謂行多露兮。寧我之污也。亂曰。嘉名爲玉。父之命兮。幽辱糞壤。終保貞兮。憂思悄悄。淚淫淫兮。蒙此忍詬。日當心兮。王西樵曰。相其語勢。殆是女中之左徒。徐淑蔡琰。無其矯矯。

辛卯冬。宜興史孝廉（名鑑宗北）上道經淇水。夜宿宜溝客舍。見壁間有數行云。馬足飛塵到鬢邊。傷心羞整舊花鈿。回頭難憶宮中事。衰柳空垂起暮烟。後又云。妾廣陵人也。從事西宮。曾不二載。馬上琵琶。逐塵長去。愴懷賦此。和淚濡毫。促裝心亂。語不成章。時庚寅七夕後四日。廣陵葉子眉識。呼主者問之。知爲宏光西宮也。

王考功筆述云。孫沁亭相公南征紀畧。載女子趙雪華題李家莊壁三詩。并有

感寄。不記其詞。鄒平西青羊店逆旅中有女子題壁者。自署萬里女郎。詩云。獨抱寒衾憶夢眠。第二句不記。馬蹄得得行何已。歸雁提提又近年。蓋和唐人韻也。亦宛轉可誦。又有題濟南東王舍莊壁者。不記姓名。詩云。夢寄車塵馬足中。依稀綺疏夜燈紅。無端野鶴鳴寒柳。驚起愁心對曉風。後小字旁注隨外北征作。陽邱道上盧氏店中曾有女子於七夕題絕句壁上。前一小序。末署云。天孫渡河之夕。夢兒書。夢兒蓋其名也。詩後二句云。惆悵佳期不復還。有似銀屏墜臂井。餘不復記憶矣。數條予并載入朱鳥逸史中。以俱題壁詩。故識於此。

江都倪氏有鸚鵡怨集。其本序云。內子爲閩中巨族。依其舅氏於白門。孟夏歸余。一病不起。客有善李少君術者。爲余招內子魂。叩生前事。歷歷如響。復作詩十數章。本序後附懺詞云。生於閩海。長於西江。又云。衣不曳地。七襄錦織。鴛鴦案可齊眉。六禮書連鴻雁。乃以兵戈萍散。魂驚拍裏悲笳。兼之骨肉花殘。影落天涯。畫角爰求媒妁。締此姻緣。纔咏關雎。忽嗟瘖馬。前端陽之一日。鈿翠埋幽。曾

合。盞之幾時。爐香化燼。又云廿五年之粉黛。辛苦同休。十九日之牀帷。沉疴不起。一氏詩有云。已作靡蕪離恨草。莫看茵蔯並頭蓮。

柴貞儀（字如光）杭州人也。能詩。其咏羅巾絕句云。拭去盈盈淚。攜來冉冉香。殷勤纏素手。縷縷似愁腸。亦極有思致。

通州陳契（字無垢）幼博學。詩文絕工。著有繡佛齋集。嘗作閨怨五言詩。有夢去不關愁。曉來心自惡之句。從叔文起（名宏裔）見之。屢形吟賞。（自注姊有寄予內子數絕句。一云斑管吟成字字珠。才高皇甫重三都。寄言小妹慚非古。文采江南讓大蘇。又云既擅分金又惜詩。千秋鮑叔即名師。枯腸索句慚非錦。聊當梅花寄遠思。蓋姊有茹蕙集。即余作序。）

松陵周羽步（名瓊。一字飛卿）詩才清俊。作人蕭散。不以世務經懷。僕俄有名士態。生平尤長七言絕句。居如皋。冒先生深翠山房。八閨月吟咏頗多。如贈范洛仙云。黯淡消魂獨倚樓。登山臨水又逢秋。簷前垂柳絲千尺。只繫柔腸不繫舟。贈蘇貞仙云。一架薔薇滿袖香。同行誰不羨紅妝。生平最愛清幽事。肯惜凌

波繞曲廊。又寄懷洛仙云。蕭騷越客獨淹留。汗漫西風柳岸秋。安得東風解我意。好吹此恨到揚州。此等語俱極似唐人絕句也。又羽步贈吳湘逸詩云。絮語花陰夜未央。細聆音韻轉悠揚。君今幸作吹簫侶。儂願期爲雙鳳凰。意蓋有爲也。

茂苑吳藥仙（名琪）才情新婉。當其得意。居然劉令嫺矣。與飛卿著有比玉新聲集。蕊仙尤好大畧。精繪染。飛卿贈詩云。嶺上白雲朝入畫。樽前紅燭夜談兵。蓋寶錄也。（黃皆令比玉新聲集序曰。不意唐山房中而後復聞正始。惜未能借江醴陵五色筆。展薛洪度十樣箋。倩衛茂漪手書之。藏之白間。覩闥間耳。吳湘逸儀真人。亦冒推官侍兒也。一名扣扣。蓋摘繁欽定情詩中語。資性穎異。好讀書。文選杜詩一二徧卽能覆誦。年十九天聞者惜之。（按湖海樓本集有吳扣扣小傳。卽謂姬也。家伯氏有同湘逸水繪菴看桃花二絕云。林垌深杳恣聊浪。小霽偎紅露籠光。癡態若雲誰得見。畫隄飛起兩鴛鴦。小閣湘中雲水鄉。有人如玉共文房。三吾昔日應無此。贏得幽情惱漫郎。）

王繡君（名璐卿）通州人馬孝廉（名振飛）之妻也。閨房唱和時以小幅行世。風調綿整。人甚稱之。嘗見其一絕句云。青草湖頭花正妍。綠莎汀畔水連天。輕舟載得春多少。無數飛紅到漿邊。蓋咏舟前落花者。筆情波媚。與題頗稱云。又嘗見繡君一絕云。春寒日日雨如絲。草滿離亭水滿陂。寄語東君須着意。惜花人去未多時。亦自成調。自注繡君妹亦工詩。余內子嘗以白紵乞二王簪花格。便覺瓊枝璧月。爭映行間也。

西軒集（西軒淮南邱象隨所居軒名）載婁江女子燈夕寄答一絕。清怨迢迢。耐人尋味。詩曰。荒樓何處忍吹簫。寂寞燈前涕淚遙。忽看病中書信至。却傷今夜是元宵。閨閣中有如許思理。惜已軼其姓名。原唱係襄陽年少所作。有一行清淚了元宵之句。辛楚欲絕。亦不知誰家年少。殊可惜也。（王阮亭感事三章附錄宵後。少小愁多不自持。鍼牀初繡合歡枝。春風筵上迴中後。夜雨燈前擁髻時。雙黛痕消鴛翠減。單衾香細鷓鴣知。定情三五遙相憶。詎獨繁欽解賦詩。曼睩橫波溼鏡潮。紅蘭當戶柳垂條。爲歌白石逢郎艷。曾約黃金貯阿嬌。

酒病正濃過上已。春愁難安近花朝。那知更逐香雲去。楚水巫山萬里遙。金鵲鴉。鸞鳥柏門。琴川春水記啼痕。機中錦字勞相憶。肘後香囊是舊恩。密約難忘松柏樹。新居聞傍苳蘿村。春江花月千餘里。悵望流光欲斷魂。又附錄邱象隨摘語爲起句一首。夜雨燈前擁髻時。上紅初引第三絲。玉鈎穩壓重簾靜。海燕深棲煖夢遲。十七雲鬢年最少。一雙星鵲誓先知。風流意極銷魂處。半近粧臺有所窺。

吳門家太僕（名濟生）示余以望遠圖。乃十四歲女子所作。霧鬢雲鬟。薄施水墨。真遺世獨立矣。（錢塘陸圻望遠曲十四首。今錄其三。）采罷薜蘿蕪望故夫。藐姑仙子不曾殊。屏間歷歷窺青瑣。道上明明種白榆。舉體乍飄連理帶。定情羞解合歡襦。可憐漂泊刀頭約。坐看天街夜月孤。雙啼玉筍濕羅巾。爲結相於訪故人。自是口中生石闕。何堪腹內轉車輪。儂聞梧子心難變。郎比蓮花貌絕倫。何事小姑偏獨處。清溪簫鼓夜迎神。皓腕輕羅驗守宮。纖纖手爪似春葱。常將小婦誇中婦。不擬賢雄是故雄。九醞滿浮金盞落。兩環眞作玉玲瓏。

何妨深鎖青苔濕。說與昭陽絕不同。

夔州李翰林（名長祥。崇禎癸未進士官庶吉士）亂後僑居金陵。娶姚夫人。善丹青。得北宋人筆意。曾爲雲間董大（名黃）母夫人畫一粉箴。烟墨離離。深秀不可言。爲香奩畫手中逸品第一。（或曰夫人又工畫仕女圖）

江西康孝廉（名范生）夫人亦金陵女也。工畫竹。最似管夫人手法。孝廉頗矜重之。嘗以一扇貽余。綠篠明玕。便覺白日欲翳。（王考功曰。朱遠山夫人文江集。有和康夫人寄外詞。似又不僅擅繪事也。）

江陰女子周淑禧。處士周榮起女也。工畫花鳥。在徐熙黃荃間。好事者爭以餅金購之。同時又有宜興盧丹善畫美人。每作一圖。皆婦爲之點睛云。

海昌女子李因。字今是。號是庵。作水墨花鳥。幽淡欲絕。王吏部嘗題其芙蓉鷺鷥畫云。寒入金塘花葉孤。非烟非雨態模糊。姚家女子丹青絕。寫作芙蓉匹鳥圖。姚月華小傳。嘗作芙蓉匹鳥也。李是葛光祿無奇夫人。著有竹笑軒集。又以節著。

秦淮宋蕙湘。教坊女也。被北兵掠去。題詩郵壁。悽然有去國離家之痛焉。詩凡四首。猶記其一云。風動江聲羯鼓催。降旗飄颺鳳城開。君王下殿將軍死。絕代紅顏馬上來。王西樵曰。絕代一作薄命。

秣陵崔秀玉。父吳門老教授。家貧。居鷓鴣鳴埭下。常口授秀玉書史。無不明曉。著有耽佳閣詩集一卷。如咏杜鵑花句云。恰喜花名似鳥名。慧絕可想。丹陽賀宿述。

廣明弟（名玉璫）自北歸。以郵亭女子一詩示予。予爲憮然。詩曰。凌波卸却換宮韉。女作男粧實可嗟。扶上高樓愁不穩。泪痕多似馬蹄沙。蓋流人羈子過之繫念矣。（詩更有自序云。乙酉六月一日。遇難寶林庄。傍徨無地。灑淚而書。以爲異日話尋之具。廣陵十七歲女子張氏淚筆書于方順橋店中。

耕塢老人爲余言。予壬寅過鄭州。見驛亭有姑蘇女史芳芸詩。猶記其末句云。銀缸燒盡心還熱。畫鼓金針月已西。最爲清麗。其全首錄藏敝篋。曾舉示映然子。卽采入名媛詩緯。王考功所載。亦余言之也。予閨人亦有和韵。

乙酉澄江之變。士子黃姓者。妻秦氏。被擄不。屈過金山。題詩壁。上末二句曰。落
團夜坐三更月。懺悔今生未了緣。明日投囑殞。兵去復甦。適遇乳母夫過。携歸
復合。

劉阿李者。李氏。字小鳳。長千里人也。其父母故貧。幼鬻于秋進士（章光）家。耿
罹平陵之難。自妻姚朱以外。隨死者凡四人。小鳳法當入官。蘭陵劉生捐金贖
之。左右其事者。則馬大將軍之力爲多。（將軍名允昌。吳婁東人。蒙古故將之
裔。明末爲黔南大將軍。天兵南下。因束身來歸。天子嘉之。賜田宅金帛有差。
視諸儀同秩。）（聞者義焉。與小鳳同時入官者。一曰雙蓼。後代小鳳選入掖庭。
一日服益。則年最少。後不知所終云。鄒祇謨有傳。）（新城王士禎詩曰。天涯芳
草碧。氤氳擁髻燈前感少君。共道朱家輕一諾。非田蕭寺識雙文。定情欲賦明
璫解。心字初濃斗帳薰。夢到葭萌關上去。還如蕭總識香雲。）（花枝似玉咏紅
顏。曉鏡明窗幾寸山。小閣春濃香蔽膝。後堂蝶拂玉交關。乍宜角枕哀生咏。自
賣青溪盧女還。罨畫樓台烟月夜。劉郎應不憶人間。）

李姬（名香）秣陵教坊女也。母曰貞麗，有俠氣。嘗一夜博輸千金立盡。姬亦俠而慧，畧知書，能辨別士大夫賢否。張學士（溥）夏吏部（允彝）尤亟稱之。十三歲從吳人周如松受歌，盡得其音節，然不輕發也。嘗一日者，故開府田仰以金二百鎰邀姬一見。開府向兒事魏闥者，又姬嘗以他事獲罪阮懷賓。至是喟然嘆曰：田公寔異於阮公乎？峻却之，卒不往。姬與歸德侯方域善，曾以身許方域，設誓最苦，誓辭今尙存湖海樓篋衍中。又方域與陳處士小札曰：昨域歸來有人倚闌私語，謂足下與域至契。既知此舉，必在河亭凝望，冀月落星隱，少申夙諾。不意足下誘李君虞作薄倖十郎也。然則一夜徬徨，失却十年相知。羅袖拂衣，又誰信此盛遇乎？域即冒受法太過之嫌，然有意外之逢。此卽至誠之報也。足下表章，自是不藏善之美。其實天王明聖，不介而孚，遭際如此，臣願畢矣。今日雅集，亟欲過談，而香姬盛怒足下，謂昨日乘其作主而私讌十郎，堅不可解。則域雖欲過從，恐與人臣無私交之義，未有當也。翫此書詞，姬生平風調爾爾。）

松陵吳氏（名銀姊）與鄰邑王生。以才藝相昵。後事露。庭翰氏板所供狀。灑灑數千言。頗露致語。一時爭傳誦焉。（辭多不載。中有云。昔淡眉卓女。服縞素而犇相如。漢皇弗禁。紅拂張姬。著紫衣而歸李靖。楊相不追。古有是事。今亦宜然。蓋委放誕于閨房。寄清狂于螻蟻矣。）

陸姬孟珠。或曰。嚈城大家女也。曾爲侯門寵妓。侯裁于法。姬邑邑不得志。流落江海間。悽然擁髻。有東京夢華想。製詩一卷。自名紅衲道人。（□□□贈姬詩二首。辭漢金人淚滿腮。西園東閣已成灰。莫嫌鳥爪麻姑少。曾見滄桑幾度來。剩水殘山花信稀。瑣牕鸚鵡舊籠非。農家十二珠簾外。可有尋常燕子飛。）

潁水劉公猷比部（名體仁）寄王推官家集數種。中有賢媛詩三卷。一名雲錦樓詩。係進士劉摺妻李氏著。李氏中丞某女孫。一名紉蘭軒詩。進士劉佐臨女著。一名寶田堂詩。秀才劉振女著。俱可誦。汝潁風流。卯金爲最。孝威諸妹。有天人之譽矣。（此條係西樵筆述。并注雲錦樓偶成一絕曰。花前閒步數蜂鬚。霽色初晴小院隅。巧試金釵移日影。闌干劃處損紅朱。紉蘭軒新月一首曰。宿

雨夕方歇。雲間天氣清。星河仍欲淨。涼月復來迎。簾捲花初好。螢飛火自明。虛簷移凳久。新茗聽新聲。又櫻桃起句曰。竹實方成筍。朱櫻已及時。寶田堂雪夜起句曰。雪飛忽滿徑。入夜合瑤天。

臨邑邢慈淨子愿（名侗官太僕）先生之妹。善畫觀音大士。莊嚴妙麗。用筆如玉台膩髮。春日游絲。（慈淨適武定馬方伯。馬夫人雅工詩文。詩有非非草。蘭雪齋集二種。錢宗伯選入列朝詩集者。非其佳製也。從馬宦黔中。馬卒于官。夫人扶柩還塗。中作黔塗畧一書。文筆高古。有班惠姬之風。予在萊海時。于劉幼孫先生家見夫人答劉一書。詞極雅健。又于張渤海家見其硯銘二首。亦皆有致。又工書酷類太僕。刻有之室集帖。婦人筆墨。見于金石者。房璘妻高而外。殆不多有。然高文詞不多見。則夫人兼長爲尤難矣。）

余嘗游宿遷北司嵒山。有石刻女郎湯文玉遊山詩云。山雨初晴洗佛螺。春風幾處揭青莎。采香不倦溪邊路。多少飛紅趁襪羅。詞極新倩。然與他遊詩雜書一石。蓋他人爲刻之。非其自書也。

女子琅玕濟南德州人也。曾有句云。自憐身似楊花。願向天涯情死。字數不多。讀之居然悵惘。（琅玕題德州旅壁。一序二詩。序云。妾家齊右。歡是吳儂。玉樹其人。紅葉贈我。既見君子。信綠綺之可媒。我思古人。願紅拂以爲友。佳人久嗟薄命。好緣肯俟來生。苦海斯離。多露勿畏。寶馬踏來。剛半夜。老崑崙焉所用之。彩鸞飛去。向天邊。莽吒利從茲逝矣。聊題短句。用示情癡。詩一云。何須押衙妙手。五更暗度香鞍。誰續奇女子傳。小名喚作琅玕。二云。昨宵紅拂深閨。今日高唐去矣。後二句。則所載也。此女子不特筆豔。人亦復奇。

王菊枝工小詩。雋令殊甚。廣東程內史。（名可則）爲余說。洵可謂珠娘之絕調矣。（粵中生女號珠娘。菊枝有絕句一首。紀其末句云。與孤牕雨一般聽。語甚雋。今選家或改作孤牕夜雨一般聽。庸甚矣。）

無錫顧文婉自號避秦人。詩詞極多。恆與王仲英相倡和。詞見倚聲右集。（文婉浣溪沙云。風雨妨春苦不寬。開簾怕見嫩紅殘。錦屏深護早春寒。新嬾一身扶不起。愁痕萬點鏡慵看。空拈班管寫長歎。又云。獨坐無聊對簡編。閒題恨字

滿花箋。夕陽西去轉淒然。掩淚低徊粧閣畔。掀簾私語瘦梅前。此時試問阿誰憐。又云。曉日凝粧上翠樓。惱人春色徧枝頭。湘簾風細蕩銀鈎。燕子未歸寒側側。梅花初落恨幽幽。重門深鎖一天愁。

長沙女子王素音爲亂兵所得。題詩古驛有云。可憐魂魄無歸處。應向枝頭化杜鵑。見者莫不憐之。王阮亭有減字木蘭花云。離愁滿眼。日落長沙秋色遠。湘竹湘花。腸斷南雲是妾家。掩啼空驛。魂化杜鵑無氣力。鄉思難裁。楚女樓空。楚雁來。蓋爲素音作也。乙未歲。阿貽偕同邑傅侍御（名辰）北上。至白溝河。頓此邸中。見壁間有和素音詩者。覓原題不得。以問居停。指牆邊積木堆五六尺許。云在此中堵壁上。時方隆冬。阿貽與侍御急欲讀素音詩。乃同從奴共運木及半。而詩盡出。侍御執炬。阿貽呵凍蘸筆錄詩。竟共讀。書已復各爲和章。書之壁。書竟乃命酒劇飲。始覺手腕欲僵。各大笑相顧。謂癡絕也。此事亦極可傳。余後此至邸。亦和韻。末有也學低頭拜杜鵑之句。素音原詩共三絕。前有小序。是儷語。凡二百許字。其精麗可與琅玕女子相敵。載余燃脂集中。（自劉比部

以後共七條。俱係西樵先生筆述并注。以下俱係湖海樓自撰并注。

江西李侍郎（名元鼎）與夫人朱中楣（字遠山）有文江唱酬一集。盛行于世。（常熟錢□□文江集序有云。珊瑚筆格。綠沉之管。交輝玳瑁書籤。雲母之箋。雙璧花深網戶。每刻燭以分題。燕乳綺疏。或擁書而徵事。又云。雕軒文駟。驂玉馬以北朝。翟茀鞠衣。伴角巾而東下。水精簾幙。鎮日焚香。雲母蓮花。午年辟蠹。豈若敬通見抵。但對孺人子美漂流。長隨妻子。

湯畹生（名淑英）長洲人。適休寧吳翮。工詩善奕。年三十六夭。（其暮春南鄉子云。天氣最無憑。乍雨還晴。又做陰。時侯困人三月也。清明暗買韶光柳醵金。杯酒恣閒吟。寂寞春庭門草心。院落黃昏。簾幙靜深深。獨坐譙門又起更。王西樵爲予言。畹生詞佳者最多。予錄二十餘篇入燃脂集中。）

范滿珠休寧人。范眉生（名良）妹。詩才與兄相稱。述母一詩曰。獨眠不禁冷風呼。摧落梨花滿地鋪。可奈壻亡留女在。那堪兒死更孫無。枕前有夢誰人伴。燈下無言已淚枯。不是彼蒼昏昧久。如何伯道暮年孤。詩語絕痛。又旅夜絕句。

云。殘燈明滅。亂蟲啼。展轉鄉心月漸低。夢對家人纔欲語。雞聲依舊到窗西。淒淒楚楚。可念也。詩名繡蝕草。紅豆老人爲之序。

周明嫺（名庚）莆田人。諸生陳承續妻也。生平製撰所見不多。曾覽其尺牘一卷。清遙秀映。允爲玉台之名構矣。與仲嫂書云。感念化者。欲爲陳立傳。以之才之美。無子無年。搗管垂毫。惟聞猿哭。是以更端而未就。當續成之。敢不誠于陳耶。又云。三國志經嫂所點定。庚應窮其贊辭。但不解于古人何所厚薄。只覺此心爲劉。與外一書曰。離騷之所以妙者。在亂辭無緒。緒益亂則憂益深。所寄益遠。古人亦不能自明。讀者當危坐誠正以求。然後知其粹然一出于正。卽不得以奧鬱高深奇之也。又云。林媛松石圖。已見歲寒之志。欽其至性。以一絕風之畫首矣。亦不敢展玩。恐風雨悲鳴也。仲嫂能定三國志。林媛能作松石圖。新婦俱于此不凡。惜俱逸其姓氏。（見尺牘新抄。王西樵曰。周詩名羹繡集。凡百餘首。是宗竟陵者。亦有一二可錄。小札名十七帖。語語清雋。備錄燃脂集中。）甲申之難。賊人後宮有宮人費氏者。爲賊所獲。將污之。氏紿賊曰。身是長公主。

也。鼠輩詎敢爾。賊舍之。居無何。俟賊沉湎後。挾匕首立斷數賊首。遂自殺。（南昌陳宏緒詩云。衝天劇盜乘金輿。含元殿化綠林區。赭袍日角不知處。鴟鶚飛向陛前呼。團營去盡威。走黯黯風沙掩陽烏。玉貌嬋娟散如雨。紅鴉韓嘴泥中逋。賈家嬌女明光姝。巧手丹青不能圖。芙蓉墮井井水涸。銀牀不覆繡羅襦。衆驚窺視爭救出。共惜花間顏色殊。姝生妙計賺蛾賊。稱是崇禎公主軀。鼠輩何敢犯龍種。汝主遙聞磔汝徒。渠魁後驗知非是。擲向帳旁于思胡。身藏匕首口佯許。鐵衣醉倒紫氍毹。挾刃立刺咽喉斷。血縷亂濺殘香祛。我仇旣報我安徂。七尺應須傍鼎湖。談笑自蹈霜鋒凜。髮鬢不受黃埃污。盈廷豈少如戟鬚。幾個男兒耀簡書。寒燈哭拜披香影。三十六宮春草枯。）

錢塘女子吳柏（字柏舟）未嫁而夫卒。柏衰麻往哭。遂不歸母家。苦節十餘年。遭疾夭歿。所著有柏舟集數卷。詩極鍛鍊。詞尤富。而長調更絕工。不減徐夫人湘蘋也。古文尺牘。在明瑛之上。眞奇女子矣。

洞庭女子遭亂。自投漢陽江。流至壽昌。土人憫而瘞之。獲寸帛于衽衣。油楮密

固展視爲絕句十首。聞者爭傳誦焉。詩有云。征帆又說過雙姑。掩淚聲聲怯夜
鳥。葬入江魚沉底後。不留青塚在單于。結響悲楚。運格端好。詎在班婕妤下。令
千古以下王嬙蔡炎花藥夫人流輩讀之。能無愧赧欲死。（載錄其詩四首。生
小伶仃畫閣時。詩書曾託母兄師。濤聲夜夜悲何急。猶記挑燈讀楚辭。當年閨
閣惜如珍。何事牽裙繞水濱。報與雙親休眷戀。入江原是女兒身。生平猶未遇
簪笄。死後狂瀾嘆不齊。河伯有情憐薄命。東流爲繞洞庭西。照影江干不勝悲。
永辭鸞鏡歛雙眉。朱門空許成秦晉。死後相逢總未知。耕塢老人云。女姓蘭
名玉真。或曰湘潭人。或曰卽吾邑人。以入水無月餘。尙能逆流之理。然玩其句
有雙姑語文。似從下江而上者。俱存以備攷爲是。）

王十一爲余述林四娘事。幽竊而屑瑟。蓋搜神酉陽之亞也。四娘自言故衡邸
宮人。（王太史有林四娘歌。歌首繫一小序。序云。晉江陳君寶鑰。分臬青州。入
署之夜。堂上忽聞樂作。空中隱隱呵殿聲。如貴人騶從至。至則燿燎輝煌。杯饌
羅列。賓客雜沓于堂上。俳優厮養奔走于堂下。胥役大駭。走白陳君。陳君固已

心異之矣。因率衛卒呵禁之。不止。挾弓矢操而射之。不止。持轟天雷諸大炮擊之。復不止。越數日。陳方燕燭坐小齋。而風雨聲有自遠至者。齋中窸窣如人行聲。少須。雙鬟褰簾入。唱曰。林四娘侍兒青兒啓事。娘子願謁使君。陳愴悅未答。而美人翩然來矣。妖質雪瑩。繡紋花映。修蛾自歛。斜紅半舒。揄袂以前。向陳而拜。拜畢就坐。徐徐啓曰。某金陵林四娘也。幼給事衡王。中道仙去。今暫還舊宮。竊見殿閣毀于有司。花竹淪于禾黍。某故有宮中儔侶。話舊情深。停車無所。敢假片席于使君之堂。某固無能有德于使君。然亦非有害于使君。今與使君爲方外交可乎。某有小酒食。願同醉飽。并及從者。微有薄犒。幸無深訝焉。陳雖疑且畏。然度無可如何。遂偕飲。及下箸。則珍餚也。引杯則良醞也。從者視其犒。則朱提青蚨也。意始稍稍定。後則夜分必來。更闌卽去。數入內與陳夫人姬媵締交。若娣姒然。陳之客過臨淄者。或請接見。無不歡好。卽席酬和。落紙如飛。詞中憑吊故苑。離鴻別鶴之音爲多。噫。嘻。此何爲者耶。又謂四娘貌本上流。妝從吳俗。秀鬢髮。峨如遠烟。覆以霧縠。綴以珠璧。身縈半臂。足躡翠靴。錦絛雙環。環

懸利劍。冷然如聶隱娘紅線一流。婢東兒青兒皆殊麗。恒侍左右。人亦無敢調者。居三月一夕。別陳君欲去。且以青兒爲託。把酒賦詩。臨歧悵別。聳身碧霄。蹤影頓絕。青兒後一二來。久亦不至矣。異哉。曾記其一詩云。玉堦小立羞蛾蹙。黃昏月映蒼烟綠。金牀玉几不歸來。空唱人間可哀曲。

閻素華字雲衣。以長板橋頭人事宛陵唐內史。一名允甲。或稱其羅羅羸秀。孤情絕照。綽有林下風。宣城俞綬爲立傳。傳略曰。唐先生官中秘。亡幾何。爲壬人所屏逐。令人至。舉牛衣時相慰藉。如疇昔。自是不復居國門。歸而稅駕。雁翅故居耳。又時時有跡之者。游徼織于道。厲染相屬。無弗辟匿者。唐先生叱令人曰。嚙啗盡去。諸令人對曰。曩者妾不以公貧。故不謹事公。安則曜之。危則違之。失事人者禮。且箝幘者流。除閨闈安所措足。死卽死耳。已事卒定。爲唐先生友者。罔不以令人能執義云。

周炤字寶燈。江夏女子也。湘楚中人。傳其丰神纖媚。皎好如佚女。性敏給知書。歸漢陽李生。生名以篤字雲田。生固慕炤。旣得炤。則益大喜過望也。然家先

有大婦。在炤眉黛間。恒有楚色。李生愛客。遊常携炤殘箋數幅以示友。人人無不色飛者。生篋中有藏炤自寫坐月浣花圖。雙鬟如霧。烘染欲絕。圖尾有小篆二。一曰絡隱。或曰炤。又字絡隱云。董以甯周炤傳云。江夏周某女也。某官山東按察使僉事。遇閨難。殉節死。炤哀之。作悼懷之賦。略曰。侑江流之浩浩兮。弔禰衡與屈平。彼填江而不溢兮。何以抒其憤盈。草參差而並生兮。孰辨其爲杜蘅。鳥之嚶吟。亦各有所謂兮。而人孰知其情。賦長餘不錄。讀之如聽三閭大夫姊嬃吟也。龔百藥傳云。寶燈年十九。所至雖謹自蔽匿。人得窺見寶燈。蓋天人也。寶燈有次林文貞韵寄王玉映詩云。夫子南歸後。永夜述名媛。生小貯金屋。弱齡弄玉研。海桑失廬畝。竹素易釵鈿。感爾瑤華贈。時時動紈扇。菱荷綴鴛翠。天真寫素綯。詠絮謝女匹。織錦蘇娘彥。儂是小家女。畏令仙人見。注目倚鏡閣。因風寄方便。所恃一片心的。託澄練。又有聞外君。釋香子將歸一律云。茶花梅蕊自紛飛。小圃身如坐翠微。不定陰晴天欲倦。何方燕雀晚知歸。王孫歲歲懷芳草。侍女朝朝倚繡帷。見說畫眉人且近。湘山如黛未應稀。 (完)

香艷叢書一集卷二終


卷二

集

100







香艷叢書

一集卷三

婦人集補

如臯冒丹書青若著

秣陵丁雄飛（字菌生）婦卜氏（名曇字四香）婉孌柔惠。歸丁以後。每有憂生之嗟。常讀霍小玉及小青傳。淚簌簌如雨。性穎悟。雄飛在燕都。得四香手書。書中念字俱少一畫。始悟念字從人從二。心中去一畫。殊見用意也。年三十夭。雄飛悼之。作家人緒語。（經云。不亂取手香。不淫色體香。不妄語口香。不淫害心香。命字四香以此。）

清河丁氏。潘尊賁妻也。幼有劉三娘之目。能詩歌。其舟泊燕城云。流離一孤舟。魂黯燕城路。不見折瓊花。惟聞悲玉樹。二十字中。乃使人居然悽惻。（見淮南詩城又山陽蕭氏亦能詩。嘗有絕句云。花谿紅亂燕雙飛。錦水香泥春獨歸。爲憶金釵樓上夜。琵琶度月下簾幃。）



龐紉芳（名蕙孃）吳江吳聞璋（名鏘）婦。有紫藤花下分賦一詩。詩曰：年來愁病強支離。也向花前醉酒卮。綉閣開尊同北海。金釵雅集勝南皮。錦雲夜月千層浪。紫玉春風萬縷絲。何事今宵稱絕勝。筵前道韞總能詩。（見鼓吹新編陽羨陳先生曰：紉芳曾于衍波箋上書春詞一首。詩云：春深詩句滿經函。小字紅箋手自緘。睡起有情疑好夢。愁來無力換羅衫。繁花滿樹空教謝。芳草盈庭未忍芟。蕩子天涯歸未得。雙棲嗔殺燕呢喃。詩絕佳。字畫亦極明秀。）

女冠龍隱。俗姓夏氏。華亭人也。常因六姊孫儷簫沒于丁亥家難。爲賦一詩云：憶昔于歸紈綺叢。郎家聲譽擅江東。肅雍自叶房中樂。散朗仍歸林下風。日暖畫樓彤管麗。春深珠箔錦蘭通。綵雲散後空憑吊。野哭荒郊恨幾重。又閨思一律云：碧天明月影遲遲。翠袖輕寒香露滋。海內風塵勞客夢。江東羅綺擅文辭。頻驚桂棹迴前渚。時整花鈿立小墀。子夜明燈猶未寢。魚箋珍玩感婚詩。詩句清綺。豈獨君家大哀一賦獨擅才子耶。（又有王氏道元者。亦女冠也。陳留人。其禪坐書懷一律最流麗。詩云：碧雲靜鎖梵王宮。猶似明霞拱禁中。玉樹舊枝

歸淨業。內家新調擅宗風。三千里外腸堪折。十二年前淚暗紅。欲悟無生何處是。禪燈移照鏡台空。清句如此。可謂女中惠休矣。王考功曰。孔植在京師納一小姬。姓宋。貌絕婉麗。一日于几上寫明月二字。孔植問書此云何。姬笑不答。孔植爲予言之。余爲賦一絕云。雙蛾學畫指初揩。偷擲紅毫小字佳。應識參軍新句好。願隨明月入君懷。孔植持示姬。姬復爲一笑。末七字明遠句也。又東昌蔣夫人能爲小詞。其如夢令一闋。頗爲人所傳誦。全錄入燃脂集中。不記其詞矣。

（又云。東昌有尼名泉玉。亦有詞句。劉司李孔植名楷爲余道之。）

張氏湖廣黃岡烏林鎮人。工詩詞。先是已字某。父忽以他故悔。將改字富商。女聞之泣曰。兩髻何在。遂至此乎。引刀自剄死。衣帶中有詩云。搖落林居風日清。黃花白露客心驚。頗聞洵美非吾士。却憶當年敢再生。隱几芳魂飛海嶼。捲簾秋色滿山城。年華轉換俱陳跡。底事猶牽世上名。（啓正野乘曰。張氏類得道者。縱不以節著。亦當以才顯矣。雖然。與其爲班姬蔡媛。曷若爲共姜叔姬之尤愈乎。）

吳瑟瑟（字數青）姑蘇人。錢進士（名位坤）姬也。兄年十七，亦美丰姿。美音律，能爲大小李將軍畫。倩妹設色，鮮妍遠過其兄。兄嘗師朱文甫。朱畫冠當時，每稱若妹殊勝阿大也。瑟瑟畫最著者，李夫人簫史圖、孫夫人放鵲圖（錢位坤瑟瑟小傳曰：壬午八月既望，瑟瑟于歸時，清露晨流，疎星夜落，若遠若近，楚楚可念也。）

王賓孃，湖廣黃岡人。七歲能誦唐詩絕句千首，十歲能屬文，十五博通經史。家人以女博士呼之。後因所天不偶，心恒侘傺。詩文諸藁，都不以示人也。賓孃王貞定（名追駿，丁丑進士）女。

女道士曹素侯，姑蘇人。曾有一詩云：梧桐一葉早驚秋，鶴夢留人塵夢收。情逐綺雲飄玉宇，心隨碧露蕩銀鈎。浪遊清院難消日，偷上層樓未敢愁。空憶舊時衣帶緩，不勝遙夜淚重流。據此才思，或亦魚元機一流。

張一孃，婁東張太史（名溥）長女。太史無子，遺書數萬卷，盡歸一孃。自十三經及廿一史，無不淹貫。文擬左國，詩法漢魏，尤喜臨十三行。人以爲獻之復生，適

同邑吳縣祖。陳黃門子龍挽太史詩曰。若從此日論天道。應有傳經鄭小同。後太史遺腹。又生一女。言之三嘆。

王兆淑（字仙琬）通州人。亦和秋柳詩曰。春來眉展試羅衣。過眼繁華今又非。吳苑笙歌愁月盡。隋堤花草怨人稀。風吹荒岸流螢墮。葉落村墟黃蝶飛。片影涼光秋欲滴。賞心如夢肯相違。夕陽疎影使人憐。殘恨西風冷碧烟。彭澤舉盃初漉帽。秦川罷織欲縫綿。營中畫角思歸日。馬上章台憶昔年。最是悲涼成九辯。鷓鴣啁哳寂寥邊。二詩殊濯濯有致。

予竭來荆南道中。嘗訪求先民著述。客冬從松陵楊列歐進士。得陳定生先生山陽錄。今年春。又從沈呂黃孝廉。得其年檢討婦人集二書。並夙所心慕者也。間嘗觀之。山陽錄感懷今昔。渺若山河。所謂人之云亡。邦國殄瘁者。非耶。泊婦人集。則風流蕩蕩。有典午名士之習。然而故家遺俗流風。不與玉樹後庭同其消滅者。亦髣髴于是乎見。予故合二編而抄之。俾覽古之君子。知有明所以結三百年之局者。區區南部之烟花。不烈于東京之黨錮也。辛亥

齊豐宿山日吳騫題

迦陵先生婦人集。向頗疑其名不雅馴。後閱焦氏經籍志總集類載婦人詩集二卷。宋顏竣輯。乃知前輩用字之不苟如此也。楊復吉附記。

跋

迦陵先生婦人集。續本事詩。曾採取一二。余購之二十餘年。迄不可得。意謂天壤間無是書矣。辛亥九月。海甯吳丈槎客歸舟。攜示。因得睹其全豹。并如皋冒氏叔若姪纂註補遺。網重寶于深淵。合雙龍于劍水。快何如之。十月既望。震澤楊復吉識。

艷體連珠

吳江閩秀葉小鸞瓊章著

髮

蓋聞光可鑒人。諒非蘭膏所澤。髻餘繞匝。豈由脂沐而然。故艷陸離些。曼鬢稱矣。不屑髭也。如雲美焉。是以瓊樹之輕蟬。終擅魏主之寵。蜀女之委地。能回桓婦之憐。

眉

蓋聞吳國佳人。簇黛由來自美。梁家妖艷。愁妝未是天然。故獨寫春山。入錦江而望遠。雙描斜月。對寶鏡而增妍。是以楚女稱其翠羽。陳王賦其聯娟。

目

蓋聞含嬌起艷。乍微略而遺光。流眄揚清。若將瀾而詎滴。故李稱絕世。一顧傾城。楊著回波。六宮無色。是以咏曼睩于楚臣。賦美眇于衛國。

唇

蓋聞菡萏生華。無煩的絳。櫻桃比艷。豈待加殷。故裊裊餘歌。動清聲而紅綻。盈盈欲語。露皓齒而丹分。是以蘭氣難同。妙傳神女之賦。凝朱不異。獨著擣素之文。

手

蓋聞似春筍之初萌。映齊紈而無別。如秋蘭之始茁。傍荆壁而生疑。故陌上采桑。金環時露。機中識素。羅袖恒持。是以秀若裁冰。撫瑤琴而上下。纖如削月。按玉管而參差。

腰

蓋聞玉佩翩珊。恍若隨風欲折。舞裙矯旋。乍疑飄雪餘香。故江女來遊。逞羅衣之宜窄。明妃去國。嗟繡帶之偏長。是以楚殿爭纖。最憐巫峽。漢宮競細。獨讓昭陽。

足

蓋聞步步生蓮。曳長裙而難見。纖纖玉趾。印芳塵而乍留。故素縠踟躕。恒如新

月輕羅婉約。半蹙瓊鉤。是以遺襪馬嵬。明皇增悼。凌波洛浦。子建生愁。

全身

蓋聞影落池中。波驚容之如畫。步來簾下。春訝花之不芳。故秀色堪餐。非鉛華之可飾。愁容益倩。豈粉澤之能妝。是以容暈雙頤。笑生媚靨。梅飄五出。艷發含章。

七夕

蓋聞神女行雲。皆由于誕。姮娥奔月。亦豈爲眞。故世咸謂曾得支機之石。私竊以爲未至飲牛之津。是以乞巧空傳。誤捉蜘蛛之織網。填河何據。漫言靈鵲之渡人。

附劉孝綽有艷體連珠季女瓊章倣之作以呈予予爲喜甚亦一拈管然女實有仙才予拙不及也沈宜修宛君作

髮

蓋聞魏妃雙翼。艷陸離而可鑒。漢后四起。曜佐儵以齊光。故盛鬢不同。豈資膏

澤如雲飛髻。自有芬芳。是以鬢曉秦宮。競縈粧之繚繞。憐生晉主。垂委地之修長。

眉

蓋聞修蛾曼睩。寫含愁之黛葉。新月連娟。效寄情之翠羽。故遠山堪入望。于印壚。曉粧無倩。畫于張嫵。是以承恩借問。枉自爭長。淡掃朝天。方難比嬋。

目

蓋聞朱顏既醉。最憐炯炯橫秋。翠黛堪描。詎寫盈盈善睩。故華清宴罷。偏教酒半微闌。長信愁多。不損泣殘清采。是以娛光眇視。楚賦曾波。美盼流精。衛稱頤態。

唇

蓋聞勻檀傅麝。其如洛水之辭。寫絳調朱。豈若巫山之韻。故歌憐白紵。貝徵露而香聞。笛羨綠珠。蒼半啓而紅運。是以芬澤非御于桃顙。茜膏無加于櫻暈。

手

蓋聞流水題紅。無非柔荑寫恨。盈襟采綠。亦因纖素書情。故春日迴文。逞摻摻于機錦。秋風搗練。響皎皎于砧聲。是以魏殿神鍼。更誇巧製。玉奴絃索。不負時名。

腰

蓋聞嫋嫋纖衣。非關結束而細。翩翩約素。天生柔弱無豐。故飄若春雲。常愁化綵。輕如秋雁。還恐隨風。是以色冠昭陽。裙有留仙之襲。巧推絳樹。舞傳迴雪之容。

足

蓋聞淺印蒼苔。祇爲沉吟獨立。遙聞環珮。却因微動雙纏。故窄窄生蓮。東昏于斯娛矣。纖纖移襪。陳思賦其可憐。是以看上苑之春。落紅宜襯。步廣儲之月。芳綠生妍。

卷三

集

侍兒小名錄拾遺

宋晉陽張邦畿著

少蓬洪公作侍兒小名錄好事者多傳焉。王性之補錄一卷意語盡矣。余友溫彥紹復得一卷以授余曰。他日觀書有可採者續錄之。乃作拾遺。

劉商夜遊湘中秋月方皎。忽見水中一畫舫。有七八女子容止儼麗。若爲呼盧戲。其具俱布希世之寶。前有紅臘枝擎以金盤。商駭訝未絕。聞舟中語曰。紫陽真人昨給劉商黃精二斤。乃玉帝所餌之餘。食之者爲地仙。一女子曰。此人可邀致之。忽聞人呼商。遂卽舟邊拜。一女子命侍兒楊孟珠斟一杯雲母漿。商取飲。一女子笑曰。此人不固者。無丹元氣耳。因曰。慎自精修。去爾貪忍。靈餌漸近。天爵宜修。復送之岸。商覘之。直至舜妃廟前。落帆入廟。黎明。廟中得巴牋詩句。後果得至人遺精服餌。後不知所在。(樹萱錄)

寇萊公有妾曰蒨桃。公因會贈歌姬以束綾蒨桃作二詩呈公曰。一曲清歌一束綾。美人猶自意嫌輕。不知織女螢牕下。幾度拋梭織得成。風勁衣單手屢呵。

幽牕軋軋度寒梭。臘天日短不盈尺。何似妖姬一曲歌。公和曰。將相功名終若何。不堪急景似奔梭。人間萬事何須問。且向樽前聽艷歌。（翰府名談）

東坡寄劉子玉云。問道床頭惟竹几。夫人應不解卿卿。又送竹几與謝秀才云。留我同行木上座。贈君無語竹夫人。蓋俗謂竹几爲夫人也。山谷云。竹夫人乃涼寢竹器。憇臂休膝。非夫人之職。而冬夏青青。竹之所長。故名曰青奴。嘗作詩曰。穠李四絃風掃席。昭華三弄月侵床。我無紅袖堪娛夜。正要青奴一味涼。穠李昭華。貴人家兩女奴也。張文潛後作竹夫人傳。（王直方詩話）

周昭王二十四年。東甌獻二女。一曰延娟。一曰延嬋。此二人辨口麗辭。巧善歌笑。步塵無跡。行日中無影。及昭王游于漢水。二女與王同舟。乘擁夾王身。同溺于水。故江漢之人。到今思之。立祠于江湄。數十年間。人于江漢之上。猶見王與二女乘舟戲於水際。

燕昭王二年。廣延國善舞者二人。一名旋娟。一名提漠。並玉質凝膚。體輕氣馥。綽約而窈窕。絕古無倫。其舞一名縈塵。次曰集羽。末曰旋懷。昭王知其神異處。

處於崇霞之台。王好神仙之術。玄天之女。托形於此。昭王之末。莫知所在。孫亮作琉璃屏風。甚薄。而瑩徹。每於月下。清夜舒之。嘗與愛姬四人。皆振古絕色。一名朝妹。二名麗居。三名洛珍。四名潔華。使四人坐屏風內。而外望之。了如無隔。惟香氣不通於外。爲四人合四氣香。百浣不歇。名曰百濯。或以人名香。每遊皆與同輿席。以前後爲次。所居室。名爲思香媚寢。以上王子年拾遺記。

愛愛姓楊氏。本錢塘倡家女。年十五。尙垂鬟。性善歌舞。幼學胡琴數曲。遂能緣其聲以通其調。泛舟西湖。採荷花。爲金陵少年張遑所調。遂相携潛遁於京師。遑家雄於財。雅亦曉音律。歲時嬉遊。以犢車同載。故鑾輅之幸。琳館之闢。雖遠必先。雖暄必前。京都偉麗之觀。無不及也。踰二年。遑爲父捕去。不及與愛別。留於巷中。舍與余家相鄰。一日。人傳遑死。或往慰問。其所愛愴然泣下。曰。是必虛語。若果然。亦不願他從。故鄉道遠。出非以禮。必不能自還。當死此舍。自爾素服蔬膳。日呱呱而泣。不復親近樂器。里之他婦欲往見之。卽反關不納。好事有力者。百計圖之。終不可及。愛姿體纖素艷發。不類人間人。後三年。念遑之勤。感疾

而死。小婢子錦兒。今尙在其繡手籍香囊。纈履數物。香皆郁然而新。（蘇子美愛愛集）

晁無咎之貶玉山也。過彭門。而陳履常廢居里中。無咎出小鬟招奴舞梁州。以佐酒。履常作小闌木蘭花云。娉娉裊裊。芍藥梢頭紅樣小。舞袖低回。心到郎邊客。已知金樽玉酒。勸我花前千萬壽。莫莫休休。白髮簪花我自羞。無咎云。人疑未開府。鐵石心腸。及爲梅花賦。清便艷發。殆不類其爲人。履常清通。雖鐵石心腸。不至於開府。而此詞清便艷發。過於梅花賦矣。（無咎紀李良四事）

東坡朝雲墓誌銘云。東坡先生侍妾曰朝雲。字子霞。姓王氏。錢塘人。敏而好文。事先生二十有三年。忠敬若一生。子遁未朞而夭。有戲贈朝雲詩云。不學楊枝別樂天。恰如通德伴伶玄。伯仁絡秀不因老。天女維摩總解禪。經卷藥爐新活計。舞裙歌扇舊因緣。丹成逐我三山去。不作巫陽雲雨仙。（本集）

漢武帝所幸宮人麗娟。年十四。玉膚柔軟。吹氣如蘭。娟身輕弱。不欲衣。纓拂之。恐傷爲痕。每歌李延年和之。於芝生殿旁。唱迴風之曲。庭中樹爲之翻落。常致

娟於琉璃帳。恐垢污體也。常以衣帶繫娟袂。閉於重幕中。恐隨風起。娟以琥珀佩置衣中。不使人知。乃言娟骨節自鳴。相與爲神怪也。（洞冥記）

隋煬帝宮妃吳絳仙。善畫長蛾眉。帝甚憐之。由是嬪御皆倣此。宮吏日供螺子黛五斛。名娥綠。而進之。帝每倚簾顧之。移時不去。乃云。古人言。美色若可食。如絳仙者。可以療飢矣。遂賜以合歡水果。絳仙以謝。帝立爲貴妃。後與妃同游汴河。彩舟爲龍。張帆以錦。飾木剪花。日縱淫樂。遂廢國祚。（大業拾遺）

呂不韋。陽翟人也。家累千金。商於邯鄲。娶劉氏女。名曰諸姬。善舞。時秦昭王太子之孫子楚質於趙。見諸姬。心悅之。從不韋索之。不韋與之時已懷妊。兩月。及子楚立爲哀王。生始皇。始皇卽不韋之遺體也。（史記）

周瑜初從孫策攻拔之時。獲喬公二女。皆國色也。策自納大喬。瑜納小喬。江表傳策從容戲瑜曰。喬公二女雖流離。得我二人作婿。亦足爲歡。（吳志）

秦穆公女名弄玉。善吹簫。與簫史共登樓吹簫。作鳳凰音。感鳳凰從天而降。後升天矣。（帝王世紀）

越王勾踐陰謀吳。乃得國中苧蘿山鬻薪之女。曰西施。飾以羅縠。教以容步。三年使范蠡進于吳。夫差大悅。（吳越春秋）

國初朝廷遣陶穀使江南。以假書爲名。實使覘之。丞國李獻以書抵韓熙載曰。五柳公驕甚。其善待之。穀至則果如李所言。熙載謂所親曰。陶秀實非端介者。其守可墮。當使諸君一笑。因令宿埃膽六朝書。半年乃畢。熙載使歌姬秦蒨蘭衣敝衣爲驛卒女。穀見之而喜。遂犯愼獨之戒。作長短句贈之。明日中主燕客。穀凜然不可犯。中主持觥立使蒨蘭出歌續斷絃之曲。侑觴。穀大慙而罷。詞名風光好。好因緣。惡因緣。祇得郵亭一夜眠。別神仙。琵琶撥盡相思調。知音少。再把鸞膠續斷絃。是何年。（冷齋夜話）

秦少游在蔡州。與營妓婁婉字東玉者甚密。贈之詞云。小樓連苑橫空。又云玉珮丁東。別後者是也。又贈云。天外一鉤橫月帶三星。謂心字也。（高齋詩話）

楊貴妃小字玉環。（明皇雜錄）

白公杭州春詩云。柳色初藏蘇小家。本朝賢良馬慆嘗夢一美人。謂之曰。妾幼

以姿色名冠天下。而身無所依。輒有小詞浼瀆。其詞有妾本錢塘江上住之句。及後得錢唐幕官。而蘇小墓乃見公宇之後。（雲齋廣錄）

眞娘吳中樂妓。墓在虎邱山傍。（白樂天李商詩）

唐元載末年。納薛瑤英。處以金絲帳。却塵褥。衣以龍純衣一襲。無一兩。載以瑤英體輕。不勝重衣。于異國求此服也。（詩話）

唐杜秋娘。金陵女子也。年十五。爲浙西觀察使李錡妾。嘗爲錡辭云。勸君莫惜金縷衣。勸君莫惜少年時。有花堪折直須折。莫待無花空折枝。長慶中裴航游襄漢。與樊夫人同舟。樊贈詩云。一飲瓊漿百感生。玄霜搗盡見雲英。藍橋便是神仙宅。何必區區上玉京。航後經藍橋驛。遇仙女雲英。遂娶之。後俱得仙。（並傳奇）

五代時。有一僧號至聰禪師。祝融峰修行十年。以爲戒行具足。無所誘掖也。夫何一日下山。於道傍見一美人號紅蓮。一瞬而動。遂與合歡。至明。僧起沐浴。與婦人俱化。有頌曰。有道山僧號至聰。十年不下祝融峰。腰間所積菩提水。瀉向

紅蓮一葉中（古今詩話）

王魁遇桂英於萊州。北市深巷。桂英酌酒求詩於魁。魁時下第。桂英曰。君但爲學。四時所須。吾爲辦之。由是魁朝去暮來。踰年有詔求賢。桂爲辦西遊之用。將行。往州北海神廟盟曰。吾與桂英誓不相負。若生離異。神當擊之。魁後唱第爲天下第一。魁父約崔氏爲親。授徐州僉判。桂英不之知。乃喜曰。徐去此不遠。當使人迎我矣。遣僕持書。魁方坐廳決事。大怒。叱書不受。桂英曰。魁負我如此。當以死報之。揮刀自刎。魁在南都試院。有人自燭下出。乃桂英也。魁曰。汝果無恙乎。桂英曰。君輕恩薄義。負誓渝盟。使我至此。魁曰。我之罪也。爲汝飯僧誦佛書。多焚帛錢。捨我可乎。桂英曰。得君之命。卽止。不知其他。後魁竟死。（撫遺）

（完）

補侍兒小名錄

宋汝陰王 銍著

建康小史曹著。見廬山夫人。夫人命女婉出與著相見。女欣然。命婢瓊枝。令取琴出。婉撫琴而歌曰。登廬山兮鬱嵯峨。睇陽風兮排紫霞。欣良運兮暢雲柯。口雲龍兮樂太和。琴歌既畢。婉便回去。（祖台志怪）

袁真在豫州。遣女妓紀陵。送郭薛馬三妓。與桓宣武。馬遂生桓南郡。（續搜神記）

齊惠公妾。蕭同叔子生子。棄之。有狸乳而鸛覆之。取而養之。字曰無野。是爲頃公。代有齊國。（搜神記）

宋何恢爲廣州刺史。有妓曰張耀華。美而有寵。將之任。要權貴阮佃夫飲。設樂。佃夫見耀華悅之。頻求于恢。恢曰。恢可得此人不可得也。佃夫怒。拂衣出戶曰。惜指失掌。遂諷有司。以公事彈恢坐免。（南史）

霍去病父仲孺。河東人。以縣吏給事平陽侯家。與侍女衛小兒私通。生去病。仲

孺吏畢歸家。娶婦生光。因絕不相聞。久之。去病爲驃騎大將軍。擊匈奴。道出河東。河東太守郊迎。至平陽傳舍。遣吏迎。仲孺趨入拜謁。將軍迎拜。因跪曰。去病不早知爲大人遺體也。仲孺叩頭曰。老臣得託命將軍。此天力也。去病爲仲孺大買田宅奴婢而去。（戚苑）

晉賈后召愍懷太子入朝。置于別室。遣婢陳舜賜太子酒三升。太子辭而不能飲。舜逼之曰。不孝也。天賜汝酒而不飲。中有惡物耶。太子不得已強飲。遂大醉。又令小婢承福以紙筆授太子使書之曰。陛下不自了。吾當入了之。字半不成。后補成之。呈帝。廢太子。（至隱晉書）

孫綽韓非靈語責李中書曰。建元元年六月。余家婢辟邪夜眠。如夢嚙語半時。云。忽有一老公著黃練裙巾。身短衣長。甚自矜厲。瞑目切齒云。吾是刑名先生韓非弟子。李光日習吾業。綜習吾書云云。（孫綽集）

晉泰始二年。使使持節兼五官中郎將宗正丞司馬恢。拜崇陽園妾李琰爲修華。王宣爲修容。徐琰爲修儀。吳淑爲嬈好。趙珽爲充華。十年。使太常洛陽令司

馬啟拜采女胡方爲貴。嬪又使御史中丞太子舍人司馬誕拜采女劉瓊爲淑妃。臧耀爲淑媛。趙祭爲修容。陳秀爲修容。咸甯三年拜美人左嬪爲修儀。邢蘭爲婕妤。朱姜爲容華。（晉起居注）

宋元凶劭姊東陽公主。應閣婢王鸚鵡。（南史）

魏文帝宮中侍女。所絕寵者。有莫瓊。樹薛夜來。陳尙衣段巧笑四人。（崔豹古今注）

唐進士段何。太和八年。賃居臥病。有四人負金碧從二青衣。一雲髻。一半髻。皆絕色。說諭再三。何終不應。乃以紅箋題詩一篇。置何樓上而去。其詩云。樂廣清羸經幾年。姪娘相托不論錢。輕盈妙質歸何處。惆悵碧樓紅玉鈿。書迹柔媚。亦無姓名。紙末惟書一我字。何自此疾日退。（河東記）

南陽張不疑。開成四年。應宏詞。寓京師。以錢六萬置青衣鴉鬟垂耳曰春條。善書。音旨清婉。有所指使。無不愜適。又潛爲小詩曰。幽室鑲妖艷。無人蘭蕙芳。春風三十載。不盡羅衣香。不疑素禮門徒。尊師者謂不疑曰。郎君有邪氣。不疑令

作法。春條撲然作聲。視之一朽冥器耳。背上題曰春條。其衣服若蟬殼然。（博異志）

武德中曹惠爲江州參軍。官舍佛堂中有二木偶人。長尺餘。工飾甚巧。因持歸與侍兒戲。稚兒貪木偶引手請之。惠問曰。爾何時物。頗能作怪。曰。輕素與輕紅。是宣城謝太守家備偶。且曰。廬山神要索輕素等爲舞姬久矣。請命畫工。賜以粉黛。惠令工人爲飾之。輕素笑曰。此度非論舞妓。亦當爲彼夫人矣。（幽怪錄）崔紫雲兵部李尙書樂妓。詞華清峭。眉目端麗。李公罷鎮北都爲尹東洛時。方家妓盛列。諸府有宴。台官不赴。杜紫微時爲分司御史。過公有宴。故留南行一位待之。爲訪諸妓併歸北行。三重而坐。宴將醉。杜公輕騎而來。連引三觥。顧北行。回顧主人曰。嘗聞有能咏紫雲篇者。今日方知名不虛得。儻垂一惠。無以加焉。諸妓皆回頭掩笑。杜作詩曰。華堂今日綺筵開。誰召分司御史來。忽發狂言驚滿座。三重粉面一時回。詩罷。升車鞞轡而歸。李公尋以紫雲送贈之。紫雲臨行獻詩曰。從來學得斐然詞。不料霜台御史知。愁見便教隨命去。戀恩腸斷出

門時

竇梁賓。夷門人。詞華容態皆可觀。進士盧東表念其才藻。緣而綠之。嘗爲喜東表及第詩云。曉粧初罷眼初睜。小玉驚人踏破裙。手把紅箋書一帋。上頭名字有郎君。又有雨中看牡丹詩。東風未放曉泥乾。紅藥花開不耐寒。待得天晴花已老。不如攜手雨中看。

程洛賓。長水人。爲京北參軍。李華所錄。自安史亂。常分飛南北。華後爲江州牧。登庾樓。見中流汾棹。有鼓胡琴者。李喪色而言曰。振絃者宛如故舊。令問之。乃岳陽郡民王氏之舟。詢其操絃者。是所錄侍人也。王氏尋令把四絃而至。李轉加淒楚。問其姓對云。是隴西李氏。父曾爲京掾。自祿山之亂。父倉皇劍外。母程氏乃流落襄陽。父母俱有才學。所著篇章。常記心口。因講數篇。乃李公往年親制。泣然流涕。且問洛賓所在。投絃再拜。嗚咽而對曰。已爲他室矣。李歎曰。是知父子之性。雖間而親。骨肉之情。不期而會。便令歸宅。揖王君別求淑姬。齎弊詣洛賓使回。洛賓寄詩曰。魚雁回時寫報音。難憑坐襲數年心。雖然情斷沙吒後。

爭奈平生怨恨深。(已上女舞圖)

唐右司郎中馮翊喬知之有美妾曰碧玉。知之爲之不昏。武承嗣借以教諸姬。遂留不還。知之作綠珠怨詩以寄之。碧玉赴井死。承嗣得詩于裙帶大怒。諷酷吏羅告族誅之。(資治通鑑)

貞元中進士賈全虛者。黜于春官。春深臨御溝而坐。忽見一花流至全虛之前。以手接之。香馥頗異。旁連數葉。上有詩一首。筆蹟纖麗。言詞幽怨。詩曰。一入深宮裏。無由得見春。題詩花葉上。寄與接流人。全虛得之。悲想其人。涕泗交墜。不能離溝上。街史頗疑其事。白金吾奏其實。德宗亦爲感動。令中人細詢之。乃于翠筠宮奉恩院王才人養女鳳兒者。詰其由云。初從母學文選。初學記及慕陳後主孔貴嬪爲詩。幾日前。臨水折花。偶爲宮思。今敗露死無所逃。德宗爲之惻然。召全虛授金吾衛兵曹。以鳳兒賜之。車載其院資。皆賜全虛焉。

經行寺僧行蘊灑掃堂殿。見所畫女人姿顏妖冶。戲曰。世間女人得如此者。我必作妻。其夕有款扉者。蓮花娘子來。從一侍婢。妖姿麗質。妙絕人倫。蓮花顧侍

婢曰。露仙可準備幃帳。

天水趙旭家于廣陵。夢一青衣挑笑窗牖間。及覺。忽有清香滿室。有一女子年可十四五。容範曠代。笑曰。吾天上青童。久居清禁。時有世念。帝罰下人間。感配于君子。時叩柱清歌曰。白雲飄飄。星漢斜。獨行窈窕浮雲車。（通幽記）

唐韋諷家于汝潁間。遣小童理草鋤地。忽有人髮。鋤漸深。漸多。而不亂。諷異之。卽掘深尺許。乃一婦人。肌膚容色儼然如生。再拜言曰。某是郎君之祖女奴。名曰麗質。娘子嫉妬。生理此園中。

開元中有士人從洛陽道。見一女子。容服鮮麗。泣謂曰。已非人。昆明池神之女。嫁劍閣神之子。夫婦不和。無由得白父母。故欲送書一封耳。士人問其處。女曰。池西有斜柳樹。君可叩之。若呼阿青。當有人從水中出。士人入京。便送書池上。果有此樹。叩之。頻喚阿青。俄見幼婢從水中出。得書甚喜。曰。久不得小娘子消息。延士人入。謂曰。君後日可暫至此。如期。果有女子從水中出。手持珍珠一箇。笑以授士人云。（已上會昌解頤集）

趙王鎔命馬或使于燕。劉守光命韓定辭館之。時燕之酒妓轉轉者。一代名姝。無比。韓之所眷也。每當酒席。馬頻目之。韓曰。昔文公分季隗于趙衰。伯符輟小喬于公瑾。蓋惟名色可奉名人。所慮倡婦不勝賢者顧矚。願垂一詠。故得奉之。或卽命筆授毫。文不停綴。作轉轉之賦。其首曰。玳筵既啓。雅樂斯陳。霧卷羅幕。花攢錦茵。有西園之上客。命南國之佳人。貌逞嬋娟。縱玉韻而傾國。步隨縹緲。蹴羅襪以生塵。或載以歸。 (劉崇遠耳目記)

穆員稱其麗雲善歌。聽之使人醉者。醒者。醉者。悲者。樂者。悲。聲音能移人爲工。 (穆員集)

柳條女奴也。成都米市橋。僞蜀時有柳條家酒肆。蓋當時皆以當壚者爲名。柳條偶得患。沉綿經歲。俟死而已。有一道士常來貰酒。柳條每加勤奉。乃留丹數粒。柳條初服一粒。疾起能食。再服能行。終食充盛如初。 (成都古今記)

元公鎮南海日。疽發於鬢。氣息惴然。忽有一少年道士直來床前。謂元曰。本師知公病。遣某將少膏藥來。可傳之。元公寵姬號靜君。收藥貼之。至暮而愈。失道

士所在。（劉公嘉話）

韋洵美先輩。開平歲及第。受鄴都從事辟焉。乃挈所寵素娥行。羅紹威聞其姝麗。才達臨河。令女使齎二百疋及生餽而露意焉。洵美無所容足。遂令粧束更衣修緘獻之。素娥姓崔氏。亦大梁良家子。善諧謔筆札。和淚作詩曰。妾閉閒房。君路歧。妾心君恨兩依依。魂神偷遇巫娥伴。猶逐朝雲暮雨歸。洵美乃不受辟。夜渡河。宿一寺。長吁而寢曰。何處人能報不平。寺有行者排闥而揖曰。先輩蓄何不平事。洵美具語之。歛然出門而去。至三更。忽擲一皮囊入門。乃貯素娥而至。侵曉問寺僧。言在寺打鐘勤苦三十餘年。已不知所之。洵美卽遁跡他所。燈下閒笑。

小東。長沙之妓人。以能詩得幸于馬氏。後國入爲郡。窮于京師里而人絕不知。余憫其老。詢長沙宮中事。則必南望涕泣而後言。因爲作小東詩焉。薛九江南富家子。得侍宮中。善歌稽康。稽康江南曲名也。學舞於鍾離氏。建業破。零落於江北。予遇於洛陽福善坊趙春舍。飲酣。於是歌稽康。其詞卽後主所

製焉。嘗感激座人皆泣。春舉酒請舞。謝曰。老矣。腰腕衰硬。無復舊態。乃強起小舞。終曲而罷。座有王生者。請予爲稽康小舞詞。曰。薛九三十侍中郎。蘭香花態生春堂。龍盤王氣變秋霧。淮聲哭月浮秋霜。宜城酒烟溫羈腹。與君強舞當時曲。玉樹遺辭莫重聽。黃塵染髮無前綠。我聞襄陽白銅鞮。荒情古艷傳幽悲。淒涼不抵亡國恨。座中苦淚飛柔絲。洛陽公子擎銀觴。跪奴和曲生。玄光茂陵旅夢無春早。彤管含羞裁短章。以上錢易集。

王霞卿者。藍田人。才華清瞻。節行尤高。進士鄭殷彝旅于會稽。寓唐安寺樓。見粉壁間有題云。瑯琊王氏霞卿。光啓三年陽春二月。登于是閣。臨軒軫恨。覩物增悲。雖觀煥爛之花。但比淒涼之色。時有輕綃捧硯。小玉看題。其詩曰。春來引步強尋游。恨覩烟霄簇寺樓。舉目盡爲停待景。雙眉不覺自如鉤。鄭子依韵繼之曰。題詩仙子此曾游。應是尋春別鳳樓。賴得從來未相識。免交錦帳對銀鈎。霞卿乃故邑宰韓嵩自京師挈之任所。嵩緣遇暴寇而卒。鄭子怡然而往謁之。霞卿竟辭以疾不見。只令總角婢子輕綃持詩以贈之。詩曰。君是烟霄折桂身。

聖朝方切詔良臣。正堪西上投知己。何必留程見婦人。鄭得詩抱慙而去。（女仙圖）

王琨父懌不辨粟麥。時以爲殷道矜之流人。無肯與婚。家以撩婢恭心侍之。遂生琨。初名崑崙。懌後娶樂玄無子。故以琨爲名。立以爲嗣。（南史）

王藻尙宋文帝第六女臨川長公主。諱英瑗。公主性妬。而藻別愛左右人吳崇祖。主讒之于廢帝。藻下獄死。主與王氏離婚。（南史）

寵姐甯王愛姬。王宴客。妓妾皆在。獨寵姐無得見者。李太白恃酒強之。迺設七寶簾。使寵姬隔簾而歌。（唐史）

卷三

集

續補侍兒小名錄

宋晉陽溫 豫著

二書所載。共一百七十六條。猶未備也。乃復續補焉。

初莽妻以莽殺其子。涕泣失明。令太子臨居中養焉。莽妻旁侍者原碧。莽幸之後。臨亦通焉。恐事泄。謀共殺莽。臨妻愠國師公女。能爲星語。宮中偶有白衣會。臨喜。以爲所謀且成。後貶爲義陽王。出在外第。愈憂恐。會莽妻病困。臨手書曰。上于子孫至嚴。前長孫中孫。年俱有三十而死。今臣臨復適三十。誠恐一旦不保中宮。則不知託命所在。莽候妻疾。見其書大怒。疑臨有惡意。不令得會喪。既葬。收原碧等考問。具服奸謀殺狀。初莽爲侯就國時。幸侍者增秩。懷能開明。懷能生男。與增秩生男。匡女。開明生女。捷皆留新國。以其不明故也。（王莽傳）

皇太子詠武陵王左右五鬲傳杯詩曰。頂分如兩髻。簪長驗上頭。捉杯如欲醉。疑殘已復留。（玉臺新咏）

楚春申君有愛妾曰余。春申君正妻之子曰甲。余欲君之棄其妻也。因自傷其

身以示君而泣曰。得爲君妾甚幸。雖然。適夫人非所以事君也。適君非所以事夫人也。身故不肖。力不足以適二主。其勢不俱適。與其死夫人所者。不若賜死。君前妾以賜死。君復幸于左右。願君必察之。無爲人笑。君因信妾余之詐。爲棄正妻。余又欲殺甲。而以其子爲後。因自裂其親身衣之裏。以示君而泣曰。余之得幸君之日久矣。甲非不知也。今乃欲強戲余。余與爭之。至裂余衣。此子不孝。莫大于此焉。君怒而殺甲。（韓非子）

劉曠。豫章海昏人。義熙二年。病困頓。二十餘日。手足皆冷。正腹微暖。二日二夜。蹶然起坐。云有人著平幘喚曠。西北向有樓。其上有綵女團坐作樂。見曠住。樂相指而笑。游歷未遍。不知所從而出。倏忽至此。病于此都愈。後月餘。黨輩于平澤射獵。留曠守舍。因晝眠。聞語。何女郎通使。便覺颯然已至。自說東海何氏。八歲而夭。于今十歲。應爲君妻。故來修好。何女郎曰。昔日樓上之擊節。我也。衆以君見棄。是以相笑。智瓊。杜蘭香。咸吾曹也。婢名採薇。奴名邊羅。常以九石合拌。冥果。問家中吉凶。及晴雨之占。必驗。曠母妻嫌之。被妬。日滋。女曰。應爲君妻。妬

嫌已至三年而無子。何以見忌。後留信宿曠家。以湯澆之。慘然而言曰。苟不我容。便與君辭。既去之後。慎勿相憶。爲君累也。（幽明錄）

煬帝自到廣陵。沉湎失度。每睡。須搖動。或歌吹聲齊。方就一夢。侍兒韓俊娥尤得意。每寢。必令振舉支節。乃得睡不厭。賜名爲來夢兒。蕭妃密令訊之。帝不舒。汝能安之。豈有他媚。俊娥進言。妾從帝自都城來。在何妥車。車行高下不等。妾態自搖。帝就搖。洽悅。妾後得以侍寢。私效車中之態成寢。非他媚也。他日蕭妃譖去之。帝暇日登迷樓。憶之。題柱二篇云。黯黯悲侵骨。綿綿病欲成。須知潘岳髮。強半爲多情。又不信長思憶。絲從髮裏生。閑來倚柱立。相望幾多情。（大業拾遺）

唐思元大夫崔義起妻蕭氏。蕭鏗女也。爲人妬忌多瞋。好打奴婢。不信業報。麟德元年。從駕洛陽。至二年九月身亡。蕭所愛婢名閨玉。信樂佛法。家爲夫人設三七齋僧。正食時。夫人自來看齋。枷項鑲腰。獄卒衛從。唯閨玉見夫人靈。着此婢使傳語家內大小云。吾適崔氏。爲性多瞋。橫不信因果。今至地獄受罪極重。

願汝眷屬將吾平生受用資具速舍。至七七日爲設齋云云。（法苑珠林）

余媚娘者。才婦也。夫亡以介潔自守。陸希聲時爲正郎。聞其容美而善書。巧智無比。俾行人中善言者游說之。媚娘乃約媒曰。陸郎中若必得兒侍巾櫛。須立誓不置側室。及女奴。則可爲陸家新婦。希聲諾之。旣歸二年。夫妻敦睦。無何。希聲又獲名姬柳舜英者。姿殊麗。逾於媚娘。媚娘知而深怨之。密銜不發。異日令迎入宅。與之同處。比間。候希聲他出。卽召舜英閉私室中。手刃殺之。（余媚娘叙錄）

蜀青石鎮陳洪裕妻丁氏。因妬忌打殺婢金扈。潛於本家埋瘞。仍榜通衢云。金扈逃走。經年。遷居夾江。因夏潦漂壞舊居渠岸。見死婢容質不變。鎮將報州追勘。擬伏其婢尸。一夕壞爛。遂寘丁氏於法。（儆戒錄）

前南鄭尉李雲。於長安求納一姬。其母未許。雲曰。予誓不婚。乃許之。號姬曰楚寶。數年後。姬卒。卒後經歲。遂婚前南鄭沈氏。及婚日。雲浴於淨室。見楚寶執一貼藥末。徑前謂雲曰。誓予不婚。今又與沈家作壻。無物相奉。贈君香一貼。以資

沐浴寫藥末入斛中以釵攪水訖而去。雲甚覺不安。羸困不能出浴。具遂死。支體如綿。筋骨並散。（聞奇錄）

潞之女伶曰孟思賢。巧黠人也。嘗爲君侯王制之寵貯焉。制之所私伊宙。亦衙門將。多與制遊。思賢舍。故僕射幘之子也。風流善杯酒。思賢心悅之。遂私焉。關鎖益牢。遂卽踰牆而奔於宙。制知不可奈何。遂逐思賢出門。宙且納焉。宙有女奴曰解兒。有愛於宙。思賢心忌之。一日杖解兒脛間出血見骨。解兒瘡甚死。明年長慶二年軍亂。伊宙遇飛矢而死。思賢無所庇。復投制。制得之喜曰。有甘吾心者矣。遂命以短兵。關思賢二脛。踣且極捶之。制臨觀。語思賢曰。其能踰牆而奔於伊宙耶。迨夜閉於幽室。思賢終夜呼曰。解兒解兒。不能惠我速死耶。竟不勝其楚毒。再宿而死。遂與宙同瘞於邢之東門外。（昭義軍記室別錄）

吳太伯祠在東閭門之西。每春秋季市肆相率合牢醴。祈福於三讓王。多圖善馬綵輦。子女以獻之。時乙丑春。有金銀行首。糾合其徒。以輕綃畫美人侍婢。捧胡琴以從。其貌出於舊繪者。名美人爲勝兒。蓋戶牖牆壁間。前後所獻者無以

匹也。女巫方舞。有進士劉景復送客之金陵。置酒於廟之東通波館。忽久伸思寢。乃就榻夢見紫衣冠者。言曰。讓王奉屈。劉生隨至廟。周旋揖讓而坐。王語劉生曰。適納一胡琴妓。藝甚精。而色殊麗。知吾子善歌。故奉邀作胡琴一章。以寵其藝。初生頗不甘。命酌人間杯酒一杯與飲。逡巡酒至。并佐酒物。視之。乃向館中祖筵者。生飲數杯而醉。作歌曰。繁弦已停。雜吹歇。勝兒調弄。邏迤撥。四弦攏撚。三四聲。喚起邊風。駐明月。大聲嘈嘈。奔淪淪。浪感波翻。倒溟渤。小弦切切。怨颼颼。鬼哭神悲。任窳窳。倒腕斜挑。掣流電。春雷直戛。騰秋鶻。漢妃徒得端正名。秦女虛誇有仙骨。我聞天寶十年前。涼州未作西戎窟。麻衣右袵皆漢氏。不省胡塵暫逢勃。太平之末狂胡亂。犬豕奔騰恣唐突。玄宗未到萬里橋。東洛西京一時沒。一朝漢民沒爲虜。飲恨吞聲空嗚咽。時看漢月望漢民。怨氣衝聲成誓。李國門之西八九鎮。高城深疊閉閑卒。河湟咫尺不能改。輓粟推車徒兀兀。今朝聞奏涼州曲。使我心魂暗超忽。勝兒若向邊塞彈。征人血淚應闌干。歌成。劉生乘醉落魄。草札而獻。王尋譯數四。召勝兒以授之。王之侍兒見有不樂者。妬

色形於座中。恃酒以金如意擊勝兒。面破血淋襟袖。生乃驚起。明日視素繪。果有損痕。歌至今傳於吳中。（纂異記）

石季龍極捷便弓馬。勇冠當時。勒深嘉之。拜征虜將軍。爲聘將軍郭榮妹爲妻。季龍寵惑優僮鄭櫻桃而殺郭氏。更納清河崔氏女。櫻桃又譖而殺之。（晉書載記）

成風聞成季之繇。乃事之而屬僖公焉。（杜預注成風莊公之妾。僖公之母也。）
（左傳閔二年）

元載寵姬瑤英之母趙姬。本岐王愛妾也。後出爲薛氏妻。生瑤英。（杜陽編）
前書只載瑤事故續補此）

隋煬帝幸月觀。中夜憑蕭妃肩。說東宮時事。適有小黃門映薔薇叢。調宮婢衣帶爲薇刺骨。結笑聲吃吃不止。帝望見腰肢纖弱。意爲寶兒。而有私。帝披單衣。長衫不帶。急行擒之。乃宮婢雅娘也。（大業拾遺）

霍小玉命侍兒櫻桃。褰幃執燭。授李生筆硯。又取珠絡縫綉囊中。出越姬烏絲

欄素段以授生。生素多才思。援筆成章。（薛防霍小玉傳）（前已載浣沙桂子獨遺此事）

長安中有媒氏鮑十一娘。故薛蒼駟馬家青衣也。折券從良十餘年矣。性便僻巧言語。豪家戚里。無不經過。追風挾策。推爲渠帥。嘗受李生誠託厚賂。意頗德之。經數月。忽聞扣門甚急。攝衣迎問曰。鮑卿今日何故惠然而來云云。（霍小玉傳）

崔氏鶯鶯婢曰紅娘。嘗爲崔持綵箋以授張生。（元微之鶯鶯傳）

平陸尉薛昭。元和中坐謫。有田山叟者。贈藥一粒。教令遁去。因入蘭昌宮。見雲髻仙衣女子三人。詢其姓氏。長曰雲容。姓張氏。次曰鳳台。姓蕭氏。次曰蘭翹。姓劉氏。飲酣。蘭翹命骰子白二女曰。今夜佳賓相逢。須有匹偶。請擲骰子。遇采強者。得以薦枕席。雲容數勝。蘭翹遂命薛郎近雲容姊坐。昭發問曰。夫人何許人也。何以屈此。容曰。某乃開元中楊貴妃之侍兒也。妃嘗命我獨舞霓裳于綉嶺宮。妃悅。贈我詩曰。羅袖動香香不已。紅蕖裊裊青煙裏。輕雲嶺上乍搖風。嫩柳

池邊初發水。詩成皇帝吟。諷久之。亦有繼和。但我不憶耳。此時多遇皇帝與申天師談道。亦數侍天師茶藥。因閉處叩頭乞藥。師云。吾不惜。但汝無今日之分。不久處世如何。我曰。朝聞道。夕死可矣。師乃與降雪丹一粒。曰。汝但服之。雖死不壞。但能大其壠。廣其穴。含以眞玉。疏而有風。使魂不蕩。空魄不沉。寂而有物。拘制陶出。陰陽數百年。若遇生人。得交精之氣。或再生。便爲地仙耳。昭因詰天師之狀。乃田山叟之魁梧也。乃大駭曰。山叟卽申天師明矣。不然。何以委曲使予符曩日之事哉。（裴劍薛昭傳）

唐監察御史清河張佖。侍兒仙鵝。能歌舞。能書翰。常出使以仙鵝充使典。有客知者將發之。佖鉤距多數。竟得不發。（御史台記）

沈詢在昭義。嘗宴府中賓友。歌著詞令曰。莫打南來雁。從他向北飛。打時雙打取。休使兩分離。及歸而夫妻皆爲嬖妾歸秦所殺。（北夢瑣言）

申胡子朔容李氏之蒼頭也。李氏本亦世家子。得祀江夏王廟。吾與對舍於長安崇義里。遂將衣質酒。命余合飲。氣熟杯闌。因謂吾曰。李長吉爾徒能長調。不

能作五言歌詩。直強回筆端。與陶謝詩勢相遠幾里。吾請撰申胡子鬻栗歌。以五字斷句。歌成。朔容大喜。擎觴起立。命花娘出幕徘徊拜客。稱善三弄。於是以弊辭配聲。與予爲壽。（李賀集）

謝秀才有妾縞練。改從於人。秀才引留之不得。後生感憶。座人製詩嘲謝。賀復繼四首。（李賀集）

梁元帝爲妾弘夜姝。謝東宮賁合心。花釵啓日夜姝。昔往陽台。雖逢四照。曾遊澧浦。慣識九衢。未有仍我爵叙。還勝翠羽。飾以南金。裝茲麗玉。修靡夫人。本分章華之裏。中山孺子。獨荷春宮之恩。有志當熊。無期投閣。（藝文類聚木門）

梁元帝爲妾夏王豐。謝東宮賁錦啟。畧曰。舒將並石。堪來暮雨。縈持結纜。剩可蕩舟。（藝文類聚錦門）

長沙定王發母唐姬。故程姬侍者。景帝召程姬。程姬有所避。不願進而飾侍者。唐兒使夜進。上醉不知。以爲程姬而幸之。（前漢）

廣川王去有所幸姬王昭。平王地餘許以爲后。去嘗疾。姬陽成昭信待視。甚謹。

更愛之。去與地餘戲。得袖中刀。答問狀服。欲與昭平共殺昭信。答問平不服。以鐵鉞鉞之。強服。乃會諸姬。去以劍自擊地餘。令昭信擊昭平皆死。立昭信爲后。幸姬陶望卿爲修靡夫人。主繪帛。崔修成爲明眞夫人。主永巷。昭信復譖望卿云云。後去數召姬榮愛與飲。昭信復譖之云云。（前漢）

禽滑釐問於子墨子曰。魯氏有叔姪同處者。叔曰無恒。姪曰數奇。無恒有妾曰善佞。蓄私夫以生子。曰不類。數奇愛不類如其子。無恒久乃告數奇曰。不類非吾子。他人之子也。汝勿以爲弟。（李文公集）

王丞相有幸妾姓雷。頗預政事。納賄。蔡公謂之雷尙書。（世說）

卷三

集

妒律小序

昔漢高入關。中約法三章。而秦民以定。後此益加嚴密。以齊一天下之民。凜遵法守。不敢犯此。非獨明有以治民也。推之天堂地獄之說。絲毫不踰。廣大如來。而戒律尤爲精嚴。是律之所用綦密矣。乃余竊謂獨不可施於婦人女子之間。任夫人死且不避。而况笞杖徒流乎。人謂美女宜妒。而醜者不宜。巧者宜妒。而拙者不宜。不知毒出胎根。孽緣性結。奚暇自顧乎。每見千古奇妬。有不止於刻眉灼眼。髡頭椎墓者。彼帝王將相。不難駕馭羣雄。讐服海內。恒不能得之閨闥牀第之間。非徒有所惑也。實有以奪之者矣。吾友某風流道學中人。性柔而骨俠者也。傷鬚眉之陷溺。悼脂粉之癡迷。戲著妒律。縷晰條分。比例嚴密。而又不及大辟。以從寬典。蓋以慈悲心。轉大法輪。使慧心者讀之。競競自好。卽頑悍者亦或赧赧自慚。雖未必革面洗心。正如禹鑄九鼎。魑魅魍魎。情狀畢現。其爲崇亦少殺矣。抑聞之。梁武因邾后悍妬成疹。左右進曰。聞鶻鶻羹能療妬。邾茹之稍減。帝善之。左右復進曰。願陛下廣修諸劑。以徧賜羣臣。使不才者毋妬于有。

才挾私者。毋妬於奉公。濁者不妒其清。貪者不妒其廉。亦助化之一端也。余曰。否。否。若然。將盡取天下之鵠鷄爲羹。以飼妬婦。則斯律措而不用。是萬不能。因思南宋劉休妻妒。帝勅令開小店賣皂筴掃帚。以辱之。元制婦人妒者。令乘驢牛車。狗部下。昔人謂其惜不著之令甲。是妒律一書。蓋發前人之所未發者矣。安得不急鑄之以廣布之門內者。

妬律

海甯陳元龍廣陵著

名例

一凡婦梳頭臨鏡。駕言從鏡中見夫與婢目挑。遂生嗔毒。罵併及丈夫者。擬坐以斷罪。不以律例杖七十。徒一年半。

判曰。迷網沉淪。聞蟻聲而驚夢。疑團莫解。飲弓影而成疴。是以披畫圖而含哀。詢洛神而赴水。群狐滿腹。載鬼一車。以莫須有之情。比將母同之律。罪由自召。人亦何尤。

一凡婦允夫宿妾。日間反覆議明。及至更深。猶復令妾針紉。若或忘之者。擬坐以公事應行稽程律。笞二十。遲至三更者。加一等。

判曰。春秋盟會。成事定於一言。戰國縱橫。趨向決於片語。乃爾拘牽薄務。似存退悔之心。演習虛文。無非出納之吝。雖健忘者。當不至此。援引律法。猶覺從寬。

一夫與婢有染。妻乃褪婢內衣。以秦椒等辛辣之物。納入婢女私處。比照以穢污入人口律。加等。引新例。發與黑龍江新披甲爲奴。

判曰。豈翫猶含。尙苦鹽梅之味。牡丹初放。何堪姜桂之投。卽蛇蝎以爲心。無此毒也。本豺狼而成性。豈其然乎。按律無可引援。請從新例究擬。

吏部

一凡婦見夫外入。故拈針線。兀坐不語。及再三詢之。一推而起。擬坐以無故不朝參公座律。杖八十。徒二年。

判曰。慵拈倦繡。祇念遠人。默坐低頭。爲懷遊子。未有室家靜好。琴瑟和諧。見良人而轉嘖。聞溫言而添恨者也。婦德無極。女怨無終。律以朝參。正斯憲範。

一凡婦有病在牀。仍令腹婢稽查丈夫與妾偶語等情。擬坐以納交近侍官員律。杖一百。流三千里。

判曰。珠沉玉碎。肯使鸞鏡塵埋。柳折花殘。不許鶯簧舌轉。卽曰關心者亂。

奚須壁後置人。若云在家必聞。夫豈沙中偶語。今乃展轉反側。殊多密探之煩。而迷夢沉吟。祇厯他山之慮。官箴有玷。自當屏絕於遐荒。壺範斯懲。庶不患深於跋扈。

一。凡婦每見人之內眷。必苦勸不可令夫納妾。媿媿不倦。擬坐以同僚代判文案律。杖八十。徒二年。

判曰。畫樓秘閣。共談閫內之私。密室柔情。細訴胸中之壘。聯牀握手。附耳訂謀。豈誠永漏話長。祇爲深閨計遠。老璫衣鉢。官家勿使空閒。少婦傳燈。阿郎決難二室。比目何堪瘤贅。並頭胡可駢枝。第彼婦各具肺腸。豈容人而參帷幄。家有制度。此屬越庖。自謀已非。代人難恕。

戶部

一。凡婦每同婢妾觸牌點韻。嘻笑一堂。忽聞主人聲息。悉皆屏去。擬坐以脫漏戶口律。家長杖六十。徒一年。

判曰。紫鬪平鋪。象牌齊翻。玉筍霞箋試展。班管漫揆瑤詞。乃老子興復不

淺而羣芳吹散。因何是。豈楚卒聞歌。競解中宵之甲。抑亦蘇生挾策。惟深兼併之防。罪坐發縱。奔逸免究。

一凡婦值偶宿姬妾室。便偃臥不起。只推有病。及再三安慰。不覺盈盈淚下。擬坐以戶役不均律。杖八十。徒二年。

判曰。自是桃貪結子。故尋樹底殘紅。原非浪逐癡兒。疑作花間戀蝶。不知膠木下逮。方可蠡斯誦興。爾乃烏啼殘夢。憐春色之將闌。花擾獨愁。恨秋梧之早落。猶然心懷固寵。念舊愛而情傷。志切專房。分新恩而腸斷。苑枯頓異。情罪偏歸。

一凡婦容夫納妾。限夫往妾所止。以一更為率。遲歸則怨望。詈擬坐以丁夫差遣不平律。杖六十。

判曰。命將出師。最忌從中掣肘。濟人利物。應須忘分推心。如其箝制刻期。恐致工多限促。必欲束縛計晷。定然此怨彼嗟。苟發縱之不公。當援律而杖懲。

一凡婦無子有年。畏人清議。陽爲娶妾。私禁冷室。不令丈夫見面。擬坐以田地荒蕪律。杖七十。徒一年半。

判曰。歷歲深耕。既無薄穫。乃憎多口。爰挾陰謀。縱不學司馬公夫人。飾之入院。何致如白太傅內子。不使進幃。鴉過長門。夢斷朝陽。日影魚封。永巷魂消。巫峽雲蹤。女有罪而幽囚。郎何辜而乏後。荒我田疇。律難輕貸。一凡婦見夫妾生子。故將家業。施捨僧尼。搬運母家。併與出嫁女狼藉無度。擬坐以盜賣田宅律。杖八十。徒二年。

判曰。珠非蚌出。奚惜金穴。銅山篋自我操。卽欲沙揮泥灑。綺丸蔽野。翠玉成塵。神誕佛生。窮朝昏於水陸。老嫗少婦。溢裘馬之輕肥。甘心若敖之鬼。甯惜叔孫之兒。愚其縱恣。律以攘竊。

一凡婦聞親戚朋友娶妾。卽行毒罵。併自咒以及丈夫。擬坐以把持行市律。杖八十。徒二年。

判曰。城門失火。未嘗殃及池魚。滕國防危。預爾憂先。築薛含沙射影。足徵

鬼蜮之衷。打草驚蛇。預作綢繆之計。罪狀似難比擬。情形不易姑容。律以把持。實爲允協。

一凡婦無子。恐夫賣妾。非立已姪。卽抱螟蛉。擬坐以斬人宗祀律。杖一百。刺配寧古塔。絕產沒官。父母兄弟不行解勸。俱發旗下爲奴。

判曰。妒蚌難胎。久慮蛾眉之入室。牝狐幻術。陰營蝶負之良圖。乃欲代馬以牛。更恐以武繼李。科其罪狀。投豺虎而誰憐。揆厥私衷。飽溪壑而自利。擬減等於大辟。且屬原情。藉絕產而入官。詎資異孽。在昔設謀決策。計雖出自妖姬。而今遂過模稜。事自成於醜類。禍因滋蔓。連坐非苛。

一凡婦歸寧父母。或詣廟燒香。必將丈夫愛妾。挈之同往。擬坐以拐帶人口律。杖七十。徒一年半。

判曰。情懷水火。原非蘭茝之和。意介干戈。素乏壺簞之雅。攜手同歸。是何心也。與子偕往。保無他乎。察其略取之心。治彼杖徒之罪。一凡婦與夫議明。或三六九。或二八日。分潤於妾。乃至期齟齬。不令夫往。擬

坐以收支留難律。笞五十。再犯者加一等。如是三次者。杖六十。徒一年。

判曰。三分有二。宜加服事之誠。取二用三。古有貪殘之戒。爾乃渝盟割地。輒懷猶豫之衷。役志侵漁。漸現饕餮之態。當與不與。律固有條。初犯從輕。再犯加等。

一。凡婦故令陋婢強夫衽席。以塞娶妾之念。擬坐以良賤爲婚律。主婚者杖七十。徒一年半。

判曰。錦衾璀璨。自宜軟玉溫香。繡帳氤氳。可無穠桃翠柳。雖實命不同。尤共葑菲薄采。而承恩非貌。奚堪魑魅偕歡。因濁酒粗布之謠。解醜妻惡妾之嘲。進以匪匹。實爲亂群。責有攸歸。誰職其咎。

一。凡婦使婢年已長大。不令蓄髮。恐丈夫有成人之思。擬坐以嫁娶失時律。杖七十。徒一年半。

判曰。芳草無情。隨春來而漸茂。綠楊何意。因時至而垂絲。惡竹筍之衝簷。刪其鳳羽。嗔薔薇之踰架。剪彼蓬心。自崔夫人不許麗服。而袁紹妻遂使

髡頭。乃虞擲果而禁投桃。未咏標梅而歌冰泮。不疑他意。祇問失時。

禮部

一凡婦年已衰邁。猶然脂粉翠鈿。以固寵幸。擬坐以服飾違式律。答五十。逐出免供。

判曰。翠髮香雲。豔質曾邀帝寵。柳眉桃靨。嬌姿準擬人看。不知出塞明妃。顏華已非舊日。抱疴婕妤。形容頓異當時。乞憐未必希恩。掩袖殊堪憎惡。態固難堪。情猶可憫。

一凡婦蓄妾。原非得已。乃自誇賢德。冀人贊美。擬坐以現任官輒自立碑律。杖一百。徒三年。

判曰。膏雨和風。令望應流於萬里。深仁厚德。芳譽自播於千年。故口碑載道。逢人惟訝峴山。而尸祝由心。至今永思棠芾。何爾事因情近。名與實殊。輒向人言。攘爲己德。苟傳聞不察。幾欲勒之貞珉。久假不歸。竟爾廁於賢哲。盜名有禁。功令宜遵。

一凡婦暗令腹婢借名罵奴僕。因夫及妾。併有子之妾。擬坐以公差人員役。欺凌長官律。杖六十。徒一年。主婦辯非主使。記過一次。

判曰。浪蝶狂蜂。奚顧新舊嫩蕊。暴風驟雨。那管細果花胎。猶如狐假虎威。豈惜鼠投器忌。雖護身有符。苟犯法無赦。主婦記過。姑免深求。

一凡婦買妾入門。必使魘鎮。或掛己禪於門首。或置捧槌於門限內。種種不一。擬坐以禁止師巫說律。杖一百。流三千里。

判曰。玉顏未入。輪迴九轉之腸。象管初吹。聲斷百年之夢。不用千金買賦。陰求片鐵鑄符。一帛硃書。宜投蛛網。數行秘籙。忽墜迷途。性情制以鸚哥。精爽攝爲虎俚。是蓋幻而無跡。卽或殺之泯蹤者也。淫覲邪巫。痛懲遠屏。一凡婦因夫買妾。便設經堂。修齋禮懺。惟同尼僧往來。擬坐以左道惑衆律。杖一百。流三千里。

判曰。楊柳新栽。昨夜幾番風雨。荼蘼初架。曉來無數葛藤。蛾眉入而粉黛衰。鴉鬢添而鸞鏡掩。粧閣因而繡佛。琴堂用以緡經。寄怨毒於瞿曇。發幽

憤於般若。淫艷妲尼。藉禪和而入室。貪癡釋子。披緇戒而踵門。內則從此踰閑。性情由之難制。是用履霜杜漸。故爲首禁嚴懲。

一凡婦嫉夫有妾。從旁嫁禍。期以絕之。擬坐以術士妄言禍福律。杖一百。流三千里。

判曰。婉容順色。鬚眉不計其猜。深阱隱機。脂粉亦忘其伎。是以不言掩鼻。鄭襄以巧愛而斃楚姬。覆被殺兒。武曌以忍心而殞唐後。臨風擗毒。向影吹沙。不第讒言離間。蓋實溺陷死生者也。所當滿杖遠配遐陬。

兵部

一凡婦夜臥。必將床前暗置桌椅等物。周匝布密。以防夫有他適。擬坐以假宿衛人儀仗律。杖一百。徒三年。

判曰。秦王宮裡。不失狐白之裘。漢后禁中。誰通赭馬之跡。不虞竊符之魏姬。第慮偷香之韓壽。乃無防意如城之謀。聊效入苙招豚之計。坐以假借。罰其愚駭。

一凡婦因夫夜起洩溺。不與聞知。疑其私婢。卽生嗔毒罵。擬坐以夜禁不嚴律。答五十。

判曰。床內青銅。原慮懷奸之計。枕邊玉盒。用爲護身之符。乃崇垣何處飛奴。簾外忽驚人影。醒來夢話。郎已夢到高唐。醉後魂銷。身遂魂逝。楚館彼固失告。此則疏防。

一凡婦使用婢女。不許面粉鬢油。止令破衣敝履。充作夜不收。打聽丈夫外事。擬坐以私渡關津律。杖八十。徒二年。

判曰。金釵十二。豈必盡充下陳。粉黛三千。亦惟供我侍從。何必修羅夜叉。分途勾攝。山精水怪。匿影潛窺。出入自有關防。內外豈容飛越。爰書有禁。城旦何辭。

一凡婦見夫入室。同妾悄語。卽假借公事。突入衝散。擬坐以擅闖轅門律。如止以譁擾不作嗔狀。引例末減。答五十。免供。

判曰。翡翠牀前。方調鸚鵡之舌。水晶簾外。忽來俊鶻之衝。不徒花上曬衣。

未免腹中藏劍。有心心術不端。無心學術不到。

一凡婦度妾與夫。正值綢繆之際。忽喚妾起。屬以他事。擬坐以擅調官軍律。杖一百。發邊遠充軍。

判曰。酣戰方深。浪子軍威正盛。金牌忽召。夫人桴鼓停聲。既徹白登之圍。詎有黃龍之望。墮功西徼。先軫之唾。固宜。掣肘東臆。長舌之罪。難賞。宥以生令。猶爲寬典。

督捕

一凡夫入妾室。慮主母之嗔。因而逃入妻所。妻遂閉之不令出戶。擬坐以窩隱逃人律。杖一百。流徙尙陽堡。

判曰。桃源有路。本期接引漁郎。梅子多酸。未便相延洞口。效紅拂之宵征。非得已也。反文君之私奔。意何爲乎。爾乃冥心已會。故托於李上蔡逐客之書。妙諦全窺。竟不學魯男子閉戶之美。汝既有意於窩逃。吾將按例而問擬。

刑部

一凡婦見夫與妾就寢。故不穩臥。隔房頻問瑣屑事務。擬坐以聽訟迴避不迴避律。答四十。

判曰。鴛夢初諧。正慮窺簾鸚鵡。蝶棲未穩。何堪聒耳游蜂。既干迴避之條。難辭撓法之譴。量從薄儆。以蔽厥辜。

一凡婦設榻床後。應妾同寢。令抱衾稠以就。即使合歡。不令暢遂。併不得諠語一字。擬坐以不應禁而禁律。杖六十。

判曰。臥榻之側。原非鼾睡之方。忌者之前。又豈詼諧之地。桃花三汲。猶虞浪動潛鱗。鶯囀一聲。更慮驚翻宿蝶。是宜通禁。允此嚴懲。

一凡婦因夫偶飲妓家。遂令端跪床前。自仍假寐。更餘不允發放。擬坐以告狀不受理律。杖一百。徒三年。

判曰。蝴蝶偶入花叢。原非貪宿。蜻蜓薄遊水際。未免沾濡。況風過帶香。何關薄倖。而衣沾剩粉。聊以娛情。爾乃頓發嬌嗔。罔顧黃金之膝。居然假寐。

任憑玉漏之催。眞變羊之巫。可誑而逆鱗之怒。難批矣。懸案過情。杖遣不枉。

一凡夫調婢。婢極力洒脫。以致頰紅肉顫。妻乃不察。仍擣婢女毒打。擬坐以官司。故出入人罪律。杖六十。以增減輕重論。

判曰。狹路相逢。幾餌身於豺虎。投梭峻拒。得幸脫於鷹鷂。顫斷香肌。蓋爲雲橫烟鎖。紅堆粉面。原非雨後霞生。不申法於強梁。反宣威於弱質。故出。故入。按律何辭。

一凡夫夜來私妾。及旦入妻房。乃託故啓釁。需索首飾衣服。擬坐以因公科歛律。計贓從重論。贓未入手者。杖六十。

判曰。終年交頸。曾無感於寸衷。一旦分甘。遂矜懷於大賚。翠環金縷。非可要挾而求。寶鈿繡衣。務在隨宜而錫。爾需索既出於機心。將擬罪應同於科斂。

一凡婦因夫娶妾。反目假病。臥牀不吃茶飯。其夫委曲勸解。終屬忿言詬罵。

及腹婢私進飲食。則啖之人至。輒復匿去。擬坐以資緣作弊。杖一百。流三千里。

判曰。銀牙正辟。何心翠釜紫駝。繡戶無人。輒噉金盞玉粒。若彼陰險之情。爲鬼爲蜮。業已覘其一斑。矧其秘藏之迹。如虺如蛇。甯能防之久後。縱茲不治。長此安窮。

十。一凡婢薄有姿色。見其稍稍修容。輒以誘漢。痛詆。擬坐以故勘平人律。杖八十。

判曰。桃花沐雨。原非有意呈嬌。梅子含酸。遂謂揉脂獻媚。擬以重杖。警彼多心。

一凡婦閱戲。見有演及妾妓者。婦必曉曉。併罵揀戲之人。以及自己丈夫。擬坐以決罰。不當律。笞五十。

判曰。雅劇新聲。用佐娛賓之勝。芳姿艷質。藉供綺席之歡。事爭選靡麗之情。詞必出佳人之口。爾乃觀花容而色沮。聞鶯囀而神飛。撫景傷心。當歌

疑讞誰家薄倖。故開作俑之端。郎實情乖。冀效跳梁之習。衾裯鼎沸。嫺友波騰。鼓焰無端。答懲有律。

一凡婦因公擊婢。輒侵下體便處。擬坐以決罰。不如法於人。虛怯處非法毆打。律成傷者。答四十。

判曰。前代腐刑。爰書久削。編民閹割。憲典嚴懲。卽男子而已然。況女子乎。何有。爾乃借公洩忿。聲罪討於包茅。乘興宣威。肆戈矛於夾谷。如驗有傷。按律究擬。

一凡婦值夫外出。卽將夫妻及有姪之妾。陰賣。並不擇人論價。迨妾知覺。不從。竟以燒香等計。誑騙出門。擬坐以監守自盜律。杖一百。發尙陽堡。同謀杖一百。流三千里。

判曰。小往大來。本蓄分甘之怨。母以子貴。愈深固寵之憂。不虞君子之征。行。巧屬紅顏之薄命。機乘挂帆鼓棹之時。早定調虎離山之計。牢籠巧計。奚容不抱琵琶。亟拔眼釘。那計珍珠十斛。辱當壚而不惜。雖換馬亦欣然。

傷情極矣。慘何如之。勘狠毒之元凶。固應遠徙。卽同謀之協從。勿令網遺。一凡婦端坐。令夫跪受刑杖。如不依從。號哭無已。擬坐以威勢制縛人律。杖一百。徒三年。

判曰。毒龍飛怒。白日晦而海水揚。脂虎橫行。谷風生而狐兔伏。吼聲正厲。鼻息敢舒。不憚協以威行。何惜律其勢制。

一凡婦喜多蓄婢。每同夫對飲。不令婢立已後。恐美目之盼。向夫傳情。擬坐以誘人犯法律。杖一百。流三千里。

判曰。錦繡成行。勿使肉屏障後。鴛鴦羅列。莫教花陣當前。蓋防對面芙蓉。密訂上官之約。燈前秋水。暗邀月下之期。不知慢藏之招。實爲冶容之誨。既飲人以狂藥。復忌已而閉邪。爾故陷之。罪還責爾。

一凡婦毒打婢女。其夫微言勸解。便謂私婢。愈加鞭笞不已。擬坐以冤屈平民爲盜律。杖六十。徒一年。

判曰。毒手老拳。情難坐視。纓冠披髮。勢涉嫌疑。乃詞以情遷。卦因變動。貪

非盜璧。浪爲竊金。屈法枉贓。故出。故入。

一凡婦不能容妾。反飾喧作喜。以昭賢德。願稱姊妹。無分大小。及入門。非禁。卽賣。擬坐以欺詐官私取財律。杖八十。徒二年。

判曰。夢中之蘭玉未占。被底之鴛鴦難共。琵琶隔院。聲已遠而莫疑。鸚鵡異籠。語屢調而難覺。顧耳屬於垣。趾不旋踵。王丞相之驅車。爲凌諸婢。戚少保之肉袒。奚獲二雛。爾乃蜜裏藏刀。必欲花間逐蝶。情亦甚矣。城旦猶輕。

一凡婦與夫小有間言。便呼兄喚弟。加之強橫。以宣威。夫妻擬坐以假冒官。兵律。杖七十。徒一年半。

判曰。日麗雲閒。風忽變而成颼。波恬浪靜。石偶激而生瀾。巧令如虎如狼。闐然吹聲。吹影遂聞。猛鷲搏鷹。不啻羣鴉噪鳳。蠢茲醜類。勿令網遺。孰爲主謀。訊明并逮。

一凡婦見夫有恙。便歸罪婢妾。故醜言徧告於人衆。擬坐以假公營私律。杖

六十徒一年。

判曰。紙帳呻吟。遽稱此風之始。竹牀偃仰。遂生爲厲之增。不知閨闔之事。甚於畫眉。乃以中華之言。指爲牆茨。意欲如將軍體敵。因人言而驅姬。恐難同太傅暮年。以老病而放妾。假借釁端。誑誣加等。

一凡婦舉動難堪。因夫稍違。便從妯娌兄弟哭訴。加以聽信婢妾之言。漫不省察。擬坐以越訴律。如汚人名節。杖一百。發附近充軍。

判曰。冀握權衡在手。先以論議向人。蓋因蠱惑於心。奚計含沙於口。不知盜嫂之事。猶可解也。至若通妹之誣。豈能堪乎。天譴難逃。王章莫貸。

一凡婦見婢垂髻。頗諳人事。竟不謀之夫主。擅配家奴。擬坐以屏去人服食律。杖八十。

判曰。桃花含蕊。何須便嫁東風。蚌孕猶胎。豈遂揚輝北渚。預作納履之猜。何其遽也。陰爲掩襲之計。不亦泰乎。擬以重杖。抑彼機心。

一凡婦打罵婢妾。吼聲震外。併罵及親友者。擬坐以辱罵尊長律。無服笞二

十有服笞五十。期親同胞杖一百。伯叔師友各加一等。

判曰。虎牙橫噬。豈避賢豪。烈火蔓延。寧分玉石。西楚大呼。鉄騎重圍。辟易河東一吼。拄杖落手茫然。魚無耳而深藏。鳥高飛而色舉。此蓋司晨之牝。非特門內之妖已也。因族黨之尊卑。就科條之輕重。量從分別。予以自新。一凡侍婢垂髻者。婦恐其夫沾染。悉皆鬻賣。另覓小者供用。擬坐以畧賣人口律。杖八十。徒二年。若畧賣至三口以上。枷號一個月。發邊衛充軍。牙保人各減。並追價入官。

判曰。絲柳初垂。遂驚心於黃鳥。夭桃未放。早畱意於游蜂。以防微杜漸之心。作革故鼎新之計。刈葦竹以植黃楊。驅修翎而蓄蚱蜢。律以畧賣。允蔽厥辜。

一凡婦知妾有姙。故使勞力。以致墮胎。併令產中飲食失時。擬坐以窩弓殺傷人律。杖一百。徒三年。

判曰。海棠新放。幸有色而無香。荳蔻初含。將漸開而結實。滿園春色。誰是

宜男共祝天孫。若爲乞巧。甫徵蘭夢。旋起鳩謀。致使瓜未熟而蒂已離。木向榮而心先蠹。覆巢不令完卵。殺母必更傷兒。豈止暗地害人。是蓋明欲絕後。置於徽纆。誠爲允宜。

一凡婦因事與夫反目。遂卽駕言寵妾。身投尼室。經宿不回。擬坐以背夫逃走。律杖一百。流三千里。

判曰。久蓄疑猜。苦無半隙。稔懷怨恨。巧駕一言。禪關藍室。允爲解脫之門。妖廟淫祠。故是藏奸之藪。卽非紅拂之奔。難洗緇流之辱。投之有北。永絕南還。

一凡婦抓碎丈夫面皮。併嚙傷肌膚者。擬坐以妻妾毆夫律。杖一百。徒三年。願離者聽。

判曰。情緒偶乖。笑裂千端。錦繪幽思乍觸。怒敲七尺珊瑚。狂飆發而松柏摧。驚濤轟而蘭蕙損。金閨虎坐。玉潤羊眠。旣昧三從。須嚴七出。

一凡婦特令腹婢私行窺探。互相論譚。以致婦之面色忽白忽青。微微冷笑。

擬坐以竊盜不得財律。答五十。免刺。

判曰。紗窗隙底。聆潛蟻鬥之聲。羅帳房中。化作鴟張之態。百螢惑眼。千崇蠱心。蜀碎芙蓉。吹上桃花之面。南香含笑。如啼漢女之粧。薄笞少懲。姑不深究。

一。凡婦聞妓女送夫扇巾等物。輒搜尋裂碎。擬坐以毀棄器物律。准竊盜已行而不得財律。答四十。

判曰。采蘭贈芍。雖屬淫靡。賁鶴焚琴。殊虧大雅。况報桃引趣。原非越水之紗。貽管呈愁。豈是江臯之珮。存之增韻。毀之獲愆。

工部

一。凡婦置妾衾稠床第。命作窄小止堪一人獨臥者。擬坐以造作不如法律。答四十。

判曰。棣棠誼重。曾傳大被之風。燕雀情深。舊有聯牀之雅。卽眉公之新式。未聞隘彼規模。非楚宮之細腰。何故減其繩尺。既稽古而無徵。當按律以

示儆。


一凡婦因夫欲往妾所。乃身先誘敵。及酣戰良久。已挫其鋒。始令鼓勇出汛。擬坐以虛費工力。採取不堪用律。坐贓論罪。杖一百。徒三年。

判曰。戈矛高揭。原期用力邊陲。而根本動搖。遂至奮身內寇。率罷乏之兵。將何充敵。值蕭牆之變。實所傷神。罪不止於阻撓。律應坐以虛費。粵稽贓迹。雖城旦而猶輕究厥奸謀。迅決杖以發遣。

(完)


香艷叢書一集卷三終





香豔叢書

第一集




HQ
1739
H75
V. 4
香艷叢書

三婦評牡丹亭雜記

錢塘吳人吳山著

吳人初聘黃山陳氏女同。將昏而沒。感於夢寐。凡三夕。得倡和詩十八篇。人作靈妃賦。頗泄其事。夢遂絕。有邵媼者。同之乳母也。來述同沒時。泣謂媼必詣姑所。言同薄命。不逮事姑。嘗爲姑手製履一雙。令獻之人。私叩同狀貌服飾。符所夢。媼又言同病中。猶好觀覽書籍。終夜不寢。母憂其茶也。悉索篋書燒之。僅遺枕函一冊。媼匿去。今尙存也。人許一金相購。媼忻然攜至。是同所評點牡丹亭還魂記。上卷密行細字。塗改略多。紙光問問。若有淚跡。評語亦癡亦黠。亦元亦禪。卽其神解。可自爲書。不必作者之意。果然也。惜下卷不存。對之便生於邑。已娶清溪談氏女。則雅耽文墨。鏡匿之側。必安書簏。見同所評。愛玩不能釋。人試令背誦。都不差一字。暇日仿同意補評下卷。其杪芒微會。若出一手。弗辨誰同。



誰則嘗記人十二歲時。偕衆名士集毛丈稚黃齋。客偶舉臨川恨不得肉兒般團成一片語爲創獲。人笑應曰。此特衍詩義耳。詩不云乎。聊與子如一兮。遂解衆頤。諸子虎男載之橘苑雜紀。今視二女評人語直糟粕矣。則旣評竟抄寫成帙。不欲以閨閣名聞於外間。以示其姊之女沈歸陳者。謬言是人所評。沈方延老生徐丈野君譚經。徐丈見之。謂果人評也。作序詒人。於時遠近聞者。轉相傳訪。皆云吳山評牡丹亭也。則又沒十餘年。人繼娶古蕩錢氏女。宜初僅識毛詩字。不甚曉文義。人令從崑山李氏妹學。妹教以文選古樂苑漢魏六朝詩乘。唐詩品彙草堂詩餘諸書。三年而卒業。啓籥得同。則評本怡然解會。如則見同本時。夜分燈燭。嘗欹枕把讀。一日忽忽不懌。請于人曰。宜昔聞小青者。有牡丹亭評跋。後人不得見。見冷雨幽牕詩。淒其欲絕。今陳姊評已逸其半。談姊續之以夫子故。揜其名久矣。苟不表而傳之。夜台有知。得無秋水燕泥之感。宜願典金釵爲梨棗資。意甚切也。人不能拂。因序其事。吳人舒鳧書。

坊刻牡丹亭還魂記。多標玉茗堂元本者。予初見四冊。皆有譌字。及曲白互異。

之句。而評語率多俚陋可笑。又見刪本三冊。惟山陰王本有序頗雋永。而無評語。又呂臧沈馮改本四冊。則臨川所譏割蕉加梅。冬則冬矣。非王摩詰冬景也。後從嫂氏趙家得一本。無評點。而字句增損。與俗刻迥殊。斯殆玉茗定本矣。爽然對翫。不能離手。偶有意會。輒濡毫疏注數言。冬釭夏簟。聊遣餘閒。非必求合古人也。

還魂記賓白。間有集唐詩。其落場詩。則無不集唐者。元本不注詩人姓氏。予記憶所及。輒爲注之。至于詩句中。多有更易字者。如莫遣兒童觸瓊粉。作紅粉武陵何處訪仙鄉。作仙郎。雖于本詩意刺謬。旣義取斷章。茲亦不復批摘也。右二段陳姊細書臨川序後。空格七行。內自述評註之意。共二百四十字。碎金斷玉。對之黯然。談則書。

向見牡丹亭諸刻本。詰病一折。無落場詩。獨陳姊評本有之。而他折字句。亦多異同。靡不工者。洵屬善本。每以下卷闕佚。無從購求爲快快。適夫子遊苕雪間。攜歸一本。與陳姊評本出一板所摹。予素不能飲酒。是日喜極。連傾八九瓷杯。

不覺大醉。自晡時臥至次日。日射幔鉤。猶未醒。鬪花賭茗。夫子嘗舉此爲笑。噓於時南樓多暇。仿姊意評注一二。悉綴貼小籤。勿敢自信。積之累月。紙墨遂多。夫子過泥予。迂許可與姊評等埒。因合抄入茗溪所得本內。重加裝潢。循環展覽。笑與抃會。率爾題此。談則又書。

同語二段。則手鈔之。復自題二段于後。後以評本示女甥。去此二頁。摺疊他書中。予弗知也。沒後。點檢不得。思之輒增悵惘。今七夕曬書。忽從庾子山集第三本翻出。楮墨猶新。映然獨笑。又念同孤冢埋香。奄冉十三寒暑。而則戡身女手之卷。亦已三度秋期矣。悵望星河。臨風重讀。不禁淚潛潛下也。吳人記。

此夫子丁巳七月所題。計余是時才七齡耳。今相距十五稔。二姊墓樹成圍。不審泉路相思。光陰何似。若夫青草春悲。白楊秋恨。人間離別。無古無今。茲辰風雨淒然。牆角綠萼梅一株。昨日始花。不禁憐惜。因向花前酌酒。呼陳姊談姊魂魄。亦能識梅邊錢某。同是斷腸人否也。細雨積花蕊上。點滴如淚。既落復生。盈盈照眼。感而書此。壬申晦日錢宜記。

夫子嘗以牡丹亭引證風雅。人多傳誦。談姊鈔本采入。不復標明。今加吳曰別之。予偶有質疑。間注數語。亦稱錢曰。不欲以蕭艾云云。亂二姊之蕙心蘭語也。若序目所注。則無庸識別焉。宜又書。

或問吳山曰。禮女未廟見而死。婦葬于女氏之黨。示未成婦也。子于陳未娶也。而評牡丹亭。概稱三婦何居。曰。廟見而成婦。謂子婦也。非夫婦之謂也。女之稱婦。自納采時已定之。而納徵則竟成其名。故納采辭曰。吾子自惠。貺室某。室者婦人之稱。納徵則曰徵者成也。至是而夫婦可以成也。禮娶女有吉日。而女死。壻齊衰而吊。既葬而除之。夫死亦如之。女之可夫。猶壻之可婦矣。夫何傷于禮歟。

或曰。曲有格。字之多寡。聲之陰陽。去上限之。或文義弗暢。衍爲襯字。限字大書。襯字細書。俾觀者了然。而歌者有所循。坊刻牡丹亭記。往往如此。今于襯字。何概用大書也。曰。元人北曲多襯字。概用大書。南曲何獨不然。襯字細書。自吳江沈伯英輩始。斤斤焉。古人不爾也。予嘗聞歌牡丹亭者。裊晴絲吹來閒庭院。格

本七字。而歌者以吹來二字作襯。僅唱六字。具足情致。神明之道。存乎其人。況玉茗元本。本皆大書。無細書襯字也。

或謂牡丹亭多落調出韻。才人何乃許耶。曰。古曲如西廂。人值殘春蒲郡東。才高難入俗人機。值字俗字作平則拗。琵琶支虞歌麻。且諸韻互押。若僅僅韻調而乏斐然之致。與歌工之乙尺四合無異。曷足貴乎。曰。子嘗論評曲家。以西河大可氏西廂爲最。今觀毛評。亟稱詞例。牡丹亭韻調之失。何不明注之也。吳山曰。然。不嘗論說詩者乎。意義訛舛。大家宜辨。若一方名一字畫。偶有互異。必旁搜羣藉。証析無已。此博物者事。非閨閣務矣。聲律之學。韻譜具在。故陳未嘗注。談亦仿之。予將取所用音調故實。方語詩詞曲并語有費說者。學西河論釋例。別爲書云。

或問曰。有明一代之曲。有工於牡丹亭者乎。曰。明之工南曲。猶元之工北曲也。元曲傳者無不工。而獨推西廂記爲第一。明曲有工有不工。牡丹亭自在無雙之目矣。

或曰子論牡丹亭之工。可得聞乎。吳山曰。爲曲者有四類。深入情思。文質互見。上也。審音協律。雅尙本色。次也。吞剝坊言。譌語。專事雕章。逸辭。案頭場上。交相爲譏。下此無足觀矣。牡丹亭之工。不可以是四者名之。其妙在神情之際。試觀記中佳句。非唐詩卽宋詞。非宋詞卽元曲。然皆若若士之自造。不得指之爲唐。爲宋。爲元也。宋人作詞。以運化唐詩爲難。元人作曲亦然。商女後庭。出自牧之。曉風殘月。本於柳七。故凡爲文者。有佳句可指。皆非工於文者也。或曰。賓白何如。曰。嬉笑怒罵。皆有雅致。宛轉關生。在一二字間。明戲本中故無此白。其冗處亦似元人。佳處雖元人勿逮也。

或問坊刻牡丹亭本。婚走折。舟子又有秋菊春花一歌。准警禦淮二折。有箭坊鎖城二渾。何此本獨無也。曰。舟子歌乃用唐李昌符婢僕詩。其一章云。春娘愛上酒家樓。不怕歸遲總不憂。推道那家娘子臥。且留教住耍梳頭。言外有春日載花停船相待之意。二章云。不論秋菊與春花。個個能嚙空腹茶。無事莫教頻入庫。一名閒物要些些。則與舟子全無關合。當是臨川初連用之後。於定本削

去。至以賤房爲箭坊。及外面鎖住李全裏面鎖住下官諸語。皆了無意致。宜其并從芟柞也。

臨川曲白。多用唐宋人詩詞。不能悉爲引注。覽古者當自得之。卽尋夢二字。亦出唐詩。乃評者往往驚爲異想。遼豕白頭。抑何可怪耶。

或問記中雜用哎喲哎也。哎呀咳呀咳也。咳咽諸字。同乎異乎。曰。字異而義略。同字同而呼之有輕重疾徐。則義各異。凡重呼之爲厭辭。爲惡辭。爲不然之辭。輕呼之爲幸辭。爲嬌羞之辭。疾呼之爲惜辭。爲驚訝辭。徐呼之爲怯辭。爲悲痛辭。爲不能自支之辭。以此類推。神理畢現矣。

或曰。牡丹亭集唐詩。往往點竄一二字。以就已意。非其至也。曰。何傷也。孔孟之引詩。有更易字者矣。至左傳所引。皆非詩人之旨。引詩者之旨也。曰。落場詩。皆集唐。何但註而不標也。曰。旣已無不集唐。故玉茗元本。不復標集唐字也。落場詩。不注爨色。亦從元本。

或問若士集詩。腹笥乎。獺祭乎。曰。不知也。雖然難矣。

陳於上卷未注三句。談補之。談於下卷亦未注一句。錢疏之。予涉獵於文。既厭翻檢。而錢益覩記寡陋。唐人詩集。以及類苑紀事。萬首絕句諸本。篇章重出。名字互異。不一而足。錢偶有所注。註漏實多。它如來鵠或云來鵬。崔魯一作崔櫓。誰能譚笑解重圍。皇甫冉句也。譌刻劉長卿。微香冉冉淚涓涓。李商隱詩也。謬爲孫逖。不勝枚舉。皆不復置辨。覽者無深揅掎焉。

或問若士復羅念菴云。師言性。弟子言情。而還魂記用顧況世間只有情難說之句。其說可得聞乎。曰。人受天地之中以生。所謂性也。性發爲情。而或過焉。則爲欲。書曰。生民有欲。是也。流連放蕩。人所易溺。宛邱之詩。以歌舞爲有情。情也。而欲矣。故傳曰。男女飲食。人之大欲存焉。至浮屠氏以知識愛戀爲有情。晉人所云未免有情。類乎斯旨。而後之言情者。大率以男女愛戀當之矣。夫孔聖嘗以好色比德。詩道性情。國風好色。兒女情長之說。未可非也。若士言情。以爲情見於人倫。倫始於夫婦。麗娘一夢所感。而矢以爲夫之死靡忒。則亦情之正也。若其所謂因緣死生之故。則從乎浮屠者也。王季重論玉茗四夢。紫釵俠也。邯

鄆仙也。南柯佛也。牡丹亭情也。其知若士言情之旨矣。

宜按洵有情兮。是千古言情之祖。陶元亮效張蔡爲閒情賦。專寫男女。雖屬託諭。亦一徵也。

或者曰。死者果可復生乎。曰。可。死生一理也。聖賢之形。百年而萎。同乎凡民。而神常生於天地。其與民同生死者。不欲爲怪以惑世也。佛老之徒。則有不死其形者矣。夫強死者。尙能厲。况自我死之。自我生之。復生亦奚足異乎。予最愛陳女評牡丹亭題辭云。死可以生。易生可與死。難引而不發。其義無極。夫恒人之情。鮮不謂疾疹所感。溝瀆自經。死則甚易。明冥永隔。夜台莫旦。生則甚難。不知聖賢之行法。俟命全而生之。全而歸之。舍生取義。殺身成仁。一也。孔子曰。朝聞道。夕死可矣。又曰。原始反終。故知死生之說。死。不聞道。則與百物同漸絕耳。古來殉道之人。皆能廟享百世。匹夫匹婦。凜乎如在。死耶生耶。實自主之。陳女茲評。黯與道合。不徒佛語涅槃。老言谷神也。

或又曰。臨川言理之所必無。情之所必有。理與情二乎。曰。非也。若士言之而不

欲盡也。情本乎性。性卽理也。理貫天壤。彌六合者也。言理者莫如六經。理不可通者六經實多。無論元鳥降生。牛羊腓字。其跡甚怪。卽以夢言。如商賁哀弼。周與九齡。孔子奠兩楹。皆非情感。周禮掌夢。獻夢。理解。傅會。左氏所紀。益荒忽不倫已。然則世有通人。雖謂情所必無。理所必有。其可哉。或問若士言夢中之情。何必非眞。何謂也。曰。夢卽眞也。人所謂眞者。非眞也。形骸也。雖然。夢與形骸未嘗貳也。不觀夢搆而精遺。夢擊躍而手足動搖乎。形骸者眞與夢同。而所受則異。不聲而言。不動而爲。不衣而衣。不食而食。不境而無所不之焉。夢之中又有夢。故曰。天下豈少夢中之人也。

嘗與夫子論夢境。夫子曰。吾其問諸焦冥乎。眼睫一交。已別是一世界。古德教人參睡着無夢時。便似鴻濛混沌也。予謂按顛則驚。拊心則覺。此處大可觀夢。夫子頷之。又一日論夢。夫子曰。晝與夜。死生之道也。醒與夢。人鬼之道也。予曰。其寐也綿綿延延。如微雲之出岫。若不遽然。其寢也千里一息。捷如下峽之船。何也。夫子曰。陽見而陰伏。故出難而歸速。

或稱評論傳奇者。類作鄙俚之語。以諧俗目。今牡丹亭評本。文辭雅雋。恐觀者不皆雅人。如臥聽古樂也。曰是何輕量天下也。天下不皆雅人。亦不絕雅人。正使萬俗人。譏不足恨。恨萬俗人賞。一雅人譏耳。

或曰。子所謂抄入茗溪本者。嘗見之矣。陳評上卷。可得見乎。吳山悄然而悲。喟然而應之曰。癸丑之秋。予館黃氏。隣火不戒。盡燔其書。陳之所評。久爲灰塵。且所謂茗溪本者。今亦亡矣。曰。何爲其亡也。曰。癸酉冬日。錢女將謀劓。劓錄副本成。日暮微霰。燒燭燐酒。促予檢校。漏下四十刻。寒氣薄膚。微聞折竹聲。錢謂此時必大雪矣。因共出。推牕見庭樹枝條。積玉堆粉。予手把副本。臨風狂叫。竟忘室中燭花。爆落紙上。烟達簾外。回視炯炯然。不可嚮邇。急挈酒。盞傾潑之。始熄。復簇爐火。然燈。酒縱橫流地上。漆几焦爛。燭台融錫。與殘紙煨燼。團結不能解。因嘆陳本既災。而談本復罹此厄。豈二女手澤。不欲留于人世。精靈自爲之耶。抑有鬼物妬之耶。殘釭欲施。雪光易曉。相對淒然。久之。命奴子坎牆陰梅樹旁。以生絹包燼團瘞之。至今留焦几。志予過焉。

李玉山曰。瘞燼團。留焦兒。皆雅事可傳。

或曰。女三爲粲。美故難兼。徐淑蘇蕙。不聞繼嬋。韋叢裴柔。亦止雙絕。子聘三室。而祕思妍辭。後先相映。樂乎何遇之奇也。抑世皆傳子評牡丹亭矣。一旦謂出三婦手。將無疑子爲捉刀人乎。吳山曰。疑者自疑。信者自信。予序已費辭。無爲復也。且詩云。人知其一。莫知其他。其斯之謂與。予初聘陳。曾未結褵。天闕不遂。談也三歲爲婦。炊臼遽徵。錢復清瘦善病。時時臥牀。殆不起。予又好遊。一年三百六十日。無幾日在家相對。子以爲樂乎否也。

右或問十七條。夫子每與座客談論所及。記以示余。因次諸卷末。是日晚飯時。予偶言言情之書。都不及經濟。夫子曰。不然。觀牡丹亭記中。騷擾淮揚地方一語。卽是深論天下形勢。蓋守江者必先守淮。自淮而東。以楚泗廣陵爲之表。則京口秣陵。得以遮蔽。自淮而西。以壽廬歷陽爲之表。則建康姑熟。得襟帶長江。以限南北。而長淮又所以蔽長江。自古天下裂爲南北。其得失皆在於此。故金人南牧。必先騷擾其間。宋家策應。亦以淮揚爲

重鎮。授杜公安撫也。非經濟而何。因顧謂兒子向榮曰。凡讀書一字一句。當深繹其意。類如此。甲戌秋分日錢宜述。

甲戌冬暮刻牡丹亭還魂記成。兒子校讐譌字。獻歲畢業。元夜月上。置淨几于庭。裝褫一冊。供之上方。設杜小姐位。折紅梅一枝。貯胆瓶中。然燈陳酒果。爲奠。夫子忻然笑曰。無乃太癡。觀若士自題。則麗娘其假託之名也。且無其人。奚以奠爲。予曰。雖然大塊之氣。寄于靈者。一石也。物或憑之。一木也。神或依之。屈歌湘君。宋賦巫女。其初未必非假託也。後成叢祠。麗娘之有無。吾與子又安能定乎。夫子曰。汝言是也。吾過矣。夜分就寢。未幾。夫子聞予嘆息聲。披衣起肘。予曰。醒醒。適夢與爾同至一園。彷彿如所謂紅梅觀者。亭前牡丹盛開。五色間錯。無非異種。俄而一美人從亭後出。豔色眩人。花光盡爲之奪。意中私揣。是得非杜麗娘乎。汝叩其名氏。居處。皆不應。廻身摘青梅一丸。撚之。爾又問若果杜麗娘乎。亦不應。銜笑而已。須臾大風起。吹牡丹花滿空。飛攬餘無所見。汝浩歎不已。予遂驚寤。所述夢蓋與予夢同。因共詫爲奇異。夫子曰。昔阮瞻論無鬼。而鬼見。

然則麗娘之果有其人也。應汝言矣。聽麗譙。統如打五鼓。向壁停燈未滅。予亦起呼小婢。簇火淪茗。梳掃訖。急索楮筆。紀其事。時燈影微紅。朝暾已射東牖。夫子曰。與汝同夢。是非無因。麗娘故見此貌。得毋欲流傳人世耶。汝從李小姐學。尤求白描法。盍想像圖之。予謂恐不神似。奈何。夫子乃強促握管。寫成。并次記中韻。繫以詩。詩云。暫遇天姿豈偶然。濡毫摹寫當留仙。從今解識春風面。腸斷羅浮曉夢邊。以示夫子。夫子曰。似矣。遂和詩云。白描真色亦天然。欲問飛來何處仙。閒弄青梅無一語。惱人殘夢落花邊。將屬同志者。咸和焉。錢宜識。

李玉山曰。予應兄嫂教。有和句云。因夢爲圖事邈然。牡丹亭畔一逢仙。可知當日懷春意。猶在青青梅子邊。如鸛鵲學人言。不惟不工。亦不似也。

或謂水墨人物。昉自李伯時。非也。晉衛協爲列女圖。吳道子嘗摹之以勒石。則已是白描法矣。龍眠墨筆仕女。仿也。非昉也。予與吳氏三夫人爲表妯娌。嘗見其藏有韓冬郎偶見圖四幅。不設丹青。而自然逸麗。比世所傳宋畫院陳居中摹崔麗人圖。殆於過之。惜其不署姓名。或云是吳中尤求所臨。今觀錢夫人爲

杜麗娘寫照。其姿神得之夢遇。而側身歛態。運筆同居中法。手搓梅子。則取之偶見圖第一幅也。昔人論管仲姬墨竹梅蘭無一筆無所本。蓋如此。乙亥春日。馮嫺跋。

吳山四兄。聘陳嫂。娶談嫂。皆蚤夭。予每讀其所評還魂記。未嘗不泣然流涕。以爲斯人既沒。文采足傳。而談嫂故隱之。私心欲爲表章。以垂諸後。四兄故好游。談嫂沒十三年。朱弦未續。有勸之者。輒吟微之。取次花叢。懶回顧。半緣修道。半緣君之句。母氏迫之。始復娶錢嫂。嘗與予共事筆硯。酬花獻月之餘。取二嫂評本參注之。又請於四兄。典金釵雕板行世。予偶憶吳都張元長氏梅花草堂二談。載俞娘行三麗人也。年十七夭。當其病也。好觀文史。一日見還魂傳。黯然曰。書以達意。古來作者多不盡意而出。若生不可死。死不可生。皆非情之至。真達意之作矣。研丹砂旁注。往往自寫所見。出人意表。如感夢折注云。吾每喜睡。睡必有夢。夢則耳目未經涉。皆能及之。杜女故先吾著鞭耶。如斯俊語。絡繹連篇。其手蹟迺媚可喜。某嘗受冊其母。請秘爲草堂珍玩。母不許。急錄一副本。將上。

湯先生謝耳伯願爲郵不果。上虞山錢受之。近取西廂公案參倒洞聞漢月諸老宿。請俞娘本戲作傳燈錄。甚急。某無以應也。由此觀之。俞娘之注牡丹亭也。當時多知之者。其本竟湮沒不傳。夫自有臨川此記。閨人評跋。不知凡幾。大都如風花波月。飄泊無存。今三嫂之合評。獨流布不朽。斯殆有幸有不幸耶。然二談所舉俞娘俊語。以視三嫂評注。不翅瞠乎。則不存又何非幸耶。合評中詮疏文義。解脫名理。足使幽客啓疑。枯禪生悟。恨古人不及見之。洵古人之不幸耳。錢嫂夢觀麗娘。紀事寫像詠詩。又增一則公案。予亦樂爲論而和之。并識其後。自幸青雲之附云。玉山小姑李淑謹跋。

牡丹亭一書。經諸家改竄。以就聲律。遂致元文剝落。一不幸也。又經陋人批點。全失作者情致。二不幸也。百餘年來。誦此書者。如俞娘小青。閨閣中多有解人。又有賦害殺婁東俞二娘者。惜其評論。皆不傳于世。今得吳氏三夫人合評。使書中文情畢出。無纖毫遺憾。引而伸之。轉在行墨之外。豈非是書之大幸耶。文章有神。其足以傳後者。自有後人與之神會。設或陳夫人評本殘缺。無談夫人

續之續矣。而秘之篋笥。無錢夫人參評。又廢首飾以梓行之。則世之人能誦而不能解。雖再閱百餘年。此書猶在塵霧中也。今觀刻成。而麗娘見形于夢。我故疑是作者化身矣。同里女弟顧姒題。

吳與予家爲通門。吳山四叔。又父之執也。予故少小以叔事之。未嘗避匿。憶六齡時。僑寄京華。四叔假舍焉。一日論牡丹亭劇。以陳談兩夫人評語引證禪理。舉似大人。大人嘆異不已。予時蒙穉。無所解。惟以生晚不獲見兩夫人爲恨。大人與四叔持論。每不能相下。予又聞論牡丹亭時。大人云。肯綮在死生之際。記中驚夢尋夢診崇寫真悼傷正折。自生而之死。魂游幽構。歡撓冥誓。回生五折。自死而之生。其中搜抉靈根。掀翻情窟。能使赫蹏爲大塊。隕櫜爲造化。不律爲眞宰。撰精魂而通變之。語未畢。四叔大叫歎絕。忽忽二十年。予已作未亡人。今大人歸里。將干孤嶼築稗畦草堂。爲吟嘯之地。四叔故好西方止觀經。亦將歸吳山草堂。同錢夫人作龐老行逕。他時予或過夫人習靜。重聞緒論。卽許拈此劇參悟前因否也。因讀三夫人合評。感而書其後。同里女姪洪之則謹識。

甲戌長夏。曬書檢得舊竹紙半幅。乃陳姊彌留時所作斷句。口授妹書者。夫子云。陳沒九年後得諸其妹。婿妹亦亡二年矣。竹帛斜裂。僅存後半。因鏤夫子還魂記。或問上方空白。感其昔時閒論牡丹亭之句。附錄於此。俾零膏剩馥。採香奩者。猶得采摭焉。第二行北風吹夢四字。二行恰如殘醉欲醒時七字。是末句也。以後皆一行二十一字。一行七字相間。凡九首。三行下缺二字。其文云。也曾枯坐閱金經。不斷無明爲有形。及到懸崖須口口。如何煩惱轉嬰寧。按闕文疑是撒手二字。次云。屢子裁羅二寸餘。帶兒折半裏猶疏。情知難向黃泉走。好借天風得步虛。次云。家近西湖性愛山。欲遊娘却罵痴頑。湖光山色常如此。人到幽厠更不還。次云。簇蝶臨花綉作衣。年年不著待于歸。那知著向泉台去。花不生香蝶不飛。次云。盡檢箱奩付妹收。獨看明鏡意遲留。算來此物須爲殉。恐向人間復照愁。次云。爺娘莫爲女傷情。姊嫁仍悲墓草生。何似女身猶未嫁。一棺寒雨傍先塋。次云。看儂形欲與神離。小婢情多亦淚垂。金珥一雙留作念。五年無日不相

隨。次云。口角過斜痰滿咽。涓涓清淚灑紅綿。傷心趙嫂牽衾語。多半啼痕是隔年。次云。昔時閒論牡丹亭。殘夢今知未易醒。自在一靈花月下。不須留影費丹青。按談姊南樓集。載補陳姊缺文。一首云。北風吹夢欲何之。簾幙重重只自垂。一縷病魂消未得。却如殘醉欲醒時。予亦有補句云。北風吹夢斷重吹。一枕餘寒心自疑。添得五更消渴甚。却如殘醉欲醒時。自顧形穢。難免續貂之誚矣。

跋

臨川牡丹亭數得閨閣知音。同時內江女子。因慕才而至沉淵。茲吳山三婦。復先後爲之評點校刊。豈第玉簫象管。出佳人口已哉。近見吾鄉某氏閨秀。又有手評本。玉綴珠編。不一而足。身後佳話。洵堪驕視千古矣。丙申長夏震澤楊復吉識

龜台琬琰

新安張正茂松如著

西王母

母居龍月城。城中產黃中李。花開則三影。結實則九影。母惜之過於蟠桃。

嫦娥

羿妻。逃月爲虛上夫人。

上元夫人

夫人名阿環。降漢宮。年可二十餘。頭作三角髻。

玉女

葭萌縣有石穴。名玉女房。房前修竹數竿。下覆青石壇。每因風自掃此壇。女每遇明月夜。卽於壇上閒步徘徊。復入此房。

太眞王夫人

夫人有子。爲三天太上府都官。時乘白龍。週游四海。

殷王女

女食蓬累根得道。

朱翼

太陽女。二百八十歲。色如桃花。眉髻如畫。

馬郎婦

婦於金沙灘。施一切人淫。凡與交者。永絕淫念。死葬後。一梵僧來云。求我侶。掘開乃鏤子骨。僧以杖挑起。升雲而去。

玉卮娘子

玉卮西王母第三女。崔書生遇之。遺以白玉合。

顓和大玄女

一名西靈子。都入水不濡。入火不然。盛寒着單衣。行水上。可至積日。能徙宮殿。城市於他所。指之則失所在。

麻姑

姑降蔡經家云。接待以來。東海三爲桑田。蓬萊水久清淺矣。共有三麻姑。此卽王方平妹。降蔡經家者。又石勒時。麻秋女於望仙橋飛昇。名麻姑。又政和中。建昌人姑。餘山得道者。亦名麻姑。（畊餘雅錄云。麻姑姓黎。字瓊仙。唐放出宮人也。則是有四麻姑矣。）

女兒

朱仲嘗於會稽賣珠。以素書貲酒於儿家。儿盜寫之。學其術仙去。

紫雲娘

魯敢遇仙女曰。嘗見紫雲娘。誦君佳句。

毛女

女字玉姜。陶太白陟芙蓉峯。遇之。毛髮翠潤。身輕如飛。以萬歲松脂。千歲柏子遺陶。

梅姑

梅姑生時。能着履行水上。

弄王

玉吹簫作鳳鳴。有鳳止其屋。後乘鳳去。

英妃

妃腋下忽生碧毛。謝同列曰。我碧毫小仙也。久爲世溷。今當去。汝等努力。會當見我於玄圃耳。

張麗英

英面有奇光。不照鏡。但對白紈扇。如鑒焉。

南陽公主

王莽秉政。公主避亂犇華山。得道仙去。嶺上遺一雙珠履。

白水素女

晉安郡書生謝端。性介潔。不染聲色。嘗於海岸觀濤。得一螺。大如一石米斛。割之中有美女。曰。予天漢中素女。天帝矜卿純正。令爲君婦。

曉暈

暈釀游仙酒。飲之而臥。夢歷蓬萊赤水。

鹿娘

村人韓文秀。見鹿產一女。遂收養之。及長爲女冠。梁武帝爲立觀。後死。入棺。帝開視之。但異香網縕。不見骸骨。

皇太姆

姆居武夷。遊行乘白雲一片。

水仙子

仙子爲南溟夫人侍者。手恒弄一圓石子。如鳥卵。色類玉。後以贈青霞君。爲經鎮。一日忽大風雨。石裂。有一蟲走出。狀若綠蠅。就研池飲少水。乘風雨掣去。盖一龍也。

萼綠華

降羊權家。可二十許。上下皆青衣。贈權詩及金玉條脫各一枚。

配瑛

瑛與鳳共處。鳳嘗以羽翼扇女面。

拳夫人

夫人居處。嘗有青紫氣屬天。兩手俱拳。漢武帝令開其手。數十人擘莫能開。帝自披手卽伸。後死雲陽宮。香聞十里。尸解柩空。但存絲履。

魯妙典

麓林道士授妙典大洞黃庭經。入九疑十年。

智瓊

瓊下嫁濟北從事竝義起。贈詩云。飄浮救世敖。曹雲石滋芝。一英不須潤。至德與時期。神仙豈常降。應會來相之。納我榮五族。逆我致禍菑。

程偉妻

偉按枕中鴻寶。作金不成。妻卽因偉爐中汞。出囊中藥少許。投之卽成金。

黃虛微

虛微年逾八十。貌如嬰孺。號花姑。

緱仙姑

姑居南岳魏夫人仙壇。忽一青鳥飛來。自言爲南岳夫人使。以姑修道精苦。命我爲伴。姑徙湖南。隱九疑。鳥併隨之。清話云。青鳥形如鳩。紅頂長尾。緱仙姑曾見之。

雲英

雲英。雙手如玉。光彩照人。

杜蘭香

蘭香。駕青牛鈿車。下嫁張碩。婢子二。大者萱。支小者松。支墉城集仙錄云。湘江漁父。於洞庭聞啼兒聲。視之三歲女子。舉之十年餘。忽有青童自碩所來。携女去。臨升謂父曰。我杜蘭香也。有過。謫人間耳。

秀英

英。丁義女。今瑞州崇元觀。有英煉丹所。

少室仙姝

封陟居少室山。林藪深秀。泉石清寒。仙姝降其居。陟不顧。留詩。蕭郎不顧鳳頭人。雲澀迴車淚。臉新愁。想蓬瀛歸去路。難窺舊苑碧桃春。

樊夫人

一名雲翹。夫人爲玉皇女史。劉綱吐盤成魚。夫人吐盤成獺。食之。

楊敬眞

敬眞適同村王清。奉箕帚惟謹。目爲勤力新婦。

賣蕨母

姆賣蕨市上。黃衣破結。有飢色。王鯨遇而憫之。乃以千錢買蕨。姆謝而去。及歸。蒸於烏頭。甑盡成金釵。

郊道光女

女嘗於高郵軍南樓東井。汲水煉丹。飛仙去。今號玉女井。

湛姆

許旌陽心期每歲謁姆。姆卽覺之。曰。子勿來。吾卽還帝鄉矣。

雲林夫人

夫人與許穆書云。玉醴金漿。交梨火棗。當與山中許道士。不與人間許長史。

何仙姑

姑生而頂有六毫。含雲母粉。往來山嶺。行步如飛。天寶九載。見於麻姑五色雲中。

吳彩鸞

彩鸞日寫唐韻一部。運筆如飛。

崔生妻

崔生得隱形符。潛唐玄宗宮禁中。爲術士所知。追捕甚急。生逃還山。追者在後。隔澗見妻告之。妻擲其領巾。成五色虹橋。生過卽滅。

許明恕婢

明恕以杖擊婢。隨杖身起。不知所在。

楊父女

女絕色。有謝生者求娶。父曰。有詩一聯。能續則許。詩曰。朱奩半牕月。脩竹一簾風。生曰。何事。今宵景無人解與同。女曰。天生吾壻。偶之七年而逝。後生見之。江中曰。吾水仙也。慙謫人間耳。

驪山老姥

姆袖中出一瓢。令李筌谷中取水。既滿。忽重百餘斤。力不能制。

潘統制妻

妻一歲連舉三子。常于淨室趺坐誦經。出必以虎子自隨。

東陵聖母

或以聖母姦妖。官收付獄。頃之已從獄牕中飛去。衆望見之。轉高入雲中。遺所着履一緡。

孫仙姑

姑臨化書頌云。三千功德超三界。跳出陰陽包裹外。隱顯縱橫得自由。醉魂不復歸賓海。

裴玄靜

玄靜乘白鳳冲舉。

瞿夫人

隋末黃元仙爲辰州刺史。隋亡。與夫人隱州西之羅山。貧甚。爲人傭織養姑。如此者十年。忽謂元仙曰。昨有帝命。當與君別。俄化青氣數丈。騰空而去。

威逍遙

逍遙獨處靜室。忽一日屋裂如雲。但見室內所御衣履。逍遙與衆仙在雲中。

陳元嬌

元嬌掌蓬萊紫虛洞。

唐廣眞

廣眞跨大蝦蟆度海。因游名山。

錢妙眞

妙眞與妹依陶隱居。道成。忽披白衣。入茅山燕洞。妹後至。洞已扃矣。至今有碧

桃花。紫菖蒲在焉。

曹仙媼

媼常携幼女。引一犬。息馬鬪關柳下。一日渡河。舟師拒之。媼携女與犬。凌波御風。須臾登岸。

武元照

元照在女孩。母茹葷。輒終日不乳。比長。神人告照絕粒。母強食。神乃剖腹滌之。麻衣仙姑。

仙姑隱少室山。人見跳入石壁中。聲隱隱如雷。

馬大仙

大仙家貧。事姑甚謹。嘗往來傭織。去家百里。有美食。卽以笠浮。頃刻還家薦姑。

劉安女

母送女適何氏。忽有白鵝自空而墮。女乘之去。陳軒詩曰。白鵝乘去人何在。青鳥飛來信不遙。若使何郎有仙骨。也應同引鳳凰簫。

焦靜貞

靜貞謂薛季昌曰。司馬承禎得道。高于陶都水。當爲東華上清真人。

酒家女

女眉生而連耳。細而長。衆以爲異。鄴人犢子。牽一黃犢過。女悅之。遂隨去。冬日常賣桃李市中。

太真

楊通幽道士。至蓬萊最高處。多樓閣。有戶東向。署曰玉妃太真院。

江妃二女

女遊江湄。逢鄭交甫。解所佩明珠贈之。行數十步。女不見。珠亦隨失。

謝自然

自然登天台玉霄峰。見滄海蓬萊。亦應非遠。乃浮一席。航海訪蓬萊。

王氏祖母

母二百餘歲。兩眼白眚皆碧。夜多不睡。每月餘忽不見。數日復來。牀頭秘一柳。

箱。可尺餘。封鑲甚密。一日母不在。因竊開之。中止一小鐵篋。自是不歸。

洛神女

蕭曠遇神女。問曰。陳思王精靈安在。曰。爲遮須王。

明節劉后

林靈素云。后是九華玉真安妃。後有青城翁。見后於巫山。

禪黎王女

女生而不言。其國枯旱。地下生火。王怖。女爲仰嘯。天降洪水。至十丈。

賣酒姥

姥善採百花釀酒。王方平嘗以千錢過蔡經家。與姥沽酒。後有人經洞庭湖。見賣百花酒者。姥也。

(完)

潮嘉風月記

山陰俞蛟清源著

青樓珠箔。能勾蕩子之魂。赤仄雲繪。難實妖姬之壑。被無窮之遺害。溯作俑于何年。金縷歌殘。豔名花而早折。玉簫聲咽。傷幽會以難期。洞號迷香。入尋何衆。泥惟沾絮。洗脫者誰。僕也不解溫柔。貽譏風雅。遇紫雲于席上。敢發狂言。賡綠水于牆邊。頓忘綺夢。墨堆雪嶺。美醜無煩。加黑白之評。風颭荷珠。姻緣何必有短長之喻。乃梅州帶水。毗接封圻。而潮郡連疆。地鄰瀛海。徹夜之笙歌疊奏。撥鷗絃而驚起潛鱗。侵晨之紛黛皆香。籠蟬鬢而豔留碧浪。采風問俗。紀載宜詳。品翠題紅。篇章爭麗。逞擲心而賣眼。每氣盡于綺袴園中。竭獻笑以呈歡。徒魂斷于蓬牕深處。迨夫色荒情倦。繼以裘敝金殘。對此日之蕭條。傷懷殊甚。憶當年之佳麗。回首難堪。是用箴規。爰資搜輯。

麗景

潮州居羊城東北。山海交錯。物產珍奇。嶺表諸郡。莫與之京。以故郭門內外。商

族輻輳。人烟稠密。儼然自成都會。昔韓文公貶潮州刺史。驅鱷魚之害。開文教之端。後人追慕其德。名其江曰韓江。越今七百餘年。烟波浩渺。無滄桑之更。而繡幃畫舫。鱗接水次。月夕花朝。鬢影流香。歌聲戛玉。繁華氣象。百倍秦淮。此外如梅州之八角亭前。齊昌之西河塘外。雖規模不及。而雨絲風片。滯人魂魄。如出一轍也。若非在上者惠養有方。則荒徼之區。安能富庶華美至此極哉。

潮嘉曲部中。半皆蜑戶女郎。而蜑戶惟麥濮蘇吳何顧曾七姓。以舟爲家。互相配偶。人皆賤之。間嘗攷諸紀載。蜑謂之水欄。辨水色。卽知有龍。又曰龍戶。秦始皇使屠睢統五軍監祿殺西甌王。越人皆入叢薄中。與禽獸處。莫肯爲秦。意者今之蜑戶。卽西甌之遺民歟。生男專事篷篙。祇在濔溪潮陽五百里內。往來載運物貨。以受值。生女則視其姿貌之妍媸。或留撫畜。或賣鄰舟。父母兄弟。仍時相顧問。稍長。輒勾眉敷粉。撒管調絲。蓋其相沿之習。有不能不爲娼者。非如燕趙之區。隨處可遊。資生多術。乃不顧廉恥。以身爲貨。可同日而語。故遇交好者。擇純謹可倚。卽託以終身。不俟老大始嫁作商人婦也。廣東蜑戶。與浙江墮民。

曾蒙

諭旨。准其爲良。與居民一體安居習業。土豪地棍。橫加逼辱。依律治罪。載在令典。此眞胞與爲懷。欲滌斯民舊習之污。無如結習莫除。甘於下賤。亦可哀也已。六篷船形勢。昂首巨腹而縮尾。首長約身之半。前後五艙。首艙居則設門。并几席之屬。行則并篷去之。以施篙楫。中艙爲欸客之所。兩旁垂以湘簾。雖寬不能旋馬。而明敞若軒庭。前後分爲燕寢。几榻衾枕。奩具熏籠。紅閨雅器。無不精備。捲幔初入。竟錦綉奪目。芬芳襲人。不類塵寰。然此猶麗景之常耳。頃年更有解事者。屏除羅綺。臥處橫施竹榻。布帷角枕。極其樸素。榻左右各立高几。懸名人書畫。几上位置胆瓶。彝鼎。間倚蓬牕。焚香挿花。居然有名士風味。對榻設局。脚牀二。非詩人雅士不延坐。韓江抵清溪。往迴千餘里。處處修篁夾岸。每乘此船。與粉白黛綠者。凭欄偶坐。聽深林各種野鳥聲。頓忘作客。是何異古之迷香洞。非胸有卓識。安得不爲之惑。諺云。少不入廣。職此故歟。

潮嘉風俗樸魯。良家婦女。布衣椎髻。頗形惡劣。舟中則雲鬟分梳。薄如蟬翅。蛾

眉約秀。淡若春山。綵袖曳風。睡花凝碧。繡鞋步月。瘦玉生香。至於環珮聲低。芳蹤漸遠。釵鈿製巧。新樣頻翻。更有不能枚舉者。而儉荒之徒。囿於習俗。每嫌蓮船不束。無論妍媸。見而齒冷。是皆措大之見。烏足與品題佳麗哉。從來歌咏美人。未嘗語及其足。史稱楊妃羅襪。宋書稱婦人圓履。韓冬郎詩云。六寸圓膚光。纖纖皆不纏足之明驗。且昔人論東坡詩。如名家女大腳步便出。是女之美。惡不在足之大小。今有人焉。濃眉闊目。碩腹粗腰。雖裙底雙鈎。不盈三寸。亦謂之佳麗乎。如余所見潮州之竹姑。興寧之貞娘。月鳳。郭十娘。麥蓮。鳳梅。州之吳小。金。麥鳳妹。皆眉黛楚楚。一笑嫣然。緩行獨立。倍覺娉婷。余雖不解個中三昧。而知當日西子太真。足以傾人城者。斷不在鳳頭窄小也。

琵琶古樂器也。自康崑崙而後。能彈五十四絃者。已久無其人矣。然當時太常卿王瑀。嘗云。琵琶聲多。琵琶聲少。亦未可彈大弦。豈俗手所能擅其技哉。今舟中女校書。度曲動輒亂撥石槽。以倚和其韻。雖有巧者。時變新聲。究不足與言樂也。但空江秋夜。月印澄潭。雁橫碧落。箕踞蓬窗。靜聽鄰船。輕彈低唱。亦復不惡。友

人金柳南贈林香竹姬人大美。云香楓一曲欲銷魂。紅燭青尊忽夜分。無限幽懷寫不盡。滿江涼月白紛紛。

鴉片烟出外洋諸國。色黑而潤。凡遊粵者。無不領其旨趣。余初不知爲何物。後按本草綱目云。鴉片一名阿片。又名阿芙蓉。天方國種紅罌粟花。不令水淹頭。七八月花謝後。刺青皮取之。此說甚確。余嘗見人煮烟熬膏。其中尙有花瓣如蓮者。不過形體略小。其爲罌粟所製無疑。友人姚春圃嘗爲余道鴉片之美。謂其氣芬芳。有味清甜。值悶雨沉沉。或愁懷渺渺。矮榻短檠。對臥遞吸。始則精神煥發。頭目清利。繼之胸膈頓開。興致倍佳。久之骨節欲酥。雙眸倦豁。維時拂枕高臥。萬念俱無。但覺夢境迷離。神魂馳蕩。真極樂世界也。余笑曰。其然。豈其然乎。然近日四民中。惟農夫不嘗其味。卽仕途中。多有耽此者。至於娼家。無不設此以媚客。然嗜好過分。受害亦甚酷。

工夫茶烹治之法。本諸陸羽茶經。而器具更爲精緻。爐形如截筒。高約一尺二三寸。以細白泥爲之。壺出宜興。密者最佳。圓體扁腹。努嘴曲柄。大者可受半升。

許杯盤則花瓷居多。內外寫山水人物極工致。類非近代物。然無欵識。製自何年。不能考也。爐及壺盤各一。唯杯之數。則視客之多寡。杯小而盤如滿月。此外尚有瓦鎗棕墊紙扇竹夾。製皆樸雅。壺盤與杯舊而佳者。貴如拱璧。尋常舟中不易得也。先將泉水貯鎗。用細炭煎至初沸。投閩茶於壺內。沖之。蓋定復徧澆其上。然後斟而細呷之。氣味芳烈。較嚼梅花更爲清絕。非拇戰轟飲者得領其風味。余見萬花主人於程江月兒舟中題吃茶詩云。宴罷歸來月滿闌。褪衣獨坐興闌珊。左家嬌女風流甚。爲我除煩煮鳳團。小鼎繁聲逗響泉。蓬瀛夜靜話聯蟬。一杯細啜清於雪。不羨蒙山活火煎。蜀茶久不至矣。今舟中所尙者。惟武彝極佳者。每斤需白鑊二枚。六篷船中食用之奢。可想見焉。

潮州土俗。以蛇之青色者爲青龍。奉之如神。每歲二月。望前結綵爲輿。管絃鉦鼓。舁之以行。名曰迎青龍。女郎之未經梳攏者。皆濃粧豔服。扮劇中故事。隨神遊行。望之燦然如錦。始濯如花。始發豔心。悅目莫可名言。執袴子弟。裙屐少年。爭備金繪。擇佳麗者。以次給之。受者名曰得標。得標多者。聲名噪甚。即有大腹

腹賈。不惜千金爲製衣飾。與之梳櫛。昔邱海陽鐵香有觀妓詩云。鳳城二月好春光。社鼓逢逢報賽忙。百戲具張全不顧。爭圍台閣看新粧。又云。一枝花門一枝新。公子王孫逐後塵。奪得錦標載月返。不知春思屬何人。蓋實錄也。

曲中稱謂多不可解。如余澹心秦淮雜誌所載妓家。僕婢稱之曰娘。外人呼之曰小娘。假母稱之曰娘兒。客至稱客曰姐夫。客稱假母曰外婆之類。皆不離乎本來面目。惟潮嘉妓呼客曰老燕。客呼妓曰老襄。外人呼之曰阿嫂。或曰潮人阮讀如燕。襄讀如相。卽劉阮楚襄之意。是真癡人說夢。楚襄非女子。何以客反呼妓爲襄耶。燕襄之稱。必有命意者在。惜乎無從考據耳。舟中妓女親生者少。皆買自貧家。或得諸他舟。教習絃歌。傳授衣鉢。頗費劬勞。迨梳櫛後。一切家計。取給於女。謂之當家。當家日久。遇意中人。任其繾綣。不甚管束。唯私本船篙工。則與良婦犯奸無異。阿母忿相責詈。不少寬容。姊妹中亦鄙薄之。此娼家家法也。

麗品

濮小姑。韓江人。態度豐豔。柔情綽約。雖不嫻文翰。而吐屬溫。和。遇少年服飾炫麗。舉止浮蕩者。厭薄之。名士騷客。聯句飛觴。則櫻唇微綻。粉靨生渦。侍坐終日。不倦。否則邀之亦不至。卽至。酒數行。先姊妹歌滿江紅一曲。便向座客斂衽辭去。雖有力者。噤以金帛。挾以威勢。亦不顧也。故當時才流。凡有雅集。必登小姑舟。如奉爲吟壇主。臨安吳殿撰頴雲。校試潮嘉。適乘其舟。嚴諭從人禁妓不得入。謁小姑竊窺而心慕之。然以學使尊嚴。何敢遽爲毛遂。輓轡于中。莫可排解者。累日矣。一日傍晚。舟次齊昌江口。密雨如注。小姑曰。此天贊我也。因與其母定計設筵。醉僕從于他舟。潛令篙師約當吳寢所穴篷數處。頃之衾枕淋漓。吳急起狂呼。莫有應者。小姑僞自夢中驚覺。挑燈出視。謂吳曰。湫隘何可憇。息後有小榻尙潔。敢請貴人移寢。何如。吳睨之。嫣然一笑。媚致橫流。不覺心動。遂與燕婉。及試罷。返省。題便面以贈小姑曰。輕衫薄髮雅相宜。檀板低敲唱竹枝。好似曲江春宴後。月明初見鄭都知。折柳河干共黯然。分襟恰值暮秋天。碧山一自送人去。十日蓬窗便百年。小姑捧詩而拜。欲脫簪隨行。吳不可。殷勤慰諭而

止。于是潮人咸呼小姑爲殿撰夫人。云小姑益自矜貴。卽名士騷人亦難輕覲其面。假母逼之。小姑曰。兒嘗侍寢玉堂。何可復理故業。遂出私囊千金于湘子橋邊。築精舍數間。焚香禮佛。後聞吳君逝世。設位哭奠。數日不食而卒。至今潮人艷稱之。噫。歌妓中如濮小姑者。亦傭中佼佼者乎。余聞吳公臚唱後。告假完姻。其夫人雙目失明。自慙非偶。告之父母。遣人謝絕。吳曰。夫婦之義。一與之盟。終身不易。漢宣帝卽位。尙求微時故劍。余何人斯。敢背此盟。卒爲夫婦。其高義有足多者。因紀其遇小姑而并及之。

艷妹不知其姓氏。或曰。卽濮小姑之妹。姿態豐艷。舉止蘊藉。頗有小姑風。浙人沈子靜常。贈以詩曰。蘭湯試罷倚新粧。回憶巫雲幾斷腸。寶樹自歸珊網後。一枝紅艷獨凝香。生平不諳歌絃。酷喜彈棋。客至其舟。有善奕者。卽煮茗對局。終日不倦。靜常每勸其脫藉。而妹不悟。因題詩棋枰以寄之。殘棋一局費思量。小却頻經未散塲。困到垓心纔回首。滿枰花影已斜陽。妹得詩泣下曰。靜常真愛我也。敬當什襲藏。無負明訓。然同心難得。至今尙在曲中。

才娘眉目如畫。能學內人裝束。樵風居士贈詩云。百結雲鬢七寶釵。曉粧纔試鏡奩開。不知宋玉傷秋甚。鎮日牆東盼楚才。其鄰舟有福來青姑。色藝與才娘頗頗。而談吐流利。應酬圓轉。則過之有無名子贈福來云。石槽一曲奏新聲。彈向江天月正明。泪溼青衫緣底事。兒家前歲學初成。又贈青姑云。素馨白朶綴釵梁。蟬鬟輕盈燦雪光。勻罷晚粧人倚檻。好風吹去隔江香。

曾春姑。澄海人。自幼父母俱喪。依於嬸母蓉娘。丰姿穠粹。如碧桃初放。滿座生春。顧性情孤峻。每日晨起梳洗畢。輒閉戶焚香。或臨牕刺繡。不喜見人。嘗有販米客備百金。願親薌澤。春姑鄙其人。毀粧稱疾。客去。蓉娘讓之。春姑曰。撫育之恩。兒豈忘懷。容俟得當以報。無相迫也。蓉娘無如之何。然春姑之名從此噪甚。欲締交者。鷁首履滿。俱不當意。吳江金大司馬聽濤爲諸生時。作客韓江。聞其名訪之。值午睡。因朗吟梁簡文美人春睡圖。低鬟壓落花之句。驚迴幽夢。倦眼斜注。覺金公神彩。不似庸流。整巾徐起。叙談良久。情意頓洽。遂成燕婉。未幾。金公鄉試旋里。春姑祖餞江邊。攬衣揮涕。金公取小端硯勒其事於背。贈之曰。我

苟富貴。攜此而來。當不相負。春姑珍如趙璧。後十餘年。金公以內閣學士校試潮嘉。向例當道往來。蜑船應役。時春姑猶在舟中。未脫藉。隨蓉娘至清溪。聞學使姓名。里居甚確。伏蓬底窺之。態度宛然。密謂蓉娘曰。是誠前度劉郎也。夜分設筵舟中。延其幕客沈靜常者。邀金公過飲。春姑作別時裝束。俟酒酣。用盤承硯獻之。金公就燭取視。驚詢曰。爾豈昔年韓江曾氏春姑耶。春姑嗚咽不成一語。金公攜硯返舟。作詩二首。贈白金五百兩。慰遣之。春姑遂留金於蓉娘。曰。兒不能復事賤役。聊借金公之惠。以報阿母恩。因擇士人委身而去。詩曰。含顰憶昔侍尊前。麗服明妝似水仙。今日相逢卿老矣。不堪回首問當年。不抱琵琶過別船。芳心與石一般堅。相思有證分明在。淚漬模糊滿硯田。潮嘉河畔至今傳誦焉。

蓉娘字秋卿。不善飲酒。每釀半杯。卽紅暈滿頰。如落日芙蓉。情致纏綿繾綣。凡與交者。均不能忘懷。黃岡張司馬贈詩云。被池香煖睡昏昏。日過高春尙掩門。怪煞雪衣頻喚起。梨花滿地見春痕。江頭小宴捧霞觴。風送芙蓉隔岸香。侑酒

却防呼唱曲。潛邀姊妹理霓裳。其姪女曾春姑落藉後。蓉娘老大隨土人而去。郭十娘居齊昌西門外。早著豔名。一時名流爭妍取媚。尋盟責諾。無虛日。十娘蔑如也。獨與余友金柳南傾蓋輸心。如董小宛之遇辟疆。柳如是之懷蒙叟。其私心竊計。謂意中目中。微斯人莫可委身者。柳南名作機。與余同里。家計山卓。犖不羣。意豪氣邁。工吟咏。屢應童子試。不售。卽棄去。遊於滇楚。臨流攬勝。慷慨悲歌。久之賦歸。益無聊。因挾申韓業。遊嶺南公卿間。理文案。詳慎明敏。雖久居要津者。不能及。人多忌之。以是恒賦閒。然雖貧。猶典衣聚書。至數千卷。嘯歌不廢。而所爲詩益工。宜其縱情風月。欲銷塊壘鬱勃之氣於溫柔鄉也。先是柳南遊幕齊昌。公餘登河濱之鄉樓。屢招十娘不至。因以蟬翼紗二端。並蒂蘭一枝。遣僮申款曲。十娘收蘭返紗。謂僮曰。歸語汝主。好珍重此花。拜惠多矣。越日柳南張筵邀姬。少選。十娘珊珊來。雅服靚粧。容華妍秀。席間奏湘妃怨一曲。宛然幽篁淥淚。音韻悽楚。定情未幾。而十娘遽嬰疾。柳南爲之焚香默禱。由是十娘情意逾密。欲脫籍相從。而柳南旅囊羞澀。因裂如意一鈎。各執半要盟。以待

異。日適其邑某。公夙聞柳南名。崑侔厚幣以聘。勢不可却。刻日戒塗。十娘設讌以餞。相對汎瀾。酒半。柳南僞醉。離席馳馬去。從此關河間隔。歡會難期矣。柳南以世無黃衫客。恒鬱鬱。因賦如意詩寄十娘。曰。如意不如意。其如如意何。望穿春信杳。別久淚痕多。孤月照裙屐。重雲鎖黛螺。回頭似一夢。壯志盡銷磨。後十年。柳南重過鄉。十娘已臥病牀第。玉容憔悴。握手失聲。柳南賦詩二十首。歌以當哭。節錄其半。十載重來事已非。梨花零落燕分飛。徐娘未老風姿減。淚溼當年舊舞衣。幽蘭一剪證前因。蟬翅紗輕穩稱身。對鏡嫣然渾一笑。分明我是意中人。挹翠偎紅正暮春。名花齊折鬥芳辰。一枝冷豔誰堪似。妙手玲瓏寫洛神。樺燭高燒照綺筵。清歌兩部醉群仙。漏聲欲斷人初散。偷近熏籠倚玉肩。小閣濛濛細雨中。殘燈隱約背牕紅。傷春倦臥無人問。獨爇心香禱碧空。沈疴乍起倍清癯。閉戶兼旬似隱居。興至偶然乘彩鷁。閒憑水榭數遊魚。不曾豎指學紅綃。鐵練何須鎖綺寮。怪底連宵玩明月。出門動即遣垂髫。原注。十年前假母慮十娘效紅拂故事。跬步命小婢隨行。半鈎如意締三生。密誓雙雙對短

繁小語有時紅兩頰。欲呼夫婿又低聲。悲莫悲兮生別離。臨歧揮淚共牽衣。明朝南濟橋頭水。不見鴛鴦相並飛。賣賦慙非司馬才。空教紅粉委荒萊。不知海國蒼茫外。何處黃金可築台。未幾十娘奄逝。埋香黃土。柳南攜尊哭奠。其生前愛桃花。爲購數十株。環種墓門。吾知異時花發成林。香凝紅露。猶似當年人面也。

郭十娘有妹曰紐兒。膚髮光膩。眉目韶秀。惜兩腋下有氣。觸鼻甚穢。俗名爲狐騷臭。遇讌集酒酣。輒薰蒸滿座。往往有掩鼻而去者。友人周海廬與之曙。贈以詩。不啻連篇累牘。並徧徵諸同人之善詠者。裝錦軸贈之。余戲拈黃金縷一曲。云。芳思撩人當永晝。無限柔情。河畔心期久。金屋勸君須早構。六篷船可藏嬌否。底事尋春偏獨後。綺夢初迴。小字頻呼紐。百和香濃薰莫透。知君愛艷狐騷臭。海廬大慙。遂與紐兒相絕。後遇土人以百金爲之落籍。當與海廬有同好也。

大美字美娘。廉靜寡欲。衣飾樸素。每逢讌集。酒酣拇戰。羣囂紛起。獨美娘默如。

善歌馬頭調。其聲嬌而細。宛而長。如春鶯出谷。然深自珍秘。初見不輕度也。與梅州陳生交。逾年舉子。卽潛至其家。母訪得之。挾歸不從。因延道士作法。俗名狗頭符。美娘心動。遽返。近有閩人林香竹。教之誦唐詩。至劉希夷今年花開顏色改。明年花落知誰在。爲之憮然。亦有心人也。

蓮鳳玉膚芳貌。雲鬢霧鬢。眞曲中尤物。爲人敏妙。廣筵長席。閒使主觴。政纖悉無訛。且能爲酒客解紛。故凡有宴會。鳳不與。則舉座不樂。名重程江。惜其母貪鄙。客纏頭輕者。輒形辭色。以是遊蹤漸稀。唯余同僚北平松君。以貴家子弟。揮金如土。恒至其舟。蓮鳳亦善事之。

桂姐姿首略堪寓目。故自矜莊。不苟言笑。僮夫妄稱其有閨閣態。互相推奉。桂姐益自信不疑。甚至客至其舟。白眼相對。無一言酬答。有惡少恨之。僞爲貴公子。乘其舟至清溪道上。俟夜深人靜。令乞兒數輩褫其衣而迭就之。創甚。自此稍斂戢。昔日伎倆。不敢復試矣。

西姐品格端好。能誦毛詩。及四子書。舟中以女學士呼之。吾鄉劉生曾至其舟。

見西姐憑几作札。致人云。一日不見。如三秋兮。惠而好我。命彼夙駕。我有旨酒。以燕嘉賓。其樂何如。如鼓瑟琴。劉生不勝心折。因力勸其從良。不久。卽隨杭州徐某脫籍去。粵中歌妓。能讀書通文翰者。西姐而外。指不再屈。

月兒姿首清麗。白晝相接。如對名花。映燭而坐。愈覺其妍。故人呼爲夜嬌嬌。桂山邱學士贈詩云。春衫窄袖小雲鬟。燭影浮杯照遠山。怪煞纖纖江上月。夜來光彩滿人間。由是月兒名噪甚。遠近文學之士。得識一面以爲快。

大善一名西洋畫。姿色穠粹。堪與桃李爭妍。爲殿撰劉大戎賞識。贈詩云。叱咤頃刻變風雲。橫槊江皋酒正醺。百鍊此身得一善。溫存不讓李將軍。其妹善姑亦娟秀。有詩云。雲翹繼起賽雲英。踏月歸來調素箏。獨善何如兼善美。休言先已證三生。自是兩姝實錄。

小金舟居程江之東。容光韻秀。體態娉婷。頗有大家風範。與蕭山朱某交好。曾于秋夜乘艇。閒歌浣花溪一曲。音韻淒惋。兩岸旅人。爲之揮涕。朱某臨別贈七絕二首。詩不錄。小金藏之枕篋。獨坐無聊時。一誦之。

琳娘不好妝。飾粗服亂頭。天然風韻有。潔癖拂拭。几榻塵塵終日不去手。凡賈人與達官門吏等。雖挾重貲求見。概不納。獨與湘湖老人程介夫善。故介夫贈詩。有作客頭將白。逢卿眼倍青之句。後介夫得疾旋里。逾年無信。其同鄉友人王百川過琳娘。見淚痕滿面。伏枕不起。詢其故。曰。昨夜夢介夫死矣。百川多方慰喻。終不釋已。而凶問果至。琳娘爲位哭之累日。噫。風塵中如琳娘者。蓋亦鮮矣。

簪姑人物秀麗。服御繁華。有豪貴家氣象。韓江士人鄭之鼎。嘗與交好。贈詩云。碧紗如霧護春妝。蘭麝薰多骨亦香。何處相逢曾識面。刺桐花底月昏黃。矜貴氣象。于此可見。鄭生貴介子弟。與簪姑往來。未及半年。所贈不下數千金。唐人北里志。稱每席四鐙。燭盡加倍。較之鄭生。不亦陋哉。

玉娘膚理皙白。態度輕婉。每夕陽含波。晚風微颺。輒金鎖絳衫。獨倚水榭。望之如仙。座客王百川贈詩曰。滿江風月淨塵氛。獨立亭亭迥不羣。漫說玉娘顏似玉。軟香更勝玉三分。眞實錄也。其母貪鄙。稍不如願。卽令玉娘謝客。澄海豪客

李芥園邀集韓江人士。張宴湘子橋下。玉娘每度一曲。擲錦十匹。其母聞之。匍匐船頭。口呼佛號。以謝。芥園叱去。滿座闐然。玉娘不勝忿。旋舟數日。不食。其母悔悟。惡習爲之稍減。

石姑又名十姑。白如玉肪。眉目楚楚。饒有風致。曾隨僧父。四年而寡。無所倚。遂返程江理故業。曲中姊妹咸非笑之。獨小娜與之款洽。相對忘懷。小娜潔白可匹。石姑而冷容柔態。則過之。毘陵陳雲羈旅梅州。每月夜卽招兩人。煮工夫茶。細啜清談。至曉不及亂。人怪之。答曰。譬彼名花。綴于樹枝。迎風淅露。神致飛越。若折而嗅之。生氣寂然。有何意趣。後解維返省。石姑小娜南望涕零。甚于所歡。噫如陳生者。堪稱好色矣。非若登徒子徒有淫行也。

寶娘不知其里居姓氏。大抵韓江土著。或曰金性。故又呼金寶云。頤而秀。玉立亭亭。髮長委地。善歌工調笑。凡往來韓江及宦遊者。靡不與之相接。余友宗君芥颺。攝南澳司馬篆。謙集其舟。寶娘平日遇富商貴介。結束濟楚。媚態百出者。都無所屬意。獨傾心于宗君。時宗君耄矣。視茫茫而髮蒼蒼。且于溫柔鄉中。卽

其少壯時初無所繫戀。故于金寶亦淡漠置之。僅以定情詩八首作纏頭之贈。受代者至。旋歸會城。逾年揭陽有事。隨觀察張公朝縉復至韓。事畢。張公置酒宴羣僚。席間謂宗君曰。吾聞此間有名妓金寶者。欲委身于君。非一日矣。君固名士也。以名妓事名士。如吾鄉當日董小宛之嫁冒襄。至今傳爲美談。吾當爲君作蹇脩以成其美。卽令海陽令諭金寶之假母。是夕以彩輿簫鼓迎之而歸。宗君出其當日定情詩以示同僚。一時傳頌。羨金寶之得所歸。而張觀察實當代風流教主也。詩曰。去年良會共浮槎。疎雨如珠透臂紗。似此風流真絕代。妙香開到白蓮花。莊嚴喜聽腐儒談。打破機關絕愛貪。別有風光消不得。杏花春雨似江南。瓊花一見一回新。更向名花證慧因。畫舫簾波燈影下。紅粧偏對白頭人。細撥檀槽板未停。低鬟翠鳳動琤玲。多情爲我歌金縷。倦倚蓬牕半醉聽。濛濛香篆障輕綃。鬟髻橫斜奈此宵。觸迕校書狂杜牧。填詞紅燭又高燒。前身雪北與香南。拈取紅芳一指參。結習風懷除得否。載花船是散花龕。流轉濃華又一旬。幾番風信逐芳塵。蘭因絮果何時了。我是羅浮夢醒人。贏得清風兩袖。

輕。濃香淺夢記分明。愧無十幅纏頭錦。便面題詩贈寶卿。余讀其詩。婉麗纏綿。鍾情實摯。因拈如此江山一闋。以贈。藍橋本是神仙窟。爲問阿誰能遇。碎搗元霜。細斟玉液。夢繞韓江古渡。相逢競妒。覩鬢影脂香。輕盈媚嫵。畫舫橫波。錯疑解佩漢濱女。赤繩經早繫就。笑擲心竇。眼多少。執袴往日情。癡而今。願足知費幽懷幾許。韶華暗度。試品色題香。未云遲暮。月下花前。從今詩思苦。

小琳者。金寶之女。恣態不甚豔。而粧束雅淡。別具一種韻致。自金寶歸宗司馬。舟中冷落。不啻蓬門。小琳屈意款接。凡至其舟者。煮茗陪坐。終日無倦容。于是物望頓歸。家聲復振。江南士人張仲玉。與交最密。贈以詩曰。客邸愁無奈。乘船一訪卿。叩門驚好夢。倚笛奏新聲。小鼎茶初熟。疎簾月倍明。撥灰添百和。絮語忽更深。同時擅美者。有小足小蓀。皆色藝俱佳。沈靜常贈小足詩云。十六芳齡正破瓜。妙于酬應足當家。生成一種銷魂處。眼似秋波臉似霞。贈小蓀云。胭脂河畔女兒家。冶色當春醉曙霞。未許羣芳誇解語。風流還讓合歡花。練江何似浣花村。秀茁蘭芽有小蓀。莊蝶翻飛不知處。原注小蓀自莊漁莊潮陽携來。

空教杜宇漬啼痕。後小蓀因惡少招飲。堅拒不去被辱。遂決意脫籍從良。
俊添色藝不甚佳。而性情豪放。每逢月夜。質衣沽酒。邀韓江士女。作團圓會。清
歌酣暢。恒數夕不休。後得消渴病。瀕危。囑其妹小鳳曰。我本瑤池侍女。誤愛色
香世界。謫墜人間。今限滿當去。既而徧體嬌汗。如燒沈水。香聞隔浦。視之玉筋
下垂。雙眸合矣。蘭溪章鳴皋有遊仙詩二首。挽之。玉洞春迴萬樹花。箇中茅屋
卽農家。閒邀姊妹臨流水。笑指蓬山隔彩霞。一春好事醉中過。偏愛黃鶯對酒
歌。石徑兼旬無客到。不關風雨落花多。小鳳亦翩翩有致。今尙在韓江。有無名
子贈詩云。桃根桃葉莫爭妍。月旦湘橋憶往年。有妹嗣音誇小鳳。玉樓風韻更
嫣然。味其詩。疑與俊添有舊者。

軼事

岐巔抵韓江六七百里而遙。其間溪流曲折。隨山而下。月夜女郎獨坐船頭。輕
彈低唱。時一遇之。風味亦足宜人。碣石衛先輩晞駿有詩云。曉風殘月滿江秋。
獨倒芳樽澆客愁。十載宦遊歸未得。不堪更聽古梁州。公以名進士。除興寧令。

撫字心勞。催科政拙。聚書至數百卷。公餘吟詩自娛。有事梅溪。必登女郎舟。倚翠偎紅。在所不免。玩其詩。可以知其風格焉。

有滿姑者。本韓江妓。恒往來清溪岐嶺間。郡人故未之識。與餘姚翁寶山情好頗篤。後其母卒。姑挈千金欲從寶山。寶山避之省城。屢招不往。姑不得已。委身士人。或詰寶山以堅拒之故。寶山喟然曰。吾清白吏子孫也。豈可以不義之財玷辱家聲哉。

昔陶朱公有致富奇書。以養魚種竹爲先務。齊昌境內。徧處皆池沼。既可灌田。復可養魚。而舍旁及邱隴皆藝竹。宛有淇澳之風。而竹惟南濟橋一帶爲尤盛。兩岸綠影參差。迤邐十里。夏午蒸暑盤旋室中。無坐臥處。輒與魏湘巖楊嘉幹路玉峯金柳南諸君。攜尊挈榼。放舟其間。登岸至池邊竹林深處。解衣席地而坐。驕陽斂影。通體清涼。柳南折荷花爲杯。注酒其中。以筴刺之而吸。相顧樂甚。一日興闌思返。林外忽有雙鸞冉冉而至。聞公等效李靖安故事。烏可無酒。糾我輩故不速而至。視之則柳南所賞之大小兩鳳也。遂命歌相府蓮一曲。同

人紛起。洗花更酌。久之。夕陽欲下。飛鳥歸林。柳南載兩姬返棹。謂余曰。昔在傳家孔公幕中。嘗與同人納涼此地。有時郭姬亦不召而至。今諸人散若秋烟。而我儼然重至。能無如右軍蘭亭脩禊。俯仰今昔之感耶。大鳳卽磨墨伸紙。請賦詩以紀。柳南成七律一章。修篁兩岸綠參天。依舊風光似昔年。獨倒芳尊悲逝水。空勞湘管弔非烟。朱門俯仰成春夢。白袷飄零老硯田。何日扁舟返鑑曲。匡牀夜雨話聯蟬。大鳳貌不逮小鳳。而情勝之。與柳南無一夕歡。握手纏綿。較嚙臂者更篤。故柳南每有讌集。雙鳳必翩翻齊下。猶賣珠者得錦匣而光益顯也。程江蟹船中有雛女。年纔十一歲。髻髮鬢髻垂肩際。若松塵一夕。窺見其母與所歡橫陳榻上。不覺慾心頓熾。比曉告母。欲人梳櫛。母笑其稚。年無識。諭止之。女曰。不如我願。即服毒死。母無悔也。越日竊取鴉片和酒欲吞。母奪棄之。不得已爲之倩人梳櫛。見者咸捧腹胡盧而去。或有訐之者曰。汝知奸幼女之律乎。是欲誘我以蹈法網也。女則晝夜號泣欲死。母因招無賴子與以金若傭值者。至今女長。猶不滿三尺。而爲雨爲雲。已不止高唐一夢矣。五代南漢劉龔。每令

男女白晝裸淫後苑。相視爲樂。名爲大體雙。後苑中鳥獸以及雞犬皆見慣。亦鎮日交合。今雛女見母之交歡。而遽思梳櫛。是何異南漢苑中之禽獸哉。

又有老娼。年垂六十。齒搖搖而髮星星。狀極衰憊。然夜無男子。則寢不安枕。一日停橈江渚。見一少年。于水淺處褰裳以涉。體貌豐偉。娼愛之。邀至舟中。屈意承歡。欲與合。少年不可。曰。汝髮其種種矣。我方年壯。母乃不倫。請別選相當者。以求歡。予不敢聞命。娼因餌以重金。少年遂勉強就之。至今倡隨如夫婦焉。昔夏徵舒之母。雞皮三少。嘗借陽精爲駐景之丸。故人或以娼擬夏姬。夫夏姬年耄而貌艾。自陳靈公之後。楚莊欲納之而不果。後巫臣子反黑要之。徒爭欲委禽者。指不勝屈。其艷冶之態。卽少艾者猶瞠乎其後也。記曰。儼人必於其倫。若老娼者。徒有淫行。而無駐景之術。直母彘耳。烏足與夏姬同日語哉。

江左楊少情者。年弱冠。丰姿妍秀。如好女子。見人面輒發頰。強與接數語。卽避去。隨舅氏某公。任潮州分司。舅嘗謂人曰。此余家賢宅相。有北齊楊遵彥之風。眞足消受竹林別室。銅盤重肉者也。與一姬交最密。姬品貌年齒。與生亦相埒。

嘗細雨初晴。兩人乘舟。閒泛岸上。觀者環堵。驚爲一雙玉樹。臨風搖曳也。尋某公卒。凡親友隨任者。皆旋里。生獨戀姬不去。逾年。囊橐將罄。姬勸其歸。輒淚沾衿袂。姬因太息曰。我豈不欲脫籍相從。顧私蓄止百餘金。不足以飽阿母慾。然謀事在人。君攜去。試向贖身。濟否聽命可也。生浼交好者說之。攜不從。計無所出。唯閉戶掩泣。或散步芳郊。旬日間。一日徘徊樹下。望姬船鳴咽不已。忽有人自後撫其肩曰。異哉。子何悲之甚也。生驚。則一少年衣冠楚楚。爰詭詞以對。客搖手曰。觀子神氣。已知底蘊。自指其胸曰。此中有熱血斗許。願爲世間佳士一灑之。君固未可與語者。咨嗟欲去。生知非常人。挽與共坐。備述顛末。客初無一語。但詢生姓名寓居而去。久之。揭陽奸民朱阿姜謀不軌。制軍提兵往勦。文武員弁往來韓江上下者如梭織。一夕。姬與他客酌酒蓬牕。撥石槽度曲。忽有皂衣者數人至。疾呼曰。督轅巡官至。舉舟惶遽。客倉皇鼠竄。而巡官已高坐艙中。傳呼搗母。責其買良爲娼。令左右褫衣欲撻之。搗哀乞始釋。顧謂姬曰。汝當照例發賣。姑念事不由己。許汝擇人而嫁。姬跪謝以願從楊生對。巡官卽傳生

至舟視之。曰。眞汝偶也。飭繳身價給鵠。促兩人買棹遄行。生與姬喜出望外。而終不知巡官爲何人也。次日薄暮。舟抵三河。有客攜尊逕入。揖生稱賀。蓋卽當日樹下相逢之少年也。笑問姬曰。昨夜驚乎。日者別後。謀爲若兩人撮合。而無術。非制軍臨郡。焉能作此狡獪。以遂足下願乎。生與姬頓顙若奔角。敬叩姓氏。客不答。但酌數觥。致聲珍重。騰躍登岸。長嘯而去。嗟乎。誰謂世無黃衫客哉。昔有浙東陳生。遊幕海陽。學問旣優。人亦老成持重。服食更儉樸無華美。每謂同人曰。吾儕彈鋏侯門。所得修脯。如傭工之值。瞻父母妻子而無餘。豈可冶遊以喪志。少年儂薄者。恒非笑之爲迂。曰。彼孽緣未到耳。饒舌何爲。凡同人設席河干。強之必峻拒。越十年。幕囊所蓄幾累萬。而生亦年垂耳順矣。因束裝思歸。戒塗有日。驕其同人曰。諸君見我之歸。徒嘖嘖稱羨。盍亦學我之守。不作狹邪遊乎。同人銜之。思設筭以相傾。而無術。謀之某姬。云此亦易與。先是姬小忤幕寮。虞有禍。轉懇陳生爲之緩頰而免。每欲置酒申謝。生拒之。至是招其僕。歛容致詞曰。我蒙陳君覆幬久矣。今聞遄歸。有日。圖報無期。特備薄餞。以伸悃曲。煩

謹達之。倘得一顧。當酬以洋蚨大衍之數。非所吝也。僕利其金。以告生。且慫慂之。生念僕相隨久。藉此一行。足償其勞。況刻卽解維。何至喪其所守。因許之。姬遂盛筵延生至舟。翠袖金尊。殷勤侍奉。無半語涉謔。亦不作狎昵態。生私心竊許。謂章臺柳。竟不作臨風蕩漾耶。日暮辭去。姬并不挽留。送至鷁首。而預屬篙師伺其登岸。擠之落水。姬卽奮躍隨下。抱持狂叫。舟人至。集掖之而起。衣冠沾濡。回坐舟中。呼僕旋寓取衣。良久不至。詢之則已入醉鄉。置主人濕衣沾體而不顧矣。生躁悶欲死。已有雙鬟捧華服至。換畢。猶兀坐以待夜分。身倦假寐於榻。姬爲之徧體按摩。覺骨節盡酥。沉沉睡去。比醒。聞枕畔小語曰。渴乎。視之。姬也。語如鶯轉。氣勝於蘭。不禁神魂駘宕。不能定情。從此朝朝暮暮。至兼旬不返。僕促之歸。曰。舟中樂甚。吾將娛老於此矣。迷戀數年。半生心血所積。盡歸烏有。而面日亦憔悴。疴羸若病夫。有當日被其訕笑者。顧曰。陳某素不治遊。其鐵石心腸之張乖崖乎。座中有妓。心中無妓。其有道之程夫子乎。今何以色荒若此。則直是河間婦矣。生聞之默然無以對。未幾卒於舟。妓殮而埋之。噫。女色爲釣。

魂之鈎。妓館實陷人之阱。觀於此。可以猛省矣。

昔黃司馬之署梅州也。有家人張和者。囊無長物。與一妓交最密。至積逋累累。故往來雖頻。而纏頭甚薄。假母患之。令妓拒絕。而妓不聽。一日張飲妓所。夜半。母喚去。借他事撻之。無數。始令返。張見棒痕。爲之揮涕撫摩。妓益感其意。謂曰。情好如我兩人。豈忍相離。然汝既不能脫我於風塵。而母日摧折。終不免於難。不如仰藥同死。結夫婦於九原。不猶愈於生乎。張落魄。計不得妓。無生人之趣。慨然許諾。妓拔釵付張。質錢沽酒。投鴉片於中。兩人對酌。各醺醉。抱持而臥。迨母驚覺。多方灌救。妓蘇而張則無及矣。母攜妓向州署自投。司馬云。彼孽由自作。與汝等何尤。越日。妓竟別抱琵琶。爲他客侑酒。不復念張之死。并張之何以死也。而張魂不昧。每夕至舟首。呼妓名而罵。雞鳴始去。妓延道士作法禳之。厲益甚。甚至掠輒拋瓦。解衣床外。衣自豎立。種種怪異。不可殫述。而遊客之尋花間柳者。亦裹足不敢登其舟。久之。鴛亦不堪其擾。賣妓與鄉人爲妾。妓夢張謂曰。汝誘我同死。而今獨活。行將與汝就質陰曹。以泄此憤耳。逾年。妓爲其嫡所

辱憤激服毒死。人盡云負張之報。其所以不死於疾而卒死於毒歟。余謂張咎實自取。其遷怒於妓。是張死而猶頑鈍無知也。妓之死。亦命數會逢其適。非張之果能爲厲而死之也。紀之以警世之戀妓者。

附錄

趙翼簷曝雜記

廣州珠江。蠶船不下七八千。皆以脂粉爲生計。猝難禁也。蠶戶本海邊捕魚爲業。能入海挺鎗殺巨魚。其人例不陸處。脂粉爲生者。亦以船爲家。故冒其名。非眞蠶戶也。珠江甚闊。蠶船所聚。長七八里。列十數層。皆植木以駕船。雖大風浪不動。中空水街。小船數百往來其間。客之上蠶船者。皆由小船渡。蠶女率老妓買爲己女。年十三四。卽令侍客。實罕有佳者。晨起面多黃色。傳粉後。飲卯酒。作微紅。七八千船。每日皆有客。小船之繞行水街者。賣果實香品。竟夜不絕也。余守廣州時。制府嘗命余禁之。余謂此風由來已久。每船十餘人。恃以衣食。一旦絕其生計。令此七八萬人。何處得食。且纏頭皆出富人。亦哀多益寡之道也。事

遂已。聞潮州之綠蓬船。較有佳者。女郎未笄。多扮作僮奴。侍側。官吏亦無不爲所染也。有狀元夫人者。尤絕出。某修撰視學粵東。試潮畢。以夏日回廣州。所坐船不知其爲綠蓬也。夜就寢。忽蓬頂有雨。滲及枕邊。急呼群奴。奴已各就妓船去。莫有應者。忽船後一麗人。裸而執燭至。紅綃抹胸。膚潔如玉。褰帷就視漏處。修撰不覺心動。遂暱焉。船日行二三十里。十餘日至惠州。又隨至廣州。將別矣。而麗人誓欲相從。謂久墜風塵中。今得侍貴人。正如蛻骨得仙。若復淪下賤。有死而已。請隨入署。爲夫人作婢。以沒世。淚如雨不止。百計遣之不去。贈以五百金始歸。而不知正其巧於索資也。及歸。而聲價益高。非厚幣不得見。人皆稱之。謂狀元夫人云。

袁枚隨園詩話

久聞廣東珠娘之麗。余至廣州。諸戚友招飲花船。所見絕無佳者。故有青唇吹火拖鞋。出難近都如鬼手。馨之句。相傳潮州綠蓬船。人物殊勝。猶未信也。後見毘陵太守李甯圃程江竹枝詞曰。程江幾曲接韓江。水膩風微蕩小艫。爲恐晨

曦驚曉夢。四圍黃篋。悄無窗。江上瀟瀟暮雨時。家家蓬底理哀絲。怪他楚調兼潮調。半唱消魂妙絕詞。

檀萃楚庭稗珠錄

吳殿撰於潮眷一妓。妓持帋乞詩。卽書一絕云。濤箋親捧剪輕霞。小立當筵蹙錦韉。休訝老坡難忍俊。多因無奈海棠花。此妓聲價頓增。人因呼爲狀元嫂。蓋粵妓稱爲阿嫂。因殿撰之眷而獨異之。故稱狀元嫂也。後知交間有見之者。而人頽然而目衝焉。不似當年李琪風韻。使殿撰而在。再得見之。則影搖千尺。聲撼半天。能無再借重於端明乎。

吳樹珠擘紅餘話

珠江襟帶羊城。上承滄溟。牂牁諸水合流入海。粵秀屏其北。虎門障其東。羣峯拱翠。一水拖藍。中央海珠石。隨波上下。勢欲浮去。夾岸闌闌千家。風欄雪檻。宛如海上蜃樓。眞者疑幻。其間帆檣如林。青雀黃龍之舫。集于洲渚。別有花艇藏嬌。靚粧炫服。照臨波鏡。乃水上平康里也。每當夜靜月明。皓腕當窗。絳樹之清

歌競奏。綠珠之玉笛橫飛。雖竹西歌吹。無以加茲。然綺羅絃管。大抵長鬚奴大腹賈徵逐其中。若杜樊川書記風流百無一焉。此則烟花減色而亦珠江之辱矣。

潮嘉風月記跋

潮嘉風月記。蓋仿余澹心板橋雜記而作也。觀陳瑩戶瑣事。非不娓娓可聽。顧纔出墨池。便登雪嶺。文人月旦。每多失實所見不逮所聞。作者恐亦未能免俗耳。乙亥孟夏震澤楊復吉識。

宣統元年十一月初版
宣統二年四月三版


香艷叢書一集

(四冊定價大洋一元)

上海棋盤街平和里內
國學扶輪社

上海六馬路吉慶坊內
國光活版部

上海棋盤街平和里內
國學扶輪社



版權所有

外埠分發行所

成都 北都 北京 天津 保定 山

粹源官各官各官文
記記書書書書書
局莊局坊局坊局
元書局

總發行所

校刊者
印刷所


廣東 漢口 長沙 南京 杭州 蘇州 湖北 寧波
會文 廣益 鴻文 啓新 德記 振新 羣益 汲經
學社 書局 書局 書局 書局 書局 書局 齋

國學扶輪出版社廣告

國朝文匯	壹百冊	洋三十元
翁山文外	五冊	洋五元
翁山詩外	十二冊	洋五元
王壬秋全集	十二冊	洋二元
錢牧齋文鈔	四冊	洋二元
顧仲恭文集	二冊	洋一元
龔定盦全集	七冊	洋二元
魏默深文集	六冊	洋二元
胡天游文集	四冊	洋一元五角
聊齋文集	二冊	洋六角
汪大紳 羅臺山合鈔	四冊	洋一元五角
彭尺木 薛家三合鈔	四冊	洋一元五角


戴南山 方望溪合鈔	八冊	洋二元
吳摯甫文集	五冊	洋一元
吳摯甫詩集	一冊	洋五角
全謝山文鈔	八冊	洋三元
春酒堂文集	二冊	洋八角
章太炎 譚復生合鈔	五冊	洋一元五角
林琴南 嚴幾道合鈔	四冊	洋一元二角
香艷叢書	共十集 四十冊	洋十元
青樓小名錄	四冊	洋一元
佛爾雅	二冊	洋六角
古今說部叢書	四十冊	洋十元

一
卷
八
十
四



香艷叢書

第二集




第二集

香
豔
叢
書

上海國學扶輪社印行





HB
1737
H25
V.5
香艷叢書二集目錄

卷一

三風十愆記記色荒

三風十愆記記飲饌

艷回二則

筆夢叙

卷二

絳雲樓俊遇

金姬傳

滇黔土司婚禮記

衍琵琶行

西湖小史

卷三

十國宮詞

啟禎宮詞

卷四

海鷗小譜

邵飛飛傳

婦學

婦人鞋襪攷

纏足談

百花彈詞

今列女傳

李師師外傳

紅樓百美詩

百花扇序
閒餘筆話

目錄

一一

香艷叢書

香艷叢書二集目錄終

二
三

集二
集

香艷叢書

二集卷一

三風十愆記記色荒

明滅元。凡蒙古部落子孫流寓中國者。令所在編入戶籍。其在京省。謂之樂戶。在州邑。謂之丐戶。丐戶多在邊海之邑。其隸於常熟者。男謂之貧子。婦謂之貧婆。其聚族而居之處。謂之貧巷。初無姓。任取一姓以爲姓。而各以種類自相婚配。其男以索綯爲業。常不足以自給。婦則習漿齏縫紉。受役於殷實高貴之家。所獲常百倍於男。司晨之勢。積重於牝雞。由來久矣。厥後家計日足。男子不復理前業。衣裳楚楚。安坐而食。婦則爲伴媵。爲賣珠娘。爲小兒醫。常以一人而營數業。以一人而應數家。都市之中。窈窕少女。往來如織。摩肩蹠踵。混雜人羣。恬不爲怪。然不事艷粧。色服。簪止骨角。衣止玄絹。裙止白練。不掩袖。不束帨。不着紅履。淡掃蛾眉。以相矜。尙而已。當有事而出。則令其夫或攜小囊。或負小筐。相隨於後。道遇所熟識。婦則趨迎而前。殷勤歡語移時。夫則俯立道旁。不敢與其

人舉手。然亦實不知其何許人也。至大戶家。婦則直入閨闥。與內主人謙語。飲饌。日旰未及出。夫則踟躕伺候於門外。不敢他往。亦不敢迫促。必俟婦出。乃偕歸。歲時糕粽。喜慶酒肉。給賞頻來。醉之飽之。皆拜婦之賜。初。丐戶中有吳家娘者。色美而性頗貞。豪胥徐孚中之子欲私之。不得。乃乘其婦歸寧。令僕急叩吳之門。詭言郎君病驚。急求診視。吳急往。入門則止徐在家。將逼以非禮。吳乃唾罵而出。邑人咸高而敬之。於是丐戶中頗知自好。相戒勿令少婦出應。止令老年嫗奔走其業。不四五年。人各家索衣食無資。而有事相召者。亦寥寥於門。蓋顏色不足投時好。故去而他顧也。於是衣食之謀迫。而俊巧之婦。艷冶其容。仍出而曳裾於富貴之家矣。自是而後。其風益惡。其業益行。則有若張氏之妻。以賣珠寶而見悅於琴堂大令。宿氏之婦。以誘奸而致污夫名。閱家聲。然事猶隱蔽不甚著聞。惟所謂草頭娘者。夏姬再世。大類人妖。列之淫風。以實十愆中之一事。雖語涉穢褻。亦聊以供委巷中談資耳。草頭娘者。初嫁葉某。葉死復嫁徐四。徐又死。已而擇當意者招之爲假夫。假夫者。僅以給應門之役。聽指使。供買。

辦名爲夫。實則不之夫也。稍失其意。輒逐之。復招他人。故自壯至老。屈指多人。人因其初嫁夫姓。稱爲葉家娘。厥後著名於邑。輕薄子又因葉字有草頭。遂指曰草頭娘。蓋隱號也。草頭娘居縣署後小巷。體微豐。姿容秀媚。喜吹簫鼓琴。工博戲。能誦詩。更熟二十一史。精彈詞。工於調五味。不減易牙。少時嘗從其母出入大家。貴介子弟之不檢行止者。輒與有染。故未嫁時。已多外幸。既嫁。專業伴媵。不屑更事他業。邑中承平。幾三十載。競尙繁華。好勝之舉。日新月異。凡嫁女之家。非得草頭娘不足耀婚禮之盛。或召他婦旁觀。竊非笑曰。枉費財。伴娘乃尋常物色耳。以至親戚鄰友之來賀者。倘草頭娘不在。則舉席爲之不歡。故嫁女之家。恐其他往。必先期訂之以金。至則人人色喜。遇嘉宴。雖貴客亦與同席。爲酒正。律若商君。其令新巧。出人意表。坐客醉。輒與之挨枕攬秘。無所不至。席間遇所歡。輒與訂私會期。毫無顧忌。樂安氏以過暱而患消渴。天水氏以結想而病癰。癰更可笑者。爵尊鄉老亦慕其名。令侍寢一夕。捐以甘金。未幾遂成痿痺之疾。其蠱人毒人如此。而名反益噪。甚中年遂棄伴媵業。不復事事。關一軒。

洒掃精潔。幽竹數竿。盆花數種。几榻器皿。布置清雅。親治酒餚。招所歡宴樂其中。凡尋常肴品。一經其手。調和輒可人口。如嘗異味。人益爭慕之。於是邑中豪富勢宦。日命肩輿。邀草頭娘至家治庖。呼朋羣飲。迭爲賓主。命曰車盤會。計肴一簋。值須一金。治庖畢。即置之座。草頭娘挽髻髻爲時樣粧。素馨茉莉等花。羅插滿頭。搖曳而出。入座衣香襲人。吐音嬌細。客未飲。先爲之骨醉矣。席間好與客辯逸事。多慧解。客有言近日西山土人掘地得瓦缶數千。如養蠶蟀器。啟視各置一骷髏。衆茫然未識何故。草頭娘曰。此定是海倭殺邑人首級欲獻功。故聚於此。後倭退。邑人憐而葬之。而棺不盡具。故作此窖器以埋之耳。客未之信。後檢之倭寇日記。適與其言符。又客有訛以瓦礫之礫作外礫之礫爲談者。草頭娘曰。翻礫作礫。亦將翻瓦作磚耳。又自言先世在元時係貴戚元老籍。在中國宣戶之上。謂之正戶。明太祖於正字底畫帶筆畧挑遂成丐字。我豈真乞丐子孫耶。由是風雅之士聞其談吐。亦心慕焉。一時墮其阱中者。亦指不勝屈。年五十後。益自放誕。羣惡少來與狎。雜沓紛呶。甚且爭鬪於庭。有傷目及指者。草

頭娘懼。乃閉門謝客。佯示矜貴。實以避禍也。而貪其色者。如蠅慕羶。卒依戀不
舍。潛窺竊視。踵趾相接於戶外。至有以父子而迭相來覲其門。聚毳爲樂者。羣
惡少鼓噪逐之。乃去。草頭娘聞之。益自深匿。蓋獨居岑寂者三四月矣。有馬嫗
者。與草頭爲鄰。親愛若同胞姊妹。凡嫗有所勸阻。一言立聽。當閉門謝客時。富
家宦戶必欲招之出。肩輿數邀。草頭固辭不往。百計欲致之。知馬嫗爲所親信。
許之金。囑令聳恿。嫗乃言於草頭曰。與彼素厚歡好。奈何遽爲之絕。草頭始諾。
乃令所謂假夫者。守視門庭。淡粧幽雅。綽約登輿。小婢一二隨後。至彼家。或侍
飲。或博戲。流連忘反。於是有力者恐其復沮。羣議聚歡。則一日酌五兩。留宿則
倍。竟以娼妓家用纏頭錢例。邑中爲之語曰。要認縣背後。只跟馬脚走。要見娘
家好。老馬先喂飽。於是惡少輩乃大喜曰。是有徑可通也。乃就馬嫗講款。說合
一次。例予金若干。入門後。願費金一如富家勢宦數。嫗則得金卽諾。少年至。輒
爲先容。伺草頭娘暇日。必以示諸少年。嫗藉是得以溫飽。而草頭娘所積以千
計。無子。乃出其所蓄齋僧飯尼。邑中放生樂施等會。諸鄉老率以草頭娘爲善。

緣領袖。揮霍多金。一無吝色。嘗私語馬嫗曰。吾所以不惜恥者。欲舍生作善事。爲來生福耳。邑人傳之爲笑談。初。邑中豪宦趙某好冶游。嘗邀草頭娘侍其宅。眷抵郡賞桂。己則與郡子弟別坐一舟隨之。既至。兩舟並維一處。時郡中有廢紳時某者。與趙某爲宿好。新喪其如君。亦坐畫舫來解悶懷。一見趙卽邀之過舫。云無以爲樂。有樂女徐鴻鴻者。頗有名郡中。適招之來。可令侑酒也。須臾一小舟載徐至。入席不善飲。亦不能爲酒令。殊失主人意。趙乃云。敝內眷舟中有一侍婦葉家娘者。可命之來。極歡而罷。何如。某大喜。亟令人邀草頭。草頭已與趙眷微酣。乘輿而至。趙行令。令以古詩中字爲飲數。因舉杯曰。銅雀春深鎖二喬。則客飲二次。至草頭娘亦舉杯曰。五雲深處是三台。各飲八合。座乃大喧笑。主人歡喜。詢知無夫。欲得之。趙爲通意於草頭。草頭以時有盛名。欣然願侍巾櫛。而諸宦中素與草頭狎者。從中撓之。佯爲愛時。札述草頭平時情狀。時懼而止。草頭聞殊怏怏也。於是誓不與此宦往來。晚年醜聲如故。擇少年之美貌者。往來不絕。爲竟日歡。爲長夜飲。意興更不減少。壯日計每月費諸少年金。幾及

中人十家之產。一士人家本素封。因狎草頭娘五六年而家產蕩然。其友遇諸塗。憫其飢。挈至家飲食之。酒後戲詰之曰。人狎少婦亦情之常。彼年已六十餘。子有何樂而狎之。乃自令若是。士人曰。子非我。安知我之樂也。彼年雖老。然髮黑如漆。容色淡若。又通體肉勝於骨。肌膚柔滑如凝脂。情之所鍾。正在我輩。安得不爾。其友大笑。復戲問曰。外此得無悅子媚子者乎。士人不覺色飛。拍案起曰。有之。但此際非親暱之不能知。卽知之亦難以明言。友復大笑。由是以觀。歐陽子所謂妖嬈女態。老有餘妍者。猶不足以盡之。豈非夏姬再世大類人妖者耶。雖然。妖由人興。人心所好。成爲風尚。風尚所積。生是尤物。誰職其咎歟。商書曰。殉於貨色。是謂淫風。今乃見之。可慨已。

卷一

二

集

三風十愆記飲饌

宋洪堯撰。陽谷漫錄中有厨娘事。言京都中下之戶。不重生男。每生女。則愛護之。如捧璧擎珠。甫長成。則隨其資質。教以藝業。用備士大夫採拾娛侍。名目不一。有所謂身邊人。本事人。針線人。堂前人。雜劇人。拆洗人。琴童。厨子。等等。級截然不紊。就中厨娘。最爲下乘。然非極富貴家。力稍不足。不能用也。有某宦者。奮身寒素。遨歷郡守。然日用淡泊。不改儒風。偶奉祠居里。便嬖不足使令於前。飲食且大率。郡守因念昔日在都於某官處晚膳。出厨娘所調羹。極可口。適有便介往京。謾作書友人。囑以物色。皆不屑來就。未幾。友人復書曰。得之矣。其人年可二十餘。近回自某大老第。有容藝。能算能書。當疾遣以詣。不下旬月。果至。初憇五里亭。特遣夫先申稟啟。乃其親筆也。字畫端正。歷敘慶賀新禧。以卽日伏事左右爲欣幸。末乃乞其煖轡接取。庶成體面。其詞委婉。殆非庸碌女子所及。郡守一見。爲之破顏。及入門。容止循雅。紅衫翠裙。參侍左右。乃退。郡守大過所望。於是親友皆議舉杯爲賀。厨娘亦遽請試技。郡守曰。大筵有待。且具常食。五

盞五分。厨娘請菜品食品質次。郡守書以與之。食品第一羊頭僉。菜品第一葱
壺。餘皆易辦者。厨娘謹奉令。舉筆硯開列物料內。羊頭僉五分。合用羊頭十個。
葱壺五碟。合用葱五斤。他物稱是。郡守心嫌太費。然未欲遽示儉嗇。姑從之。翌
日。厨役告物料齊。厨娘發行奩。取鍋鏹孟勺湯盤之屬。令小婢先捧以行。燿燦
耀日。皆是白金所製。約每器須值廿金。至如刀砧雜器。亦一一精緻。旁觀爲之
嘖嘖。稱賞不已。厨娘更團襖圍裙。銀索繫膊。掉臂入厨房。據胡床坐。徐起切抹。
批。攪。快熟條理。直有運斤成風之勢。其治羊頭也。瀉置几上。剔留臉肉。餘悉擲
之地。衆問其故。厨娘曰。此皆非貴人所食也。衆爲拾起。頓置他所。厨娘笑曰。若
輩欲食狗子食耶。其治葱壺也。取葱輒微過沸湯。悉去須葉。視碟之大小分寸。
而截斷之。又除其外數重。取條心之似韭黃者。淡酒鹽浸漬。餘悉棄了。無所惜。
凡所調和。馨香脆美。濟楚細膩。食之舉箸無餘。親朋相顧稱好。既徹席。厨娘整
襟再拜曰。此日試厨。幸中台意。乞照例支犒。郡守方遲難。厨娘曰。得毋待檢成
例耶。乃探囊取數幅紙以呈曰。是向在某官所得支賜判單也。郡守視之。其例

每大筵。則支犒錢十千緡。絹廿疋。常食半之。數皆足。無虛者。郡守不得已。爲破慳。強給之。私歎曰。吾輩力薄。此種筵晏。豈宜常奉。此等廚娘。豈宜常用。不旬日。託以他事。善遣之去。此北宋時風俗也。羣尙飲食。雖素儉之郡守。不免俗情。況今日之華靡成性者乎。前所紀畜女優。譜時曲。酣歌恒舞。所謂巫風已盡矣。然尙鬼之俗。必牲牷告備。而尸祝乃緩節以安歌。好樂之場。必肴饌精緻。而朋儕乃式歌而且舞。則求精於肴品者。乃酣歌恒舞之媒也。用是附之巫風云。邑中食物之求豐求美。始於典商方時茂家。每宴客。率以侈泰。碗以宋式爲小。易以養文魚之大者。碟以三寸爲小。易以盛香圓之大者。煑豬蹄甜醬黃糖全體而升諸俎。謂之金漆蹄。撞燒羊肘白糖白酒全體而升諸俎。謂之水晶羊肘。燒雞及鴨。每俎必雙。亦全體不支解。他品率稱是一時富家爭效之。而明時庶人宴飲定制。器用淺小。簋止六。或缺其一。間用木刻鱗像魚形。盛諸豆以備其數。至此其風大變矣。於是錢副使者富而官宦而益富。里居時好賓客。其夫人克勤中饋職。善造酒饌。所取以新清精三字爲上品。其著聞於邑者數種。今列於左。

羊腰。從剖羊者買歸。生腰子。連膜炙酥。取出。剝去外膜。切片。用胡桃。去皮搗爛。拌腰炒炙。俟胡桃油滲入。用香料原陳酒原醬油烹之。味之美。熊掌不足擬也。或無羊腰。卽用猪腰。如前法製之。並佳。鰲裙。鰲自江北販來者。不用。惟用產於河裡者。宰之。畧煮取出。剔取其裙。鑷去黑翳。極淨純白。畧用猪油爆燂。和薑桂末。乃出供客。入口卽化。異味馨香。咸莫知其爲鰲也。因別其名曰葷粉皮。蒸野鴨。家鴨肥濃。不足貴也。必野鴨之網得者。去毛極淨。乃空其腹。用五香和甜醬醬油陳酒實腹中。而縫其隙。外用新出鍋腐衣包之。乃蒸。蒸爛。去皮。自頸至腿節節開解之。抽其骨。止存頭脚。仍用全體。再用五香甜醬醬油陳酒等料。入原汁中。微火燻之。視汁將乾。乃取出供客。餘若山中花雞刺蝟鷹等物。之有脂者。皆用腐衣包裹而蒸。故脂不漏而腴。鴨舌從廚師家。或酒館中。廣取得之。熟而去其舌中嫩骨。豎切爲兩。同筭芽香菌等入麻油同炒。潑以甜白酒漿。客食之。疑爲素品中麻姑之類。而味不同。此爲雜品中第一。雄雞冠。亦廚司家酒館中收得者。絹裹置藏糟中。經宿亦用麻油甜白酒漿。同筭芽香菌等炒之。客嗜其

味莫知爲何物。此爲雜品中第二。鷄鴨腎亦收之。廚司家酒館中沃以酒漿。取泉水煮爲羹。和以鮮笋芽或鮮嫩松花菌。味美異常。此爲雜品中第三。鵲蛋先期付錢於養鵲者。逐日收積。白湯煮熟。去壳。甘願圓勻。光白可愛。作湯點。又香蓮米磨粉爲糰。松子仁入潔白洋糖搗爛爲餡。與鵲蛋並陳作湯點。客或携歸二三枚。香氣滿袖。此爲湯點中勝品。鯽魚舌亦廣收之。廚司家酒館中者。白酒漿沃之。泉水煮爲湯。畧摻細葱心一撮。作酒後湯品。極爲清貴。青魚尾選青魚之大而鮮者。斷其尾。淡水煮之。取出劈作細絲。抽去尾骨。和笋菌紫菜爲羹。或研胡椒末。調白蓮藕粉作膩。而滴以米醋少許。酒後啜之。神思爽然。味回於口。此又羹湯中別具一種風味也。以上數種過於求美。然濃肥之味。十不列一。尙有衛生頤養遺意。抑或非厥性所好也。而好勝者必踵而增華。而副使者。新清精三字爲食上品之風。又爲之一變。於是太原趙氏以蒸鰻擅譽。潁川氏勝之以無骨刀魚。徐廚夫以燉鮓魚鳴技於春時。邵聲施家則勝之以四時皆有。事輒翻新。實古昔先民口所未嘗也。蒸鰻擇肥大粉腹者。去腸及首尾。寸切爲段。

拌以飛鹽。排於鏊中。沃以甜白酒釀。隔湯燉之。數沸後。加以原醬油。復煮數沸。視其脊骨。透出於肉。就鏊內箝去其骨。然後用葱椒拌潔白肥猪油。厚鋪其面。入鍋再燉。數沸。視猪油融入鏊底。乃出供客。此味最濃厚。貪於飲食者。一言及口中。津每涔涔下也。而潁川氏曰。是未足奇也。春初刀魚。先於總會行家下錢。凡刀魚之極大。而鮮者。必歸陳府。令治庖者。從魚背破開。全其頭而聯其腹。先鋪白酒釀於鏊中。攤魚糟上。隔湯燉熟。乃抽去脊骨。復細緝其芒骨至盡。乃合兩片爲一。頭尾全具。用葱椒鹽拌猪油。厚蓋其面。再蒸之。迨極熟。不更置他器。舉鏊出供。味鮮而無骨。細潤如酥。至未及。謂舉箸而客先欲染指而嘗矣。鰮魚本美味。爲南方水族中貴品。向用蒸。或用煮。自廚夫徐姓者。約畧如王氏蒸鰮。陳氏蒸刀。鱸製。但加潔白洋糖。不切段。不去鱗。味更腴而鮮潔。視他種煮法。尤覺風味不同。人皆爭嗜之。然春盡則有。夏盡則無。未能常繼也。乃邵氏謙賓。雖在秋冬。皆具。客問何來。邵曰。其來不易。春將暮。命僕之善腊魚者。携銀錢及洋糖椒末飛鹽。上好藏糟等料。舟載至海頭。坐居停主人家。俟漁人一得魚。即去

腸留鱗。用洋糖實其腹中。搽之鱗上。隨用藏糟厚鋪瓮底。加椒末飛鹽若干。放入魚。又用糟厚蓋其上。又加椒末飛鹽若干。積滿瓮口。手拳築實。細泥封固。至家。必掘地窖貯之。恐炎天潰敗也。客述主人言如此。然此猶未若食河豚者事更煩且重也。虞邑邊海。春日多河豚。人皆知其有毒。食之者少。自李子寧起家牙行。講於飲食。隔年取上黃荳數斗。揀純黑及醬色者去之。復揀其微有黑點及紫暈者去之。純黃矣。必經他手再揀。逐粒細驗。乃煮爛。用淮麥麵拌作醬黃。六月中入潔白鹽合醬稀少。作罈。晒之烈日中。醬熟入瓮。覆之。瓮盆用灰封固。名曰河豚醬。據云荳之黑色。醬色及微有黑紫斑者。作醬燒河豚。必殺人。而晒醬時。或入烟塵。燒河豚。亦有害。故必精細詳慎如此。其治河豚也。先令人至澄江。舟載江水數缸。凡漂洗及作汁等水。皆用江水爲之。河豚數雙。割去眼。抉出腹中子。剝其脊血洗淨。用銀簪脚細剔肪上血絲盡淨。刮其肉。取皮全具。置沸湯煮熟。取出。納之木板上。用鑷細箝其芒刺。無遺留。然後切皮作方塊。同肉及昉和骨。猪油炒之。隨用去年所合醬入鍋烹之。啟鑊時。必張蓋其上。蔽烟塵也。

用紙丁蘸汁燃之則熟。否則未熟。每烹必多。每食必盡。而卒無害。以是著名於時。年年二三月間。朋黨輒醵錢聚會於其家。上下匆忙。竟似以河豚爲一年大事。饕餮淋漓。恣啖爲快。春初及夏初。殆無虛日。至於邑人尤有可笑者。蟹出潭塘爲最肥。大爪黃者謂之金爪黃蟹。向用煮。不知何人以煮則黃易走漏。味不全。忽起巧思。用線縛入蒸籠蒸之。味更全美。斯足飫矣。乃有周四麻子者。自都中歸。又翻一新法。爲爆蟹。遂開酒館於西城。秋時來顧者。晝夜無虛席。其法將蟹蒸熟。置之鉄節炭火炙之。蘸以甜酒麻油。須臾壳浮起欲脫。二螯八足。骨盡爆碎。臍脇骨皆開解。用指甲微撥之。應手而脫。僅存黃與肉。每人一分。盛一碟中。薑醋洗之。隨口快啖。絕無刺吻抵牙之苦。其術秘不肯授人。人雖效其法。炙之蟹焦而骨壳如故。或云彼於春夏時。賂丐者捕蛇千頭。剝皮煮爛。蛇肉浮起。成油貯之於器。隱取用之炙時。所云麻油者。實則蛇油也。人信爲然。不三四年。人無爆蟹者。於是邑中仍興食蒸蟹會。始自漕書及運弁爲之。每人各有食蟹具。小錘一小刀一小鉗。一錘則擊之。刀則割之。鉗則搜之。以此便易。恣其貪饕。

而士大夫亦染其風焉。是時海禁嚴。凡海錯之自閩廣者。貴於白金。人僅恣口於本境易致之物。未幾海禁弛。珍錯畢至。於是士大夫以爲宴客無海味。不足爲觀美。席中首品。必用大菜。大菜者。燕窩也。彼處須五六金一斤。至蘇必倍之。其他若魴翅密刺等物。間以供客人。又忽嘗異味。不思魚肉矣。食味已盡。講及器皿。某品宜用哥窯。又某品雖恒有。宜用宣窖。味取諸遠來。器取諸上古。前此濃味饗餐之風。忽又一變。於是孫封公著同嗜錄。陸比部有食經注。雖一時游戲之筆。亦見攸好之同。後君子循覽斯篇。其謂之何。

偶憶舊聞。故明時有沈三胖者。居北鄉。富於財。每食輒殺數牲。猶世苦無下箸處。其妻好淡泊。屢勸其惜福無太侈。不聽。年五十後。財盡乏食。依栖一室。妻以菜羹進。稍入口。卽嘔。寧忍飢不食。一親戚饋以熟肉一盤。一殮卽盡。緣腸胃餓損。過飽而死。其妻與一老婢紡織存活。值歲飢。市無米者已浹旬。自分與老婢必皆作餓鬼。忽思園中有衍蔓於高樹者。或是山藥。掘之可食。當延殘喘一二日。乃令老婢掘其根。得一物如東瓜形。蓋何首烏也。乃取而食。

之。每晨各食一片。至夜不飢。而神氣日旺。半年乃盡。而歲已豐。米多價廉。仍得存活。一日因爨下無薪。破屋中所鋪木板已朽。令老婢拆爲薪。婢入忽隨板而陷。蓋板下乃窖也。別無他物。惟泥封酒瓮五十具。啟之皆似水。結冰半寸許。有鄰翁聞之來視。詫曰。此上首房主人所藏醴也。鼎革時兵亂。主人移居於鄉。遂遺忘耳。迄今已三十餘年。此酒真瓊漿矣。其面上凝結爲冰者。乃酒之精華無疑。乃皆取而嘗之。略無酒味。而三人不覺酩酊大醉。邑中好事者爭欲購得之。每瓮予價廿金。沈妻以是衣食頗足。終其天年。

豐四二則

嚴思庵先生閒筆

明萬歷之末。上倦於勤。不坐朝。不閱章奏。輦下諸公亦泄泄杳杳然。間有陶情花柳者。一時教坊婦女競尙容色。投時好以博賞財。後且聯布羽黨。設局誑騙。妙選姿色出衆者一人爲囡。名曰打乖兒。其共事者。男曰幫閑。女曰連手。必擇見影生情。撮空立辦者。與之共事。事成計力分財。而爲囡者獨得其半。于是構成機巧。變幻百出。不可究詰。時鄭貴妃專寵。兄國泰倚皇親勢。喧赫都中。諸樂戶女子率以承應至其家。往來日久。因熟悉其內眷。及子弟輩。思欲一試其術。而囑於皇親未敢也。有徐少司空者。南直揚州人。自部曹歷職卿貳。久宦京都。晚年於都中娶一妾。生少子。甚愛之。司空家富。以本籍田產撥付長君。而以燕京市廛租及古玩寶器并宦囊予之少子。復以其所蔭職予之爲出身地。司空歿。少子以母同居都中。其書屋有小樓。窗外爲隣家內院。適有沈姬者。移居於此。一日姬詣徐宅。徐母子與之款洽。姬自言一子爲國學生。善鑒古玩。客於鄭

皇親門下。皇親信任吾子。待之異於他客。吾亦往來其家。其家正夫人爲某氏。副夫人爲某氏。女曰賽姑。年十八。尙未字。其正夫人云。必擇名宦子。貌美才美。且有官職者。方與爲婚。因笑指徐生曰。郎君必中選。吾爲媒可乎。徐母曰。齊大非吾偶也。蓋業已謝之矣。他日其子沈瑀來拜。人物俊偉。談吐爛雅。徐生一見。懽甚。知其善識古器也。出其珍藏羅列示之。瑀咋舌曰。君家寶玩若是。除是榮陽府中。天下莫如君家者。然如雙玉獅啣環一事。世所罕有。卽鄭府中無可匹敵。徐生曰。鄭氏最珍者何物。瑀曰。前日貴妃所賜賽姑數種。其中有不世奇珍。有玉如鵝卵。曰暖手。寒時兩手握之。掌中溫氣欲汗。有爐曰自然香。木質而中空。臥時以體相偎。香氣滃然。流繞被中。一是臂釧。白玉爲質。而以金刻花鳥嵌其細巧。不可名狀。又一爲碧藍寶石簪。黑夜中有碧光射人目。其餘珠珥服飾。尙有價可評。未足奇也。徐生因問賽姑何人。曰。鄭君之嫡女也。與老母極親厚。老母嘗言賽姑妙麗。神仙中有之。塵世所無也。鄭夫人愛之甚。前後求婚者百數。皆不見允。蓋良緣未遇耳。徐生信其言。獨耿耿於所謂賽姑者。恨未一寓目。

也。至中秋夕。徐生母子登樓賞月。忽聞樓外嬌聲紛紛。俯瞰沈家庭中。婦女濟濟。皆艷粧共圍一美姝於堦前。小立玉容姣好。與月色相映。珠光翠影閃耀於烏鬢綠髻間。沈嫗倉皇晉接。驚喜若狂。携座語美姝曰。盍少坐。且玩此皎月。因仰觀天上。笑指嫦娥曰。不意今夕降寒家也。俄而茶至。美姝畧舉盃沾唇。旋立起辭去。嫗執手挽留。姝微吐一二語。音細不辯。兩保姆相扶。率衆婦遂出。徐母子從樓上細窺。且莫知其爲何等貴家女也。次日沈嫗來。欲借朱紅盒子。自云昨宵忽蒙一貴人過舍。倉猝不及款待。欲盛果品數種。聊申意耳。徐母曰。得非昨夜坐汝庭中者耶。嫗佯驚曰。太君何以知之。因作回想狀。忽拍手笑曰。吾知之矣。在樓上窺見之。耶。徐母曰。然也。嫗曰。太君前。吾不能私。實鄭皇親養姑。昨宵往大興隆寺燒香。歸途經此。一至寒舍。外間不知。徐母曰。曾字人否。嫗曰。未也。吾向固言之。可爲郎君嘉偶。奈太君意過謙。何。徐母曰。姑試言之。但多費。恐力不支。嫗曰。何哉。以太君家財。萬金可吐手而辦。尋常婚禮。以數百金爲至。今結婚皇親。誠不容過。嗇。然統計問名若干。納采若干。吉期若干。不過二三千金。

足矣。且陸續付去。不必一朝盡輸所有。異日新人至。白鏹黃金。堆箱盈篋。小往大來。何目前吝此區區者哉。東海家世不亞榮陽。郎君以妙年指日授職。若借泰山力。倚爲奧援。將躡五馬。登八座。金章紫誥。榮及所生。此豈世間常有之福。吾以比鄰美情。欲成此佳事。非有厚望。但冀郎君得意後。念老婦微勞。一垂盼於吾子可耳。時徐生在旁。不覺飫聽。其母亦心動。遂託求昏。越日將晚。嫗忽至。面色醄然。行動皆有醉容。戲拉徐生手。頓諸地。大呼曰。速揖謝吾。速揖謝吾。母迎而問之。嫗曰。事諧矣。但鄭夫人欲一見郎君貌。約來月初一日。與吾往神木廠。女貞庵遊玩。須郎君來一面。以郎君貌。定入彀。徐母子大悅。待至是日。徐生盛服乘馬。僕從衣服皆煥然。至庵門。蒼頭數十人坐於門首。見生至。頗倨不爲起。生欲入。一蒼頭呵止之。言家太太在。何書生乃擅入耶。徐生爲道來意。蒼頭曰。果爾。亦須入報。乃令小童入。須臾。沈嫗出。咎生曰。相待久。何遲遲耶。亟携生入。至客堂。令坐。少頃。小鬟出。令嫗引生入內。生至後堂立堦下。望簾內一麗人。珠襦綉帔。莊嚴若神。徐生鞠躬拜手。簾內彷彿爲答。嫗復引至客座。欸茶良久。

有秀麗小鬟兩人。自內各捧一金絲盒。出向嫗曰。太夫人贈公子者。徐生向盒拜謝。令僕從擎之趨出。則諸蒼頭肅立叩送。非復向時倨坐呵叱態矣。徐生揚揚馬上。如從天上來。至家。亟欲啟視所贈物。則金扇及佩囊等。皆宮中式。意其爲貴妃所賜。轉贈愛壻者。喜極。於是擇日發柬。邀沈母子。欸以盛筵。令往鄭府議聘禮。嫗述榮陽夫人意。議定聘金二千兩。綵幣四百端。泰山泰水。各以寶玩古器數事爲壽。兩舅兄亦如之。徐生母獨留古玩中。雙玉獅啣環。不列禮目。沈珣有難色。語徐生曰。此物差足博皇親歡。餘雖足珍。彼目中視若尋常物。倘無以得其歡心。恐多齟齬。生曰。此百世寶環。有血紋。兩玉獅色微青。共啣環於口中。婉轉盤旋。疑是天工琢成。吾家世代珍藏。外人無知者。惟吾兄一親見之。家母意欲存留。奈何。嫗從旁笑曰。太君計左矣。鄭府中古玩。無一非賽姑掌者。異日止須吾一言盡數。納諸奩中。仍是君家物。何損毫髮乎。徐母不得已。竟從之。乃行聘禮。金多五十兩一錠。每盤雙錠。兩人舁之。古玩皆盛以錦匣。襲以綉緞。每盤二事。亦兩人舁之。綵幣每盤二十端。每端鎮以簪環小件。亦兩人舁之。使

從百餘人。鼓樂間其中。炫煌道路。臨行。媒者謂衆曰。昨皇親諭意。已在上東門別第。受禮行事。不必詣府第也。已而至別第。高門畫棟。蒼頭蹕濟。凡陳設器皿等。悉是公侯家氣象。回禮答式。事事得體。欸帖書忝眷榮陽字樣。其大如拳。使從多於徐。人盡簪花披紅衣裳鮮耀。一時喧填街巷。都中人咸知徐鄭結秦晉好也。沈嫗索媒金。徐予之四鎰。不受。加綾絹四端。猶不受。更贈以寶簪一對。乃受。翌日。其子來謝。不言所事而去。數日後。嫗來盛言皇親爲賽姑治裝。已遣人往各省採辦。越則往陝。翠則往廣。珠則往遼東。綾緞則往蘇杭。今吾子已持千金往蘇杭矣。撫掌而談。歷歷可聽。閱月餘。嫗足音杳然。徐生母乃從樓上窺之。庭中亦闐然。怪之。乃使人至皇親第訪之。並無沈監生者在門下。亦無老嫗沈姓者往來。又至上東門。則其房屋封扃。問諸旁隣。皆云此王閣老空宅。他家或燕客。或結姻。則賃以壯觀耳。歸告徐生。母子不勝憤恨。遂相對而泣。乃兄之手札。忽自南來云。沈君來南。知弟將補官。欲移吾五百金。恐吾見却。將先人所遺玉獅啣環爲信。同胞兄弟。乃作如是計校耶。某日勉集五百金。并雙玉獅交與。

沈君回北想已檢收。但此物不可輕以託人也。徐生得兄書。悲愧更甚。其母歎曰。吾偶昏迷。受此大創。致乃兄亦墮其術。不意一老醜婦。乃詭詐如此。眞神奸也。遂出千金爲徐生謀蔭職。未幾得某州通判。隱忍前事而去。後諸樂戶中有洩其事者。知此役也。主謀者樂戶婦駱四娘。其假養姑則京師名妓羅小鳳。假鄭夫人者。則小鳳之嫂羅二娘也。沈嫗沈瑀及蒼頭婢婦等。則所謂幫閑人連手人也。紛紛不可勝紀。至崇禎中。御史風聞其狀。奏請裁汰在京樂戶。於是散入各省。而流寓揚州者獨多有。陳錫元者。本徽人。依揚州富商趙昌祺。司質庫中奔走事。陳與趙爲表親。而陳素愿慤。趙信任之。乃令往鹽廠課竈戶。司鹽務出入。歲得幹金獨厚。中年未娶。無室家。積金五百餘兩。以百金買屋爲弛擔。時居停地。時海濱出鹽。倍多於常歲。諸灶戶委積如山。錫元與同事各出銀若干。賤價而買。囤儲規利。適海泛鹽盡沒。價忽貴。所獲利子多於母。陳橐中頓長千金。自以爲一生吃着不盡。洋洋如濠上魚矣。錫元之同事吳子寧者。居某處。錫元早起往候之。見其西隣有浣衣門首者。鬢髮如雲。皓腕侔雪。羅裙輕颺。纖履

微露時。婦方曲身洗滌。陳從後窺之。未見顏色。既至吳居。主人他往。不遇而出。見婦方立起。仰面看日光照處。眉目秀媚。頰輔豐盈。如初日芙蓉。凝露鮮艷。陳爲之心動。歸至家。適子寧來。坐談良久。忽問曰。兄居向無西隣。今居者是何家。子寧曰。吾亦不知何自。前日從廠中歸。內子語余曰。有新鄰馮二娘者。挈其子小哥來拜。自云北京人。夫主物故。孤貧無依。來維揚。欲依一至戚。遍訪無踪。不得已與乾父及此子僦居於此。聞吳君善經紀。欲令此子追隨擔簦。練習貨殖。爲衣食計。否則同業者。或欲求螟蛉。仰恃高義。望爲先容。因戲語錫元曰。兄未有子。盍撫之。錫元曰。遽撫螟蛉。諸多不便。計惟有中饋主。乃爲處置得所。子寧解其意。乃起戲捶其背曰。無恥老人。乃作假途取貌想耶。然彼未嘗出口。吾不便與言此。遂拂衣去。他日。馮又至吳家。申前言。乞爲小哥地。子寧內子爲言某處頗有機緣。聊慰其來意。馮遽歸。具酒肴。令其乾父李老率小哥。猝至錫元家。錫元意必子寧爲之作合。非無因而至。又見所饋諸品。烹調精腴。滋味馨香。糕餌諸式。玲瓏新巧。皆非市肆可得。不欲拂其情。遂坐受百拜。父子禮竟。似夙有

成議者。小哥年十五。炊汲洒掃。朝夕恪勤。依依膝下。聽使令。錫元愛之。携往鹽廠。吳子寧見之。以爲此舉。錫元自爲之。亦不問其所以也。已而錫元挈小哥返揚。小哥歸而省母。未幾忽偕李老至。錫元延之坐。李似欲有言而止。旣而曰。勢必爾。無嫌直告也。因語錫元曰。爲極無理事。欲瀆君聽。此事必如予老人意。則可兩全。否則兩失。姑妄言之。予家北京。侄爲司禮監太監。頗得意。老人在京。差具饘粥。前因吾女隻身遠出。必欲老人作伴。不得已來揚。月內家司禮已兩次飛書促吾北歸。但念吾女一子已爲君嗣。隻影單形。萬不能自活。若令此子歸宗養母。則負君德。且傷君心。皆爲非計。老人之意。莫如令吾女繼君室。爲君操井臼。君就居吾女家。爲吾女主持門戶。則小哥離母而仍依母。稍盡烏私。君無妻而適得妻。亦成嘉耦。衣綻則縫。服污則洗。饑則飯至。渴則茶來。試問老鰥夫曾有此樂事否。所謂必如予意。則兩全。否則必至兩失者。老人之意如此。明哲如君。請三思之。錫元大喜曰。事固善。但誰爲主婚者。李老拍胸起曰。我便是。有家司禮在。誰敢何我者。乃急索柬及筆硯。親書生庚。雙手送陳。陳奉持之。如獲。

珍璧已而就馮居成婚。則李老已北上。錫元心惑其美。意俛俛如有失。比入內。則几席器皿。事事精緻。綉帷錦被。燿燿耀目。爐內香氣。芬郁繚繞。裾袂雖劉阮之入天台。不過過也。自是燕爾之情。堅如膠漆。主人以鹽廠事屢促之。殊有此閒樂。不思蜀意。二娘盡態極妍。曲媚之中。間以譴浪。一日錫元過其。忽以足鉤之。擁而置之膝。挪揄之曰。霜後葫蘆中乾外枯。又一日。忽語錫元曰。聞夫養婦不聞婦養夫。汝囊中羞澁。何以處我。錫元曰。無恐。我有八百金。貯主人典中。汝日坐啖。亦不過羨餘微利耳。二娘眉忽縐。故作沉思狀。忽作咄咄聲。伸指指錫元曰。眞憫。漢多金。貯彼無片紙。隻字付汝。爲據。主人年邁。一旦不測。伊郎豈善。良者欲強索難矣。前無室家。故作此淺計。今守舍有人。急宜索歸。伺物有賤徵。君居奇可獲大利。何寄人籬下。仰人鼻息。錫元心以爲然。乃向昌祺索取所貯金。昌祺年老而智深者。語錫元曰。銀便如數取去。但此物當念辛苦中來。貯諸典。利雖薄。得之意中。若貯之他所。利雖多。宜防失之意外。勿以吾言爲非。錫元不省。持歸。二娘置之櫃。付其匙於陳。陳欲持銀往鹽廠爲經運計。與二娘

商之二娘曰。固善。但須一觀大局。有大利。然后歸取。未晚。萬一無利。可弋。勢必持歸舟車。淺露道途。往返八百金。豈不足動人耳目哉。錫元又以爲然。已而主人促之急。諸同事又來勸駕。乃定行期。二娘爲錫元計曰。向典移二百金。以足千數。異日獲利以償之。經紀家固多多益善也。錫元從之。移二百金。併付馮囑曰。謹守之。二娘笑曰。前何太疏。今何太密。汝物卽吾物。尙煩過慮哉。又語錫元曰。汝舊居房屋。值百金。空置無益。盍售之。歸價於我。我居此屋。亦以百金。僦者願以歸汝。我年未四十。尙有孕道。倘得子。則此爲我二人偕老之處。授之汝子。小哥則別處之。他所宜早爲計。亦欲附橐中求微息也。錫元又從之。且喜其有遠慮。精心計也。臨行。二娘問歸期。錫元曰。吾久未往。諸務叢積。今往多則三月。少亦一二月。二娘曰。期何遠也。天氣將暑。汝父子需涼衣。越日須遣小哥歸。取服之垢者。歸濯之。彼處食物。或不堪入口。此間常製。就令小哥挈至。錫元領之。又心感其情之深也。既至廠。逾數日。果遣小哥歸。囑以五六日。必至廠。逾期不至。延至二旬。仍不至。錫元乃暗自詫爲怪事。遂棄廠務。兼程而歸。至則屈戍守。

門排入則室中蕩然。不留一物。往問屋主。人則曰。渠計月出貨錢。居三月出錢若干。欲去則聽其去。又安知其所之。錫元乃知所居。亦非百金僦者。不覺魂胆俱喪。謀之吳子寧。子寧曰。墮彼術中矣。偕晤趙昌祺。欲其撥遣多人蹤跡之。昌祺搖首曰。何益。彼有如此手段。而豈爲人蹤跡耶。所惜者八百金耳。錫元大慚。已而主人知鹽課中虧二百金。爲陳所浪費。亦不復追索。但好言遣之。錫元無所歸。窮困。每爲人言反詭狀。輒捥胸頓足。悔恨欲泣。或有知之者。曰。此北京黠妓羅二娘也。詭信馮耳。一日錫元閒步雷塘。適畫舫有貴公子。擁數麗妓。歡飲。二娘在焉。始知其行踪不遠。又抱琵琶渡別船也。因在岸側。爲二娘所見。乘間以手招之。私語曰。陳郎耶。向日無情。實爲李老所誤。彼構成此局。許我百金倩爲媒。非我本懷也。明日可伺吾於集慶巷王姥家。其繼女小鳳我姑也。爲白我意。留彼處片刻。我來。當有以報汝。乃出袖中碎金五六兩予之。卽麾之去。翌日錫元至集慶巷。則王門已爲邑令封局。所言王姥及小鳳者。被逐出竟久矣。乃知復被所欺。憤極歸。徵爲僧云。是時流賊破陝西及河南。勢逼南畿。淮揚諸郡

無樂土。兼值歲飢。比戶流亡者半。至宏光立四鎮。揚州繁華都會。幾爲戰場。於是隋堤楚館。蛛網塵封。吳地妖姬。風流雲散矣。揚城西郭有種蔬人蔣老者。所居茅屋一椽。四壁傾壞。值世荒亂。種蔬常不自給。飢則掘江干野薺充腹。往往數日不能舉火。然勤於操作。年五十餘。精力健強。揮鋤町畦間。雖寒暑無所苦。歲乙酉。清兵南下。將至淮揚。蔣之鄰里。皆率妻子逃避一空。蔣老無妻。不逃避。仍依茅屋。自念無食。逃亦死。不逃亦死。死是意中事也。既而大兵圍揚州。其駐西城者。爲滿洲都統某。其隊長曰披甲一披甲掠村落。獲蔣老至都統營。都統見以敗蓑蔽下體。問曰。是鄉農乎。蔣老不能對。都統令剪其髮。當各營擔水之役。蔣老力作。不敢片刻閒暇。擔水畢。卽爲析薪炊爨。沐馬掃溲。事事周至。諸披甲悅之。相與語曰。聞說南方人耽情逸樂。日日啖爛肉。飲苦茗。睡至日高三丈未起。何此人勤慤如是。因擔水至都統大營。其掌馬卒令蔣老刈取馬芻。都統閱馬見馬芻。問何人所辦。掌馬卒舉蔣以對。都統喜曰。彼乃辦事精細。夏月芡根有蛭。截其根。令馬不病。滿人生長北方。不知南方芡艸。夏月不宜連根飼馬。

也。遂納蔣老步兵牌。隸正藍旗下。未幾揚城破。闔城受屠。婦女老醜皆被殺。獨留少美者。給有功披甲。已而大兵渡江。軍中不許攜帶婦女。限三日賣諸民間。諸披甲以買主揀擇。致價不均。各以巨囊盛諸婦女。固結囊口。負至通衢。插標於囊上。求售甚急。大率皆爲留揚鎮守北方人買去。本城人則靡有子遺矣。一披甲欲賣去囊中人。三日不售。怒而欲投之江。同伍力阻之。披甲曰。然則將付之何人。或曰。蔣蠻子。勞苦無妻。盍以賞之。皆曰。善。呼蔣至。披甲指囊示之。曰。爾無夜伴。任爾取去。蔣茫然不識。所謂夜伴何物。諸滿兵語之曰。賞汝老婆耳。蔣恐甚。頓首於地。哀懇曰。一身不能自活。不敢從命。披甲怒曰。南方人刁詐。信然。白手得百金貨。乃假意故却。天下豈有不要老婆之男子。而於吾前作誑話耶。將拔刀斬之。一滿兵從後抱持。諸同伍舉囊置蔣老背。叱令速退。蔣老不得已。負歸茅屋。愴怳久之。莫知所措。旣而念此中人受困已極。背負時絕無聲息。似垂斃者。不勝心惻。乃啟囊視之。則一美也。奄奄一息。果垂斃矣。急抱起。臥之於敗板。罄其瓶得米合許。拾蘆枝煮粥。就其口灌之。已而婦仍昏昏睡去。蔣老復

至大營供役。滿兵戲語曰：「新郎宜有喜色，何不豫爲？」蔣老曰：「吾自分將作溝中殍，何忍更累一婦？」俟彼稍甦，詢其親戚，行將送之歸耳。諸滿兵憐其誠，贈以蚊帳被褥，又與乾糧黑豆各斗許。蔣老拜謝，携歸。視婦轉動，頗爲心慰。復煮粥抱起進之，覓一便器置寢所。次日復煮粥食之。時大營已行，蔣老無所事事，仍携耰種菜及歸。婦已起，兩手搯敗版而坐。見蔣老，忽問曰：「此何處？」曰：「西城外小村落也。」曰：「我何以至此？」曰：「滿洲兵令我負歸。」曰：「去錢幾何？」曰：「貧人無錢。」婦沉吟曰：「無錢安能得我？」曰：「當日以不能相活力辭，乃彼拔刀欲殺我，幸同伍中力救，勸我負歸。」語未畢，婦又昏倦，倒身下睡。閱兩日，婦神氣漸爽。蔣老炊飯佐以園蔬與食。蔣曰：「此地離城不及半里，婦潛然淚下。」蔣曰：「爾有夫乎？」婦曰：「吾揚州太守妻也。」蔣駭甚，曰：「是官太太耶？」因頓足曰：「太守已殉難，奈何？」婦曰：「非也，乃前任太守某也。」蔣曰：「然則太守固在，可相聞也。」婦悲泣曰：「前月往金陵謀復官，遇盜殺之江中矣。」蔣曰：「獨無親戚乎？」又泣曰：「陝西殘破，太守親戚久無。」蔣曰：「太守無親戚，汝或有父母兄弟，尚可相依。」吾當爲汝遍訪。婦又泣，吾止一義母。城破時爲

兵所殺。因號慟不止。蔣老亦爲流涕慰之曰。且無悲。終當有所歸依。缶中尙有半月糧。遲遲以待可也。婦曰。感爾厚恩。但爾貧困至此。食不能繼。奈何。蔣老曰。世亂已平。謀生亦易。婦領之後。見此老誠懇。遂有倚託終身之意。呼至前問曰。汝得進城否。蔣老曰。日來爲訪官太親戚入城。奚止數十次。遍走空城。寂無人踪。惟尸骸滿道耳。曰。滿兵守門。免盤詰否。曰。守門兵吾熟識也。且吾有正藍旗步兵腰牌。原無所阻。婦喜曰。果爾。吾有事相委。西城內有董公祠。祠之左側。第三家門首。一大陰溝中有木匣二具。可爲吾取至。蔣老遽諾。卽行。婦呼還語曰。匣不可露人目。守兵見之奈何。蔣老曰。置匣於土簾底。而以亂薪覆其上。可也。須臾歸。問婦曰。何物鎖肩沉沉者。婦曰。銀也。破鎖視之。約千金。婦又曰。更有一處。乃集慶巷中第四家屋頗卑。小門有雙環。入此門。過第二進。至東側廂。厨下積灰中藏銀兩大包。今已四年有餘。未知爲何人所得也。蔣老曰。吾姑一往。及至其處。則門首陳設弓刀。爲滿洲兵舍館矣。蔣老方徘徊門外。一滿洲兵出。見之遽趨而前。拍其肩曰。老蠻何事至此。蔣視之。乃素相識者。答曰。拾糞釀田。其

人曰。甚善。此間廚下有多年積灰。爲吾除之。乃引蔣老至灰所。指曰。幸除淨。言已卽去。蔣老挾灰得大包二。各用布厚裹。而以細繩縛紮。比前更重。乃置之簾底。灰覆其上。擔歸。婦大喜。次日婦復語蔣老曰。汝膽頗壯。玉帶橋北有一大第。汝識之乎。蔣老曰。識之。吾前爲官太訪親屬。屢至其地。向爲一滿洲大帥所據。今大帥移營南去。此宅空洞。無人居矣。婦曰。此宅中板房一所。下有銀窖。其左邊版末有鉄環。隱記拽環。啟板。卽可得。蔣老曰。倘已爲滿帥所得。奈何。婦曰。吾決汝此往。亦必如意。蔣老於是荷土簾入城。至其處。果有板房一所。半爲滿兵拆毀。獨有鉄環處一半。安然未動。如其言。啟視。則累累皆白銀砌滿窖。中運之於簾。仍覆土於上。擔重而出。荷虛而入。如是者數四。守門者曰。老蠻種菜。獲幾許利。而作苦如此邪。答曰。窮人不勞不活耳。於是盡運以歸。卽於婦寢所之側。累土爲窖。爲婦藏金其中。喜謂婦曰。頃見揚人紛紛返里。鋪家亦有開張者。大勢已靜。人間夫妻子女骨肉。相聚有期。吾爲官太訪親屬。倘有天幸。可挈此多金歸去。搬運之勞。吾力猶能爲役。婦曰。吾何歸。歸汝耳。蔣老大驚。辭曰。茅舍餓

夫不敢作此想。婦告以情。曰。吾北京樂戶羅小鳳也。出自青樓。慙非白璧。髮方覆額。猥以姿容。邀諸貴人欣賞。奈慈母即世。見妬悍嫂。繼爲此地洪生所憐。挈吾南來。別居吾於董公祠左側。又遭洪妻率悍婦。摔我痛毆。扁吾於小樓中。吾憤極自縊不死。繼歸吾集慶巷王姥家爲妓。幸義母加恤。恩同已出。安處數年。忽爲諸惡少圖詐。未遂。首之公庭。備諸榜笞。逼令歸籍。乃與義母行至山東。適太守朝覲南回。娶吾爲繼室。侍寢三年。適太守解任。留揚玉帶橋邊。又一載。不料江中之訃旋聞。城外殺聲踵至。白頭老母。魂逐江流。翠黛嬌兒。身羈毳幕。忽又束縛囊中。委棄道左。暴露三晝夜。飢渴莫我救。此時早知有死。安望生存。誰實脫我以死。誰實食我而生。私心竊幸。謂自此已得所天。君乃令我終失所歸。耶。言已悲咽。不自勝。蔣老亦爲之憐惻。後遂與之同枕席。蓋此老混沌初開時也。時南北雖通。商賈往來絕少。兩地所出貨物。各苦積滯。蔣老與謀。先營草房百間。於是持千金往北。各賤販其土貨而歸。艸房百間。儲俱滿。一時南北賈人樂其便近。悉來貿易。不數年。取利幾十餘萬。乃造大第。畫棟雕梁。以居。婦於其

中羅列珍錯以養之。凡婦所指揮。無不如其意。至是仍呼婦爲官太。家人亦不知此何自來也。一日蔣老語婦曰。藉官太力得起家。或意欲施舍作善事。當以萬金相還。婦曰。是吾還汝物。何待汝還我也。因言少時在北京。母將死。私舉遺賞五百金授吾。是夜夢金甲神指吾百金諭吾曰。留以償債。已而携至揚城。得洪生厚贈。又夢金甲神來曰。速藏償債金。禍且至。驚寤如神言。匿之門首溝中。已而遭洪生妻苦辱。以練自絞其頸。魂離形矣。忽見金甲神叱曰。債未償。乃欲逃乎。揮手作刀劍聲。樓下一嫗驚寤來救吾。已而入妓館。積金二千餘。靜夜與義母共包裹。又夢神如前語曰。速藏償債金。禍且至。寤而泣告義母。母不信。黎明吏役持牘來拘母。迫匿之廚下灰中。房屋卽爲縣令封閉。不得入取。已而入太守署。專寵宦囊若干。皆委我藏弄。又夢神曰。償債金已足。汝可自繳。今各處所藏金。汝往輒獲。神亦不復夢。豈非原是汝物。兆由前定乎。蔣老亦心異焉。婦乃立誓焚修。廣行善事。遂爲蔣老置妾生一子。撫之如已出。年逾六十。先蔣老而卒。小鳳之晚節若此。而羅二娘則不知所終。

通省積雪。飲南酒數盃。紙窗淅瀝聲不止。一燈相對。不覺旅懷空集。適主人
出。縱談維揚坊曲閒逸事。主人揚人也。聲口間頗足爲乙邦奇優。孟曲暢情
節。巧摹入神。一時嚙嚙差慰寂寥。早起呵凍筆書之。敗紙庚寅仲冬燕邸思
庵閒筆。

筆夢叙

古今皆夢也。自富貴逸樂以至貧賤困厄。境不同而夢則同。何也。當其富貴逸樂。則見爲富貴逸樂矣。當其貧賤困厄。則見爲貧賤困厄矣。一旦神與形離。冥然歸於無何有之鄉。彼又烏知夫富貴逸樂之爲富貴逸樂。貧賤困厄之爲貧賤困厄耶。是則古來境不同而同歸於夢也。若錢侍御秀峯公。其可謂極富貴逸樂之境者乎。第宅之廣且鉅也。如此。人人見爲富貴逸樂也。而不知富貴逸樂之人。亡歸於無何有之鄉。則所謂富貴逸樂者。烏可得而據乎。不可得而據。尙安有所謂富貴耶。逸樂耶。侍御之生也。因夢而生。後之富貴逸樂。特夢緣耳。爲述其生平。作筆夢小叙。

侍御之生也。父龍橋公。夢一老僧。豐頤大耳。徑造其家。云自泰山來。欲借此了緣。覺而夫人生男。因取名岱。字汝瞻。後汝瞻爲直指。奉使泰安州。詣一寺。見僧堂有一小照。宛如己貌也。問之。有僧對云。此先師爲某鄉宦所辱。一笑而逝。其年月日。則侍御所生之月日也。已偵知鄉宦實肆橫鄉里爲不法。欲題參。不五

日而家書至。蓋鄉宦聞而恐。急赴常求救於龍橋。願重建此寺。爲封翁祝釐。龍橋性仁厚。好奉佛。作書寬解之。後此寺鼎新巍煥。重振宗風。如老僧時云。

龍橋世業頗豐。實無意其子讀書。侍御入小學。其師亦僅能記名姓而已。不二年而經書皆成誦。并曉大義。師驚告龍橋。乃擇師學舉子業。甫擲管而文理斐然可觀。真夙慧也。是時吾邑承瞿文懿盛名後。邑中士大夫家立文壇。月旦子弟。侍御與近里蕭氏子徒步來城與課。至湖橋。兩人遙玩山景。錢喟然曰。我得志。第宅必營於西半城。蕭曰。然則我必東半城。後皆驗。蕭名應宮。字觀復。登進士。兵備遼東。捆載而歸。廣營第宅。今方塔前小東門一帶蕭家廊下是也。自兵備去世。而其子孫已凌替矣。侍御中隆慶辛未進士。出江陵相公門。江陵愛其才。深相得也。擢御史。三持斧鉞代巡。四典鄉會試。而門生故舊。自此盛也。神廟登極。覃恩。龍橋膺封誥。然尙勤穡事。時郡丞楊借防江名。驛騷鄉里。道經彭城宅。欲暫避雨。吏役見一老翁倉卒在場收麥。以蒼頭呼之。俄而肅冠帶出迎。則前收麥者。語郡丞曰。明府此來何爲。曰。鹽盜出入。特親稽察耳。翁厲聲曰。盜於

何有。此地實寧靜。何爲數來。使數十里小民不勝擾。郡丞慙焉。卽爲返旆。并勗
汎卒戒勿生事。龍橋有兄早世。爲撫遺孫。翼之成立。分金使富。弟念甫營宅。占
乃兄地。旁觀爲之不平。翁曰。渠從力穡起家。肯堂肯構。亦先人之光也。置勿較。
後侍御給假養親。壽至七十有八而終。江陵秉政。勢頗煊赫。長安士大夫欲一
見顏色而不可得。惟侍御至接見。似有夙緣。壬午春。江陵招飲。席間偶言楚省
文風頗盛。但敝邑則殊少科甲。侍御對曰。今科必是世兄。然無心也。至秋闈而
湖廣主試首點錢岱矣。江陵子中式。撒闈。張來謁。卽呈帖邀飲。次日主考赴相
府宴。自貢院至相府。約二里許。所經街道。皆上結綵繪。下鋪氍毹。旁列鼓吹。主
司與從吏皆履不沾泥。如入赤霞城。郡人聚觀。傳爲勝事。

附記贐儀

程儀二千兩

綵緞百端

素緞百疋

色絹八十疋

銀壺二

金斗一

玉匣硯二

碧玉蟾蜍二

貓兒眼二

湘妃洒金扇十

東珠扇球一

雄黃假山一

金鑲玉帶一

古銅爐一

古銅香盒一

水晶揮屏四

宋元板書四種

侍御復命後。謁江陵。握手慰勞。意氣益投。然侍御爲人煦煦和厚。而後慮深遠。以江陵明察。凡事並不干請。遇公政。亦能委曲開導。於江陵前。故江陵雖剛愎自用。未常不改容以聽。而仕途熱中之士。皆思得當於彭城公。不待謀面而餽遺絡繹於門庭矣。

一日江陵酒後。諦視侍御戲之曰。兄眞福相。老夫此位不久將屬。蓋非有心也。而侍御不無他疑。遂作引避想。時皇太后萬壽慶賀畢。疏請終養。江陵挽留甚力。不從。江陵作詩以送。且屬云。地方利弊。幸密札相聞。以佐老夫不逮。時長安歌詩餽賸者。填塞旅邸。遂告假歸。時也。四十有四。出京後。如長蘆。嵯司山東。按撫布政。及諸都司皆故交。俱遣使賁厚。賸至府縣以下。雜沓送禮。過宿遷。揚州鹽運司趙汝瑚知府方進。皆侍御門人。離郡二十里。出郭迎接。請暫留身泊壩子。坐軒轎。儀導至公館。結綵張燈。陳設綺麗。二公及江都尹陪宴。明日出遊瓊

花觀。晚至鹽司署設宴觀劇。凡揚郡名班皆集。有揚州監稅徐老公者亦在座。自云有家妓數名。頗嫺音樂。明早乞枉駕一顧。稍申款曲。至次日復往監稅署觀女樂。徐公屢詡其教習之善。選擇之審。侍御姑口譽之。以其爲弋陽腔。心勿悅也。徐監選女樂四名來送。固辭之。徐監乃喚滿江紅載四女遣管家二人。女侍二人。候鎮江口。隨侍御至家。

附記女妓

張五兒

年十二揚州人後名五舍

韓壬姐

年十二北京人後名壬壬

馮觀兒

年十二揚州人後名觀舍

月華兒

幼養徐公家不知姓年十一後名月姐

時江南旱。鎮江開止辰酉二時開放。雖上司緊急公文踰時亦不能行。獨侍御舟至。不待卽開。而撫標兵卒及按院差官已賁帖迎候三日矣。侍御錦歸。會族慶宴。龍橋冠帶上坐。命四女子侑酒。曲皆弋陽調。舉座大笑。後侍御命掌家韓壽妻老四者。撫五舍月姐爲女。命王成妻老慶者撫壬壬觀舍爲女。兩婦梳妝極好。潔纒弓足。理髮鬢不逾年。皆成秀美小鬟。

附記揚州衆商揭送禮單

贐儀六千兩

銀盃盤十二副

金盃盤四副

金鑲牙箸十雙

金鑲檀箸十雙

銀喜壺兩把

銀蠟臺二副

嵌銅蠟臺六副

銀鑲挿屏十二

晶燈二十盞

宣德瓷器八十件

蓮花晶燈二十盞

門色晶燈二十盞

古銅唾盂一

花梨桌四

椅十六

書桌二

脚踏四

文櫃二

雕漆涼牀一

古銅面盆一

錦被二床

錦褥兩牀

哆囉毬帳一

銀帳鉤二

繡披十六

繡圍四

古銅花瓶大小各二一品 補服十

是年冬。龍橋公考終。訃音未至京師。而江陵慰唁手札已至。蓋公從驛遞報知也。治喪分三處。皆設公神位。凡各省同僚近好。則郡中承天寺。縣中紳衿。則慧日寺。鄉間則三黨姻戚。間有籍在各省。仍來弔於郡縣親至鹿苑者。公所住皆鎮名

門下士也。郡中治喪。則在郡鄉先達主之。王婁東亦與焉在縣則瞿孫陸三宦主之。鄉

則三日而畢。縣則五日。郡中則幾及半月。蓋遠方道里不齊故也。數日輻輳駢

集。司喪者幾應接不暇。江陵祭文墓志及賻贈等。郡侯吳縣尹親賁至承天寺

隨後復躬送至鹿苑墓中。其祭幛三百軸。皆白綾裱寫。賻儀亦幾二萬有奇。祭

品充棟。狼籍庭階。每日都爲輿隸厮役負載而去。其猪羊等牲積若邱山。婁東

每日分送陪弔諸賓。有庠士誇詡人曰。錢老先生家執紼回。知荆妻豚子。日日

得嘗少牢味。聞者晒之。侍御守制三年。江陵四次手書不答。終喪始上書答謝。

江陵卽答回書。又云。倏忽三載。光儀契闊。夢想爲勞。適接華翰。知讀禮後。餘哀

未忘。眞仁人孝子之用心也。賑濟事不意奉行不善至此。當再瀆聖明。救此一

方民命耳。伏祈云云。江陵札侍御皆秘此札。偶書房見之。未幾江陵復致書來。殊有推轂意。然侍

御已相度西城營菟裘爲終老計。捧檄之喜。久淡如也。西城第宅。其最著者曰

集順堂。怡順堂。百順堂。其順堂。其順爲長子。仍峯建棟。擇名宅第。皆前後相望。

輦飛門角。盤亘山塘。西涇邑中第宅。此爲首推。集順堂右爲山滿樓。侍御門人

爲浙鹽司遣幹僕建此樓爲老師壽。其紀綱之僕身極短。粥粥若無能。而指揮工匠三月而成。其高數仞。深廣稱是。後鹽司來謁侍御。設宴此樓。適優人裝元尤戰敗時跳跌狀。撼攤席上高果。鹽司赧甚。恐老師之不足於中也。立命更造。用直長木厚至二寸餘。崇敞鞏固。爲通邑名樓之冠。今爲侍郎蔣載門所得分授三房俗稱環秀山滿樓之右。爲四照軒。軒有池。池上有湖石。名舞袖。名翔鶴。皆玲瓏聳秀。門下士遠方輦致。選擇最緻者。假山之上。有亭曰挹翠。西城山景踴躍亭前。亭下有五石壁。剗削如天成。刻營造年月於其上。侍御自記亦鐫焉。軒前皆美山石。有大松二。挺秀天表。軒之左右亦皆湖石爲山。山徑幽折。峯巒隱秀。侍御一生此處爲最樂。故以秀峯自號焉。闢園曰小輞川。在西城九萬圩西偏。城河自南門依城趾直西至此。而繚繞回環。中多曲港。方爲之窪。圓爲之沼。俱與城河通。圍以高垣。贅以水門。水門時啟閉。容游船出入。內則石梁木槎。或造臺觀以架其上。水邊植柳桃李梅芙蓉等。每春。鄉人載婦女蕩槳入水門。濃陰垂庇。落英繽紛。皆歡呼終日。以爲勝遊。窪之中有亭無基址。以大木作檣。凌空結撰。所謂空心

亭也。其鋪板不用實心。俱彫鏤花勝如窗櫺。以透水面涼風。爲夏日避暑所在。門客趙靜之。構思營成者。集順、怡順、其順。每大門前開一荷池。石欄周圍。夏月則荷香數里。惟百順堂在山塘涇西岸。荷池在聽事之旁。亦極廣大。園內爲侍御晚年結構。雖不及四照軒之勝。然名石頗少。而四時花卉則盛。近地街道俱設閤。故侍御門前無敢夜行者。夏月則令居民各潑井水於第前街道。侍御夜歸如行早涼時也。侍御寢處在集順堂之日多。怡順堂爲令嗣讀書處。西席設焉。其順乃晚年所建。長公仍峯居之。百順則女樂聚焉。連房洞闥。幾四百間。長公極聰明。曾記其幼時試筆作破題。是日侍御設盛筵。演戲款師。題目是學而時習之一句。待完後。邀師赴席。而擲管良久。只寫一句如鳥數飛。師意大窘。謂其抄註凡兒也。外邊邀請已屢。視其稿。只是如鳥數飛四字。及侍御自來邀師。長公大恐。速書學之象也。呈師。師乃訝其靈異不凡。長公名時俊。萬歷庚子舉人。甲辰進士。仕至湖廣副使。長公子裔肅亦孝廉。

侍御居鄉。加惠於寒微。而待紳衿則殊倨傲。生平未常作威福。亦未嘗與當道

關談一事。雖聲氣甚廣。東脩之間。接踵門庭。皆及門顯位者。爲報師恩。實未嘗遣介致書以求分潤也。故江陵身後。大滋物議。而侍御脫然無累。優遊林下數十年。聲色自娛。無纖芥禍云。

女教師

沈娘娘。蘇州人。少時爲申相國家女優。善度曲。年六十餘。探喉而

出音節嘹亮。衣冠登場。不減優孟。

薛太太。蘇州人。舊家淑媛。善絲竹。兼工刺繡。年五十餘。宅中皆稱

爲太太。

女優十三名

老生張寅舍。家人女。兩眉疎秀。顏色絜白。頗有微靨。體態端雅。弓足。得幸於

侍御。改名素玉。爲侍妾三十年。侍御卒後。入尼庵。奉佛終身。

正旦韓壬壬。北京人。紫膛色。頤額方稱。丰姿綽約。足略弓。後適張僕子五郎。外馮觀舍。揚州人。姿容秀麗。長大姣好。足弓。名翠霞。侍御於侍妾中。命爲

首領。侍御卒後。旋卒第中。

且老張二姐。小東門竹匠女。姿色紅白停勻。身材五短。弓足。侍御卒。年已四

十餘。適人。

生小徐二姐。蘇州人。臉如鵝子。豐滿潔白。小口花牙。態度嫺雅。弓足。爲侍御

妾。貌獨冠羣。妾上名佩瑤。後終其家。

且小吳三三。蘇州人。眼微似鸚鵡。而丰姿俏麗。色態雙絕。弓足而纖小。後適

顧氏子爲妾。

且小周桂郎。蘇州人。姿容妍麗。體態娉婷。弓足纖小。其平正輕利。爲衆妾莫
及。有凌波微步之致。爲侍御妾。改名連璧。

淨大吳小三。家人女。面白而圓。身材微胖。足未弓。後適家人長壽。

淨二張五舍。揚州人。姿色紅暈。身材短俏。足略弓。終於侍御家。

淨小徐二姐。韋縣人。面潔白。脣有一黑痣。頗斌媚。獨足未弓。後適蘇州一富
人。

且貼月姐。眉梢長曲。面頰微靨。姿色頗艷。弓足。後配家人子譚四。

以上十三人。皆女師沈薛二人教之。咸能嫺習成戲。然皆不能全材。每能一二齣而已。又各有工有未工。如張素玉與韓壬壬。則姜詩蘆林相會。伯喈小別。其擅場也。徐佩瑤之張生。吳三三之鶯鶯。周連璧之紅娘。張素玉之汲水訴夫。馮翠霞之開眼上路訓女等齣。尤爲獨擅。扮淨者別無他長。第傳粉面作雜襯脚色。或吹彈合曲。打雜走場。而女師沈娘娘。則職司鼓板而已。吳小三名扮大淨。實未獨出登場。聲音細不能唱高調。而張五舍徐二姐。每扮雜色登場。則縮胸不能爲科譚。惟舞技則人人精熟。每於酒筵散後。擺列舞桌。或四張。或八張。女教師配齊身材長短。著一色舞衣。音樂競奏。捉對登場。歌曲一闋。乃立舞桌起舞。其偏反偃仰。跪起鞠曲。疾徐高下。節奏齊合。長袖旖旎。綵裙閃爍。宛如洛神巫女。從空而降。舞畢再歌一闋而退。然張樂時。僮僕非承應。不得混入戲房中。祇是女人伴當。錢老四。王老慶。各管箱籠衣服首飾裝匣。及靴帽等具。不關男人也。曾記數年前。侍御宴一顯達。出女優。其僮姚保者。竊從百順堂罽毼隙窺之。有言於侍御。卽杖而逐之。而教師沈薛又能拘束嚴肅。其家人女平時

則母家照管。餘皆兩教師收管。衣服四季增添首飾及脂粉等費。則歲底頒發。時或三兩一名。或五兩一名。設宴時賞賜在外。所賞或簪或環或指釧。惟扮生旦者。蒙賜尤多。其曾侍寢者。歌舞且工。卻不在宴時賞賜。羅蘭姐者。其父爲羅鳴九。係瑞霞班老生。瑞霞爲郡中名班第一。而羅又爲子弟中第一。羅之姊爲廣東按院王公副室。王係侍御分房所取士也。復命過蘇。來謁侍御。知侍御怡情音樂。乃因副室介鳴九出千金。買此女爲壽。後因習舞登桌蹉跌。血不華色。侍御遣還母家。不知所終。馮翠霞者。小名觀舍。性極慧。自維揚來。不閱月。已能說此閒鄉語。初裝副末。僅能錦衣緩步。唱開場詞。唱畢。卽戴紅毡帽。出場吹笛彈弦。或扮家人之類。別無他長也。後因裝外之王仙仙身材微短。教師令兩人交換。乃大見所長。侍御觀而悅之。至晚年。猶朝夕不離左右。諸妾咸聽指揮焉。宅中每月演戲。亦不過二三次。若檀板清歌。管弦齊響。無日不洋洋盈耳。諸女中歌聲最婉轉悠揚。字字溜亮者。惟張素玉。次則馮。次則韓。又次則張與二徐。餘皆出聲太細太嬌。似非小旦以外所宜。蓋女人不能高調也。侍御止蓄女樂。

不蓄梨園子弟。邑中向有錢府班者。特記錢府牌額。非錢府教成也。然侍御宴外賓多用男班。而女樂但用之家宴及花朝月夕而已。曾不輕出侑賓。

附記演習院本

躍鯉記

琵琶記

釵釧記

西廂記

雙珠記

牡丹亭

紅梨記

浣紗記

荆釵記

玉簪記

以上十本。就中止摘一二齣。或三四齣。演時王仙仙將戲目呈上。侍御親點訖。登場演唱。侍御和顏諦聽。或曲中有微誤。則即致兩女師爲校正之。春時小輞川花叢似錦。侍御日偃息其間。諸女或打十番。或歌清曲。張素玉中坐司鼓。餘女團團四圍。笙歌相聞。幾於滿城。牆外遊人。竟日立聽。皆作李謩想。夏時則避暑小輞川之空心亭。諸女輪番隨從。每日四人坐一船。盪舟輕漾而渡至亭。湘簾四掛。蘭蕙百盆。縹緗盃几。四女則跋小紅鞋。徧體氷紈。肌膚雪映。揮扇榻旁。侍御手一編。飲涼茗。倦則偃臥。鼾睡以消永晝。時或捲簾憑檻。惟覺荷香風送。清氣襲人。至暮方回。侍御於夏月酷暑不作音樂。不會客。雖貴客至。亦祇令長子仍峯晉接而已。秋時或小輞川。或四照軒。遇楓葉落。則登挹翠亭。列酒肴。命

侍妾每清歌一曲。進酒一觴。至夜張燈亭上。弦管迭奏。都人士每從城西上望之。以爲不減謝安。冬月則於百順堂。期我軒地板上。再鋪重茵。窗櫺皆以毳幕揜蔽。臥榻之前後。以細絨絨作幔。掛於帳前。帳用細絹爲表。復以細絹夾之。故安寢絕無寒氣。宴飲用女樂。惟冬天爲多。七十以前。每多長夜狂飲。管弦歌舞。甚至達旦。七十以後。自日入至夜分而已。晚年畏寒尤甚。常至小輞川賞雪。首戴風巾。紫貂暖耳。身衣狐白裘三重。猶慮足冷。令兩侍妾對坐一長圓桶中。復以纈被伸兩足於中間。以資暖氣。蓋用非人不煖之意也。故冬夜臨臥。則侍妾先脫衣臥被中。令溫。然後就寢。不用火爐。恐火氣燥烈也。年八十。郡縣敦請。應鄉飲大賓。戚里雜沓慶賀。乃出女樂演戲相款。列筵百順堂。徹席後。復作管弦之會。已而令女樂十人齊舞。且歌且舞。夜半方散。人盡歎爲觀止。有門客舉少陵詩曰。盍簪騰櫪馬。列炬散林雅。謂此宴如是。泰昌元年十二月。考終於集順堂。享年八十有二。

觀侍御一生。掇巍科。登顯要。獲燕衍之福。極聲色之娛。享期頤之壽。子五。登

科甲者二。舉孝廉者二。孫曾孫十有四。舉孝廉者二。入士籍者六。侍御故後有族人某者。生伎心。謂集順不足爲喪次。宜治喪於百順。乃於山塘涇上下兩岸搭席廠。作過街棚。移屍就殯焉。一縣譁然以爲非禮。周連璧者。依於其孫裕公家。女刺繡朝夕伴處。外閒羣不逞之徒。遂謗議沸騰。欲傾裕公。牧齋爲之排解。事乃昭雪。周後嫁諸生王宇新爲妾。宇新有兄宇春者。亦諸生。竟欲攘而奪之。致周蓬首跣足走避。尤爲當日異聞云。

舊交據梧子哭曰。天乎。何爲乎倏而盛。倏而衰乎。一轉瞬而變幻如是乎。其愚弄斯人乎。旣而瞿然覺曰。侍御之生。非生乎。其夢因乎。侍御之富貴逸樂。非富貴逸樂乎。其夢境乎。則第宅之廣且鉅。其南柯之郡乎。姬妾之多且美。其蕉葉之鹿乎。衣服供養之華且麗。其邯鄲旅舍之黃梁乎。且安知侍御之沉酣於富貴逸樂之境者。不栩栩然爲胡蝶乎。雖然。侍御之夢。其往夢也。而夢侍御之夢者。重復聲勢。赫奕於電光泡影中。而尙未覺也。天乎。其誰覺之乎。

按蒙叟續譜。岱字汝瞻。隆慶辛未進士。除廣州府推官。以卓異拜湖廣道監。

察御史。壬戌五月卒。年八十二。汝瞻易直弘亮。明允沉塞。遇事斧劈。觸解目無盤錯。狀貌魁偉。聲如巨鐘。抵掌談諧。聳動一座。驟而與之游。無不傾倒。知爲通人快士也。汝瞻爲江陵舉士。江陵方急才。每得其章奏。輒稱善。故事。元輔不謁客。而江陵尤貴倨。顧獨枉駕過汝瞻。呼守邸人屬曰。傳語主人。吾不以此禮加他御史也。巡按山東湖廣。再主鄉試。程文簡潔圓潤。文體一變。山東多豪猾大駟。通關京輦。持監司郡邑長短。德府強親近賊殺不辜。急則亡匿。王所一切用閒。掩捕按治。論死。豪強懾服。言者請穿河渠。通灌注。下齊豫。按臣議。汝瞻討覈原委。條上利害。謂當壞官亭廬舍千萬。所費水衡錢萬萬。兩省騷動而無補國計。事乃寢。其能引大體。決大事。爲西臺眉目如此。壬午楚闈事甫竣。而江陵歿。諸與江陵厚善者。皆目爲張黨。汝瞻遂不復振。垂三十年。國成潰弛。寇氛日熾。追思綜覈初政。咸嘆息於江陵。思其所錄用之人。皆精強幹辦。可資緩急。不若近世懦臣鄙夫。憤耗蠹國家者。而汝瞻則已老矣。中年歸田。氣力壯盛。出其精神才術。從事於田園聲妓。以耗壯心。每日管

弦鏗鏘。奕棊飲酒。如是者四十餘年。汝瞻內行淳儔。以尊祖敬宗牧族爲事。建五王祠。脩族譜。宗人貧老破衣芒屨蒙袂登堂。與金章朱履雜坐。稱孫稱姪。不敢少自假易。蓋其祖父家風如此。晚與余談江陵時事。舉其決疑斷國者數十條。以相策發。新城王司尊象乾同年生也。天啟中以欸虜開鎮前遼。汝瞻笑曰。王霽宇遂作擎天一柱。朝家可謂乏人矣。先君常言汝瞻不坐廢。當任邊督爲名本兵。晉溪虞坡。其在季孟之間乎。汝瞻舉酒屬先君而笑。以爲知言也。子時俊。字用章。萬曆甲辰進士。歷官湖廣道按察使司副使。居官醇謹。管武林南關以清惠聞。歸田後。園池使女之奉。不減汝瞻。其才情揮霍不如。

附顧仲恭討錢岱檄

仲恭名大韶。顧大章之學生。弟雅擅古今文詞。恃才任氣。老於國子生時。岱


將飲大賓。仲恭作文討之。傳播通邑。岱爲氣沮焉。

原任削籍御史錢岱者。山川鍾戾。宇宙窮兇。筮仕節推。而佯敗奕棋。作吳太守之門客。躡等侍御。而號呼狗竇。附張相國之義男。敬大臣命題士林訕笑。八丑記成。曲里巷喧傳。既失江陵之鷹犬。而垂首以歸。旋爲虞邑之豺狼。而張吻以噬。丞簿佐貳。悉供頤指。氣使之人。門皂吏胥。盡結爪牙腹心之黨。瞿起吾以刀筆入幕。素著閹老之稱。王壽舍以籌算登堂。兼擅國舅之寵。署曹完爲發圯校尉。趙玉坎之白骨夜零。授葉鳳爲橫海將軍。揚子江之赤波晝沸。用文則高良朱文臣之徒逞其詐。用武則陸勝侯文學之屬耀其威。立分管四十九區。處處生波造釁。准手本數千百紙。日日傳板投文。極勢力之可吞。大不厭乎萬貫。苟搏攫之所及。細不遺乎百文。其可以柔取者。則餌之以酒食。釣之以女優。不惜捐廉喪恥。其可以強取者。則逼之以私牢。刦之以官法。奚憚極慘窮刑。金玉滿

堂。盡是禦人之貨。田園半邑。孰非悖入之財。家僮無算。不治饗殮。而慣習酒肆。爲醉飽之地。伎樂成羣。不給衣飾。而專倚市門。爲粉黛之資。締構則但畫圖樣。而重閣層樓。聽督工者之巧覓。燕享則止開品件。而山珍海錯。任買辦者之旁搜。毀文學書院爲中堂。而荷亭之臥榻難穩。截蕉尾琴川爲西沼。而輞川之疆界日恢。局哄族叔。君平立。詈錢三山百年之產。奸誘妾姊。鄭氏潛移。顧豫川半萬之資。殺夫大逆也。貪其色而掩其奸。則有若蕭文煌之嫂。強盜重辟也。賴其賍而收其黨。則有若王玉川之兒。父子相爭。則助子以殺父。骨肉之焚尸暴矣。主僕成訟。則佐僕以毆主。李翁之託孤痛哉。陳尙書敕諭猶新。松楸之斬伐殆盡。趙少宰骨肉未冷。田廬之攘奪靡遺。翁都諫二姓姻盟。愛女幾葬於幽阱。陸職方兩榜年誼。親弟垂斃於老拳。捏假命以詐鄉紳。則先太常忍恥唾面。縱羣優以辱甲榜。則王進士飲恨垂涕。龔孝廉發忿以成名。半因撻之朝市。浦舉人撫膺而立死。正緣辱及妻孥。認奴子爲孫行。裔昌之登譜牒。不可解也。壓宗女爲奴配。錢梗之投書揭。豈能已乎。總之作惡似惟日不足。行兇眞罄竹難書。計


罷官以來。歷三紀於茲。日管一事。則所破不下百萬餘家。月殺一人。則所斃何止三百餘命。若斯人者。鯨鱷不足喻其貪。虺蜥不足比其毒。蛆蠅不足喻其穢。鬼奸不足比其賊。上白衣冠縉紳。下至行乞負販。方百里之內。五萬戶之民。聞者無不痛心。言之莫不切齒。以故龍橋羞爲之父。焚封誥以絕恩。陳氏恨爲之妻。借託鉢以表怨。張大尹醜詆於公案。秦直指榜示於通衢。乃至甘鄧二案臺。耿楊兩父母。屢欲伸威國法。迄今漏網天誅。豈意衆棄之罪人。突踞上元之賓席。老生利其微賄。攘臂公然具呈。學師畏其積威。給解先行謝事。將使千年庠序。轉爲盜賊飲博之區。五百鬚眉。盡成兒女唾罵之物。高皇之大誥何在。列聖之申飭蕩如。匪直一邑之差。實重三吳之恥。且岱八旬安富。三世豪奢。再輸重寶於天合家。業已腰纏金帶。預拜房師於相國寺。亦遂名荐賢書。兼之貽厥孫謀。直足繩其祖父。殺婢僕如草芥。縛良善如鷄豚。而國家旣遣瘴惡之刑。造化尙稽禍淫之報。止存一線之清議。聊當百姓之口誅。若遂抹殺公評。倒持學政。堂堂僕主。強顏爲之酬酢。赫赫憲綱。盛典登其姓氏。則兇邪必加肆橫。世界行

且陸沉。迄今子游之遺迹尙存。仁宰之新政伊始。豈容殉一二無恥之請。禁億兆不平之鳴。詔雖伏枕臥床。不覺裂眦怒髮。通學雲翔而不救。則國學亦可僂言。壯夫林立而不前。則病夫亦可仗義。雖岱勢堪搖岳。錢可通神。觸之必焦。犯之必碎。姚志禹徵訐之。而身殞於毒餅。孫弘道隱諷之。而禍懸於伏機。詔然廢棄散材。留殘微息。視一生如蝶夢。等七尺於鴻毛。欲敗其名。則彈章波及之人。已忌情於寸進。欲殺其命。則奇病荐臻之際。又何戀夫餘生。是用危言於濁亂之鄉。奮筆於痿痺之手。敢持大義。責爾諸儒。若不能抗步以揚聲。舉觥而發郢。憚亦便當捲堂而削迹。蹈海以追仲連。腎腸既敷。聾聵斯警。檄文所至。士類咸知。



香
豔
叢
書

第
二
集



HG
1737
H95
v6

香艷叢書

絳雲樓俊遇

錢謙益字受之。號牧齋。晚而自號蒙叟。亦自稱東澗老人。萬歷丙午舉於鄉。庚戌成進士。殿試第一甲第三人。入翰林。授編修。尋丁父憂。天啟辛酉補原官。主試浙江。以失察錢千秋關節事。坐罰俸告病歸。甲子起爲諭德。進少詹事。時魏忠賢羅織東林諸人。謙益以東林黨削籍旋里。崇禎改元。召爲正詹事。轉禮部侍郎。適會推閣員。廷臣列謙益名。而溫體仁周延儒不得與。遂爲兩人所忌。溫借浙關節事。訐訟於上前。周從旁助之。復坐杖論贖。削籍竟廢不用。家居九年。又爲同邑奸民張漢儒訐奏。逮至京。事白得釋。弘光僭號。晉階宮保。兼禮部尙書。大兵定江南。謙益投誠。命以禮部侍郎管內院學士事。尋以老病乞歸。順治四年。又以江陰黃毓旗事牽連。被逮下金陵獄。事白。釋還。謙益詩古文詞冠絕近代。入仕途。自詞詩臺閣文章無出其右者。大拜乃意中事。而屢起屢踣。常快



快於中年。遂不惜名節。晚年益放情於聲色。柳姬如是。故娼也。性慧善詩。晨夕酬唱。倚以娛老。嘗修明史。屬稿未就。悉燼於火。乃歸心佛。乘以自遣云。所著有初學集。列朝詩集。開國羣雄事畧。楞嚴金剛心經蒙鈔。至康熙三年甲辰卒。年八十有三。

牧齋殿試後。小璫宮報謂狀頭已定。錢公。司禮諸監俱飛帖致賀。傳臚前夕。所知投刺者。絡繹戶外。牧齋亦過信喜極。比曉榜發。則狀頭乃吳興韓敬。蓋敬通巨璫。藉其潛易也。錢恨甚。後韓以京察見黜。疑錢擠之。亦恨甚。牧齋與浙人水火。自奪狀頭始。

吾炙集。投筆集。皆牧齋晚年所撰。觸忌諱。藏此書者多秘。投筆集爲族子曾王注。吾炙集表曾王詩爲首。曾王博學好古。注初學有學兩集。牧齋深器之。謂能紹其緒云。

牧齋極經史淹貫之能。其讀書法。每種各有副本。凡遇字句新奇者。卽從副本挾取。粘於正本上格。以便尋覽。供采擷。蓋正本或宋元精刻。則不欲輕用丹黃。

也。

一門生具腆儀。走幹笑。自遠省奉緘於牧齋。內列古書中僻事數十條。懇師剖晰。牧翁逐條裁荅。復出已見。詳加論定。中有惜惜鹽三字。尙待凝思。柳姬如是從旁笑曰。太史公腹中書。乃告窘耶。是出古樂府。惜惜鹽。乃歌行體之一耳。鹽宜讀行。想俗音沿訛也。牧翁亦笑曰。吾老健忘。若子之年。何藉起予。

初吳江盛澤鎮有名妓曰徐佛。善畫蘭。能琴。四方名流。連鑣過訪。其養女曰楊愛。色美於徐。而綺淡雅淨。亦復過之。崇禎丙子春。婁東有張庶常溥。告假歸溥。固復社主盟。名噪海內者。過吳江。艤舟垂虹亭。訪佛於盛澤之歸家院。值佛他適。愛出迎溥。一見傾意。攜至垂虹亭。纏綿而別。愛自是竊自負。誓擇博學好古。爲曠代逸才者從之。聞虞山有錢學士謙益者。實爲當今李杜。欲一見其丰裁。乃駕扁舟來虞。爲士人粧。坐肩輿。造錢投謁。易楊以柳。易愛以是。刺入。錢辭以他往。蓋目之爲俗士也。柳於詩內微露色相。牧翁得其詩大驚。詰問者曰。昨投者士人乎。聞者曰。士人也。牧翁愈疑。急登輿。訪柳於舟中。則嫣然一美姝也。因

出其七言近體就正。錢心賞焉。視其書法得虞褚兩家遺意。又心賞焉。相與絮語者終日。臨別。錢語柳曰。此後卽柳姓是名相往復。吾且字子以如。爲今日証盟。柳諾。此錢柳作合之始也。

柳嘗之松江。以刺投陳臥子。陳性嚴厲。且視其名帖自稱女弟。意滋不悅。遂不之答。柳悲。登門冒陳曰。風塵中不辨物色。何足爲天下名士。洎遇牧翁歸。乃昌言曰。天下惟虞山錢學士始可言才。我非才如學士者不嫁。錢聞之大喜曰。天下有憐才如此女子者乎。我亦非如柳者不娶。時牧翁適喪偶。因做元稹會真詩體。作有美生南國百韻以貽之。藻詞麗句。窮極工巧。遂作金屋住阿嬌想矣。庚辰冬月。柳歸於錢。牧翁築一室居之。顏其室曰我聞。取金經如是我聞之義。以合柳字也。除夜促席圍爐。相與餞歲。柳有春日我聞室之作。詩曰。裁紅暈碧。泪漫漫。南國春來已薄寒。此去柳花如夢裡。向來煙月是愁端。畫堂消息何人曉。翠幕容顏獨自看。珍重君家蘭桂室。東風取次一憑欄。蓋就新去故。喜極而悲。驗裙之恨方殷。解佩之情愈切。

辛巳初夏。牧翁以柳才色無雙。小星不足以相辱。乃行結褵禮於芙蓉舫中。簫鼓遏雲。蘭麝襲岸。齊牢合盃。九十其儀。於是琴川紳士。沸焉騰議。至有輕薄子。擲磚彩鷁投礫。香車者。牧翁吮毫濡墨。笑對鏡臺。賦催粧詩。自若。稱之曰河東君。家人稱之曰柳夫人。

當丁丑之獄。牧翁佗僚失志。遂絕意時事。既得章臺。欣然有終老溫柔鄉之願。然年已六十矣。黝顏鮎背。髮已皤然。柳則盛鬢堆鴉。凝脂竟體。燕爾之夕。錢戲柳曰。吾甚愛卿髮黑膚白也。柳亦戲錢曰。吾甚愛君髮如妾之膚。膚如妾之髮也。因作詩有風前柳欲窺青眼。雪裡山應想白頭之句。牧翁於虞山北麓構樓五楹。匾曰絳雲。取眞誥絳雲仙老下降。仙好樓居。以况柳以媚柳也。牙籤萬軸。充牣其中。置綉帷瓊榻。與柳日夕晤對。錢集中所云爭光石鼎聯名句。薄暮銀燈算劫煤。蓋紀實也。牧翁披吟之好。晚而益篤。國史校讐。唯河東君是職。臨文或有待探。討柳輒上樓。番閱。雖縹緲盈棟。而某書某卷。隨手抽拈。有百不失一者。或用事微有舛訛。旋爲辨正。牧翁悅其慧解。益加憐重。

國朝錄用前朝耆舊。牧翁赴召。旋置吏議。放還。由此益專意吟咏。河東君侍左右。好讀書。以資放誕。客有挾著述願登龍門者。雜沓而至。幾無虛日。錢或倦見客。柳卽與酬應。時或貂冠錦靴。時或羽衣霞帔。清辨泉流。雄談蜂起。座客爲之傾倒。客當茗拜者。則肩筠輿。隨女奴代主人過訪於逆旅。卽事拈題。共相唱和。竟日盤桓。牧翁殊不芥蒂。嘗曰。此我高弟。亦良記室也。戲稱爲柳儒士。

庚寅絳雲災。錢移柳居于紅豆山莊。其邨有紅豆樹一株。故名。良辰勝節。錢偕柳移舟湖山佳處。其中秋日。携內出遊。詩曰。綠浪紅闌不帶愁。參差高柳蔽城樓。鶯花無恙三春侶。蝦菜居然萬里舟。照水蜻蜓依髻影。窺簾蛺蝶上釵頭。相看可似嫦娥好。白月分明浸碧流。柳依韻和曰。秋水春山淡暮霏。船窗笑語近紅樓。多情落日依蘭棹。無藉浮雲傍綵舟。月幌歌闌尋麈尾。風床書亂覓搔頭。五湖烟水常如此。願逐鷗夷泛急流。其餘篇什。多附見牧翁有學集。不盡載也。

大江以南。藏書之富。無過於錢。自絳雲災。其宋元精刻。皆成劫灰。世傳牧齋絳

雲樓書目。仍牧齋暇日。想念其書。追錄紀之。尙遺十之二三。惟故第在東城。其中書藉無恙。北宋板前後漢書幸存焉。初牧翁得此書。出三百餘金。以後漢缺二本。售之者故減價。僅獲金三百餘。牧翁寶之。如拱壁。遍囑書賈。欲補其缺。一書賈停舟於烏鎮。買麵爲晚飧。見舖主人於敗簾中取舊書一頁。作包裹具。諦視。則宋板後漢書也。賈驚竊喜。因出數金買之。而首頁已缺。賈問主人求之。主人曰。頃爲對鄰包麵去。索之可也。乃并首頁獲全。星夜來常。錢喜欲狂。欸以盛筵。予以廿金。是書遂爲完璧。其紙質黑色。炯然奪目。真藏書家不世寶也。入本朝。爲居要津者取去。

牧翁一日赴親朋家宴。肩輿歸過迎恩橋。輿夫蹉跌。致主人亦受倒仆之驚。忽得奇疾。立則目欲上視。頭欲翻拄於地。臥則否。屢延醫診視不效。時邑有良醫俞嘉言。適往地郡治疾。亟遣僕往邀。越數日。俞始至。問致疾之由。遽曰。疾易治。無恐。因問掌家曰。府中輿夫强有力善走者。命數人來。於是呼數人至。俞命飲以酒飯。謂數人曰。汝輩須盡量飽飧。且可嬉戲爲樂也。乃令分列於庭四角。先

用兩人夾持其主。併力疾趨。自東至西。自南至北。互相更換。無一息之停。主人殊苦顛播。俞不顧。益促之驟。少頃令息。則病已霍然矣。他醫在旁。未曉其故。俞曰。是疾乃下橋倒仆左邊。第幾葉肝搖摺而然。今扶掖之。疾走抖擻。經絡則肝葉可舒。既復其位。則木氣舒暢。而頭目安適矣。此非藥餌之所能爲也。牧翁益神其術。稱爲聖醫。

附俞嘉言

嘉言本姓朱。江西人。明之宗室也。鼎革後。諱其姓。加朱以捺爲余。後又易朱以則爲俞。向往來於牧齋之門。結草廬北城之山麓。嘉言少遇異人。授以秘方。兼善黃白之術。弟子有所得其術者。輒語曰。吾誓以濟世。不以私。故先師強以授我。然尙不免大譴。二天殛。一無後。汝願天殛乎。無後乎。二者必於設誓時。願受其一。乃可。弟子聞而懼。不復請。人或疑其託辭以拒。然嘉言無後。

嘉言治疾。尤加意貧人。藥籠中預貯白金。或三星。或四五星。有貧人來就醫。

者。則量其病之輕重。爲多寡。雜白金於藥中。予之。臨去。則語之曰。歸須自檢點。乃可。煮也。其人如言。得金喜若天賜。藥未進。而病已去其半。其金其黃白之術成之也。聞其煉時。掌火者皆隔於穴中。運扇不令一人見。然亦不常煉也。煉亦不過十金。多則廿金而已。

嘉言往鄉舟。過一村。落見一少女於沙際。搗衣。注視良久。忽呼停棹。命一壯僕曰。汝登岸。潛近此女身。亟從後抱之。非我命。無釋手。僕如其言。女怒且罵。僕抱之益力。女益怒。罵大呼其父母。其父母出。欲毆之。嘉言徐諭曰。我僉某適見此女。將攫危症。故相救。非惡意也。女父母素聞其名。乃止。僉問曰。此女未豆乎。曰。然。僉曰。數日將發。悶豆萬無可救。吾所以令僕激其怒者。乘其未發。先洩其肝火。使勢稍衰。後日藥力可施也。至期可於北城外某處來取藥。無遲。越數日。忽有夜叩僉廬者。則向所遇村中小女之父也。細言女得熱疾。煩燥不寧狀。僉問膚間有豆影否。曰。不但現影。且現形。僉慰之曰。汝女得生矣。乃畀以托裏之劑。此女漸致發透。其痘獲無恙。

北城多敗屋。居民多停柩其中。嘉言偶見一棺似新厝者。而底縫中流血若滴。驚問傍鄰。則曰。頃間某鄰婦死。厝柩於此。嘉言急見其人。爲語之曰。汝婦未死。凡人死者血。斃生者血。鮮。吾見汝婦棺底血流出甚鮮。可啟棺速救也。蓋其婦實以臨產。昏迷一日夜。夫以爲死。故殯焉。聞僉言。遂啟棺診婦脉。未絕於心胸間。針之。未起而下。已呱呱作聲。兒產。婦亦甦矣。夫乃負婦抱兒而歸。

邑有大老某致仕家居。其夫人年已五十。忽嘔吐不欲飲食。諸醫羣集。投劑俱不效。邀嘉言視脉。側首沈思。遲久而出。乃拍大老之肩曰。高年人猶有童心。耶。是娘非病。吾所以沈思者。欲一辨其男女耳。以脉決之。其象爲陰。裏陽。定是男也。已而果驗。嘉言以醫名世。奇效甚多。不盡載。

己酉豫王兵渡江南。在京諸臣相率迎降。致禮幣有至萬金者。牧齋獨致禮甚薄。蓋表己之廉潔也。東端細書太子太保禮部尙書兼翰林院學士臣錢謙益百拜叩首。謹啟上貢。計開鑒金銀壺一具。法琅銀壺一具。蟠龍玉盃一進。宋製

玉盃一進。天鹿犀盃一進。夔龍犀杯一進。葵花犀杯一進。芙蓉犀杯一進。法琅鼎杯一進。文玉鼎杯一進。法琅鶴杯一對。銀鑲鶴盃一對。宣德宮扇十柄。真金川扇十柄。弋陽金扇十柄。戈奇金扇十柄。白子宮扇十柄。真金杭扇十柄。真金蘇扇四十柄。銀鑲象箸十雙。右啟上貢。又署順治二年五月二十六日太子太保兼禮部尙書翰林院學士臣錢謙益。時郡人張滉與豫王記室諸暨曾王佐善。因得見牧翁送禮帖子而紀之以歸。又語滉云。是日錢捧帖入府。叩首墀下。致詞王前。王爲色動。接禮甚歡云。

乙酉五月之變。柳夫人勸牧翁曰。是宜取義全大節。以副盛名。牧翁有難色。柳奪身欲沈池水中。持之不得入。其時長洲沈明倫館于牧齋家。其親見歸說如此。後牧齋偕柳游拂水山庄。見石澗流泉。潔清可愛。牧翁欲濯足其中。而不勝前却。柳笑而戲語曰。此溝渠水。豈秦淮河耶。牧翁有惡容。

拂水山庄。在西郭錦峰之麓。牧翁先塋在焉。依丙舍爲別業。曰耦耕堂。曰秋水閣。曰小蘇隄。曰梅圃谿堂。曰酒樓。時絜河東君游息其中。每於早春時。梅花將

綻則坐。鷁首輕颺而來。令僮繫鼓舟中。音節清越。謂之催花信。

芙蓉庄卽紅豆村。在吾邑小東門外。去城三十里。白茆顧氏之別業也。牧齋爲顧氏之甥。故其地後歸於錢。紅豆樹大合抱。數十年一花。其色白。結實如皂莢。子赤如櫻桃。順治十八年辛丑。牧翁八十壽誕。而是花適開。蓋距前此時已二十年矣。遂與諸名士賦詩以誌其瑞。見有學集。至康熙三十二年癸酉。再結實數斗。村人競取之。時庄已久毀。惟樹存野田中耳。今樹亦半枯。每歲發一枝。枝無定向。土人云其枝所向之處。稻輒歉收。亦可怪也。

弘光僭立。牧翁應召。柳夫人從之道出丹陽。同車携手。或令柳策蹇驢而已。隨之私語。柳曰。此一幅昭君出塞圖也。邑中遂傳錢令柳扮昭君。妝炫煌道路。呼衆口固可畏也。

牧翁仕本朝。亦不得志。以禮部侍郎內弘文院學士還鄉里。丁亥歲忽爲蜚語所傷。被急徵。河東君實爲職豪。長君孫愛性暗懦。一籌莫展。牧翁于金陵獄中。和東坡御史臺寄弟詩。有慟哭臨江無孝子。徒行赴難有賢妻之句。蓋紀實。

也。孫愛見此詩。恐爲人口實。託翁所知百計請改孝子二字。今集中刻壯子是求改後更定者。牧翁游虎邱。衣一小領大袖之服。士前揖問此何式。牧翁對曰。小領者。遵時王之制。大袖乃不忘先朝耳。士謬爲改容曰。公眞可爲兩朝領袖矣。又有題詩寺壁者曰。入洛紛紜意太濃。暮驢此日又相逢。黑頭早已羞江總。青史何曾惜蔡邕。弘光時牧翁奏請在家修史不許昔去尙寬沈白馬。今來應悔賣盧龍。可憐北盡章臺柳。日暮東風怨阿儂。或云是雲間陳臥子所作。

牧齋欲延師教令嗣孫愛而難其人。商之程孟陽。孟陽曰。吾有故人子嘉定黃蘊生。名淳耀。足當此席。但其耿介。未可輕致。惟渠同里侯某素爲親信。囑之轉懇。乃可。牧翁如其言。以囑侯。侯致錢旨力爲勸駕。黃意不悅。不得已於侯而應錢聘焉。牧翁相得恨晚。一日程出海棠小箋示黃。黃曰。唱者爲誰。程曰。牧老如君柳夫人作也。子帖括之暇。試點筆可乎。黃變色曰。忝居師席。可與小君酬和乎。先生耆年碩德。主人爲老友。固可無嫌。若淳耀則斷不可。後孟陽語牧翁。牧翁益加驚。

一鄉人入城。聞異香濃郁。隨風而來。俄見婦女數十人。皆靚粧簇擁綵輿。至一大第。居鄰各呼伴入第。往觀。鄉人雜於衆中。亦立於階下觀之。綵輿停置中堂。若有所俟。而旁女肅佇久之。俄而中門啓。白鬚老人烏巾紅履。翔步而出。女從揭輿簾。扶一麗姝登猩絨褥。環佩璆然。珠襦綉帔。燿燦奪目。俛首下拜。老人抗顏受之。拜已。携麗姝手。歡然笑語而入。鄉人怪之。問於衆人之同觀者。始知某官女從師學詩。白鬚老人則學士牧翁也。

牧齋長君名孫愛。性暗懦。亦頗迂闊。其居在東城。與海防公署鄰。比防署火。延及內衙。防尊倉猝而出。暫借錢廳事一憩。孫愛出迎。始亦無失禮。及坐定。便問老父臺何科舉人。第幾甲進士。防尊係是滿州。非由科甲。囁嚅未有以應。一吏從旁微語。係某旗下某堡人。孫愛默然。未及待茶。便拂衣進內。弗出。防尊大窘而去。

田雄執宏光至南京。豫王幽之。司禮監韓贊周第令諸舊臣一一上謁。王鐸獨直立戟手。數其罪惡。且曰。余非爾臣。安所得拜。遂攘臂呼叱而去。曾王佐目擊。

其事。是日獨錢宗伯見故主伏地慟哭。不能起。王佐爲扶出之。

柳夫人生一女。嫁無錫趙編修玉森之子。柳以愛女故招婿至虞。同居於紅豆村後。柳沒。其婿攜柳小照至錫。趙之姻戚咸得式瞻焉。其容瘦小而意態幽嫻。丰神秀媚。幀幅間幾呼之欲活矣。坐一榻。一手倚几。一手執編牙籤。繚軸浮積几榻。自跋數語於幅端。知寫照時適牧翁選列朝詩。其中閨秀一集。柳爲勘定。故卽景爲圖也。

康熙初。長君孫愛己與鄉薦迎牧翁同居。柳與女及婿仍居紅豆村。踰二年。牧翁病。柳自鄉奔候。未幾牧翁卒。柳留城守喪。不及歸也。初牧翁與其族素不相睦。乃托言牧翁舊有所負。聚百人交訟於堂。柳泣而前曰。家有長嫡。義不受凌削。未亡人奄有薄資。留固無用。當捐此以賂凶而抒難。立出千金授之。詰朝羣凶喧集如故。宗人聞風來求沾惠者益多。柳遣人問曰。今將奚爲。族人曰。昨所頒者夫人之長物耳。未足以贍族。長君華館連雲。腴田錯綉。獨不可分其半以給貧族耶。斯時孫愛聞而懼甚。匿不敢出。柳念若厭其求。則如宋之割地。地不

盡兵不止。非計也。乃密召牧齋懿親及門人之素厚者。復糾家僕數輩。部署已定。立與之誓曰。苟念舊德。無踰此言。咸應曰諾。柳乃出語族人曰。妾資已盡。不足爲贈。府君之業。故在期以明日。盃酒合歡。所須惟命。衆始解散。是夕。柳果執豕魚羊。肆筵以待。申旦而羣宗屬至。柳與列坐喪次。潛令僕鑷前扉。乃入室登榮木樓。似將持物以出者。久之不出。家人心訝。入視。則已投繯矣。大書於壁曰。并力縛凶黨。然後報之官。孫愛哭之慟。家人急出。盡縛族人。門閉無一脫者。而維繫之具。柳於前一日預備一室。故數十人頃刻就縛。柳之女鳴之官。邑令某窮治得實。繫羣凶於獄。以其事上聞。悉置之法。牧翁之不致身死而家毀者。柳之力也。於是邑中之能詩者。作殉節詩以輓之。而長洲顧荃作河東君傳。

予友震澤徐奎伯孝廉有咏河東君詩云。一死何關青史事。九原羞殺老尙書。蒙叟有知難乎其爲夫壻矣。庚戌正月上浣一日。皞皞子附識。

金姬傳序 原闕

吳之士喜談張氏有吳時事其書所載有異聞若金姬傳者蓋海虞前憲副五川楊先生著也予嘗數過姬墓一坵穹然於水溪聞其爲借國之遺不知其事始若是方張氏自淮南渡江以窺吳貉突鯨吞其弟寔將有徒常熟於是首受兵疆守弛備遂至不支而楊氏能以其家力與寇鏖戰雖不克濟豈非一時之雄乎張氏旣宅吳假王稱兵賓賢才謀纓組尙禮樂誦說太平以文其治士如饒介之蘇昌齡陳敬初陳汝言輩言議信合

金姬小傳

金姬。姓李氏。名金兒。濟南章邱人。李素女也。五世祖嘉謨。僞齊劉豫時。以四郡強壯應募。爲雲從親衛子弟。豫愛其年少精敏。又自言與李儔侍郎通譜。時儔亦受僞齊官。因納爲壻。將加爵都尉。嘉謨堅辭不拜。然能謙恭下士。排難解紛。以全善類。人多德之。豫敗。故得免禍。歸田里。爲富翁。宋亡。其孫以鄉役部發歲運至元都。嘗夜對月悲歌。聞鄰婦有倚樓而泣者。明日訪之。則宋舊宮人金德淑也。因過語。德淑本杭人心。懷故土。欲以身託南行。遂與通。生一子。名都生。竟留都下。父死。都生從母爲金姓。不復與章邱之族相聞。及長。娶大都女子。復生一女。都生亦早亡。家貧甚。偶章邱有李生至。欲求爲妾。謀之媒氏。卽以都生女應之。李見生以百金酬聘。眷戀不復思歸。居數年。亦生一女。名金兒。卽姬也。明敏妙麗。世罕其匹。日誦古今經史及仙佛百家之書。父得張明遠之傳。精於醫卜。悉以其術授之。遂元妙。言人禍福皆響應。父自謂不能及也。元室政亂。民窮。李生將携家還山東。兵阻從間出。羈離旅寓盱眙縣。夏暑。金氏嘗裸體納涼。李

生見其肘下有黑痣。大如五銖。生曰。吾肘亦有一黑痣。形甚似。豈天以形類作合乎。抑亦同苗裔耶。因各言家世。妾曰。吾先父章邱士人之子。本亦姓李。父早喪。從母姓爲金。聞先大父有遺文可驗也。出書示之。備載族屬姓李。生名亦在焉。生卽素都。生卽李生祖孫婦子。孫婦謂金德淑妾固生從女弟也。相顧慚恨。不能自存。金兒聞之。剪髮自誓。願爲尼。以贖骨肉之恥。自是以兄妹別處。求歸愈切。時至正十四年甲午。張士誠僞稱周誠王。六月己酉。兵陷泗州。李生一家悉被游兵所掠。金兒時年未及笄。分配太妃曹氏帳中爲侍兒。曹氏頗賢智。偶問及其鄉里。金兒具陳始末。又言自幼祝髮爲尼。頗知經典。醫卜雜藝。是歲十月朔。士誠因避苗軍之鋒。自揚州退保高郵。元右丞相脫脫統兵十萬圍其城。用部將董搏霄之言。分兵復其侵地。天長六合等城。高郵危急。曹氏命金兒卜之。得无妄之小過。執策進曰。天下雷行。剛自外來。而爲主於內。其占利正而獲大亨。說者謂首顛顛。趾延延。剛以正之。畏以齊之。乃可得順而合道。變體以柔得中。下拂上悸。趾趨爪墜。故必畏以省同政。奮威以懲小人。乃可對時育物以當天命。

也。然其繇曰伊尹智士。去桀耕野。執順以終。天祐無咎。主公今方改元。天祐顯著。卜詞事同圖讖。取威定霸。決於此矣。旣而脫脫兵日集。勢號百萬。遂墜其城。士誠危蹙。計將背城死戰。曹氏復命卜之。得需之坎。金兒曰。雖需於泥。其利用恒。能敬慎則不敗也。又以立準之曰。奕之初一。赤卉方銳。利進以退。其測曰。赤卉方銳。退以動也。蓋陽能剛。能柔。能作。能休。見難而縮。家性爲奕。雖勿肆。終無怫愼。毋妄動也。更二夕。時當冬。忽聞雷發城中。金兒夜起賀曰。明日可出師戰矣。遂登樓仰觀良久。天將曙。趨告曹氏曰。龍文虎氣。悉見我營上。時不可失。請急擊之。曹氏卽以告士誠。俄而謀者緣城至。言元主有詔。削奪脫脫官爵。四更時。親衛鉄甲軍聞報。皆喪氣散去矣。士誠乘隙開門縱擊之。大敗元兵。軍勢復振。由是帳中悉以金兒言驗。稱爲姑姑。曹氏益寵愛。父母皆留幕下。盖自被錄以後。雖不復髡緇而脩持如故。明年乙未。江陰大盜朱英。江宗三自相讐殺。英不能勝。過江求援於士誠。疑爲元兵說客。按劍臨之。辭拒不許。自夏徂秋。往復數四。英乃盛陳江南饒富。玉帛子女冠於海內。且曰。妻子皆在軍門。願以爲質。

士誠夜入帳中。言於其妻劉氏。遂聞於其姑。同召金兒問之。對曰。伯王之相。自與凡流不類。昨從太夫人帳後。窺見主公顏色。似得之天成。妾見太陰累犯壘壁軒轅。又見太白。自五月至九月。累經天晝。見入犯太微。光掃天梁。其應在吳。江南之禍。必不能免。曹氏強之卜。乃請扶乩。占之曰。天遣覽兵殺不平。世人能有幾人平。待看日月雙平照。殺盡不平方太平。明日事聞於士誠。時士誠改歷明時大喜。以爲日月雙照之符。遂定計過江。先遣其弟士德選高郵兵三千人。以英爲嚮導。擊橫柵以渡。至福山時。已逼歲除。英曰。兵貴神速。常熟守臣雖已知我渡江。今當除夕。官民且耽慶節。醉飽。未必有備。乘間卽趨之。可卽破也。夜半兵至九浙港。士德尙疑之。乃遣李伯昇將高郵兵千人。統率朱英兵直趨城中。而自將大軍。以英子清爲嚮導。從虞山南入。約明日合兵縣治。其寔欲以英嘗敵也。先是蜀人楊椿字子壽來吳。自言裔出關西。爲宋少師楊棟之嗣。與楊文靖公五世祖汝江爲近族。因隱居虞山。買田結廬於湖村。又立家廟。與文靖子孫之居邑中者相爲倫次。遂土著。椿爲人尙氣節。好文章。鎮帥脫寅知其賢。

召爲館客。既又署爲參謀。留居郡中。至是聞士誠聲言南渡。脫寅恐常熟失守。先遣椿將兵二千至縣。相機調兵。至則與縣魯達花赤議論不合。椿歎曰。我本邑人。爲元帥守禦。而守臣謀不合。事何由濟。頃之聞士誠曰。渡江。乃移兵伏虞山北麓興福寺中。計士德必從福山塘直入。將伺其兵半渡要擊之。及士德分兵南行。椿夜聞報。率將士越維摩嶺。逕趨湖橋。伏於其家園圃及林木中。以伺。十六年正月朔。士德將至墅橋。朱清曰。此去湖橋數里耳。過此則湖山相逼。林木繁茂。不可不爲之備。士德乃遣其將韓謙錢輔將兵前行。至湖橋。椿從其家廟中鼓譟而出。伏兵盡集。謙輔兵出不意。不戰而走。椿追至小山頭。士德聞變。疾趨之。潰卒望見士德旂幟。反兵奮擊。一以當十。椿見勢不敵。且戰且却。循山而南。復湖橋。整旂肅隊。堅壁以待。士德仰戰不能勝。三被流矢所中。方自危懼。時伯昇兵已入城。官民棄城走。不血刃而下。遂遣朱英將其步卒從虞山頂來迎。英望見兩軍相持。疾馳下攻之。椿遂敗。然猶殺傷及蹂躪死者各千餘人。血流遍野。椿僅以身免。遁入郡中。士德既據常熟。復用維揚人蘇昌齡計。二月壬

子朔。士德兵抵齊門。附城而入。脫寅告急於椿。椿曰。士德兵已入城。吾聞巷戰將勇者勝。請以身當大敵。乃自率梟銳直赴士德搏鬥。自辰至晡。士德身被數創。輔謙持短兵接戰。亦皆重傷。忽屋瓦飛墮。馬士德持鎗突前刺椿。洞其胸。椿死罵不絕口。脫寅方與伯昇戰於婁門。聞椿死。亦敗走匿叢篠中。亂兵殺之。蘇州遂下。士德據承寺爲王室立省院。六部百司之職。皆以部將及所親愛者布列。改平江路爲隆平府。以鍛工周仁爲太守。悉以郡中院寺及豪府第宅分給居之。捷至高郵。士德以蘇昌齡爲弘文館學士。遣齋書來迎士誠。以是月二十五日發高郵至通州。期以三月三日渡江。仍由福山入。服御器用。皆假乘輿。三月朔。奉其母登狼山。觀長江之險。心憚之。設齋祈福。曹氏謂士誠曰。舟中有金姑姑。智算神妙。非塵世間物也。試與議之。如何。士誠曰。我每用其占。皆奇驗。軍旅事多。未暇見耳。趣使召之。金兒青衣跣足。垂涕而出。衆皆駭愕。曹氏大訴。侍從令易衣。金兒収淚徐對曰。妾本俘獲子女。罪當萬死。初見主公。安敢粧飾。取便。一時愁眉怨語。體兒不端。士誠譏立忘言。注目諦視。唯唯再三。遣去。頃之。易

常服出拜。士誠曰。汝事太夫人已久。劉夫人每言汝堪策定數。灼龜觀兆。變化無窮。然占有數宗。汝得其幾。金兒曰。占有定。天人宗太乙宗五行堪輿宗建除宗叢辰宗歷宗。妾皆究之。惟象緯著龜之占。乃出聖賢正論。故古之卜者。掃除設座。正其衣冠起居。自誓以當鄉人。顏色嚴正。以對懈婦。法天地象四時。順於仁義。分策定卦。按式正基。然后言天地之利害。人事之成敗。此天下之重事。不敢不以敬也。後世之卜。齊楚異語。瓦玉異用。而其人又多誇浮虛矯。居卑行污。何足與論卜哉。夫卜而不審。不見奪糶。音所爲人主計而不審。身無所處。故古之聖王建國受命。未嘗不寶卜筮以助善。越王勾踐倣文王八卦占體辭象。用范蠡文種爲謀臣。而推遠西子。故能破敵國而霸天下。桀紂之時。與天爭功。壅遏鬼神。使不得通。又用趙梁左疆爲謀臣。寵姐已妹喜。以爲內嬖。卒使蔽其耳目。以亡其國。此皆經史所著也。士誠曰。蘇州雖已新服。地方百里。四面皆非吾有。元末革命。人心反側。將奈之何。金兒對曰。軍國大事。非兒女子之所知。今蒙主公再生之恩。老夫人解衣推食之愛。不敢不言。妾聞創業開基。與守成之主不

同。非仁與義。無以收四海之望。非才與知。無以服英雄之心。天下神器也。可以智取而不可以力爭。可以群策謀而不可與羣才斷。是故君德莫善於運乾剛之斷。莫不善於任匹夫之勇。守成且然。而況創業之君乎。今以天時人事占之。江南政乖民困。徵賦煩劇。威力迫脅。萬姓離心久矣。主公以江淮先聲。士卒効命。乘破竹之勢。南定嘉湖。北撫淮泗。鼎足千里。角立羣雄。不過一投鞭之勞耳。然聞江南捷至。而子女玉帛。盡入私門。府署官爵。已皆濫給。損舉義伐暴之名。失履世賞功之柄。政教號令。非出一門。入吳之後。方將爲國家深慮耳。時金兒初見士誠。察其意有所屬。每荅問。輒高其論以動之。盛陳綱紀約束其邪思。士誠果端然改容。致席召前。謂曰。吾聞古之聖人。不居朝廷。必居卜筮之中。誠如太夫人言。汝眞天人也。安得沉埋在此。且勿他言。但今江波浩渺。天險爲限。又聞江中沙洲盤繞。舟師皆新集。鄉民未能盡悉。汝爲我卜之。得蠱之剝。詞曰。羊腸九縈。相推稍前。止須王孫。乃得上天。對山江中風浪雖險。當自有降人相助。姑伺之。俄頃而福山富人曹氏聞士誠將渡。先已脅於士德之威。恐禍及家門。

遂發江舡百艘。殺牛醺酒。犒士誠之師。士誠初以癸巳歲起兵。後用是月十二日癸巳入吳。欲知國祚脩短。自起焚香再拜祝蓍卜之。得中孚之晉。金兒進曰。中孚陰陽變動。六位周而反。及游魂之卦。互體見民止於信義。辛未土以壬午水火用事。與乾爲飛伏。晉陰陽反覆。進退不居。精粹氣鈍。是爲游魂。己酉金用丙戌火土用事。與民爲飛伏。詞曰。日月運行。一寒一暑。榮光赫赫。創業大數。俟天運一周。乃決國祚靈長。當與日月並明矣。士誠喜謂金兒曰。帷幄運籌。多汝之功。伺戎事稍暇。當行冊賞。今卽渡江矣。聞汝能詩。有詩以作士氣乎。命將校收庭中列幟。置金兒前。立綴詩其上。曰。萬隊旌旗臨北斗。連江笳鼓動雄風。君王自欲觀朝日。驅石行看到海東。舟遂發。蔽江而南。金兒父母舟中乘間私問曰。主公以國祚卜。終當何如。金兒曰。中孚之卦。準立之中。其體最尊。其象則混沌旁薄。正天作主。而必待思貞當位。乃受其福。至於陰陽神戰。覆常是虞。巔靈之反。或難免也。故先賢命繇。旣贊其榮光赫赫矣。又言不得保巔躓隕墜。更爲士伍。其意可見。父曰。然則汝告主公日月運行。一寒一暑。榮光赫赫。似謂國祚

靈長者何居。金兒曰。一寒一暑。大運周也。歷以十二辰爲一紀。自今起丙申後十二年爲丁未。別有真人當其榮光者矣。但我時命已促。他日當自驗之。其父驚曰。吾本窮途羈旅。俘獲餘生。賴汝天賦敏質。乘時遭際。今江南已下。鼎足勢成。定策帷幄之勳。當首及汝。同享富貴。無異邱子明之遇武帝。何自出不祥之言。若此。金兒對曰。傳有之矣。美好佳麗。爲衆人患。故騏驥不能與驪驢爲駟。鳳凰不能與燕雀爲羣。而賢者亦不與不肖同列。且強得者必暴亡。強取者必無功。吾不願臣妾末流也。士誠旣至福山。曹氏迎致其家。獻金帛米穀。各以鉅萬計。珠玉錦繡數千器。及暮將士縱掠。積貨一夕而空。僅免屠戮而已。時以巨舟重載。恐塘水淺澁。復發人濬治。乘潮平壅。絕江口。又收曹氏所蓄竹木。每數里爲一牖。舟至發之。命其將徐志堅督守巡察。故所駕龍舟戰艦。大或萬斛。小或數百石。江河畧無阻滯。至九浙港。蘇昌齡曰。入郡必由縣治。河狹不能容舟。莫若仍回道以行。士誠從之。是爲三月十日。時和景明。自福山以達郡城。士馬騰躍。甲仗鮮華。壅塞兩岸。將二百里。旌旂鼙鼓。振撼天地。士誠黃屋左毒。舉帷顧

盼意滿志驕。追憶金兒之占驗。使人召見。初金兒見士誠於狼山。屬軍旅急遽。危疑未安。又爲金兒危言所恐。散畏之。未敢他有所冀。及金兒入舟。發容明麗。進止端莊。帷幄侍御。人人自失。不覺心動。紿之曰。我有所求。汝試卜之。意欲金兒自爲卜吉也。卦成得大畜之觀。進曰。卜詞不協。不敢以告。士誠曰。試舉其詞。金兒不肯荅。士誠強之。乃以繇進曰。三蛆逐蠅。陷墮釜中。灌沸淪殪。與女長訣。士誠曰。吾聞神龜知吉凶。而首直空櫓。卜可盡信哉。自起取桃花簪其鬢。笑曰。此爲聘。金兒曰。吾卜處吉凶。別然否。多中於人。昔獻公貪驪姬之色。卜而兆有口象。其禍竟流五世。主公方受命爲王。豈忍以妾爲驪姬乎。士誠不從。盡出所得曹氏珠翠錦繡賜之。而命參軍王敬去撰冊金姬詞。且俟他日加妃號。位次劉氏。金兒苦辭不得。忽輕翠已覆體矣。知不能免。乃曰。妾受老夫人厚恩。不可不先往謝之。士誠曰。此固當然。卽命謹厚女士數人從之。至曹氏舟。屏去盛粧。復其常服。進拜具陳。曹氏曰。汝天賦敏妙。分所當得。不必辭也。又拜劉。劉語亦如之。又召其父母所親。各敘訖。忽就舟中啓其故篋。出香焚之。向天列拜長跪。

私祝環視者皆無所聞。莫測其意。須臾閉目。奄然無語。父母驚赴。急趨呼之。已絕息矣。士誠倉皇至。執其手。哀慟不已。求良材爲棺。不可。或曰。曹氏牖木皆榿楠。油杉可用也。卽出諸水中。架空熬沸。油灌其頂。水下出如注。俄棺成。悉以所賜珠玉從葬。築坎道旁。土旣寔。乃行。舟次湖橋。昌齡指陳士德戰地。士誠停駐觀之。見陣亡將士屍骨橫籍。積如邱壘。心恨椿。又見椿舊宅祠宇尙存。卽命守將盡撤之。徙建金姬墓道。其園圃中嘉樹珍草。悉令乘時移種。又發曹氏園亭益之。由是數日之間。花木品列。臺榭參差。老柏喬松。交蔽內外。繁華盛觀。雖出一時。而棟宇花石。皆成舊林。儼然一古寺古宅也。又藉楊椿產業以給姬親黨。從行者使留守姬墓。將俟成大業後。別爲陵寢。徙之。未幾拜其父素爲隆平府丞。時有陰陽術人李行素爲丞相或卽其人姬母封夫人。與素別縣而處。避兄妹之嫌也。其親黨皆得出入士誠府中。二十六年。士誠謀取江陰。久未得逞。因惑金姬之言。加封護國定仙妃。饒介之撰文。周伯奇書篆。刻石神道。國初張羽所撰之七姬權厝志並銘祠而卜之其夜劉氏夢姬對劉泣曰。國家舉事大錯。天意已不在主公。若不早脩德以塞天

謹來歲此時難爲計矣。他日又夢姬撫士誠二子曰。妾受夫人恩。有不測。當相庇。劉氏私心憂懼。秘不敢言。預召姬母厚撫之。賞賚日多。人莫知其故。明年天兵下蘇州。士誠兵敗。城將陷。劉氏以二子付姬母。及二乳母各給銀三斤。且曰。非不能多也。但汝不可過取。多則反爲吾兒累矣。城破。姬母匿兒民家舍。月餘。嚴稍解。乘間馳至湖村。視姬墓。則已成邱墟矣。其同時親黨尙多竄伏山中。漸相聚。言陸將軍從江陰來。亂兵發姬墓。屍已脫去。棺中惟衣衾在焉。塋姬時事起倉卒。士誠先以珠寶金銀盡埋土中。其母獨識其處。乃就廢穴旁。又發土數尺。悉存無失者。母盡取之。復自福山渡江還章邱。二子長。遂冒李姓。亦不復知有張也。洪武之末。其季領山東鄉薦。將赴都下。母戒之曰。京師平字街南官房口。有一盲母。年八十餘矣。汝可密訪之。勿令人知。寄言我猶無恙。急歸報我知也。兒奉母教以行。至京。拜戶部主事。訪得之。夜入其家。姆盲不能視。隔屏問曰。客從何來。乃夜入此。兒荅曰。我章邱李氏子。吾母金夫人寄聲問起居耳。姆遽起。捫其面。連披二掌。曰。何物小子。聲之似我弟也。國亡幸留此孽。敢不畏死來。

此耶可速還家。竟卽推出。閉其戶。蓋姆卽士誠姊。得赦不死。當時預聞託孤者也。明日兒稱疾還鄉里。其子孫至今編籍章邱云。

附記

題盱眙客舍金兒初渡淮作

馬足燕山雪。船頭泗水雲。客身和雁影。飄泊過孤村。

常熟縣志曰金鷄墩在縣治西北二十五里。世傳張士誠渡江妃死。權厝於此。訛姬爲雞。因有妄言下有金寶。其氣化爲鷄。夜鳴其上。

金姬傳別記

李嘉謨不拜僞齊官

李嘉謨世爲章邱農家。劉豫初僭位。外節儉而內淫。佚人多獻妻女姊妹以求官。習以成風。又禁偶語。喜倍克士。豫妾至百七十人。子麟妾百二十人。嘉謨父懼禍。見其子年少精敏。玉肌瑩白。遂命以四郡強壯應募。雲從親衛。時麟駐軍魏博。投謁靈岩山谷間。冒雨出雲樹中。軍從皆竦立而觀。及拜麟馬前。辭旨清辨。了無懼色。拭雨而退。色愈明潔。精彩射人。一時軍門呼爲雲中仙子。麟遂留幕下。稱帳中小李。月餘。豫見問之。自言與李疇侍郎通譜。儔亦受僞齊官。豫妾錢氏有女玉英。豫所鍾愛。因納爲壻。常與麟並馬出入。寵幸無比。豫欲加爵都尉。嘉謨堅辭不拜。錢氏強之。嘉謨泣曰。我本章邱小民。一旦際風雲。身極富貴。文不知筆硯。武不識干戈。寵冠三軍。富當萬戶。何德以堪之。玉英曰。父母爲帝后。女爲宮主。都尉之職。古今通典。君才貌廻出流輩。雖欲辭之。恐不能免。嘉謨引妻至屏後。語曰。吾非不知都尉之榮。然視汝父母兄弟。皆無遠謀。昨聞遣劉

從善爲河南浪沙官。意在發掘宋室陵寢。吾苦諫不從。且虐害小民。斬戮忠義。敗亡可待也。吾與汝身尙不知何託。况敢思高位以自速夷滅乎。妻曰。今將奈何。曰。吾意待汝生子後受爵。汝當從中勸止之。再俟別圖。或可免禍也。由是竟不拜官。然能謙恭下士。排難解紛。以全善類。每獨出。則儒衣緩帶。從僕不過三四人。恂恂如書生。路人不知其爲貴冑也。及豫敗。與其妻逃入荊湘。泛舟爲商。竟得免禍。初玉英恃父母之愛。所得金寶鉅萬。悉遣親僕以漸運送章邱藏之地中。後金以李儔改汴京同知副留守。嘉謨始歸。遂成富家翁。

楊椿死節靈異

楊椿既死。士德棄其屍水中。椿婦王携其子往求不得。躡踴號泣於戰地。明日巡掠將士遇之。遮道扣馬哭且罵。將士欲兵之。知爲椿妻子。執送士德。不屈。蘇昌齡爲椿友善。謂士德曰。公方開國定基。與江北時不同。不可不以節義風厲其下。椿既死義。其妻復犯嚴不遜。是妻不失烈婦。子不失孝子。宜以義宥之。士德怒解。昌齡使人扶歸其家。王氏病甚。席地假寐。夢椿謂曰。我尸在張香橋。急

收之。妻扶創往。則尸當流倚橋而立。得以禮歛葬虎丘。復神附王曰。虜乘我墮馬殺我。已得請上帝。不一年當復吾冤。然吾不願妻子陷虜。後五日來取同往矣。時子穎年十五。女滿年九歲。皆無疾。與王氏如期一日並死。明年三月。士德兵援常熟。果亦墮馬爲虎所擒死。

卷三

三

集

滇黔土司婚禮記

江陰陳鼎定九著

滇黔龍土司本鷲氏也。於周爲漢上諸姬。左氏傳所載羅人鷲人是也。楚滅宋。蔡羅鷲四國俘其宗室。放之南徼。遂成苗彝。今滇黔之間。有宋家蔡家羅家龍家之苗。卽其裔也。四家之冠裳服飾。冠婚喪祭。一秉周禮。以十一月建子爲歲首。婚姻重媒妁。備六禮。然後成。鷲氏于三國時。伯仲從諸葛武侯。平南蠻有功。兄王于滇東爲龍氏。弟王于滇南爲鳳氏。一去鳥爲龍。一增几爲鳳。世爲諸苗之長。蓋與黔西安氏火濟同受爵于蜀漢者也。故至今第宅仍王家規模焉。四家世爲姻好。嫁嫡長女爲嫡長婦。必一媵八人。古諸侯一娶九女之遺意也。然所媵或養同姓。或選良家。或庶產。嫡女則不能矣。中國士大夫嫡長子娶四家長官嫡長女亦然。王臣加于諸侯也。常人則否。長官女亦斬與常人。其宗族則勿論矣。余幼以文字見知。宣慰父子以嫡長女許字。問名拜允。納采下聘。以及親迎奠雁。一遵周禮。余飄流異域。一貧如洗。安能備禮。皆內父母資之而後行。

也。內父母以余爲士也。不可以筆門圭竇而成大禮。乃爲治第于宣慰府西之里許。卽蜀漢阜東柘察第故址也。柘察者。苗語也。峒主呼壻爲柘察。呼女爲以納。卽漢語郡馬郡主之稱也。龍氏旣封王。其壻阜東母拜司隸副尉。曾列第于此。時以材武從武侯入蜀。官侍中。舉家遷焉。第遂廢。故卽其址而堂構也。四旁瓦草房數千楹。皆其族屬及僮僕所居。俱刀耕火種爲業。其俗淳龐。大有三代遺風焉。第輕殺重姦罪。犯者男女皆斬。卽親子弟毋赦。其所屬部落有作奸犯科。斃盡劫殺漢人者。長官卽率衆掩而斬之。俘其子女以歸。若申請上司。動輒累歲月。彼奸苗卽擁衆叛。不可制矣。蓋不可治以鞭朴之刑。而威以斬殺之罪。辟庶乎得以久安長治也。所治第凡三十層。中十層。層各五楹。有頭門儀門大堂二堂三堂。皆平屋。其後卽書樓粧樓藏樓繡樓護樓。層各有廂。廂各二楹。三堂之後。左右各五層。皆樓。樓各三楹。廂各二楹。左右各分貯四媵。媵各侍女四人。老嫗一人。虛左後一層爲內廁。右後一層爲內庖。三堂之前。左右亦各五層。層三楹。廂二楹。皆平屋。左則二層爲外庖。庖前兩層居僮僕。一層養驃馬。右則

二層爲外書房。以待賓客。前兩層居僮僕。一層奉香火。蓋室西南隅。奧是也。三堂之外。卽宅門。常扁鑰匙交宣慰府。欲啓發。牌付司閤者。馳取之。旁闢一竇。深咫有半。置輓轆。所以進飲食者也。左右有巷。中絕別內外。內置銅缸。可容十石。以剗竹穿牆。引山澗水注之。分流各院。以應用。護樓後有隙地。可五六畝。半種筍。鑿池畜水。以供浣濯。半爲曬曝地。周以大石。牆高數仞。牆外丈餘。卽巉巖峭壁。轟漢高山矣。其材木皆采于海南。大都鉄梨檀栢之屬。地墁鉛磚。夏不發潮。冬不作冷。屋成費不貲矣。蓋土司于前朝盛時。多產五金珍寶。最稱豐富。所謂時逢至治。天不吝瑞。地不愛寶也。及其季年。諸貨絕產。而民困矣。余值其已衰。猶得叨其餘光。况全盛乎。去其居三十里。過峻嶺。卽有水道。可達南海。通交趾。西南諸國。故所用器皿。多紫檀花梨。焚皆沉速安息之類。女子尙短衣。衣齊腰長裙。裙百折。或二百折。富者穿五重。貧者亦兩三重。男子亦然。其衷衣及襯。冬夏皆紵。處女夜臥。不脫不沐。臨嫁方沐。旣嫁日一沐。沐畢。塗以蘇合油。貧者塗以羊膏。故膚如凝脂也。其衷衣與襯相接。皆聯金扣。以百數。襯口與羅襪相接。

亦密以扣扣皆圓而扁者。貧家以鉛錫爲之。合巹之夕。始解。既定情。復起穿如故。生子然後去。惟仲家牯羊。苗黃毛。犵獠白獐。獐黑獐。獐五種。苗以跳月爲婚者。皆不襯。跳月爲婚者。元夕立標于野。大會男女。男吹蘆笙于前。女振金鐸于後。盤旋跳舞。各有行列。謳歌互答。有洽于心。卽奔之。越日送歸母家。然後遣媒。妁請聘價焉。旣成。則男就于女。必生子然後歸夫家。周禮暮春之月。大會男女。過時者奔之。勿禁。不及時者勿許。今此五苗。無論過時與不及時者皆奔。殆其流弊歟。長官家女有縛足者。民間多不縛。便于工作也。其縛也甚易。山中有草曰威靈仙者。取其根汁煎濯之。不數日而步步金蓮矣。苗種類甚多。而習俗各異。婚禮亦不同。惟宋蔡羅龍鳳五姓得其正。其條節甚繁。不用樂。三月廟見。方作樂。大會親戚。新郎君見長者。用斑竹箸。雉羽扇爲贊。長者贈以硃砂石。青牛馬犬豕。新婦見尊者。用棗栗榛松爲贊。尊者贈以峒巾。苗錦金寶簪耳。此四姓五家古例也。余娶時。雜行漢禮。用樂器。兼苗中銅鼓。親迎絳紗燈百對。後炬百燎。火爆以千計。綵輿藍蓋。用先人儀仗爲前導。羊一牛一豕一犬一。皆塗以彩。

酒二甕。錢百緡。犒司閹。其執事人皆役所屬諸苗。抵府。奏樂者七。發炮者七。開門。外舅公服趨立阼階。爾雅妻之父爲外舅。揖壻及賓相入。賓相皆庠中知名士。閑于禮者也。具巾衫頂帶以從事。壻與相者從右入。再拜堂下。相者引壻升堂。布席南向。請外舅坐。外舅辭焉。壻入拜。外舅受四荅。壻下堂。奉雁幣陳上奠之。再拜畢。壻與相者東向坐。外舅北向坐。進桂子湯者三。鞠躬者六。相者引壻入後堂。發炮者三。奏樂垂簾。相者凡三誦詞請外姑。妻之母爲外姑。少頃。外姑率媵出坐簾內。壻入拜于簾外。亦受四荅。卽命坐簾外。進梅花湯者三。飲畢。簾內一緋衣老嫗出以軟紅羅丈許束壻腰。牽入簾內。相者不得入。外姑引入三堂。再拜訖。又遍拜諸媵。母母皆跪荅。引壻南向坐。外姑西向坐。諸媵母皆退外姑一等坐。進玫瑰湯者三。畢。又進棗栗蓮子湯者三。每進湯必再鞠躬。畢起再拜謝。外姑出贈金玉盃各一對。金象箸廿雙。金銀鎖帟衍圈各一對。金二條。銀二綻。命緋衣媼送出大堂。坐席演劇。飲三爵。徹席更衣。上攢盤。又飲三爵。起復衣公服。相者引至堂下。再拜謝。外舅乃出。緞紗綾羅各十二束。黃

金十二錠。玉碗二隻。古爐二座爲贈。壻再拜謝。引壻從後堂。歷三堂。由書樓至粧樓。凡門相者必唱禮再拜。謂之拜門。將見其女。故重其門而勞壻也。吁。有苗氏可謂愚矣。夫拜門。豈見門而拜之謂耶。門何知而拜之乎。相者出。外舅引壻見外姑。又兩揖兩拜。諸媵母亦兩揖兩拜。乃引壻中堂北向立。奏苗女樂。數十小婢。衣緋。擊諸葛銅鼓。震天盤旋環繞于庭中。謳苗歌。抑揚宛轉。如鶯啼芳樹焉。俄而衣緋媼以朱絲一縷。繫壻左臂。引絲入室。繫女左臂。牽出女以錦蒙首。與壻並立。拜其祖宗神位。凡八拜畢。夫婦交拜。次拜外舅姑。凡八拜。命坐。外舅姑北向。諸媵母皆侍立。壻與女東向並坐。緋衣媼揭女綉蓋以面示壻。諸媵母俱作苗語。嘖嘖頌女。若曰。吾女不辱壻也。送粉團湯同牢。壻與女皆侍女。引匙進食畢。外舅引壻出。女送壻出粧樓。至書樓中堂止。緋衣媼解壻左臂。絲引女還。緋衣媼者。女儂相也。已而呼相者入。苗更錦衣舞蹈。擊銅鼓。謳苗詞。請新人登車。引車入。舉家涕泣以送。媵母擁女登車。諸媵女皆涕泣。就車內擊銅鼓吹蘆笙送之。樂奏天鵝聲。外發炮。開中門。外舅送壻至堂下。鞠躬者三。上馬奏樂。

馳歸第。少頃。鸞車至。諸女親於大門外。設香案。焚楮帛。送家神。迎入書樓。相者誦詞三。請新婦。緋衣媼持鑰啟門。引新婦左臂朱絲付新郎君。牽新婦下車。侍女扶諸媵出。共簇新婦歸臥房。相者立中堂唱禮。夫婦交拜。諸媵皆隨新婦後行禮。不坐牀。席地而坐。飲交盃。諸媵皆雁行列坐。新郎君新婦各一飲。推遞諸媵。飲畢。相者擊銅鼓歌喜詞。撒紅豆。爲祝多男。奏樂畢。相者請新郎君安諸媵室。乃與諸媵皆出。緋衣媼卽合房門。爲新婦更衣。履進香湯。凡三沐焉。相者引新郎君先從右奏樂安室。其俗尙右。故先右。侍女扶媵者參新郎君。新郎君坐受二拜。荅二拜。老媼進媵者酒。手奉新郎君。飲半。媵者接。跪飲畢。起。鞠躬者四。侍女扶入幃中。相者復引新郎君安第二室。亦如之。西四畢。至東四。俱如右。相者引新郎君還正室。更衣畢。相者出。新婦出迎。鞠躬者四。新郎君荅以四揖。相携入綉幃。諸媵者新沐畢。更衣俱來幃中。亦鞠躬者四。新郎君新婦荅禮畢。告辭。各歸房。訖。雞初鳴。諸媵俱櫛沐至新房。遞茶道喜。候新婦粧畢。偕新郎君於姑寢門外。遞茶。姑受茶不接見。令婢辭焉。新郎君新婦率諸媵於寢門外。再

拜而退。新郎君卽公服策馬詣外舅府謝。先於大堂拜外舅畢。入後堂拜外姑。留飲。陪者皆其娣姒。姑姊之屬。以百數。俱各再拜。飲畢。歸。日暮。新郎君新婦率諸媵遞酒核。姑亦辭焉。如前行禮而反。如是者五日。第六日。張樂設席於後堂。新郎君新婦先拜天地。次祠家神。次祀灶。次拜姑。次女親。次小姑。諸媵者俱隨新婦後行禮。南向一席坐新婦。東向八席坐媵者。西向四席坐諸女親。西北向一席。則姑小姑主焉。姑遞杯箸。新婦跪辭。小姑代行禮畢。新婦跪遞姑盃箸。次女親。次小姑。飲三爵。徹席。更衣。再飲三爵。新婦率媵下堂拜謝訖。隨姑入堂。爲姑進幃帳衾枕衣服首飾。奉沃盥。候姑寢。乃率諸媵退。自是每雞初鳴。必起櫛沐。率諸媵至姑寢門。如未醒。卽默候。旣醒。卽呼內侍女啟門入。爲姑着衣履櫛沐。進早膳訖。乃退。中亦率媵奉飯。每日以一媵侍其役。日暮。爲姑滌溺器。整衾枕。候寢。然後退。日日如是。如疾病。必令媼請假。俾諸媵奉事如前。三月。請設三代祖宗神主。夫婦率媵謁焉。盛設酒筵。大堂會男。後堂會女。夫婦執贄。遍拜長者。各受貽贈而成婦焉。余幼時。胆最怯。常聞舅氏錢伯可先生曰。苗俗淫亂。

惟蔡宋羅龍鳳五家風氣最正。卽親子弟。奸僮僕婦女。必殺不宥。余悚然。于是每遇苗女艷者。皆不敢仰視。及僥倖後。入見座師大主考。閻公問曰。尊庚幾何矣。余對曰。十六歲。副主考沈公問曰。曾有姻事否。余卽頸面發赤。不能荅一辭。同年友項汪蕙代答曰。想猶未爾。沈公曰。尙赧顏耶。閻公曰。如未聘。到京聯捷。吾爲子卽柯。余益羞赧。不能對。及合巹時。一由儐相主持。唱揖卽揖。唱拜執拜。安諸媵室。以爲皆送親來之女。我有主道。故相者令我安之也。至于媵者奉酒。直以爲內家之人。敬我新郎君耳。自後日見其同婦侍姑。稍稍悟其爲侍妾。又見其與婦同居。若非卑賤之流。見余輒侍立。並不敢抗坐。夫婦又言語不通。婦固識漢語而不能講。雖解余言而余不解其言也。故無可問處。竟不識其何等。人總由處于萬山之中。孤陋寡聞。別無交游知心同輩。爲我談其風俗。又在家日少。總不解其語言。止有一慈母之舅。又老成持重。亦難以褻語與甥言。家慈平日極嚴。又不敢問。亦難於啟齒。且家慈亦不解苗語。故無從以教予也。一表妹卽慈母舅所出。年雖幼。最聰穎。然以異姓故。見余輒匿影。踽踽涼涼。甚可

悲也。且心又畏舅氏親子弟必殺之言。故平日見諸媵者。皆以賓客待之。不敢或狎也。初外姑月一至。三月之後。月兩三至。或四五至。至輒熟視女眉目及婿眉目。時與室老作密語。我又不解其所語何事。揣其意若婿與女未嘗定情者。又時時密問女。女輒融然面赤。俯首不答。固問固不答。彼輒頓足而去。我見之。煩悶欲絕。家慈亦訝之。詰予故。予以不解。家慈煩懣抑鬱。惟吁嗟而已。他日又來密問女。見女不對。輒垂涕。女不得已。乃附其母耳語數語。彼輒翻然喜悅。撫予肩背者再而去。曩外姑數與室老密語。妹侍家慈常陪從。盡聞之時。妹在苗中兩載餘。盡解苗語。知其所語。故及家慈見外姑。屢形不豫之色。心甚憂之。妹告母曰。母憂也。無他事耳。我知之矣。又不告母所以然。蓋難於言也。而母憂疑益深。余益不安。及半載後。夫婦言語相通矣。我能解苗語。內子及諸媵妾皆學於家慈。略通漢書。能漢語矣。因問內子曩者尊慈密語。頓足垂涕者何耶。內子告以故。果不出予所揣也。室老者老年寡居有德之婦。亦龍氏宗人也。聘來掌一室之事。舉室聽其指揮。善報文。室中皆登焚薄以焚內父母者也。爲人極

端嚴。內子及諸媵并侍女。稍不合。輒罵詈。輕則揮掌。重則提以杖。見之無不胆落。忽一夕。外姑携酒筵來。大張花燭。于下房盛設幃幔衾枕。令媵者蘭。彷彿嚴粧。出拜家慈。再拜余夫婦。及室老諸人。然後拜外姑。各奉酒三爵畢。歸下房。日暮。外姑去。家慈亦入。內子携雙燭。引余寢下房。余曰。何爲者。內子曰。寒門家教。凡女子適人。半載不孕。卽令媵妾入值。冀早生子。今妾空侍巾櫛六閱月矣。蘭姊長。當首入侍。故家慈送花燭來耳。且男子結褵。敝鄉風俗。期一年舉子。不舉則嗣續艱矣。故家慈前者之皇皇爲妾之不娠也。予方悟。乃就下房寢。雞初鳴。室媼促媵者歸。內子亦起櫛沐。頃臾諸媵集。卽率往家慈處。遞茶萬福。奉姑櫛沐。早膳而退。促予詣謝外姑。行再拜禮焉。自是間兩日。蘭必入值。至雞初鳴。卽去。詩所謂戴星而往還者是也。兩月蘭不孕。內母如前携花燭酒筵來。送甄姑入值。月餘。內子有孕。蘭與甄俱孕。孕者室老卽不令入值。且有厲禁。蓋苗中嬰兒最忌種痘。痘必。百無一二生者。其氣又易沾染。卽壯夫染之。無不痘。痘無不死。常見一兒痘。而禍延一鄉。竟絕噍類者。求其不痘。無如一受孕。卽不與男子

同處。則他日所產兒。決不痘矣。故大家有室老之設。專護其事。小戶其姑卽嚴護之。其孕也易識。今夕受胎。明晨婦眉間卽有一縷紅絲。隱隱而現。大家婦人。每早必參見室老。室老一見卽知。曰。若有孕矣。母與男子同處。立爲移置別室。夜必扇鑰。室老日夜隄防。至七閱月。胎成方解。嚴蓋關係非一人一家故也。外姑聞三婦皆有孕。大悅。以次備花燭酒筵。送媵者。鄭重琬香。蕙雪。安節。蕊珠。瓊鈿。六女入值。乃已。從嫁八媵。半屬宗人。半選良家。大都其家臣之女也。其齒以內。子居中。上而遞長。至四齡止。下而遞幼。至四齡止。蓋亦周制也。服飾皆同。惟內子多一金項環。而釧則起花金樣也。他皆素金爲之。琬香者。良家女也。長內子一歲。同月日時生。聲音笑貌皆同。惟髮差短耳。餘皆酷肖之。至余結褵。半載後。夫婦言語雖通。然倉卒間常不能辨之。往往見琬香來。輒起欲拉與語。彼曰。吾非小姐也。郎君幸尊重。如是者再矣。室人皆目笑之。卽家慈亦嘗錯認爲媳而呼焉。蓋無一不相同。不能辨也。他日內子與余作戲。以項環戴琬香。令入寢室。余方踞坐於榻。以爲內子來也。卽欲拉與語。彼輒翩若驚鴻。踉蹌趨出。余深

訝內子之急遽。異于尋常也。少頃。內子入。頸無環矣。余以爲琬香也。問之曰。小姐何在。內子曰。誰爲小姐者。輒與余並坐于榻。余又深訝琬之唐突。蓋媵者向不與主人抗也。須臾。琬入。探環戴內子項。顧余曰。還郎君小姐。舉室皆闕然一笑。古語云。人心之不同。如其面焉。謂面皆不同也。然天下竟有相同者。豈特仲尼陽貨而已哉。大都苗女狀同者最多。余往往見有雙雙而來。似無分於彼此者。不特親姊姊然也。乃至妯娌姑嫂亦有然者。甚而相隔數十百里。亦有相同者。不一而足也。蓋苗中之山峰巒多有相同者。故產人面目亦多相同者。內子嘗謂余曰。妾年十七必死。繼妾席者必琬香也。夫子善視之。善琬香卽善妾矣。余怪而詰之。故對曰。妾嘗夢遊一山。有瓊樓玉宇焉。一女冠引妾入謁玉真仙。姬云。仙姬錦衣霞冠南向坐。妾拜於堂下。旁一女官以笏指妾謂姬曰。是女慧且有道緣。可留爲侍。仙姬曰。尙幼。姑令讀漢書。須十七齡耳。遂揮妾出。妾還至臥室。見一女踞妾榻。妾叱之。因驚寤。後家君選媵得琬香。妾一見卽夢中踞榻之人也。妾之榻。誰得而踞之。而踞者乃琬香。故繼妾席者必琬香也。且曩不識

所謂漢書者。今從姑讀論語孝經。非漢書而何耶。故知妾十七必死也。余聞其言而悲之。然夢也。烏足以爲據。後內子果十七而死。未半載而琬香亦故。余卽續錢氏繼席之說。殊謬。蓋內子與琬香狀相類。夢魂自外來。見踞其榻者卽己軀也。非琬香也。不自識其爲己軀而叱之。適琬香狀與相類。故疑繼其席者爲琬香。而琬香卒不應也。各媵女獨處室。老皆有法。不許偃仰縱橫。旣覆以衾。外加繡紬。四角鎮以銅獸。重或至二三十斤。若不令其轉側者。寢後卽禁復起。洩溺幃外。張燈徹夜。榻前每夕輪一婢伺候。室老時行潛察。一聞發軀呼聲。輒排闥入。捉其髮而扑之。卽侍女亦不得有軀聲也。每二鼓卽寢。至雞初鳴。室老輒擊銅版者七。各房室媼亦擊銅版以應之。俱促諸婦起櫛沐。櫛沐畢。皆集正室爲主婦治粧。粧畢則偕往候姑。凡有身者立稍不端。坐不正。臥或偃仰縱橫。及酣酒茹葷者。室老輒誡之。諸媵與主婦常同坐起。或嬉戲投博。皆勿論。見主人則不敢坐。常侍立終日。不敢生怠傲色。總因室老之嚴。舉室從無諠譁聲。侍女森立左右。屏氣似不息者。肅然如三軍之稟大將軍令也。主人欲與諸媵坐。必其

臥榻。若於椅。室老聞之。必加撻。媵者或逢怒主人。室老必勒媵者去其下衣。當庭而痛扑之。無赦也。凡爲姑滌溺器。浣衣服。治裳履。愁衾枕。進飲食。生子者連三日。女者二日。未生者一日。次第以行。無敢或素。皆室老主之。卽內子亦不敢假手侍女。如有身及疾病。必請假始免。次者行。產後病瘥復入。噫。此真三代之禮也。不意中原絕響。乃存邊徼。古語云。禮失而求諸野。今野不可求。乃在苗蠻之中。亦可慨矣。家慈一切動用。內子總之。入媵各有分掌。一事不備。一物不工。職者恥之。嗟乎。苗蠻之有禮。不如諸夏之亡也。嗟乎。龍氏富貴。自漢迄今矣。其世守勿失者。非有堅甲利兵之足恃也。所恃者。世有其德耳。今其所產女。能盡婦道如此。則其家教之善可知矣。夫女能盡婦道。子能盡子職。則德立矣。又何有富貴之不久。且遠哉。今中國之士大夫。妄希富貴久遠。不於孝友是求。而反從事於無倫之浮屠氏。以誦經布施飯僧塑像。以行善。悲夫。

衍琵琶行

新建曹秀先冰持著

余過潯陽訪所謂琵琶亭者。有亭歸然。不聞琵琶之聲。憶白司馬歌咏當時情景。宛然在目。引其詞而長之。命曰衍琵琶行。

潯陽江頭夜送客。吳楚中間開水驛。兒童報道司馬來。名曰居易姓曰白。楓葉荻花秋瑟瑟。一派秋聲吹簫策。江上淒清總可哀。況是相逢驪唱日。主人下馬客在船。紛紛別緒若爲牽。冀得石尤風一起。明朝繫纜此江邊。舉酒欲飲無管絃。寂然對酌當離筵。多少漁燈散江面。照成李郭兩神仙。醉不成歡慘將別。天涯分袂情難說。潯陽作郡送迎難。只愁柳條盡攀折。別時茫茫江浸月。異地風烟寄舟筏。故人心事訴分明。彼此書空還咄咄。忽聞江上琵琶聲。此聲端不似無情。可能彈出明妃曲。教人怨恨一時生。主人忘歸客不發。豈是離悰未休歇。但覓知音古亦稀。誰操絕調蛟龍窟。尋聲暗問彈者誰。商陵牧子不同時。又疑滯跡江湖外。關山月向笛中吹。

琵琶聲停欲語時。知他何喜更何悲。底事四絃聲緊慢。惱人情緒一絲絲。
移船相近邀相見。渺渺予懷生眷戀。自哂文人癖未除。溷跡通榮與優賤。
添酒迴燈重開宴。江頭主客不知倦。醉吟居士久牢騷。藉澆塊磊咸稱善。
千呼萬喚始出來。故故嫋嫋步却回。不是多情鍾我輩。那能覲面弗相猜。
猶抱琵琶半遮面。主客凝神銀海眩。纖纖諒不似從前。遮莫秋來舊執扇。
轉軸撥絃兩三聲。調音操縵手將迎。欲待琵琶不振響。莫慰主客意縱橫。
未成曲調先有情。有情二字誤平生。而今試把鵲絃弄。涇水贏於渭水清。
絃絃掩抑聲聲思。性自沉吟百工媚。悠然想見漢宮人。按曲徵歌成金翠。
似訴平生不得意。絃中句語聲中字。何必鬚眉好丈夫。哭途泣路心如醉。
低眉信手續續彈。歷歷落落興禾闌。遠客一尊消不得。幽憂苦調摧心肝。
說盡心中無限事。心中暗灑絃中淚。巾幘羈愁江上舟。命之窮也時不利。
輕攏慢撚抹復挑。徐徐盡態費招邀。淡泊形容聲細細。管渠雨驟與風飄。
初爲霓裳後六么。隸事翻新譜亦調。轉疑不是文君操。司馬奚緣解渴消。

大絃嘈嘈如急雨。曾無點滴到塵土。怕與江上風水遭。雪浪直撼江邊樹。
小絃切切如私語。兒女昵昵相爾汝。不知琵琶是何聲。忘却曲彈到幾許。
嘈嘈切切錯雜彈。閒暇神情活指端。除是精能成妙妓。得心應手豈非難。
大珠小珠落玉盤。但聞清聲橫闌干。聲將透及珠微碎。聽來還未覺摧殘。
間關鶯語花底滑。好音絃上時相軋。歷歷偷轉紅袖中。一路清聲鳴遠戛。
幽咽泉流水下灘。清音互荅向回湍。竟是冰桐齊一例。鍾期聆得愜餘歡。
水泉冷澀絃凝絕。凍風吹成澗邊雪。絃上莫問瀟瀟聲。感到人間歲寒節。
凝絕不通聲暫歇。依舊風情生倏忽。當筵悵望耳無聞。舉首青天問明月。
別有幽愁暗恨生。婦人心事果難明。誰無愁恨還輸汝。轉恐舟中載不輕。
此時無聲勝有聲。蕭蕭慘慘各崢嶸。萬事刺懷眉上現。未須撥弄客心驚。
銀瓶乍破水漿迸。紛灑并幹心不覓。詎道鉄琵琶經手彈。隱隱清商帶風勁。
鉄騎突出刀槍鳴。鎧甲光寒大將行。潛師問道制奇勝。婦人幻作琵琶聲。
曲終收撥當心畫。轉振權奇中間隔。那聞五音競響臻。比視千金輕一擲。

四絃一聲如裂帛。清商暗動齒牙擘。彈者熟練局初完。多少豪人盡廻席。
東舟西舫悄無言。一洗耳畔祛勞喧。似解琵琶曲真妙。遷客離人何處村。
唯見江心秋月白。委波一片淨圓璧。依稀直上廣寒宮。霓裳羽衣仙子夕。
沉吟放撥揅絃中。黯淡風姿若个同。玉人老去嬌如舊。江上秋風任轉蓬。
整頓衣裳起斂容。一枝霜月蘸芙蓉。多年未覩車旗色。此夜尊前抵折衝。
自言本是京城女。長安甲第連禁籞。區區弱質此間生。誓不牽絲到吳越。
家在蝦蟆陵下住。下馬陵成踵訛誤。我家住此幾何年。尙有田園有墳墓。
十三學得琵琶成。纔把琵琶玉手輕。自是因緣關愛好。嬌姿宛轉可憐生。
名屬教坊第一部。居然女子持門戶。豈真他可壓簪紳。能向人前歌且舞。
曲罷曾教善才伏。歌喉跌蕩還回覆。品題今古善歌人。不絲如竹竹如肉。
妝成每被秋娘妒。不分眉蛾兼齒瓠。世途兩美傾軋多。同業同時不同路。
五陵年少爭纏頭。裘馬翩翩指翠樓。却慕虛名謁門下。外間謾自詡風流。
一曲紅綃不知數。物力艱難那省顧。慘歟泣淚盡鮫人。歎盡朝朝還暮暮。

鈿頭雲篋擊節碎。少年不禁顛狂態。桃李春風爛漫花。蜂蝶紛紛舞成隊。
血色羅裙翻酒汙。石榴花瀉金盤露。狹斜惡少結同心。回望西陵松柏樹。
今年歡笑復明年。縮得光陰買笑錢。愛色人多愛才少。春蠶絲盡懶成眠。
秋月春風等閒度。別家管領情回互。描却遠山頻蹙眉。學走金蓮尙翹步。
弟走從軍阿姨死。單形隻影苦蓮子。亦復門庭氣象衰。日日催人迅彈指。
暮去朝來顏色故。駒隙犇馳曾弗駐。兒時憶得饋桃花。肌容羞却織縑素。
門前冷落車馬稀。待欲題門燕子飛。燕子自遣來往影。肯隨舊雨欸柴扉。
老大嫁作商人婦。也賦鸞鳳親井臼。昔年掌上弄明珠。青青化作章台柳。
商人重利輕離別。自渠本色不相欺。我曾綺席承官長。低唱陽關却爲誰。
前日浮梁賣茶去。計較錙銖向羈旅。候火應烹苦味濃。未識夢回何處所。
去來江口守空船。今日船中儂可憐。水鳥雙雙掠舟過。野鴨無因飛上天。
繞船月明江水寒。江中穆穆跳金丸。薄命自慚無月樣。一年圓得幾回團。
夜深忽憶少年事。九枝燈下海棠睡。一刻千金不領春。癡人要墮傷心淚。

夢啼妝淚紅闌干。博得拋家髻一看。潯陽郭外人初醒。那識江城有達官。
我聞琵琶已嘆息。風土操音來自北。往時王粲賦登樓。直是欲歸歸不得。
又問此語重唧唧。譬如貴人初謝職。莫誇曩昔住京城。點綴風華來澤國。
同是天涯淪落人。謾言物色尙風塵。汝嫁茶商元寂寞。我官司馬剩清貧。
相逢何必曾相識。萍水孤蹤亦暫卽。如此燈前一識君。錦字迴文認誰織。
我從去年辭帝京。蕭條僕馬指南征。算是玉皇香案吏。詎眞物外住蓬瀛。
謫居臥病潯陽城。游宦無聊心曳旌。五架三間草堂在。謾勞五老笑相迎。
潯陽地僻無音樂。人誦詩書守淳樸。但知山水有清音。水宮亭背山廬嶽。
終歲不聞絲竹聲。東山冷處負平生。只學蘭亭修楔會。一觴一咏暢幽情。
住近湓江地低濕。九派風濤鋪藻瀋。均傳此地是長沙。若遇賈生哀欲泣。
黃蘆苦竹繞宅生。嫋嫋娟娟競野榮。信此官曹荒涼甚。不堪風雨下深更。
其聞旦暮問何物。深樹菁蒼遠山屹。因風訝得怪聲來。詎能久居不鬱鬱。
杜鵑啼血猿哀鳴。物類何當心不平。三更月上催歸急。十二時中浴汨盈。

春江花朝秋月夜。貴游行樂居亭榭。謫宦心情怯景光。蕭索獨愁無稅駕。
往往取酒還獨傾。儼覺淵明風骨清。束帶無心縈五斗。漉巾乞食有誰爭。
豈無山歌與村笛。粗有聲音破虛寂。或騎牛背棹漁舟。儼若梨園非勁敵。
嘔嘔啁啾難爲聽。敢從海上叩秦青。吏散官閒空索句。杯中物盡板扉局。
今夜聞君琵琶語。惆悵何因理愁緒。西蜀琵琶卽有峰。隴山鸚鵡弗如汝。
如聽仙樂耳暫明。鈞天髣髴奏瑤京。潯陽城外少此調。邇日江山韵亦清。
莫辭更坐彈一曲。妙曲泥人心不足。竟教北海再開樽。無礙楚庭方滅燭。
爲君翻作琵琶行。胡笳十八拍還成。潯陽後有游人過。商婦能歌或著名。
感我此言良久立。由來知己下車揖。粉黛看看末路難。不獨傷心背鄉邑。
卻坐促絃絃更急。一彈再鼓難收拾。未是絃催手腕疲。新知舊好懷憂悒。
淒淒不似向前聲。木落風寒水一泓。惹恨難迴腸九折。歌喉順處逆人情。
滿座重聞皆掩泣。欣慨胡然遽交集。憐渠不早立身名。中流壺繫判呼吸。
座中泣下誰最多。樂極悲來泣當歌。懷土思鄉全不耐。鏡中髮白影婆娑。

江州司馬青衫溼。半世英雄付歌什。酒闌歸散客亦行。商婦回向客船泣。
衍琵琶行跋

潯陽江頭。商婦琵琶。自有白傅一詩。遂成雙絕。今更得地山夫子引而伸之。千
秋韵事。鼎足而三矣。癸卯仲夏震澤門人楊復吉識

西湖小史

山陰李鼎和仲著

一時

袁石公曰。西湖宋畫也。最足賞鑑。惟遇雪。則水空山沒。雲低樹斷。儼似元人手筆。余論湖景。當以雪爲第一次。新柳。餘寒初淺。半染輕黃。絕樣風流。致堪腸斷。其次月。皎蟾當空。波光生艷。衆山靜遠。如百千美人。臨鏡梳鬟。四季皆妙。不獨秋也。又其次紅葉。南山一帶。秋老愈妍。錯如錦綉。豈減二月花哉。今遊湖者。春時最盛。然半屬看忙。領幽味。賞清韻者。有幾。吳人嘲杭人爲怕月。信非虛也。如西溪之梅。滿隴之桂。翁山之李。六橋之桃。盡人知之。何煩予筆。

二地

向時所傳十景。已滄桑不復可識。湖濱麗矚。莫逾南屏。試登慧日。芳翠盈袖。若紫陽饒石而嫌于市。天竺有泉而嫌于囂。杖履所及。每爲惋惜。予所賞者。于勝果寺則取其僻。于蓮花峰則取其雋。于放生池則取其空。于西冷橋則取其澹。

千木巖危踰鳥道。演福庵巧奪鬼工。靈鷲惟韜光差寂。金蓮池可枕漱較冷泉。爲深。龍井惟片雲足嘗。風篁嶺堪袍笏。比烟霞爲杳。兩高峯峻矣。恨無康樂之屐。十八澗曲矣。惜少蘇州之嘯。永興則綠萼最著。雲居則楓林獨佳。古蕩不減。桃源。雲棲居然淨土。御教場奇石揮天。月輪塔怒濤捲雪。遊踪到此。別是一觀。乃至六一之泉。叔明之屋。窮兒翻經之台。抱朴沉丹之井。遺跡雖存。荆榛莫辨。安得好事者一爲表出爲湖山吐氣哉。

三墅

凡爲園者。先水石。次古木。次結構。西湖秀冶。自具剪裁。無須壘山鑿石。林木無不森蔚。到處會心。所難獨結構耳。雅則易寒。華則易俗。山林廊廟。故難兼勝。姑就邇年所築。稍爲次第。湧金惟寄園頗儼。而取徑不迂。南山惟寓林最秀。而結屋不稱。孤山稱快雪堂。而更置少韻。裏湖推鳴鷗墅。而廓落無致。包園在靈峰者。人巧天工俱錯。而斧痕太露。馮園在西溪者。老梅脩竹俱古。而山骨不靈。予友江邦玉築室橫山。林岫深迴。足稱最勝。遠則土橋金園。白蕩懶園。水木幽茂。

亦堪游憩。柴園獨稱麗甚。惜秘不爲人見。他園尙夥。不能悉載。無論宋時諸園。不能髣髴。卽如太倉弁園。惠山鄒園。永嘉王園。雲間顧園。皆膾炙一時。數墅一邱一壑。恐不能敵。差足豪者。西湖一大園耳。

四舫

湖中之舟。鱗鱗如鯽。曷啻數百。其稍潔者。輒爲有力人所據。半雜以市兒官役。又否則高髻廣額。塗脂抹粉之嫖母。見之欲嘔。予嘗論湖中舟居。大勝園居。旣遠塵囂。亦鮮剝啄。當月則濯魄冰壺。當暑則披襟荷畔。當雨則潑墨欲狂。當曉則輕霞未散。沉酒濡首。領畧方盡。然舟有二。其一紅粧成隊。士女堵立。玉簫象管。一飲百鍾。此豪士之快舉也。其一則雅姬焚香。俊童捧釣。筆床茶灶。臨流賦詩。此韵士之風流也。所好各異。用舫亦別。如隨喜菴水上園等。則宜雅士。水一方臨春樓等。則宜豪士。舍此二者。反不如扁舟一葉。晨夕夷猶于烟波間耳。何可同俗子日午登舟未暮卽返哉。

五產

湖上耳目奉。無不極天下之娛。獨于樽俎間。概所憤憤。一經庖人手。更無鮮口者。如讀中原紫氣等詩。入目可厭。又如讀老生帖括語。出口已臭。董思白先生嘗曰。湖中厨子。功勝大黃的。非戲語。然有所產。足以奪四方之嗜。而易所好。品有嗜味者。西來之栗也。龍泓之茶也。有仙饌者。花下之藕也。湖中之蓴也。楊梅則玉泉最勝。櫻桃則亭皋最佳。芡實則橫里最富。密橘則栖上獨異。至于春初之筍。秋半之茭。葛園之青李。三橋之紅菱。皆屬杭產。不得獨遺。其餘土魴水鳧。紅蝦青鯽。非不稱珍。以非清韵。故不載。獨虎跑泉名喧宇內。與慧山可伯仲。卽以甲湖產。何愧哉。

六獻

閱舊志。風雅輩出。足以領袖天下。嗣響寥寥。每徒申嘅。聊述一二。私仰止焉。馮開之。醉心宗乘。兼負東山之癖。虞德園。搜目奇僻。不讓子雲之元。徐茂英。博雅共推。黃貞父。澹宕自喜。論書則湯堯文不失正鋒。許靈長別具逸腕。論畫則張白雲頗無作氣。沈青門另饒雋才。王雲萊壽踰百歲。疑有方術。邵虎菴石隱半。

生無慚棲逸。數先生雖逝。遺徽剩墨。尙足照映湖山。嗟乎。孤山非君復不著。冷泉非樂天不名。誰謂地不以人重哉。近四賢祠。增入王元美。此公爲一代文章冠。俎豆無忝。獨進東粵周公。不知何意。余謂周有周祀。似不以此重也。孫太初畜鶴南屏。詩最清勁。可並和靖。入以太初。諸賢定當抱臂。（周卽府城隍是）

七僧

友之有僧。如花中之竹。羽中之鶴。氣韵別是一種。簪冠樓履。最宜淨侶同行。西湖梵宮甲天下。僧稱好事。但趨驚勢利。有自命騷雅。而居積不異俗人。有高唱禪宗。而乞墻直同市井。急宜遠去。弗復與交。不若種茶藝竹之野衲。尙覺樵朴可喜。若昭慶一賈肆也。天竺一屠門也。法相一錢埒也。淨慈差冷。靈隱獨貧。種種名刹。不可勝紀。靜室林布。豈乏名緇。第求如清順可久輩。亦無其人。獨蓮持大師。單持念佛。遠傳永明之衣。近拍中峯之板。西湖佳麗。數遊者如狂。一入雲塢。恍入蓮邦。卽鳥鳴松唱。皆有禪意。不必禮大師之塔而心已冷然矣。

八艷

湖中不可無美人。猶鬢無關於神明。而失之不佳。蘇小同心。至今芬頰。琴操參悟。猶屬錚錚。佳人難再。孰踵其芳徽者。據余目所見。杜天素畫擅一時。風鬟霧鬢。而多高韻。王修微詩驚四座。讀書談道。而多勝情。惜哉。林旣還閩。王亦他適。近有王雲友精於六法。足參管姬之座。風流不墜。賴有此君。昔人有云。無此不成京師。予亦曰。無美人不成西湖。要豈論於俗妓輩哉。未暇語貌。一種有氣惡甚。反不如獨對西子。雨顰晴笑。自堪傾國。弗以此輩唐突之耳。(完)

西湖小史跋

西湖佳麗甲天下。名人題識。每不能名言其妙。茲不過得其一壑一邱而覽之者。已不禁悠然神往。正猶吳仲圭畫山水縮本。雖絹素無多。而烟雲紆縵。神味全別矣。惜作者命筆時。適當勝國末年。否則後日湖山全盛之際。應大有勾留清夢者。足供記載耳。丙申夏日震澤楊復吉識。



香
豔
叢
書

第
二
集

香艷叢書

二集卷三

秀水孟

彬賦魚譜



十國宮詞

唐室鼎遷。正五季代興之日。中原雲擾。亦羣雄競奮之秋。地擁江淮。楊花共
李花並茂。天開巴蜀。鬼子與毬子同謠。彭城則嶺海稱雄。典午復湖湘坐大。
又况跨吳越而朝稱尙父。據甌閩而人號三郎。江陵當四戰之衝。太原守一
隅之固。居然袞冕。同封異姓之王。到處樓臺。爭列後庭之寵。三千粉黛。繡幕
珠簾。二八妖嬈。舞裾歌扇。漫襲承平之舊。渾忘締造之艱。然而興廢靡常。繁
華易逝。宮庭閒寂。賸有荒烟。輦道蒼涼。鞠爲茂草。恣一時之游宴。供千載之
流連。爰搜十國遺聞。用賦百篇宮體。匪敢補史之佚。竊附識小之私。云爾。
十圍燃燭擊球工。兵諫何來跋扈雄。繞柱白龍曾入夢。袖中一紙出西宮。

按楊行密。唐天復二年。賜爵吳王。建國揚州。傳渥隆。演溥。三主。後
徐浩。稱帝。奉吳主。為讓皇。通鑑。楊渥。然十圍之燭。以擊球。一燭
費錢數萬。又渥晨視事。張顥。徐溫。帥牙兵二百。露刃直入庭中。
謂之兵諫。五國故事。注徐溫夢入宮中。見白龍。繞其殿柱。明日。
入果見渥弟渭。衣白衣。抱殿柱而立。乃嗣位。人史氏教也。大要言。
弑渥圖自立。嚴可求急書一紙。乃西宮太夫人。史氏教也。大要言。
嗣王不幸。將無負楊氏。
當立告諸將。無負楊氏。

小樓懽飲酒初醺。傳粉君臣禮不分。一笑鵝衣蒼鵝健。三郎反自作參軍。

五代史。徐氏專政。隆演幼懦。而知訓尤凌侮之。無君臣禮。嘗飲酒。
樓上。命優人高貴卿侍酒。知訓為參軍。隆演鵝衣鬚髻。為蒼鵝。
十國春秋。宋齊邱密言于知。
語曰。三郎驕縱。敗在朝夕。

樓上焚香誦佛頻。丹陽宮裡羽衣新。楊花飄落渾如雪。怎奈團枝玉樹春。

五國故事。讓皇帝方誦佛書于樓上。使者趨前。帝以香爐擲之。俄
而見弑。十國春秋。昇元二年。徙讓皇居丹陽宮。通鑑。讓皇帝。
飛羽衣。習辟穀術。十國春秋。武義元年。有謠云。江北楊花作雪。
語本性李後。
遂應此謠。

江南江北已無家。臺榭荒蕪冷鈿車。三十年來同一夢。枯楊何事復生花。

江表志讓皇帝賦詩江南江北舊家鄉三十年來夢一場吳苑宮闌今冷落廣陵臺榭亦荒涼又讓皇既還數年未卒每有枯楊生枝

玉葉金枝絕世姿。雙雙白雁繫紅絲。妝臺鸞鏡春何在。嗚咽人呼公主時。

玉壺清話璉讓皇長子也。初先主第四女璉納之為妃。容範絕世。及禪代封永康公主。聞人呼公主則嗚咽流涕。辭不願稱宮中為之慘戚。

縞素長齋畢此生。延和人靜月空明。佛香一炷還私誓。願作無情莫有情。

玉壺清話璉卒永康公主終身縞素不茹葷血。朝夕焚香對佛自誓曰。願兒生生世世莫為有情之物。居延和宮年二十四無疾而亡。

讓皇百日海陵遷。局却朱門不計年。楚岫吳江空悵望。永寧宮裏草如烟。

五代史昇元六年李昇遷楊氏子孫于海陵號永寧宮嚴兵守之。絕不通人。五國故事讓皇帝溥既渡江賦詩略曰。烟凝楚岫愁千點。雨滴吳江淚萬行。兄弟四人三百口不堪端坐細思量。

一夕秋霜上鬢鬚。清光漸漸入天衢。金奴烏舅黃門喚。照夜何須大寶珠。

按吳徐誥唐天福二年僭稱帝復姓李氏更名為南唐傳瑒
煜二主為宋所滅南唐近事烈祖輔吳之初以為非老成無以
彈壓遂服藥變其髭鬚一夕成霜來偶得月詩先主令白乃曰徐意
忽夜半寺僧撞鐘逮旦召問云夜來偶得月詩先主令白乃曰徐意
徐出東海漸入天衢此夕一輪滿清光何處無先主私喜而釋
之烏舅案上捧燭鐵人高尺五殿奴正黃昏急須燭喚小黃門撥
我金奴來左右竊相謂曰鳥舅金奴正黃昏急須燭喚小黃門撥
南大將獲李後主寵姬者見燈輒閉目云宮中本閣每至夜則懸
烟氣愈甚曰然則宮中未嘗點燭耶云宮中本閣每至夜則懸
大寶珠光照一室如日中也

瓊雲片片灑金鋪清暇君臣樂事俱旋進和章陪曲宴更傳名手寫新圖

清異錄保大五年元日大雪李主展宴賦詩命李建勛和建勛
即時和進乃召同宴仍集名手圖畫真容高冲古主之侍臣法部
絲竹周文矩主之樓閣宮殿朱澄主之雪竹寒林
董源主之池沼禽魚徐崇嗣主之圖成皆絕筆也

茱房菊蕊繡花餽佳節重陽散鬱陶望斷鵲原數行淚宮中愁賦卻登高

南唐書從善後主同母弟也遣朝京師因留質不歸後主悲思每
憑高北望泣下沾衿由時歲時游宴皆罷嘗製卻登高文有原每
一鵲兮相從飛嗟予季兮不來歸無

茶油花餅鏤金黃。雅淡新翻北苑妝。宮樣更誇天水碧。薄綃爭染露珠涼。

南唐拾遺記南唐時建陽進茶油花子大小形製各別宮嬪鏤金于面皆淡妝以此花餅施額上時號北苑妝宋史李煜伎妾常染碧經夕未收會露下色愈鮮明熁愛之自是宮中競收露水染碧以衣之謂之天水碧

錦洞天開近御牀。金鋪玉戶麗花房。移風纔報蓬萊紫。又賞崇蘭讌飲香。

清異錄後主每春盛時梁棟壁柱拱階砌並作隔筒密插雜花榜曰錦洞天又廬山僧舍有麝囊花一葉色正紫號紫風流後主詔取數十根植于移風殿賜名蓬萊紫十國春秋保大二年八月幸飲香亭觀蘭

雅度何須粉黛施。珊珊玉骨擅仙姿。吼聲如虎金環震。不改從容進膳時。

十國春秋種氏名時光態度閑雅宛若神仙烈祖常大怒聲如虎殿陞金環為震動左右皆喪膽視魄神氏左手持食右手手進匕從容如平時

纖裳高髻淡蛾眉。煖殿開筵夜雪時。製得新聲催按拍。破傳醉舞曲來遲。

南唐書周后瓶為高髻纖裳及首翹髻朶之妝嘗雪夜酣宴舉杯請後主起舞後主曰汝能瓶為新聲則可矣后即命賡綴譜喉無所滯音筆無停思俄頃譜成所謂邀醉舞破也又有恨來遲破傳醉舞等句十國春秋注後主誅周后詎有曲演來遲破傳醉舞等句

霓裳法曲譜開元。利撥檀槽雅製存。一自玉環留別後。空將金屑殉芳魂。

南唐書故唐盛時霓裳羽衣最為大曲後不復傳周后得殘譜以琵琶奏之于是開元天寶之遺音復傳于世十國春秋注後主以詠周后詞有利撥迅手重新雅製等句南唐書后臥疾已革猶不亂親取元宗所賜檀槽琵琶及平時約臂玉環為後主別卒于瑤光殿後主哀甚以后所愛檀槽琵琶同葬

叙襪還提金縷鞋。畫堂南畔早情諧。待年此日重親迎。彩雁御書過御街。

詞綜後主子夜詞花明月暗籠輕霧今宵好向郎邊去叙襪步香階手提金縷鞋畫堂南畔見一晌偎人顫奴為出來難教君恣意憐十國春秋繼國后周氏周后女弟也周后沒后未勝禮服待年宮中開寶元年始議立后為繼室將納采後主命以鵲代白雁被以文繡使卿書特舉親迎之禮

柔儀殿內碧牕紗。侍女添香金鳳斜。更築紅羅亭子小。花深深處醉流霞。

清異錄李煜長秋周氏居柔儀殿有主香宮女其焚香之器有玉太古容華鼎金鳳口罍諸種南唐書後主于羣花中作亭幕以紅羅雕鏤華麗而極迫小僅容二人每與后酣飲其中

巧笑明眸態絕殊。保儀新選有誰如。月明不復羊車過。閒掌深宮萬卷書。

馬令南唐書保儀黃氏容態華麗冠絕當世後主雖屬意會小周
后專房由是進御稀而品秩不加第以掌墨實而已初元宗後主
皆妙于筆札博收古書宮
中圖籍萬卷皆保儀所掌

椒寢香埋又幾春。琵琶聲咽舊宮嬪。鈿蟬金雁都零落。猶按當年一曲新。

南唐書宮人流珠者性聰慧工琵琶昭惠后所作邀醉舞恨來遲
二破久而忘之後主追念昭惠問左右無知者流珠獨能追憶無
所忘失後
主大喜

淩波素襪獨翩翩。掌上輕盈宛若仙。學得纖纖新月樣。春趺裏就舞金蓮。

道山新聞李後主宮嬪窈窕纖麗善舞後主作金蓮高六尺飾以
寶物令窈窕娘以帛纏足纖小屈上如新月狀著素襪舞金蓮上體
勢回旋有
淩波之態

御苑依依柳幾株。風情烟態映春蕪。臨池愛仿元和脚。手寫黃羅什慶奴。

墨莊漫錄江南李後主嘗于黃羅扇上書以賜宮人慶奴云風情
漸老見春羞到處銷魂感舊游多謝長條似相識強隨烟態拂人
頭想見其風流也柳宗元詩柳家新樣元和脚且盡畫芽歛手徒
主學柳公權

異卉奇葩繞院開。侍兒春曉折花回。風流輸與雙飛蝶。恣傍玉人雲鬢來。

十國春秋宮人秋水喜簪異花芳
香拂鬢常有蝶繞其上撲之不去

繡佛深宮戶自扁承恩淡掃黛眉青傷心彌勒花空獻剩有金書一卷經

默記李後主手書金字心經一卷賜其宮人喬氏喬氏後入太宗
禁中聞後主薨自內廷出其經舍在相國寺西塔以資薦且自書
于後曰故李氏國主宮人喬氏伏遇國主百日謹舍昔時賜妾所
書般若心經一卷在相國寺西塔院伏願彌勒尊前持一花而見
佛云

薄命如雲粉黛羞梧桐葉落故宮秋勸君休唱芳儀曲塞北江南一樣愁

默記遼聖宗芳儀李氏江南李景女初嫁供奉官孫某為武彊都
監妻女皆為聖宗所獲封儀生公主一人晁補之為作芳儀曲有
秦淮潮水鍾山樹塞北江南易懷土國亡家破一身存薄命
如雲信流轉芳儀加我名字新教歌遺舞不由人等之句

霞帔長披玉貌溫雅通仙術獨承恩麥珠圓處盈銀釜雪鋌鎔成帶爪痕

江淮異人錄耿先生者江表將校耿謙之女也少而明慧頗明于
道術保大中召之入宮處之別院號曰先生先生常被碧霞帔手
如鳥爪十國春秋元宗常購真珠數升欲得圓珠耿曰易致也
就取小麥以銀釜燭之皆成圓珠光彩奪目江淮異人錄嘗大
雪上戲之曰先生能為銀乎先生曰亦可乃取雪實之握為
銀鋌投于熾炭中過食頃曰可矣乃持以出赫然洞赤及冷爛然

爲銀甌而
指痕具在

雲冠羽警道家妝。慷慨身投烈焰亡。無限江山容易別。白衣紗帽愧君王。

十國春秋淨德院尼乃八十餘人皆宮人入道者都城將陷亦積薪于庭院後主與約曰如有不虞宮中舉火爲應吾與汝輩俱焚死及保儀黃氏燔積書于宮淨德院望見烟焰遂無一人肯脫者十國春秋注後主作長短句云無限江山別時容易見時難故臣聞之有泣下者宋史曹彬俘李煜還汴帝御明德門以煜常奉正朔命勿宣露布止令煜君臣白衣紗帽至樓下待罪詔並釋之

手爲佛印類成疣。精舍香林處處修。開善夫妻方普度。王師已報下池州。

十國春秋開寶二年普度諸郡僧崇修佛寺改寶公院爲開善道場國主與后誦佛經拜跪頽額至爲瘤贅手常屈指作佛印唐書有北僧立石塔于采石磯施予皆拒不取及王師下池州繫浮橋于石塔然後知其爲閒也

識成鬼子上金牀。山色青城繞苑牆。阿姊昭陽新擅寵。旋看花藥又專房。

按王建唐天復三年爲蜀王偕稱帝是爲前蜀傳子宗衍爲後唐所滅建十國春秋帝以卯年生至是丁卯卽位左右獻鬼子上金牀之識帝命飾金爲坐又徐耕有二女皆國色相工曰青城山王氣徹天不十年有真人承運此女當作后妃長女卽太后果高

祖爲賢妃與妹淑妃皆以色進專
房用事淑妃宮中稱爲花蕊夫人

金甲珠冠耀素秋。昇仙橋畔餞宸游。漢嘉一路宮人隊。水調聲聲下閬州。

十國春秋乾德二年下詔北巡秋八月帝發成都被金甲冠珠帽
執戈矢而行后妃餞于昇仙橋遂以宮女二十人從行至漢州浮
江而下壬申至閬州舟子皆衣錦繡
帝自製水調銀漢之曲命樂工歌之

土木繁興姿宴娛。飛鸞瑞獸儼蓬壺。宣華十里樓臺敞。枉獻南朝三閣圖。

十國春秋帝命宣華苑內延袤十里構重光太清延昌會真之殿
清和迎仙之宮降眞蓬萊丹霞怡神之亭飛鸞之閣瑞獸之門土
木之功最極奢巧嘉州司馬劉贊
獻陳後主三閣圖并作歌以諷

霓裳唱罷後庭酬。履舄交歡醉未休。怪道江邊珠翠繞。浣花溪上看龍州。

十國春秋帝以上巳節宴怡神亭自執板唱霓裳羽衣內臣嚴凝
月等競歌後庭花婦女雜坐履舄交錯酣歌達旦夏四月幸浣花
溪龍舟彩舫十里縣亘自百花潭
至萬里橋游人士女珠翠夾岸

毬場步障錦爛斑。白打春風入市闌。重向御厨當面列。經旬猶未下繪山。

十國春秋帝雅好蹴鞠引錦步障以翼之往往擊毬其中漸至街
市而不知又帝結綵爲山立二綵亭于前列諸金銀綺釜之屬

取御廚食料烹燂其間帝乃憑欄觀之
號曰當面廚或樂飲繪山經句不下

數錢女子手摻摻小市紅欄柳影纖絕勝齊宮沽酒肆風帘颺處著青衫

十國春秋帝命大內造街坊市肆令宮嬪著青衫懸
帘鬻食男女雜齒交易而退帝與妃嬪輒爲笑樂

碧落溶溶夜宴時玉簫一曲侑金卮月華如水君須醉卻笑嘉王好酒悲

十國春秋後主宴近臣于宜華苑令宮人李玉簫歌已所撰月華
如水宮詞侑嘉王宗壽酒詞曰輝輝赤浮五雲宜華池上月華

新月華如水浸宮殿有酒不醉是癡人五代史衍嘗以九日宴
宜華院嘉王宗壽以社稷爲言言發流涕韓昭等曰嘉王酒悲耳

諸狎客共以慢
言爭謔嘲之

臉夾燕支冠帶蓮醉妝相對坐生憐風流只愛尋花柳不走者邊便那邊

北夢瑣言蜀王衍常裹小巾其光如錐宮女多衣道服帶蓮花冠
施胭脂夾臉號醉妝詞綜蜀主王衍醉妝詞者邊走那邊走只

是尋花柳那邊走者
邊走莫厭金杯酒

風塵淪落不堪聞連袂悲歌響入雲唱徹甘州新譜曲柳眉桃臉畫羅裙

五國故事衍率母后同幸青城至上清宮宮人皆衣畫雲霞道服
衍製甘州曲親唱之曰畫羅裙能結束稱腰身柳眉桃臉不勝春

薄媚足精神。可惜許淪落。在風塵。宮人皆應聲和之。

丹景元都次第登。雲浮翠輦陟峻嶒。賦詩到處尋名勝。夜上星壇看聖燈。

十國春秋帝與太后太妃歷丈人觀元都觀丹景山各製辭勒石遂至漢州三學山觀聖燈賦詩而還

珠鞍寶馬動香塵。競擁流星二十輪。七里亭邊回鵲隊。一時相對盡沾巾。

清異錄蜀衍造平底大車凡二十輪牽以駿馬騎去如飛謂之流星輦五代史衍自縣谷還至成都百官及後宮迎謁七里亭衍

雜宮人作回鵲隊以入御文明殿與羣臣相對涕泣無一言以救國患

喧呼聞鬪夾城雞。煽處深宮有艷妻。忍向秦川重回首。春花夜月總淒迷。

通鑑蜀主嘗自夾城過聞太子與諸生鬪雞擊毬喧呼之聲歎曰吾百戰以立基業此輩其能守乎有廢立意而徐賢妃為之內立

竟不能也又唐莊宗遣中使向延嗣盡殺衍宗族於秦川驛十國春秋注時有蜀僧遠公傷廢國詩有丹禁夜涼空鎖月後庭

春老漫開花之句

故苑筵開此代興。一燈誰識醋頭僧。丹霞樓上穿鍼夕。又與宮人乞巧凭。

按孟知祥唐長興四年為蜀王僭稱帝是為後蜀傳子昶為宋所滅十國春秋王宴府僚于王氏宣華院謂左右曰使衍不荒于

政有賢臣輔之繼爰小子豈能遽及此耶趙季良曰亦天時也
不有所廢君何以與燈燈便倒及帝登極數月即宴駕人以爲
卓之呼曰不得霞樓觀宮人乞巧前蜀後主亦以七夕與宮人
帝以七夕宴丹霞樓觀宮人乞巧前蜀後主亦以七夕與宮人
巧于丹霞樓

羅帳綾帷寢殿張宮中小輦只銅裝如何元夜觀燈火十萬金錢賜舞倡

五國故事和頗務慈儉寢處惟紫羅帳碧綾帷無錦繡諸飾居
常在內惟銅裝朱漆小輦而已十國春秋廣政三年春正月上
元節帝觀燈露臺命舞倡李豔娘入宮賜其家錢十萬

競渡龍舟水一隈繡旂隊隊彩雲開淩波殿外薰風入慈母年高奉輦來

十國春秋夏五月重午節帝奉皇太后游淩波殿觀競渡

紫府移根託上闌春秋佳日儘追歡芳林催賞紅梔子御苑宣看黑牡丹

十國春秋冬十月賞紅梔子花於芳林院大宴百官其花爛紅六
出清香如梅當時最重之又三月帝宴牡丹苑牡丹花有檀心
如墨者香聞至五十步從官皆賦詩以賞之

錦纜徐牽泛畫艘重樓窈窕間文牕分明海上神仙府金殿何須數曲江

堯山堂外紀蜀王昶游浣花御龍舟觀水嬉人望之若神仙昶曰曲江金殿鎖千門未及此也兵部尙書王廷珪賦曰十字水中分島嶼數重花外見樓臺昶稱善久之

栽徧芙蓉覆綺帷層闌高下萬千枝錦城一望真如錦空賦邠風七月詩

堯山堂外紀蜀主昶令羅城上皆種芙蓉覆以帷幕每至秋時盛開四十里皆鋪錦繡高下相照昶謂左右曰自古以蜀為錦城今日觀之真錦城也張立作詩諷曰四十里城花發時錦囊高下照坤維雖裝蜀國三秋色難入邠風七月詩

宮寢桃符換隔年長春餘慶製新聯內臣競獻金花樹最愛忘憂獨立仙

堯山堂外紀蜀主昶前歲除日昶自題桃板于寢門云新年納餘慶嘉節賀長春乃宋祖誕聖節名也清異錄孟昶時每臘月內官各獻羅體圈金花樹梁守珍獻忘憂花縷金于花上曰獨立仙

品分十四列深宮官職新除望幸同多少驚婚喧里巷桃夭處處詠春風

十國春秋廣政六年大選良家子以備後宮州縣騷然民多立嫁其女謂之驚婚于是後宮位號列十四品有昭儀昭容昭華保芳媛修娟等秩比公卿大夫士焉

寵擅椒房眉黛妍青城同輦幾流連白楊不復當時路猶憶深宮點翠鈿

十國春秋後主妃張氏擅殊色眉目如畫嘗同輦游青城山久而
不返忽雷雨大作被震而殞乃以紅錦龍褥裹瘞觀前白楊樹下
幾年數年鍊師李若冲忽見女子吟詩若有所怨詩曰一別蠻與今
幾年數年楊風起不成眠常見往日椒房寵淚滴衣衿損翠鈿

雪香宮扇暑風清。水殿涼生夜幾更。一任釵橫雲鬢亂。摩訶池上月華明。

清異錄孟昶夏月水調龍腦末塗白扇上一夕與花蕊夫人登樓
望月悞墮其扇爲人所不得外有效者名雪香扇詞綜蜀主孟昶
夜起避暑摩訶池上作水肌玉骨清無汗水殿風來暗香滿繡簾
一點月窺人欹枕釵橫雲鬢亂詞

離恨絲絲出劍門。杜鵑聲裏暗銷魂。最憐白首宮詞後。一幅張仙戀舊恩。

詞譜花蕊夫人有采桑子半閨云纔離蜀道心將碎離恨絲絲以
日如年馬上時時聞杜鵑後山詩話青城人費氏女五代時以
才色入蜀宮後主嬖之號花蕊夫人效王建作宮詞百首見聞
搜玉世傳張仙像者乃蜀主孟昶挾彈圖也初花蕊夫人入宋宮
念其故主乃攜此圖懸于壁且祀之謹一日太祖幸而見之致詰
焉夫人詭荅曰此吾蜀中張仙像也祀之能令人有子

芙蓉帳子淡籠烟。暖向鴛鴦被底眠。誰唱庭新樂府一聲萬里去朝天。

十國春秋後主以芙蓉花染繒爲帳幔名曰芙蓉帳輟耕錄孟
蜀主一錦被一梭織成被頭作二穴如雲版樣此之謂鴛鴦
國故事蜀之末作新曲云萬里朝天未幾後主朝宋崎嶇川陸斯
其駝矣

珠殿纔興又玉堂。風流天子王蠻方。芙蓉甘菊呼鸞道。無復龍川歌舞岡。

按劉隱梁乾化二年為南海王隱弟巖僭稱帝是為南漢傳玢晟

銀三主為宋所滅十年為南海王隱弟巖僭稱帝是為南漢傳玢晟

左右曰縱不及堯舜禹湯亦不失作風流天子又言家本咸秦恥

王蠻土名曰呼鸞夾栽岡南越王佗三月三日修楔之處劉襲壘

石為道名曰呼鸞夾栽岡南越王佗三月三日修楔之處劉襲壘

甘菊芙蓉與羣臣游宴

南薰宮殿迴凌虛。暗炙龍涎散玉除。藏用仙人二十四。車燒沈水笑麤疏。

清異錄廣府劉襲僭大號晚年作南薰殿柱皆通透刻鏤礎石各

置鑪燃香故有氣無形上謂左右曰隋帝論車燒沈水卻成粗疏

爭似我二十四

個藏用仙人

金柱銀衣儼玉壺。採珠更置媚川都。寺人競進才人寵。只合蕭閒作大夫。

五國故事銀立萬政殿飾一柱凡用白金三千錠又以銀為地衣

十國春秋置媚川都于合浦縣定其課令入海五百尺採珠

又帝委政于宦者襲澄樞陳延壽及才人盧瓊仙等臺省官僅充

員而已清異錄劉襲僭立奢麗自恣在宮中自稱蕭閒大夫

流花橋外水云。丹荔含漿映薄暝。也博一時妃子笑。遺釵墮珥醉紅雲。

廣東新語城北有芳春園桃花夾水二三里一名甘泉苑其橋曰

流花銀與富人為紅雲宴于此雨後往往拾得遺釵珠貝知為亡

國之遺物也。十國春秋帝命荔支熟時設紅雲宴以樂後宮歲以爲常。

曉色朦朧赴上林。花枝角勝採春深。阿誰喧笑全輸却。買讌頻催獻要金。

清異錄劉鋹在國春深令宮人門花凌晨開後苑各任采擇少頃赦還宮鎖後苑膳訖普集角勝負于殿中負者獻要金要銀買宴

亭館清幽地更偏。一尊淺酌共流連。綠天深處親題字。親錫佳名扇子仙。

十國春秋南海有蘇氏園者雅稱幽勝後主攜李蟾妃微行至此憇酌綠蕉林中大書蕉葉曰扇子仙後人構亭于上以志異名爲

亭云

玉朶銀絲簇髻青。蕊珠宮裏態娉婷。香殘粉冷歸何處。只有花田賸素馨。

廣東新語素馨斜在廣州城西十里南漢葬美人之所有美人喜簪素馨死後遂多種素馨于塚上故曰素馨斜以彌望悉是此花又名曰花田十國春秋宮人素馨惟喜插白花遂名其花曰素馨花

瓊仙端不讓瓊芝。秩進才人管百司。腕白身輕來月下。幽吟還似在宮時。

十國春秋盧瓊仙與黃瓊芝並爲女侍中朝服冠帶參決政事後主進位陞瓊仙秩爲才人廣東新語盧瓊仙劉鋹之才人也崇禎間有請凡仙者瓊仙至題云身輕不許風中立腕白愁教月下看

新署宮衙作候窗。祇應獨夜守明釭。妖淫羞煞波斯女。裸逐相看大體雙。

清異錄南漢劉晟殿側置宮人望明窗以候曉宮人謂之候窗監

又劉鋹得波斯女黑脂而慧豔善淫銀嬖之賜號媚豬又選惡

少年配以雛宮人使褫衣露偶銀

遠游冠服紫霞裾。內殿尊嚴奉女巫。寶帳高懸呼太子。玉皇昨降上清都。

十國春秋女巫樊胡子自言玉皇降胡子身帝于內殿設帳幄陳

實貝胡子冠遠游冠衣紫霞裾坐帳中宣禍福呼帝為太子皇帝

昌華苑裏月如霜。野蕘叢生輦路荒。執梃降王嗤作長花名。誰喚小南強。

葉廷珪海錄圖經蒔子州在番禺縣劉氏子其上創昌華苑

國故事大寶末年野蕘生于宮殿通鑑太宗將討北漢銀進言五

曰臣率先來朝願得執梃為諸國降王長清異錄南漢每見南北

軋軋機聲萬戶同。八牀山茗摘幽叢。好開明月春風圃。老作湖南一令公。

按馬殷梁開平元年為楚王傳希聲希範希廣希萼希崇五主為

南唐所滅十國春秋湖南不事桑蠶高郁勸王令輸稅者以帛

代錢由是機杼大盛。又高郁請聽民售茶。由是屬內民皆得摘。山收茗號曰八牀主人。堯山堂外紀。馬殷建明月園于潭州。命徐仲雅賦詩。鑿開青帝春風。臣往湖南。馬殷冊命。或欲稱臣。呼般為殿下。琛謂之曰。豈有湖。南一令公。稱藩唐室。復欲天使。稱臣哉。既見般。但呼公而已。

娉婷秀質。毓蘭房。愛主盈盈。駕七香。唇齒遠聯。秦晉好。纔歸珠海。又錢塘。

十國春秋。南平王劉巖求婚。許之王遣弟永順節度使存送女子。廣南吳越王錢鏐為其子傅璠來求婚。許之。命掌書記李岷馬匡。吳越女于。

丹砂塗壁。爛生光。十六樓成。又五堂。合殿更看雲氣繞。九龍爭吐篆烟香。

十國春秋。文昭王希範作天策光政等十六樓。天策勤政等五堂。塗殿率用丹砂。通鑑希範作九龍殿。刻沉香為八龍。長十餘丈。抱柱相向。希範居其中。自為一龍。三楚新錄。凌晨將坐。先使人焚香于龍腹中。烟氣鬱然而出。若口吐焉。

麝香風煖日遲遲。嘉宴堂開泛玉卮。妒殺風流徐學士。會春園裏賦新詩。

十國春秋。王建有會春園。嘉宴堂。金華殿。開携子弟僚屬于會春園游宴。學士徐仲雅等賦詩。上觴晝夜無節。湖湘故事。馬氏作會春園。開宴。徐東野作詩。有山色遠堆螺黛雨。草梢春憂麝香風。為當時所稱。

漏盡銅壺醉未休。可堪花謝漢宮秋。馬家婦是彭家女。長夜何曾縱夜游。

通鑑天復三年楚順賢夫人彭氏卒彭夫人貌陋而治家有法希範憚之既卒希範始縱聲色為長夜之飲十國春秋秦國夫人薨石文德獻挽詞有月沉湘浦冷花謝漢宮秋何王品為挽詩第一以其辭之忽也遽索檐子疾歸且以其言告文昭王王笑曰此釋氏禪機耳何不答以彭家女馬家婦則禪機立解矣夫人笑曰此釋性是妾無見性之過也

衆駒爭棧亦堪悲。苦諫深閨淚暗垂。一片梧桐曾井月。倉黃不似景陽時。

十國春秋許德助語吳人曰楚國雖小舊臣宿將故在也願吳朝勿以為念他日衆駒爭棧後可圖耳通鑑馬希萼調朗州丁壯為鄉兵將攻潭州其妻苑氏諫曰兄弟相攻勝負皆為人笑不聽已而敗歸苑氏泣曰禍將至矣余不忍見也赴井而死

家山高會唱吳謳。玉爵金尊迭勸酬。喜見白頭鄰媼在。寧馨猶復說婆留。

按錢鏐梁開平元年為吳越王傳元確宏佐宏倣四主後納土于宋十國春秋王置酒高會父老男婦八十以上者金尊百歲者玉尊王執爵上壽高揭吳音為歌舉座賡之叫笑振席寧馨肅世家王衣錦親巡有鄰媼九十餘攜壺漿迎王曰錢婆留寧馨之將棄于井祖妣知非常人固不許因小字曰婆留而井亦以名

焉

春露秋霜淚暗揮。萱闈長日色依依。層樓親負同歡笑。衣錦分明是彩衣。

吳越備史王純孝稟于天性每春秋祭享必鳴咽流涕嘗曰今日貴盛皆由積善所致但恨祖母不能見耳嘗游後庭層樓皇妣春秋高不能上王親負而登焉

深宵機杼月黃昏。寸帛時關民隱存。暇日偶尋游賞地。百縑爭肯施空門。

吳越備史正德夫人吳氏將游奉國寺王乃命帛百縑以備散施夫人曰妾備嘗機杼之勞遠以游賞費之非恤民之道遂不受而罷

陌上花開鶯亂飛。香車過處色芳菲。君王不道多情甚。贏得歌聲緩緩歸。

東坡陌上花序吳越王妃歸臨安王以書遺妃曰陌上花開好緩緩歸矣吳人用其語為歌含思宛轉聽之悽然

元女聯姻沁水開。吹簫未下鳳皇臺。鸞鏘重見如雲盛。百兩還從帝里來。

十國春秋天祐三年唐哀帝選武肅王第三子傅瑛尚壽昌公主未及降而卒天祐四年哀帝又選武肅王第十五子傅璟為駙馬

侍女中宵各主更。綴鈴枕上夜頻驚。後庭樂部渾拋卻。祇鼓胡琴一再行。

吳越備史王每夕必列侍女各主一更戒之曰外有報事當振鈴聲以爲警省又以圓木小枕綴鈴睡熟則敬由是而寤名曰警枕我又不恤政事爲長夜之飲也宴遂罷

香含寶鴨篆烟融鑄得銅容奉蕊宮道服曾宗黃老學松風一曲奏絲桐

吳越備史王命鑄王妣恭懿太夫人銅容二致于奉國金地二尼寺恭懿夫人幼而婉淑善鼓琴頗尙黃老學居常被道士服餘皆布練而已

錦棚繡祿飾珠鈿銀鹿成羣戲帳前誰是釋迦親抱送宮中特鑄洗兒錢

吳越備史莊穆夫人馬氏常置銀鹿于帳前坐諸公子于上夫人閱其聚戲喜重顏色十國春秋穆王第十四子儼初生之夕夫人命鑄金銀大錢爲洗兒之具

曾駕雲駟觀帝畿金銀湯藥錫宮闈駢蕃天寵加尤渥特典還封異姓妃

十國春秋開寶九年王與妃及世子入覲加封吳越國王妃宰相言異姓無封妃故事太祖曰行自我朝表特恩也妃辭謝中宮賜金銀衣著湯藥法酒等

彩圖揮漢影亭亭鑄徧華嚴幾度經更乞君王親作記夕陽金碧照南屏

十國春秋黃妃嘗于南屏山雷峯顯嚴院建塔奉藏佛螺髻髮名
黃妃塔塔高四十餘丈兀立層霄金碧璀璨建塔時以石刻華嚴
經鱗鬘其下忠
懿王有建塔記

西湖湖水碧溶溶。十里樓臺罨畫中。複道衣香人影亂。一時同在水晶宮。

按王審知梁開平三年爲閩王子延翰延鈞嗣稱帝傳昶義二主
義爲朱文進所弑湧幢小品僞閩王延翰跨城西西湖築室十
餘里號曰水晶宮每攜後
庭游宴從子城複道以出

羽葆霓旌扈屬車。溪田處處麗如霞。不知宮錦裁多少。鋪徧泉州母后家。

十國春秋惠宗幸泉州如皇太后母家謁黃氏家廟田鋪緹錦木
被彩繪因名里曰錦里驛曰錦田居曰錦第溪曰錦溪墓院曰錦
溪院

新築長春夜宴開。萬枝龍燭映蓬萊。靚粧侍女分行立。玉腕金尊次第來。

十國春秋永和元年立淑妃陳氏爲皇后后本昭武帝侍婢名金
鳳惠宗嬖之築長春宮以居數爲長夜之飲每宴燃金龍燭數百
枝敕宮婢數十擎杯杵多金玉瑪瑙琥珀玻璃之屬以次遞進不
設几筵

堂開甘露兩株椽。珠琲金莖早著花。相約傾筐聯雅會。清人樹底試新芽。

清異錄偽閩甘露堂前兩株檄鬱茂婆娑宮人呼
爲清人樹每春初嬪嬙戲摘新芽堂中設傾筐會

錦衣簇簇映紅妝。絃管聲喧蘭麝香。上已風光修楔好。桑溪溪畔共流觴。

金鳳外傳三月上已延鈞修楔桑溪金鳳偕後宮雜衣文錦列坐
水次流觴娛暢沈麝之氣環佩之音達于遠近途中絲竹管絃更

奏番迭

紫蓼青蒲浪影浮。短衣飛棹競中流。樂游新曲同聲唱。長奉君王鬪彩舟。

金鳳外傳端陽日造彩舫于西湖每舫載宮女二十餘人衣短衣
鼓楫爭先延鈞御大龍舟以觀金鳳作樂游曲使宮女同聲歌之

曲曰西湖南湖鬪彩舟青蒲紫蓼滿中洲波渺渺水悠悠長奉君
王萬歲游

大牀長枕暖生春。帶雨尤雲雜笑顰。更向水晶屏下望。分明玉體看橫陳。

金鳳外傳延鈞張長枕大牀擁金鳳與諸宮人裸臥造水晶屏風
與金鳳狎淫于內令宮女隔屏覘之

鏤金錯彩燦牙牀。飛燕宮中赤鳳翔。誰信長春明月夜。九龍帳底貯歸郎。

十國春秋惠宗晚年得風疾后遂與幸臣歸守明私惠宗嘗命錦
工造縷金五彩九龍帳于長春宮既成進之守明日宿于內國人

帳惟貯一歸郎

曼殊陀利闌穠華。紅雨飛空整復斜。好設六宮三昧宴。依稀天女散天花。

清異錄閨昶春餘宴後苑飛紅滿空昶曰彌陀經云雨天曼陀羅華此景近似今日觀化工之雨天三昧宜召六宮設三昧宴

金礎珠簾奉麗華。坐還同席出同車。情根不斷人間種。猶作鴛鴦一樹花。

金鳳外傳延鈞爲春燕造東華宮以真珠爲簾帳範金爲柱礎立十國春秋康宗后李氏本惠宗宮人名春燕有色康宗烝焉遂立

爲皇后行則同輿坐則同席後康宗與后葬蓮花山側冢上有樹生異花似鴛鴦交頸時人名曰鴛鴦樹

剩粉殘香鎖畫樓。蓮花山畔黯松楸。卻憐一樣傾城色。化作胭脂土一邱。

十國春秋康宗同李后葬蓮花山側先是陳后與惠宗亦葬是山後亂兵發諸陵剔取寶玉后及陳后容色如生鮮血流潰山爲之

赤世遂呼其山曰胭脂山

銀葉杯深醉不醒。醉中生殺任傾城。九龍殿內簪花出。怪是桃林又鼓聲。

五國故事延義在位鍊銀葉爲酒杯名曰醉如泥十國春秋賢妃尙氏有殊色景宗最憐龍焉醉中妃所欲殺則殺之所欲有則

宥之五國故事延義將與僞妃上官氏出幸上官之私第首遇

花自九龍殿事簾而出三爲簾所拂墜于地既而不論數步遇晉害盡有甌閩之地至子延義桃林地中復有鼓聲其年延義爲左

右所殺王
氏遂滅

吳姬唱罷又韓娥。聽徧春風幾曲歌。錦段鮮明紅破束。歌聲何似哭聲多。

按高季興唐同光元年為南平王傳從誨保融保勗繼冲四主為宋所滅堯山堂外紀貫休避地洛宮荆帥高氏優待之會有言時政不治乃作酷吏詞以刺之有吳姬唱一曲等開破紅束韓娥唱一曲錦段鮮照屋寧知一曲兩曲歌曾使千人萬人哭

渚宮亭上宴仙曹。簇簇紅妝束錦綵。四十朱絃聲競奏。當筵齊抱紫檀槽。

十國春秋天福八年王鏐江陵城西南隅為池立亭于上曰渚宮堯山堂外紀王仁裕嘗使江渚高從誨出女妓數十並善彈胡琴仁裕有詩美之云紅妝齊抱紫檀槽一抹朱絃四十條

看花臺畔繞春風。幾醉金隄十里中。作得琅玕新檻子。一枝深護海珠叢。

江陵志餘高氏常修築金隄厥後江勢改徙而看花臺一帶十五里猶存古跡土人呼為高王古隄焉十國春秋侍中保勗好營造臺榭有估客自嶺外來得龍眼一枝獻于保勗保勗命作琅玕檻子置之曰海珠叢

杞梓堂開後苑連。清泉一鏡子城邊。轆轤聲斷肩輿日。孤柏蕭蕭泣杜鵑。

十國春秋開運二年建杞梓堂江陵志餘高氏井在子城內高王後苑之井也宋兵入城繼冲以肩輿暴井上給內人入與多墮

井死後人哀之
植柏建祠于上

淨業同修入化城。雲鬟剪卻戒衣成。最憐年少金閨女。簾外鐘傳五寺聲。

十國春秋武信王五女失其名相傳五女俱幼年好道薙髮爲女
僧各止一處一曰佛華寺一曰菩提寺一曰莊嚴寺一曰石佛寺
一曰法輪寺

幼讀黃庭內外經。夢中彷彿遇湘靈。琵琶翻盡人間調。疑向麻姑指上聽。

十國春秋荆南仙女適文獻王子保節五歲通黃庭內外經及長
善琵琶一夕夢見金銀宮闕中有仙人披羽服自稱曰麻姑傳以
樂曲每夕輒夢遇之歲餘得
百餘調都非人間所曾有

昆玉金友漢家孫。母后深宮鞠育恩。不分麻衣還似雪。碧天涼月照冤魂。

按劉崇更名明稱帝于晉陽是爲北漢傳鈞繼恩繼元三主爲宋
所滅十國春秋睿宗后郭氏天會時常養英武帝兄弟爲子
宋史北漢主繼元妻段氏嘗以小過爲孝和后郭氏所責旣而病
卒繼元疑后殺之后方縗服哭孝和帝于柩前繼元遣其嬖臣范
超執而私
縊殺之

僧女翩翩入禁闌。承恩椒寢獨乘鸞。册妃底車貽鄰笑。問罪遺書自契丹。

宋史北漢主寵姬郭氏醫僧之女也有殊色北漢主嬖之將立為妃樞密使段常以所出非偶恐貽笑鄰國北漢主乃止十國春秋遼主貽書來責其詞曰段常爾父故吏本無大惡一旦誣害婦言是聽非爾而誰帝惶恐謝罪

手揮如意講華嚴施積如山國用添知是後宮多內寵更將首飾助香奩

十國春秋五臺山僧繼容故燕王劉守光子也睿宗嗣位用宗姓例拜鴻臚卿繼容能講華嚴經手執香如意四方爭為供施多積蓄以佐國用宋史北漢多內寵繼容獻首飾數百副

罪罪大雪碎瓊粧一夜春風入苑牆官妓如花齊拜賜晉陽宮裏作端陽

清異錄周季年東漢國大雪盛唱曰生怕赤真人都來一夜春後宋以賜將校先是宋太宗將至晉陽語侍者我以端午日當置酒高會于太原城中及帝降果五月五日也

十國宮詞跋

五代史之闕佚不可枚舉卽如周世宗有兩皇后俱係符氏薛歐所載祇有宣懿皇后符氏而已文獻通考則云世宗後符后宋初號周太后太平興國中入道號玉清仙師大事且不能紀而況瑣事乎孟賦魚先生搜羅十國典故作爲宮詞百首而以其事分注于下非特情詞悱惻能動閱者之心卽其所徵引亦足以廣見聞而昭鑒戒故亟登之壬寅初夏吳江沈樾惠識

十國宮詞

南匯吳省蘭泉之著

吳

弟太祖楊行密傳子烈祖渥被弑弟高祖隆演立薨
睿帝溥立讓位于南唐歷匹主凡四十六年

黑雲都外陣雲收。卅六英雄扈豫游。涂上甜梅新賜號。蜂糖早又諱揚州。

孔傳六帖楊行密有銳士五千衣以黑緇黑甲號黑雲都歐陽
修五代史吳世家行密所與起事劉威陶雅之徒號三十六英雄
揚州民呼密為蜂糖行密據江淮滁人謂若溪為菱溪杏為甜梅

郎君玉貌欸和來。忽地簫聲起鳳臺。邂逅早聯兩姓好。楊頭錢眼各無猜。

陶岳五代史補楊行密嘗命宣州刺史田頔圍錢塘錢鏐危急遣
其子元璩修好于行密元璩風神俊邁行密見之甚喜因以女妻
之遂命顏罷兵又先是行密與鏐勢力相敵行密嘗命以大斧科柳謂之斫楊頭至
為錢貫號曰穿錢眼鏐聞之每歲命以大斧科柳謂之斫楊頭至
以元璩通婚二境漸睦
穿眼斫頭之論始止

東院親軍署職優。射場無事更勾留。十圍地室光明燭。夜夜麻衣試擊毬。

吳任臣十國春秋吳烈祖世家初內營有親軍數千屯于牙城之
內王悉遷出于外以其地為射場已而選壯士號東院馬軍廣署之

親信以爲將吏。陳彭年江南別錄景王居父喪掘地爲室作晉樂夜燃燭擊毬燭大者十圍一燭之費數萬錢。

擁柱盤桓見白衣真龍託夢是耶非。參軍慣作逢場戲。又試金丸頂上飛。

十國春秋吳高祖世家徐溫嘗夜夢入宮見白龍繞殿柱詰旦見隆演衣白衣擁柱而立心異之至是得嗣立。又徐氏專權王幼儒不能自持而知訓尤凌侮之嘗與王爲優自爲參軍使王爲蒼鵠以從又汎舟濁河王先起知訓以彈彈之。

俚謠傳唱渺無端。雪似楊花李玉團。江上樓船親試覽。書生挾策話迎鑾。

十國春秋吳高祖世家武義元年有童謠云東海鯉魚飛上天又有謠云江北楊花作雪飛江南李樹玉團枝李花結子可憐在樓似楊花無了期又吳睿帝本紀順義四年冬十月王如白沙觀樓船太學博士王穀上書請改白沙爲迎鑾略曰日月所經星辰盡爲黃道鑾輿所止井邑皆爲赤縣王命更其名曰迎鑾鎮。

辟穀長辭廟算勞。嵯峨殿榜列仙曹。丹陽何處尋漁父。殘笛聲聲憶漸高。

十國春秋吳睿帝本紀天祚三年冬十月己丑齊主表請改江都宮殿名皆于仙經內取之帝常服羽衣習辟穀術陸游南唐書烈祖本紀昇元二年夏五月讓皇屢請徙居戊午收潤州治爲丹陽宮以平章事李建勳充迎奉讓皇使甲寅徙讓皇居丹陽宮丹陽宮春以平章事李建勳充迎奉讓皇使甲寅徙讓皇居丹陽宮至十國春秋有漁父鼓漁者傳太祖初起廬州稱八營子孫鱗次而霸也。

南唐烈祖李昇傳三子元宗璟璟傳後主煜降于宋歷三十九年

木再呈奇月再延。維新鼎命百靈駢。內家從識駝蹄燄。夜捧金奴侍御筵。

龍堯江野錄李昇受徐溫之禪也其日江西楊化爲李洪州李
生連理詔還李姓國還號唐又南唐園丘之際太史奏月延三
刻陸書雜藝傳某御厨烈祖受禪御膳晏設賴之其食味有驚
鶯餅天喜餅駝蹄餞春分餞密雲餅鐘糲炙瓏璫燄紅頭筵五色
餽飽子母饅頭舊法具存呼爲烏舅案上捧燭鐵人高尺五殿燭
不用脂蠟灌以烏柏子但呼爲烏舅案上捧燭鐵人高尺五殿燭
楊氏時馬廐中掇過我金奴來
須燭喚小黃門掇過我金奴來

圖畫天然摹雪夜。交輝棣萼小樓西。朝元纔了芳菲早。又縱宜春綠耳梯。

鄭文寶江表志元宗友愛之分備極天倫太弟景遂江王景邁齊
王景達出處游晏未嘗相舍臣皆有詩詠徐鉉爲前後太弟以弟
樓展晏咸命賦詩夜繪曲盡一時之妙御容高冲古主之寒林董
合爲一圖召名公圖繪曲盡一時之妙御容高冲古主之寒林董
下侍臣法部絲竹周文矩主之樓閣無非絕筆清異錄宜春王
元主之池沼禽魚徐崇嗣主之圖成無非絕筆清異錄宜春王
從謙嘗春日與妃侍游宮中後圃妃睹桃花盛開欲折而條高
小黃門取綵梯獻從謙乘駿馬擊毬乃引韉至花底痛采芳菲顧

謂嬪妾曰我之
綠耳梯何如

裘衫沓渺去青城。無復金門羽客迎。別試承漿鎔雪手。內廷重欽耿先生。

十國春秋南唐譚峭傳峭字景昇師嵩山道士得辟穀養氣之術
夏則服鳥裘冬則綠衣或臥風雪中後入青城山仙去陳舜
愈廬山記保大道士譚紫霄賜號金門羽客亦曰元流真侶按
景昇號紫霄真人吳淑江淮異人錄保大中南海貢龍腦漿能
補益元宗嘗以漿調酒服之耿先生曰未為佳也乃以縑囊貯
腦懸于琉璃餅中食頃曰已漿矣元宗聞滴瀝聲少頃視之勺
水矣明日發之半瓶香氣馥然江表志耿先生大雪時取雪投
熾炭中灰埃甚起徐以灰周覆之過食頃取出赫然者銅置之
地及冷爛然為錠銀視其下如垂酥滴乳之狀陸書方士傳耿
先生者父雲軍大校少為女道士垂玉貌鳥爪嘗著碧霞帔自稱比
邱先生始因

敲枰圍坐畫屏隈。陪試春場鞠一回。宿諾深銜真不爽。銀鞵新著謝恩來。

陸友仁硯北雜誌周文矩畫重屏圖江南中主兄弟四人圍棋紙
上著色人皆如生前鄭文實南唐近事元宗嘗謂馮權曰我富
貴日為爾置銀鞵及保大初因擊鞠賜銀三十斤權命工鍛鞵穿
之

鞵扇輕颺碧箭抽。蒼苔紅葉總非儔。飲香亭外秋如水。侍輦同參警列候。

清異錄俗以開花風爲風韞扇陳耀文天中記南唐元宗廬山
百花亭刻石云蒼苔迷古道紅葉亂朝霞清異錄保大二
主幸飲香亭賞新蘭詔苑令取滬溪美土爲馨列侯壅培之具
列一本作烈

北苑新妝的乳茶六宮清讌內香誇帳中別有留春法。熬取鵝梨一穗斜。

毛先舒南唐拾遺記建陽進茶油花子大小形製各別宮嬪
于面皆淡妝以此花餅施額上號北苑妝宋庠楊億談苑江
李氏別令取茶之乳作片或號京錠的乳及骨子等名至清
保大七年召大臣宗室赴內香燕凡中外夷所出以至和合
飲佩帶粉囊共九十二種沉香用之無馮贊南部烟花記江
主帳中香法以鵝梨蒸沉香用之

硯官尊並墨官尊。小殿龜頭細與論。禿盡翹軒諸葛帚。千秋祖帖勒昇元。

羅願新安志龍尾山在婺源東南南唐元宗時歙守獻硯薦工
少微擢硯官陳師道後山叢話南唐于饒州置墨硯官歲貢有
數李氏本姓奚賜國姓世爲墨官云十國春秋南唐元宗本紀
帝在位嘗構一小殿謂之龜頭常居處以視事左右偵其所在必
問曰大家何在龜頭裏清異錄宣城諸葛筆妙甲當時號翹
軒寶帚十國春秋南唐元宗本紀宣城諸葛筆妙甲當時號翹
炳摹勒古今法帖上石原案馬傳慶言後主命徐鉉以所藏法
入石名曰昇元卽此帖也

停觴久爲聽歌聲。花外垂除空復情。一笑當筵除拜普。仙僚同話李家明。

燒槽拜賜出東房。新破番番迭和長。要情重瞳頻醉舞。擣囊花底按霓裳。

馬令南唐書談諧傳王感化善謳歌元宗嗣位晏樂擊毬不輟嘗
 乘醉命感化奏水調詞感化惟歌南朝天子愛風流一句如壁之
 數也。又宗輒覆杯歎曰使孫陳二主得此一游家明從元宗之
 尊也。又李家有明談諧敏給工為諷辭元宗好游家明從元宗之
 賞也。後苑李近臣臨池垂釣臣下皆登魚元宗獨無獲家明從元宗之
 曰玉髮垂鈎興正濃碧池春煖水溶溶凡鱗不敢吞餌知是君
 王合釣龍元宗大悅又景遂過景達皆以皇弟加爵而恩未
 及臣下因置酒殿中家明俳戲為翁媼列坐婦進飲食拜禮
 煩翁媼怒曰自家官自家家何用多拜也元宗笑曰吾為國主恩
 不外覃子是百官進秩有差原注江浙謂舅為官謂姑為家
 其書女憲傳後主昭惠后周氏通書史又善音律尤工琵琶元宗賞
 其藝取所御琵琶時謂燒槽者賜焉。又善音律尤工琵琶元宗賞
 后復作邀醉舞恨來遲新破者行于時汝能創為新聲則可矣后
 嘗雪夜酣燕舉杯請後主起舞後主曰汝能創為新聲則可矣后
 卽命箋綴譜喉無滯音筆無停思俄頃譜成所謂邀醉舞破也叢
 又後主本親後主無滯音筆無停思俄頃譜成所謂邀醉舞破也叢
 色正紫類丁香號紫風流江南後主詔取植子移風殿賜名蓬萊
 紫正紫類丁香號紫風流江南後主詔取植子移風殿賜名蓬萊
 譜尋之盡
 得其聲

匝。匝春陰錦洞天。纖裳高髻鬪嬋娟。花香拂拂隨人影。鳳子紛紛黏綠鬟。

清異錄李後主每春盛時梁棟窗壁柱拱階砌並作隔簾密抑難
花榜曰錦洞天書后妃傳昭惠后創為高髻纖裳及首翹鬢
朵之妝人皆效之十國春秋南唐列傳宮人秋水喜簪異花芳
香拂水嘗有蝶繞其上撲之不去

親迎銀鵝繡被陳金錢四撒帳生春明珠依舊深宵展。恰照香階衩襪人。

馬書女憲傳繼室周后將納采後主先令校鵝代白雁被以文繡
使衙書及親迎錢其文曰長命富貴金玉滿堂又有忠孝傳家五男
二女李書撒帳太平封侯拜相之類王銍默記江南大將獲李後主
龍姬見燈輒閉目云烟氣易以蠟燭亦閉目云烟氣愈甚曰然則
宮中未嘗點燭耶云宮中本閣至夜則懸大寶珠光照一室如日
中也馬書女憲傳后自昭惠殂常在禁中後主樂府詞有衩襪
步階手提金縷鞦之類多傳于外至納后乃成禮而已

主香長日奉柔儀。鋪殿花光望欲飛。等得新涼秋露滿。忙收天水染羅衣。

清異錄李煜僞長秋周氏居柔儀殿有主香宮女其焚香之器曰
把子蓮三雲鳳折腰獅子小三神記字金鳳口罍玉太古容華鼎
凡數十種郭若虛圖畫見聞志江南徐熙輩有子雙嫌幅素上
畫叢艷疊石傍出藥苗雜以禽鳥蜂蟬之妙熙乃供李主宮中掛
設之具謂之鋪殿花宋史南唐李煜家煜收露水染碧以經夕
未收會露下其色愈鮮明煜愛之自是宮中競收露水染碧以衣
之謂之天水碧時謂逼迫之徵

小亭窄窄紅羅葉格香燼貯不多密意難傳祇勸酒萬花叢映醉顏酡

十國春秋南唐繼國后周氏傳後主常于羣花中作亭以紅羅押以玳牙雕鏤華麗而極迫小僅容二人每與后酣飲其間焦羅前

紅羅疊間白羅層檐角河光一曲澄碧落今宵誰得巧淩波妙舞月新升

五國故事南唐後主每夕延巧必命紅白羅百匹以豎為月宮天河之狀丹青志後主嘗坐碧落宮中張八尺琉璃屏畫夷光獨立圖道山新開李後主宮嬪窅娘織麗善舞後主作金蓮高六尺蓮中作品色瑞蓮令窅娘以帛纏足纖麗善舞後主如新月狀著素襪舞金蓮中回旋有淩波之態唐鐫詩蓮中花更好雲裏月常新為窅娘作也

牙籤萬軸手親儲玉貌何曾下玉除妒殺黃羅團扇女懷中偷展錯刀書

馬書女憲傳保儀黃氏容態華麗冠絕當時顧盼顰笑無不妍姣其書學伎能出于天性後主雖屬意會小周專房進御稀而品秩不加第以掌墨實而已云風情漸老見春羞到處魂銷感舊游多嘗以黃羅扇書詞賜之云風情漸老見春羞到處魂銷感舊游多謝長條似相識強垂烟態拂人頭如寒松霜竹謂之金錯刀善書畫書作顛筆樛曲之狀遒勁如寒松霜竹謂之金錯刀

鴛鴦寺主感銷零譜在流珠指上聽還證多生花佛諦細摹金字施心經

清異錄李煜在國微行娼家遇一僧張席煜遂爲不速之客垂醉
大書右壁曰淺斟低唱優紅倚翠大僧鴛鴦寺主傳風流教誨
僧妓不知爲誰也十國春秋南唐列傳流珠後主嬪御也破流通
慧工琵琶後主嘗製念家山破昭惠后製邀醉舞恨來遲御二破流
傳既久樂籍多忘之後主追念昭惠后理其舊曲顧左右無知者
流珠獨能追憶無失後默記李後主手書金字心經一卷賜自書
喬氏後入太宗禁中聞後主薨出舍相國寺西塔院伏願彌勒尊前持一花而見
于後云故李氏國主宮人喬氏遇國主西塔院伏願彌勒尊前持一花而見
佛書般若心經一卷在相國寺西塔院伏願彌勒尊前持一花而見

前蜀高祖王建傳子後主衍滅
于後唐二世凡三十五年

神妝半面告祥符。穩坐金牀大業扶。恰喜壽春嘉節裡。仙宗呈進混元圖。

十國春秋前蜀高祖本紀初帝見裸體婦人于鹽井告曰若當
吾國土地主及即位遣官祭鹽井玉女之神神出半面享之
帝以卯年生至丁卯即位左右獻免子金上金牀之識帝命飾金爲
坐詔以金德王又帝以降生日爲壽春節諸僧進辟支佛牙道
士獻武成混元圖
案武成建年號也

秋楔宮妝結束牢。殘紅飄墮罷登高。多情龜化橋頭水。緩送燕脂咽暮濤。

張唐英蜀檣杭永平四年重陽建出游實歷寺妃后皆從其日宮
女四人逃匿搜尋不獲明日得之乃寺僧誘藏民家與僧二十二

人同斬
龜化橋

新裁麗句寫紅絲。總是烟花絕妙詞。教得歌伶承制好。低翻一段聖琉璃。

十國春秋前蜀後主本紀童年即能屬文甚有才思尤酷好靡麗之詞常集艷體詩二百篇號烟花集凡有所著蜀人傳誦焉清異錄王衍伶官家樂侍宴小池水澄天見家樂應制云一段聖琉璃

聖燈高下照巖梯。鳳藻聯賡鳳字題。但是碧烟紅霧裡。宮銜隨處勒金泥。

一統志聖燈蓬山者為最初出三點漸至數十點高下相應離合不常未知何物十國春秋前蜀後主本紀帝奉太后太妃禱青城山又歷丈人觀元都觀丹景山金華宮至德寺朝上清宮謁高祖塑像帝與太后太妃齊製辭勒石遂至彭州陽平化漢州三學山薄莫觀聖燈賦詩而還及天苴驛又賦詩案碧烟紅霧撲人衣太后題丹景山金華宮句也

憑樓展眺聖情娛。四面繪山當面廚。倚徧新妝殘醉裡。小娥扶上麝香輪。

孔平仲續世說衍結繪為山及宮室樓觀于其上又別立二彩海亭于前列諸金銀錡釜之屬取御廚食料烹燂于其間帝乃凭樓視之號曰當面廚為風雨所敗則易新者或樂飲繪山涉旬不敷自製醉妝詞清異錄王衍苑馬數百皆逸足也有名曰麝香輪

仙苑張筵侍夜游。交橫簪鳥雜觥籌。玉簫低唱深杯勸。沉醉嘉王淚未收。

蜀檣杭命于宣華苑中構重光太清延昌會真之殿清和迎仙之
宮降真蓬萊丹霞怡神之亭飛鸞之閣瑞獸之門帝時與諸狎客之
婦女游戲其中為長夜之飲十國春秋前蜀王宗壽傳嘗于九
日侍酒宜華苑乘間極言社稷將危涕泣不已潘在迎韓昭等曰
嘉王從來酒悲乃與諸狎客共撰新詞侑宗壽酒宗壽一飲而盡蓋
能省復命宮人李氏歌已所撰新詞侑宗壽酒宗壽一飲而盡蓋
懼禍也又李玉簫傳後主嘗宴近臣于宣華苑命玉簫歌已所
撰月華如水宮詞侑嘉王宗壽酒聲近臣于宣華苑命玉簫歌已所
傾倒宗壽懼禍亦為之盡觴詞曰輝輝赤赤浮五雲宣華池上月
華新月華如水浸宮殿有酒不醉真癡人

別酒仙橋送幾巡。珠冠金甲賽祆神。承恩恰侍流星輦。二十輪排二十人。

蜀檣杭北巡旌旗戈甲百里不絕衍戎裝金甲冠珠帽錦袖執
弓挾矢百姓望之謂如灌口祆神后妃餞于昇仙橋以宮人二十
人從清異錄蜀衍荒于游幸乃造平底大車下設四臥軸安五
輪凡二十輪牽以駿馬騎去如飛謂之流星輦

村店旗亭禁苑通。青衫交市笑春風。闌然一見成狼虎。猜鬼疑神沸六宮。

十國春秋前蜀後主本紀命大內造村坊市肆令宮嬪著青衫縣
帘鬻食男女雜齒交易而退帝與妃嬪輒為笑樂何光遠鑑戒縣
錄帝或晝作鬼神夜為狼虎潛入諸宮驚動嬪妃老少奔走往往
致卒

龍舟畫舫返雲汀。簇仗相迎七里亭。官裡敕排回鶻隊。蓮花冠子暫拋停。

十國春秋前蜀後主本紀帝浮江南下龍舟畫舫照耀江水舟子皆衣錦繡帝自製水調銀漢之曲命樂工歌之司馬光資治通鑑蜀主至成都百官後宮迎于七里亭妃嬪作回鶻隊入宮十國春秋前蜀後主本紀妃嬪皆戴金蓮花冠衣道士服

步障層圍白打來。潛移早度錦城隈。御香飄處人能識。爲是中參皂莢灰。

夏樹芳詞林海錯章莊詩內官初賜清明火上相開分白打錢白打卽今之蹴鞠戲也十國春秋前蜀後主本紀雅好蹴鞠引錦步障以翼之往擊毬其中漸至街市而不知續世說王衍燕諸香晝夜不絕久而厭之更薰阜莢以亂其氣

不語停杯睿慮厪。霓裳罷按夕陽曛。富筵回得天心喜。傳誦溫江十在文。

蜀檣杭咸康元年四月會羣臣舉觴不飲容色不悅特進顧在玠曰臣聞主憂臣辱今陛下臨軒不樂臣願請罪衍曰北有後唐南有蠻詔不能弔伐所以憂也在玠曰與土木朝廷有十臣在陛下何憂卽有洗馬林罕著十在文以憂進曰與土木朝廷有十臣在陛下何憂卽持斧鉞出鎮藩籬飾宮殿于退方命蠻與而遠幸爲覲之端爲禍之原有王承休在摧挫英雄吹揚佞媚全無才智繆處腹心斷爲禍命于戲玩之間戮仇讐于樞機之下有國之棟梁旣不棄無賄賂又不行有宋光嗣在受先王之付屬爲大國之棟梁旣不棄無賄賂又不退恣一門之奢侈任數力之驕矜徒爲貪饕之輩人實非社稷之奸謀有王宗弼在縲絏烟霄殊非蹇諤興亂本則逞章程之妙社稷之奸謀

則事類舌之能心口傾危尙居左右有韓昭左性懷慘毒心恣貪
殘焚蕪軍營恢拓私第不顧喧騰于衆口惟思自任于忿懷有歐
陽晃在酷毒害民井聚貨叨爲郡守實天恩瘡痍已偏于陽
安蒙蔽由憑于密勿有田魯儔同于苑君王金珠求滿于貪心有徐
但務奢華不守入輔弼第宅無謬于上佐君但唯而循旨有景潤
瓊在出爲留思入掌樞機常叨不次之恩每爲竊無厭之寵敷對惟
澄在搜求女色取悅宸襟素非忠勤實爲忝竊有嚴凝之月昏使
誇乎便捷佐時識乎經綸任臣如玩聖明致君爲樂紂之昏使
亡國之音趨有臣在陛下任臣如玩聖明致君爲樂紂之昏使
上乏唐虞之化有臣在陛下任臣如玩聖明致君爲樂紂之昏使
笑賜彩馬五百段一加開府在山珣以外紀蜀主衍嘗罕自執溫
太庭花思
越人曲

玉貌清才妙擅雙。新詞傳唱釣魚缸。夜闌更寫婆婆娑。竹影透南軒。月一窗。

十國春秋前蜀昭儀李氏傳王衍昭儀李氏名舜絃酷有詞藻所
著蜀宮應制詩隨駕詩釣魚不得詩多爲文士所賞圖繪寶鑑
西蜀李夫人夕獨坐南軒竹影婆娑可喜即起揮毫濡墨模寫
紙窗明日視之生意自足

後蜀高祖孟知祥傳子後主昶
降于宋二世凡四十四年

綃帳輕紅玉枕青仙能入夢。醉能醒瓊華。一去幃宮冷。獨旦迢迢七十屏。

清異錄皇明帳不知所自色淺紅恐是鮫綃之類又左宮中有十
 州三島像施之大小牀皆稱夜則燦錯如金箔狀又與仙帳云是
 玉為之體方所製左宮以授杜光庭進之蜀主與皇明帳為
 左宮王夫人所製孟蜀高祖晚年作以畫屏七十張關百鈕而
 帳宮二寶又帳十國春秋後蜀高祖已而改封福慶長公主與
 闕之用為寢所帳國春華長公主已而改封福慶長公主與
 克讓女也莊宗即位封贈晉國順長公主高祖慶極追冊為皇
 三年薨唐遣使歸葬冊贈晉國順長公主高祖慶極追冊為皇
 后

逢場毬馬暫開襟。鳴杼敦耕繫聖心。鳳紙祇看裁詔罷。又攜宸翰飭官箴。

五代史後蜀世家趙鼎好打毬走馬令其務出入阡陌勞來三農望杏
 德元年願勸農桑詔曰刺守縣令其務出入阡陌勞來三農望杏
 敦耕瞻蒲勸穡春鵲始轉便具籠筐蟋蟀載吟即鳴機杼之令長
 杭廣政四年趙鼎著官箴始轉便具籠筐蟋蟀載吟即鳴機杼之令長
 撫養安綏政在三異道在七絲驅難為理留犢為規寬猛得所風
 俗可移無令侵削無使瘡痍下民易虐上天難欺賦輿是切軍政
 是資朕之爵賞朕固不踰時爾俸爾祿民膏民脂為人父母罔不仁
 慈勉爾為戒體朕深思

佳日正逢明慶節。法雲寺裡特行香。近臣跪進黃筌筆。桃核宣來賜壽觴。

十國春秋後蜀後主本紀廣政元年十一月以誕生日為明慶節
 帝幸佛寺散香花藥夫人宮詞法雲寺裏中元節又是官家誕

降辰誕辰鼎臣東原錄館中有蜀人黃筌畫白兔甚佳蓋孟昶
生每誕辰卽獻畫也張唐英後蜀紀事孟昶時中書舍人劉光
祚獻蟠桃核酒杯云得于華山陳搏賜帛五十疋四川通志蜀
後主有桃核二扇每扇盛水五升良久成酒能醉人更互貯水以
供其晏

白紅紅萬朵攢洛陽花譜幾曾看參承新自宣華苑始識仙裁瑞牡丹

胡元質牡丹譜蜀中自李唐後未有此花凡圖繪者惟名洛陽花
至僞蜀孟氏于宣華苑中廣加栽植名之曰牡丹苑廣政五年牡
丹雙開者十黃者白者各三黃白相間者四後主宴苑中賞之有
深紅淺紅深紫淺紫淡黃鉅黃潔白正暈側暈金含稜銀含稜榜
枝副搏合歡重臺至五十葉面徑七八寸復有檀心如墨者香聞
五步蜀檣杭廣政五年三月復晏苑賞瑞牡丹從官皆賦詩

舊本新翻漣漫幕鐫不異太利初君王最薄纖浮體特敕官司勸韻書

曹學佺名勝志成都記孟昶有國其相母昭裔刻孝經論語爾雅
周易尚書周禮毛詩禮記儀禮左傳凡十經于石盡依太和舊本
歷年乃成洪邁容齋續筆廣政十四年成都石本諸經博士
儀禮年乃成洪邁容齋續筆廣政十四年成都石本諸經博士
孫逢吉書尚書校書郎周德政書爾雅平泉令張朋古書周易博
謹四通志詩話孟蜀後主崇尚六經恐石不效王衍作輕薄
易爲木板宋世稱刻本始于一百卷惜不傳今所傳邵武黃公紹
小詞乃敕史館集古今韻會五

卷三

二

集

者乃輯略耳。十國春秋後蜀後主本紀廣政十六年宰相母昭齋出私財百萬營學館且請鏤板印九經以頒郡縣從之。

聽朔先期敕大官緋羊首向食單刊玉霄自具清虛府只奉齋筵月一盤。

清異錄孟蜀尚食掌食典一百卷有賜緋羊其法以紅麴煮肉緊卷石鎮深入酒骨淹透切如紙薄乃進注云酒骨糟也。十國春秋後蜀後主本紀廣政十三年帝加尊號睿文英武仁聖明孝皇帝道號玉霄子。清異錄孟昶月旦必素飡性喜薯藥左右因呼薯藥為一盤。

冰肌玉骨耐煩炎。拜奉新詞妮夜蟾。池上風來執扇卻。雪香濃傍御衣霑。

蘇軾洞仙歌序僕七歲見眉州老尼姓朱自言嘗隨其師入蜀主孟昶宮中一日主與花藥夫人避暑摩訶池上作一詞朱具能記。今朱已死人無知此詞者獨記其首兩句云冰肌玉骨自清涼無汗暇日尋味豈洞仙歌令乎乃為足之。清異錄孟昶月夜水調龍腦末塗白扇上以揮風一夜與花藥夫人登樓望月誤墜其扇為人所得外有效者名雪香扇。

紅梔花種自仙巖。點綴釵梁綠鬢銜。香似梅兼有色。畫宜團扇繡宜衫。

耿煥野人閑話蜀主昇平日嘗理園苑申天師進花子兩粒曰紅梔子種之不覺成樹其花斑紅出其香襲人蜀主甚愛重之令圖寫于團扇或繡入于衣服或以絹素鵝毛做作首飾謂之紅梔子花蜀檣杭十月孟昶宴芳林園紅梔子花六出而紅清香如

梅時最重之

浣花溪水滑于油。面面芙蓉映好秋。下上龍舟簫鼓引神仙。宛在錦城游。

蜀檣杭廣政十二年八月。蜀游浣花溪。蜀中百姓富庶。夾江皆創亭榭。游賞之處。都人士女。傾城游玩。珠翠綺羅。名花異香。馥郁金

殿鎖千門。龍舟不觀水嬉。上下十里。人望之如神仙。之境。和曰。曲江

花外見樓臺。稱善久之。堯山堂外。紀蜀主和令羅城上。盡種

芙蓉。每至秋時。盛開四十里。皆錦鋪錦。繡高下。相照。和謂左右曰。自

露臺燈耀舞衣妍。一搦纖腰十萬錢。進御乞頒新位號。梳將高髻學朝天。

蜀檣杭廣政三年。上元觀燈。露臺舞倡李艷。孌有姿色。召入宮。賜

其家錢十萬。又後宮位號十有四品。昭儀昭容。昭華。保芳。保香

保衣。安宸。安蹕。安情。修容。修媛。修涓。等秩。比公卿大夫士。字文

氏妝臺記。孟和時。婦女治髮。為高髻。號朝天髻。

紅錦泥窗破臘天。金花樹樹四廊駢。官家隱愛忘憂字。口敕宣檯獨立僊。

陸游老學庵筆記。蜀人謂糊窗為泥。窗花。藥宮詞云。紅錦泥窗遠

四廊。清異錄。孟和時。每臘日。內官各獻羅體圈。金花樹子。梁守

駕錦成時只一梭。鋪裝早屏舊綾羅。清宵夢杳芙蓉帳。黃土留時不忍哦。

陶宗儀輟耕錄孟蜀主一錦被其閣猶今之三幅帛而一梭織成
 被頭作二穴若雲板漾蓋以扣于項下如盤領狀兩側餘錦則擁
 覆于肩此之謂駕衾也羅帳碧綾帷褥無錦繡諸飾本紀後主初襲位
 頗勤政事寢處惟紫羅帳名曰芙蓉帳又後主妃張氏傳妃名太華
 蓉花徧染繪為帳幔有專房之寵廣政初後主妃張氏傳妃名太華
 少擅殊色事後主有專房之寵廣政初後主妃張氏傳妃名太華
 人觀月餘不反居數日雷雨大作悲悼無已後數年鍊師李若冲
 瘞觀前白楊樹下明日急趣回鑾悲悼無已後數年鍊師李若冲
 于薄莫步白楊樹側忽見女子吟詩若有所怨詩曰一別鑾輿問今
 幾年白楊風起不成眠常見女子吟詩若有所怨詩曰一別鑾輿問今
 人耶鬼耶女子歿後言妾蜀妃張太華也因陪駕游此被震乞賜
 超拔若冲乃于中元節修長生金簡以答之未幾夢太華謝曰妾
 己受生人幽冥蒙師薦拔恩非淺領得生神九卷經後主聞之厚
 隨金簡出幽冥蒙師薦拔恩非淺領得生神九卷經後主聞之厚
 賁若冲

南漢
 列祖劉隱傳子高祖龔立降于宋歷五主凡六十七年

萬里梯航一笑休。玉堂珠殿造蠻陬。加尊新尚安豐頂。刺史傳呼到洛州。

袁樞通鑑紀事本末貞明元年劉巖以吳越王鏐為國王而已獨
 為南平王求封南越王帝不許巖謂僚屬曰今中國紛紛孰為天

子安能梯航萬里遠事僞庭乎由是貢使遂絕即皇帝位于番人
改元乾亨會輦隆平集龔爲玉堂珠殿飾以金碧翠羽見北
必自言世居咸秦恥爲南蠻王呼中朝止曰洛州刺史清異錄
南漢僭瀝小國乃作平頂帽自冠之由是風俗一變皆以安豐頂
尙爲

風流天子垂衣坐越國夫人迎輦回礎柱四圍香氣湧錯疑手握楚雲來

清異錄劉龔僭大號作南薰殿柱皆通透刻鏤礎石各置鑪燃香
故有氣無形上謂左右隋煬帝論車燒沉水爭似我二十四箇藏
用僊人縱不及堯舜禹湯不失作風流天子通鑑記事本末貞
明元年劉巖逆婦于楚楚王馬殷遣永順節度使馬存送之五年
正月漢主巖立越國夫人
馬氏爲皇后般之女也

朱髻白馬致深誠遠嫁長和貴主行布燮高才誰得偶中朝賦手仗王翎

五代史南漢世家雲南驃信鄭明遣使致朱髻白馬以求婚使者
自稱皇親母弟清容布燮兼理賜金錦袍虎綾紋攀金裝刀封歸
仁慶侯食邑千戶持節鄭昭仁昭增城縣主妻明案驃信即南詔長
龔及羣臣皆不能逮遂以隱女增城縣主妻明案驃信即南詔長
和國主也鄭明演志作鄭仁明布燮夷官名與坦綽久贊竝謂之
清平官猶中國之宰相孫逢吉職官分紀南詔獻朱鬣馬中書
舍人王
緡獻賦

軍門舊額乍貽。旋拜南宮獻七奇。狡獪更傳王學士。白虹見賦白龍時。

十國春秋南漢王定保傳高祖欲稱帝憚定保不從先遣出使荆南及即位而定保固知其心未善也預使倪曙迎勞且告以建國事定保曰建國當有制度吾入南門清海軍額猶在豈不見笑四方高祖常作南宮極土本之盛定保獻南宮七奇賦以美之一時稱爲絕倫又王宏傳官翰林學士承旨會白虹化爲白龍見三清殿宏爲賦上之文采鉅麗高祖悅改元白龍深加欣賞案五國故事乾亨九年八月白虹入三清殿中頗懷憂畏會宏欲悅乃巖以白虹爲白龍見上賦賀之巖大悅乃改元白龍

受得神丹保睿躬。雲華扇秘石堂穹。甘泉無事勞親決。只付雙雙女侍中。

十國春秋南漢中宗本紀乾和七年帝如英州受神丹于野人隨御雲華石室以藏焉王士點禁扁劉晟有昌華天明甘泉玩華秀華玉清太微七宮資治通鑑南漢主以宮人盧瓊仙黃瓊芝爲女侍中朝服冠帶參決政事

霞裾雲幄坐娥嫖。鵠立金鋪聽不淆。遙見至尊呼太子。侵祥說是玉皇教。

五代史南漢世家宦者陳延壽引女巫巫樊胡子自言玉皇降胡子身銀于內殿設帳幄陳寶貝胡子冠遠游冠衣紫霞裾坐帳中宣禍福呼銀爲太子皇帝國事皆決于胡子

內三公並內三師。紫闥黃樞判百司。聞說狀頭勤自闕。人間無復重須臾。

十國春秋南漢陳延壽傳後主信任宦者凡羣臣有才能及進士
狀頭或僧道可與談者皆先下蠶室然後得進亦有自宮以求用
者由是奄人十倍于乾和時諸使名不啻二百有三師三公等官
稍加內字以別之因謂士人爲門外人

一雙玉李進軍容。豔雨奢雲寶帳重。誰更偷陪題扇子。綠天秋淨曉陰濃。

十國春秋南漢李托傳托納二養女于後主長爲貴妃次爲美人
政事皆決于托而後行加特進開府儀同三司甘泉宮使兼六軍
觀軍容使行內中尉清異錄廣主常與幸姬李蟾妃微行至蘇
氏園憇酌綠蕉林廣主命筆大書蕉葉曰扇子仙蘇氏于其所起
亭子

私署宮司慣候窗。銀壺靜報漏琤琮。何來絕慧波斯女。別戀春場大體雙。

清異錄南漢劉晟殿側置宮人望明窗以候曉宮人謂之候窗監
又劉鋹得波斯女黑睛而慧絕善淫鋹賜號媚豬延方士求健
陽法選惡少配以雛宮人使褫衣露偶鋹與媚豬延行覽玩號曰
大體雙

名花美女正相當。一例呼來共色香。彩縷細盤雲鬢髻。還應壓倒小南強。

廣羣芳譜素馨考龜山志昔劉王有侍女名素馨冢上生此花
因以得名十國春秋南漢美人李氏傳同時有宮人素馨以殊
色進性喜插白花遂名其花曰素馨花清異錄南漢地狹力貧
不自揣度有欺四方傲中國之志每見北人盛誇嶺南之強世宗

遣使入嶺館接者遺以茉莉文其名曰小南強後銀面縛到洛陽見牡丹大駭有縉紳謂之曰此名大北勝

芳林花事圖紛紜買燕揮金勝負分又看離枝三百熟敕開內苑賞紅雲

十國春秋南漢後主本紀春三月命宮人鬪花內苑帝向晨時先敗後苑集衆采擇俄敕局戶還宮膳訖角勝于殿中令宦者抱關置樓羅歷以驗出入號曰花禁負者獻宴金宴銀買燕禁扁南漢有芳林園清異錄嶺南荔枝固不逮閩蜀劉鋹每年設紅雲晏正荔子熟時

魚英托子鏤椰壺。恰稱蕭閒署大夫。戲結珠龍情不淺。探波仍課媚川都。

清異錄劉鋹偽宮中有魚英托鏤椰子立壺四隻各受三升魚英蓋魚腦骨煥治之可以成器又劉鋹僭立奢麗自恣在宮中自稱蕭閒大夫吳垌五總志劉鋹性絕機巧嘗結真珠勒為戲龍之狀王象之輿地紀勝東莞縣有媚川都南漢置凡隸三千人入海探珠有及五百餘尺而後得珠者

楚武穆王馬殷傳子衡陽王希聲文昭王希範廢王希廣恭孝王希萼入于後唐歷五王凡五十七年

宮門環帶碧湘波。幕府紅蓮得氣多。底事聯吟明月圃。瑞卿頻唱九州歌。

湖南通志碧湘門即今長沙府城南門馬氏建明統志長沙城南門之側有碧湘宮五代時馬氏置蔡條西清詩話馬殷據潭州

時建明月圃命幕客賦詩徐仲雅詩云鑿開青帝春風圃移下姮娥夜月樓五代史補歐陽彬工詞賦馬氏時將希其用攜所著詣府掌客吏弗與通有歌人瑞卿者慕其才延于家瑞卿能歌每歲武穆王生辰必歌于筵上時湖南舊管七郡外又加武陵岳陽是九州彬作九州歌以授瑞卿至時使歌之

連蜺八柱巧安排。身介潛飛用九諧。沉水迷離春殿曉。嵯峨頭角上雲階。

續世說馬希範建天策府構九龍殿以沉香爲八龍各長八尺環柱相向作趨捧勢而已坐其間自謂一龍也幞頭腳長丈餘以象龍角凌晨將坐先使人焚香于龍腹中烟氣鬱然而出若口吐焉

春園雅會勝宜探。黛雨香風作意酣。明日羽觴應再舉。流杯池上月重三。

五代史楚世家馬希範作會春園嘉宴堂其費鉅萬陶岳荆湘近事馬氏作會春園宴徐東野作詩有數聯爲當時所稱云荆湘璣影冷偏粘草蘭麝香濃即損花山色紅堆螺黛雨草梢春憂麝香風衰蘭寂寞含愁綠小杏妖嬈弄色紅湖南通志流杯池在長沙縣北五里一統志五代馬希範鑿爲上己被楔宴集之所

學士新成十六樓。逍遙真個似瀛洲。深宵角簾吟談劇。暖送丹砂不識秋。

路振九國志希範開天策府以拓拔恒李宏泉廖匡圖徐仲雅李鐸潘起曹稅李莊徐牧彭繼英裴頌何仲舉孟元暉劉昭禹鄧禹

文李宏節蕭洙彭繼勳等十八人為學士案五代史補曹悅作衛
 曦李宏節作李松年蕭洙作蕭銖十國春秋楚文昭王世家建
 天策府于長沙城西北作天策光政等十六樓天策勤政等五堂
 極棟宇之盛欄檻皆飾金玉塗壁用丹硃數十萬斤地衣春夏用
 角簾秋多用木縣與子
 弟僚屬游晏其間也

漢宮花謝鏡生埃記觸禪機薄怒回今夜半開雲路月初筵迎得四儀來

十國春秋楚石文德傳秦國夫人薨天策學士各撰挽詞以進文
 德亦撰十餘章其一云月沉湘浦冷花謝漢宮秋王得詩大驚品
 為挽歌第一夫人誰家婦女彭氏昭王大怒索檐子疾嘗往城北報恩寺燒
 香長老問夫人誰家婦女彭氏昭王大怒索檐子疾嘗往城北報恩寺燒
 何歸之速也夫人曰今日好沒興被個老禿問妾是誰家婦女大
 凡婦女是不善之詞安得對妾而發文昭笑曰此所謂禪機夫大
 可答弟子是彭家女馬家婦則禪機立解矣夫人曰如此則妾所
 謂無見性也慙赧數日曹衍湖湘馬氏故事徐雅休長沙人因
 馬希範夜宴迎四儀夫人賦云雲路半開千里月洞門斜掩一天
 春

宿衛銀槍盡選鋒鎖香屈戌護重重西堂春永清宵短懶聽催人七寶鐘

九國志希範奢欲無厭募富民年少肥澤者為銀槍都尉長槍大
 槊鑒以白金用備宿衛劉恕十國紀年馬希範少愛倡伎徐降
 真及嗣立號西堂夫人天中記七寶鐘七寶所鑄高六尺廣二
 尺孟昶以之為馬希範壽後希範以賜山寺

楚膩湘醺薄病嘗。行廚日料費評量。清涼一勺崑崙蔗。更覓袁家纏齒羊。

十國春秋楚雞坊長卒傳當馬氏時善種子母蔗灌蔣有法繁
殖蔓衍遂為湖南圃人冠蔗凡三種曰蠟蔗曰荻蔗曰赤崑崙蔗
一酒厭膏膩居道曰清異錄袁居道不求聞達馬希範延入府希範
也病酒厭膏膩居道曰清異錄袁居道不求聞達馬希範延入府希範

情多不獨小東曾。雨過高唐夢倍增。龍脚一雙輕舉穩。帝鄉遙望白雲層。

王銍補侍兒小名錄小東長沙之伎人以能詩得幸于馬氏後國
入為郡窮于京師里而人絕不知言及長沙宮中舊事則必南望
泣涕而後言天中記馬希範二脚左右長尺餘謂之龍脚人或
誤觸則終日頭痛十國春秋楚文昭王世家王好學善詩頗優
禮文士然奢靡喜淫先王媵妾多加無禮又令尼僧潛搜士庶家
女有容色者強委禽焉前後數百人猶有不足之色曰吾聞軒轅
御五百女以升天吾其庶幾乎

吳越忠肅王錢鏐傳子文穆王元瓘薨子忠獻王宏佐立薨弟
忠遜王宏倬立胡進思為變弟忠懿王俶立納土歸宋歷
五王凡九年

婆留井上夜芒衝。絕域爭傳不睡龍。白髮宮娥知底事。綠蠟偏話黑甜濃。

十國春秋吳越武肅王世家始誕之夕父寬方他適有鄰人奔告曰君家後舍開甲馬聲甚衆寬馳歸而鑾已生有紅光滿室怪之將棄于水邱氏之井鑾大母知非常人固不許因小字婆留而井亦以名水邱國志晉天福中契丹使至朝廷以近侍李泳爲監伴使有判官幽蘭人謂泳曰吳越嘗不睡乎詰其故答曰嘗聞五臺山王子大師云浙中詠龍今已歸矣西湖游覽志武肅居宮中輪差諸院敏利老嫖不監直一夕有大蜥蜴沿銀缸隴油既竭而倏然不見監嫗以所異之嫗直語人也明日王曰吾昨夜夢飲麻膏而飽更嫗以所見對王微哂而已

汲引高居握髮頻相看客面澤于銀寫生校尉描鸞手不貌尋常行路人

順存錄武肅王于宮中建握髮殿取周公吐哺握髮意訛作惡發殿方鎮編年錢鏐鎮吳越有名書二三十人號鸞手校尉伺北工以貌進鏐曰面有銀光奇士也即召見有禍相者用之胡岳渡江

警枕欽聽警夜丸長年布帳不知寒椒盤畫燭逢今夕喚取胡琴一再彈

錢儼吳越備史錢鏐在軍未嘗安寢用圓木作枕睡熟則欽由是得寤曰警枕又每夕彈金丸于牆樓之外使直宿者畢應又武肅王夫人嘗以王寢帳毀裂造清練帳將易之王曰作法于儉猶恐爲奢卒不用九國志吳越王錢鏐嘗于除夜命諸子及諸人將以胡琴爲一再行之飲也曰

香茅脯塞佐清醕。水府函詩逞霸材。夜半六丁趨海上。君王親自射潮迴。

吳越備史武肅王以梁開平四年八月築捍海塘。怒潮急湍。版築不就。表告于天。禱胥山祠。函詩一章。置海門云。傳語龍王。并水府錢塘借與築錢城。因採山陽之竹。造箭三千隻。羽以鴻鷺之羽。飾以丹珠鍊與築錢城。鐵爲鏃。既成。用葦敷地。分箭六處。幣用東方青九十丈。鹿脯煎餅。時三丈。清酒。棗脯。茅香。淨水。各六分。香鑪。布置。以丙十丈。鹿脯煎餅。時三丈。清酒。棗脯。茅香。淨水。各六分。香鑪。布置。以丙夜三萬人。鑄以屬。丁日。上酒。三行。禱云。六丁神君。玉女。陰神。從官。兵妄干唯願神君。佐我。助我。令。我。功。行。早。就。禱。訖。明。日。募。強。弩。退人。以。射。濤。頭。人。用。六。矢。每。潮。一。至。射。以。一。矢。射。至。五。矢。潮。乃。退。百

扶鳩翁嫗識眞王。昭耀臨安十錦張。玉罌金樽齊醉舞。吳喉高揭唱還鄉。

僧文瑩。湘山野錄。開平元年。梁封錢武肅。鏐爲吳越王。改其鄉。臨安縣。爲臨安。衣錦軍。是年。省瑩。龍延。故老。旌鉞。鼓吹。照耀。山谷。自臨昔。釣游之所。盡蒙以錦繡。或樹石。至有封官。爵者。舊賣鹽。肩擔。亦裁。錦韜之一。鄰嫗。九十餘。攜壺漿。角黍。迎于道。鏐下車。賣鹽。肩擔。撫其背。猶以小溪呼之。曰。錢婆。留喜。汝長。成。蓋。初。生。時。光。怪。滿。室。爲懼。將沉。于了。溪。此。嫗。留。之。遂。字。焉。爲。牛。酒。大。陳。鄉。飲。張。蜀。錦。爲廣。幄。以。飲。鄉。婦。凡。男。女。八。十。已。上。金。樽。百。歲。己。上。玉。樽。三。時。黃。髮。飲玉。者。尚。十。餘。人。鏐。起。執。爵。于。席。自。唱。還。鄉。今。掛。錦。衣。吳。越。一。王。駟。馬。歸。臨。安。道。上。列。旌。旗。碧。天。明。今。天。無。欺。時。輝。父。老。遠。近。來。相。隨。家。山。鄉。眷。今。會。時。稀。斗。牛。光。起。今。天。無。欺。時。

父老雖聞歌進酒都不之曉武肅覺其歡意不甚浹洽再酌酒
揭吳喉唱山歌以見意詞曰你輩見儂底歡喜別有一般滋味
永在我儂心裏嘉靖臨安懸志錢武肅王錦閣合聲廣贊父老
振席歡感閭里錦故名臨安爲十錦衣錦營衣錦山衣錦南鄉衣錦
山錦溪錦以錦故名臨安爲十錦衣錦營衣錦山衣錦南鄉衣錦
北鄉錦溪錦橋畫錦堂畫錦坊保錦坊衣錦將軍樹

寒食東風上錦衣輕陰掩冉麴塵飛繁花最是多情種常送香車緩緩歸

蘇軾陌上花詞序吳越王妃每歲必歸臨安王以書遺妃曰陌上
花開可緩緩歸矣吳人用其語爲歌含思宛轉聽之淒然而其語
鄺野爲易之曰陌上花開蝴蝶飛江山猶是昔人非遣民幾度垂
垂老游女還歌緩緩歸陌上山花無數開路人爭看翠幘來若爲
留得堂堂去且更重教緩緩廻生前富貴草頭露身後風流陌上
花已作遲遲君去魯猶歌緩緩廻生前富貴草頭露身後風流陌上

玉帶名駒嗜好奇英雄顧盼自生姿嗤他北使誇張甚輸賭金餅箭一枝

劉中達鴻書吳越武肅王遣使于梁太祖問王所好何物使者曰
好玉帶駿馬太祖曰真英雄也選玉帶一名馬四賜之吳越備
史天成中有番使假道來聘仍以命番使矢大誇于吳人武肅
山酒酣因以金餅置射棚之上命番使射之一發中餅之寶再發中餅
王吏崔詢兼嘴寶以勝遂授以親箭二一發中餅之寶再發中餅
之嘴番使慙服

樛木恩闈推壺化行玉羊卅載夢罷成宮鎮日喧何事銀鹿紛紛看戲嬰

十國春秋吳越文穆王恭穆夫人馬氏傳武肅王常禁中外畜聲
伎而文穆王年逾三十無子夫人爲之請武肅王喜曰我家宗祀
幸汝得主之矣乃聽文穆王納諸姬鄭氏生宏信長夫人皆均
佐吳氏生宏俶衆妾生宏德宏億宏偃宏仰宏信既長夫人皆均
養之常置銀鹿于帳前坐羣兒于上而弄之吳越備史文穆王
元瓘唐光啟三年丁未冬十一月十二日生于杭州之東院先是
有胡僧持一玉羊獻武肅王曰得
此當生貴子王果以丁未生焉

清門處士伴沉寥影寫琅玕點素綃連日小侯瓜戰罷寒漿盛進越州窰

清異錄海舶來有一沉香翁剗鏤若鬼工高尺餘舶曾以上吳越
王王目爲清門處士發源于心清聞妙香也十國春秋吳越武
肅王世家亦間能書寫畫墨竹然不以廢正務清異錄吳越進
嘗上瓜錢氏子弟逃暑取一瓜各言子之數言定剖昔負者張
宴謂之瓜戰朱炎陶說吳越秘色窯錢氏有國時越州燒進曾
槌高齋漫錄越州燒進爲供奉之物臣庶不得用故云秘色
鮮餘玲瓏出盎初天然色樣牡丹如買來新向漁人網不是西湖使宅魚
清異錄吳越有一種玲瓏牡丹鮮以魚葉調成牡丹狀既熟出盎
中微紅如初開牡丹玲瓏談錄錢氏時西湖漁者日納魚數斤謂
之使宅魚其捕不及額者必市以供頗爲民害一日羅隱侍坐壁
間有礪溪垂釣圖武肅索詩隱應聲曰呂望當年展廟謨直釣釣
國更誰如若教生得西湖上也是
須供使宅魚武肅大笑遂蠲其役

一枝龍藥施禪關。法苑珍逾旖旎山。更與真妃留塔記。細書經尾禮華鬘。

清異錄吳越孫妃嘗以一物施龍興寺形如朽木筋僧不以爲珍
偶出示舶上胡人曰此日本國龍藥簪也增價至萬二千緡易去

二峰又高麗舶主王大世選沉水近千金墨爲旖旎山象衡王妃七十
氏傳又有黃妃者常于南屏山雷峰顯嚴院建塔奉藏佛螺髻吳髮

名黃妃塔後以地產黃皮木遂訛爲黃皮塔俗稱雷峰塔焉吳髮
越國王錢俶秘富禁中恭率瑤具舫率爰以事力未充姑從七級梯

存不私願之私以千尺十三層爲率爰以事力未充姑從七級梯
宮監志未滿爲歎塔成之日又鑄華嚴諸經圍繞八面真成不

吳初志未滿爲歎塔成之日又鑄華嚴諸經圍繞八面真成不
議錫數大精進幢于是合十指爪以贊歎之塔曰黃妃云吳越國

王錢俶拜手謹書于經之尾
好夢分明踐彩繩。禮賢新宅寵光騰。中元已賜鼇山會。又買元宵兩夜燈。

十國春秋吳越忠懿王世家忠懿王將內附決于天竺大士夢
士以彩繩圍繞其宅歸宋之意始定後子孫遂金紫不絕又開

實九年二月王至京師賜宴于迎春苑尋詔王居禮賢宅又太
平興國三年五月上表願以十三州一軍八十六縣戶十五萬

六百八十宅爲永業七月十六元節汴京張燈宋帝令有司于王宅
仍賜禮賢宅爲永業七月十六元節汴京張燈宋帝令有司于王宅

前設燈山陳聲樂以寵之
後張燈五夜相傳宋時只三夜錢王納土買添兩夜爲上元節前

聞

司空王潮傳太祖審知薨子嗣王延翰立被弑弟惠宗鑄延
政弑子康宗繼鵬立遇弑太祖子景宗職立遇弑弟天德延
主凡滅于南唐歷七年

白馬驅馳動七閩。緇流指點說金輪。西天一現蓮花相。急鑄金銅丈六身。

五代史閩世家王審知狀貌雄偉隆準方口常乘白馬軍中號白
馬三郎閩黃滔丈六尺高後二十有日丁亥鑄善薩二丈有三尺高
金銅像丈有六尺高後二十有日丁亥鑄善薩二丈有三尺高
銅為內肌金為外膚取法西天鑄成東越初我公登壇之三年已
未秋夕夢天之西際彩雲罽裂大佛中座而啟言曰斷予一臂衛
之一方既覺而思現乎形昭像也斷一臂誓誠也衛一方保衆也
始嘉其異姑默其事後創其意命自賓席逮衆庶有植信根映慧
燭者許以一金投吾俸中將檀于肆俟以銅易而後鳩工鴻爐卜
境擇日鑄斯佛而成翼日我公禮閱之乃與夢中一仙徐登一臂工
斯佛也一寫而公翼日我公禮閱之乃與夢中一仙徐登一臂工
之別鑄而會我公翼日我公禮閱之乃與夢中一仙徐登一臂工
丙申會僧千人引歸于開元寺壽山之塔院翼二菩薩于左右三
十二相足八十種好具其明年正月十八日設二十萬人齋號無
遮會以落之

檜影池光見性靈。飯僧留得去來形。中朝昨賜金身額。寫徧稜伽四藏經。

十國春秋閩太祖世家王夢梵僧數百輩奕奕有光所至處有雙
檜並池而秀一僧前跪曰王能飯吾于此乎及旦訪其地而築室

焉命池曰浴聖檜曰息聖又王于城西南張爐冶十三所鑄釋迦彌勒諸佛像唐主賜額曰金身報恩之寺王又鑄金銀萬餘兩作金銀字四藏經各五千四十八卷

神霄秘殿五雲連雙鶴飛來太乙烟位業寶皇親說與他生還主大羅仙

十國春秋閩陳守元傳以左道見信于惠宗作寶皇宮居之守元謬為大言稱寶皇命王少避其位後當為六十年天子惠宗欣然避位令長子主府事道名元錫既而復位遣守元問寶皇六十年後將安歸守元復謬傳寶皇語曰六十年後當為大羅仙主閩海叢談閩王鏐曰祈太乙神冊逾年雙鶴徘徊而下遂謀僭號

長春晏罷月初移秘戲中宮敕許窺意逐行雲情逐雨水晶屏外立多時

徐燾陳金鳳外傳龍啓元年封金鳳為皇后築長春宮以居之延鈞數于其中為長夜之晏每晏輒敕宮中燃金龍燭數百枝環左右光明如晝復敕宮女數百人擎一盃盤皆瓊瑤瑪瑙琥珀玻璃之屬以隊遞進不設几筵酒酣長枕大牀擁金鳳及諸宮女裸臥隨意幸之又遣使于日南造水晶屏風司圍四丈二尺延鈞與金鳳淫狎于內令宮女隔屏窺之嬉笑為樂

羽觴宛轉水雲邊一曲桑溪沸管絃燭影衣香回仗早當頭新月未成弦

金鳳外傳三月上巳延鈞修楔桑溪金鳳偕後宮雜衣文錦列坐水次流觴娛暢窮日而返沈靡之氣環佩之響燎炬之光達于遠

近途中絲竹絃管續紛奏
和清音入雲觀者塞道

南湖風景接西湖。紫蓼青蒲入畫圖。彩舫如流歌互答。綺羅香裡鬪水膚。

金鳳外傳端陽日造彩舫數百于西湖每舫載宮女二三十人衣
短衣鼓楫爭先延釣御大龍舟以觀金鳳作樂游曲使宮女同聲
歌之曲曰龍舟搖曳東復東采蓮湖上紅更紅波淡淡水溶溶奴
隔荷花路不通西湖南湖東彩舟青蒲紫蓼滿中洲波渺渺水悠悠
悠長奉君王萬歲游游人士女綺繡夾岸難畚如市夜收宮女入
宮多不知所之者延釣亦不問

長春寂寞似長門。醕晏香銷燭就昏。回得九龍綃帳暖。清詞一首抵文園。

金鳳外傳有小吏歸守明弱冠督美延釣嬖之日侍禁中竇緣與
金鳳通百工院使李可殷因歸郎以通于金鳳可殷慧敏造縷金
五彩九龍帳于長春宮織入龍于外而以延釣為一龍既成延釣
歡甚益暱守明國人歌曰誰謂九龍帳惟貯一歸郎初金鳳成延釣
傲得進及為后令可殷潛之傲怨金鳳負已盛飾其妹春燕進于
上春燕媚婉絕代初入宮年才十五顧盼舉止動移上意春燕冊
妃擅愛專席延釣自是不復復御九龍帳矣明樂元夕御大醕殿
前翰林承旨韓偓等觀燈暢宴命各賦大醕明月去莫道夢魂遙
事賦詩曰淚滴珠難盡容殘玉易消倘隨明月去莫道夢魂遙延
釣動念因返駕長春宮

求丹都在三清殿。嬪御同焚山水香。月地雲階仙仗闕。御槽閑煞渥注郎。

通鑑紀事本末閩主用陳守元言作三清殿于禁中以黃金數千
斤鑄寶皇大帝天尊老君像晝夜作樂焚香禱祀求神丹清異
錄道士談紫霄有異術閩王昶奉之爲師月給山水香焚之香用
精沉上火半熾則沃以蘇合油金鳳外傳建三清殿紫霄導春
燕諸後宮齋宿其下晝夜聚禱謂爲繼鵬祈年永祚而媒襄無忌
國醜之宮齋清異錄王昶傾金錢市名馬五匹各有位號曰金鞍
使者千里將軍致遠
侯渥洼郎驥國公

清人樹影鬱堪攀佳會傾筐紫翠閒纔摘新芽甘露暖乳甌試鬪鷓鴣斑

清異錄僞閩甘露堂前兩株茶鬱茂陶穀清異錄閩中造茶錢花
初嬪嬙戲摘新芽堂中設傾筐會茂婆娑宮人呼爲清人樹每春
紋鷓鴣斑點試茶家珍之按方輿勝覽云免毫錢出甌寧下注云
黃魯直詩建安瓷盃鷓鴣斑是鷓鴣斑即免毫錢試門之法以水
痕先退者爲負耐久者爲勝故較勝負曰一水兩水茶色白入黑
錢水痕易驗免毫錢之所以貴也

紫薇照耀列宮峨春比東華貯更多看到雨天三昧足香紅亂墜曼陀羅

十國春秋閩康宗后李氏傳本惠宗宮人名春燕有色惠宗病康
宗因陳后以求春燕惠宗快與之康宗嗣位立爲賢妃及通文
改元復立爲皇后別造紫薇宮爲皇游幸之所土木之盛逾于
東華檀楠爲梁棟真珠爲簾幙范金爲柱礎清異錄閩昶春餘
晏後苑飛紅滿空昶曰彌陀經云雨天曼陀羅花此景近似今日

觀化工之雨天三昧
宜召六宮設三昧晏

建州新進耐重兒不入歡筵荷御題。卻愛別賜。周學士宣來常捧醉如泥。

清異錄有得建州茶膏取作耐重兒八枚膠以金縷獻于閩王。遇通文之禍為內侍所盜轉遺貴臣。十國春秋閩景宗本紀中。書侍郎同平章事李光準常侍夜晏以醉忤旨命執送都市斬之。吏不敢輒殺繫之獄中明旦召復其位是夕又晏侍臣收翰林學士周維岳下獄吏拂楊待之曰相公昨夜宿此尚書勿憂已而醉。解釋之他日又曲晏羣臣皆醉去獨維岳在坐帝曰維岳身甚小。何飲酒之多左右曰酒有別腸不必長侍。帝欣然命捧維岳下。剖視酒腸旁有解之者曰殺維岳無人侍。陛下劇飲乃舍之。下五殿。國故事閩王議為長夜之飲以銀葉作杯桑弱為冬瓜片名曰醉。如泥酒盈不可復置他所惟飲盡始得脫手。

醉鄉日月共椒塗。買晏何嫌鉅。勸麤開閣平章承敕問。永隆萬貫進曾無。

十國春秋閩景宗后李氏傳司空李真女也。永隆四年冊立為皇。后嗜酒剛愎景宗寵而憚之。洪遵泉志陶岳泉貨錄王審知鑄大鐵錢。錢闊寸餘甚羸重亦以開元通寶為文以五百章文為貫俗謂之鉅錢。與銅錢並行通鑑紀事本末議以同平章事李廷英。為泉州刺史延英掠人子女詐稱受詔采擇事覺按之廷英自歸。退獻買錢晏萬緡議悅明日召見曰晏已買矣。皇太后貢物安在廷。英復獻錢于李后乃遣歸泉州復召為相又曠鑄永隆通寶大鐵錢一當鉛百。

荆南

弟武信王高季興傳子文獻王長子侍中繼冲立降于宋四世

五十七年

五院精藍一日開宮花四散落香臺。諸天欲證聲聞果。彌勒隨緣示像來。

十國春秋荆南武信王五女傳五女失其名相傳俱幼年好道爲
女僧各止一處曰佛華寺曰菩提寺曰莊嚴寺曰石佛寺曰法輪
寺江陵志餘彌勒瑞像現于高氏清泰開隨吳商葉旺船至荆
登岸乃知爲像高氏迎之從香烟所指置城西北隅萬壽寺右手
缺中指屢鑄不成後漁人得
之高沙湖以補缺處如生成

五花賓館望沙樓。時駐軒車述勝游。隨例筵鋪高足枕。紫槽一抹送清謳。

錢易南部新書荆南舊有五花賓館待賓之上地也故蔣肱上成汭
詩云不是上台知姓氏五花賓館敢從容十國春秋荆南文獻
王世家天福五年晉翰林學士陶穀來聘王晏穀望沙樓又開
運元年晉學士王仁裕來聘王出十伎彈琴以樂之韻府羣玉載
從誨有句云紅妝齊抱紫檀槽一抹朱絃十四條競置周羽冲三楚
新錄高從誨時荆南尚使瓷器皆高其足而公私競置用之謂之
高足枕

桃源洞口似仙家。亭記迎春麗景斜。忽地渚宮秋漸老。清風開徧白蓮花。

禁扁望沙樓下有桃源洞。十國春秋荆南文獻王世家王鑿江陵城西南隅爲池立亭于上曰洛宮先是城東南舊有渚宮王特做其名而稱之又置亭于側曰迎春孔自來江陵志餘清風天池在城東北隅方數百步深清鏡潔潭而不流高氏之所鑿也凡溝港城隍悉開白蓮花數年

金鞦翠袖醉春風。窈窕軒薨衆曲通。盼得嶺南龍眼到。琅玕重護海珠叢。

十國春秋荆南待中保勗世家保勗曰召倡妓集府署擇士卒壯者令恣調謔乃與姬妾垂簾共觀以爲娛樂又好造臺榭窮極土木之工清異錄賈人自嶺外還得一枝龍眼已鹽乾凡四十團共千枚至荆南獻高保勉因作小琅玕檻子立置之名曰海珠叢

全休萬事見時堪。湯社頻分一勺甘。鎮日坐參華定水。茶烟輕颺紫雲庵。

隆平集從誨于諸子中最愛保勗在保抱雖甚怒見之則釋然而笑荆南人目之爲萬事休清異錄吳僧文了善烹茶游荆南高而保勉白于季興延置紫雲庵日試其藝保勉父子呼爲湯神奏授華定水大師上人目曰乳妖

麻姑弟子汜清商。芳禁流傳韻繞梁。一曲彈來憑一指。四條絃外作秋涼。

十國春秋荆南仙女傳平江節度王保義女五歲通黃庭內外經及長善琵琶一夕夢涉水登山顛見金最宮闕中有仙人披羽服自稱麻姑傳以樂曲自是每夕輒夢遇之即指授音律歲餘得百餘調都非人間所曾有其尤者名獨指商以一指彈一曲更爲擅

奇適文獻王子保節復夢麻姑至曰即當相邀明日庭中聞雲鶴
音樂仙女奄然而逝

北漢世祖劉明傳子睿宗鈞殂養子少主繼恩立遇弑

褐衫笠帽氣凌雲畫閣凝香視政勤一笑黃驢裝乍卸殿前宣敕署將軍

十國春秋北漢世祖本紀帝自高平披褐戴笠乘契丹所贈黃驢
率百餘騎由雕窠嶺間道馳去歸爲黃驢治廐飾以金銀食以三
品料號自在將軍政閣禁

飛鸞閣上翠華春定有方留妙法輪卻怪天公傳玉戲攔街齊唱赤真人

禁扁北漢有飛鸞閣十國春秋北漢睿宗郭姬傳姬故醫僧女
僧與嫠婦通而生姬有殊色睿宗納之宮中嬖之將冊立爲后樞
密使段常以姬所出非偶恐貽笑隣國遂中止清異錄周季
年東漢國大雪盛唱曰生怕赤真人都來一夜春後大宋受命

異果殊方致得難分頒鵠立伺千官竹青棗子紛摹擬端出金梭畧綽盤

清異錄唐末羣方負固東漢有商歸自閩越以橄欖獻于霸君明
日分賜大臣禁帥郝惟慶曰此公狀類我鄉竹青棗加之一時久
方得薄味官家何用賜臣
所喜者金梭略綽盤耳

神旗鼓吹助朝威丹仗頻移頌佛暉相對定王禪味永握君揮灑映三衣

李西輝天龍寺千佛樓碑銘略帝宅之西五里而遙北自乾坎南距
 申酉往者北齊國後魏興邦各營避暑之宮用憇鳴一舍之
 是乎金平人塔東老氏富觀星布于巖石矣勒閣內設石像侍
 區上容址皇帝再加添飾功用宛然次有池水甚潔國嶺
 對峙昔宗神位每角充方中雷英武施雲禱咸萃矣由九
 其下約三會中審高帝榜曰龍口今閣授檢司徒歸義府都
 重之下尊天幼冲躬親官次吏不口敢口歎口出閣校齡之居
 督時年尚禮謁精藍一歲之口口口口口口口口口口口口口口
 叔季諸王幼謁精藍一歲之口口口口口口口口口口口口口口
 齋禱心愛敬授右金吾衛口口口口口口口口口口口口口口
 恩加檢校太保授右金吾衛口口口口口口口口口口口口口口
 太師行太原尹未幾值倉卒之變上獨執雄斷入平內難時戊辰
 秋九月嗣宸極立定傾危恒切飯依每屈良辰必親行幸至壬
 申歲十二月降詔有司尊大御宇後正乙亥歲鑄皇帝飛詔
 孫如來以物典冊將加徽號鴻吹英武貴近受英武衛帝兼願
 衣御帶馴馬琬鞍別賜神旗鼓吹英武善心帝嚴整儀銘云
 屈初禪之境臣幸陪仗親奉美德音歡有侍謹作禪居潛邸
 春初禪之境臣幸陪仗親奉美德音歡有侍謹作禪居潛邸
 時常假又僧定王繼容傳能講華嚴經手執帽香如意紫檀鑲
 握假又僧定王繼容傳能講華嚴經手執帽香如意紫檀鑲
 室滿君假又僧定王繼容傳能講華嚴經手執帽香如意紫檀鑲

十國宮詞跋

昔歐陽永叔重修五代史于吳楚諸世家多所漏略此 本朝何氏所以有十國春秋之作也夫十國之君惟吳越王錢鏐爲翹楚而陌上花開緩緩歸猶不免南朝天子愛風流之習其他可知矣錢鐸石先生撮侈靡之事懷規諷之思所箸十國詞箋略抽秘騁妍久已膾炙人口是編倣而爲之雖筆意少遜而足以備炯戒則一也壬寅初夏日吳江沈楸愚識

啟禎宮詞

貴池劉 城伯宗著

天啟宮詞

閶闔新迴暈月風。龍旂斧鉞下高空。依稀偶語聽難了。南海子裡老王公。
蓮漏投籤已幾回。金鋪屈戍鎖難開。火城忽簇仙韶動。奉聖夫人休沐來。
經筵故事不容差。一例先生賜吃茶。早已叩頭宣謝去。排當大內好喧譁。
樂撤更深御寢安。喧爭驚起玉闌干。聖恩問取人情願。判許和鳴結采鸞。
漢帝椒風絕等儕。六宮粉黛枉金釵。高家小姐蛾眉好。那用凌波窄錦鞵。
旌旗鉦鼓徹雲霄。講武彤庭蒐與苗。堪笑諸臣勞諫草。豹房戎服自先朝。
上谷雲中有奏題。似云烽火接城西。聖人正案龜茲舞。未可張皇說鼓鼙。
聖人自是人倫至。規矩方圓百世師。小閣運斤多秘製。唐虞何用命工垂。
水殿蒲觴太液游。柘袍親自轉船頭。不因蔡女舟能蕩。誰見黃龍負艣浮。

玉管瑤笙別殿喧。朝看金屋暮長門。漢皇不好相如賦。莫把黃金買淚痕。
青鳥時稱王母宣。黃河如瀉水衡錢。老蟾駕月天宮裡。福澤人間誰許先。
玉面真欺桃李紅。年年春到怨東風。自從王聖承恩寵。對食相憐滿漢宮。
封章連日奏重瞳。鐫德銜恩祀上公。早見文書房奉進。溫綸已票速批紅。
部題閣票舊章同。墨敕何妨自聖衷。昨日言官解經好。舜湯執用總皆中。

崇禎宮詞

天。亶。吾。皇。達。四。聰。早。從。興。慶。受。分。桐。令。孜。王。聖。芟。夷。後。桂。殿。蘭。房。日。正。中。
蛾。眉。巧。笑。溢。三。千。選。藝。徵。歌。盡。可。憐。不。是。恩。輕。及。命。薄。清。心。寡。欲。揭。宮。前。
水。晶。簾。照。月。微。明。鴛。被。迴。身。夢。始。驚。門。外。稍。聽。牌。子。過。鸞。輿。警。蹕。已。聞。聲。
昨。朝。暖。閣。詢。邊。計。今。日。平。臺。議。用。人。內。宴。排。當。遲。不。御。相。傳。弘。治。事。重。新。
御。爐。縹。渺。裊。香。烟。聖。體。虔。恭。再。拜。天。欲。卜。金。甌。如。往。事。願。求。良。弼。似。商。賢。
講。章。進。到。聖。情。欣。玉。儿。旋。攤。披。覽。勤。昨。日。經。筵。無。逸。畢。回。宮。猶。閱。尙。書。文。
升。天。大。祀。曠。多。年。聖。主。精。禋。格。上。玄。始。自。致。齋。成。禮。返。祥。雲。直。到。掖。庭。纏。
貞。靜。坤。寧。紫。極。俱。兩。宮。貴。姊。亦。規。模。聖。王。風。化。從。宮。闈。不。覓。平。陽。衛。子。夫。
絳。蠟。宵。分。跋。幾。除。至。尊。永。夜。覽。文。書。每。逢。水。旱。兵。戎。事。共。覩。龍。顏。慘。不。舒。
宸。極。森。嚴。兼。聽。全。刺。奸。密。奏。戒。傳。宣。打。來。事。件。朝。朝。進。短。紙。牢。封。奏。御。前。
文。書。識。字。缺。常。員。掌。監。循。規。也。補。遷。睿。聖。命。題。親。試。取。掄。才。不。使。費。金。錢。

大官玉食每從裁。茶飯難循往例開。近爲恒暘憂側席。青袍步禱外郊來。
未容戚里門繁華。請乞常裁望聖奢。御帕黃封恩澤重。時時宣賜到田家。
尙衣三澣敢言勞。修省連朝又布袍。怪得蘇杭頻減織。冰紈阿錫念民膏。
宵衣每動鼓鼙思。重遣中軍往視師。敕約頻聞救水火。轡銜原不假恩私。
御案琅函入覽多。孝經小學日編摩。代言稟擬仍塗改。那有閒情看舞羅。
吾皇仍不語機祥。忽詔因緣事闡揚。因感掌珠天籟語。依稀得見老孃孃。
拜舞天顏喜氣融。東朝冊立出中宮。齊傳列祖希聞事。千載元良迥不同。



香豔叢書

第二集

香艷叢書

二集卷四

海鷗小譜

益都趙執信秋谷著

自題二首

落絮沾泥會有時。髮絲禪榻最堪思。阿難一笑花偏著。合向楞嚴覓道師。
曉漏趨朝夢已乖。日高和酒泥香懷。不教名輩輕揮扇。縱戀鱸魚亦復佳。

余放斥既久。不自檢飭。浪遊南北。多預花酒之筵。頗能諧笑。或雜綴詩詞。或
間爲時人傳誦。而實無所接遇。知交輩咸以介靜之目歸之。甲申歲。客津門。
自春徂秋。狎遊既數。矯激非情。如海客之于鷗鳥。不自覺其相親近也。長日
無事。戲爲紀錄。以志吾過。且詒好事者。

藥枝者。西郭人也。當戊寅己卯間。名噪甚。尋常不可得一見。余以辛己之秋。
始遊于此。友人百計爲致之。寒夕濃陰。紅燈深屋。翩然而來。明豔奪目。蒲州



老友吳天章先生。當代詩人也。方在座。一轉盼間。頓失常度。乃相與爲詩品題。雜以嘲謔。屬和者。至成帙。時妓適有所避。于余有知己之感。情殊厚。會余遂東歸。頗不能忘。今年再至。則已爲有力者所主。不可復見矣。居久之。有爲余傳言者。乃相期于他所。叙舊傷離。數語而別。猶持余前時所書便面。容色憔悴。非復曩態。先是有問于余者曰。蘂姬何如。余曰。新荷出水。飛鳥依人。聞者莫不愉悅自失。及是余又自失矣。爲二絕句示客。

鳥鵲秋前報好音。人間不信月終沉。如何兩渡臨滄海。不見輕泥蘸客襟。照水閑花偏有豔。先霜病葉已難支。三年好在遊春夢。悔作重尋杜牧之。

埽便面留別詞

蝶戀花

秋老家山紅萬疊。何意淹留。斷送重陽節。醉裏情懷空自結。鸞環低盡湘簾月。總爲相逢教惜別。明月風帆。亂落霜林葉。暮雨迷離天外歇。寒花付與紛紛蝶。

天津之西。有村名楊柳青者。臨漕河。人家皆曲折隨水。比屋如綉。樹色鬱然。風景可戀。中多狹邪。而金錢眞珠者爲其尤。北地諸姬以金玉珠名者十七八。蓋其俗也。眞珠貌及中人。齒亦不卑。然恬雅無囂陵習。故人多稱之。余始至卽得妓。意不甚屬。而妓乘余于醉。故余贈詞有醉濃不省歡娛之句。後不再至。其妹玉珠則劣矣。

柳梢青

無計枝梧。病身陡頓。春夢模糊。亂惹閒愁。驚開倦眼。斗帳紅珠。醉濃不省歡娛。曉鏡裡臨窺畫圖。聞道門前。煙波澹沲。楊柳蕭疎。

有玉素者。行四人第。稱其行第。晉人也。小身常貌。色頗鮮好。至于手足柔纖。膚肌瑩膩。時蓋罕其輩矣。性尤慧利。工于應對。余始于初夏燭下見之。贈以南柯子詞。又有句云。何物比將嬌與巧。燕子鶯兒。蓋紀實也。然自待過高。意所不愜。雖竭貲力。百計媚之。不能得其歡。其當意者。卽無所隱也。用是爲雅流所賞。而市兒或嫉之如仇。金錢者反是。流俗豔稱之。蓋其性頗蕩。舉動佻

急。不能自持。語亦敏給。而皆近俚。惟足趾與素相若。膚色風態。薄似吳娘。可暫見而不可久狎者也。

南柯子

引燭催行雨。排愁泥酒卮。春光不信去天涯。看取樽前楚楚海棠枝。瞥眼渾相識。曹騰不自持。他年何處最相思。應是紅酥著體欲融時。

浪淘沙

微雨過庭墀。新綠離披。玉人和笑近郎時。何物比將嬌與巧。燕子鶯兒。杯趁晚風移。漏鼓參差。雲間細閃月如眉。滅燭解襟香澤散。一石何辭。

玉秀者素之嫂也。春間爲何人攜往都門。余未之見。客有能道之者。放逸略似金錢。而姿首殊勝。頃聞在酒筵觸忤醉客。以拳揮之。應手而殞。久乃復甦。猶病累月。士人傳以爲笑。余戲爲長句以調素妓曰。

君不見曲中宜潤雙芳妍。苦死願得書生憐。蛾眉鵝肋不自惜。傷心不作移栽蓮。又不見舊院聲名馬老三。琵琶一曲喧江南。一朝摧殘值強暴。秋波變血雲。

鬢髮情鍾我輩古有語。磊落寒酸空自許。不及長安俠少年。傲睨當筵力如虎。
綺羅紅粉輕于塵。膝行匍伏擎金尊。醉中片語不稱意。毒手半落消香魂。令我
忽憶半臂忍寒宋使君。又憶五花殺馬王學士。不辭白髮映紅粧。請卿試看風
流子。

余以康熙甲子有事太原。遂車下太行。中間宴會多見妙麗。予時年二十有
三。眼色所接。交相飛動。徒以簡書可畏。強自檢束。其後友人有知之者。讚訕
相半。余亦時時自笑也。今適已二十年。余垂垂老矣。此間諸妓。往往遷自山
右。問其年。大都二十年中之所生長者也。而余乃荒迷潦倒其間。有似補當
時之所不足。信乎有夙分哉。妓以玉名者。素秀而外。有玉蓮玉葵。以金名者。
有金仙金香。仙妓最與余荏苒久。蓮體貌似真珠。而肌膚膩潔。余曾于月下
攜其手。因醉後見其胸。殆素之流也。葵白皙多肌。齒甚少。而頗染市氣。仙語
余曰。使是兒從我三月。當入雅流。此言可以知仙之格調矣。
仙姿貌中上。而脩眉稚齒。風韻體態。近是上流。若其酬答敏慧。雖文士靡以

加也。亦能爲吳語。數往來余寓齋。余賦不忘十絕句。做微之雜憶體。

其一

迢迢銀漢事難期。冉冉朝雲路易迷。不忘半牕聞小語。花陰嫋嫋獨來時。（蓋其時亦有所主。竟能宛轉自至也。）

其二

藥爐煙裊鬢鬢愁。却月長牕翠欲流。不忘嬌多緣咽苦。向人強笑背燈羞。（蓋妓有牙病。余強之服藥。含嚙甚艱。明日良愈。）

其三

朝光晃朗久侵匿。雲影低迷作掛簷。不忘粧成心自賞。雙持明鏡映疎簾。

其四

微風吹月入牕櫺。隱約蘭湯沃雪聲。不忘黃昏新浴起。隔簾低喚太涼生。

其五

玉盤的礫貯清冰。濕照雲鬢蟬枕棱。不忘褰帷窺午睡。雪膚欲向簾紋凝。

其六

晚涼新點麴塵沙。半月微明絳縷霞。不忘當筵索疆飲。春來初放小桃花。

其七

玻璃波影木蘭橈。十里香風颭翠翹。不忘新粧閒弄水。蓮花妬面柳舒腰。

其八

綠雲撩繞惹春衣。釵燕參差拂鏡飛。不忘閒庭梳結晚。月明風細髮香微。

其九

高樓雲盡月團圓。遠水無聲夜露乾。不忘溪風裊衫袖。羅輕如雪壓闌干。

其十

新蟬嘒嘒送斜陽。小蝶翩翩過短牆。不忘臨行還却坐。滿頭花映讀書床。
(皆卽事叙述無容溢語耳)

坵初贈三詞

謁金門

腸欲斷。昨暮酒闌人散。明月似知人戀戀。夜深教夢見。聞道高堂開宴。悵望行雲一片。誰送暗香來枕畔。頓成新繾綣。

女冠子

薄酣枕上。月澹牕明。相向可憐生。風裡纖纖柳。花前恰恰鶯。新歡偏鄭重。幽態更輕盈。酒醒寒近曉。不勝情。

清平樂

曉牕晴曙。黯淡巫山雨。寶鏡晶明（一作瑩）香一縷。故傍新粧耳語。輕衣乍褪天紅。微波暗逗春濃。坐久雙蛾顰久。芳心更屬誰儂。

金香者。仙之姊也。與仙名相埒。而仙每稱之曰。是我以上人。方臥病謝客。惜不得一見之。素琴者。貌不揚。而能歌好飲。得酒卽不自制。或醉則嘔吐狼藉。酒徒多與之善。又有素可者。年長矣。而色不衰。素妓亟稱之。

玉如者。秦人也。僑居眞定。壬午之春。津有好事者。聞其名而致之。至則不合意。外間人亦無有顧之者。居久之。狼狽而返。明年。別有人携以再來。則聲價

大起。向之不顧者。皆爭邀致。每宴會。以其來否爲榮辱。居一年。衣裘鮮華。金帛充牣。而人又稍稍厭之矣。今春復返。客有從眞定來者。言其困苦無生理。欲隨客更來。而客辭之。昔時相識。又無人肯爲之地。余聞之。友人云。如妓眼色。撩人。歌小詞。殊佳。餘無可取。善飲酒。而必擇人與地。性嬌憨。不肯俛仰人。故人寢惡之。嗟乎。一人之身。三載之內。非有美醜懸殊也。前之所棄。卽爲後之所爭矣。且前之所爭。而又爲所棄矣。人生遇合。亦猶是耳。安得如妓立至。余爲引巨觥而慰之。

若青者。與藥妓並時齊名。津中皆呼之爲小八兒。似燕台妓品中題目也。辛巳秋。友人欲並致之。而適有據之者。卒不可得。壬午夏。妓避地之江南。逮今二載。匪惟余其舊識者亦絕望矣。中秋日。有邀余飲月者。酒甫行。而妓出。四座動色。迥非常觀。細詢之。附舟北來。纔數日耳。余已倦客。戒行有期。仙素杳然。不可復蹤蹟。豈意晚得高流。且酬夙願。贈以夜合花長調云云。余謂青妓眉目姣好。放誕風流。似卓文君。至于輕纖柔媚。兼有衆長。自非藥妓。無能爲

輩而蔡已若彼矣。美名難居。盛時易失。昔人所爲感慨係之者也。

夜合花

天與溫柔人傳嬌小。幾年思煞傾城。江波浩渺。斷潮何處相迎。秋有信。月還盈。鵲橋邊巧送新盟。劉郎前度。徐孃未老。消得風情。連宵雨暗牕櫺。趁向雲輕。漢淺掩映三星。龍鬢鳳枕。黛眉幾許低橫。金不暖。玉無聲。算瑤池獨有飛瓊。東阿才費。文園渴劇。一作消渴。端爲卿卿。

天津密邇上都。水陸交會。俗頗奢靡。故聲色最焉。纏頭豐侈。攘臂紛紜。南北所經。無與同者。向者率多土著。近來秦晉間。遂聞風而屬至矣。然佳者蓋寡。其稍稍出色者。卽不能留也。蔡與青要爲秀色獨立者。異地多才。難爭勝耳。又聞其里中有童姓者。始得名。客言其姿態綽約。背立風前。殆奪畫圖。而雙鬢之妙。在青素之上。蓋目所未睹者。若風流言詞。無以過人也。咸欲爲余力致之。余謝曰。美不可盡。欲不可極。揚州一夢。可以覺矣。乃附識于卷末。此譜成于中秋後。余行有期矣。余故人自都中至。與主人巧相援止。旣度重。

陽。而余侵尋抱疾。入仲冬始愈。冬至前乃成行。青妓自八月晦來齋中。依依不去。及是乃分手。不知者幾謂有鏡湖春色之戀也。蓋妓性慧絕。既習余。卻視外間人無足與者。由是大致怨怒。不恤也。或徵其指。答以微詞。大似蕭夫子之僕矣。主人曰。盍委身乎。妓不應。強之則哀泣而已。其不可奈何。惟余知之耳。方余病中湯藥洗沐。抑搔扶掖。無不曲體而周至者。余甚荷之。故人復招致有蓮衣（束鹿人）月英素雲（皆荏平人）數輩。皆少好在仙素之間。妓多方推引。余壹不顧也。瀕行前數日。妓懷楚不自勝。屢廢飲食。余再三慰之。妓自言生平未嘗如此矣。余行之明日。夕宿青縣。題少年遊以寄思。蓋不忍沒妓之意。因再識。

少年遊

離情觸處總相關。小字縣名傳。聽去偏驚。避將無計。誰使駐征鞍。夢中從此尋猶近。寒夜奈無眠。轉眼春風。預愁江上萬點見青山。

此書聞于武林汪師。李徵君求之積年不得。平原董曲江太史許假。

而爽約。今春遇德水趙易叔明經於廣陵。願爲抄寄。七月之杪始至。披卷纏綿。如入柔鄉。惜不得與鳳樓共觀之也。丁丑暮春沃田居士跋於紅橋客館。

丁丑臘二十三日陳竹町從蟬書樓借得。轉示在陬老人錄於維揚無事此靜坐齋。并綴二絕句於後。徐郎恬澹偏多事。手寫飴山集外編。紅紫妖邪紛著眼。亭亭可有出泥蓮。不緣落魄滯江湖。肯與師師立傳無。却笑平安杜書記。祇將慟哭換歡娛。

癸未長至後一日研石山農錄于婁縣官齋。丁酉暮春在陬老人重錄於張氏蘋香齋。距丁丑忽忽二十一年矣。

秋谷先生於康熙己未科館選。時年一十有八。甲子衡文山右。所謂有事太原東下太行者。指此時也。至作譜歲在甲申。則先生已於戊辰年因演洪稗畦長生殿事去官。自後遂浪遊燕趙吳越間。老而喪明。不廢吟咏。迨乾隆己未。猶及與後輩稱前後同年云。楊復吉附記。

海鷗小譜跋

海鷗小譜。秋谷先生。於康熙甲申歲寓津門所作。風流放曠。盡態極妍。所係詩詞。旖旎纏綿。出入香奩。疑雨二集。洵藝林豔品也。先生雜著。如談龍錄。聲調譜。德州盧氏皆已梓行。獨此帙尙少流傳。壬寅孟冬。武林鮑丈以文過訪。談次及之。則云篋中久藏寫本。丙戌春間。萊陽趙荷村太守。借刻於杭。東板寄睦。荷村捐館。此書亦不可問聞矣。爲惋惜者久之。余因憶吳興同年閔太史裕仲。曾云家有其書。許爲持贈。郵書索之。仲冬上浣。太史專函寄示。余得之狂喜。急倩友人鈔入叢書續編。而錄其副以詒以文。廿年劍化。一旦珠還。遙稔知不足齋主人。應不禁掀髯一笑也。此帙爲笠澤書院山長閔敦甫先生手校本。後附題辭二絕句。今并錄後。壬寅小除夕震澤楊復吉識

(完)

卷四

集

邵飛飛傳

江陰陳鼎定九著

邵飛飛者。字扶搖。三山西河女子也。幼孤。其季父授村童句讀。飛飛隔牆聞讀書聲。過耳輒成誦。七歲。徧記學庸論孟毛詩。常闇誦於室。季父奇之。教之識字。一目了然。稍講。卽通大義。垂髻以才貌聞里中。求之者阿母皆不許。蓋欲售顯者以圖富貴也。閩寇伏誅。姚口菴總督關南。幕員有羅密者。道經其居。見飛飛澣衣河畔。豔羨不已。復廉知能文。遂殫力圖之。乃託辭繼室。以千金餽母。又厚賄其季父。卽歸之。居五載。秩滿還京師。其婦悍妬且虐。不能容。遂以飛飛配閨人。乃作薄命詞二十絕句。燕台詞十絕句。以寄其母而死。其薄命詞曰。誰憐青髻亂飄蓬。馬上琵琶曲又終。嫁得儂夫雙足健。漫云佳壻喜乘龍。隔斷江山幾萬重。粉脂零落爲誰容。如何嫡嫡親生母。只愛金錢不愛儂。停鍼無語對銀釭。心自酸辛淚自雙。高疊愁城堅似鐵。酒兵十萬總難降。荻簾日影上遲遲。亂綰烏雲不畫眉。羨殺隔街誰氏女。金錢閒擲買燕脂。鸚鵡比翼兩相依。文彩徧樾

世所稀。誰料風濤生洛浦。鍛翎又逐野雞飛。白雲縹緲望中迷。獨倚蓬牕掩面啼。萬里北堂知也否。碧梧不是鳳凰棲。想後思前恨屢加。誤人都是浣溪紗。既然負却當年意。何必尋春訪若耶。十里西湖憶舊游。而今無復汎輕舟。自憐磊落看花眼。日對烟牕兩淚流。積雨污泥盡沒階。行行溼透小弓鞋。偶思多少侯門女。指點青鬟對對排。不須重賦白頭吟。入骨憂煎死易尋。贏得芳魂歸去好。一抔黃土百年心。自排薄命更誰如。蘭不當門竟被鋤。回首五年成底事。珠圍翠繞夢華胥。土砌茅簷撲面塵。可憐觸目也傷神。看他赫赫司晨牝。也是奴儂一樣人。獅子容他吼獨尊。却將儂去配司閭。兒郎薄倖真堪恨。不記天香枕畔溫。憶昔雙雙倚畫闌。名花相對並頭看。何期棄置同秋葉。忍使琵琶別調彈。淡春衫。嫋嫋腰。菱花自對亦魂消。如何剛狠河東性。相見雖憐總不饒。五載紅妝窄袖輕。人人都道妾傾城。郎情底事秋雲薄。莫訝青樓日送迎。挑燈含淚疊雲箋。萬里緘封報可憐。爲報生身親血母。賣兒還贖幾多錢。無端昔日慕金夫。也是貪癡女子愚。寄語故園諸姊妹。荆釵裙布自堪娛。自悔當初博望高。今成

明月水中撈。風箏本是隨風信。莫怪絲絲綫不牢。無奈鳴鳩居鵲巢。啄將紅藥出林梢。堪憐薄命愁如織。却與詩人作解嘲。其燕台詞曰。袴褪郎當短。短衫高。籬頭髻更巉巖。教奴依樣常妝束。滿漢平分道不凡。摩娑雙眼蹙雙蛾。掩面呼天怎奈何。俗子不知人意懶。挨肩的的唱秧歌。柳色青青詠漢南。樹猶如此人何堪。輸他鄰婦無思慮。枕大葵花滿髻簪。怪聲咀噲誇多般。反道奴奴缺舌蠻。悵望夕陽芳樹外。嬌鶯嘹亮語家山。炎天斗室穢難聞。燒酒生葱盡日熏。記得故園風景好。白羅衫襯石榴裙。豕圈雞棲暑氣重。喙喙滿屋門青蠅。有人水閣珠簾裡。猶說今朝熱不勝。蜀魄啼殘不忍聽。斷腸最是雨淋鈴。劈蘭老米鍋焦飯。南國佳人幾慣經。秋宵偏厭酒人狂。雨怨雲愁總斷腸。一枕正成鄉曲夢。門前猶喚賣甜漿。驟車陣陣響如雷。門外風吹百尺灰。可惜青蔥纖似玉。日生爐火簇烟煤。北地風高朔雪寒。滿天飛絮壓重簷。炕頭不是尋常火。馬糞如香細細添。共三十絕句。所親得其詩於母氏。徧以示人。讀者莫不憐之。

外史氏曰。紅顏薄命。自古而然。況有才乎。才者造物之所忌也。丈夫擅之。且猶

不可。況女子哉。況女子而猶使之不得其所哉。宜其怨之深而言之忿。必至于死而後已也。余讀飛飛詩三十章。感慨係之矣。

婦學

會稽章學誠實齋著

周官有女祝女史。漢制有內起居注。婦人之文字。千古蓋有所用之矣。婦學之名。見於天官內職。德言容功。所該者廣。非如後世祇以文藝爲學者也。然易訓正位乎內。禮職婦功。絲枲。春秋傳稱賦事獻功。小雅篇言酒食是議。則婦人職業。亦約略可知矣。（男子弧矢。女子鑿枲。自有分別。至于典禮文辭。男婦皆所服習。蓋后妃夫人內子命婦于賓享喪祭。皆有禮文。非學不可。）

婦學之目。德容言功。鄭注。謂爲辭令。自非嫺于經禮。習于文章。不足爲學。乃知誦詩習禮。古之婦學。略亞丈夫。後世婦女之文。雖稍偏于華采。要其淵源所自。宜知有所受也。

婦學掌于九嬪。教法行于宮壺。內而臣采。外及侯封。六典未詳。自可例測。葛覃師氏。著于風詩。（侯封婦學）婉婉姆教。垂于內則。（卿士大夫）歷覽春秋內外諸傳。諸侯夫人。大夫內子。並稱文能道。斐然有章。若迺盈滿之祥。鄧曼詳推。

于天道。利貞之義。穆姜精解于乾元。魯穆伯之令妻。典言垂訓。齊司徒之內主。有禮加封。以至泉水。悲流。委懷賦懷歸之什。燕飛上下。淒涼送歸。媵之詩。凡斯經典。禮法文采。風流與名卿大夫。有何殊別。然皆因事牽聯。偶見載籍。非特著也。若出後代史。必專篇類徵。列女則如曹昭蔡炎故事。其爲商皇彪炳。當十倍於劉范之書矣。是知婦學亦自後世失傳。三代之隆。並與男子儀文。率由故事。初不爲務異也。不學之人。以湊洧諸詩爲淫者。自述因謂古之孺婦。矢口成章。勝於後之文人。不知萬無是理。詳辨其說于後。此處未暇論也。但婦學則古實有之。惟行於卿士大夫。而非齊民婦女皆知學耳。

春秋以降。官師分識。學不守于職司。文字流爲著述。古無私門著述。說詳校讐通義。丈夫之秀異者。咸以性情所近。撰述名家。此指戰國先秦諸子家言。以及西京以還經史專門之學。至于降爲詞章。亦以才美所優。標著文采。此指西漢元成而後及東京而下諸人詩文集。而婦女之奇慧殊能。鍾于間氣。亦遂得文辭偏著。而爲今古之所稱。則亦時勢使然而已。然漢廷儒術之盛。

班固以爲利祿之塗使然。蓋功令所崇。賢才爭奮。士之學業。等乎農夫治田。固其宜也。婦人文字。非職業。間有擅者。出於天性之優。非有爭于風氣。騫于聲名者也。（好名之習起于中晚文人。古人雖有好名之病。不區區于文藝間也。丈夫而好文名。已爲識者所鄙。婦女而騫聲名。則非陰類矣。）

唐山房中之歌。班姬長信之賦。風雅正變。（雅指房中風。指長信。）起于宮闈。事關國故。史策載之。其餘篇什。寥寥。傳者蓋寡。藝文所錄。約略可以觀矣。若夫樂府流傳。聲詩則倣。木蘭征戍。孔雀乖離。以及陌上采桑之篇。山下蘼蕪之什。四時白紵。子夜芳香。其聲暉以緩。其節柔以靡。則自兩漢古辭（皆無名氏）訖於六朝雜議。並是騷客擬辭。詩人寄興。情雖託於兒女。義實本於風人。故其辭多駘宕。不以男女酬答爲嫌也。（如陌上桑。羽林郎之類。雖以貞潔自許。然幽閒女子。豈喋喋與狂且爭口舌哉。出於擬作佳矣。）至於閨房篇什。間有所傳。其人無論貞淫。而措語俱有邊幅。文君淫奔人也。而白頭止諷相如。蔡炎失節婦也。而鈔書懇辭十吏。其他安常處順。及以貞節著者。凡有篇章。莫不靜如

止水穆若清風。雖文藻出於天嫺。而範思不踰闕外。此則婦學雖異於古。亦不悖於教化者也。

國風男女之辭。皆出詩人所擬。以漢魏六朝篇什證之。更無可疑。古今一理。不應古人兒女矢口成章。後世學士力追而終不遂也。譬之男優飾靜女。以登場。終不似閨房之雅素也。昧者不知斯理。妄謂古人雖兒女子亦能矢口成章。因爲婦女宜於風雅。是猶見優伶登場。演古人事。妄疑古人動止必先歌曲也。優伶演古人故事。其歌曲之文。正如史傳中夾論贊體。蓋有意中之言。決非出於口者。亦有旁觀之見。斷不出本人者。曲文皆所不避。故君子有時涉於自贅。宵小有時或至自嘲。俾觀者如讀史傳而兼得詠歎之意。體應如是不爲嫌也。如使眞出君子小人之口。無是理矣。國風男女之辭。與古人擬男女辭正當作如是觀。如謂眞出男女之口。無論淫者萬無如此。自暴卽貞者亦萬無如此。自褻也。

昔者班氏漢書未成而卒。詔其女弟曹昭躬就東觀踵而成之。於是公卿大臣

執贄請業。（大儒馬融從受漢書句讀）可謂擴千古之所無矣。然專門絕學有淵源。書不盡言。非其人卽無所受爾。又符秦初建學校。廣置博士經師。五經精備。而周官失傳。博士上奏太常韋逞之母宋氏家傳周官音義。詔卽其家講授。置生員百二十人。隔絳幃而受業。賜宋氏爵。號爲宣文君。此亦擴千古之所無矣。然彼時文獻盛於江左。符氏割據山東。遺經絕業。幸存。世學家女。非名公卿所能強與聞也。此二女者。並是以婦女身行丈夫事。蓋傳經述史。天人道法所關。恐其湮沒失傳。世主不得不破格而崇禮。非謂才華炫耀驚流俗也。卽如靖邊之有譙洗夫人。佐命之有平陽柴主。亦千古所罕矣。一則特開幕府辟署官屬。一則羽葆鼓吹。虎賁班劍。以爲隋唐之主。措置非宜。固屬不可。必欲天下婦人以是爲法。非特不可。亦無是理也。

晉人崇尚元風。任情作達。丈夫則糟粕六藝。婦女亦雅尚清言。步障解圍之談。新婦參軍之戲。雖大節未失。而名教蕩然。論者以十六國分裂。生靈塗炭。歸咎清談之滅禮教。誠探本之論也。

王謝大家。雖愆禮法。然其清言名理。會心甚遙。習儒風。亦暢元旨。方於士學。如中行之失。流爲狂簡者耳。（近於異端。非近於娼優也。）非僅能調五言七字。自詡過於四德三從者也。若其旖旎風光。寒溫酬答。描摩纖曲。刻畫形似。脂粉增其潤色。標榜飾其虛聲。晉人雖曰虛誕。如其見此。挈妻子而逃矣。（王謝大家雖愆禮法。然實讀書知學。故意思深遠。非如才子佳人一味淺俗好名者比也。）

唐宋以還。婦才之可見者。不過春閨秋怨。花草榮彫。短什小篇。傳其高秀。間有別出著作。如宋尙宮之女論語。侯鄭氏之女孝經。雖才識不免迂陋。（欲作女訓。不知學曹大家女誡之體。而妄擬聖經。等於七林。問子虛烏有。）而趨向尙近雅正。藝林稱述。恕其志足嘉爾。（此皆古人婦學失傳。故有志者所成。不過如此。）李易安之金石編摩。管道昇之書畫精妙。後世亦鮮有其儷矣。然琳琅歎識。惟資對勘於湖州。筆墨精能。亦藉觀摩於承旨。未聞宰相子婦。得偕三舍論文。（李易安與趙明誠集金石錄。明誠方在大學。故云爾。）翰林夫人。可

共九卿揮塵。蓋文章雖曰公器。而男女實千古大防。凜然名義綱常。何可誣耶。蓋自唐宋以訖前明。國制不廢女樂。公卿入直。則有翠袖熏爐。官司供張。每見紅裙侑酒。梧桐金井。驛亭有秋感之緣。蘭麝天香。曲江有春明之誓。見於紀載。蓋亦詳矣。又前朝虐政。凡搢紳籍沒。波及妻孥。以致詩禮大家。多淪北里。其有妙兼色藝。慧傳聲詩。都人士從而酬唱。大抵情綿春草。思遠秋楓。投贈類於交遊。殷勤通於燕婉。詩情闊達。不復嫌疑閨閣之篇。鼓鐘聞外。其道固當然耳。且如聲詩盛於三唐。而女子傳篇亦寡。今就一代計之。篇什最富。莫如李冶薛濤魚元機三人。其他莫能並焉。是知女冠方妓。多文因酬接之繁。禮法名門。篇簡自非儀之誠。此亦其明證矣。

夫傾城名妓。屢接名流。酬答詩章。其命意也。兼具夫妻朋友。可謂善藉辭矣。而古人思君懷友。多託男女殷情。若詩人風刺邪淫。又代狡狂自述。區分三種。蹊徑畧同。品隲韻言。不可不知所辨也。夫忠臣友誼。隱隱存懇摯之誠。諷惡嫉邪。言外見憂傷之意。自序說放廢。而詩之得失懸殊。本旨不明。而辭之工拙迥異。

（離騷求女爲真情則語無倫次國風溱洧爲自述亦徑直無味作爲擬託文情自深）故無名男女之詩。殆如太極陰陽之理。存諸天壤。而智者見智。仁者自見仁也。名妓工詩。亦通古義。轉以男女慕悅之實。託諸詩人溫厚之辭。故其遺言雅而有則。眞而不穢。流傳千載。得耀簡編。不能以人廢也。第立言有體。婦異於男。比如薤露。雖工。惟施於挽郎爲稱。權歌縱妙。亦用於舟婦爲宜。彼之贈李和張。所處應爾。良家閨閣。內言且不可聞。門外唱酬。此言何聞爲而至耶。（自官妓革而閨閣不當有門外唱酬。丈夫擬爲男女之辭。不可藉以爲例。古之列女皆然）

夫教坊曲里。雖非先王法制。實前代故事相沿。自非濂洛諸公。何妨小德出入。故有功名匡濟之佐。忠義氣節之流。文章道德之儒。高尚隱逸之士。往往閒情。有寄。簪於簡編。禁網所弛。亦不爲盛德累也。第文章可以學古。而制度則必從時。我朝禮法精嚴。嫌疑慎別。三代以還。未有如是之肅者也。自官禁革除。女樂官司不設。教坊則天下男女之際。無有可以假藉者矣。其有流娼頓妓。漁

色專奸。並干三尺嚴條。決杖不能援贖。（職官生監並是行止有虧。永不叙用。）雖吞舟有漏。未必盡罟爰書。而君子懷刑。豈可自拘司敗。每見名流板鐫詩稿。未窺全集。先閱標題。或紀紅粉麗情。或著青樓唱和。自命風流倜儻。以爲古人同然。不知生今之世。爲今之人。苟於禁令未爛。更何論乎文墨。周公制禮。同姓不昏。假令生周之後。以爲上古男女無別。而瀆亂人倫。行同禽獸。以爲古人有然可乎。（名士詩集先自具枷杖供招。雖謂未識字可矣。）

夫才須學也。學貴識也。才而不學。是爲小慧。小慧無識。是爲不才。不才小慧之人。無所不至。以纖佻輕薄爲風雅。（雅者正也。與惡俗相反。習染風氣。謂之俗。）纖佻鄙俚。皆俗也。鄙俚之俗。猶無傷於世道。人心。纖佻之俗。則風雅之罪人也。（以造飾標榜爲聲名。）（好名之人。未有不俗者也。）炫燿後生。猖披士女。人心風俗。流弊不可勝言矣。夫佻達出於子衿。古人所有。標榜流於巾幘。前代所無。蓋實不足而爭驚於名。已非夫而藉人爲重。男子有志。皆耻爲之。乃至誼絕絲蘿。禮殊授受。輒以緣情綺靡之作。託于斯文氣類之通。因而聽甲乙於臚傳。

求品題於月旦。此則釵樓勾曲。前代往往有之。靜女閨姝。自有天地以來。未聞有是禮也。

古之婦學。如女史女祝女巫。各以職業爲學。畧如男子之專藝而守官矣。至於通方之學。要於德言容功。德隱難名。必如任姒之聖。方稱德之全體。功粗易舉。蠶績之類。通乎士庶。至其學之近於文者。言容之事。爲最重也。蓋自家庭內。則以至天子諸侯卿大夫士。莫不習於禮容。至於朝聘喪祭。后妃夫人。內子命婦。皆有職事。平日講求不預。臨事何以成文。漢之經師。多以章句言禮。尙賴徐生善爲容者。蓋以威儀進止。非徒誦說所能盡也。是婦容之必習於禮。後世大儒。且有不得聞也。但觀傳載敬姜之言。森然禮法。豈後世經世大儒所能及。至於婦言主於辭命。古者內言不出於閫。所謂辭命。亦必禮文之所須也。孔子云。不學詩。無以言。善辭命者。未有不深於詩。但觀春秋婦人辭命。婉而多風。乃知古之婦學。必由禮而通詩。非禮不知容。非詩不知言。六藝或其兼擅者耳。穆姜論易之類。後世婦學失傳。其秀穎而知文者。方自

謂女兼士業。德色見於面矣。不知婦人本自有學。學必以禮爲本。舍其本業而妄託於詩。而詩又非古人之所謂習辭命而善婦言也。是則卽以學言。亦如農夫之舍其田而士失出疆之贊矣。何足徵婦學乎。嗟乎古之婦學。必由禮以通詩。今之婦學。轉因詩而敗禮。禮防決而人心風俗不可復言矣。夫固由無行之文人。倡邪說以陷之。彼眞知婦學者。其視無行文人。若糞土然。（無行文人學本淺陋。眞知學者不難窺破。）何至爲所惑哉。（古之賢女。貴有才也。前人有云。女子無才便是德。者。非惡才也。正謂小有才而不知學。乃爲矜飾。騫名。轉不如村姬田嫗。不致貽笑於大方也。）

飾時髦之中。駟爲閨閣之絕塵。彼假藉以品題。（或譽過其實。或改飾其文。）不過憐其色也。無行文人。其心不可問也。嗚呼。已方以爲才而炫之人。且以爲色而憐之。不知其故而趨之。愚矣。微知其故而亦且趨之。愚之愚矣。女之佳稱。謂之靜女。靜則近于學矣。今之號才女者。何其動耶。何擾擾之甚耶。噫。婦學跋

章實齊進士婦學。余于藝海珠塵中得見全帙。其言婉而多風。洵金閨藥石也。因錄登叢書之。蓋較陸麗京陳乾初查石丈新婦譜徐野君婦德四箴更進一籌矣。丁卯上巳日震澤楊復吉識。

婦人鞋襪考

莆田余懷澹心著

古婦人之足。與男子無異。周禮有屨人。掌王及后之服屨。爲赤舄。黑舄。赤纁。黃纁。青勾。素履。葛屨。辨外內命。夫命婦之功屨。命屨散屨。可見男女之履。同一形製。非如後世女子之弓彎細纖。以小爲貴也。考之纏足。起於南唐李後主。後主有宮嬪宵娘。纖麗善舞。乃命作金蓮。高六尺。飾以珍寶。綳帶纓絡。中作品色瑞蓮。令宵娘以帛纏足。屈上作新月狀。著素襪。行舞蓮中。迴旋有凌雲之態。由是人多效之。此纏足所自始也。唐以前未開此風。故詞客詩人。歌咏美人。好女。容態之殊麗。顏色之天姣。以至面粧首飾。衣綃裙裾之華靡。髻髮眉眼唇齒腰肢。手腕之婀娜。秀潔無不津津乎其言之。而無一語及足之纖小者。卽如古樂府之雙行纏云。新羅綉白蹻。足趺如春妍。曹子建云。踐遠遊之文履。李太白詩云。一雙金齒屐。兩足白如霜。韓致光詩云。六寸膚圓光緻緻。杜牧之詩云。鈿尺裁量減四分。漢雜事秘辛云。足長八寸。蹻跗豐妍。夫六寸八寸。素白豐妍。可知唐

以前婦人之足無屈上作新月狀者也。卽東晉潘妃作金蓮花貼地令妃行其上曰此步步生金蓮花。非謂足爲金蓮也。崔豹古今注東晉有鳳頭重台之履不專言婦人也。宋元豐以前纏足者尙少自元至今將四百年矯揉造作亦泰甚矣。古婦人皆着襪。楊太真死之日馬嵬媼得錦綉襪一隻過客一玩百錢。李太白詩云溪上足如霜不着鴉頭襪。襪一名膝襪。宋高宗聞秦檜死喜曰今後免膝襪中挿匕首矣。則襪也。膝襪也。乃男女之通稱。原無分別。但古有底今無底耳。古有底之襪不必着鞋皆可行地。今無底之襪非着鞋則寸步不能行矣。張平子云羅襪凌躡足容與。曹子建云凌虛凌步羅襪生塵。李後主詞云剗襪下香階手提金縷鞋。古人鞋襪之製其不同如此。至于高底之製前古未聞于今獨絕。吳下婦人有以異香爲底圍以精綾者有鑿花玲瓏囊以香麝行步霏霏印香在地者此則服妖。宋元以來詩人所未及故表而出之以告世之賦香。詠玉台者。

余澹心先生此考甚精博然竊疑之卽以所引杜牧詩云鈿尺裁量減四分

下句乃云纖纖玉笋裏輕雲已極善形容。秘辛云。足長八寸。下云底平指歛。約縑迫袂收束微如禁中。亦覺摹寫酷肖。非影響之談。蓋漢尺最小。其長如今六寸耳。是八寸僅四寸餘也。秘辛又云。自顛至底長七尺一寸。蓋四尺三寸也。漢制攷云。中婦人手長八寸。儀禮註云。中人之跡長尺二寸。較量即可知矣。且他處言纏足甚多。姑引數條。白樂天上陽宮人白髮詩云。小頭鞋履窄衣裳。誠齋雜志云。天寶間。桃源女子吳寸趾。以足小得名。姚鵠尺牘云。馬嵬老嫗得太真錦襪以致富。其女名玉飛。得雀頭履一隻。眞珠飾口。薄檀爲苴。長僅三寸。南部烟花記有陳宮臥履。臥時猶履。纏足可知。古樂府云。纖纖作細步。精妙世無雙。輟耕錄云。晉永嘉元年。鞞鞋用黃草。宮內妃御皆著。始有伏鳩頭履子。伏鳩頭狀其纖小也。南史羊侃有彈箏人。陸大喜。著鹿角爪長七寸。時人謂能掌中舞。此皆在窈娘之前。不止此也。又按史記貨殖傳云。今趙女鄭姬設形容。揄鳴琴。揄長袖。躡利屐。謂之利亦尖銳之意。張衡西京賦云。振朱履于盤擲。史游急就章。鞞鞞印角。下注云。鞞謂韋履。頭深而兌。底

平而薄者也。今俗謂之跣子。按兌與銳同。鞮薄革小履也。按此卽張衡同聲歌。鞮芬以狄香者也。卬角。當卬其角。舉足乃行。疑卽今之扳尖鞋。此三者皆謂婦之履也。修竹閣女訓云。本壽問于母曰。女子必纏足。何也。其母曰。聖人重女。使不輕舉。是以裹其足。范睢裹足不入秦。用女喻也。此又在秘辛之前矣。其他言婦人鞋履者甚衆。尙在疑似未暇多載也。費錫璜滋衡氏跋。

纏足談

錢塘袁枚子才著

婦人纏足。墨莊漫錄。以爲起於李後主窈娘。楊升菴丹鉛錄。引古樂府之新羅繡行。纏足。趺如春妍。杜牧詩之鈿尺裁量減四分。駁之。以爲唐時已有矣。輟耕錄亦云。始於五代。余按漢隸釋。漢武梁祠畫老萊之母。曾子之妻。履頭皆銳。是証據之最古者。然沈約宋書禮志。男子履圓。女子履兌。是又非銳之說也。大抵古女子行不露足。慎夫人衣不曳地。王莽妻亦然。以爲美談。可見古婦人衣皆曳地不露足也。若纏足之事。轉在男子。毛詩赤芾金舄。卜子夏小傳曰。幅偃也。所以自偃束也。箋云。如今行滕也。行而緘足。故曰行滕。邪而纏之。故曰邪幅。衛褚師聲子襪而登席。出公怒其無禮。豈古人必赤足登席。乃謂之有禮乎。蓋雖脫履解襪。而足上自有邪幅裹之故也。想婦人亦當如男子矣。大抵婦人之步。貴乎舒遲。毛詩月出皎兮。佼人僚兮。舒窈糾兮。毛傳。舒遲也。窈糾。舒之姿也。張平子南都賦。羅襪躡蹠而容與。焦仲卿詩。足下躡絲履。纖纖作細步。旣以緩行。

爲貴。則纏束使小。在古容或有之。故急就章鞞。鞞却角褐襪巾。師古注。鞞。韋履也。頭深而銳。平底。俗名跣子。鞞。薄革小履也。巾者。裹足巾。若今裹足布。漢書地理志。趙女彈絃跣躡。師古注。躡。與屣同。小履之無跟者也。跣。謂輕躡之也。是數者。皆漸漸有以小爲貴之義。然唐白香詩曰。小頭鞋履窄衣裳。天寶末年時世粧。韓致光詩曰。六寸膚圓光緻緻。皆極言其小。而終不言其弓。可見潘妃之步金蓮花。亦非弓也。北史。任城王楷刺并州。斷婦人以新靴換故靴。知男子婦人同一靴也。郭若虛圖畫見聞記。唐代宗令宮人穿紅錦鞞靴。楊妃死於馬嵬。人藏其錦襪。觀者人一錢。太白越女詞。展上足如霜。不着鴉頭襪。皆婦人穿靴襪之明證。其非弓也明矣。宋史。治平元年。韓維爲穎王記室。侍王坐。有以弓鞋進者。維曰。王安用舞靴。可見當時婦人舞才着弓鞋。平時不着也。惟北宋徐積咏蔡家婦云。但知勒四支。不知裹兩足。陸放翁老學庵筆記。宣和末。女子鞋底尖。以二色合成。名錯到底。伊世珍瑤環記。言徐玉英臥履。以薄玉花爲飾。內加龍腦。謂之玉香。此則弓鞋之明証。盛行於宋時。若玉壺清話。載唐明皇咏錦襪云。

瓊鉤窄窄手中弄明月。以爲弓鞋之証。恐是小說家之附會。

完

卷四

三

集

百花彈詞

錢塘錢濤怒白著

自古名花號美人。

嬌紅嫩白鬥芳春。

每誇金谷千秋麗。

更道隋宮五色新。

把酒常須花在眼。

現花莫便酒離唇。

明朝試向花前看。

滿地殘紅最愴神。

花落花間最有情。

閒將筆墨譜花名。

千紅萬紫都評遍。

分付花神仔細聽。

問誰人開闢就花花世界。更那個創造下草草乾坤。百年中無非是香花陽燄。一日裏不可少檀板金尊。慨世間有無數名花異卉。普天下知多少花朵花名。君不見錦堤邊千般爛熳。君不見紅嬌畔萬種精神。君不見上陽宮蜂喧蝶攘。君不見宜春苑燕送鶯迎。一種種一般般看他妖艷。紅者紅。白者白。聽我評論。有客能將雁柱排。花前高唱獨徘徊。

春風春雨雖相妬。看取名花指下開。

第一種牡丹花。天生富貴號花王。稱國色。花裡爲尊。姚家黃。魏家紫。而今罕見。得君王帶笑看。傾國傾城醉楊妃。倚闌干。沉香亭北。李青蓮題妙句。三調清平。芍藥花。比牡丹雖然少遜。一般的門春華。越樣鮮新。金帶圍廣陵城。預知宰相。不知道洧水畔。贈與何人。露桃花。倚東風。深紅淺白。武陵溪。元都觀到處。藏春蓬萊山。三千載。開花結果。天台路。盼着了。阮肇。劉晨。最可惜暮春時。一番紅雨。眞堪嘆。今日裡。人去題門。桃花謝。杏花開。艷妝春色。疊亂霞。飄微纖。根倚深雲。碎錦坊。裴晉公。午橋遺愛。廬山上。董神仙。五樹成林。探花宴。上林中。賦詩爭快。狀元去。馬如飛。踏碎香塵。桃花紅。杏花紅。李花偏白。白如霜。白如雪。無月自明。怎知道。王家郎。一朝鑽核。倒不如李家兒。萬古盤根。世間花還又。數梨花。潔白似何郎。曾傳粉。一樣消魂。鶯來覓蝶來。認新粧。淡淡淚。闌干愁。寂寞春雨盈盈。薔薇花在牆東。春紅零亂。想經年未架。却心緒縱橫。無人處。折一枝。常防刺手。夜深時。纔經過。攬住羅裙。玉蘭花。分明是。茗華刻就。玉堂前。爭春色。香氣氤氳。

綉球花。在風前。誰能踢弄。玉簪花。滿地上。若個遺簪。金雀花。一般兒。飛飛欲動。
蝴蝶花。可也是。栩栩身輕。丁香花。豈蕊花。念愁不破。夜合花。合歡花。最苦多情。
有一種。水中蓮。又名菡萏。照秋波。窺明鏡。冉冉亭亭。細端詳。綠雲中。宛如仙子。
雖然是在。污泥不染。埃塵太華。峰藕如船。曾開十丈。太液池。花能語。紅白芳芬。
似六郎。好龐兒。親承兒女。后怪潘妃。一步步。喜殺東昏。只有那。老嫦娥。一枝丹。
桂。有誰人。攀得著。兩袖。香生紅狀元。白探花。黃爲榜眼。寶龍涎。欺鳳餅。老翠連。
雲。臯塗山。種將成。八稜。齊挺。廉寒宮。斫不去。家載重生。晚霜天。東籬畔。菊花開。
放。想從來。稱知己。只有淵明。問尊前。子細看。花如我。瘦吟澤畔。靈均氏。問夕餐。
英。秋江上。芙蓉花。淩波弄影。一枝枝。翻江浪。別有風情。紫薇花。端只許仙郎。相。
對。紫荊花。再不教。兄弟。輕分木筆花。描不出。千般春色。金錢花。買不得。萬種春。
情。玉堦前。鷄冠花。那能報曉。三更裡。杜鵑花。啼得。傷心。並不見。金燈花。夜深照。
影。只有那。鼓子花。雨打無聲。我愛他。十姊妹。要他。窈窕。我愛他。千日紅。不肯凋。
零。我愛他。剪春羅。剪開羅帶。我愛他。紫羅欄。裁作羅巾。誰得似。淩霄花。千雲直。

上誰得似蜀葵花。向日傾城誰知道。萱草花兒。兒女誰知道。棠樣花。弟弟兄。茉莉花。偏偏只是秋香不散。茶蘼花。全不能春夢難醒。山丹花。山茶花。十分春色。瑞香花。木香花。滿座香薰。鳳仙花。細看時恍如鳳彩。牽牛花。試聽花不見。牛鳴。蜡梅花。是誰把黃酥細染。石梅花。問誰將紅粉調勻。真堪嘆。木槿花。朝榮暮瘁。怎能似菖蒲花。不老長生。有一個着蘆花花中孝子。有一個噉松花花裡仙人。真難得。欸冬花。三冬獨茂。真難得。長春花。四季長新。紅蓼花。一點點離人淚。血楊柳花。一絲絲蕩子春魂。朱藤花。盡道是輕盈不俗。水仙花。又自會瀟灑離塵。棣棠花。雖不是黃金煉就。玫瑰花。却真個紫玉雕成。棗子花。橘子花。終須結實。碧桃花。海棠花。可惜飄零。梔子花。帶妙香。三分嫩白。櫻桃花。垂紫蒂。一樹紅英。照菱花。洞房中。一雙俊影。猷椒花。高堂上。兩位雙親。一千兩金銀花。那能買笑。幾萬貫榆莢錢。不會通神。萬種花。總不如寒梅獨異。又清香。又高古。無與爲羣。點就了壽陽粧。一時豐韵。做醒了羅浮夢。千古消魂。尙記得在他鄉寄歸驛。使不知道。是何年嫁與林君。

聞道花開不易看。一時說出許多般。

不知尚有名花在。聽我從頭仔細彈。

還有那幽蘭花生於空谷。縱無人香自在。不受塵埃。還有那蕃釐觀瓊花一本。
是天花。豈肯在人世沈論。還有那優曇花奇香妙品。在西方億萬劫與物爲鄰。
還有那虞美人花開古墓。立風前情脉脉。欲笑還顰。還有那雁來紅。老年。忽少。
還有那吉祥草到處爲禎。還有那美人苴。偎紅倚綠。還有那映山紅。徧谷彌陵。
驚粟花媚藥中實名鴉片。珠蘭花七碗內堪伴茶星。一丈紅五尺攔剛遞半段。
木蘭花船上望原是花身。漢宮秋那知道長門秋怨。秋海棠最堪憐。腸斷秋砧。
梧桐花放下着六根六識。木棉花識就了千緯千經。月季花月月紅。四時不斷。
含笑花朝朝樂一笑生春一般的。菜花開遊蜂隊隊直等的。槐花黃舉子紛紛。
石竹花篆竹花迥於異樣。朱蘭花若蘭花各自相分。苜蓿花靛青花近於野草。
王瓜花白豆花瑣碎難論。筆尖頭寫不盡許多數目。四季花那能盡悉記其名。
倒不如隋煬帝宮中剪綵。代天工補就了一段陽春。又不如唐天子服軒擊鼓。

好春光。判斷了。不費天心。洛陽城到春來。名花開遍。河陽縣號花封。仙吏傳名。
黃四娘有的是。千枝萬朵。蘇公堤鎮。一片紫霧紅雲。說不盡自古來繁華境界。
收拾些。從今後。花柳心情。君不見。霎時間。催花風雨。粉牆邊。蒼苔上。都是殘英。
金谷園。剩得些。荒苔野鮮。百花洲。只見些。蔓茸青。燐彩雲中。望不見。散花天女。
春宮內。難覓個。花蕊夫人。覷得破。假機關。花開花落。悟得着。真消息。非色非聲。
坐談間。描寫盡。花情花態。東風裡。不知道。花喜花嗔。滿詞場。又添了一番佳話。
慚愧殺。江郎筆。五色花生。

百歲光陽易白頭。

花開花落幾時休。

且將膝上琵琶語。

彈盡胸中一段愁。

最好春光二月天。

驚紅哭紫各紛然。

那能化作花間蝶。

日向花房自在眠。

今列女傳

母儀

孝聖憲皇后。純皇帝之母也。始在母家。居承德城中。家貧無奴婢。六七歲時。父母遣詣市買漿酒粟麵。所至店肆輒大讎。市人敬異焉。十三歲時入京師。值中外姊妹當選入宮。隨往觀之。門者初以爲在籍中。旣而引見。十人爲列。始覺之主者懼譴。令入末班。孝聖容體端頤。中選。分皇子邸。得在雍府。卽世宗憲皇帝王宮也。憲皇帝肅儉儉學。靡有聲色侍御之好。福晉別居。進見有時。會夏被時疾。御者多不樂往。孝聖奉妃命。旦夕服事唯謹。連五六旬。疾大愈。遂得留侍。生高宗焉。及爲太后。約皇帝以禮。率六宮以慈。福壽仁賢。形於四海。準回之平也。有女藉於宮中。生有美色。專得上寵。號曰回妃。然準女懷其家國。恨於亡破。陰懷逆志。因侍寢而驚。宮御者數矣。詰問具對。以必死報父母之讐。上益悲壯其志。思以恩養之。太后知焉。每召回女。上輒左右之。會郊祭齋宿。子夜駕出。太后乘平輦直至上宮。入便閉門。宦侍奔告。

上遽命駕還。叩門不得入。以額觸扉。臣御號泣。聞於內外。太后當門坐。促召回女。絞而殺之。待其氣絕。撫之已冷。乃啟門。上入號泣。俄而大寤。頓首太后前。太后亦持上流涕。左右莫不感動泣下。海內聞者皆歎息。相謂天子有聖母也。靜而有化。而彊于教誨。詩曰。君子萬年。景命有僕。此之謂也。

節義

織笠女者。河南人也。其縣婦女采臺草織笠以爲事。女自十二三時。每織擇精好細潔之草。別藏之。既多。復擇其尤當嫁之歲。自製一笠。既成。昏用獻其夫。而語其勤焉。夫戴以出。市人見者無不誇也。久之。旁縣亦聞之。它日夫出。有自後呼之者。公子也。問之曰。物以難得而珍。貨以有用爲貴。今子之笠。婦所織也。冠之不可以却暑。無貪不可以爲炊。子誠賣之。願論其價。可乎。其夫心惜之。而以客爲寃言。姑應之曰。吾笠不賣。客幸欲之。若得錢八萬。當以與客。不然。無相問也。公子大喜。遽下錢八萬。取笠而去。於是其夫輦錢而歸。喜告其婦曰。笠已賣矣。乃得八萬。若先靳之。十萬可致也。女問其故。默然內悲。而無言。其夫出。遂闔

戶自經而死。君子以織笠女爲識微。夫古之婦也。義可求去。今也不然。一入其門。榮辱隨之。至於見賣逼淫。而求死興獄者。有司日有聞也。女之死。可謂達時矣。使龍比知之。則其君無殺諫之名。屈平知之。則其先無左徒之寵。君子與其待敗而俱傷也。不若自潔以全其交。詩曰。反是不思。亦已焉哉。此之謂也。

辯通

直辭女童滿洲人。其父爲京營四品官。則未知其爲參領與佐領與。咸豐九年冬。選良家女入宮。引見內殿。上親臨視。女童以父官品例在籍中。晨入天寒。上久不出。諸女立階下。冰凍縮慙。莫能自主。女童家貧衣薄。不堪其寒。屢欲先出。主者大臆怪。固留止之。稍相爭論。女童大言曰。吾聞朝廷立事。各有其時。今四方兵寇。京餉不給。城中人衣食日困。恃粥而活。吾等家無見糧。父子不相保。未聞選用將相。召見賢士。今日選妃。明日挑女。吾聞古有無道昏主。今其是邪。於是上在屏後微聞之。出則詔問誰言者。諸女恐怖失色。莫能對。女童前跪稱奴適有言。上問曰。汝何所云。女童前對奴等當引見。駕久不出。誠

不勝寒。欲出不得。而總管以朝廷禁令相責。奴誠死罪。忘其軀命。具言朝廷立事。各有其時。今四方兵寇。京餉不給。城中人衣食日困。恃粥而活。奴等家無見糧。父子不相保。未聞選用將相。召見賢士。今日選妃。明日挑女。竊聞古有無道昏主。竊以論皇上。願伏其罪。於是上默然良久。曰。汝不願選者。今可出矣。女童叩頭退立。上遂罷選。當女童前後言時。與在旁者莫不惶急。流汗咋舌。不敢卒聽。及得溫旨遣出。或猶戰慄不能正步。以此女童名聞京師。君子以爲能直辭。詩曰。匪飢匪渴。德音來括。此之謂也。女童既出。上它曰。以事降其父一階。欲令後選時。女可不豫也。君子以爲女童以一言而悟主成。文宗之寬明。顯名於後世。詩曰。靜女其變。貽我彤管。女童可以煒彤管矣。

今列女傳附錄

國風報春冰室野乘載此三事據云得之達縣吳季清先生所箸筆記吳又聞諸王壬秋先生云云茲讀湘綺樓今列女傳筆意謹嚴敘述得體事實與吳稍異惟吳文斐亶亦有可觀因附錄之 皞皞子識

回部王妃某氏者國色也。生而體有異香。不假熏沐。國人號之曰香妃。或有繩其美於中土者。高宗純皇帝微聞之。西師之役。將軍兆惠陛辭。上從容語及香妃。命兆惠一窮其異。回疆既平。兆惠果生得香妃。致之京師。先密疏奏聞。上大喜。命沿途地方官吏護視起居維謹。慮風霜跋涉致損顏色。兼以防其自殊也。既至。處之西內。妃在宮中。意色泰然。若不知有亡國之恨者。唯上至則凜凜霜雪。與之語。百問不一答。無已。令宮人善言詞者諭以指妃慨然。出白刃袖中示之曰。國破家亡。死志久決。然決不肯效兒女子。汝汝徒死。必得一當以報故主。上如強逼我。則吾志遂矣。聞者大驚。諄其侶欲共刦而奪之。妃笑曰。無以爲也。吾和衣中尙有如此刃者數十計。安能悉取而奪之乎。且汝

輩如強犯我者。吾先飲刃。汝輩其奈何。宮人不得要領。具以語白。上。上亦無如何。但時時幸其宮中。坐少選。卽復出。猶冀其久而復仇之意漸怠也。則命諸侍者。日夜邏守之。妃既不得遂所志。乃思自戕。而監者所夕不離側。卒無隙可乘而止。妃至中土久。每歲時令節。思故鄉風物。輒潛然泣下。上聞之。則於西苑中。妃所居樓外。建市肆。室廬禮拜堂具。如西域式。以悅其意。今其地尙無恙也。時孝聖憲皇后春秋高。微聞其事。數戒上。毋往西內。且曰。彼既終不肯自屈。曷弗殺之以成其志。無已。則權歸其鄉里乎。上雖知其不可屈。而卒不忍舍也。如是者數年。會長至圖丘大祀。上先期赴齋宮。太后問上。已出。急令人召妃詣慈甯宮。妃既至。則命鑄宮門雖上。至不得納。乃召妃至前。問之曰。汝不肯屈。志終當何爲。耶。對曰。死耳。曰。然則今日賜汝死可乎。妃乃大喜。再拜頓首曰。太后天地恩。竟肯遂臣妾志。耶。妾閒關萬里。所以忍辱而至。此者。唯不欲徒死。計得一當。以復仇雪耻耳。今既不得遂所志。此身眞贅旒。無甯一瞑不視。從故主地下之爲愈矣。太后天地恩。竟肯遂臣妾志。臣妾地下。

感且不朽。語罷泣數行下。太后亦爲惻然。乃令人引入殯室中縊之。是時上在齋宮。已得報。倉皇命駕歸。至則宮門已下鍵。不得入。乃痛哭門外。俄而門啟。傳太后命引上入。則妃已絕矣。膚色如生。面色猶含笑也。乃厚其棺。歛以妃禮葬之。

旗人某氏女者。父爲驍騎校。夫婦老而無子。且家赤貧。恃女針黹以養。縫紉溷廚之事。悉一身兼之。女略識文字。有暇則聚鄰童。教以識字。藉博升合資。時咸豐初年也。一日禁中選秀女。期屆。女名在籍中。聞報抱父母慟哭。念已入宮。父母老無依。且展轉死溝壑。欲奉親以遁者數矣。故事無問官民家女。旣當選。則以官監守之。慮其遁也。女旣不克脫。不得已。屆期隨衆往。排班候駕於坤寧宮門外。時天甫黎明也。是時金陵甫失守。羽書絡繹至。上憂勞旰食。每樞臣入見。議戰守事。輒至日昃。乃退。民家女初入宮禁。已戰栗不自勝。又俟駕久。罷倚不能耐。重以飢渴交迫。相向飲泣。監者叱之曰。聖駕行且至。何敢若此。不畏鞭笞耶。衆聞言。愈戰懼欲絕。女勃然起。厲聲語監者曰。去室家。辭父母。以入宮。

禁果當選。卽終身幽閉。不復見其親。生離死別。爭此晷刻。人孰無情。安得不涕泣。吾死且不畏。況鞭笞乎。且緒寇起。粵嶠閒不數載。悉長江而有之。今遂陷金陵。天下已失其半。天子不能求將帥之臣。汲汲謀戰守。以遏賊鋒。保祖宗大業。而猶留情女色。強攫民家女。幽之宮禁中。俾終身不獲見天日。以縱一日之欲。而棄宗社于不顧。行見寇氛迫宮闕。九廟不血食也。吾死且不畏。況鞭笞乎。監者大驚。急掩其口。而上適退朝。御輦已至前矣。因共縛其手。牽詣上前。抑之跪。女猶倔強。不肯屈膝。初女所言。上已微聞之。至是復笑問其故。女仍侃侃然奏如前語。上欣然喜曰。此真奇女子也。亟命釋其縛。令引入宮中。朝見。皇后時某邸方喪偶。謀續娶。因以女指昏焉。而罷所選秀女。使皆甯其家。

某氏者。河南民家女也。生而奇慧。鄉里以針神譽之。少失怙恃。鞠於兄嫂。兄嫂皆鍾愛之。爲擇配甚苛。故及笄。猶無人委禽也。女一日以麥草織雨笠。窮工極巧。鉤心鬥角。竭數十日力。僅成一具。持付兄。俾詣市售之。曰。第索價百金。無增

減有購者。卽詢其里居姓字而謹識之。兄訝曰。一笠耳。惡能直百金。持以過市。人不將疑我狂耶。女曰。第如我言之。必有購者。如其竟無人。不怨兄也。嫂在側。默喻其意。知女意在擇偶也。因促其夫如妹言。兄不得已。持以出。閱三日。無人問價者。意女特謔言耳。日暮。倦欲歸。忽一少年翩然來迎。與語。衣履脩潔。神宇閒雅。兄故所相識。隣村某高材生也。見所持笠。異之。把玩不釋手。問持此何爲。以求售對。詢其價。以百金對。生沈思久之。恍然悟。卽邀兄詣其家。出百金授之。而留其笠。兄微以言叩之。則生猶未娶也。歸告妻。使以語妹。女果首肯。亟以媒氏往。婚遂成。卜日親迎以歸。伉儷果綦篤。壻家故無舅姑。惟夫婦二人倡隨之樂。誠萬戶侯不與易也。生寶愛草笠甚。令女爲製錦韜藏其中。出必冠之。無間晴雨。歸必手自拂拭。韜而懸之帷中。以爲常。數年後。女舉一子。已呀呀學語矣。生有所善某富室子者。嘗求昏于女。女以其無行。却之。至是益妒生之得美婦也。謀所以閒之者。乃陽納交焉。恒招生爲詩酒會。因道之爲狹邪遊。生惑焉。出輒數日不歸。女憂之。乃婉語曰。昨某君來吾家。吾於屏後窺其人目動而言。

肆是殆有異圖不可近也。生未以爲然。笑置之。一日醉歸。忽易笠而帽。女訝問之。則已爲某乘醉攫去矣。女默然。亦無一言。生倦而酣寢。曉始醒。則獨臥於床。訝女胡蚤作。呼之不應。亟起視。已縊於窗櫺閒矣。生駭極。木立大痛。茫不知其故。俯視碎錦狼藉地上。拾審之。卽所以韜笠者。始悟女所以死。乃大痛悔號泣數日。亦感疾死。

李師師外傳

李師師者。汴京東二廂永慶坊染局匠王寅之女也。寅妻既產女而卒。寅以菽漿代乳乳之。得不死。在襁褓未嘗啼。汴俗凡男女生。父母愛之。必爲捨身佛寺。寅憐其女。乃爲捨身寶光寺。女時方知孩笑。一老僧目之曰。此何地。爾亦來耶。女至是忽啼。僧爲摩其頂。啼乃止。寅竊喜曰。是女真佛弟子。爲佛弟子者。俗呼爲師。故名之曰師師。師師方四歲。寅犯罪繫獄死。師師無所歸。有娼籍李姥者。收養之比長。色藝絕倫。遂名冠諸坊曲。徽宗既卽位。好事奢華。而蔡京章惇王黼之徒。遂假紹述爲名。勸帝復行青苗諸法。長安中粉飾爲饒樂氣象。市肆酒稅日計萬緡。金玉綈帛充溢府庫。於是童貫朱勔輩復導以聲色。狗馬宮室園囿之樂。凡海內奇花異石。搜采殆徧。築離宮於汴城之北。名曰艮嶽。帝殷樂其中。久而厭之。更思微行爲狹邪遊。內押班張迪者。帝所親倖之寺人也。未宮時。爲長安狎客。往來諸坊曲。故與李姥善。爲帝言隴西氏色藝雙絕。帝豔心焉。翌日命迪出內府紫葺二匹。霞氍二端。瑟瑟珠二顆。白金廿鎰。詭云大賈趙乙。

願過廬一顧。姥利金幣喜諾。暮夜帝易服。雜內侍四十餘人中出東華門二里許。至鎮安坊。鎮安坊者。李姥所居之里也。帝麾止餘人。獨與迪翔步而入堂戶。卑庫姥出迎。分庭抗禮。慰問周至。進以時果數種。中有香雪藕。水晶蘋婆。而鮮棗大如卵。皆大官所未供者。帝爲各嘗一枚。姥復款洽良久。獨未見師。師出拜。帝延佇以待。時迪已辭退。姥乃引帝至一小軒。梨几臨牕。縹緗數帙。牕外新篁參差弄影。帝翛然兀坐。意興閒適。獨未見師。師出侍。少頃。姥引帝到後堂。陳列鹿炙。鷄醢。魚膾。羊羹等肴。飯以香子稻米。帝爲進一餐。姥侍旁。款語移時。而師終未出。見帝方疑異。而姥忽復請浴。帝辭之。姥至帝前耳語曰。兒性好潔。勿忤帝不得已。隨姥至一小樓下。漏室中浴竟。姥復引帝坐後堂。肴核水陸盃盞新潔。勸帝歡飲。而師終未一見。良久。姥纔執燭引帝至房。帝舉帷而入。一燈熒然。亦絕無師。師在帝益異之。爲徙倚几榻間。又良久。見姥擁一姬姍姍而來。不施脂粉。衣絹素。無艷服。新浴方罷。嬌艷如出水芙蓉。見帝意似不屑貌。殊倨不爲禮。姥與帝耳語曰。兒性頗愼。勿怪。帝于燈下凝睇物色之。幽姿逸韻。閃爍

驚眸問其年。不答。復強之。乃遷。至于他。所姥復附帝耳曰。兒性好靜坐。唐突勿罪。遂爲下帷而出。師師乃起解。玄絹褐襖衣。輕綈捲右袂。援壁間琴。隱几端坐。而鼓平沙落雁之曲。輕攏漫撚。流韻淡遠。帝不覺爲之傾耳。遂忘倦。比曲三終。雞唱矣。帝急披帷出。姥聞亦起。爲進杏酥飲。棗糕餠。飪諸點品。帝飲杏酥盃許。旋起去。內侍從行者皆潛候於外。即擁衛還宮。時大觀三年八月十七日事也。姥語師師曰。趙人禮意不薄。汝何落落乃爾。師師怒曰。彼賈奴耳。我何爲者。姥笑曰。兒強項。可令御史裡行。已而長安人言藉藉。皆知駕幸隴西氏。姥聞大恐。日夕惟啼泣。泣謂師師曰。洵是夷吾族矣。師師曰。無恐。上肯顧我。豈忍殺我。且嘻。昔之夜。幸不見逼。上意必憐我。惟是我所竊自悼者。實命不猶。流落下賤。使不潔之名。上累至尊。此則死有餘辜耳。若夫天威震怒。橫被誅戮。事起佚游。上所深諱。必不至此。可無慮也。次年正月。帝遣迪賜師師蛇蚶琴。蛇蚶琴者。琴古而漆黝。則有紋如蛇之蚶。蓋大內珍藏寶器也。又賜白金五十兩。三月。帝復微行如隴西氏。師師仍淡粧素服。俯伏門階迎駕。帝喜爲執其手令起。帝見其堂。

戶勿華。殿前所御處。皆以蟠龍錦繡覆其上。又小軒改造傑閣。畫棟朱欄。都無幽趣。而李姥見帝至。亦匿避。宣至則體顫不能起。無復向時調寒送暖情態。帝意不悅。爲霽顏。以老娘呼之。諭以一家子無拘畏。姥拜謝。乃引帝至大樓。樓初成。師師伏地叩帝。賜額。時樓前杏花盛放。帝爲書醉杏樓三字。賜之。少頃置酒。師師侍側。姥匍匐傳樽。爲帝壽。帝賜師師隅坐。命鼓所賜蛇蚶琴。爲弄梅花三疊。帝啣杯飲聽。稱善者再。然帝見所供肴饌皆龍鳳形。或鏤或繪。悉如宮中式。因問之。知出自尙食房廚夫手。姥出金錢倩製者。帝亦不憚。諭姥今後悉如前。無矜張顯著。遂不終席。駕返。帝嘗御畫院。出詩句。賜諸畫工。中式者歲間得一二。是年九月。以金勤馬嘶芳草。地玉樓人醉杏花。天名畫一幅。賜隴西氏。又賜藕絲燈。暖雪燈。芳苳燈。大鳳銜珠燈。各十盞。鸕鷀杯。琥珀杯。琉璃杯。金偏提。各十事。月團鳳團。蒙頂等茶。百斤。鉢。飢寒具。銀餠數盒。又賜黃白金各千兩。時宮中已盛傳其事。鄭后聞而諫曰。妓流下賤。不宜上接聖躬。且暮夜微行。亦恐事生。叵測。願陛下自愛。帝領之。閱歲者再不復出。然通問賞賜。未嘗絕也。宣和

二年帝復幸隴西氏見懸所賜畫於醉杏樓觀玩久之忽回顧見師師戲語曰畫中人乃呼之欲出耶即日賜師師辟寒金鈿映月珠環舞鸞青鏡金虬香鼎次日又賜師師端溪鳳硯李廷珪墨玉管宣毫筆剡溪綾紋紙又賜李錢百千緡迪私言于上曰帝幸隴西必易服夜行故不能常繼今艮嶽離宮東偏有官地袤延二三里直接鎮安坊若于此處爲潛道帝駕往還殊便帝曰汝圖之於是迪等疏言離宮宿衛人向多露處臣等願出貲若干于官地營室數百楹廣築圍牆以便宿衛帝可其奏於是羽林巡軍等布列至鎮安坊止而行人爲之屏跡矣四年三月帝始從潛道幸隴西賜藏圖雙陸等具又賜片玉棋盤碧白二色玉棋子畫院宮扇九折五花之簾鱗文蓐葉之席湘竹綺簾五綵珊瑚鈎是日帝與師師雙陸不勝圍棋又不勝賜白金二千兩嗣後師師生辰又賜珠鈿金條脫各二事璣琲一篋毳錦數端鷺毛繪翠羽緞百匹白金千兩後又以減遼慶賀大賚州郡加恩宮府乃賜師師紫綃絹幕五彩流蘇冰蠶神錦被却塵錦褥麝金千兩良醞則有桂露流霞香蜜等名又賜李姥大府錢萬緡

計前後賜金銀錢繪帛器用食物等不下十萬。帝嘗於宮中集宮眷等。謙坐。章妃私問曰。何物李家兒。陛下悅之如此。帝曰。無他。但令爾等百人改豔粧服。玄素令此娃雜處其中。迴然自別。其一種幽姿逸韻。要在色容之外耳。無何。帝禪位。自號爲道君教主。退處太乙宮。佚游之興。於是衰矣。師師語姥曰。吾母子。嘻。嘻。不知禍之將及。姥曰。然則奈何。師師曰。汝第勿與知。唯我所欲。是時金人方啓釁。河北告急。師師乃集前後所賜金錢。呈牒開封尹。願入官助河北餉。復賂迪等。代請於上皇。願棄家爲女冠。上皇許之。賜北郭慈雲觀居之。未幾。金人破汴。主帥闕嬾索師師。云。金主知其名。必欲生得之。乃索累日不得。張邦昌爲蹤跡。之以獻金營。師師罵曰。吾以賤妓。蒙皇帝眷甯。一死無他志。若輩高爵厚祿。朝廷何負於汝。乃事事爲斬滅宗社計。今又北面事醜虜。冀得一當爲呈身之地。吾豈作若輩羔雁贄耶。乃脫金簪。自刺其喉。不死。折而吞之。乃死。道君帝在五國城。知師師死狀。猶不自禁其涕泣之洩瀾也。

論曰。李師師以娼妓下流。猥蒙異數。所謂處非其據矣。然觀其晚節烈烈。有俠

士風。不可謂非庸中佼佼者也。道君奢侈無度。卒召北轅之禍。宜哉。

附錄

道君北狩在五國城。或在韓州。凡有小小吉凶喪祭節序。北人必有賜賚。一賜必要一謝表。北人集成一帙。刊在權場。傳寫四五十年。士大夫皆有之。余曾見一本。更有李師師小傳。同行於時。

道君『北狩在五國城』。幸李師師家。偶周邦彥先在焉。知道君至。遂匿於牀下。道君自携新橙一顆。云江南初進來。遂與師師謔語。邦彥悉聞之。櫟括成少年游云。并刀如水。吳鹽勝雪。纖手破新橙。後云城上已三更。馬滑霜濃。不如休去。直是少年行。李師師因歌此詞。道君問誰作。李師師奏云。周邦彥詞。道君大怒。坐朝宣諭。蔡京云。開封府有監稅周邦彥者。聞課額不登。如何。尹京不案發來。蔡京罔知所以。奏云。容臣退京尹叩問。續得復奏。京尹至。蔡以御前聖旨諭之。京尹云。惟周邦彥課額增羨。蔡云上意如此。只得遷就將上。得旨。周邦彥職事廢弛。可日下押出國門。隔一二日。道君復幸李師師家。

不見李師師。問其家。知送周監稅。道君方以邦彥出國門爲喜。既至不遇。坐久至更初。李始歸。愁眉淚睫。憔悴可掬。道君大怒。云爾往那裡去。李奏臣妾萬死。知周邦彥得罪。押出國門。略致一杯相別。不知官家來。道君間曾有詞否。李奏云。有。蘭陵王詞。今柳陰直者是也。道君云。唱一徧看。李奏云。容臣妾奉一杯歌。此詞爲官家壽。曲終。道君大喜。復召爲大晟樂正。後官至大晟樂府待制。邦彥以詞行。當時皆稱美成詞。殊不知美成文筆。大有可觀。作汴都賦。如箋奏雜著。皆是傑作。可惜以詞掩其他文也。當時李師師家有二邦彥。一周美成。一李士美。皆爲道君狎客。士美因而爲宰相。吁。君臣遇合于倡優下賤之家。國之安危治亂。可想而知矣。貴耳集

讀書敏求記。吳郡錢功甫秘冊藏有李師師小傳。牧翁曾言懸百金購之。而不獲見。偶聞邑中蕭氏有此書。急假錄一冊。文殊雅潔。不類小說家言。師師不第色藝冠當時。觀其後慷慨捐生一節。饒有烈丈夫概。亦不幸陷身娼賤。不得與墜崖斷臂之儔爭輝彤史也。張端義貴耳集載有師師佚事二則。傳

文例舉其大故不載。併附錄于後。又宣和遺事載有師師事。亦與此傳不盡合。可并參觀之。

卷四

二

二

集

紅樓百美詩

潘容卿孚美著

百美新詠創格之後繼者林立潘容卿孚銘著有紅樓百美詩一帙裁對工整言簡事賅洵佳製也詩云

椒殿恩榮渥。元妃萱闈福祚昌。賈母宜家嫺靜好。王夫人警世演荒唐。幻仙

姑金玉前緣誤。寶釵蘋蘩內則詳。尤氏承愉鸚舌巧。鳳姐矢志鵲音傷。李執私

語銷銀燭。四兒新盟訂海棠。探春瓊葩開並蒂。李文綺彩筆紀千行。彩明悽惻

芙蓉詠。晴雯娉婷茉莉妝。平兒良姻希附鳳。傳秋芳雅謔笑攜蝗。劉老老鳧

徵仙品。薛寶釵鵲啼悼塚鄉。迎春魂難招露井。金釧夢竟覓蘭房。秦可卿慧鏡

層層障。妙玉禪燈藹藹光。惜春旅愁淹淑女。邢岫烟歸信誑癡郎。紫鵲介壽聯

雙美。喜鸞四姐兒稱名應七襄。巧姐贈硝懷舊侶。藥官鬥草擾離腸。豆官秋月

詩人榻。香菱春風仲子牆。司棋醉顏眠芍藥。史湘雲清淚灑瀟湘。黛玉忿積拌

爭柳。春燕情移慣畫簷。齡官倩容欣一顧。嬌杏嘉禮侍三商。雪雁舞趁秋韃索。

佩偕鳳鸞。書傳傀儡場。葵官伶官寒食昏。藕官梵宇合歡牀。鶴仙沁香鼠竊糈糊遣。墜兒鸞交邂逅臧。萬兒詼諧銜主命。小螺嫵媚炫戎裝。妮嬃將軍簞拭蘭湯膩。碧痕衣沾桂萼香。秋紋添粧脂粉具。素雲倚立佩環鏘。繡鳳繡鸞彩鳳賞雨浮鸞鷺。寶官玉官牽絲引鳳凰。雛鳳偕行旋白璧。青兒留盼羨紅裳。紅衣女曲度秋宵豔。文花神游雪徑涼。若玉陳詞樓啟鑰。豐兒宣令座飛觴。鴛鴦杯茗看爭歡。智能尉肴睢秘藏。蓮花投箋來款款。翠墨問扇去皇皇。靚兒楓露空遺憾。茜雪苓霜不諱賊。彩雲屬垣聽隱約。小鵲觀海詠蒼茫。真真國女飲恨金無迹。尤二姐全貞劍有銚。尤三姐風箏飄蛺蝶。嬌紅冰練殉鴛鴦。張金哥菊獻花盤麗。碧月梅編綵線長。鶯兒珠期還合浦。彩霞雲早試巫陽。襲人笑雜疎櫺外。寶蟾羞含短榻旁。柳五兒知交嗟賦鵬。可人往事鑒亡羊。良兒繾綣縈綃帕。小紅愁癡認綉囊。優大姐藏珍兄陷妹。入畫感義女悲娘。寶水月涵真性。芳茶蘼殿衆芳。麝月天桃偏減色。茄叢棘更生芒。秋桐妙諦頤能解。翠訛傳口未防。侍書飛蚨憑爾賜。佳蕙疊鳳向誰償。繡橘盡篋聊分檢。翡翠玻璃縹居鎮自忙。二

丫頭歌喉流綺席。雲兒忠節吊迴廊。瑞珠花靨嬌慵畫。綺霞蓮羹喜共嘗。玉釧
霜螯滋戲謔。琥珀脂虎逞強梁。夏金桂演劇鬚眉古。艾言撩人意態狂。多如娘
撫絃膠幸續。胡氏舒悅影徐颺。春纖搆訟夫貽戚。周瑞女言歸母待將。檀雲佳
音潛問訊。小霞噩夢細論量。彩屏薦枕情何迫。貴兒媳婦操戈氣易揚。善姐買
糕通絮語。小蟬潑醋惹餘殃。鮑二家姐酸奠羈蕭寺。鸚鵡鸚哥追隨過別廂。銀
蝶擊蒙煩飭戒。珍珠覽勝偶倘佯。翠雲蝶使憐纖弱。文杏鴛儔歎逝亡。藥官乞
錢呼較便。銀姐送券任堪當。笑兒身擬彰文繡。小吉祥名同衍吉祥。同喜貴趨
跽陪御輦。抱琴等鼓吹奏華堂。文官等

(完)

卷四

三

三

集

百花扇序

趙杏樓著

自古美人多薄命。(虞美人)正如風播楊花。(楊花)苟非之子遇同心。(梔子)幾見扇迎桃葉。(桃花)所以青樓色減。(冬青)玉女名湮。(玉蘭)縱或萍水相逢。(萍花)不少贈芍秉蘭之什。(芍藥)無如薦蘿莫託。(薦蘿松)徒深鳳漂鸞泊之悲。(鳳仙)故迷香之洞無春。(木香)比紅之詩難繼也。(紅花)茲有蘭蕖女史。(蘭花)桂籍仙娥。(桂花水仙)顏如槿華。(木槿)年方瓜及。(木瓜)惺忪杏眼。剪秋水之雙清。(剪秋羅)的皪櫻唇。(櫻桃)探春痕之一點。(探春)祇以家無儋石。(石竹)居少槐堂。(槐花)遂依姊妹叢中。(十姊妹)僑寓臙脂巷口。(臙脂花)委玫瑰於糞壤。(玫瑰)素質何堪。(素馨)嘗荼蓼之苦辛。(荼蓼薜花)甘心未必。(甘棠)踟躕兮玉簪搔首。(玉簪)懊惱則金盞澆胸。(金盞)縱迎春色以爭妍。(迎春)猶抱冬心而獨耐。(耐冬)則有采香才子。(楝子花)

紅豆詩人（豆花）翠袖情深（翠雀）錦囊才富（青囊）韓冬郎無其豔
句（欸冬）杜紫薇是彼前身（紫薇）咳唾珠璣（珠蘭）襟懷風月（二
月藍）祇以未登蕊榜（玉蕊）恒搖木筆以書空（木筆）因之逐隊香街
（瑞香）爰擲金錢而買笑（金錢）偶過枇杷花底（枇杷花）試叩荆扉
（紫荆）竟從茉莉幃中（茉莉）潛窺蓉面（芙蓉）高燒蜡燭（蠟梅）
海棠之春睡初醒（海棠）對照菱花（菱花）籬菊之秋容比瘦（菊花）
茶餘共話（山茶）漏滴忘歸（滴滴金）繡毬拋向郎懷（繡毬）錦帶繫
於女手（錦帶）從此家人含笑（含笑）公子忘憂（忘憂）訂夜合之雙
情（夜合）綰丁香之百結（丁香）石榴裙底（石榴花）飽看並蒂蓮花
（蓮花）金橘懷中（橘花）幾索雙丸荳蔻（豆蔻花）雖乏桑中之喜（
扶桑）已無李下之嫌（李花）情思纏綿（木綿）詩腸鼓吹（鼓子花）
爰對一枝香草吟成惜玉新詞（晚香玉）更拈百種名花繪向合歡團扇（
百合花）木桃有贈（夾竹桃）瓊玖思酬（瓊花）因描依樣葫蘆（蘆花）

（壽登棗梓）（棗花）更仿浣花藤紙（藤花）色染天桃（碧桃花）張蕉
雪爲譜傳奇（紅蕉）魯棣花遍徵題詠（唐棣）共願春長月季（月季）
杜鵑無復催歸（杜鵑花）倘然香肯夜來（夜來香）桐鳳不妨相似（桐
花）僕燕山羈旅（山礬）牛渚詞人（牽牛）性嗜丹鉛（山丹）心慚鐵
石（鐵樹花）記得牡丹開日（牡丹）曾遇梨園（梨花）不圖梅萼舒時
（梅花）又親蘭澤（木蘭）爰挹薔薇香露（薔薇）試洗手以披函（洗
手花）更剪銀燭繁花（闌天燭）讀斷腸之佳句（斷腸花）愧我心同葵
葵（葵花）彌殷向日之忱（向日葵）感君下采蘋蘩（蘋花）殊乏凌霄
之筆（凌霄花）

附題詞

吳麓泉

公子翩翩喜浪游。詩名傳播在青樓。嗟余醉出歌姬院。散盡黃金祇賣愁。

周子方

紅情綠意惜娉婷。寫照分明在畫屏。看到一枝償一詠。勝他十萬護芳鈴。

爲花忙煞筆頭春。阿寶憐才意備真。紈扇錦箋留韻事。青衫紅粉兩傳人。

張次瑄

小青真个解憐才。權把新詩當鏡台。一曲韋娘春意滿。百花齊向筆尖開。欲將永好報投瓜。十色裁箋學浣花。他日吟壇傳韻事。門前也合種枇杷。

張子修

逢人共說項斯名。展讀詞章心更傾。紈扇彩箋真妙絕。風流千古兩多情。才華錦繡滿胸中。百詠名花字字工。紅袖而今長拂拭。何須羨彼碧紗籠。

周慎之

好風吹放合歡枝。彩筆題成絕妙詞。我亦癡情舊狂客。怕從愁裡讀君詩。拋殘紅豆舊風流。回首不堪京洛游。剩得模糊詩畫在。尋常團扇亦千秋。

趙才石

漫拈紅豆說相思。兒女情工一例癡。粉黛飄零名士感。淒涼譜入斷腸詞。新詩一卷當纏頭。小杜青樓慣買愁。贏得薛濤千載後。天涯芳草繼風流。

名葩憔悴委芳時。空費羅虬百首詩。不及金鈴三萬個。一春長護好花枝。
紅顏命薄恨難填。落拓青衫復可憐。扇自團圓人自缺。聲聲徒喚奈何天。

陳鐵珊

一枝仙卉謫天台。吹落風塵信可哀。名士自來饒豔福。美人從古重詩才。
多情草本王孫種。薄命花難閬苑栽。細雨小牕無限景。幽蘭都爲女兒開。
寄語東風好護持。莫教風雨損花枝。贈投有意心原慧。飄泊無歸命可知。
不信傾城偏墮劫。幸逢才子自工詩。百花牋紙殷勤製。如此癡情報亦宜。

周慎之

名花恰似女兒嬌。春意三分韻更饒。才子從來情是累。美人真個福難消。
吟成團扇憐桃葉。染就華箋勝薛濤。一樣風流佳話在。朝宗而後又詩樵。

寶竹坡

花叢聞說有知音。百首新詩費苦吟。夜雨滴乾才子淚。春風吹暖美人心。
錦箋染出關情切。紈扇題成寄意深。轉盼鴛鴦各飛去。綺樓何日再追尋。

卷四

「二」

二

(完)

集

閒餘筆話小引

閒與餘有不同乎曰不同焚香煮茗種竹栽花雅歌投臺鼓琴對奕皆閒也其事已過則爲閒之餘矣筆與話有不同乎曰不同一堂晤對酬酢紛如面固能聞久不復記皆話也欲其不朽則有賴于筆矣故惟閒餘始能以筆爲話此湯君卿謀閒餘筆話之所由以名也雖然話可易筆哉能勝讀十年書者則筆之能悅親戚之情者則筆之能大家團圓共說無生者則筆之非是話也不可以筆今卿謀之筆固已不啻如此吾嘗取而讀之其措思在有意無意之間其吐語在亦佛亦仙之際其旁通如帆隨湘轉望衡九面其靜致如空山無人水流花開不唯非閒餘不能著且非閒餘亦不能讀矣吾獨怪乎世之著書者應酬世務權衡子母凡其筆之于書者皆出于忙冗之餘亦安得有佳話乎哉虞卿有言非窮愁不能著書余謂窮而愁者必且米鹽不繼室人交謫富爾時安能著書能著書者大都皆貧而樂者耳余雖不識卿謀然未嘗不可想見其樂也

心齋張潮撰

卷四

下
六
集
一

三

集

閒餘筆話

長洲湯傳楹卿謀著

予閒人也。性好靜。閉門兀坐。杳若深山。悠如永年。類禪家之寂。已而世事及我。一切遣往不問。我不累物。物亦忘我。遂流而爲懶。既乃頽澹幽默。心忽倦去。投足一榻。作土木形骸。竟日不聞履聲。且積而成病。寂也。懶也。病也。皆閒境也。而又佐以聽雨之朝。看雲之晝。臨風之晚。待月之宵。澆書攤飯之餘。篝火篆烟之暇。皆閒境也。造物者秘爲清福。而人不能享。以本無閒情故。予獨以閒情領受之。則天清地曠。浩乎茫茫。皆吾閒也。皆是助我閒話也。雖然。話亦何擇之有。白雲往還。星月自出。以爲太空之話可也。風葉鳴廊。江波自湧。以爲大塊之話可也。夕秀始吹。草蟲雜作。以爲萬象之話可也。惟其閒閒爾也。而吾置身此間。不已餘乎。吾尤以其閒而爲話。不尤餘之餘乎。吾愛吾餘。輒付此卷。或莊或諧。或雅或俗。或喜或悲。或笑或罵。或醒或醉。或獨或偶。或出或處。或見或聞。無乎不閒。無乎不餘。則皆可話也。吾話吾閒。亦閒也。人知吾話之爲閒。而不知吾話之

閒爲閒之餘也。昔蘇學士強閒人說鬼。不免犯妄語戒。予喜聞閒苦而話不得閒人。因邀中書君話之。中書君卽予之閒人也。中書君閒矣。而予益復閒。閒情一篋。宛在十指間。何必妄言妄聽。借鬼話作舌本。毋乃耳根未淨乎。予舌本既強。耳根復清。因以其聞聞及中書君。而中書君相過從時。輒爲閒時閒境一助。自今以往。庶無餘閒逸此卷外。此中閒話。日夕自佳。惜不令蘇學士掀髯聽之也。

聰明能誤人。不如懵懂。文章能亂世。不如朴誠。意氣能隕命。不如優容。衣冠能厚顏。不如草野。

原評 名言可銘座右

胸中涇渭。清濁之流自如。皮裡春秋。雌黃之口何在。彼日以標榜爲事者。吾祝其世世生生爲暗啞之人。庶足懺悔冤業。解脫殺機耳。

神仙是英雄退步。然此事本多寄托。須知張子房暮年。用不著黃石公。不得不借赤松子爲好結果。當日辟穀。畢竟是英雄欺人。若果神仙石作英雄收場。則

秦皇漢武。何不白日飛去。

吾輩不可不存時時可死之心。不可不行步步求生之事。存心事事可死。則身輕而道念自生。行事步步求生。則性善而孽緣不墮。此儒宗禪悅不二法門也。若心境本不清曠。飾放誕爲風流。事跡本不光明。假慈悲爲因果。地獄之設。正爲此人。

人生不可不儲三副痛淚。一副哭天下大事不可爲。一副哭文章不遇識者。一副哭從來淪落不偶佳人。此三副方屬英雄血淚。真事業。真性情。俱在此中。非復兒女情長。執手涕泣比也。

原評 如卿謀言豈有淚乾時耶

天下不堪回首之境有五。哀逝過舊遊處。憫亂說太平事。垂老憶新婚時。花發向陌頭長別。覺來覓夢中奇遇。未免有情。感均頑豔矣。然以情之最惡者言之。不若遺老吊故國山河。商婦話當年車馬。尤爲悲憫可憐。

原評 古詩云可惜歡娛地都非年少時又云風月自清夜江山非故園每

一諷詠殊不勝情如卿謀言有同感矣

風月娟然。天下第一有情物。而于韵士美人。尤爲親近。意中嘗設一佳景于此。願與天下有情者居之。一庭一院。一花一石。一簾一几。一塵一屏。一茗一香。一卷一軸。然後一妾一婢。一絲一竹。一愁一喜。一謔一嘲。乘興則一樓一台。一觴一咏。倦遊則一枕一簾。一蝶一槐。夢覺徐徐。兩美在側。一寐一寤。一偎一抱。當此之時。只愁明月盡矣。

原評 但云理之所必無。安知非情之所必有耶。

極意作詩。不必得詩。窮形作畫。不必入畫。深于詩畫者。正于不著筆處遇之。予嘗登樓遠眺。見樹頂藏鴉。山嵐滴翠。便如身在畫圖中。又嘗扃戶靜思。見竹影搖牕。茶烟裊日。輒覺情落帟上。乃悟坐卽有詩。行卽有畫。簡文所云會心處不在遠。東坡所云時于此閒得少佳處也。但不堪向莽漢饒舌。恐滅吾輩清福耳。

吾輩一身得秋氣多。便是雅人深致。若得春氣。則近于思婦。得夏氣。則近于熱

官得冬氣。則近于隱士。固當以蕭瑟清曠。蕩我襟情。兼持萬斛秋光。爲世間療俗耳。

一日之間。人各有有。各有時。時各有宜。養德宜操琴。練習宜彈棋。遣情宜賦詩。輔氣宜酌酒。解事宜讀史。得意宜臨書。靜坐宜焚香。醒睡宜嚼茗。體物宜展畫。適境宜按歌。閱候宜灌花。保形宜課藥。隱心宜調鶴。孤況宜聞蛩。涉趣宜觀魚。忘機宜飼雀。幽尋宜藉草。澹味宜掬泉。獨立宜望山。閒吟宜倚樹。清談宜剪燭。狂笑宜登台。逸興宜投壺。結想宜欹枕。息緣宜閉戶。探景宜携囊。爽致宜臨風。愁懷宜佇月。倦游宜聽雨。元悟宜對雪。辟寒宜映日。空累宜看雲。寄歡宜拾釵。揮憤宜擊劍。遭亂宜學道。臥病宜參禪。療俗宜避人。破夢宜說鬼。識此意者。一遊一賞。悠然自得。何憂不合時宜耶。若予心慵手懶。身外俱空。無乎宜也。無乎宜。是以無乎不宜也。

文君當壚。卓王孫恥之。却爲千古佳話。昔人詩云。卓女盈盈亦酒家。數錢未慣半羞花。遠山風流。宛然可念。但此時沽酒者必極多。萬一有阮嗣宗來。醉臥其

側不知文君何以處之。未免代長卿耽憂耳。思之大笑。

袁粲爲丹陽尹。郡南一家有竹石。粲徒步往。不通主人。直造竹所。吟咏自得。主人出。笑語歡然。俄而車騎至門。方知是袁尹。予謂車騎不至爲高。旣已徒步而來。何必乘軒而返。將以此鳴高耶。抑市重耶。卽此未能免俗。便是一重公案。桓子野每聞清歌。輒喚奈何。予曰旣已無可奈何。何必又喚奈何。展成笑曰。使子野聞此言。必又喚奈何矣。

展成自號三中子。人不解其說。予曰。心中事。揚州夢也。眼中淚。窮途哭也。意中人。返生香也。我比猜詩謎的杜家何如。展成笑而不答。

展成作夏子夜歌云。招郎採蓮去。宛在水中沚。郎自採蓮花。儂自採蓮子。因自註云。不採蓮花。焉得蓮子。予曰。註脚妙矣。請下一轉語。曰。你只顧採蓮花。又那得蓮子。相與絕倒。

金陵歸。展成從水路而余登陸。展成寄語云。君欲消受曉風殘月耶。予答云。誠不如君唱大江東去。

予與展成會飲一家。客方聚訟。適進蛤蜊。展成笑曰。那知此事。只食蛤蜊。或問此何人語。予亦笑曰。那知此事。且食蛤蜊。展成嘗云。月犯少微。戴逵求死。乃應在謝敷。可見蒼蒼者自有真品題。不爲處士虛聲所誤。今人纔能握管。便自號文士。脫一旦文星有厄。吾知人人有一篇自祭文矣。予應之曰。此曹徒亂天下人鬼俱憎。吾今屈辱文星。權令大家應兆也。得名場乾淨一番。但恐冥司自有公案。不欲令監子成名耳。雖然。今日謝敷非卿而誰。設不幸月犯少微。卿劇可危。爾時卽不作自祭文。亦須以諛墓累及我也。相與狂笑不已。

原評 孰意今日謝敷卿謀當之耶。諛墓之謔顛倒及余。能無車過腹痛之感。

夜坐閱牡丹亭。因憶比來所傳世上演牡丹亭一本。若士在地下受苦一日。未知人語鬼語。意甚不平。竊謂才如臨川。自當修文地府。縱不能遇花神保護。亦何至摧殘慧業文人。令受無量怖苦。豈冥途亦妬奇才耶。內子從旁語曰。當由

臨川不幸遇著杜太守陳教授一班人作冥判耳。予笑領之。徐曰：若令我作判官，定須覓一位杜小姐判送氤氲司矣。

展成嘗語予云：昔謝康樂謂天下才共一石，子建獨得八斗，我得一斗，自古及今共用一斗。予亦謂天地茫茫，祇有萬斛愁。予獨得九千斛，世人合得千斛耳。予曰：不然。萬斛愁，君獨得九千斛，世人又派去千斛，然則置我何地？還是萬斛愁，爾我各分其半。大家得五千斛，彼世人者無與焉。此言頗得平否？展成首肯。

(完)

跋

向讀尤悔菴先生西堂雜俎，其傾倒于湯君者實甚。屢欲購湘中草讀之而不可得。及西堂全集出，始見其書。誠有如尤先生所云者。湯君雖早賦玉樓，然觀其閒而有餘，苟以東坡無事此靜坐一日似兩日之說準之，則二十五年之壽便可作五十觀矣。心齋居士題。

香齋叢書二集卷四終

宣統二年二月付印
同年二月出版

香艷叢書


(四冊定價大洋一元)

校刊者

上海棋盤街平和里內
國學扶輪社

總發行者

上海棋盤街平和里內
國學扶輪社



版權所有

外埠分發行所

成都 北都 北京 天津 保定 山西

粹記書局 源記書局 官書坊 各書坊 官書坊 各書坊 官書局 新書局


廣東 漢口 長沙 南京 杭州 蘇州 湖北 寧波

會文書社 廣益書局 鴻文書局 啓新書局 德記書莊 振新書莊 羣益書局 汲經齋

國學扶輪出版社出版廣告

諸家
大評


香豔叢書	嚴幾道	林琴南	譚復生	章太炎	春酒堂文集	全謝山文鈔	吳挀甫詩集	吳挀甫文集	方望溪	戴南山	聊齋文集	胡稚威文集	魏默深文集	校名龔定盦全集	顧仲恭文集	錢牧齋文鈔	王壬秋全集	國朝文匯
共十集四十冊	四冊	三冊	二冊	八冊	一冊	五冊	六冊	二冊	四冊	四冊	七冊	二冊	四冊	十二冊	壹百冊			
洋十元	洋一元二角	洋一元五角	洋八角	洋二元五角	洋五角	洋一元	洋二元	洋六角	洋一元五角	洋二元	洋二元	洋一元	洋二元	洋二元	洋二元	洋二元	洋三元	洋三十元



設將
舞
價
部

香艷叢書

第三集



H2
1737
H45
1.9

古今說部叢書

第一集

即日出版

廣告

邇來小說盛行庸俚濫惡大雅唾棄東西譯本又與我國社會心理相鑿枘閱者索然

憂之不惜重貲購得說郭說鈴古今說海名賢說海藏說小萃唐人說薈

五朝小說歷代小史顧氏文房小說明朝四十家小說袁氏四十家

小說後四十家小說廣四十家小說烟霞小說及各種叢書秘書精

本原刻本互相讎校刪複擇尤廣續付刊至其紀述之賅洽趣味之濃厚文筆之古

雅春華秋實兼而有之不特酒後茶餘藉資消遣而開卷有益足以藥近日學子空疏固

陋之病最錄各種名目即日佈告全部六十冊分作十集每集六冊定價一元六角全集十六元預

定全部者減半外埠郵費一元六角

總發行所上海

棋盤街
平和里

本社謹啟

青樓小名錄

四冊

價洋一元

此爲京口趙小亭先生所輯自有女伎之始以迄明末國初搜羅詳盡較之

北里志青樓記教坊志麗情集等編紀述尤爲豐贍其中詩詞樂府采取頗

精均爲他集所未載詢平康中一部大歷史也本社竟得葆光齋主人手抄本細加校正公

諸同好現已付印即日出版

明宮史八卷

二冊

價洋一元

遺聞軼事足補正

明奄人劉若愚著若愚酌中志已刻入海山仙館叢書中茲更敘流詳盡

史所不及曰內庭宮室瑣記曰內府衙門職掌曰內板經書記略曰內臣服佩記略曰飲食好尚


曰遼左棄地記畧曰見聞瑣事雜記曰曩臣自叙共八卷向無刻本四庫全書不著錄本社以重價購

得毛嶽生先生手抄本附有膠城澹無欲齋跋語校勘付印色色精美准于四月內出版

第三集

香
豔
叢
書

國學扶輪社校印



香艷叢書二集目錄

卷一

敝帚齋餘談節錄

影梅菴憶語

王氏復仇記

鬘華室女史新撰紅樓葉戲譜

釵小志

粧臺記

髻鬢品

卷二

漢雜事秘辛

大業拾遺記

元氏掖庭記

焚椒錄

美人判

清閒供

卷三

看花述異記

新婦譜

新婦譜補

新婦譜補

古豔樂府

卷四

比紅兒詩注

某中丞夫人

妖婦齊王氏傳

老狐談歷代麗人記

宮詞

天啟宮詞

啟禎宮詞

香艷叢書

三集卷一

敝帚齋餘談節錄

秀水沈德符景倩箸

婦人弓足

婦人纏足。不知始自何時。或云始于齊東昏。則以步步生蓮一語也。然余向年觀唐文皇長孫后繡履圖。則與男子無異。友人陳眉公姚叔祥俱有說爲証明。又見則天后畫像。其芳趺亦不下長孫。可見唐初大抵皆然。惟大曆中夏侯審咏被中睡鞋云。雲裡蟾鈎落鳳窩。玉郎沉醉也摩挲。蓋弓足始見此。至杜牧詩云。鈿尺纔量減四分。纖纖玉笋裹輕雲。又韓偓詩云。六寸膚圓光嫩嫩。唐尺只抵今製七寸。則六寸當爲今四寸。亦弓足之尋常者矣。因思此法當始于唐之中葉。今又傳南唐後主爲宮姬窅娘作新月樣。以爲始于此時。似亦未必然也。向聞禁掖中。凡被選之女。一登籍入內。卽解去足紉。別作宮樣。蓋取便御前。犇

趨無顛蹶之患。全與民間初製不侔。予向寓京師。隆冬遇掃雪軍士從內出。拾得宮婢敝履相視。始信其說不誣。近日常雜事秘辛紀後漢選閹梁冀妹事。因中有約束如禁中一語。遂以爲始于東漢。不知此書本楊用修僞撰。託名王忠文得之士酋家者。楊不過一時遊戲。後人信書太真。遂爲所惑云。

春畫

春畫之起。當始於漢。廣川王畫男女交接狀於屋。召諸父姊妹飲。令仰視畫。及齊後廢帝於潘妃諸閣壁。圖男女私褻之狀。至隋煬帝烏銅屏。白晝與宮人戲影俱入其中。唐高宗鏡殿成。劉仁軌驚下殿。謂一時乃有數天子。至武后時。遂用以宣淫。楊鐵崖詩云。鏡殿青春秘戲多。玉肌相照影相摩。六郎酣戰明空笑。隊隊鴛鴦浴錦波。而秘戲之能事盡矣。後之畫者。大抵不出漢廣川齊東昏之模範。惟古墓磚石中畫此等狀。間有及男色者。差可異耳。余見內庭有歡喜佛云。自外國進者。又有云。故元所遣者。兩佛各瓔珞嚴妝。互相抱持。兩根湊合。有根可動。凡見數處。大璫云。帝王大婚時。必先導入此殿。禮拜畢。令撫摩隱處。默

會交接之法。然後行合卺。蓋慮審稟之純朴也。今外間市骨董人亦間有之。製作精巧。非中土所辦。價亦不貲。但比內庭殊小耳。京師勅建諸寺。亦有自內賜出此佛者。僧不肯輕示人。此外有琢玉者。多舊製。有絨織者。新舊俱有之。閩人以象牙雕成。紅潤如生。幾遍天下。總不如畫之奇淫變幻也。工此技者。前有唐伯虎。後有仇實甫。今僞作紛紛。然雅俗甚易辨。倭畫更精。又與唐仇不同。畫扇尤佳。余曾得一扇面。上寫兩人野合。有奮白刃馳往。又一挽臂阻之者。情狀如生。旋失去矣。

人疴

人生具兩形者。古卽有之。大般若經載五種黃門。其四曰博叉半。釋迦謂半月能男半月不能男。然不曰亦能女也。素問有男脉應女脉應之說。遂具兩形矣。晉惠帝世。京洛有人兼男女體。亦能兩用。而性尤淫。解者以男寵太興之徵。然亦不聞一月中陰陽中各居其半也。余幼年在京師。聞教坊有妓陳二者。姿貌既非殊麗。門前車馬亦稀。但爲勳貴家所矚。動輒彌月不出。甚或攘奪詬病。問

之。則如晉惠京洛人分上下半月作男女。以故閨閣中嬖溺不肯捨去。又吳中常熟縣一縉紳夫人。亦大家女也。亦半月作男。當其不能女時。藁砧避去。以諸女奴當夕。皆厭苦不能堪。聞所出勢偉勁倍丈夫。且通宵不訖事。云按二十八宿中心房二星皆具兩形。則天上已有之。何論人世。舊傳狸有兩體。其年久者能變幻惑人。遇男則牝。遇女則牡。京師多有此妖。或一家中內外皆爲所蠱。各自喜爲佳遇。然實同此獸也。狐與狸又各一種。而世多混稱之。

不男

男子生而隱宮者。內典以爲人中惡趣。有五種不男。曰生堅妬變半。且有五種不女。曰螺筋鼓角線。俱終身無嗣育。如古帝王貴人亦有之。晉廢帝海西公有隱疾。漢武陽侯樊市人不能爲人。元魏仇洛齊生非男。北齊臨漳令李庶之天閹。隋大將軍楊約之爲口所傷皆是也。本朝藩王則楚王英燦亦傳聞不男。大臣則楊文襄一清。倪文毅岳。及士人閔工部夢得。俱云隱宮無嗣息。其有無罪而自宮者。國初太常卿邱元清以辭賜宮女金。吾指揮同知傳廣以求入內廷。

隆慶間戚畹李文進以隨侍今慈聖皇太后入宮仕至御馬監太監。賜蟒玉。卽今武清侯李文全同產弟也。今莆田王繼祖以少年讀書苦思慾自去舉丸。又聞嘉靖末年。閩人戶部主事柯維祺以修宋史新編求絕房室專功。亦如太史公下蠶室故事。此聞之馮開之祭酒。及於中甫比部者。王與柯俱孫茂竹同年進士。其言或有據。宋宦官梁師成自詭蘇軾出子。及用事後。復應進士舉。登上第。仍供內役。此古今所無。若本朝翰林庶吉士散成坐晉王濟熹事腐刑。爲廊府典寶。以潛邸恩陞太監。尊寵一時。其宦蹟竟與司馬遷無異。却與梁師成相反。又元順帝至正間有趙伯顏不花者。年三十餘有妻子矣。爲順帝所閹。後官至樞密院使。大貴用事。

懼內

士大夫自中古以後。多懼內者。蓋名宦已成。慮中冓有違言。損其譽望也。乃若君相亦有之。則唐孝和帝之賜宴。見嘲於優人。至下比於裴談。其後王鐸之爲都統。見嘲於門生。謂不如降黃巢。固爲千古笑端。唐季朱溫李克用。皆一時劇

盜酋豪。一畏其妻張。每聞召卽中道而返。一敬其妻劉。與計軍國大事。此其才智。或自有足攝二主者。本朝名臣。亦大有此風。往事不及知。如吾浙王文成之立功仗節。九死不回。而獨嚴事夫人。唯諾恐後。近年吳中申王二相公。亦與夫人白首相莊。不敢有二色。至如萬歷初。薊帥文登之戚少保繼光。今甯夏帥蕭都督如薰。皆矯矯虎臣。著庸邊閫。俱爲其妻所制。又何也。又若近日新安汪司馬長君。無疆爲婦陸氏所妬。至刑厥夫爲閹人。蒲州楊太史元祥。與婦羅氏爭言。遂以刀自裁。尤慘毒之甚者。抑更非前將相諸公比矣。先是永樂宣德間。有吳中者。山東武城人也。由監生起。以永樂二年爲左都御史。尋改刑工尙書。至兼掌吏部兼宮詹事。加官至少保。正統七年卒。贈荏平伯。諡榮襄。凡爲二品正卿者四十年。一品亦十六年。其人好色多妾媵。而妻嚴酷不敢近。一日領誥命歸。妻令左右讀其詞。因問中曰。此果聖語耶。中曰。不敢詞臣代言耳。妻曰。此翰林眞無忝清華。卽吳中一誥。何嘗以一廉字許之。中慚笑而曰。蓋中素以墨著也。其後禁中優人承應。遂作吳中畏內一劇。上輒爲一引滿。此亦懼內之最

享福澤者。附紀爲諸公解嘲。今有一詞林華亭人。甲辰庶常也。以怕羞著名。一日其同年陳無非往候之。歡然留飯。坐久過午而脫粟未具。且詞林亦被呼入內良久。陳餒甚。馳歸。他日詢其故。則云是日間客爲何人。曰陳工部。又問得毋同里同年耶。曰然。遂大怒。曰是人窮秀才。糟糠有年。甫登第。卽買一妾。此等獐獍。便餓死。不可與糠粃。故并藁砧禁不許出。此亦何異隋之獨孤后以高顯愛妾生子。遂憎之至殺之也。

婦人髭

婦人有髭者。唐則李光弼之母宋氏。酒媼朱氏。元則順帝至正十一年正月京師齊化門東一婦人生髭尺餘。本朝則宏治十六年湖廣隨州應山民張本華妻崔氏生髭三寸餘。見之邸報。鄱陽邱婦人美髭。人呼爲三鬚娘。見之紀載。若宦官則惟宣和間廣陽郡王童貫領下鬚數十莖。他不多見。本朝太監劉馬兒爲帥西征。臨戎必戴假髻以令其衆。蓋取威重如蘭陵王假面入陣耳。

蔡見菴

隆慶間邊庭效順。各鎮議馬市講款。虜酋俺荅貢馬至宣府。其妻三娘子者。專虜中事。時蔡見庵可賢憲使備兵陽和。正同督府宴犒于城上。蔡少年登第。丰姿白晢。如神仙。三娘子心慕之。在城下請于督府曰。願得兵道蔡太史至吾營中。一申盟誓。以結永好。蔡出城。至其營。正奉酒酪爲壽。忽以精騎數十擁蔡北去。塞上大駭。欲追。然諸砦按堵。未敢遽議勦。數日後。仍送蔡入城。三娘子已荐寢于毳帳數昔矣。自此邊塵不驚。西陲寢烽者數歲。蔡坐此被議罷歸。三娘子每至邊。輒以蔡爲問。一時推轂者亦衆。因再起再廢。至壬辰。寧夏劉哮之亂。言者復以邊才薦。又用爲賓鎮河西道。既奏功。進大叅。又以言歸。甲午再起遼東未久。仍被議去。而蔡亦暮年矣。閼氏自獻。邊臣不能守慎。獨之戒于廉隅。或稍妨。而威重亦未失。遽遭吏議。屢蹶不振。惜哉。

守土吏狎妓

今上辛巳壬午間。聊城傅金沙光宅令吳縣。以文采風流爲政。守亦潔廉。與吳士王百穀厚善。時過其齋中小飲。王因匿名娼于曲室。酒酣出以薦枕。後遂以

爲恒王因是居間請托。橐爲之充牣。癸未甲申間。臨邑邢子愿。伺以御史按江南。蘇州有富民潘璧成之獄。所娶金陵角妓劉八者。亦在讞中。劉素有艷稱。對簿日呼之上。諦視之。果光麗照人。因屏左右密與訂。待報滿離任。與晤于某所。遂輕其罪。發回教坊。未幾邢去。令人從南中潛竄入舟。至家許久。方別。二公俱東省人才。名噪海內。居官俱有惠愛。而不矜曲謹如此。是時江陵甫歿。當事者一切以寬大爲政。故吏議不見及云。

妓鞋行酒

元楊鐵崖好以妓鞋纖小者行酒。此亦用宋人例。而倪元鎮以爲穢。每見之輒大怒。避席去。隆慶間何元朗。覓得南院王養玉紅鞋。每出以觴客。座中多因之酩酊。王弇州至。作長歌以紀之。元鎮潔癖。固宜有此。晚年受張士誠糞漬之酷。可似引滿香尖時否。

徐安生

徐安生。吳人。徐季恒女也。季恒能鑒古善談。爲余父客。暮年始舉此女。慧美多。

藝而性頗蕩。曾嫁武林邵氏。以失行見逐。遂恣爲非禮。其寫生出入宋元名家。嘗倣梅道人風雨竹一幅遺予。且題二絕句於上云。夏月渾忘暑。酷堪愛酒杯。棋局何當風雨齊。來打亂幾叢新綠。其二云。滿擬歲寒持久風。伯雨師凌誘。雖云心緒縱橫。亂處君能整否。次詩蓋用唐李季蘭語。其寄意不淺。予怪其無因。置不復答。後此女淪落許久。嫁里中黃生。亦名家子也。爲乃父不容。復下山。作魚元機行徑。今年已漸長。不知踪跡何所。聞爲一武弁誘入京師矣。其才情實可念也。余向已記徐姓女三人矣。

契兄弟

閩人酷重男色。無論貴賤妍媸。各以其類相結。長者爲契兄。少者爲契弟。其兄入弟家。弟之父母撫愛之。如壻弟。後日生計及娶妻諸費。俱取辦于契兄。其相愛者。年過而立。尙寢處如伉儷。至有他淫而告訐者。名曰晏奸。晏字不見韻書。蓋閩人所自撰。其昵厚不得遂意者。或至相抱繫溺波中。亦時時有之。此不過年貌相若者耳。近有稱契兒者。則壯夫好淫。輒以多貲聚丰姿韶秀者。與講衾

綢之好。以父自居。列諸少年于子舍。最爲逆亂之尤。聞其事肇于海寇云。大海中禁婦人在師中。有之輒遭覆溺。故以男寵代之。而酋豪則遂稱契父。因思孫恩在晉以諸妓妾隨軍。豈海神好尙。亦隨今古變改耶。但契父亦有所本。嘉靖間廣西上凍州土知州趙元恩者。幼而失父。其母尙盛年。與太平陸監生者私通。久之遂留不去。元恩因呼陸爲契父。事之如嚴君。其尊稱與閩寇同。第其稱謂之故。大不侔耳。南宋王僧達族子確。年少美姿容。僧達與之私。歟後欲逼留之。避不往。乃于屋後作大坑。欲誘確來殺之。男色之嗜。至不避族屬尊卑。且行凶忍如此。亦閩俗之祖歟。

同川浴

古云粵中多蜮。因男女同川而浴。乃淫氣所生。同川事。予未之信。一日與沈繼山司馬談及。沈云予令番禺時。初不知有此風。蓋令居解署。不及見耳。及謫戍神電衛閒居。每飯後群奴皆出。必暮而返。日日皆然。則痛答之曰。爾輩亦效權奸。欲棄擲吾耶。然不悛如故。一日午飯罷。微伺之。則僕輩相率出城。因尾之。同

行至郭外。近河濱。見老少男婦俱解衣入水內。拍浮甚樂。彌望不絕。觀者如堵。略不羞澀。始知此曹甯受笞而必不肯守舍也。予因問曰。自此後公將何法以處之。沈曰。從此以往。豈但不施箠楚而已。每遇飯飽。吾先羣奴而出門矣。因抵掌大笑。此風不知今尙然否。

牡猿化牝

隆慶二年。山西男子李良雨化女一事。見之奏牘。天下所信。近日有傳其僞者。後見郎氏七修類稿云。雄黑猿多有化爲雌者。予怪笑。謂郎老儒爲人所紿。及見嘉靖間吳興王濟著日詢堂手錄。則云廣西橫州山中猿皆黑。老則轉爲黃。其勢與囊俱潰去。化爲牝。與黑而牡者交。輒孕。此王官彼中所親見者。蓋其地凡爲猿者皆然矣。猿旣變黃。又數百年。別化而爲白。旣白之後。爲牡。爲牝。遂不可得而知矣。然則白猿公劍術。亦屬老牝耶。宇宙中非目覩者。斷不可臆決。向傳鬼生俱牝。望月而孕。近偶畜兔。則雌雄各具其孳尾如恒獸。古語蓋難盡信。

周解元淳樸

周用齊汝礪。吳之崑山人。文名藉甚。舉南畿解元。久未第。館于湖州南潯董宗伯家。賦性樸茂。幼無二色。在塾稍久。輒告歸。主人知其不堪寂寞。又不敢強留。徵及龍陽子都之說。卽恚怒變色。謂此禽獸盜丐所爲。蓋生平未解男色也。主人素稔其憨。乃令童子善淫者。乘醉納其莖。夢中不覺歡洽。驚醒。其童愈勗之不休。益暢適稱快。密問童子。知出主人意。乃大呼曰。龍山眞聖人。數日聲不絕。明日其事傳布。遠近怪笑。龍山爲主人別號。自是遂溺于男寵。不問妍媸老少。必求通體。其後舉丁丑進士。竟以暮年好外。羸憊而沒。

男色之靡

宇內男色。有出于不得已者數家。按院之身辭閨閣。閹黎之律禁奸通。塾師之客羈館舍。皆係託物比興。見景生情。理勢所不免。又如罪囚久繫狴犴。稍給朝夕者。必求一人作耦。亦有同類爲之講好。送入監房。與偕臥起。其有他淫者。必相歐訐告。提牢官亦爲分割曲直。嘗見西署郎吏。談之甚詳。但不知外方獄中。

亦有此風否。至西北戍卒。貧無夜合之資。每于隊伍中自相配合。其老而無匹者。往往以兩足凹代之。孤苦無聊。計遂出此。正與佛經中所云五處行淫者相符。雖可笑。亦可憫矣。至于習尚成俗。如京師小唱。閩中契弟之外。則得志士人。致變童爲厮役。鍾情年少。狎麗豎若友昆。盛于江南。而漸染于中原。乃若金陵坊曲。有時名者。競以此道博游。增愛寵。女伴中相誇相謔。以爲佳事。獨北妓尙有不深嗜者。佛經中名男色爲旃羅含

以上選錄敝帚齋餘談十五則

影梅庵憶語

如臯冒 襄辟疆著

愛生于暱。暱則無所不飾。緣飾著愛。天下鮮有真可愛者矣。矧內屋深屏。貯光閨彩。止憑雕心鏤質之文人。描摹想像。麻姑幻譜。神女浪傳。近好事家。復假篆聲詩。侈談奇合。遂使西施夷光。文君洪度。人人閤中有之。此亦閨秀之奇冤。而噉名之惡習已亡。妾董氏原名白。字小苑。復字青蓮。籍秦淮。徙吳門。在風塵雖有艷名。非其本色。傾蓋矢從。余入吾門。智慧才識。種種始露。凡九年。上下內外。大小無忤。無間。其佐余著書。肥遯。佐余婦精女紅。親操井臼。以及蒙難遘疾。莫不履險如夷。茹苦若飴。合爲一人。今忽死。余不知姬死而余死也。但見余婦煢煢粥粥。視左右手罔措也。上下內外大小之人。咸悲酸痛楚。以爲不可復得也。傳其慧心隱行。聞者歎者。莫不謂文人義士難與爭壽也。余業爲哀辭數千言。哭之。格于聲韻。不盡悉。復約畧紀其槩。每冥痛沉思。姬之一生。與偕。姬九年光景。一齊湧心塞眼。雖有吞鳥夢花之心手。莫能追述。區區淚筆。枯澀黯削。不能

自傳其愛。何有于飾。矧姬之事。余始終本末。不緣狎昵。余年已四十。鬚眉如戟。十五年前。眉公先生謂余視錦半臂碧紗籠。一笑瞠若。豈至今復效輕薄子。漫譜情艷。以欺地下。儻信余之深者。因余以知姬之果異。賜之鴻文麗藻。余得藉手報姬。姬死無恨。余生無恨。

己卯初夏。應試白門。陪密之云。秦淮佳麗。近有雙成。年甚綺。才色爲一時之冠。余訪之。則以厭薄紛華。挈家去金閭矣。嗣下第浪遊吳門。屢訪之半塘。時逗遛洞庭不返。名與姬頡頏者。有沙九畹。楊漪炤。予日遊兩生間。獨咫尺不見姬。將歸棹。重往冀一見姬母。秀且賢。勞余曰。君數來矣。予女幸在舍。薄醉未醒。然稍停復他出。從兔徑扶姬于曲欄。與余晤。面暈淺春。纈眼流視。香姿玉色。神韻天然。嬾慢不交一語。余驚愛之。惜其倦。遂別歸。此良晤之始也。時姬年十六。庚辰夏。留滯影園。欲過訪姬。客從吳門來。知姬去西子湖。兼往遊黃山白嶽。遂不果行。

辛巳早春。余省覲去衡嶽。繇浙路往。過半塘。訊姬。則仍滯黃山。許忠節公赴粵。

任。與余聯舟行。偶一日。赴飲歸。謂余曰。此中有陳姬某。擅梨園之勝。不可不見。余佐忠節治舟數往返始得之。其人淡而韻。盈盈冉冉。衣椒繭時背顧湘裙。眞如孤鸞之在烟霧。是日燕弋腔紅梅。以燕俗之劇。伊呀啁晰之調。乃出之。陳姬身口如雲出岫。如珠在盤。令人欲仙欲死。漏下四鼓。風雨忽作。必欲駕小舟去。余牽衣訂再晤。答云。光福梅花如冷雲萬頃。子能越旦偕我游。否則有半月淹也。余迫省覲。告以不敢遲留。故復云。南嶽歸棹。當遲子于虎嘯叢桂間。蓋計其期八月返也。余別去。恰以觀濤日奉母回。至西湖。因家君調已破之囊。陽心緒如焚。便訊陳姬。則已爲寶霍豪家掠去。聞之慘然。及抵閭門。水澁舟膠。去潯關十五里。皆充斥不可行。偶晤一友。語次有佳人難再得之歎。友云。子誤矣。前以勢刼去者。賸某也。某之匿處。去此甚邇。與子偕往。至果得見。又如芳蘭之在幽谷也。相視而笑曰。子至矣。子非雨夜舟中訂芳約者耶。曩感子殷勤。以凌遽不獲訂再晤。今幾入虎口得脫。重晤子。眞天幸也。我居甚僻。復長齋。茗椀爐香。留子傾倒于明月桂影之下。且有所商。余以老母在舟。緣江楚多梗。率健兒百餘。

護行。皆住河干。矍矍欲返。甫黃昏而砲械震耳。擊砲聲如在余舟旁。亟星馳回。則中貴爭持河道。與我兵鬥。解之始去。自此余不復登岸。越旦則姬淡粧至。求謁吾母太恭人。見後仍堅訂過其家。乃是晚。舟仍中梗。乘月一往相見。卒然曰。余此身脫樊籠。欲擇人事之終身可託者。無出君右。適見太恭人如覆春雲。如飲甘露。真得所天。子母辭余笑曰。天下無此易易事。且嚴親在兵火。我歸當棄妻子以殉。兩過子皆路梗中。無聊閒步耳。子言突至。余甚訝。卽果爾。亦塞耳堅謝。無徒悞子。復宛轉云。君倘不終棄。誓待君堂上晝錦旋。余答云。若爾當與子約。驚喜申囑。語絮絮不悉記。卽席作八絕句付之歸。歷秋冬。犇馳萬狀。至壬午仲春。都門政府言路諸公。恤勞人之勞。憐獨子之苦。馳量移之耗。先報余時正在毘陵。聞音如石去心。因便過吳門。慰陳姬。蓋殘冬屢趣余。皆未及答。至則十日前復爲竇霍門下客。以勢逼去。先吳門有嬖之者。集千人譁劫之。勢家復爲大言挾詐。又不惜數千金爲賄。地方恐貽伊戚。刼出復納入。余至悵惘無極。然以急嚴親患難。負一女子無憾也。

是晚壹鬱。因與友覓舟去。虎嘯夜遊。明日遣人之襄陽。便解維歸里。舟過一橋。見小樓立水邊。偶詢遊人。此何處何人之居。友以雙成館對。余三年積念。不禁狂喜。卽停舟相訪。友阻云。彼前亦爲勢家所驚。危病十有八日。母死。鐫戶不見客。余強之上。叩門至再三。始啓戶。燈火閨如。宛轉登樓。則藥餌滿几榻。姬沉吟詢何來。余告以昔年曲欄醉晤人。姬憶淚下曰。曩君屢過余。雖僅一見。余母恒背稱君奇秀。爲余惜不共君盤桓。今三年矣。余母新死。見君憶母。言猶在耳。今從何處來。便強起揭帷帳審視余。且移燈留坐榻上。譚有頃。余憐姬病。願辭去。牽留之曰。我十有八日寢食俱廢。沉沉若夢。驚魂不安。今一見君。便覺神怡氣王。旋命其家具酒食。飲榻前。姬輒進酒。屢別屢留。不使去。余告之曰。明朝遣人去襄陽告家君。量移喜耗。若宿卿處。詰旦不能報平安。俟發使行。甯少停半刻也。姬曰。子誠殊異。不敢留。遂別。越旦。楚使行。余亟欲還。友人及僕從咸云。姬昨僅一面。蓋拳切不可負。仍往言別。至則姬已妝成。凭樓凝睇。見余舟登岸。便疾趨登舟。余具述卽欲行。姬曰。我裝已戒。隨路祖送。余却不得却。阻不忍阻。由潛

關至梁溪。毘陵羨澄江。抵北固。越二十七日。凡二十七辭。姬惟堅以身從。登金山。誓江流曰。妾此身如江水東下。斷不復返吳門。余變色拒絕。告以期逼。科試年來以大人滯危疆。家事委棄。老母定省俱違。今始歸經理一切。且姬吳門貴逋甚衆。金陵落藉。亦費商量。仍歸吳門。俟季夏應試。相約同赴金陵。秋試畢。第與否。始暇及此。此時纏綿兩妨無益。姬仍躊躇不肯行。時五木在几。一友戲云。卿果終如願。當一擲得巧。姬肅拜于船牕。祝畢。一擲得全六。時同舟稱異。余謂果屬天成。倉卒不臧。反償乃事。不如暫去。徐圖之。不得已。始掩面痛哭失聲。而別。余雖憐姬。然得輕身歸。如釋重負。纔抵海陵。旋就試。至六月抵家。荆人對余云。姬令其父先已過江來云。姬返吳門。茹素不出。惟翹首聽金陵偕行之約。聞言心異。以十金遣其父去。曰。我已憐其意而許之。但令靜俟。畢塲事後。無不可耳。余感荆人相成相許之雅。遂不踐走使迎姬之約。竟赴金陵。俟塲後報姬。金桂月三五之辰。余方出闈。姬猝到桃葉寓館。蓋望余耗不至。孤身挈一嫗。買舟自吳門。江行遇盜。舟匿蘆葦中。柁損不可行。炊煙遂斷三日。初八抵三山門。

又恐擾余首場文思。復遲二日始入。姬見余雖甚喜。細述別後百日。茹素杜門。與江行風波盜賊驚魂狀。則聲色俱淒。求歸逾固。時魏塘雲間閩豫諸同社。無不高姬之識。憫姬之誠。咸爲賦詩作畫以堅之。場事旣竣。余妄意必第。自謂此後當料理姬事以報其志。詎十七日忽傳家君舟抵江干。蓋不赴寶慶之調。自楚休致矣。時已二載違養。冒兵火生還。喜出望外。遂不及爲姬商去留。竟從龍潭尾家君舟抵鑾江。家君閱余文。謂余必第。復留之鑾江。候榜。姬從桃葉寓館。仍發舟追余。燕子磯阻風。幾復罹不測。重盤桓鑾江舟中。七日乃榜發。余中副車。窮日夜力歸里門。而姬痛哭相隨。不肯返。且細悉姬吳門諸事。非一手足力所能了責逋者。見其遠來。益多奢望。衆口狴狴。且嚴親甫歸。余復下第意阻。萬難卽詣。舟抵郭外樸巢。遂冷面銑心。與姬決別。仍令姬歸吳門。以厭責逋之意。而後事可爲也。陽月過潤州。謁房師鄭公。時閩中劉大行自都門來。與陳大將軍及同盟劉刺史飲舟中。適奴子自姬處來。云姬歸不脫去時衣。此時尙方空在體。謂余不速往圖之。彼甘凍死。劉大行指余曰。辟疆夙稱風義。固如是負一。

女子耶。余云黃衫押衙。非君平仙客所能自爲。刺史舉杯奮袂曰。若以千金恣我出入。卽于今日往陳大將軍立貸數百金。大行以侵數劬佐之。詎謂刺史至吳門。不善調停。衆譁決裂。逸去吳江。余復還里。不及訊。姬孤身維谷。難以收拾。虞山宗伯聞之。親至半塘。納姬舟中。上至薦紳。下及市井。纖悉大小。三日爲之區畫。立盡。索券盈尺。樓船張宴。與姬餞于虎膠。旋買舟送至吾臬。至月之望。薄暮。侍家君飲于拙存堂。忽傳姬抵河干。接宗伯書。娓娓灑灑。始悉其狀。且卽馳書貴門。生張祠部立爲落籍。吳門後有細瑣。則周儀部終之。而南中則李總憲舊爲禮垣者與力焉。越十月。願始畢。然往返葛藤。則萬斛心血所灌注而成也。杜茶村曰。是篇娓娓至數千言。浩浩蕩蕩。西起崑崙。東注溟渤。冲瀾窮甗。異派分支。千態萬狀。姿媚橫生。頓使會真長恨等篇。黯然失色。非辟疆莫能爲此文。非姬莫能當此作。真千秋大觀矣。情語云乎哉。

壬午清和晦日。姬送余至北固山下。堅欲從渡江歸里。余辭之力。益哀切。不肯行。舟泊江邊。時西先生畢今梁寄余夏西洋布一端。薄如蟬紗。潔比雪。豔以退

紅爲裏。爲姬製輕衫。不減張麗華。桂宮霓裳也。偕登金山。時四五龍舟衝波激盪而上。山中遊人數千。尾余兩人。指爲神仙。遠山而行。凡我兩人所止。則龍舟爭赴。迴環數匝不去。呼詢之。則駕舟者皆余去秋淞回官舫長年也。勞以鵝酒。竟日返舟。舟中宣磁大白。孟盛櫻珠數升共啖之。不辨其爲櫻爲唇也。江山人物之盛。照映一時。至今譚者侈美。

秦淮中秋日。四方同社諸友。感姬爲余不辭盜賊風波之險。間關相從。因置酒桃葉水閣。時在座爲眉樓顧夫人。寒秀齋李夫人。皆與姬爲至戚。美其屬余。咸來相慶。是日新演燕子箋。曲盡情豔。至霍華離合處。姬泣下。顧李亦泣下。一時才子佳人。樓台烟水。新聲明月。俱足千古。至今思之。不異游仙枕上夢幻也。鑾江汪汝爲園亭極盛。而江上小園尤收拾江山勝槩。壬午鞠月之朔。汝爲曾延予及姬于江口梅花亭子上。長江白浪擁象奔。赴杯底。姬轟飲巨卮。羅觴政明肅。一時在座諸妓。皆頽唐潰逸。姬最溫謹。是日豪情逸致。則余僅見乙酉。余奉母及家眷。流寓鹽官。春過半塘。則姬之舊寓固宛然在也。姬有妹曉

生同沙九畹登舟過訪。見姬爲余如意珠。而荆人賢淑。相視復如水乳。羣美之羣妬之。同上虎邱。與予指點舊遊。重理前事。吳門知姬者。咸稱其俊識。得所歸云。

鴛鴦湖上。烟雨樓高。逶迤而東。則竹亭園半在湖內。然環城四面。名園勝寺。夾淺渚層溪。而漱艷者皆湖也。游人一登烟雨樓。遂謂已盡其勝。不知浩瀚幽渺之致。正不在此。與姬曾爲竟日游。又共追憶錢塘江下。桐君巖瀨。碧浪蒼巖之勝。姬更云新安山水之逸。在人枕灶間。尤足樂也。

杜茶村曰。金山一點。屹當匹練之中。臙粉六朝。香染金陵之地。樓名烟雨。湖字鴛鴦。而二妙采眞。披雲擷秀。讀之令人步步欲仙。寧但兩越天都。嵐翠沾酒衣裾已也。

虞山宗伯送姬抵吾臯時。余待家君飲于家園。倉卒不敢告嚴君。又侍飲至四鼓。不得散。荆人不待余歸。先爲潔治別室。幃帳燈火器具飲食。無一不頃刻具。酒闌見姬。姬云始至。止不知何故不見君。但見婢婦簇我登岸。心竊懷疑。且深

恫駭抵斯室見無所不備。旁詢之始感歎主母之賢。而益快經歲之矢相從不誤也。自此姬扃別室。却管絃。洗鉛華。精學女紅。恒月餘不啟戶。耽寂享恬。謂驟出萬頃火雲。得憇清涼界。回視五載風塵。如夢如獄。居數月。於女紅無所不妍巧。錦繡工鮮。刺巾裾如蠟。無痕。日可六幅。剪綵織字。縷金迴文。各厭其技。針神針絕。前無古人已。

姬在別室四月。荆人携之歸。入門。吾母太恭人與荆人見而愛異之。加以殊眷。幼姑長姊。尤珍重相親。謂其德性舉止。均非常人。而姬之侍左右。服勞承旨。較婢婦有加無已。烹茗剝果。必手進。開眉解意。爬背喻癢。當大寒暑。折膠鑠金時。必拱立座隅。強之坐飲食。旋坐旋飲食。旋起。執役拱立如初。余每課兩兒文。不稱意。加夏楚。姬必督之改削成章。莊書以進。至夜不懈。越九年。與荆人無一言枘鑿。至於視衆御下。慈讓不遑。咸感其惠。余出入應酬之費。與荆人日用金錯泉布。皆出姬手。姬不私銖兩。不愛積蓄。不製一寶粟釵鈿。死能彌留。元旦次日。必欲求見老母。始瞑目。而一身之外。金珠紅紫。盡却之。不以殉。洵稱異人。

杜茶村曰。斷斷足再來人。一毫不苟。一絲不挂。誠然而來。誠然而往。吾以比之。董永織女。薛嵩紅線。

余數年來。欲哀集四唐詩。購全集。類逸事。集衆評。列人與年爲次第。每集細加評選。廣搜遺失。成一代大觀。初盛稍有次第。中晚有名無集。有集不全。并名集俱未見者。甚夥。品彙六百家大略耳。即紀事本末千餘家。名姓稍存。而詩不具。全唐詩話更覺寥寥。芝隅先生序十二唐人。稱豫章大家藏中。晚未刻集七百餘種。孟津王師向余言。買靈寶許氏全唐詩數車滿載。即曩流寓鹽官。胡孝轅職方批閱唐人詩。劖劖工費。需數千金。僻地無書可借。近復裹足。牖下不能出遊。購之。以此經營搜索。殊費工力。然每得一帙。必細加丹黃。他書中有涉此集者。皆錄首簡。付姬收貯。至編年論人。準之唐書。姬終日佐余稽查抄寫。細心商訂。永日終夜。相對忘言。閱詩無所不解。而又出慧解以解之。尤好熟讀楚辭。少陵義山王建花蕊夫人王珪三家宮詞等身之書。周迴座右。午夜衾枕間。猶擁數十家唐詩而臥。今秘閣塵封。余不忍啟。將來此志。誰克與終。付之一歎而已。

猶憶前歲。余讀東漢至陳仲舉范滂諸傳。爲之撫几。姬一一求解其始末。發不平之色。而妙出持平之議。堪作一則史論。

乙酉客鹽官。嘗向諸友借書讀之。凡有奇僻。命姬手抄。姬於事涉閨閣者。則另錄一帙。歸來與姬遍搜諸書。續成之。名曰奩艷。其書之瑰異精祕。凡古人女子自頂至踵。以及服食器具。亭台歌舞針神才藻。下及禽魚鳥獸。卽草木之無情者。稍涉有情。皆歸香麗。今細字紅箋。類分條析。俱在奩中。客春顧夫人遠。向姬借閱此書。與龔奉常極讚其妙。促繡梓之。余卽當忍痛爲之校讐。鳩工以終姬志。

姬初入吾家。見董文敏爲余書月賦。仿鍾繇筆意者。酷愛臨摹。嗣遍覓鍾太傅諸帖學之。閱戎輅表。稱關帝君爲賊將。遂廢鍾學。曹娥碑。日寫數千字。不訛不落。余凡有選摘。立抄成帙。或史或詩。或遺事妙句。皆以姬爲紺珠。又嘗代余書小楷扇存戚友處。而荆人米鹽瑣細。以及內外出入。無不各登手記。毫髮無遺。其細心專力。卽吾輩好學人鮮及也。

杜茶村曰。閨秀較書鑒賞。唐有薛濤。宋有李易安。濤風塵老醜。易安失身匪人。終爲風雅之玷。宛君才藻精敏。益見芳貞。而眞嗜殊好。木之天性。方之大。家女史何愧。

姬于吳門。曾學畫未成。能作小叢寒樹。筆墨楚楚。時于几硯上。輒自圖寫。故于古今繪事。別有殊好。偶得長卷小軸。與笥中舊珍。時時展玩不置。流離時甯。委奩具。而以書畫捆載自隨。末後盡裁裝潢。獨存紙絹。猶不得免焉。則書畫之厄。而姬之嗜好。眞且至矣。

姬能飲。自入吾門。見余量不勝蕉葉。遂罷飲。每晚侍荆人數杯而已。而嗜茶與余同性。又同嗜芥片。每歲半塘顧子。兼擇最精者。緘寄。具有片甲蟬翼之異。文火細煙。小鼎長泉。必手自吹滌。余每誦左思嬌女詩。吹噓對鼎鑪之句。姬爲解頤。至沸乳看蟹目魚鱗。傳瓷選月魂雲魄。尤爲精絕。每花前月下。靜試對嘗。碧沈香泛。眞如木蘭沾露。瑤草臨波。備極盧陸之致。東坡云。分無玉腕捧蛾眉。余一生清福。九年占盡。九年折盡矣。

姬每與余靜坐香閣。細品名香。宮香諸品。淫沉水香。俗人以沉香著火上。煙撲油膩。頃刻而滅。無論香之性情未出。卽著懷袖。皆帶焦腥。沉香有堅緻而紋橫者。謂之橫隔沈。卽回種沉香。內革沉。橫紋者是也。其香特妙。又有沉水結而未成。如小笠大菌。名蓬萊香。余多蓄之。每慢火隔紗。使不見烟。則閣中皆如風過伽楠。露沃薔薇。熱磨琥珀。酒傾犀罍之味。久蒸衾枕間。和以肌香。甜豔非常。夢魂俱適。外此則有真西洋香方。得之內府。迥非肆料。丙戌客海陵。曾與姬手製百丸。誠閨中異品。然熟時亦以不見烟爲佳。非姬細心秀致。不能領略到此。

黃熟出諸番。而真臘爲上。皮堅者爲黃熟。桶氣佳而通。黑者爲夾機黃熟。近南粵東筦茶園村。土人種黃熟。如江南之藝茶。樹矮枝繁。其香在根。自吳門解人剔根切白。而香之鬆朽盡削。油尖鉄面盡出。余與姬客半塘時。知金平叔最精于此。重價數購之。塊者淨潤。長曲者如虬。皆就其根之有結處。隨紋縷出。黃雲紫繡。半雜鷓鴣。可拭可玩。寒夜小室。玉幃四垂。氍毹重疊。燒二尺許絳蠟。

二三枝。陳設參差。堂几錯列。大小數宣爐。宿火常熱。色如液金粟玉。細撥活灰一寸。灰上隔砂。選香蒸之。歷半夜。一香凝然。不焦不竭。鬱勃氤氲。純是糖結。熟香間有梅英半舒。荷鵝黎蜜脾之氣。靜參鼻觀。憶年來共戀此味。此境恒打曉鐘。尚未著枕。與姬細想。閨怨有斜倚薰籃。撥盡寒爐之苦。我兩人如在藥珠衆香深處。今人與香氣俱散矣。安得返魂一粒。起于幽房。扇室中也。

一種生黃香。亦從枯瘴朽癰中。取其脂凝脉結。嫩而未成者。余嘗過三吳。白下遍收筐箱中。蓋面大塊。與粵客自携者。甚有大根株塵封如土。皆留意覓得。携歸。與姬爲晨夕清課。督婢子手自剝落。或觔許。僅得數錢。盈掌者僅削一片。嵌空鏤剔。纖悉不遺。無論焚蒸。卽嗅之味如芳蘭。盛之小盤。層撞中色殊香別。可弄可餐。曩曾以一二示粵友黎美周。訝爲何物。何從得如此精妙。卽蔚宗傳中恐未見耳。

又東莞以女兒香爲絕品。蓋土人揀香。皆用少女。女子先藏最佳大塊。暗易油粉。好事者復從油粉擔中易出。余曾得數塊于汪友處。姬最珍之。

余家及園亭。凡有隙地皆植梅。春來蚤夜出入。皆爛漫香雪中。姬于含蕊時。先相枝之橫斜。與几上軍持相受。或隔歲便芟剪得宜。至花放恰採入供。卽四時草花竹葉。無不經營絕慧。領略殊清。使冷韻幽香。恒霏微于曲房斗室。至穠豔肥紅。則非其所賞也。

秋來猶耽晚菊。卽去秋病中客貽我剪桃紅。花繁而厚。葉碧如染。濃條婀娜。枝枝具雲鬢風斜之態。姬扶病三月。猶半梳洗。見之甚愛。遂留榻右。每晚高燒翠蠟。以白團圓六曲圍三面。設小座于花間。位置菊影。極其參橫妙麗。始以身入。人在菊中。菊與人俱在影中。迴視屏上顧余曰。菊之意態盡矣。其如人瘦何。至今思之。澹秀如畫。

閨中蓄春蘭九節。及建蘭。自春徂秋。皆有三湘七澤之韻。沐浴姬手。尤增芳香。藝蘭十二月歌。皆以碧箋手錄粘壁。去冬姬病。枯萎過半。樓下黃樓一株。每腊萬花。可供三月挿戴。去冬姬移居香儷園。靜攝數百枝。不生一蘂。惟聽五鬣濤聲。增其淒響而已。

姬最愛月。每以身隨升沉爲去住。夏納涼小苑。與幼兒誦唐人咏月及流螢執扇詩。半榻小几。恆屢移以領月之四面。午夜歸閣。仍推窗延月于枕簟間。月去復捲幔倚牕而望。語余曰。吾書謝希逸月賦。古人厭晨歡樂宵宴。蓋夜之時逸月之氣靜。碧海青天。霜縞冰淨。較赤日紅塵迴隔仙凡。人生攘攘。至夜不休。或有月未出。已齁睡者。桂華露影。無福消受。與子長歷四序。娟秀浣潔。領略幽香。仙路禪關。於此靜得矣。

李長吉詩云。月灑灑。波烟玉。姬每誦此三字。則反覆迴環。日月之精神氣韻光景盡于斯矣。人以身入波烟玉世界之下。眼如橫波。氣如湘煙。體如白玉。人如月矣。月復似人。是一是二。覺賈長江倚影爲三之語尙贅。至淫耽無厭化蟾之句。則得翫月三昧矣。

杜茶村曰。納域名香。重霄皓魄。奇花異茗。倚態爭芬。自非眞仙瓊媛。莫可得而領略。兼之天才麗質。把玩晨昏。玉臂雲鬢。馥郁于琉璃世界中矣。姬性澹泊。於肥甘一無嗜好。每飯以芥茶一小壺溫淘。佐以水菜香豉數莖粒。

便足一餐。余飲食最少。而嗜香甜。及海錯風薰之味。又不甚自食。每喜與賓客共賞之。姬知余意。竭其美潔。出佐盤盂。種種不可悉記。隨手數則。可觀一斑也。釀飴爲露。和以鹽梅。凡有色香花蔬。皆於初放時採漬之。經年香味顏色不變。紅鮮如摘。而花汁融液。露中入口噴鼻。奇香異艷。非復恒有。最嬌者。爲秋海棠。露海棠無香。此獨露凝香發。又俗名斷腸草。以爲不食。而味美。獨冠諸花。次則梅。英野薔薇。玫瑰。丹桂。甘菊之屬。至橙黃橘紅。佛手香櫞。去白縷絲。色味更勝。酒後出數十種。五色浮動。白瓷中解醒消渴。金莖仙掌。難與爭衡也。取五月桃汁。西瓜汁。一縷一絲。漉盡。以文火煎至七八分。始攪糖細煉。桃膏如大紅琥珀。瓜膏可比金絲內糖。每酷暑。姬必手取其澤示潔。坐爐邊靜看火候。成膏不使焦枯。分濃淡爲數種。此尤異色異味也。製鼓取色取氣。先於取味。豆黃九晒爲度。顆瓣皆剝去衣膜。種種細料。瓜杏薑桂。以及釀鼓之汁。極精潔以和之。鼓熟擎出。粒粒可數。而香氣酣色殊味迥與常別。

紅乳腐烘蒸各五六次。內肉既酥。然後削其膚。益之以味。數日而成者。絕勝建甯三年之蓄。他如冬春水鹽諸菜。能使黃者如蠟。碧者如落。蒲藕筍蕨鮮花野菜。枸蒿蓉菊之類。無不採入食品。芳旨盈席。

火肉久者無油。有松柏之味。風魚久者如火。肉有麋鹿之味。醉蛤如桃花。醉鱖骨如白玉。油蜆如鱖魚。蝦鬆如龍鬚。烘兔酥雉如餅餌。可以籠而食之。菌脯如雞環。腐湯如牛乳。細攷之食譜。四方郇厨中一種偶異。卽加訪求。而又以慧巧變化爲之。莫不異妙。

杜茶村曰。一七一變。異香絕味。使人作五饈八珍之想。

甲申三月十九之變。余邑清和望後。始聞的耗。邑之司命者甚懦。豺虎猙獰踞城內。聲言焚劫郡中。又有興平兵四潰之警。同里紳衿大戶。一時鳥獸駭散。咸去江南。余家集賢里。世恂讓。家君以不出門自固。閱數日。上下三十餘家。僅我灶有炊煙耳。老母荆人懼。暫避郭外。留姬侍余。姬扁內室。經紀衣物書畫文券。各分精粗。散付諸僕婢。皆手書封識。群橫日劫。殺人如草。而隣右人影落落如

晨星。勢難獨立。只得覓小舟。奉兩親挈家累欲衝險從南江渡。澄江北。一黑夜六十里。抵湖洲朱泛宅。江上已盜賊蜂起。先從間道微服送家君從靖江行。夜半家君向余曰。途行需碎金無從辦。余向姬索之。姬出一布囊。自分許至錢許。每十兩可數百。小塊皆小書。輕重于其上。以便倉卒隨手取用。家君見之訝且歎。謂姬何暇精細及此。維時諸費較平日溢十倍。尙不肯行。又遲一日。以百金雇十舟。以百餘家募二百人護舟。甫行數里。潮落舟膠不得上。遙望江口大盜數百人踞六舟爲犄角。守隘以俟。幸潮落不能下逼我舟。朱宅遣有力人負浪踏水馳報曰。後岸盜截歸路不可返。護舟二百人中且多盜黨。時十舟哄動。僕從呼號垂涕。余笑指江上衆人曰。余三世百口咸在舟。自先祖及余祖孫父子六七十年來。居官居里。從無負心負人之事。若今日盡死盜手。葬魚腹。是上無蒼蒼。下無茫茫矣。潮忽早落。彼此舟停不相值。便是天相。爾輩無恐。即舟中敵國不能爲我害也。先夜拾行李登舟。時思大江連海。老母幼子。從未履此奇險。萬一阻石尤。欲隨路登岸。何從覓輿輛。三鼓時以二十金付姓沈人求雇二輿。

一車夫六人。沈與衆咸詫異笑之。謂明早一帆未午便登彼岸。何故黑夜多此難尋無益之費。倩榜人募輿夫。觀者絕倒。余必欲此二者。登舟始行。至斯時雖神氣自若。然進退維谷。無從飛脫。因詢出江未遠。果有別口登岸。通泛湖洲者。舟子曰。橫去半里有小路六七里。竟通彼。余急命鼓楫至岸。所募輿車三事。恰受俯仰七人。餘行李婢婦。盡棄舟中。頃刻抵朱宅。衆始嘆余之夜半必欲水陸兼備之爲奇中也。大盜知予中遁。又朱宅聯絡數百人。爲余護發行。行李人口盜雖散去。而未厭之志。恃江上法網不到。且值無法之時。明集數百人。遣人諭余以千金相致。否則竟圍朱宅。四面舉火。余復笑答曰。盜愚甚。爾不能截我于中流。乃欲從平陸數百家火攻之。安可得哉。然泛湖洲人名雖相衛。亦多不軌。余傾囊召闔庄人付之。令其夜設牲酒齊心于庄外。備不虞。數百人飲酒分金。咸去他所。余卽于是夜。一手扶老母。一手曳荊人。兩兒又小。季甫生旬日。同其母付一信僕偕行。從庄後竹園深箐中蹣跚出。維時更無能手援姬。余回顧姬曰。汝速蹴步。則尾余後。遲不及矣。姬一人顚連趨蹶。仆行里許。始仍得昨所雇輿。

輒星馳至五鼓。達城下。盜與朱宅之不軌者。未知余全家已去其地也。然身脫而行囊大半散矣。姬之珍愛盡失焉。姬返舍謂余當大難時。首急老母。次急荆人兒子。幼弟爲是。彼卽顛連不及死深箐中無憾也。午節返吾廬。衽金革城與內臬獍爲伍者十旬。至中秋始渡江入南都。別姬五閱月。殘臘乃回。挈家隨家君之督漕任去江南。嗣寄居鹽官。因歎姬明大義。達權變如此。讀破萬卷者有是哉。

乙酉流寓鹽官。五月復值犇陷。余骨肉不過八口。去夏江上之累。緣僕婦雜沓犇赴。動至百口。又以笨重行李。四塞舟車。故不能輕身去。且來窺矚。此番決計置生死于度外。扁戶不他之。乃鹽官城中。自相殘殺甚閼。兩親又不能安。復移郭外大白居。余獨令姬率婢婦守寓。不發一人一物出城。以貽身累。卽侍兩親挈妻子流離。亦以子身往。乃事不如意。家人行李紛沓違命而出。大兵迫構。李雍髮之令初下。人心益皇皇。家君復先去惹山。內外莫知所措。余因與姬決此番潰散。不似家園。尙有左右之者。而孤身累重。與其臨難捨子。不若先爲之地。

我有年友。信義多才。以子托之。此後如復相見。當結平生歡。否則聽子自裁。毋以我爲念。姬曰。君言善。舉室皆倚君爲命。復命不自君出。君堂上膝下有百倍重于我者。乃以我牽君之臆。非徒無益而又害之。我隨君友去。苟可自全。誓當匍匐以待君回。脫有不測。與君縱觀大海。狂瀾萬頃。是吾葬身處也。方命之行。而兩親以余獨割姬爲憾。復携之去。自此百日。皆展轉深林僻路茅屋漁艇。或月一徙。或日一徙。或一日數徙。飢寒風雨。苦不具述。卒于馬鞍山遇大兵殺掠奇慘。天幸得一小舟。八口飛渡。骨肉得全。而季之驚悸瘁瘡。至矣盡矣。

秦溪蒙難之後。僅以俯仰八口免。維時僕婢殺掠者幾二十口。生平所蓄玩物及衣貝靡子遺矣。亂稍定。匍匐入城。告急于諸友。卽襤被不辦。夜假蔭于方坦庵年伯。万亦竄跡初回。僅得一氈。與三兄共裹臥耳房。時當殘秋。牕風四射。翌日。各乞斗米束薪于諸家。始暫迎二親及家累返舊寓。余則感寒痢瘡沓作矣。橫白板扉爲榻。去地尺許。積數破絮爲衾。爐煨霜節。藥缺攻補。且亂阻吳門。又傳聞家難劇起。自重九後。潰亂沉迷。迨冬至前僵死。一夜復甦。始得間關破舟。

從骨。林肉莽中。冒險渡江。猶不敢竟歸家園。暫棲海陵。閱冬春百五十日。病方稍痊。此百五十日。姬僅捲一破席。橫陳榻旁。寒則擁抱。熱則披拂。痛則撫摩。或枕其身。或衛其足。或欠伸起伏。爲之左右翼。凡痛骨之所適。皆以身就之。鹿鹿永夜。無形無聲。皆存視聽。湯藥。手口交進。下至糞穢。皆接以目鼻。細察色味。以爲憂喜。日食粗糲一餐。與籲天稽首外。惟跪立我前。溫慰曲說。以求我之破顏。余病失常性。時發暴怒。詎諍三至。色不少忤。越五月如一日。每見姬星靨如蠟。弱骨如柴。吾母太恭人。及荆妻憐之感之。願代假一息。姬曰。竭我心力。以殉夫子。夫子生而余死。猶生也。脫夫子不測。余留此身于兵燹間。將安寄托。更憶病劇時。長夜不寐。莽風飄瓦。鹽官城中。日殺數十百人。夜半鬼聲啾嘯。來我破牕前。如蛩如箭。舉室飢寒之人。皆辛苦勦睡。余背貼姬心而坐。姬以手固握余手。傾耳靜聽。淒激荒慘。欷歔流涕。姬謂余曰。我入君門。整四歲。蚤夜見君所爲。慷慨多風義。豪髮幾微。不隣薄惡。凡君受過之處。惟余知之亮之。敬君之心。實踰于愛君之身。鬼神讚歎。畏避之身也。冥漠有知。定加默祐。但人生身當此境。奇

慘異險。動靜備歷。苟非金石。鮮不銷亡。異日幸生還。當與君敝屣萬有。逍遙物外。慎毋忘此際此語。噫吁嘻。余何以報姬于此生哉。姬斷斷非人世凡女子也。杜茶村曰。才子佳人。多生亂世。如王嬙文姬綠珠。莫可縷數。姬生斯時宜矣。奔馳患難。終保玉顏無恙。首邱繡闥。復得夫君五色彩毫。以垂不朽。孰謂其不幸歟。

丁亥。讒口鑠金。太行千盤。橫起人面。余胸墳五嶽。長夏鬱蟠。惟蚤夜焚二紙告關帝君。久抱奇疾。血下數斗。腸胃中積如石之塊。以千計。驟寒驟熱。片時數千語。皆首尾無端。或數晝夜不知醒。醫者妄投以補。病益篤。勺水不入口者二十餘日。此番莫不謂其必死。余心則炯炯然。蓋余之病不從境入也。姬當大火鑠金時。不揮汗。不驅蚊。晝夜坐藥爐傍。密伺余于枕邊足畔。六十晝夜。凡我意之所及。與意之所未及。咸先後之。已丑秋。疽發于背。復如是百日。余五年危疾者三。而所逢者皆死疾。惟余以不死待之。微姬力。恐未必能堅以不死也。今姬先我死。而永訣時。惟慮以伊死。增余病。又慮余病無伊以相待也。姬之生死。爲余

纏綿如此。痛哉痛哉。

杜茶村曰。此種精誠。格天徹地。嘔血剖心。能與龍比並忠。曾閔齊孝。萬祀千秋。傳之不朽。

余每歲元旦。必以一歲事卜一籤于關帝君前。壬午名心甚。劇禱看籤首第一字。有得憶字。蓋憶昔蘭房分半釵。如今忽把音信乖。癡心指望成連理。到底誰知事不諧。余時占玩不解。卽占全詞。亦非功名語。比遇姬清和晦日。金山別去。姬茹素歸。虔卜于虎嘯關帝君前。願以終身事余。正得此籤。秋過秦淮。述以相告。恐有不諧之歎。余聞而訝之。謂與元旦籤合。時友人在坐曰。我當爲爾二人合卜于西華門。則仍此籤也。姬愈疑懼。且慮余見此籤中懈。憂形于面。乃後卒滿其願。蘭房半釵。癡心連理。皆天然閨閣中語。到底不諧。則今日驗矣。嗟乎。余有生之年。皆長相憶之年也。憶字之奇。呈驗若此。

姬之衣飾。盡失于患難。歸來澹足。不置一物。戊子七夕。看天上流霞。忽欲以黃跳脫摹之。命余書乞巧二字。無以屬對。姬云。曩于黃山巨室。見覆祥雲。眞宣爐。

欸式佳絕。請以覆祥對乞巧。鐫摹頗妙。越一歲釧忽中斷。復爲之恰七月也。余易書比翼連理。姬臨終時。自頂至踵。不用一金珠紈綺。獨留跳脫不去手。以余勒書。故長生私語。乃太真死後。憑洪都客述。寄明皇者。當日何以率書。竟令長恨再譜也。

姬書法秀媚。學鍾太傅稍瘦。後又學曹娥。余每有丹黃。必對泓穎。或靜夜焚香。細細手錄。閨中詩史成帙。皆遺跡也。小有吟咏。多不自存。客歲新春二月。即爲余抄選全唐五七言絕句。上下二卷。是日偶讀七歲女子所嗟人異雁。不作一行歸之句。爲之淒然下淚。至夜和成八絕。哀聲怨響。不堪卒讀。余挑燈一見。大爲不憚。即奪之焚去。遂失其稿。傷哉異哉。今歲恰以是日長逝也。

客春三月。欲長去鹽官。訪患難相恤諸友至邗上。爲同社所淹。時余正四十。諸名流咸爲賦詩。龔奉常獨譜姬始末成數千言。帝京篇連昌宮。不足比擬。奉常云。子不自註。則余苦心不見。如桃花瘦盡春醒面。七字。綰合己卯醉晤壬午病晤兩番光景。誰則知者。余時應之。未卽下筆。他如園次之自昔文人稱孝子。果

然名士悅傾城。于皇之大婦同行小婦尾。孝威之人在樹間。殊有意。婦來花下。卻能文。心甫之珊瑚架筆香印屨。著富名山金屋尊。仙期之錦瑟蛾眉隨分老。芙蓉園上萬花紅。仲謀之君今四十能高舉。羨爾鴻妻佐春杵。吾邑徂徠先生。韜藏經濟一巢樸。游戲鶯花兩閣和。元旦之蛾眉間難佐書幃。皆爲余慶得姬。詎謂我侑卮之辭。乃姬誓墓之狀耶。讀余此雜述。當知諸公之詩之妙。而去春不注奉常詩。蓋至遲之今日。當以血淚和槩險也。

三月之杪。余復移寓友沂友雲軒。久客臥雨。懷家正劇。晚霽。龔奉常偕于皇園次過慰留飲。聽小奚管絃度曲時。余歸思更切。因限韻各作詩四首。不知何故。詩中咸有商音。三鼓別去。余甫着枕。便夢還家。舉室皆見。獨不見姬。急詢荆人不答。復徧覓之。但見荆人背余下淚。余夢中大呼曰。豈死耶。一慟而醒。姬每春必抱病。余深疑慮。旋歸。則姬固無恙。因閒述此相告。姬曰。甚異。前亦于是夜夢數人強余去。匿之幸脫。其人猖獗不休也。詎知夢真而詩籤咸來先告哉。

杜茶村曰。名士名姬。精爽俱至。動與人孚。故其卜兆揮毫。宛然對話。顧造物

何不少延其算耶。惜哉。

(完)

影梅庵憶語跋

巢民先生生多奇遇而中年後屢悲死別殆禪家所謂修福修慧而未了愁緣者顧色能伐性憂能傷人而先生獨享大年其以色壽者歟抑以憂延齡者歟
癸巳秋日震澤楊復吉識

王氏復仇記

祝孝廉者。姓顧。名化雍。字仲求。爲諸生時。能閉戶自守。古之狷介士也。其先常隸屬於陳司空。必謙。以故人輕之。天啟辛酉。化雍登賢書。鄉老中或與相見者。第稱之曰祝舉人而已。邑有公事。當集諸紳會議。值嚴寒。有孝廉沈某者。見化雍至。故作嘲語曰。今日真寒甚。鼻中涕乃突然而出。吳下以奴僕爲鼻。沈故借景。擲揄之。同座皆匿笑。其爲人侮慢如此。祝之居在南城。與趙宦鄰。趙宦者名士錦。字前之。明時進士。爲橫於鄉里。邑人號爲四大王者也。與陳必謙爲兒女姻。陳趙勢焰赫奕。而士錦尤貪悍肆兇虐。覩祝居與已聯比。啟鳩據心。遂挾陳與祝瓜葛。謂祝居係陳故業。令備奩於趙。囑媳呼祝妻王氏至面。白祝不往。則令婦隔牆詈而辱之。化雍含忍者有年。而趙終不能釋。祝終不與校。蓋受其凌虐久矣。化雍秉鐸丹陽。會試旋里。士錦卽令其黨持銀數。佯欲價買。逼之立券。祝不應。士錦怒。令健僕肆口辱罵。拆毀牆壁。頃刻間。兩家廳事洞達爲一。化雍夫人王奔趙哀懇。趙妻及媳受士錦旨。捽其髮而歐之。褫衣裂裾。苦辱萬狀。化

雍忿恨。情極自縊死。遺筆囑其子曰。行年未五十。被惡鄰趙士錦逼佔祖基。朝夕詈罵。辱及爾母。凌虐萬狀。含冤自經。雖類匹夫小諒。實出萬不得已。橫死之後。爲伍尙者。爲伍員者。聽兒輩爲之。我躬不閱。遑恤我後。崇禎十六年十一月初一日。父含淚遺囑。

事聞闔邑。人心不平。實甚。然畏趙勢焰。無敢過而問者。王夫人於是出揭遍貼通衢。其揭曰。

丹陽縣儒學教諭舉人祝化雍妻王氏全男從泰。虔泣血具

揭。爲誣陷逼產立殺夫命事。痛夫化雍祖居。與豪宦趙士錦鄰。並百計謀吞。天宦丹陽未遂。今初一日。覘夫下第歸家。統兇立拆牆垣。搜捉。逼立文契。氏急奔告伊妻及士錦。喝家衆一面將氏裂衣毆辱。一面擒夫鎖考。夫逃避無門。立刻殞。士錦猶謂夫詐死。令奴遍行搜驗。持鎗搦夫妾趙氏。破頸流血。拘折氏指。萬目共覩。今署縣公出。暴尸七日。地方不敢舉報。訴捕不敢准呈。鄰里不敢作証。地慘天昏。神號鬼哭。士錦廣收亡命。蓄意叵測。抄萬家。殺萬命。今則殺及命官。

目無國紀。罪惡貫盈。人天共憤。激切哀告。

崇禎十六年十一月

日具

於是王夫人復刊揭百五餘張。遣急足走丹陽。粘於街衢。復遍送合學諸生。且寓書曰。願諸君敦侯芭之誼。舉鮑宣之旛。助我未亡人。執兵隨後。共報斯讐。則大義允堪千古。未幾諸生各擔襮被。裹餼糧。雲集響應。而麀至於虞。人人攘臂裂眦。欲甘心於天水氏。以報師仇。時瞿稼軒先生家居。於陳趙兩家皆夙好。故不避嫌怨。特爲厠身謹解約。次日集合邑紳士會議於天水氏之堂。時化雅樞已殯於堂上丹陽諸生群入相揖。向衆紳士昌言曰。逼死命官。至變也。至慘也。貴邑禮義之鄉。固宜聲罪致討。共伸公忿。何乃首鼠兩端。人各模稜坐視。晚輩雖懦。頗知在三之節。惟有急走京師。擊登聞鼓。泣訴九閭。爲貴邑科名中人一雪恥辱耳。諸紳噤不發一語。當是時。邑中諸先達齒爵最尊者。唯錢牧齋謙益未至。諸紳故列坐以待。少頃。報錢至。稼軒起謁迎入。皆坐。瞿乃白錢曰。祝趙構難。紛擾匝旬。迄無成議。惟丐老師片言。以爲折衷。錢曰。陳氏之意若何。瞿曰。陳氏意主

於和錢艷然作色曰。在陳旣可以無君。祝亦可以無主。遂拂衣登輿去。於是丹陽諸生奮臂一呼。邑中士民響應數千百人。飛臺擲棟。塵烟蔽天。聲震山谷。瞬息間。趙居頓爲平地。諸生遂捐土葬化雍於天水氏之堂基。各撫掌稱快而去。祝氏亦毀其宅。不留片瓦。蓋恐士錦駕題搶刼爲反噬計也。當衆人之毀趙室也。諸鄉老如從壁上觀。絕不敢出一義忿言。以當鳴鼓之攻者。惟延佇舍旁。久乃潛散云。

野史氏曰。祝雖出自卑微。然亦膺一命於朝矣。趙欲攘其居。又致之死。設長吏中有義縱。王溫舒。命斷斯獄。豈不大快人心哉。奈當日國事已非。羣情奮亂。鄉先生箝口結舌。惟知避怨自全。賴蒙叟一言稍扶。諸生義氣爲差。強人意耳。卒之死者徒死。生者竟生。營鬼窟而安身別業。勢燄依然。覆馬鬣而賁恨重泉。沈冤誰訴。尙論往事者。不禁擊唾壺而長歎也。

紅樓葉戲譜

德清鬢華室女史戲擬

凡作此戲者。四人入座。一人坐醒。三人免醒。兩人亦可對看。莊家十二張。散家十一張。每副三張。各從其類。如情胎歸情胎。情淑歸情淑。名字不得重複。遇重者打去。或另配一副。寶玉茫茫渺渺作百子用。如情胎祇有兩張。用寶玉或茫茫或渺渺一張。便可配成一副。惟金釵情淑中。茫茫不得配入。寶玉處處可配。而三領袖亦不得配。配成四副。卽算和成。和成之家。照牌內註明副數核算。用百子配成者減半。不和之家。如有成副者。亦許算抵。惟各花色如四字三同等。和家方算。九情淑一情鍾如已全者。手內雖有餘牌。亦算和成。至於十二金釵十二侍女。更無須配副數也。

牌式 每樣兩張共計八十四張

茫茫大士

渺渺真人

情鍾

神

穿花蛺蝶

卷一

三

集

情淑 貴 淑媛 春袖 金 三十二副

情淑 英 婦德 宜家 金 三十二副

情淑 富 婦德 宜家 金 三十二副

情淑 豪 紅樓 絕雲 金 三十二副

情淑 芳 李綺 舊 金 三十二副

情貞 節 婦德 宜家 金 三十二副

情貞 烈 青鴛 領袖 侍女 三十二副

情義 忠 卷簾 三豔 侍女 三十二副

情義 媚 陸階 芍藥 侍女 三十二副

情憐 芳 叢巧 姐舊 金 三十二副

情憐 閒 冷韻 妙玉 芳 三十二副

情幽 雅 芳叢 蓓蕾 金 三十二副

情淑 柔 巫雲 夢冷 金 三十二副

情淑 仙 金釵 黛玉 袖 金 三十二副

情淑 豔 紅樓 寶琴 絕豔 三十二副

情淑 冷 韻幽 芳 三十二副

情貞 俠 紅樓 絕豔 金 三十二副

情義 孝 陸階 寶珠 藥 侍女 三十二副

情義 風 陸階 香菱 芍藥 侍女 三十二副

情憐 幽 冷韻 幽芳 三十二副

情幽 幽 冷韻 幽芳 三十二副

情幽	情胎	情胎	情庸	情庸	情慧	情慧	情傲	情傲	情妬	情妬	情移
巫雲秋	賢	木王夫	冠史太	冠尤承	木周姨	卷簾鸞兒	暗水金	暗水金	暗水金	鼓舌趙	游絲尤
夢紋	分陰人	恩君	恩	恩	三豔	香侍	香侍	香侍	如娘	如娘	別姐
冷	三十二副	三十二副	十六副	十六副	十六副	十六副	十六副	十六副	八副	八副	八副

情胎	情庸	情慧	情傲	情妬	情移
薛姨媽	邢夫人	芳官	晴雯	王熙鳳	襲人
分陰	承恩	如簧	三豔	別引	別引
三十二副	十六副	十六副	十六副	金釵	侍女

卷一

三

集

情移

麗 可卿 金釵 八副

四字

每副加二百五十六副

富貴神仙

忠孝節烈

幽閒豔雅

英賢豪俠

嬌柔甜媚

冶麗風騷

三同

每副加六十四副

樛木分陰

冠帔承恩

紅樓絕豔

婦德宜家

芳叢蓓蕾

冷韻幽芳

陞階芍藥

卷簾三豔

暗水浮香

巫雲夢冷

游絲別引

鼓舌如簧

三領袖

凡四字三同祇將手中成副者合看有無此種花色不必另配
如下三李三尤等類則須以牌配成也

各種花色

九聯

三春

三尤

三李

作七百五十六副

不補

十全

兩寶玉
兩黛玉

兩茫茫
兩渺渺
兩寶釵

作一千零二十四副

補七張

十二金釵

每名一張不得重複

同上

十二侍女

同上

同上

九情淑一情鍾

同上

作二千零二十四副

補同上

此爲我鄉徐曼仙女史所創閨中游戲生面別開近日麻雀盛行以此較之一俗一雅判若天淵女史工詩詞有鬢華室稿行世卽此小道亦足見其慧心之獨運矣庚戌三月皞皞子識

釵小志

唐 朱揆著

如夫人

齊侯多內寵。嬖如夫人者六人。

教美人戰

孫武以兵法見吳王闔閭。於是出宮中美人百人。分爲二隊。以王之寵姬二人爲隊長。

妾與政

王導有幸妾姓雷。頗豫政事。蔡公謂之雷尙書。

携妓東山

謝安棲遲東山。放情丘壑。好音樂。每遊賞。必以妓從。

開閣放妾

王處仲嘗荒恣於色。左右諫之。處仲曰。吾乃不覺爾。如此甚易耳。乃開後閣。驅

諸婢妾數十人任其所之。

妾爲夫人

杜佑議者謂佑治行無缺。惟晚年以妾爲夫人。有所蔽云。

妓圍

唐申王每冬月苦寒。令宮女密圍而坐。謂之妓圍。

簾衣

梁夏侯亶性儉率。有妓妾十數。並無被服。每有客常隔簾奏樂。時謂簾爲夏侯衣。

白頭吟

張跂欲娶妾。其妻曰。子誦白頭吟。妾當聽之。跂慙而止。

霓裳羽衣曲

上皇令宮妓佩七寶瓔珞。舞霓裳羽衣曲。曲終珠翠可掃。

雪兒歌

雪兒者李密愛姬。每賓朋文章有奇麗者。付雪兒協律歌之。

絳紗帳

馬融施絳紗帳。前授生徒。後列女樂。

肉臺盤

南唐孫晟官至司空。每食不設几案。使衆妓各執一器環立而侍。號肉臺盤。

以倡進

漢武帝李夫人本以倡進。

婦女連百

秦皇婦女連百。倡優累千。

賜妓樂

夏侯惇從太祖征孫權還。賜妓樂名倡。

毆殺笛妓

王愷嘗置酒。女妓吹笛。少有舛韻。愷便令黃門毆殺之。一座改容。

奪傷指

張均妓多麗。彈琵琶曲頂上有高麗絲結。趙詩爭奪致傷二指。

綾羅袴褶

武帝嘗降王武子家。武子供饌。並用琉璃器。婢子百餘人皆綾羅袴褶。以手擎飲食。

自爲小君裁剪

李紳爲相時。俗尙輕綃。染蘸碧爲婦人衣。紳自爲小君裁剪。

琥珀釧

東昏侯爲潘妃作一隻琥珀釧。直七十萬。

樂天姬侍

樂天詩曰。菱角執笙簧。谷兒抹琵琶。紅綃信手舞。紫綃隨意歌。自注云。皆臧獲名。

燕子樓

張建封節制武寧。納妓盼盼於燕子樓。公薨不它適。

不許妾粧

崔樞夫人治家整肅。容儀端麗。不許群妾作時世粧。

呼琵琶

蔡持正謫新州。侍兒名琵琶。嘗養一鸚鵡。持正每呼琵琶。卽扣響板。鸚鵡傳言呼之。

盡記歌詞

歐陽永叔閑汝陰時。一妓能盡記公所爲歌詞。

唱金縷

杜秋娘。金陵女也。年十五。爲李錡妾。嘗爲錡唱金縷詞。

柳枝

退之二侍姬。名柳枝絳桃。

二妾歌舞

樂天有二妾。樊素善歌。小蠻善舞。

記曲娘子

張紅善歌。每聽新聲一遍。卽能記其節奏。後入宮。號記曲娘子。

百濯香

吳孫亮寵姬有異香。歷年彌盛。浣百遍不歇。名曰百濯香。

善吹箎

河間王侍兒朝雲善吹箎。諸羌叛。王令朝雲假爲老嫗吹箎。羌皆流涕復降。語曰。快馬健兒不如老嫗吹箎。

別錦兒

韓渥集中有別錦兒詩。

房老

石崇愛婢翔風。年三十。遂退之。使爲房老。

燒指吞炭

高聰有妓十餘人。及病。欲不適他人。並令燒指吞炭。出家爲尼。
教誦賦

蜀劉琰侍婢。教誦魯靈光殿賦。

手語

崔生謁一品問疾。其妾與之手語。

善琴箏

李沂公妾名七七。善琴與箏。

香兒

元載妓薛瓊英。幼以香屑親飲啖之。長而肌香。故名香兒。

燭圍

韋涉家宴。使每婢執一燭。四面行立。人呼爲燭圍。

宴客典斟

陳無咎宴一客。用一婢典斟。必十二而後使滿。以盡誠敬之道。

金牌盈坐

河間王夜飲。妓女謳歌一曲。下一金牌。席終金牌盈座。

笑春紅

閬中叅軍黃涉婢曰笑春紅。死。涉念之。淚洒犀簾。至皆損壞。

二花

阮文姬揮髮用杏花。陶溥公呼曰二花。

妾無副服

諸葛亮答李嚴書云。吾受賜八千斛。今畜財無餘。妾無副服。

愛妾換馬

後魏曹彰性倜儻。偶逢駿馬愛之。其主所惜也。彰曰。彰有美妾可換。惟君所擇。馬主因指一妓。彰遂換之。馬名白鵠。故後人作愛妾換馬詩。奏之絃歌焉。

婢皆讀書

鄭玄家奴婢皆讀書。一婢不稱旨。使人拽着泥中。須臾一婢來問曰。胡爲乎泥。

中答曰。薄言往愬。逢彼之怒。

以婢馬賭

爾朱文略豪縱不遜。平秦王有七百里馬。文略敵以好婢賭取之。明日平秦王致請。文略殺馬列婢。以二銀器盛婢頭馬肉遺之。

以妓易帶

嚴續相公歌姬。唐高給事通犀帶。皆一代尤物。因呼盧之會。出姬解帶角之。唐彩大勝。乃酌酒令美人歌一曲而別。

我見亦憐

南郡主見桓溫妾。抱之曰。阿子我見汝亦憐。何況老奴。

侍女合彈

韓退之晚年。二侍女合彈琵琶箏。

妾不衣帛

季文子相宣成。無衣帛之妾。無食粟之馬。

妓堂

司馬郎君時貴好作妓堂。然香烟薰之。屋爲之黑。

女倡着羅縠

曹洪令女倡着羅縠之衣。

望江南

李太尉鎮關西日。爲亡姬謝秋姬作望江南曲。

弓腰

梁羊侃妾孫荆玉。能反腰貼地。嚙席上之珍。謂之弓腰。

鏡兒善箏

郭曖宴客。有婢鏡兒善彈箏。姿色絕代。李端在坐。時竊寓目。屬意甚深。曖覺之。曰。李生能以彈箏爲題。賦詩娛客。吾當不惜此女。李卽席口號曰。鳴箏金粟柱。素手玉房前。欲得周郎顧。時時誤拂絃。曖大稱善。徹席上金玉酒器。并以鏡兒贈李。

袖裏春

元宗爲太子時。愛妾號嬌兒。多從中。疊輩逍遙微行。以輕羅造梨花散。裏以月麟香。號袖裏春。所至暗遺之。

金鳳凰

周光祿諸妓掠髻用鬱金油。傅面用龍消粉。染衣以沈香水。月終人賞金鳳凰一隻。

鄭姬香

鄭注赴河中。姬妾百餘。盡薰麝香氣數里。逆於人鼻。是歲自京兆至河中。所過瓜盡一蒂不獲。

梅粧閣

郭元振落梅粧閣。有婢數十人。客至則拖鴛鴦襯裙衫。一曲終。則賞以糖鷄卵。明其聲也。宴罷散九和握香。

窈窕湯

嘉平二十五日。叔良宿醒未解。竊窕烹百和解醒湯。進之。隨飲而醒。後遂依法作湯。名竊窕湯。

染花奩

郭代公愛姬薛氏。貯食物以散風。奩收粧具以染花。奩。

謝郎衣

蘇紫蒙愛謝耽。咫尺萬里。靡由得親。遣侍兒假耽。恒着小衫。晝則私服。于內夜則擁之而寢。耽知之。寄以詩曰。蘇娘一別。夢魂稀。來借青衫。慰渴飢。若使閒情重。作賦也應願。作謝郎衣。謝亦取女。相服。衷之。後爲夫婦。

不用落塵

麗居。孫亮愛姬也。鬢髮香淨。一生不用洛成。疑其有辟塵犀釵子也。註曰。洛成。卽今篦梳。似落塵。子誤未考。

萱草浣衣

鄭元令婢萱草浣衣。萱草。輒云。郎君塵土太多。令人手皮俱脫。

白團扇

王珉與嫂婢通。嫂知撻之。珉好持白團扇。婢製白團扇歌贈珉云。團扇復團扇。許持自障面。憔悴無復理。羞與郎相見。

枕畔着衣

韓熙載北人仕江南。致位通顯。不防閑婢妾。侍兒往往私客。客賦詩有最是五更醒不住。向人枕畔着衣裳之句。

鳳窠羣女

姑臧太守張憲使娼妓戴拂壺中錦仙裳。密粉淡粧。便侍閣下。奏書者號傳芳妓。酌酒者號龍津女。傳食者號仙盤使。代書札者號墨娥。按香者號麝姬。

玳瑁牀

楚娘名伎也。江都王寵之。寢玳瑁之牀。懸翡翠之帳。

譚衣

穆宗以玄綃白書素紗墨書爲衣服。賜承幸宮人。皆淫鄙之詞。時號譚衣。

春草

白樂天有姬善舞。名春草。

碧絹蚊幃

宋武帝節儉。張妃房惟碧絹蚊幃。

作芙蕖香

歐公知潁州。有官妓盧媚兒。姿貌端秀。口中常作芙蕖花香。有蜀僧云。此人前身爲尼。誦法華經二十年。

停隼旟

劉禹錫泰娘詩。風流太守章尚書。路旁忽見停隼旟。

半粧

諺曰。白頭花鈿滿面。不若徐妃半粧。

幃婢作樂

謝安夫人劉氏。幃諸婢使在前作伎。太傅暫見。便下幃。太傅索更開。夫人云。恐

傷盛德。

青綃紫袖

竟陵王青綃持拂。紫袖吹簫。

鷓鴣止妬

梁武平齊。盡有其內。獲侍兒十餘輩。忌於郤后。左右進言曰。以鷓鴣爲膳。可以止妬。

寵盪墜牀

顏延之有愛姬。姬憑寵盪延之。墜牀至損。

脂肉滑

元稹詩。越婢脂肉滑。

老不遣妾

齊張瓊妓妾盈房。或譏其衰暮畜妓。瓊曰。我少好音律。老而方解。平生嗜欲。無一復存。唯未能遣此耳。

卜姓

禮買妾不知其姓。則卜之。

專房

霍后傳。寵之專房。

畫衣粉面

梁陳士人春游。畫衣粉面。絃歌相逐。

纖手烹

白傳。詩。茶教纖手侍兒烹。

蘭葉載

柳惲書。請以一。小。蘭。葉。載。桃。葉。小。姬。以。往。

燕燕相見

趙飛燕姐妹並幸。童謠曰。燕燕尾涎涎。張公子。時相見。

響玉鳴

楊士弘曰。江南貴家。每宴。響玉一鳴。青衣紅綃十許。曹籠燈迎立。

巾箱之寵

記曰。豈惟炊爨之勞。抑亦巾箱之寵。

顧語子

韓愈序。今人持被直三省。丁寧顧婢子。語刺刺不能休。

莫敢當夕

禮妻不在。妾御莫敢當夕。

聲清性惡

魏武有一妓。聲音清高。而情性酷惡。欲殺則愛。才欲置則不堪。於是選一人聲及之。便殺性惡者。

推婢墓中

于寶父有寵婢。母妬甚。及父亡。母乃生推婢于墓中。後十餘年。開墓。婢伏棺而甦。言其父常取飲食與之。恩情如生。

榴花染

詩鬱金香汗裏歌巾。山石榴花染舞裙。

誚失婢榜

唐人有誚失婢榜詩。詩曰撫養在香閨。嬌癡教不依。總然桃葉寵。打得柳花飛。曉露空調粉。春羅枉賜衣。內家方妬殺。好處任從歸。

粧臺記

唐宇文氏

舜加女人首飾。釵雜以牙瑇瑁爲之。

周文王於髻上加珠翠翹花。傳之鉛粉。其髻高名曰鳳髻。又有雲髻。步步而搖。故曰步搖。

始皇宮中悉好神仙之術。乃梳神仙髻。皆紅粧翠眉。漢宮尙之。

後有迎春髻。垂雲髻。時亦相尙。

漢武就李夫人取玉簪搔頭。自此宮人多用玉。時王母下降。從者皆飛仙髻。九環髻。遂貫以鳳頭釵。孔雀搔頭。雲頭篦。以瑇瑁爲之。

漢明帝令宮人梳百合分髻。髻同心髻。

魏武帝令宮人梳反綰髻。挿雲頭篦。又梳百花髻。

晉惠令宮人梳芙蓉髻。挿通草五色花。

陳宮中梳隨雲髻。卽暈妝。

隋文宮中梳九真髻。紅妝謂之桃花面。挿翠翹桃華搔頭。帖五色花子。

煬帝令宮人梳迎唐八鬢髻。

挿翡翠釵子作日妝。又令梳翻荷髮作啼妝。坐愁髻作紅妝。

唐武德中宮中梳半翻髻。又梳反綰髻。樂遊髻。卽水精殿名也。

開元中梳雙鬟望仙髻。及迴鵲髻。

貴妃作愁來髻。

貞元中梳歸順髻。帖五色花子。又有開掃粧髻。

古今注云長安作盤桓髻。驚鵲髻。復作倭髻。一云梁冀妻墮馬髻之遺狀也。晉永嘉間婦人束髮。其緩彌甚。紛之堅不能自立。髮被於額。自出而已。吳婦盛粧者。急束其髮而鬬角過於耳。

惠帝元康中婦人之飾有五兵佩。又以金銀瑇瑁之屬。爲斧鉞戈戟以當笄。太元中王公婦女必緩髻傾髻以爲盛飾。用髮旣多。不可恒戴。乃先於木及籠上裝之名曰假髻。或名假頭。

文帝元天嘉六年。召問婦人結髮者三分。髮抽其鬢直向上。謂之飛天紒。始自東府。流被民庶。

宋寶初。貴族及士民好爲異服。婦人則簪步搖釵。衫袖窄小。

楊貴妃常以假鬢爲首飾。而好服黃裙。

蜀孟昶末年。婦女治髮爲高髻。號朝天髻。

理宗朝。宮妃梳高髻於頂。曰不走落。

梁簡文詩。同安鬟裡撥。異作額間黃。撥者。振開也。婦女理髮用撥。以木爲之。形如麥核。兩頭尖。尖可二寸長。以漆光澤。用以鬆髮。名曰髻棗。競作萬安髻。如古之蟬翼髻也。

後周靜帝令宮人畫眉墨粧。

漢武帝令宮人作八字眉。

漢日給宮人螺黛作翠眉。

魏武帝令宮人畫青黛眉。連頭眉。一畫連心甚長。人謂之仙蛾妝。齊梁間多效。

之。

唐貞元中。又令宮人青黛畫蛾眉。
古今注云。梁冀妻改翠眉爲愁眉。

魏宮人畫長眉。

西京雜記云。司馬相如妻文君。眉色如望遠山。時人效畫遠山眉。

五代宮中畫眉。一曰開元御愛眉。二曰小山眉。三曰五岳眉。四曰三峯眉。五曰垂珠眉。六曰月稜眉。又名却月眉。七曰分稍眉。八曰涵烟眉。九曰拂雲眉。又名橫烟眉。十曰倒暈眉。東坡詩。成都畫手開十眉。橫烟却月爭新奇。

唐末點唇。有胭脂暈品石榴嬌。大紅春。小紅春。嫩吳香。半邊嬌。萬金紅。聖檀心。露珠兒。內家圓。天宮巧。恪兒殷。淡紅心。猩猩暈。小朱龍。格雙唐眉。花奴婦人畫眉。有倒暈粧。古樂府有暈攏髻之句。

今婦人面飾用花子。起自唐上官昭容所制。以掩黥迹也。

隋文宮中貼五色花子。則前此已有其制矣。乃彷彿於宋壽陽公主梅花落面事。

也。宋淳化間京師婦女競翦黑光紙圍團。又裝縷魚腮骨。號魚媚子。以飾面。皆花子之類耳。

美人妝面既傅粉。復以胭脂調勻掌中施之。

第一

三

集

髻鬟品

唐 段柯古

髻始自燧人氏。以髮相纏而無繫縛。

周文王加珠翠翹花。名曰鳳髻。又名步搖髻。

秦始皇有望僊髻。參鸞髻。凌雲髻。

漢有迎春髻。垂雲髻。

王母降武帝宮。從者有飛仙髻。九環髻。

漢元帝宮中有百合分髻。同心髻。

太元中公主婦女必緩鬢。欣髻。又有假髻。

合德有欣愁髻。

貴妃有義髻。

魏明帝宮有涵煙髻。

魏武帝宮有反綰髻。又梳百花髻。

晉惠帝宮有芙蓉髻。

梁宮有羅光髻。

陳宮有隨雲髻。

隋文宮有九貞髻。

煬帝宮有迎唐八寶髻。又梳翻荷髻。坐愁髻。

高祖宮有半翻髻。反綰樂游髻。

明皇帝宮中雙環望仙髻。迴鵲髻。

貴妃作愁來髻。

貞元中有歸順髻。又有開掃粧髻。


漢梁冀妻作墮馬髻。

長安城中有盤桓髻。驚鵲髻。又拋家髻。及倭髻。

王憲亦作解散髻。斜挿簪。


周弘文少時着錦絞髻。

香艷叢書三集卷一終



香艷叢書

第三集



香艷叢書

三集卷二

漢雜事秘辛

漢 無名氏

建和元年四月丁亥。保林吳姁以丙戌詔書下中常侍超曰。朕聞河洲竊窈。明辟思服。擇賢作儷。隆代所先。故大將軍乘氏忠侯商所遺少女。有貞靜之德。流聞禁掖。其與姁並詣商第。周視動止。審悉幽隱。其毋諱匿。朕將採焉。姁即與超以詔書趨詣商第。第內謹譟。食時商女女瑩從中閣細步到寢。姁與超如詔書周視動止。俱合法相。超留外舍。姁以詔書如瑩燕處。屏斥接待。閉中閣子。時日晷薄辰。穿照蜃窗。光送著瑩面上。如朝霞和雪。艷射不能正視。目波澄鮮。眉嫵連卷。朱口皓齒。脩耳懸鼻。輔靨頤頤。位置均適。姁尋脫瑩步搖。伸髻度髮。如黝髥可鑒。圍手入盤。墜地加半握。已乞緩私小結束。瑩面發頰。抵攔。姁告瑩曰。官家重禮。借見朽落。緩此結束。當加鞠翬耳。瑩泣數行下。閉目轉面內向。姁爲手



緩捧著。日光芳氣。噴襲肌理。膩潔拊不留手。規前方後。築脂刻玉。胸乳菽發。臍容半寸許。珠私處墳起。爲展兩股。陰溝渥丹火齊。欲吐此守禮謹嚴處女也。約畧瑩體。血足榮膚。膚足飾肉。肉足冒骨。長短合度。自顛至底。長七尺一寸。肩廣一尺六寸。臀視肩廣減三寸。自肩至指。長各二尺七寸。指去掌四寸。肖十竹萌削也。髀至足。長三尺二寸。足長八寸。趺跗豐妍。底平。指歛約。縑迫。袪收束。微如禁。中久之不得音響。姁令推謝皇帝萬年。瑩乃徐拜稱皇帝萬年。若微風振簫幽鳴。可聽。不痔不瘍。無黑子。創陷及口鼻腋私足諸過。臣妾姁女賤愚。慙言不宣。心書不符。見謹秘緘。昧死以聞。時夜漏三下。太后猶御壽安殿。發緘歡喜。顧語帝曰。吾入宮後。知有幼妹。然中外隔闕。目所未見。不謂爭達如爾。明日詔下有司議禮。有司奏曰。謹按春秋迎王后于紀。在途則稱后。故大將軍乘氏忠侯商女。今大將軍參錄尙書事乘氏侯冀女弟。膺紹聖善。舊協潛邸。結婚之際。有命既集。宜備禮章。時進徵幣。請下三公太常案禮儀奏。可。一準孝惠皇帝納后故事。於六月癸未。皇帝制詔大將軍參錄尙書事乘氏侯冀。乾施坤受。實始人

經不有配儷。曷奉天地宗廟。爰謀公卿。咸謂宜率前典。今使使持節太常弘宗正千秋以禮納采。主人曰皇帝嘉命。訪婚陋族。備數采擇。臣父故大將軍乘氏忠侯商之遺女。未聞訓誡。衣履若而人。欽承前典。肅奉儀制。大將軍參錄尙書事乘氏翼上。臣翼頓首再拜承制。乙酉皇帝制詔大將軍參錄尙書事乘氏侯冀兩儀配儷。承天統物。正位于內。必埃令族。重申舊典。今使使持節太常弘宗正千秋以禮問名。主人曰皇帝嘉命使者弘到。重宣中詔。問臣名族。臣女弟女瑩。父母所生。先臣故九江之守定陵侯統之遺玄孫。先臣故褒親愍侯竦之曾孫。先臣故少府特進乘氏侯雍之孫。先臣故大將軍乘氏忠侯商之遺女。外出自先臣故侍中鮦陽侯萬全之外曾孫。先臣故大鴻臚鮦陽侯桂之外孫。年十六。欽承前典。肅奉儀制。戊子皇帝制詔大將軍參錄尙書事乘氏侯冀人謀龜從。僉曰貞吉。敬從典禮。今使使持節太常弘宗正千秋以禮納吉。主人曰皇帝嘉命使者弘重宣中詔。太卜元吉。臣陋族卑鄙。憂懼不勝。欽承前典。肅奉儀制。辛卯皇帝制詔大將軍參錄尙書事乘氏侯冀之女弟。有母儀之德。窈窕之

姿如山如河。宜奉宗廟。永承天祚。以黃金二萬斤。馬十二匹。玄纁黻璧。以章典禮。今使使持節司徒戎太常弘。以禮納徵。主人曰。皇帝嘉命。降婚卑陋。崇以上公。寵以典禮。備物典策。欽承前典。肅奉儀制。甲午。皇帝制詔大將軍參錄尙書事。乘氏侯冀謀于公卿。大筮元龜。罔有不臧。率遵典禮。今使使持節大常弘。宗正千秋。以禮請期。主人曰。皇帝嘉命。使弘重宣中詔。吉日惟今。月庚子可迎。臣欽承前典。肅奉儀制。庚子。皇帝制詔大將軍參錄尙書事。乘氏侯冀歲吉。月令吉日。惟庚子。率禮以迎。今使使持節太尉喬司徒戎以迎。主人曰。皇帝嘉命。使者喬重宣中詔。令月吉辰。備禮以迎。上公宗卿。兼至副介。近臣百兩。臣螻蟻之族。猥承大禮。憂悚惶悸。欽承前典。肅奉儀制。后服紺上玄下。假髻步搖。八雀九華。十二鑲。加以翡翠朱鳥。乘法駕。重翟羽蓋。金根車。駕青交路。青帷裳。幘畫轡。黃金塗五末。蓋蚤施金華。駕駟馬。龍旂九旂。大將軍妻參乘。太僕妻御車。府令設鹵簿。屬車四十六乘。前鸞旗。車皮軒。鳳皇闔戟。九旂雲罕。金鉦黃鉞。洛陽令奉引。公卿五官校尉司隸校尉河南尹妻。皆乘其官車。帶夫本官綬。以從。置

虎賁羽林騎戎頭。黃門鼓吹五時。副車女騎夾轂。執法御史在前。五將導騎。千乘萬騎。引至闕下。自皇漢迎后。未有若斯之盛也。至八月乙未。詔曰。維建和元年八月乙未。制詔故大將軍乘氏忠侯商女瑩。朕聞任姒佐周。縣運八百。良以德重黃床。足奉宗廟也。朕以寡昧。承嗣歷服。爰求英淑。共臨海內。惟爾夙聞內戒。德冠後庭。有天桃之宜。協和鳴之祥。宜升尊位。母儀天下。今使太尉喬使持節奉璽綬。宗正千秋爲副。立爾爲皇后。其敬慎中饋。以踐乃位。無替朕命。永奠坤維。后卽位于章德殿。太尉使持節奉璽綬。天子臨軒。陞設虎賁旄頭五牛旗。百官陪位。皇后北面。太尉往蓋下東向。宗正大長秋西向。宗正讀策文畢。皇后稱臣妾。皇帝萬年。畢。住位。太尉喬授璽綬。中常侍超長跪受璽綬。奏于殿前。女史授婕妤。婕妤長跪受以授昭儀。昭儀長跪受以帶皇后。皇后伏起拜稱臣妾。皇帝萬年。訖。黃門鼓吹三通。鳴鼓畢。羣臣以次出。后卽位。大赦天下。

漢雜事一卷。得于安寧州土知州董氏。前有義烏王子充印。蓋子充使雲南時。篋中書也。然御覽諸書。亦有漢雜事而畧不見。此特載漢桓帝懿獻梁

皇后被選及六禮冊立事。而吳姁入后燕處審視一段。最爲奇豔。但太穢褻耳。不謂翼威赫震人。猶得瀆選如此。卷首有秘辛二字。不可解。要是卷帙甲乙名目。余嘗搜考弓足原始不得。及見約縑迫袂。收束微如禁中語。則纏足後漢已自有之。言脫于口。追駟不及。聊志于此。用塞疏漏之誚。成都楊慎識。

大業拾遺記

唐 顏師古

大業十二年。煬帝將幸江都。命越王侑畱守東都。宮女半不隨駕。爭泣畱帝。言遼東小國。不足以煩大駕。願擇將征之。攀車畱借。指血染鞅。帝意不回。因戲飛白題二十字。賜守宮女云。我夢江都好。征遼亦偶然。但存顏色在。離別只今年。車駕既行。師徒百萬前驅。大橋未就。則命雲屯將軍麻叔謀濬黃河入汴堤。使勝巨艦。叔謀御命甚酷。以鐵脚木鵝試彼淺深。鵝止。謂濬河之夫不忠。隊伍死冰下。至今兒啼。聞人言麻胡來。卽止。其訛言畏人皆若是。帝離都旬日。幸宋何妥所進車。車前隻輪高廣。踈釘爲刃。後隻輪庫下。以柔榆爲之。使滑勁不滯。使牛御馬。名車自都抵汴郡。日進御女車。車轆垂絞綃網。雜綴片玉鳴鈴。行搖玲瓏。以混車中笑語。冀左右不聞也。長安貢御車女袁寶兒。年十五。腰肢纖墮。駉愁多態。帝寵愛之特厚。時洛陽進合蒂迎輦花。云得之嵩山塢中。人不知名。採者異而貢之。會帝駕適至。因以迎輦名之花外殷紫。內素膩菲芬。粉蘂心深紅。跼

爭兩花。枝幹烘翠。類通草。無刺。葉圓長薄。其香氣穠芬馥。或惹襟袖。移日不散。嗅之。令人不多睡。帝令寶兒持之。號曰司花女。時詔虞世南草征遼指揮德音。敕於帝側。寶兒注視久之。帝謂世南曰。昔傳飛燕可掌上舞。朕常謂儒生飾於文字。豈人能若是乎。及今得寶兒。方昭前事。然多慙態。今注目於卿。卿才人可便嘲之。世南應詔爲絕句曰。學畫鴟黃半未成。垂肩褰袖太慙生。緣慙却得君王惜。長把花枝傍輦行。上大悅。至汴。帝御龍舟。蕭妃乘鳳舸。錦帆綵纜。窮極侈靡。舟前爲舞臺。臺上垂蔽日簾。簾卽蒲澤國所進。以負山蛟睫。幼蓮根絲貫小珠間。睫編成。雖曉日激射。而光不能透。每舟擇妙麗長白女子千人。執雕板鏤金楫。號爲殿脚女。一日帝將登鳳舸。凭殿脚女吳絳仙肩。喜其柔麗。不與羣輩齒。愛之甚。久不移步。絳仙善畫長蛾眉。帝色不自禁。回輦召絳仙。將拜嬖好。適值絳仙下嫁爲玉工萬羣妻。故不克諧。帝寢興罷。擢爲龍舟首楫。號曰曄峒夫人。由是殿脚女爭效爲長蛾眉。司宮吏日給螺子黛五斛。號爲蛾綠。螺子黛出波斯國。每顆值十金。後徵賦不足。雜以銅黛給之。獨絳仙得賜螺黛不絕。帝每

倚簾視絳仙。移時不去。顧內謁者云。古人言秀色若可餐。如絳仙。真可療飢矣。因吟持機篇。賜之曰。舊曲歌桃葉。新粧艷落梅。將身旁輕機。知是渡江來。詔殿脚女千輩唱之。皆越溪進耀光綾。綾紋突起有光彩。越人乘樵風舟。泛於石帆山下。收野繭。繰之。繰絲女夜夢神人告之。禹穴三千年一開。汝所得野繭。卽江淹文集中壁魚所化也。絲織爲裳。必有奇文。織成。果符所夢。故進之。帝獨賜司花女洎絳仙。它姬莫預。蕭妃悲妬不懌。由是二姬稍稍不得親幸。帝嘗醉遊諸宮。偶戲宮婢羅羅者。羅羅畏蕭妃不敢迎帝。且辭以有程姬之疾。不可薦寢。帝乃嘲之曰。箇人無賴。是橫波。黛染隆顧。簇小蛾。幸得畱儂伴成夢。不畱儂住意。如何。帝自達廣陵宮中。多效吳言。因有儂語也。帝昏湏滋深。往往爲妖祟所惑。嘗遊吳公宅鷄臺。恍惚間與陳後主相遇。尙喚帝爲殿下。後主戴車紗皂幘。青綽裏長裾。綠錦純緣紫紋方平履。舞女數十許。羅侍左右。中一女迴美。帝屢目之。後主云。殿下不識此人耶。卽麗華也。每億桃葉山前。乘戰艦。與此子北渡。爾時麗華最恨。方倚臨春閣。試東郭婉紫毫筆。書小研紅綃。作答江令壁月句。未

終見韓擒虎躍青驄。車擁萬甲直來衝。入殊煞風景。以至今日。俄以綠文測海。蠡酌紅梁新釀。勸帝。帝飲之甚歡。因請麗華舞。玉樹後庭花。麗華白後主。辭以拋擲歲久。自井中出來。腰肢依亘。無復往時姿態。帝再三索之。乃徐起。終一曲。後主問帝。蕭妃何如此人。帝曰。春蘭秋菊。各一時之秀也。後主復誦詩十數篇。帝不記之。獨愛小窻詩。及寄侍兒碧玉詩。小窻云。午醉醒來晚。無人夢自驚。夕陽如有意。偏傍小窻明。寄碧玉云。離別腸應斷。相思骨合銷。愁魂若飛散。憑仗一相招。麗華拜求帝一章。辭以不能。麗華笑曰。嘗聞此處不留儂。會有留儂處。安可言不能。帝強爲之操觚曰。見面無多事。聞名爾許時。坐來生百媚。實箇好相知。麗華捧詩。頽然不懌。後主問帝。龍舟之遊樂乎。始謂殿下致治在堯舜之上。今日復此逸遊。大抵人生各圖快樂。曩時何見罪之深邪。三十六封書至今使人怏怏不悅。帝忽悟叱之云。何今日尙目我爲殿下。復以往事訊我邪。隨叱聲恍然不見。

帝幸月觀。烟景清朗。中夜獨與蕭妃起臨前軒。簾櫳不開。左右方寢。帝凭妃肩。

說東宮時事。適有小黃門映薔薇叢調宮婢。衣帶爲薔薇罥結。笑聲吃吃不止。帝望見腰肢纖弱。意爲寶兒有私。帝披單衣。亟行擒之。乃宮婢稚娘也。迴入寢殿。蕭妃諛笑不知止。帝因曰。往年私幸。妥娘時情態正如此。此時雖有性命。不復惜矣。後得月賓。被伊作意。態不徹。是時儂心不減。今復對蕭娘情態。曾效劉孝綽爲雜憶詩。常念與妃。妃記之否。蕭妃承問。卽念云。憶睡時待來。剛不來。卸粧仍索伴。解佩更相催。博山思結夢。沉水未成灰。又云。憶起時投籤初報曉。被惹香黛殘。枕隱金釵。笑動上林中。除却司晨鳥。聽之咨嗟云。日月遄逝。今來已是幾年事矣。妃因言聞說。方外羣盜不少。幸帝圖之。帝曰。儂家事一切已託楊素了。人生能幾何。縱有他變。儂終不失作長城公。汝無言外事也。帝嘗幸昭明文選樓。車駕未至。先命宮娥數千人昇樓迎侍。微風東來。宮娥衣被風綽直泊肩項。帝睹之色荒愈熾。因此乃建迷樓。擇下俚稚女居之。使衣輕羅單裳。倚檻望之。勢若飛舉。又蕪名香於四隅。烟氣霏霏。常若朝霧未散。謂爲神仙境界。不我多也。樓上張四寶帳。帳各異名。一名散春愁。二名醉忘歸。三名夜酣香。四

名延。秋。月。妝。奩。寢。衣。帳。各。異。製。帝。自。達。廣。陵。沉。湎。失。度。每。睡。須。搖。頓。四。體。或。歌。吹。齊。鼓。方。就。一。夢。侍。兒。韓。俊。娥。尤。得。帝。意。每。寢。必。召。令。振。聳。支。節。然。後。成。寢。別。賜。名。爲。來。夢。兒。蕭。妃。常。密。訊。俊。娥。曰。帝。體。不。舒。汝。能。安。之。豈。有。他。媚。俊。娥。畏。威。進。言。妾。從。帝。自。都。城。來。見。帝。嘗。在。何。安。車。車。行。高。下。不。等。女。態。自。搖。帝。就。搖。怡。悅。妾。今。幸。承。皇。后。恩。德。侍。寢。帳。下。私。效。車。中。之。態。以。安。帝。耳。非。他。媚。也。他。日。蕭。后。誣。罪。去。之。帝。不。能。止。暇。日。登。迷。樓。憶。之。題。東。南。柱。二。篇。云。黯。黯。愁。侵。骨。綿。綿。病。欲。成。須。知。潘。岳。鬢。強。半。爲。多。情。又。云。不。信。長。相。憶。絲。從。髮。裡。生。閑。來。倚。樓。立。相。望。幾。含。情。殿。腳。女。自。至。廣。陵。悉。命。備。月。觀。行。宮。由。是。絳。仙。等。亦。不。得。親。侍。寢。殿。有。郎。將。自。瓜。州。宣。事。迴。進。合。歡。水。果。一。器。帝。命。小。黃。門。以。一。雙。馳。騎。賜。絳。仙。遇。馬。急。搖。解。絳。仙。拜。賜。不。然。因。附。紅。箋。小。簡。上。進。曰。驛。騎。傳。雙。果。君。王。寵。念。深。寧。知。辭。帝。里。無。復。合。歡。心。帝。省。章。不。悅。顧。黃。門。曰。絳。仙。如。何。來。辭。怨。之。深。也。黃。門。懼。拜。而。言。曰。適。走。馬。搖。動。及。月。觀。果。已。離。解。不。復。連。理。帝。意。不。解。因。言。曰。絳。不。仙。獨。貌。可。觀。詩。意。深。切。乃。女。相。也。亦。何。謝。左。貴。嬪。乎。帝。於。宮。中。嘗。小。會。爲。拆。

字令。取左右離合之意。時杳娘侍側。帝曰。我取杳字爲十八日。杳娘復解羅字爲四維。帝顧蕭妃曰。爾能拆朕字乎。不能。當辭一盃。妃徐曰。移左畫居右。豈非淵字乎。時人望多歸唐公。帝聞之不懌。乃言吾不知此事。豈爲非聖人邪。於是奸蠹起於內。盜賊攻於外。直閣裴虔通。虎賁郎將司馬德勤等。引左右屯衛將軍宇文化及。將謀亂。因請放官奴分直上下。帝可奏。卽宣詔云。門下寒暑迭用。所以成歲功也。日月代明。所以均勞逸也。故士子有遊息之談。農夫有休勞之節。咨爾髦衆。服役甚勤。執勞無怠。埃壒溢於爪髮。蟣虱結於兜鍪。朕甚憫之。俾爾休番。從便億戲。無煩方朔滑稽之請。而從衛士遞上之文。朕於侍從之間。可謂恩矣。可依前件事。是有焚草之變。

右大業拾遺記者。上元縣南朝故都梁建瓦棺寺閣。閣南隅有雙閣。閉之忘記。歲月會昌中。詔拆浮圖。因開之。得筭筆千餘頭。中藏書一帙。雖皆隨手靡書。而文字可紀者。乃隋書遺稿也。中有生白藤紙數幅。題南部烟花錄。僧志微得之。及焚釋氏羣經。僧人惜其香軸。爭取紙尾。拆去視軸。皆有魯郡文忠

顏公名顯云手寫是錄卽前之筭筆可不舉而知也志微得錄前事及取隋書校之多隱文特有符會而事頗簡脫豈不以國初將相爭以王道輔政顏公不欲華靡前迹因而削乎今堯風已還得車斯駕獨惜斯文湮沒不得爲詞人才子談柄故編云大業拾遺記本文缺落凡十七八悉而補之矣

元氏掖庭記

天台陶宗儀

元祖肇建內殿。制度精巧。頭刻螭形。以檀香爲之。螭頭向外。口中銜珠。下垂珠皆五色。用綵金絲貫串。負柱融滾。霞沙爲貌。怒目張牙。有欲動之狀。瓦滑琉璃。與天一色。朱砂塗壁。紅重胭脂。彤棹華稅。金桷雕櫺。務窮一時之麗。殿上設水精簾。堦琢龜文。繞以曲檻。檻與堦皆白玉石爲之。太陽東升。殿中燦爛。堦更飛輝。古謂天子有金殿玉墀。名不虛也。又有紫檀殿。以紫檀香木爲之。光天玉德七寶。搖光通雲凝翠廣寒等殿。其餘不可一一數也。

元妃靜懿皇后旦日

一作誕日

受賀。六宮嬪妃以次獻慶禮時。南朝宮人亦有選入

後庭者。亦以所珍進獻。一人獻寒光水玉魚。一人獻青芝雙虬如意。一人獻柳

金簡翠腕闌

似今之手鐲類但彼扁而用臂者耳

魚是太真潤肺物。如意是六朝宮人所遺。闌又

建業景陽宮臙脂井物

疑是麗華所墜

后不悅。

宮中以玉板筭及白兔胎作羹極佳。名換舌羹。

玉板筭吉州土產

備載尤良名饌錄及

高堦詩叙

大內有德壽宮、興聖宮、翠華宮、擇勝宮、連天樓、紅鸞殿、入霄殿、五花殿。亦名五華殿

東設吐霓餅曰玉華。西設七星雲板曰金華。南設火齊屏風曰珠華。北設百藥

龍脉曰木華。并中央木蓮花紫香琪座千鈞案九朶雲蓋爲五華。

大內又有迎涼之所曰清林閣。四面植喬松脩竹。南風徐來。林葉自鳴。遠勝絲

竹。旁立二亭。東名松聲。西名竹風。又有溫室曰春熙堂。以椒塗壁。被之文繡。香

桂爲柱。設烏骨屏風。鴻羽帳。規地以麝賓氍毹。

九引堂臺。七夕乞巧之所。至夕。宮女登臺。以五采絲穿九尾鍼。先完者爲得巧。

遲完者謂之輸巧。各出資以贈得巧者焉。

至大中。洪妃寵于後宮。七夕諸嬪妃不得登臺。臺上結綵爲樓。妃獨與宮官數

人升焉。剪綵散臺下。令宮嬪拾之。以色艷淡爲勝負。次日設宴大會。謂之鬥巧。

宴。負巧者罰一席。

刺繡亭。冬至則候日于此。亭邊有一線竿。竿下爲緝袞堂。至日命宮人把刺以

驗一線之功。

九龍墀。龍形九曲。金髻玉鱗。繞羅亭。植紅梅百株。延香亭。春時宮人各折花傳杯于此。拱壁亭亭六角。六壁旋拱。中置夜光珠一顆。晦夜燦若白晝。光燭數十步外。又名夜光亭。探芳徑。旁爲逍遙市。集賢堂。臺。徑除御道外。植垂梅海棠。指甲花。徑中十步起一亭。皆松栢竹樹爲之。苑中每一花開。携置亭下。以備觀玩。市上鋪陳九州四方珍異。揭錦爲招。又立庖人烹鮮飴香。以供倦游之飲。集賢臺。凡遠夷貢獻上古所遺器物。一皆貯之。又有眺遠閣。留連館。萬年宮。並在禁苑。又有龍泉井。礪礪石爲井牀。雨花臺。石爲井湫。香檀爲蓋。離朱錦爲索。雲母石爲汲餅。

宮中飲宴不常。名色亦異。碧桃盛開。舉杯相賞。名曰愛嬌之宴。紅梅初發。携尊對酌。名曰澆紅之宴。海棠謂之煖粧。瑞香謂之撥寒。牡丹謂之惜香。至于落花之飲。名爲戀春。催花之設。名爲奪秀。其或繪樓幔閣。清暑回陽。佩蘭採蓮。則隨其所事而名之也。

酒有翠濤飲。露囊飲。瓊華汁。玉團春。石涼春。葡萄春。鳳子腦。薔薇露。綠膏漿。酪有杏花酸。脆棗酸。潤腸酸。苦蘇漿。鹽有水晶鹽。蒼霜鹽。五色鹽。醬有蟻子醬。鵲頂醬。提蘇醬。油有蘇合油。片腦油。膻肭臍油。猛火油。得水愈熾后妃侍從。各有定制。后二百八十人。冠步光泥金帽。衣翻鴻獸袍。妃二百人。冠懸梁七曜巾。衣雲肩絳繪袍。嬪八十人。冠文縠巾。衣青絲縷金袍。並謂之控鸞昭儀。

熊嬪性耐寒。嘗于月夜遊梨花亭。露袒坐紫斑石。元帝見其身與梨花一色。因名其亭曰聯綺亭。

宮中制五雲車。車有五箱。以火樹爲檻式。烏稜爲輪轅。頂懸明珠。左張翠羽。蓋曳金鈴。結青錦爲重層。一作層雲覆頂。旁建青龍旗。列磨鏐雕銀戟五。右張白鳩緝毳蓋。曳玉鈴。左宜玉右爲金結素錦爲層雲覆頂。旁建白虎旗。列豹絨連珠槍五。前張紅猴毛氈。蓋曳木鈴。結赤錦爲重雲覆頂。前建朱雀旗。列線鋒火金戈五。後張黑兔團毫。蓋曳竹鈴。結墨錦爲層雲覆頂。後建玄武旗。列畫干五。中張雕羽曲

柄。蓋曳石鈴。結黃錦爲層雲覆頂。建勾陳旗。中箱爲帝座。外四箱爲妃嬪坐。每
晦夜遊幸苑中。御此以行。不用燈燭。

附陳剛中雲車夜遊詩云。金根雲蓋輅移玉。露花不墜瑤草綠。明珠照乘秋
月懸。天風吹下簫韶曲。萬年枝上清光滿。八鸞導引雙龍管。夜深如畫翠華
來。三十六宮碧雲煖。

已酉仲秋之夜。武宗與諸嬪妃泛月於禁苑太液池中。月色射波。池光映天。綠
荷含香。芳藻吐秀。游魚浮鳥。競戲群集。於是畫鷁中流。蓮舟夾持。舟上各設女
軍。居左者冠赤羽冠。服斑文甲。建鳳尾旗。執泥金畫戟。號曰鳳隊。居右者冠漆
朱帽。衣雪氍毹。建鶴翼旗。執瀝粉雕戈。號曰鶴團。又綵帛結成採菱採蓮之舟。
輕快便捷。往來如飛。當其月麗中天。彩雲四合。帝乃開宴張樂。薦蜻翅之脯。進
秋風之鱠。酌玄霜之酒。啗華月之糕。令宮女披羅曳縠。前爲八展舞。歌賀新涼
一曲。帝喜謂妃嬪曰。昔西王母宴穆天子于瑤池。人以爲古今莫有此樂也。朕
今與卿等際此月圓。共此佳會。液池之樂。不減瑤池也。惜無上元夫人在坐。不

得聞步立之聲耳。有駱妃者。素號能歌。趨出爲帝舞。月照臨而歌曰。五華兮如織。照臨兮一色。麗正兮中域。同樂兮萬國。歌畢。帝悅。其以月喻已。賜八寶盤玳瑁盞。諸妃各起賀。酒半酣。菱舟進鮮。紫角玉心之奇。山聳而至。蓮艇奉實。絳房金的之異。陵疊而來。由是下令。兩軍水擊爲戲。風旋雲轉。戟刺戈橫。戰旣畢。軍中樂作。唱龍歸洞之歌而還。

癸巳秋。順帝乘龍船泛月池上。池起浮橋三處。每處分三洞。洞上結綵爲飛樓。樓上置女樂。橋以木爲質。飾以錦繡。九洞不相直達。

附陳剛中太液秋風詩云。一鏡拭開秋萬頃。碧天倒浸琉璃影。寒飈夜捲雪波去。貝闕珠宮黛光冷。三千歌棹搖綠烟。濕鬟吹墮黃金蟬。琪樹颼颼紅鯉躍。袞龍正宴瑤池仙。

順帝宮嬪進御無紀。佩夫人貴妃印者不下百數。如淑妃龍瑞橋。程一寧。戈小娥。麗嬪張阿玄。支祁氏。才人英英。凝香兒。尤見寵愛。所好成之。所惡除之。位在皇后之下。而權則重于禁闈。宮中稱爲七貴云。

每遇上巳日。令諸嬪妃。被于內園迎祥亭。漾碧池。池用紋石爲質。以寶石鏤成。奇花繁葉。雜砌其間。上張紫雲九龍華蓋。四面幃幃。幃皆蜀錦爲之。跨池三匝。橋上結錦爲亭。中匾進鸞。左匾凝霞。右匾承霄。三匾鴈行相望。又設一橫橋。接平三亭之上。以通往來。被畢則宴飲于中。謂之爽心宴。池之旁一潭曰香泉潭。至此日。則積香水以注于池。池中又置溫玉狻猊白晶鹿紅石馬等物。嬪妃浴澡之餘。則騎以爲戲。或執蘭蕙。或擊球筑。謂之水上迎祥之樂。唯小娥體白而紅。著水如桃花含露。愈爭妍美。帝曰。此天桃女也。因呼爲賽桃夫人。寵愛有加焉。

麗嬪張阿玄。性號機敏。帝或視朝而退。卽與諸嬪嬉遊後宮。常曰。百歲光陰。等。于。馳。電。能。幾。何。哉。日。夜。爲。樂。猶。不。滿。十。萬。况。其。間。疾。病。相。侵。年。壽。難。必。如。白。雲。有。期。富。貴。皆。非。我。有。矣。何。爲。自。苦。以。虛。度。一。生。乎。於。是。長。歌。大。舞。自。暮。達。旦。號。曰。遣。光。諸。嬪。貴。妃。百。媚。其。前。以。求。容。悅。阿。玄。乃。私。製。一。崑崙。巾。上。起。三。層。中。有。樞。轉。玉。質。金。枝。紛。綵。爲。花。團。綴。于。四。面。又。製。爲。蜂。蝶。雜。處。其。中。行。則。三。層。磨。運。

百花自搖。蜂蝶欲飛。皆作鑽藥之狀。又置爲飛瓊流翠之袍。趨步之際。飄渺若月宮仙子。帝見之。指謂衆嬪曰。張嬪氣宇清越。服帝子雲霓之服。玄爲帝製繡絲絞布之裘。雪疊三山之履。以進御。帝服其裘。穿其履。冠春陽一線巾。巾乃方士所進。云是東海長生公所服。帝珍重之。作寶光樓以藏焉。至是始出服之。顧謂宮人曰。使朕服此。不食不饑。遨遊臺島間。得與金仙羽客爲侶。視棄天下如土塊耳。內豎梁行進曰。陛下冠服不異神仙。海池瓊島亦壺島之匹也。卽今迨遙百歲。猶足爲樂。何必遠有所慕哉。帝於是自稱玉宸館佩瓊花第一洞烟霞小仙。以玄爲太素仙妃。一寧爲太真仙妃。就於萬歲山築垣。狀如天台赤城。亦號紫霓城。建玉宸館。疊石爲瓊花洞以居焉。

淑妃龍瑞嬌貪而且妬。宮人少有不如意。笞撻至死。有不欲置之死地者。則百計千方。致其苦楚。以醋沃鼻。謂之酸刑。以穢塞口。謂之臭刑。夏則火圍。謂之蒸骨。冬則臥冰。謂之煉肋。不能酒者。強令之飲。多至十碗。是名醉鬼。削木埋地。相去二尺。高三尺。令女立上。又以一木拄其腰。兩手各持重物。不得失墜。名曰懸。

心之刑。凡此類者甚多。帝嘗賞賜金帛。比他妃有加。麒麟鸞鳳白兔靈芝雙角五爪龍萬壽福壽字頽黃等段。以巨萬數。嬌乃開市于左掖門內。發賣諸色錦段。如有買者。仍給一帖。令不相禁。宦官牛大輔掌之。由是京師官族富民及四方商賈爭相來買。其價增倍。歲得銀數萬。時呼爲繡市。又號麗色多春之市。凝香兒。本部下官妓也。以才藝選入宮。遂充才人。善鼓瑟。曉音律。能爲翻冠飛履之舞。舞間冠履皆翻覆飛空。尋如故。少頃復飛一舞。中屢飛屢復。雖百試不差。帝嘗中秋夜泛舟禁池。香兒着瑣里綠蒙之衫。瑣里夷名產撒哈刺蒙茸如氈。但輕薄耳。宜于秋時着之。有紅綠二色。至元間進貢。帝又命工以金籠之。粧出鸞鳳之形。製爲十大衫。香兒得一焉。至此服之。又服玉河花藥之裳。于闐國烏王河生花藥草。採其藥織之爲錦。香兒以小艇蕩漾于波中。舞婆娑之隊。歌弄月之曲。其詞云。蒙衫兮藥裳。瑤環兮瓊璫。泛予舟兮芳渚。擊予楫兮徜徉。明皎皎兮水如鏡。弄蟾光兮捉娥影。露團團兮氣清。風颼颼兮力勁。月一輪兮高且圓。華綵發兮鮮復妍。願萬古兮每如此。予同樂兮終年。帝復置酒于天香

亭爲賞月飲。香兒復易服趨亭前。衣絳繪方袖之衣。帶雲肩迎風之組。執千昂鸞縮鶴而舞。乃歌曰。天風吹兮桂子香。來閭闔兮下廣寒。塵不揚兮玉宇淨。萬籟泯兮金堦涼。玄漿兮進酒。鬼霜兮爲脩。舞亂兮歌狂。君飲兮一斗。雞鳴沈兮夜未央。樂有餘兮過霓裳。吾君吾王兮壽萬歲。得與秋香月色兮酬酢乎樽觴。歌畢。帝笑曰。昔唐明皇遊月宮。見女娥數十着素衣歌舞于樹下。朕今酌醪靈酒。對才人歌香桂長秋曲。可謂絳繪娥唱小搖金調者矣。邀香風于屏圍。呼華月以入座。衆嘩俱寂。綠竹交奏。人間之樂。當不減天上。京城北三十里有玉泉山。山半爲呂公巖。帝于夏月嘗避暑于北山之下。曰西湖者。其中多荷蒲菱芡。帝以文梓爲舟。伽南爲楫。刻飛鸞翔鶴旂于船首。隨風輕漾。又作採菱小船。縛綵爲棚。木蘭爲漿。命宮娥乘之以採菱爲水戲。時香兒亦在焉。帝命製採菱曲。使篙人歌之。遂歌水面剪青之調。曰。伽南楫兮文梓舟。泛波光兮遠夷猶。波搖搖兮舟不定。揚予袂兮金風競。棹歌起兮纖手揮。青角脫兮水滌洞。歸去來兮。樂更誰。篙人歌之。聲滿湖上。天色微曛。山銜落日。帝乃周遊荷間。取荷之葉。或

以爲衣。或以爲蓋。四顧自得。畢竟忘歸。又命作採蓮之曲。于是調折新荷而歌曰。放漁舟兮湖之濱。剪荷柄兮折荷英。鴛鴦飛兮翡翠驚。張蓮葉以爲蓋兮。緝藕絲以爲衿。雲光淡。微烟生。對芳華兮樂難極。返予棹兮山月明。

程一寧未得幸時。嘗于春夜登翠鸞樓。倚闌弄玉龍之笛。吹一詞云。蘭徑香銷。玉輦踪。梨花不忍負春風。綠窻深鎖。無人見。自碾朱砂。養守宮。帝忽于日下聞之。問宮人曰。此何人吹也。有知者對曰。程才人所吹。帝雖知之。未召也。及後夜。帝復遊此。又聞歌一詞曰。牙牀錦被繡芙蓉。金鴨香銷寶帳重。竹葉羊車來別院。何人空聽景陽鐘。又繼一詞曰。淡月輕寒透碧紗。窻屏睡夢聽啼鴉。春風不管愁深淺。日日開門掃落花。又吹惜春詞一曲曰。春光欲去疾如梭。冷落長門苔蘚多。懶上粧臺脂蓋蠹。承恩難比雪兒歌。歌中音語咽塞。情極悲愴。帝因謂宮人曰。聞之使人能不悽愴。深宮中有人愁恨如此。誰得而知。蓋不遇者亦衆矣。遂乘金根車至其所。寧見龍炬簇擁。遂趨出叩頭俯伏。帝親以手扶之曰。卿非玉笛中自道其意。朕安得至此。憂懷中遣況無地。是以來接其思耳。携手至

栢香堂。命寶光天祿厨。設開顏宴進。兔絲之膳。翠濤之酒。雲仙樂部。坊奏鴻韶樂。列朱戚之舞。鳴雎之曲。笑謂寧曰。今夕之夕。情圓氣聚。然玉笛卿之三青也。可封爲圓聚侯。自是寵愛日隆。改樓爲奉御樓。堂爲天怡堂。

帝爲英英起采芳館于瓊華島內。設唐人滿花之席。重樓金線之衾。浮香細鱗之帳。六角雕羽之屏。唐人高麗島名。產滿花草。性柔。折屈不損。光澤可佳。土人編之爲席。重樓金線花名也。出長白山。花心抽絲如金。長至四五尺。每尺寸縛結如樓形。山人取以織之成幅。大德間。尾灑夷於清源洞。得一物如龍皮。薄可相照。鱗鱗攢簇。玉色可愛。又間成花卉之形。或紅或綠。暑月對之。涼意自生。遣人進貢。時無識者。有一胡僧言曰。此斑花玉虬殼也。

帝在位久。怠於政事。荒於游宴。以宮女一十六人按舞。名爲天魔舞。首垂髮數辨。戴象牙冠。身披纓絡大紅銷金長裙襖。各執加巴刺般之器。又宮女十一人。練槌髻勒帕。常服或用唐巾窄衫。所奏樂用龍笛頭管小鼓箏簫琵琶笙胡琴響板。每宮中讚佛。則按舞奏樂。帝又於內院造龍船。首尾長一百二十尺。廣二

十尺。上有五殿。龍身并殿宇俱五采金裝。日於後宮海子內遊戲。船行則龍首尾眼爪皆動。又自製宮漏。約高六七尺。爲木櫃。藏壺其中。運水上下。櫃上設四方三聖殿。櫃腰設玉女捧時刻籌。時至。輒浮水而上。左右列二金甲神人。一懸鐘。一懸鈺。夜則神人自能按更而擊。

卷三

三

集

焚椒錄序

鼎於咸太之際方侍禁近會有懿德皇后之變一時南北面官悉以異說赴權互爲證足遂使懿德蒙被淫醜不可湔浣嗟嗟大黑蔽天白日不照其能尸說以相白乎鼎婦乳嫗之女蒙哥爲律耶乙辛寵婢知其奸搆最詳而蕭司徒復爲鼎道其始末更有加于嫗者因相與執手歎其冤誣至爲涕淫淫下也觀變已來忽復數載頃以待罪可敦城去鄉數千里視日如歲觸景興懷舊感來集乃直書其事用埃後之良史若夫少海翻波變爲險陸則有司徒公之實錄在大安五年春三月前觀書殿學士臣王鼎謹序

焚椒錄

遼 王鼎

懿德皇后蕭氏爲北面官南院樞密使惠之少女。母耶律氏夢月墜懷已復東升。光輝照爛。不可仰視。漸升中天。忽爲天狗所食。驚寤而后生。時重熙九年五月己未也。母以語惠。惠曰。此女必大貴而不得令終。且五日生女。古人所忌。命已定矣。將復奈何。后幼能誦詩。旁及經子。及長姿容端麗。爲蕭氏稱首。皆以觀音目之。因小字觀音。二十二年。今上在青宮。進封燕趙國王。慕后賢淑。聘納爲妃。后婉順善承上意。復能歌詩。而彈箏琵琶尤爲當時第一。由是愛幸。遂傾後宮。及上卽位。以清寧元年十二月戊子冊爲皇后。后方出閣。升坐扇開簾捲。忽有白練一段。自空吹至。后褥位前上有三十六三字。后問此何也。左右曰。此天書命可敦領三十六宮也。后大喜。宮中爲語曰。孤穩壓帕女。古韉菩薩喚作耨幹麼。蓋言以玉飾首。以金飾足。以觀音作皇后也。二年八月。上獵秋山。后率妃嬪從行。在所至伏虎林。上命后賦詩。后應聲曰。威風萬里壓南邦。東去能翻鴨

綠江。靈怪大千都破膽。那教猛虎不投降。上大喜。出示羣臣曰。皇后可謂女中才子。次日上親御弓矢射獵。有虎突林而出。上曰。朕射得此虎。可謂不媿后詩。一發而殪。羣臣皆呼萬歲。是歲十一月。羣臣上皇帝尊號曰。天祐皇帝。后曰。懿德皇后。三年秋。上作君臣同志華夏同風詩。后應制屬和曰。虞廷開盛軌。王會合奇琛。到處承天意。皆同捧日心。文章通鹿蠡。聲教薄雞林。大宇看交泰。應知無古今。明年后生皇子濬。皇太叔重元妃入賀。每顧影自矜。流目送媚。后語之曰。貴家婦宜以莊臨下。何必如此。妃銜之。歸罵重元曰。汝是聖宗兒。豈虎斯不若。使教坊奴得以可敦加吾。汝若有功。當除此帳。答撻此婢。于是重元父子合定叛謀。于九年七月。駕幸灤水。聚兵作逆。須臾軍潰。父子伏誅。而討平此亂。則知北樞密院事趙王耶律乙辛與有功焉。尋進南院樞密使。威權震灼。傾動一時。惟后家不肯相下。乙辛每爲怏怏。及咸雍初。皇子濬冊爲皇太子。益復蓄奸爲圖后計矣。后常慕唐徐賢妃行事。每于當御之夕。進諫得失。國俗君臣尙獵。故有四時捺鉢。上旣擅聖藻而尤長弓馬。往往以國服先驅。所乘馬號飛電。瞬

息百里。常馳入深林。遂谷扈。從求之不得。后患之。乃上疏諫曰。妾聞穆王遠駕。周德用衰。太康伏豫。夏社幾危。此游佃之往戒。帝王之龜鑑也。頃見駕幸秋山。不閑六御。特以單騎從禽。深入不測。此雖威神所屆。萬靈自爲擁護。倘有絕羣之獸。果如東方所言。則溝中之豕。必敗簡子之駕矣。妾雖愚闇。竊爲社稷憂之。惟陛下尊老氏馳騁之戒。用漢文吉行之旨。不以其言爲牝雞之晨。而納之上。雖嘉納。心頗厭遠。故咸雍之末。遂稀幸御。后因作詞曰。回心院。被之管絃。以寓望幸之意也。埽深殿。閉久金鋪暗。游絲絡網塵。作堆積。歲青苔厚。堦面埽深殿。待君宴。拂象牀。憑夢借高唐。敲壤半邊知。妾臥恰當天。處少輝光。拂象牀。待君王。換香枕。一半無雲錦。爲是秋來轉展多。更有雙雙淚痕。滲換香枕。待君寢。鋪翠被。羞殺鴛鴦對。猶憶當時叫合歡。而今獨覆相思塊。鋪翠被。待君睡。裝繡帳。金鈎未敢上。解却四角夜光珠。不教照見愁模樣。裝繡帳。待君眠。疊錦茵。重重空自陳。只願身當白玉體。不願伊當薄命人。疊錦茵。待君臨。展瑤席。花笑三韓碧笑妾。新鋪玉一牀。從來婦懽不終夕。展瑤席。待君息。剔銀燈。須知一樣明。偏

是君來生彩暈。對妾故作青熒熒。剔銀燈。待君行。爇熏爐。能將孤悶蘇。若道妾身多穢賤。自沾御香香徹膚。爇熏爐。待君娛。張鳴箏。恰恰語嬌鶯。一從彈作房中曲。常和窻前風雨聲。張鳴箏。待君聽。時諸伶無能奏演此曲者。獨伶官趙惟一能之。而宮婢單登故重元家婢。亦善箏及琵琶。每與惟一爭能。怨后不知已。后乃召登與對彈。四旦二十八調。皆不及后彈。媿恥拜服。于時上常召登彈箏。后諫曰。此叛家婢。女中獨無豫讓乎。安得輕近御前。因遣直外別院。登深怨嫉之。而登妹清子嫁爲教坊朱頂鶴妻。方爲耶律乙辛所睚。登每向清子誣后與惟一淫通。乙辛具知之。欲乘此害后。以爲不足證實。更命他人作十香淫詞。用爲誣案云。青絲七尺長。挽出內家裝。不知眠枕上。倍覺綠雲香。紅銷一幅強。輕闌白玉光。試開胸探取。尤比顛酥香。芙蓉失新艷。蓮花落故妝。兩般總甚比。可似粉腮香。蟾蜍那足並。長須學鳳凰。昨宵歡臂上。應惹領邊香。和羹好滋味。送語出宮商。定知郎口內。含有煖甘香。非關兼酒氣。不是口脂芳。却疑花解語。風送過來香。既摘上林蕊。還親御苑桑。歸來便携手。纖纖春筍香。鳳韉拋合縫。羅

襪卸輕霜。誰將煖白玉。雕出軟鈎香。解帶色已戰。觸手心愈忙。那識羅裙內。消魂別有香。咳唾千花釀。肌膚百和裝。元非噉沉水。生得滿身香。乙辛陰屬清子。使登乞后手書。登時雖外直。常得見后。后善書。登給后曰。此宋國忒里蹇所作。更得御書。便稱二絕。后讀而喜之。卽爲手書一紙。紙尾復書已所作懷古詩一絕云。宮中只數趙家妝。敗雨殘雲悞漢王。惟有知情一片月。曾窺飛鳥入昭陽。登得后手書。特出與清子云。老婢淫案已得。況可汗性忌。早晚見其白練挂粉脰也。乙辛已得書。遂構詞命登與朱頂鶴赴北院陳首伶官趙惟一私侍懿德皇后。有十香淫詞爲證。乙辛乃密奏上曰。太康元年十月二十三日。據外直別院宮婢單登及教坊朱頂鶴陳首本坊伶官趙惟一。向要結本坊入內承直高長命。以彈箏琵琶得召入內。沐上恩寵。乃輒干冒禁典。謀侍懿德皇后御前。忽於咸雍六年九月。駕幸木葉山。惟一公稱有懿德皇后旨。召入彈箏。于時皇后以御製回心院曲十首付惟一入調。自辰至酉調成。皇后向簾下目之。遂隔簾與惟一對彈。及昏命燭。傳命惟一。去官服。着綠巾金抹額窄袖紫羅衫珠帶烏

韓皇后亦着紫金百鳳衫。杏黃金縷裙。上戴百寶花髻。下穿紅鳳花鞋。召惟一更入內帳。對彈琵琶。命酒對飲。或飲或彈。至院鼓三下。敕內侍出帳。登時當直帳。不復聞帳內彈飲。但聞笑聲。登亦心動。密從帳外聽之。聞后言曰。可封有用郎君。惟一低聲言曰。奴具雖健小蛇耳。自不敵可汗。真龍后曰。小猛蛇却賽真懶龍。此後但聞惺惺若小兒夢中啼而已。院鼓四下。后喚登揭帳曰。惟一醉不起。可爲我喚醒。登叫惟一。一通始爲醒狀。乃起拜辭。后賜金帛一篋。謝恩而出。其後駕還。雖時召見。不敢入帳。后深懷思。因作十香詞。賜惟一。惟一持出誇示同官朱頂鶴。朱頂鶴遂手奪其詞。使婦清子問。登懼事發。連坐。乘暇泣諫。后怒痛答。遂斥外直。但朱頂鶴與登共悉此事。使含忍不言。一朝敗壞。安免株坐。故敢首陳。乞爲轉奏。以正刑誅。臣惟皇帝以至德統天。化及無外。寡妻匹婦。莫不刑于今宮。帳深密。忽有異言。其有關治化。良非渺小。故不忍隱諱。輒據詞并手書十香詞一紙。密奏以聞。上覽奏大怒。卽召后對詰。后痛哭轉辨曰。妾託體國家。已造婦人之極。況誕育儲貳。近且生孫。兒女滿前。何忍更作淫奔失行之

人乎。上出十香詞曰。此非汝作手書。更復何辭。后曰。此宋國忒里塞所作。妾卽從單登得而書賜之耳。且國家無親蠶事。妾作那得有親桑語。上曰。詩正不妨以無爲有。如詞中合縫。韓亦非汝所着。爲宋國服邪。上怒甚。因以鐵骨朶擊后。后幾至殞。卽下其事。使參知政事張孝傑與乙辛窮治之。乙辛乃繫械惟一長命等訊鞫。加以釘灼盪錯等刑。皆爲誣服。獄成。將奏樞密副使蕭惟信馳語乙辛。孝傑曰。懿德賢明端重。化行宮帳。且誕育儲君。爲國大本。此天下母也。而可以叛家仇婢一語動搖之乎。公等身爲大臣。方當燭照奸宄。洗雪冤誣。烹滅此輩。以報國家。以正國體。奈何欣然以爲得其情也。公等幸更爲思之不聽。遂具獄上之。上猶未決。指後懷古一詩曰。此是皇后罵飛燕也。如何更作十詞。孝傑進曰。此正皇后懷趙惟一耳。上曰。何以見之。孝傑曰。宮中只數趙家妝。惟有知情一片月。是以二句中包含趙惟一三字也。上意遂決。卽日族誅惟一。併斬長命。敕后自盡。時皇太子及齊國諸宮主咸被髮流涕。乞代母死。上曰。朕親臨天下。臣妾億兆而不能防閑一婦。更何施眉目。覩然南面乎。后乞更面可汗一言。

而死。不許。后乃望帝所而拜。作絕命詞曰。嗟薄祐兮多幸。羌作麗兮皇家。承昊穹兮下覆。近日月兮分華。托後鈞兮凝位。忽前星兮啟耀。雖鸞壘兮黃牀。庶無罪兮宗廟。欲貫魚兮上進。乘陽德兮天飛。豈禍生兮無朕。蒙穢惡兮宮闈。將剖心兮自陳。冀廻照兮白日。寧庶女兮多漸。遏飛霜兮下擊。顧子女兮哀頓。對左右兮摧傷。共西曜兮將墜。忽吾去兮椒房。呼天地兮參悻。恨今古兮安極。知吾生兮必死。又焉愛兮旦夕。遂閉宮以白練。自經上怒猶未解。命裸后屍。以葦席裹還其家。春秋三十有六。正符白練之語。聞者莫不冤之。皇太子投地大叫曰。殺吾母者。耶律乙辛也。他日不門誅此賊。不爲人子。乙辛遂謀害太子。無虛日矣。嗟嗟。自古國家之禍。未嘗不起于纖纖也。鼎觀懿德之變。固皆成于乙辛。然其始也。由于伶官得入宮帳。其次則叛家之婢使得近左右。此禍之所由生也。第乙辛凶慘無匹。固無論。而孝傑以儒業起家。必明于大義者。使如惟信直言。毅然諍之后。必不死。后不死。則太子可保無恙。而上亦何慚于少恩骨肉哉。乃亦昧心同聲。自保祿位。卒使母后儲君。與諸老成。一旦皆死于非辜。此史冊所

書未有之禍也。二人者可謂罪通于天者乎。然懿德所以取禍者有三。曰好音樂與能詩善書耳。假令不作回心院。則十香詞安得誣出后手乎。至于懷古一詩。則天實爲之。而月食飛練。先命之矣。

余讀焚椒錄。乃知元人修史之謬也。卽如宣懿皇后諫道宗。單騎馳獵。僅百二十餘言。其辭意並到有宋人所不及者。其他若陰屬單登索后書及證懷古詩於帝前。此乙辛孝傑罪案也。可削而不載乎。一書去取如此。其他挂漏可知矣。惟此錄言皇后生於五月五日。而道宗本紀稱坤寧節在十二月。又云重元父子伏誅。則重元走出大漠自殺耳。豈別有所據邪。至於錄中所載詩詞。雖淫靡不足道。如解却四角夜光珠。不教照見愁模樣。只願身當白玉體。不願伊當薄命人。偏是君來生彩暈。對妾故作青熒熒。若道妾身多穢賤。自沾御香香徹膚。此等皆有唐人遺意。恐有宋英神之際。諸大家無此四對也。併識於此。以埃博雅君子西園歸老題。

予得焚椒錄讀之。何譏人罔極哉。害天倫一至於此。亦宇宙一大變也。然與漢

武前後一轍惟道宗因妻以及其子漢武因子以及其妻而兩孫亦皆嗣位第天祚不敢望孝宣耳荀卿氏曰雖有親父安知其不爲虎子于此錄而益信矣吳寬記

此錄有西園歸老跋不知爲誰當是國初儒舊其品鑒亦當但謂坤寧節在十二月則彼不詳考清寧八年十二月行道宗母仁懿皇太后再生禮耳且曆象朔日考重熙九年五月乙卯朔則五日正己未也至若后疏以絕羣之獸爲東方朔所言此乃后誤以相如爲東方也不可不一正之更按王鼎傳云清寧五年擢進士第乃八年放進士王鼎等則五年爲誤矣不然豈有兩王鼎邪又按鼎作此錄在謫居鎮州時時乙辛已囚萊州孝傑亦死故敢實錄其事但天祚時鼎尙在如懿德皇后第二女趙國公主以匡救天祚竟誅乙辛及乙辛孝傑剖棺戮屍以家屬分賜羣臣事並不補錄一快觀者亦此錄一不了公案也海鹽姚十舜叔祥跋

南北面官遼制北面治宮帳南面治漢人耶律遼始興地曰世里譯曰耶律因爲國姓 蕭氏述律皇后兄子名蕭翰后族因以爲姓可敦突厥皇后之稱孤穩玉也 女古金也 耨韓后土也廢母也 虎斯有力也 四時捺鉢謂四時畋漁行在所也 四日二十八調遼大樂也 忒里蹇皇后也 有用耶君遼有著帳郎君皇太后等帳皆有蓋宦官也 宮帳遼宮中亦有帳房 遼后服有雙同心帕絡合縫鞞 鐵骨朶遼刑具名鐵骨朶之數擊之或五或七也秀水殷仲春方

美人判

長洲尤 侗悔菴著

呂雉殺戚夫人判

悍如飛燕。班姬自老秋風。驕若玉環。梅女猶來西閣。非無獅吼。未聞剗剔蛾眉。豈有龍縈。遂見招搖狐尾。今按呂雉。本非艷色。但作淫威。莽項羽於軍中。貽羞子女。薦辟陽于帳下。孰辨君臣。幽少帝而鳩趙王。乃楚舞何辜。痛隨瓜摘。斬淮陰而醢彭越。乃春歌豈反。慘甚弓藏。牝鷄母晨。況野鷄而鼓翼。狗彘不食。忍人彘之驚心。非人所爲。託天與直。合依居廁之例。并加入饗之科。幸免若翁鼎烹。且令此軀骨醉。

曹丕殺甄后判

賦買長門。漢帝還憐金屋。歌連總帳。阿瞞尙戀銅臺。后妃夕月之儀。忍同棄婦。神女朝雲之貌。日令游仙。今按曹丕。秀亦文人。佻仍公子。芙蓉池上。苦憶彈棋。水晶屏前。輕捐綉枕。若言選色。則華茂春松。榮曜秋菊。豈隨瓊樹靈芸。果解憐

才則詩稱塘上。琴操流泉。甯讓仲宣公幹。況明珠翠羽。洛川猶夢靈妃。乃瑤碧羅衣。永巷竟因博士。雖袁家新婦。不宜再奉五官。而武帝舊人。何得重陪九御。眞成薄倖。亦覺厚顏。曹丕降爲庶人。甄氏却歸子建。

孫秀殺綠珠判

北山羅鳥。庶人不樂宋王。南陌采桑。使君豈恨秦女。打鴛鴦于綉帳。歌舞何仇。殲蛾翠于粧樓。裙釵非罪。今按孫秀雄豪。非分勢力。橫干目眈火樹沙棠。心妬釵聲玉色。本無三斗酒。反疾才人。豈有十斛珠。輒求麗女。匹婦不可奪志。小人難與作緣。哀此紅顏。歸同白首。喪嬋娟于稚齒。千古傷心。灰狙獐之淫思。一時快事。阮遙集之乞宋偉。遺韻猶憐。武延嗣之借竊娘。效尤抑甚。彼既一家同死。此亦二豎駢誅。

韓擒虎殺張麗華判

吳宮西子。尙逐鴟夷。魏國薄姬。還輸織室。雖君王氣盡。已知賤妾無聊生。然兒女情長。應念佳人難再得。今按韓擒虎張威跋扈。流毒嬋娟。裂翠管以揚灰。剖

紅粧而喋血。縛天子于智井。剗斷塵香。刃嫦娥于桂宮。吞殘壁月。誰無傾國。獨欲甘心。既有撫軍。不思稟命。況輕狂狎客。且釋檻車。豈竊窈才人。反勞齒劍。生爲上柱國。不近人情。死作閻羅王。難逃自孽。姑援議功之典。薄從朴敎之刑。木以囊頭。鞭之見血。

陳元禮殺楊貴妃判

雪膚花貌。爭看被底鴛鴦。國色天香。獨對亭前芍藥。金釵鈿合。自應冠此三千。霓裳羽衣。猶當宥之十世。今按陳元禮。忠非兵諫。亂已臣將。徒驅疲散之軍。豈解風流之陣。冰山亡狀。宜從盤水之誅。玉腕非妖。忍委繡衾之覆。香囊錦襪。空棄馬嵬。翠髻黃裙。并埋鸚塚。豈爲天子。不能庇一佳人。何物將軍。遂敢加于貴后。上皇垂淚。愁聞淋雨之聲。方士游魂。感話渡河之事。應誅首惡。以警六軍。比謀逆者次之。依威逼者加等。

李益殺霍小玉判

千金買笑。白頭吟尙爾悲啼。十斛易妻。黑心符可爲鑒戒。苟得新而棄故。下堂

之怨爲何。况背死而貪生。抱柱之誠安在。今按李益有才無行。寡信多疑。不思海誓山盟。遂忍雲翻雨覆。烏絲欄依然在篋。侍婢傷心。紫玉釵落去誰家。工人流涕。舉杯擲地。一座歔歔。引帶倚帷。九泉感歎。我爲女子。薄命如斯。君是丈夫。負心若此。片言可折其獄。百身莫贖其辜。斑犀合少許驢駒。不過遊戲。黃衫客豈無匕首。未免糊塗。亟當撲殺此獠。庶足下謝彼美。

附錄判詞三則

俞生出妻判

浙江金華府武義縣薛絅齋太令。以名進士。現宰官身。愛民勤政。頌聲載道。近因俞生員細故出妻。妻母張氏投縣呈控。當由薛大令傳至內署。分別開導。夫婦均爲之泣下。大令備輿送婦返。俞重敦琴瑟。一時傳爲佳話。茲將判詞照錄于左。

照得風首關雎。夫婦乃人倫之始。禮詳奠雁。婚姻爲王化之原。良緣旣結。衿襮靜好。宜諧琴瑟。又况近居同里。本珂鄉修桑梓之恭。均屬清門。非玉樹詭蒹葭。

之倚。豈可囂陵反目。不思黽勉同心。茲查某秀才身列膠庠。誼諸名教。卽勃谿偶形諸姑婦。宜調停曲盡于家庭。胡爲忽振雄風。遽爾忍傾覆水。夫順親誠爲孝。冒不韙則其孝近愚。宜室主于和。交相謫則不和成懟。一紙之休書輕遞。萬人之清議難逃。至如某某氏者。慈庇萱闈。夙恃掌珠之溺愛。幼凋椿蔭。莫懸心鑑以相攸。保無性習嬌憨。偶或儀愆淑慎。豈甫作三旬新婦。卽遽干七出明條。乃微嫌等挾積嫌。致嘉耦頓成怨耦。方占反馬。忽訝離鸞。憤剪香雲。惜截髮非留賓之譽。誓深皎日。甘傷心作棄婦之吟。夫也不良。我將安適。羌復五張六角。繫鈴人不善解鈴。空勞萬語千言。破鏡後倩誰圓鏡。大好鴛鴦。一朝折翼。互爭雀鼠。兩造成仇。斯誠風化攸關。宜令因緣復合。玉女成俦。式相好。金夫見豈不有躬。公庭三尺。仗聯撮合之山。恨字十行。投爇無明之燄。在夫母某某氏盡捐嫌隙。啼三更月冷。再休愁姑惡聞聲。而妻母某某氏深感圓全。羨兩袖芹香。本雅願壻鄉修好。平情母爲己甚。晚蓋可滌前愆。曲諒曠夫怨女之癡情。仍完佳婦慈嫜之樂事。代修鴛牒。飭備魚軒。轟動闔城。紅鸞星爭看重照。迎來內署。青

鳥使令導雙歸。此時案結琴堂。藉戢爾兩家訟喙。他日筵開湯餅。方感余一片婆心。有厚望焉。其各凜之。此判。

張月蘭從良判

蜃樓海市。同命鳥每惜分飛。酒地花天。可憐虫如何結果。墮風流之孽障。結露水之情魔。解語花所以傷心。隨風絮未可同論也。如張月蘭者。七年落泊。非趙璧之能完。百折不回。比精金之入鍊。獨舒慧眼。自作良媒。之死靡他。臥元龍于百尺樓上。有生不貳。刺文鴛于七襄錦中。詎意搗金未饜。錢樹子不肯讓人。于是羯鼓頻槌。英公堂因而對簿。謂他人母。不知身所自來。順我者生。豈竟志爲伊奪。乞發堂而待字。望好月之能圓。物色前度劉郎。却似重來崔護。桃花人面。居然璧合珠聯。紅葉詩情。還藉硃符墨牒。點翻鴛譜。喜嘉耦之天成。懲彼狼貪。載輕車而風駛。看此去宜家宜室。青蓮花拔出火坑。爾當知用經用權。黑心符難逃法網。

林仲和調戲女子判

廣州省城有林仲和者。世家子也。家頗小康。年華二九。蕩檢踰閑。與瞽姬福意後改名六妹者。有嚙臂盟。出番佛五百尊。爲之贖身而藏金屋。詎福意無意于彼。攜資轉適他人。林自是頓失常性。遂成癡狂。某日在城隍廟前見一自由裝女子。遽行調戲。該女子大聲疾呼。仲和爲巡士拘局。轉解警署。經某委員訊明情節。判語傳誦一時。

訊得林仲和者。家本業儒。幼而失怙。世居鄂渚。豈號楚狂。籍寄珠江。最多蠻妓。其初有瞽姬某作夜度之娘。唱懊儂之曲。花雖鮮而着霧。柳以暗而成陰。銀海光沉。已涸剪瞳之水。鮫人臭逐。竟成嚙臂之盟。可憐五百纏頭。去隨黃鶴。縱覓三千弱水。信杳青鸞。羅敷別自有夫。伶楚難爲其婦。携琴別抱。斷縷難牽。曲似文姬。塞北之金莫贖。狂非杜牧。揚州之夢難醒。遂致癡狂。隨柳絮之風。輕薄逐桃花之浪。章台走馬。易鈎蕩子以銷魂。藥店飛龍。難療相思之病骨。路逢鄭旦。旁人每致風魔。家有摩敦。少子倍多憐愛。蓋其母以癡狂送于醫院者。已有年矣。適有女學界者。額髮覆簷。蠻鞋曳步。以壓線抽針之暇。晷讀駒盧羅馬之新

詞。彼何人斯。遽集于此。遊蜂無賴。浪尋書帶之香。野馬歸來。飛集女貞之樹。溫太真欲求下鏡。其如素乏葭苕。登徒子謬託窺隣。不過居同里巷。詩咏在城。佻達以刺狂。且傳稱行路扞格。以懲淫者。呼覈循之卒。占黴墨之爻。伊戚自貽。何詞以解。林劉氏失東海母儀之訓。怒藍田醉尉之呵。惡聞肆諸市廛。長舌嗾于堂上。何耶。惟念林仲和。竅掩慧珠。非有生之真性。波生慾海。實受病之原因。除函送醫院調治外。當爲諭知母氏。速爲另締良婚。或者調攝有方。防閑自守。既足保個人之壽命。亦免擾地方之治安。一面諭知林仲和。以生從官族。當讀父書。寡慾所以清心。悔過必期改行。莫鑽牆隙。致玷門楣。他日女界相逢。須如神聖。不可侵犯。我國歐風未徧。莫言男女盡可自由。庶于正俗衛生。兩有裨益。是。否有當。伏候憲示施行。

清閒供

歙縣程羽文蓋臣著

刺約六

一曰癖。典衣沽酒。破產營書。吟髮生歧。嘔心出血。神仙煙火。不斤斤。鶴子梅妻。泉石膏肓。亦頗頗。竹君石丈。病可原也。二曰狂。道旁荷鍾。市上縣壺。烏帽泥塗。黃金糞壤。筆落而風雨驚。嘯長而天地窄。病可原也。三曰癩。蓬頭對客。跣足爲賓。坐四座而無言。睡三竿而未起。行或曳杖。居必閉門。病可原也。四曰癡。春去詩惜。秋來賦悲。聞解佩而踟躕。聽墮釵而恹恍。粉殘脂剩。盡招青塚之魂。色豔香嬌。願結藍橋之眷。病可原也。五曰拙。學拙妖嬈。才工輓欸。志惟古對。意不俗諧。飢煑字而難糜。田耕硯而無稼。螢身脫腐。醯氣猶酸。病可原也。六曰傲。高懸孺子半榻。獨臥元龍一樓。鬢雖垂青。眼多泛白。偏持腰骨相抗。不爲面皮作緣。病可原也。

小蓬萊

蓬萊爲仙子都居。限以弱水者。蓋隔謝其囂塵濁土之風。然心遠地偏。卽塵土亦自有迥絕之場。正不必侈口白雲鄉也。

門內有徑。徑欲曲。徑轉有屏。屏欲小。屏進有階。階欲平。階畔有花。花欲鮮。花外有牆。牆欲低。牆內有松。松欲古。松底有石。石欲怪。石面有亭。亭欲朴。亭後有竹。竹欲疎。竹盡有室。室欲幽。室旁有路。路欲分。路合有橋。橋欲危。橋邊有樹。樹欲高。樹陰有草。草欲青。草上有渠。渠欲細。渠引有泉。泉欲瀑。泉去有山。山欲深山。下有屋。屋欲方。屋角有圃。圃欲寬。圃中有鶴。鶴欲舞。鶴報有客。客欲不俗。客至有酒。酒欲不却。酒行有醉。醉欲不歸。

天然具

砍栢成門。牽蘿就幕。山家真率。多自有天種天然具也。

榆莢錢

柳線

菱荷衣

秧針

竹粉

蓮房

桐葉箋

蕉扇

松拂

荷珠

苔茵

蘿薛帶

蘭佩

碧筒

蒲劍

柏子香

瘦瓢

眞率漏

柝鳴永巷。角奏邊徼。擊熱敲寒。總不入高人之夢。惟是一頃白雲。橫當衾枕。數聲天籟。代我麗譙云耳。

蛙鼓

子規啼

竹笑

鐵馬驟簷

砧杵擣衣

蛩啾唧

鶴警露

松濤

雞唱

石榴

雁過

犬聲如豹

烏鵲驚枝

莎雞振羽

鐘遠度

魚躍浪

蚓笛

鳥言

春日不第喚逸情。驚幽夢。對此正勝與俗人言也。

姑惡

鈎輈格磔

提壺蘆

脫布袴

不如歸去

行不得也哥哥

雲韶部

鳳凰不如我

得過且過

布穀

泥滑滑

都護從事

婆餅煎

莫損花

棋能避世

湯武征誅一局棋。波波劫劫。究竟何在。不如借此一枰。剝啄聲寒。聊消永晝。

也。

坐隱

橘中樂

爛柯

手談

勝固欣然敗亦可喜

賭墅

姑婦夜局

徵餅餌牛酒

妄悲

河圖數

讓老夫一着

握中一子

說法

木野狐

仙奕山

蛻龍牙

竹下

十二卜

閉目應著出人意表

釀王考績

酒德有頌。酒功有讚。緊爾釀王。空沈湎乎哉。漫爾條列數事。乃知麴生故自奇也。

斷送一生

中聖

掃愁帚

澆書

上頰

破除萬事

歡伯

釣詩鈞

輓飽

擒奸

輔邪

百藥長

著地勝

睡鄉供職

睡鄉安恬無天札疵癘。高行之士。分封而處。未許忙人供職也。

化蝶

腹便便

曲肱

南柯郡

象耳山

邯鄲道

黑甜

遊仙枕

北牕

白雲堆

一局

混沌譜

攤飯

兩腳棋盤

麴世界

東牀

華胥國

鈞天樂

黃嬾

蓬萊第一宮

百尺樓

西堂

陽台

十七醫

慧日禪師作禪本草。普度世間。但其味冲淡。服者多無恒。因戲備十七治云。

省費醫貧

苦心醫賤

餐松醫餓

裁雲醫冷

嚼雪醫熱

彈琴醫躁

安分醫貪

量力醫門

參禪醫想

獨寐醫淫

鳥啼醫夢

面壁醫動

焚香醫穢

痛飲醫愁

廣交醫寂

遠遊醫僻

讀書醫俗

四時歡

日月跳丸。忽忽如夢。加以名犇利競。膏火自煎。祇令人嘆蜉蝣耳。夫鳥飛花落。目前光景。爲歡自饒。七尺我身。定有安排處也。

春時

晨起點梅花湯。課奚奴。洒掃護階苔。禺中取薔薇露浣手。薰玉蕤香。讀赤文綠字書。晌午採筍蕨。供胡麻飯。汲泉試新茗。午後乘欸段馬。執剪水鞭。携斗酒雙柑。往聽黃鸝。日晡坐柳風前。裂五色箋。集錦囊佳句。薄暮繞徑灌花種魚。

夏時

晨起芰荷爲衣。傍花枝吸露潤肺。禺中披古圖畫。展法帖臨池。晌午脫巾石壁。據匡牀談齊諧。山海倦則取左宮枕。爛遊華胥國。午後剗椰子盃。浮瓜沉李。搗蓮花飲碧芳酒。日晡浴罷硃砂溫泉。擢小舟垂釣于古藤曲水邊。薄暮簪冠蒲扇。立層岡看火雲變現。

秋時

晨起下帷檢牙籤。挹露研珠點校。禺中操琴調鶴。玩金石鼎彝。晌午用蓮房洗硯。理茶具。拭梧竹。午後戴白接羅。著隱士衫。望紅樹葉落。得句題其上。日晡持蟹螯鱸膾。酌海川螺。試新釀。醉弄洞簫數聲。薄暮倚柴扉。聽樵歌牧唱。焚伴月香壅菊。

冬時

晨起飲醇醪。負暄盥櫛。禺中置氈褥。市鳥薪。會名士作黑金社。晌午挾筴理舊
臺。看暑形移階濯足。午後攜都統籠。向古松懸崖間。敲冰煮建茗。日晡布衣皮
帽。裝嘶風鐙策蹇驢。問寒梅消息。薄暮圍爐促膝煨芋魁。說無上妙偈。談劍
術。

月令演

令節良辰。世賞久矣。或因一事而留。或託一人而重。零時碎日。尙多流風可
挹。總輯一篇。貽諸同好。

正月

天臘歲旦

油卜人日

金吾弛夜十五耗磨日十六

買兩夜燈十八

補天穿十九

送窮二十九

二月

獻生子朔日

踏青二日

芳春節八日

祭馬祖剛日

治聾酒社日

撲蝶會十五

三月

流觴三日

摸石遊

賜新火清明

送春下旬

四月

飲酎上旬

龍華會八日

菖蒲誕十四

櫻筍厨十五

結夏

浣花潭十九

五月

地臘五日

皓露曲

竹醉十三

天地合十六

祓祭夏至

分龍晦日

六月

避伏三日

天貺節六日

薦麥瓜初伏

碧筒勸中伏

竹篠飲

蓮誕二十四

七月

軀劉立秋

曝腹書 七日

鵲橋 七夕

鬥巧宴 八日

孟蘭盆 十五

鬼燈節 十八

八月

五明囊 朔日

圍棋局 四日

廣陵濤 八日

天灸 十日

梯月 十五

牡丹誕 十五

九月

皇極日 五日

息呂 七日

題糕 九日

小重陽 十日

菊花節

御溝紅葉

十月

秦歲首 朔日

儲穀

煖爐會

小春

下元 十五

祭司寒 亥日

十一月

縣土炭 至前
三日

迎長 至前
一日

添宮線 至日

妓圍

黑金社

天竺至節十六

十二月

細腰鼓八日

星迴節十六

祠竈二十四

送寒下旬

驅難歲除

賣癡貳除夕

二六課

撒開兩手。魚躍鳶飛。打破桶底。中流自在。此是轉身向上一路。還從法外護持。所以飢食困眠。假借四大。行生坐臥。不離色身。但令二六時中。隨方作課。使生氣流行。身無奇病。只此著衣吃飯家風。便是空假中觀正局。

辰

夙興。整衣襟。坐明窻中。調息受天氣。進白湯一甌。勿飲茶。櫛髮百餘徧。使疎風清火明目。去腦中熱。盥漱畢。早餐宜粥。宜淡素飽。徐行百步。以手摩腹。令速下食。天氣者。亥子以來真氣也。靜而清。喧而濁。故天氣至巳午而微矣。

巳

讀書或楞嚴。或南華。或易一卦。循序勿汎濫。勿妄想。勿聚談。了大義知止。勿積疑。倦卽閉目。咽津數十口。見賓客。寡言以養氣。

午

坐香一線畢。經行。使神氣安頓。始飯。用素湯。當飢而食。未飽先止。茶滌口膩。漱去乃飲。多行步。小坐勿偃。胸中悶。則默呵氣二三口。凡飲食之節。減滿受虛。故當飢節其滿。未飽留其虛。

未

獵史看古人大局。窮事理。瀏覽時務。事來須應過。物來須識破。勿晝臥。無事無物。不妨事物之來。涉獵流覽。都是妙明生趣。讀書人日用不知。

申

朗誦古人得意文一二篇。引滿數酌。勿多飲。令昏志。或吟名人詩數首。弄筆做古帖。倦卽止。吟誦浮白。以王真氣。亦是張顛草書。被酒入聖時也。

酉

坐香一線。動靜如意。晚餐宜早。課兒子一日程。如法卽止。小飲勿沉醉。陶然熱水濯足。降火除濕。暮漱滌。一日飲食之毒。

戊

燈夜默坐。勿多思。勿多閱。多思傷心。多閱傷目。坐勿過二更。須安睡以培元氣。臥必側身。屈上一足。先睡心。後睡眼。睡心是止法。睡眼是觀法。

亥子

亥末子初。嬰始孩也。一身元氣。于焉發陳。當其機候。起坐擁衾。虛心靜二。無爲而行。約香一線。固其命門。精神日餘。元氣久盈。醒而行之。雖老而長存也。

丑寅

丑寅間。精氣發生時也。勿酣睡。靜守。令精住其宅。或轉側臥如弓。氣亦周流。不漏洩。如勾萌不坼。迎生氣也。

卯

醒見晨光。披衣坐牀。叩齒三百。轉動兩肩。調其筋骨。以和陰陽。振衣下榻。俾勿

濫觴。

花曆

花有開落涼燠。不可無曆。祕集月令。頗與時舛。予更輯之。以代挈壺之位。數白記紅。誰謂山中無曆日也。

正月

蘭蕙芳

瑞香烈

櫻桃始葩

徑草綠

望春初放

百花萌動

二月

桃夭

玉蘭解

紫荆繁

杏花飾其靨

梨花溶

李花白

三月

薔薇蔓

木筆書空

棣萼韡韡

楊入大水爲萍

海棠睡

綉毬落

四月

牡丹王

芍藥相于階

罌粟滿

木香上升

杜鵑歸

荼蘼香夢

五月

榴花照眼

萱北鄉

夜合始交

蘆蔔有香

錦葵開

山丹頽

六月

桐花馥

菡萏爲蓮

茉莉來賓

凌霄結

鳳仙降于庭

鷄冠環戶

七月

葵傾赤

玉簪搔頭

紫薇浸月

木槿朝榮

蓼花紅

菱花乃實

八月

槐花黃

桂香飄

斷腸始嬌

白蘋開

金錢夜落

丁香紫

九月

菊有英

芙蓉冷

漢宮秋老

菱荷化爲衣

橙橘登

山藥乳

十月

木葉脫

芳草化爲薪

苔枯

蘆始荻

朝菌歎

花藏不見

十一月

蕉花紅

枇杷藥

松柏秀

蜂蝶蟄

剪綵時行

花信風至

十二月

蠟梅坼

茗花發

水仙負冰

梅香綻

山茶灼

雪花六出

花小名

花間園丁名始知。業習于專也。若五色殊彩。五方殊俗。園丁拘墟矣。譽紫褒紅。或多逸事。鋤經拾傳。誌此小名。

瑞香曰麝囊

櫻桃曰石蜜

薔薇曰玉鷄笛

辛夷曰木筆

牡丹曰木芍藥

芍藥曰將離

罌粟曰米囊

木香曰錦棚兒

杜鵑曰紅躑躅

荼蘼曰佛見笑

玫瑰曰徘徊

萱曰忘憂又曰宜男

夜合曰蠲忿又曰合歡

梔子曰薝蔔又曰林蘭

蜀葵曰戎葵又曰一丈紅丈曰茁茅

荷曰芙蕖

茉莉曰鬘華

素馨曰悉那茗

凌霄曰紫葳

玉簪曰白鶴

紫薇曰百日紅

木槿曰舜華又曰日及又曰麗木

秋海棠曰斷腸花

丁香曰百結

芙蓉曰拒霜

山礬曰刺桐

(完)

香艷叢書三集卷二終



香艷叢書

第三集

HQ
1737
1475
V. 11
香艷叢書

三集卷三

看花述異記

武林王 暉丹麓著

湖墅西偏有沈氏園。茂才衡玉之別業也。茂才素愛花。自號花遜園。故多植古桂。老梅。玉蘭。海棠。木芙蓉之屬。而牡丹尤盛。疊石爲山。高下互映。開時熒熒如列星。又如日中張五色錦。光彩奪目。遠近士女游觀者。日以百數。三月十八日。予亦往觀。徘徊其下。日暮不忍歸。主人留飲。飲竟。月已上東牆矣。主人別去。予就宿廊側。靜夜獨坐。清風徐來。起步階前。花影零亂。芳香襲人衣裾。幾不復知身在人世。俄見女子自石畔出。年可十五六。衣服娟楚。予驚問。女曰。妾乃魏夫人弟子。黃令徵以善種花。謂之花姑。夫人雅重君。特遣相迓。予隨問。夫人隸何事。曰。隸春工。凡天下草木花卉。數之多寡。色之青白紅紫。莫不于此賦形焉。然則何爲見重也。曰。君至當自知。因促予行。予不得已隨之去。移步從太湖石後。



便非復向路。清溪夾岸。茂林鬱鬱。沿溪行里許。但覺烟霧溟濛。芳菲滿目。人間四季花。同時開放。略盡稍前一樹。高丈餘。花極爛熳。有三女子。紅裳艷麗。偕游樹下。見客亦不避。予歎息良久。花姑曰。此鶴林寺杜鵑也。自殷七七催開後。即移植此。又行數里。一望皆梅。紅白相間。綠萼倍之。當盛處。有一亭。榜曰梅亭。亭內有一美人。淡粧雅度。徙倚花側。予流盼移時。幾不能舉步。花姑曰。奈何爾。此是梅妃。梅亭二字。猶是上皇手書。幸妃性柔緩。不爾恐獲罪。予笑謝乃已。行至一山。巖壑爭秀。花卉殆與常異。聽枝上鳥語。如鼓笙簧。漸見朱甍碧瓦。殿閣參差。兩度石橋。乃抵其處。相厥棟宇。侈于王者。傍有二司。如官署。右曰太醫院。左曰太師府。予大驚訝。問花姑曰。此處亦須太醫耶。花姑笑曰。乃蘇直耳。善治花瘡者。能腴。病者能安。故命爲花太醫。其左曰太師府。何曰此洛人宋仲孺所居也。名單父。善吟詩。亦能種植。藝牡丹術。凡變易千種。人不能測。上皇嘗召至。鵬山植花萬本。色樣各不同。賜金千兩。內人皆呼花師。故至今仍其稱。入門由西街行百步餘。側有小苑。畫檻雕欄。予遽欲進內。花姑慮夫人待久。不令入。予再

三強之方許。及階。見一花合蒂。濃艷芬馥。染襟袖不散。庭中有美女。時復取嗅之。腰肢纖惰。多愁態。予不敢熟視。花姑曰。君識是花否。予曰。不識也。曰。此產嵩山塢中。人不知名。採者異之。以貢煬帝。會車駕適至。爰賜名。迎輦花。嗅之。能令人清酒。兼能忘睡。予曰。然則所見美人。其司花女袁寶兒耶。花姑曰。然。遂出。復由中道過大殿。殿角偶遇二少婦。皆靚粧。迎且笑曰。來何暮也。花姑亟問。夫人在。曰。在內殿。觀諸美人歌舞。奏樂爲樂。客旣至。當入報夫人。予遽止之。曰。姑少俟。諸美人可得窺窺乎。二婦笑曰。可。謂花姑曰。汝且陪君子。我二人侯樂畢。相延也。去後。予乃問花姑。二婦爲誰。曰。二婦本李鄴侯公妾。衣青者曰綠絲。衣緋者曰醉桃。花經兩人手。無不活。夫人以是錄入近侍。遂引予至殿前簾外。見絲竹雜陳。聲容倩善。正洋洋盈耳。忽有美人。撩髮舉袂。直奏曼聲。覺絲竹之音不能遏。旣而廣場寂寂。若無一人。予聞之。不勝驚歎。花姑曰。此永新歌。所謂歌值千金。正斯人也。語未畢。聞簾內宣王生入。予歛容整衣而進。望殿上夫人。丰儀綽約。衣絳綃衣。冠翠翹冠。珠璫玉佩。如后妃狀。侍女數十輩。亦皆妖艷絕人。

予再拜。命予起曰。汝見諸美人乎。予謝不敢。夫人曰。美人是花真身。花是美人小影。以汝惜花。故得見此緣殊不淺。向汝作戒折花文。已命衛夫人楷書一通。置諸座右。予益遜謝。旋命坐。進百花膏。夫人顧左右曰。王生遠至。汝輩何以樂嘉賓之心。有一女亭亭玉立。抱琴請曰。妾願撫琴。一聲纔動。四座無言。冷冷然撫遍七絃。直令萬木澄幽。江月爲白。夫人稱善曰。昔于頔嘗令客彈琴。其嫂審聲歎曰。三分中一分箏。二分琵琶。絕無琴韻。今聽盧女彈。一絃能清一心。不數秀奴七七矣。因呼太真奏琵琶。予聞呼太真私意。當日稱爲解語花。又曰海棠未醒。不料邂逅於此。乃見一人。纖腰修眸。衣黃衣冠玉冠。年三十許。容色絕麗。抱琵琶奏之。音韻懷清。飄出雲外。予復請搗箏。夫人笑曰。近來惟此樂。傳得美人情。君獨請此。情見乎詞矣。顧諸女輩曰。誰擅此技。皆曰第一箏手。無如薛瓊。瓊尋有一女。着淡紅衫子。繫研羅裙。手捧一器。上圓下平。中空絃柱十二。予不辨何物。夫人曰。此即箏也。頃乃調宮商于促柱。轉妙音于繁絃。始憶崔懷寶詩。良非虛語。曲纔終。又有一女抱一器。似琵琶而圓者。其形象月。彈之其聲合琴。

音韻清朗。予又不辨何物。但微顧是女。手紋隱處如紅線。夫人察予意。指示予曰。此名阮咸。一名月琴。惟紅線最善。此予方知是女。卽紅線也。夫人忽指一女曰。渾忘却汝。汝有絕技。何不令嘉客得聞。予起視。見一美人。含情不語。嬌倚屏間。聞夫人語。微笑。予遂問夫人是女云誰。夫人曰。此魏高陽王雍美人徐月華也。能彈臥箏篴。爲明妃出塞之歌。聽者莫不動容。已持一器。體曲而長。二十三絃。抱于懷中。兩齊奏之。果如夫人言。俄有一女。誇丹鳳至。諸女輩咸曰。吹簫女來矣。女謂夫人曰。聞夫人延客。弄玉願獻新聲。夫人請使吹之一聲。而清風生。再吹而彩雲起。三吹而鳳凰翔。使冉冉乘雲而去。耳畔猶聞鳴鳴聲。細察之。已非簫矣。別一女子。短髮麗服。貌甚美而媚。橫吹玉笛。極要眇可聽。夫人曰。誰人私弄笛。諸女輩報曰。石家兒綠珠。夫人命亟出見客。女件數促不肯前。中一女亦具國色。乃曰。兒亦善笛。何必爾也。綠珠聞之。怒曰。阿紀敢與我較短長耶。我終身事季倫。不似汝謝仁祖歿。遂嫁郗曇。不以汗顏。翻以逞微技。是女羞憤無一言。夫人不懌。命止樂。忽有嚙喉一歌。聲出于朝霞之上。執板當席。顧盼撩人。

夫人喜曰。久不聞念奴歌。今益足暢人懷。念奴曰。妾何足言。使麗娟發聲。妾成
夫矣。夫人指曰。麗娟體弱。不勝衣。恐不耐歌。予見其年僅十四五。玉膚柔軟。
吹氣勝蘭。舉步珊珊。疑骨節自鳴。乃曰。對嘉賓。豈能辭醜。因唱迴曲風。庭叶翻
落如秋。予但喚奈何而已。麗娟曰。君尙未見絳樹也。絳樹一聲。能歌兩曲。二人
細聽。各聞一曲。一字不亂。每欲效之。竟不測其術。夫人曰。絳樹術雖異。恐無能
勝予。吾且欲與王生觀絳樹舞。乃見飛舞回旋。有凌雲態。信妙舞莫巧于絳樹
也。絳樹謂麗娟曰。汝欲效吾歌。不得。吾欲學汝舞。亦不能。夫人大悟曰。有是哉。
漢武嘗以吸花絲錦。賜麗娟作舞衣。春暮宴于花下。舞時。故以袖拂落花。滿身
都着。謂之百花舞。今日奈何不爲王生演之。麗娟復起舞。舞態愈媚。第恐臨風
吹去。忽聞鷄鳴。予起別。夫人曰。後會尙有期。慎自愛。乃命花姑送予行。視諸美
人。皆有戀戀不忍別之色。予亦不知涕之何從也。花姑引予從間道出。路頗崎
嶇。回首。忽失花姑所在。但見曉星欲落。斜月橫窗。花影翻階。翻然若顧予而笑。
露坐石上。憶所見聞。恍然如隔世。因慨天下事。大率類是。故記之。時康熙戊申。

三月。

袁籀菴曰。具三十分才情。方能有此撰述。若有才無情。則不真。有情無才。則不暢。讀竟。始服其能。

李湘北曰。此丹麓戒折花文。絕妙注疏也。將千古艷魂。和盤托出。笑語如生。不數文成將軍之于李夫人。臨邛道士之于楊玉環矣。

徐竹逸曰。逸興如落花依草。可補虞初志艷異編之所未備。文心九曲。幾欲佔盡風流。

張山來曰。予謂以愛花之心愛美人。則領略定饒逸趣。以愛美人心愛花。則護惜別有深情。丹麓惜花如命。固應有此奇遇。

又曰。向讀艷異諸書。見花妖月姊。往往于文士有緣。心竊慕之。恨生平未之遇也。今讀此記。益令我神往矣。

新婦譜

湖上陸圻景宣撰

傅氏有理縣譜。一家相傳。不以示人。今世無其書。予所見者。惟時人治譜一帙。京邸授官者。率不可闕。使果能奉以從事。雖古循吏。何以加茲。今丙申七月。倉卒遣女。蕭然無辦。因作新婦譜贈之。以視世之珠玉錦繡。炫燿於路者。雖所贈不同。未爲無所贈也。然恐予女材智下。不能讀父書。并以遺世之上流婦人。循誦習傳。爲當世勸戒。至文不雅馴。欲使羣婢通知。大雅君子。幸毋加姍笑也。

做得起

近俗不知道理。閨女出嫁。必要伊做得起。至問其所謂做得起者。要使公姑奉承。丈夫畏懼。家人不敢違忤。果爾。必是一極無禮之婦人。公姑必怒。丈夫必恨。羣小皆怨。且乘間搆是非。親戚內外。視爲怪物。何人作敬宗族鄉黨聞之。皆舉以爲戒。則世之所爲做得起。正做不起也。吾今有一做得起之法。先須要做不起。事公姑不敢伸眉。待丈夫不敢使氣。遇下人。不妄呵罵。一味小心謹慎。則公

姑丈夫皆喜。有言必聽。婢僕皆愛而敬之。凡有使令。莫不悅從。而宗族鄉黨。動皆稱舉以爲法。則吾之所爲。做不起。乃真做得起也。

得歡心

新婦之倚以爲天者。公姑丈夫三人而已。故待三人。必須曲得其歡心。不可纖毫觸惱。若公姑不喜。丈夫不悅。則鄉黨謂之不賢。而奴婢皆得而欺凌我矣。從此說話。沒人聽矣。凡事行不去矣。故婦之善事公姑丈夫也。非止爲賢與孝也。以遠辱也。

聲音

婦人賢不賢。全在聲音。高低語言多寡。中分聲低即是賢。高即不賢。言寡即是賢。多即不賢。就令訓責己身婢僕。響尙不雅。說得有道理話。多亦取厭。況其他耶。

顏色

愉色婉容。是事親最要緊處。男子且然。況婦人乎。但事公姑丈夫之色。微有不

同事姑事夫和而敬。事翁肅而敬。待男客親戚莊而敬。待羣僕純以莊。

款待賓客

凡親友一到。即起身親理茶盞。拭碗拭盤。撮茶葉。點茶果。俱宜輕快。勿使外聞。并不可一委之羣婢。蓋新婦之職。原須必躬必親。不宜叉手高坐。且恐羣婢不稱姑意。姑或懊惱。而見卑幼不起代勞。是一娶一阿婆也。記之。

二

凡阿翁及丈夫。要留客酒飯。或豐或儉。即須請命於姑。用菜幾器。酒果小碟。多少。一一親自動手。至精潔敏妙。則須自心裏做出。不潔則客疑主人不能烹。不速即客餒。而主人有愧色。大不可也。又須再囑奴僕等。於座後用心看視。若有續到賓客。再添杯箸。若菜垂盡。須早增益。俱不必待外廂催討。

三

凡留客不留客。自有阿翁丈夫作主。新婦只宜隨順做去。不須措意也。如阿姑而上親。可請教於姑。新婦該見否。如該見。急出萬福。遲則親去。而姑不悅矣。萬

一阿姑不留酒食。不妨釐成留膳。若留阿姑而上親。姑云率薄。不妨從厚。如新婦家親戚。一到即請教阿姑應見否。如見一茶之後。新婦自先立起。不必久談。蓋久坐恐阿姑要治飲饌。深爲煩擾耳。若阿姑云。何不留之。新婦必謝云。彼有事。不能強留。蓋新婦統於所尊。未經分析。誰則責之。又況人有倉卒不便。銀錢匱乏時。即姑難以語婦者。而新婦主席。阿姑治具。亦使此心不安。故凡涉母家親戚。槩不宜留。

四

凡阿翁丈夫。有親友倉卒忽到。要留酒食。而銀錢偶乏。及要慶弔諸儀。而資財偶竭。新婦知之。即宜脫簪珥。典衣服。不待公姑開言。方爲先意承志。新婦或係貧家之女。奩無可廢。然常存此心。即布衣可質。髮髻可截也。至一二贈嫁器皿。即當公用。不問全毀。若小有愛惜之語。即屬吝嗇。卽傷公姑之心。卽爲下人姍笑。以故公姑有寧貸鄰家。而不敢問新婦者。彼塵封不用。又保無水火盜賊之虞乎。

五

常見人家羅列請客。或費一金二金。又兼舉家辛苦。無非爲奉客計也。乃客歡飲而忽報酒完。忽云燭盡。又見蠟炬瘦短數。屏間碗盞玳瑁。此俱欲客速行之意。最惹客怒。殊爲可恨。況既費一番經營。反取一番不快。此愚之甚也。請客時。酒須多蓄。未完先買添燭。須粗大多買幾枝。不失古抱燦之意。飯須用湯。可令客飽。价須蚤與酒飯。不可令飢。不過略加意要好。客人便終席歡暢。主僕皆得所欲而去。且歎主人之賢矣。新婦未當家者。不論若姑出外。及有倦時代爲料理。必須識此。

答禮行禮

凡答禮送禮。毋論姑家親戚。與母家親戚。或否或該。應厚應薄。一須稟命於姑。不可自作主意。然待姑家親戚。須常存要好看之心。母家親戚。其禮文可省處。一切省之。蓋整理一番。必費阿姑多少心血。就有煩苦。姑亦忍耐。不好聲說。所以只是少些好。若必不得已。則略一舉動。倘姑以爲煩。竟歇亦可。與其獲罪於

姑。寧負歉於親戚也。況身未當家。人多見諒。

親戚餽遺

凡內外親戚餽遺於新婦。應受應辭。一須稟命於姑。姑命受之。則受而獻之於姑。如姑云。汝可收去。必對云。婆婆收用。仍藏姑之厨櫥中。犒便多寡。俱應請教於姑。凡他家女使來。即應和顏色立起。不可高坐板臉。蓋敬主及使。自然之理也。如厮叫。須要響響答應。若輕微。則似不屑。而彼或不聽見。即怨我傲矣。其間安於他家主母。亦須朗朗。如阿姑不在一處。須頻喚女使與坐。

夫家親戚

新婦要得公姑歡喜。此大端也。其餘姑娘姑婆舅婆伯叔婆等類。非公之近親。即姑之至戚也。若有一處不喜。即於公姑分上有欠闕矣。故凡遇歲時慶賀而來。必代姑作主人。和色歡言。卑躬曲體。備極趨踴。用心襯貼。方爲賢婦。如無處睡者。留在房中。讓大牀。奉好被。薰香點茶。時其饑飽。適其寒溫。又要密請阿姑。意旨。姑若要多留數日。則放口去留。姑若今日聽歸。即不宜強留矣。不然。身雖

做好人。恐不便於姑也。

其或還家。餽問往來。不可失禮。寧存過厚之心。又當爲親戚分勞。如做鞋做針指之類。他日新婦若有急切事。彼亦相助爲理。不唯見情厚。且亦得人之驗也。

歲時甘旨二條

凡一歲之中。除夕。上元。端陽。七夕。中秋。公姑壽日。俱爲大節。是晚雖公家自有喜譙。新婦房中。不可不自治精潔豐滿。飲饌數盞。送公姑處。以表孝心。若阿翁出外。則身陪姑飲。若翁有急客。姑欲移用。卽移用爲得也。其公姑丈夫壽日。俱宜蚤起。嚴妝拜祝。虔恪備禮。凡花朝月夕。賞心樂事。時姑或寂靜。及不快意。時俱宜室中備美醞一壺。精品數器。侍姑談論。以攄懷抱。若疾病所需甘旨。尤須速辨。仍問知醫者可進否也。

二

甘旨之奉。不在多。而在意之誠。隨時可盡。隨地可盡。如貧家之女。必欲珍窮水陸。此斷不能之勢也。但逢時新諸品。俱要用心探聽。最初第一二日。可卽買之。

其葷腥仍手烹。待公姑午膳晚膳時以進。不則作家之人。又不捨吃矣。其平時只要物件可口。便是甘旨。若用銀置買。必須精者。貴者。若從親戚中餽遺所得。雖平常之物。皆可進也。至於赴席所得。親戚母家所與。雖物之一二枚。亦可藏之袖中。退而奉姑。姑必鑒其誠孝。不以爲褻。蓋事雖小。物雖微。而見人之真也。若姑事冗腹飢。雖棗栗之類。純蹄雞肋。皆可進之。

凡以物奉公姑。要使物溢於器。毋令晨星落落。搖於器之中間。凡治饌進公姑。須豐實。不可墊底。

早起

新婦於公姑未起前。先須蚤起梳洗。要快捷不可遲鈍。俟公姑一起身。即往問安萬福。至三盥須自手整理。不可高坐。聽衆婢爲之。至臨吃時。則須蚤立在傍。侍坐同吃。萬不可要人呼喚。阿姑等待不來。胸中必不快也。就有小恙。還須勉強走起。若高臥不來。阿姑令人搬湯運食。又費一番心曲矣。晚上如翁在家。即請早退歸房。靜靜做女工。不宜睡太早。如翁不在家。直候姑睡後。安置歸房。

門戶

舉家門戶啓閉。自有公姑主持。不須新婦措意。但自己房門。無論夫在不在。一進房後。即須緊緊拴下。若夫在姑處。未來。仍令婢女守門。一叩即開。不可睡去。若夫不在家。有人叩門。此必姑有所命也。響朗問明。方始開之。如姑有召。速整衣而出。毋遲時刻。其行仍以伴以火。

有過

人非聖人。不能無過。况新婦乎。新婦偶然有失。致蒙公姑丈夫譴責。便當欣然受之。云我。不是。我就改。則不惟前過無害。後且增一善矣。若橫爭我是。得罪公姑丈夫。是一小過未完。而又增數大罪。愚之甚也。

或被人讒謗。有冤抑處。亦須緩緩辨晰。不可過於爭論。如一時難白。即付之不理。久當自明。古人云。止謗莫如自修。最爲善處之法。

粧飾

婦人德言功容。容止端莊。非云粉白黛綠也。固不可隨俗艷粧。亦不宜亂頭垢

穢在家布衣整潔。出外櫛沐清鮮。立必擁面。行必屏人。此不易之程也。但衣粧髮髻。各家風尚不同。又宜請教於姑。隨其指示。然寧不及時。毋過時。要於淨潔中。常存樸素之意。不失大家舉止。

孝翁

新婦於翁。殊難爲孝。蓋中人之產。既有僕婢。則新婦謁見有時。無須執役。但當體翁之心。不須以向前親密爲孝也。何謂體心。如翁好客。則治酒茗必虔。翁望子成名。則勸勉丈夫成學爲急。如此之類。體而行之。自可視無形而聽無聲也。至爲翁洗濯器皿。及守藥爐酒鎗。可躬執其任。勿使婢操作。亦見服勤之義。或體小不安。不妨數對姑定省。一日十數問候。不多也。極貧家。躬親服事。不在此例。

孝姑三條

視姑當如視母。則孝心油然而生。方從性命。中流出。不是體面好看。但事姑事母。作用處微有不同。母可徑情。姑須曲體。凡事姑須在姑未言處。體貼奉行。若

姑一出口。爲婦者便有三分不是。蓋姑不得已而發於言。原欲媳之默喻。此姑之慈也。與母之開口便說。正自迥異。

二

新婦事姑。不可時刻離左右。姑未冷。先進衣。未飢。先進食。姑慍亦慍。姑喜亦喜。姑有怒。婦寬之。如大怒。則婦亦怒。姑有憂。婦解之。如大憂。則婦亦憂矣。至姑責備新婦處。只認自不是。不必多辯。罵也。上前打也。上前陪奉笑顏。把搔背癢。無非要得其歡心。彼事君者。尚曰。媚於一人。況婦事姑乎。非是。諛曲道當然也。

三

凡姑事翁敬。欸客豐。待下慈。治家勤儉。此即新婦之師。奉之不暇。尚敢悖戾乎。即有形迹中不盡合者。必係老成人別有所見。隨時處中。爲新婦者。一以順爲正。如略懷斟酌。即失之遠矣。其或姑有蕩佚非僻。放於繩檢之外者。新婦嚴憚自守。不在忤逆之例。

姑佞佛

凡爲姑有佞佛者。如在家長齋誦經等。新婦俱宜遵信。雖不必效法長齋或月齋六齋觀音齋斗齋之類。亦可志誠奉之。非惟順姑。且亦惜福。倘姑喜尼衆往來者。新婦當敬而遠之。不可妄有施與及多接譚。倘姑喜入寺燒香者。新婦託病不得隨行。或能幾諫。更爲賢哲。

姑物件

姑媳之間。雖如母子。然母子以情勝。姑媳則情而兼法矣。凡姑衣服器具銀錢酒食。俱不可擅動。若姑有低語向人。新婦便須退後。若姑在房中開箱。或看首飾衣服。或低語向姑娘小叔。俱不宜進前直闖。若姑命之前。即入門。若看姑首飾衣服。不可多玩弄。讚歎及云我倒沒有我。也要製。恐涉希冀。有傷堂上之心。

背後孝順

新婦當面孝順易。背後孝順難。背後孝順。全在語言中檢點。起念處真實。如在母家。必思姑家某事未完。恐其勞苦。或今日天寒。不知姑添衣否。念茲在茲。所

謂起念處眞實。不是當面好看也。人如在母家親戚。夫家親戚之前。及在自己房中。凡有言語。必稱公姑丈夫之德。云待我好。只是我不會孝順。展轉相聞。不欺背面。不愧閨室。豈非眞孝順乎。若略有一言怨望。內戚傳聞。公姑丈夫。不喜連當面好處落空矣。此所謂語言中檢點也。然起念果眞。而語言自檢點矣。語言之不檢。由起念之不眞也。

妯娌姑嫂

新婦之善相。其夫者第一。要丈夫孝友。乃世之不孝者。十不遇二三。而不友者。則十之五六。其源多起於妯娌不和。丈夫各聽婦言。遂成參商。此不可不謹也。爲新婦者。善處妯娌。第一在禮文遜讓。言語謙謹。勞則代之。甘則分之。公姑見責。代他解勸。公姑蓄意。先事通知。則彼自感德。妯娌輯睦矣。如我爲伯姆。彼爲叔娣。則爲伯姆者。先須做小伏低。儻彼偶疾言遽色。我歡然受之。不得回答。爲姆且然。況爲娣乎。其或公姑偏愛多分物件。一勿較量。只是仰承。或我富他貧。我貴他賤。皆須曲意下之。周其不足。不可使勢凌他。若他富貴。我貧賤。亦宜謙

卑委婉。不可有感憤相抗之意。蓋貧富貴賤。俱是各人分定。只宜認骨肉同氣。不可多生形跡。致有妬心也。諸姪姪女。俱宜愛之如子。乳少者。代之乳。衣食不給者。分之衣食。常加笑容。抱置膝上。新婦所生子女。當令其敬伯母叔母。一如本生之母。雖不必盡拜乾子。盡稱寄娘。亦須得兒無常母之義。方爲天倫樂事。○妯娌是非。多起於羣小搬鬪。乳媪贊襄。別房有此。切勿聽之。本房僕婢。尤當痛飭。○凡姑嫂之間。允宜愛厚。母之憐女。人所同然。姑喜則婆亦喜矣。故凡有好物衣飾。察婆欲與姑者。須竭力贊成之。婆未有此意。或微開導之。又不可比例我也。要。

敬丈夫 七條

夫者天也。一生須守一敬字。新畢姻時。一見丈夫。遠遠便須立起。若晏然坐大。此驕倨無禮之婦也。稍緩通語言後。則須尊稱之。如相公。官人之類。不可云爾汝也。如爾汝忘形。則夫婦之倫狎矣。凡授食奉茗。必雙手恭擎。有舉案齊眉之風。未寒進衣。未飢進食。有書藏室中者。必時檢視。勿爲塵封。親友書札。必謹識。

而進閱之。每晨必相禮。夫自遠出歸。繇隔宿以上。皆雙禮。皆婦先之。

二

凡少年善讀書者。必有奇情豪氣。尤非兒女子所知。或登山臨水。憑高賦詩。或典衣沽酒。剪燭論文。或縱談聚友。或座挾妓女。皆是才情所寄。一須順適。不得違拘。但數種中。或有不善衛生處。則宜婉規。亦不得聒聒多口耳。

三

丈夫在館不歸。此是攻苦讀書處。不可常寄信問候。以亂其心。或身有小恙。亦不可令知。只云安好。所以勉其成學也。彼知或數歸。即荒思廢業矣。若母家及親戚有餽遣時。亦須全送阿姑處。待姑云拏幾許至館中。方如數送去。

四

丈夫有說妻不是處。畢竟讀書人明理。畢竟是夫之愛妻。難得難得。凡爲婦人。豈可不虛心受教耶。須婉言謝之。速即改之。以後見丈夫。輒云我有失否。千萬教我。彼自然盡言。德必日進。若強肆折辯。及高聲爭鬪。則惡名歸于歸人矣。于

丈夫何損。

五

丈夫或一時未達。此不得意之以歲計者也。或一事小拂。此不得意之以日計者也。爲妻者。宜爲好語勸諭之。勿增慨嘆。以助鬱抑。勿加誚讓。以致憤激。但當愉愉煦煦。云吾夫自有好日。自有人諒。方爲賢妻。如對良友也。其或一時闕乏。竭力典質措辦。勿待其言。毋令其知。

六

風雅之人。又加血氣未定。往往遊意倡樓。置買婢妾。只要他會讀書。會做文章。便是才子舉動。不足爲累也。婦人所以妒者。恐有此輩。便伉儷不篤。不知能容婢妾。寬待青樓。居家得縱意自如。出外不被人恥笑。丈夫感恩無地矣。其爲膠漆不又多乎。凡待妾恩禮之數。須優內外之防。須密。有等丈夫。不事儒業。者。或居家營運。出外經商。俱是心血所成。勞四體以贍妻子。而婦人輩坐享衣食。恬然不知深可怪也。若新婦之賢者。必須憫夫勞役。軫夫飢寒。其體卹隨順。

處正與事讀書之夫無異。若娶婢買妾俱宜聽從待之有禮。方稱賢淑。貧家能撫卹相安。尤徵婦德。蕩子嫖賭致費祖宗基業。新婦苦諫作家堅守田產。尤稱哲慧。

七

丈夫未達。有不快意處。要勸慰之。鼓其上進之氣。既達有得意處。要戒勉之。淡其榮利之心。且常常想未遇時。回頭是岸。須存厚道。蓋富貴戲場。不能保久在也。至果報輪迴之說。不可不信。信則慈念易起。但尼僧往來無端施與。俱非功德。唯恤親友之貧。待下人之慈。救人急難。解人冤抑。葱菜轎夫舟子輩。價值略寬。等頭銀水好看些。此真修行也。

待堂上僕婢二條

待公姑之僕婢。不但不可折罵也。并不可疾言遽色。蓋優禮婢僕。即所以敬公姑也。如婢有過失。公姑未見。則當好言戒諭之。仍不可令公姑知道。如公姑親見。欲加譴責。則當婉言方便。不可作增怒之語。其或大偷盜及欲逃亡背主情。

果萬真者。亦須稟知。然非密聞阿姑。則密聞丈夫。不可公言其狀。致難收拾。又須云有聞。不敢不言。恐非灼見。須再詳察。

二

凡平時待羣婢之色。以和。待羣僕之色。以正。其或公姑偶不在前。奴婢將有怠肆之意。則待羣婢之色。以正。待羣僕之色。以嚴。其或姑扑責僕婢。但云伊不足惜。只是難爲婆婆身體。此不說方便。而方便在其中。總不應撓怒也。待公姑之僕婢。須常存優禮之心。此即孝經云。得衆人之歡心。以事親也。況羣小無怨。則讒慝無自而生。凡授銀物與僕輩。必置几案上。俟使領之。

待本房僕婢四條

陶淵明有云。此亦人子也。可善視之。蓋此輩與我同爲父母所生。可憐他命不好。我吃他還未吃。我厚衣他還薄衣。我睡他遲。我起他蚤。俱是命苦可憐也。常常要照顧他。但又不可過於愛護。凡事先有堂上之僕婢。而後有已身之僕婢。毋使人云與公姑分爾我。先私己之婢僕。而後公衆也。要令已之婢僕。尊稱公

姑之婢僕。公婢之長曰阿奶。少者曰阿姆。公僕之已冠者曰阿伯。阿叔。稚者曰阿兄。其事之之理。亦如卑幼之於尊長。

二

己身婢僕。童稚居多。如有小過。但當正言教誨之。不改。再罵詈之。許之以責。必不改而過差大。然後用小界尺與三下五下。亦不可多。第一要教他敬老家主。老主母。第一要教他做公衆之用。而室中次之。

三

凡婢僕有三大罪。一淫佚。二偷竊。三說謊搬鬪是非。此須防之於漸。慎之於微。防淫佚之法。以莊。防偷竊之法。以介。防搬鬪之法。以默。此治家之大略也。至於僮僕布素充體。亦宜浣濯縫補。早晚櫛沐。亦須眉目清朗。使有天機自得之狀。則瑕易露而教易入也。有等人家。此輩蓬首垢面。涕淚愁苦。身多血漬。面有爪痕。非如卑田院乞兒。則同地獄中餓鬼。余常歎悼。以爲主婦之不慈。不賢。入門即得之耳。

四

本房僕婢。雖宜慈愛。然或觸公姑之怒。及得罪賓客鄰里。皆宜重懲。不則俗所云護短也。又立言須平和訓飭之。不可過於憤激。此即俗所云夾氣孔。反開罪於公姑耳。

偷盜

一家之中。惟盜情最難測度。或有形跡甚似。而實非者。或有平常行止不好。而此事偏不涉者。俱難以臆斷也。若以臆斷。令含冤之人最難辯白。傷德實多。故舉家有偷盜事。雖極小者。新婦不可關一語。本房婢僕尤不可置喙其間也。謂己奴婢不許說人偷竊若公姑丈夫疑及己身奴婢。則當細心詳察。如果真實。當告公姑丈夫痛責之。勿行護短。誤其終身。本房奴婢與堂上奴婢爭鬧。不論是非。只說本房奴婢不是。痛責之。

孝母

有等新婦。不能孝姑。而偏欲孝母。此正是不能孝母也。事姑未孝。必貽所生以

惡名。可謂孝母乎。蓋女子在家。以母爲重。出嫁。以姑爲重也。譬如讀書出仕。勞於王事。不遑將母。死於王事。不遑奉母。蓋忠孝難兩全。全忠不能盡孝。猶事姑不能事母也。今若新婦必欲盡孝於父母。亦有方略。先須從孝公姑。敬丈夫。做起公姑。既喜孝婦。必歸功於婦之父母。必致喜於婦之父母。丈夫既喜賢妻。必云。彼敬吾父母。吾安得不敬彼父母。於是曲盡子壻之情。歡然有恩以相接。舉家大小。敢不敬愛。而新婦之父母。於是乎榮矣。夫家貧賤。還只是情意好。夫家富貴。還有無限好處。及母家矣。此女之善孝其親也。反是者。公姑致怨於親家。丈夫歸獄於泰山。父母兄弟。不好上門。情意索莫。讌會稀少矣。女雖欲孝其親。何道之從乎。

母家奴婢

母家奴婢往來。自然稠密。然留飯留宿。俱不宜出自己意。若阿姑云。須留飯留宿。必先固辭謝。不得已而後仰承。萬一母家人微有放肆處。必嚴諭之云。汝來此。尤不比在家。須分外小心。汝若不敬。罪歸于我。

婢來或在房中有低語亦不必多。多則恐姑見疑。以爲以家事相告也。若僕則有何密語。萬不可近身分付聲音。亦須朗朗使衆聞之。

新婦譜補

東海陳 確乾初著

絕尼人

三姑六婆。必不可使入門。尤當痛絕尼人。雖有真修者。亦概絕之。蓋容一真尼。而諸僞尼隨之而入。不可却矣。此肅閨門第一要義也。雖或素嘗與姑往還。不無異同之嫌。然新婦苟賢孝素著。事事恭順。惟此一事過執。亦不見怪。且或以嚴見憚。使此輩踪跡漸疎。家風清楚。亦是新婦入門一節好事也。

不看劇

新婦切不可入廟遊山。及街上一切走馬走索賽會等戲。俱不可出看。即家有喜宴。偶舉優觴。須在主家者自須豫絕此等內外廛隔一簾。新婦禮不當預席。或辭以疾。或以中饋無暇爲辭。期必獲命而後已。確有女既嫁。一日歸寧。笑謂父曰。吾年近三十。終不知世所謂戲文。確曰。而父素不能教女。唯此一節差足免俗。復何用求知之女笑而退。敢以勸凡爲婦女者。

聽言二條

婢女傳言。往往失真。切不可聽。若言某人說新婦不好。便當反求而速改之。勿加忿怒。若言他人不好。毋論真假。置若罔聞。若自己身邊婦女言之。便當痛戒。勿令妄言。以啓搬鬪之漸。古人云。聞人過失。如聞父母之名耳。且不忍聞。況口可顯言乎。至言及人家閨闈事。尤須塞耳。雖姊妹姑嫂娣姒間。相聚閑論。傳說流言。如言及人不好。及閨門事。亦不得助順一語。默受而已。俟其人說完。須徐徐云。恐傳聞未真。此厚道也。雖姑及諸尊長言。亦如之。

二

婢僕相訴。切不可偏聽。遽加呵怒。須徐察其實。而諭解之。若小事。雖有曲直。須云。此何足較。毋多言。若家主聞之。反取責不便。若大事。不可不理。使從實稟公。姑丈夫理之。須一聽外廂理斷。不可從中偏袒。若訴公家僕婢。雖果負冤。亦只莫管。凡聞人言。不動如山。胸中却自有分曉。此女中君子也。

責僕婢

凡僕婢雖有大過當責。萬不可自加鞭扑。必稟公姑丈夫。請責治之。倘公姑丈夫決不肯責。亦只忍耐去。但云爾等罪實難饒。家主法外貸汝。下次莫再犯。若再犯。亦只用此法。弗以前告不聽。便擅自責治也。蓋凡事持之以正。羣下自然畏服。不必鞭扑立威。如此則體不褻。而新婦愈尊重矣。

勸夫孝

新婦不唯自己要盡孝道。尤當勸夫盡孝。勿恃父母之愛。而稍弛孝敬之心。語云。孝衰於妻子。此言極可痛心。今入門以勸夫孝爲第一。要使丈夫踪跡常密。於父母而疏於己身。俾夫之孝德。倍篤於往時。乃見新婦之賢。若丈夫小有違言。公姑不快。便當脫簪待罪。曰。此繇婦之不德。致使吾夫有二心於公姑。非獨丈夫之罪也。必令丈夫改過盡孝而後已。

妯娌

兄弟一氣。必無異心。住往以娣姒之間。自私自利。致傷兄弟之和者有之。此極可恨事也。今往夫家第一要和妯娌。妯娌之不和。固非一端。大約以公姑之恩。

微有厚薄。便生嫉忌。便有爭執。此不達之甚也。大人胸中。如天地一般。有何偏見。若厚於大伯大娘。必是大伯大娘賢孝。得公姑之歡者也。厚於小叔嬸嬸。必是叔嬸賢孝。得公姑之歡者也。正當自反。負罪引慝。改過自新。庶公姑有回嗔作喜之時。不可因而不平。致有後言。若公姑獨厚已夫與已。則當深自抑損。凡百公物。讓多受寡。讓美受惡。如或妯娌中。時有不堪相加。一味順受。聞惡言。常若勿聞。只是陪面要好。久之自然感化。自相和洽。務使娣姒之間。情同姊妹。則可謂吉祥善事矣。

待婢妾

新婦成婚後。數年無子。或丈夫不耐。或公姑年老。急欲得孫。須及早勸丈夫娶妾。或飾婢進之。即已既有子。而丈夫或更欲置妾。以廣生育。無非爲新婦代勞替力之人。自當歡忻順受。但須防其出入。謹飭閨門。稍有差池。責歸主母。不可謂無預已事也。恩禮須優。夫喜亦喜。情同姊妹。妬在七出之條。稍形辭色。便不成人矣。

抱子

凡生養子女。固不可不愛惜。亦不可過於愛惜。愛惜太過。則愛之適所以害之矣。小兒初生。勿勤抱持。裹而置之。聽其啼哭可也。醫云。小兒頓足啼哭。所以宣達胎滯。無須憐惜。乳飲有節。日不過三次。夜至雞將鳴。飲一次。衣用稀布。寧薄毋厚。乃所以安之也。語云。若要小兒安。常帶三分饑與寒。蓋孩提家。一團元氣。與後天斲喪者不同。十分飽煖。反生疾病。此易曉也。珠帽繡衣等物。切不可令着身。無論非從樸之道。而珠帽繡衣。稍明理者。必不當墮此陋習矣。滿月拿周。即是慶生。張本並須從簡。男子生三月。髻女一月。髻。父命之禮。如是止矣。受賀饗客。何爲耶。

失物

凡物自當謹守。防閑有法。毋令所失。萬一有失。此自己不能謹守之過。且只忍着。不可猜人。及輕聽人言。輒至僕婢房中搜索。搜出則喪其廉恥。搜不出則彼反有辭。若公家僕婢及他家人。尤不可妄指。每因失物。反惹是招非。增添閒氣。

此不可不深思而切戒也。

勤儉

勤儉乃治家之本。爲讀書人婦。尤要講究。每見人家丈夫。姿稟絕勝。往往其妻好佚妄用。家計日落。時不勝內顧之憂。并學業亦廢者有之。語云。家貧思賢妻。此至言也。內外之事。並須細心綜理。寬而不弛。方合中道。雖新婦無預外事。而今日房中之人。即他日受代當家之人。故須預習勤儉。爲新婦貪懶好閑。多費妄用。養成習氣。異日一時難變矣。戒之戒之。凡家裏要做事務。並須及早趨完。蓋先時則暇豫。後時則忙促。忙促則難爲力。暇豫則易爲功。先之勞之。爲國之經。亦治家之經也。無事切勿妄用一文。凡物須留贏餘。以待不時之須。隨手用盡。俗語所謂眼前花。此大病也。家雖富厚。常要守分。甘淡泊。喜布素。見世間珍寶錦繡。及一切新奇美好之物。若不干我事。方是有識見婦人。

有料理有收拾

凡物要有收拾。凡事要有料理。此又是勤儉中最吃緊工夫。苟無收拾沒料理。

縱使極勤極儉。其實與不勤儉同。正如讀書人。只讀死書。了無處用也。但所謂收拾料理之法。亦非言說可盡。皆在新婦自己心上做出。唯用意深詳者。爲得之。蓋凡事虛心訪求。只管要好。便有無窮學問。雖如日月飲食。煮粥煮飯。至庸至易。愚不肖咸與知能。苟求其至。亦自有精細工夫。況進而上之道理。原自無窮。而可鹵莽滅裂乎。亦如讀書人。作文愈造愈妙。更無底止。新婦唯能不自是而處處用心。則做人作家。俱臻上乘矣。

新婦譜補

東海查 琪石文著

事繼姑

繼姑待媳。稍帶客氣者。世或有之。新婦當此。務以誠心感格。既屬已姑。何分前後。凡事極其誠敬。不假一毫虛飾。阿姑知以真心相待。自然潛孚默奪。并客氣都化了。若新婦胸中。稍有芥蒂。即便形之辭色。初則彼此客氣。既而乖戾無所不至矣。或有新婦先入門。而繼姑後至者。名分肅然。便當一於誠敬。不可生怠慢心。諺云。先來媳婦不怕晚來婆。此言大謬。戒之戒之。

事庶姑

或已爲嫡媳。而家有庶姑。其事庶姑。須一視嫡姑之意。而將順之。而更曲全之。曲全之道。尤宜百般加意。如嫡姑已沒。則待之以和敬可也。不可倚嫡凌庶。致傷庶叔之心。并傷阿翁之心。若已爲庶媳。則宜情摯篤切。極體庶姑之情。嫡姑在堂。則事庶姑以心而體。或稍殺統所尊也。嫡姑沒。并體亦極宜尊崇矣。倘或

庶姑舉止有未合處。新婦只宜以禮自持。和色婉容。規以正道。不激不隨。方爲兩得。

逞能

一應女工。及中饋等務。是婦人本分內事。非有奇才異能。可炫耀也。新婦切不可矜已之長。形人之短。妯娌姑嫂間。每以此而成嫌隙者有之。昔人戒女曰。慎勿爲好。又曰。女子無才便是德。非欲其狀如土偶。一事不爲也。有好而矜。有才而炫。所傷婦德實多。

火燭

火燭關係最大。而新婦房中。尤宜謹慎。凡火箱焙籠。須時時親手檢驗。寧寒無熱。不可因衾衣寒冷。責罵羣婢。一行責罵。彼且得而有辭。火燭之禍。基於此矣。其羣婢臥具。冬日天寒。被絮不可不厚。萬勿許携火爐入榻中。察出定行戒飭。此最悞事。不可不慎也。

古豔樂府

吳江楊 淮蘋蘭著

鳳簫引

秦穆公有女名弄玉。美而豔。好吹簫。時秦人有簫史者。亦善吹簫。穆公遂以玉妻之。因敎玉吹簫作鳳鳴。乃作鳳凰台以居之。一夕互爲吹簫。雙鳳忽集。二人遂乘之仙去。

洞簫一聲皓月圓。秦樓縹緲起雲煙。弱水清淺落雙影。蓬萊突兀登其巔。亦美人亦貴主。亦神仙。他日祖龍遍求海上之三山。何不携簫跨鳳。偕簫史以飛還。

白紵歌

西施生于越之苧蘿村。姓施氏。家居村之西。名因稱焉。有國色。越方圖沼吳之計。遂居之爲奇貨。飾以羅縠。敎以歌舞。令范蠡進于吳。夫差果大悅。乃釋越。于是建姑蘇之台。創館娃之宮。步響屧廊。櫂錦帆。淫歌舞。吳宮追歡日夜。以底于亡。吳亡後。西施隨范蠡泛五湖而去。或曰。沉之江以謝鵠。

夷未詳孰是。

苧蘿村裡柳絮飛。幾家女兒製羅衣。怪底西家有之子。亂頭粗服浣紗溪。亂頭粗服天姿絕。何物老嫗生國色。向人含顰默無言。背人揮淚嬌難匿。一朝應詔入吳宮。珠衫汗濕怯曉風。歌舞追歡樂未央。運籌祗席建奇功。奇功就。伯圖覆畫漿。芙蕖瘦。胥台麋鹿走。響屨廊空館娃秋。遺香殘月昏黃候。

採桑行

邯鄲秦氏女。羅敷嫁邑人王仁。仁爲趙王家令。敷出採桑于陌上。趙王登台見而悅之。欲奪焉。敷善彈箏。作陌上桑之歌。以明其志。趙王乃止。

採桑復採桑。採桑陌上陽。有美人兮執懿筐。綠葉叢中映明光。桑葉嫩。桑條直。使君貴人。寧不識。妾自採桑蠶有食。蠶能吐絲。妾能織。使君一何愚。豈曰桑中禮可踰。獨不念使君有婦。妾有夫。何況夫婿本風流。人言儘可配羅敷。

垓下歌

項王籍有美人名虞。常從幸。及軍敗垓下。漢兵圍之數重。夜聞四面皆楚

歌聲。乃悲歌。忼慨。虞亦從而和之。項王泣數行下。謂虞曰。善事漢王。虞曰。妾聞忠臣不二君。貞婦不二夫。請爲君死。王拔劍背而授之。姬遂自刎死。葬處。生草能舞。人呼之爲虞美人草。

暗啞叱咤萬夫辟。垓下天亡拔山力。八千子弟起江東。沛上亭長烏足敵。惜哉氣盡楚歌聲。慷慨虞兮一劍橫。賤妾請先君前死。羞學劉家之婦甘偷生。嗚呼香消玉碎鐵骨錚。重瞳目中自有睛。美人眞不枉鍾情。灑將碧血化舞草。楚宮漢殿墓木繞。虞兮虞兮千秋表。

金屋貯

漢武幼時長公主抱置膝上。問曰。兒欲得婦否。答曰。欲得。乃指左右長御百餘人。皆曰。不用。復指其女阿嬌。問好否。答曰。好。若得阿嬌。當以金屋貯之。主大悅。乃苦要上。遂成婚焉。

尤物早移人。藍田田有種。爲問儲君歡。好色亦天縱。兒家欲得婦。阿嬌可好否。椒房桂殿常相守。瑤台璇室供箕帚。莫使長門歎白首。一言訂紅絲。定金屋貯。

玉人稱。

懷夢草

漢武帝所幸李夫人病劇。帝臨視。夫人蒙被謝。帝必欲見之。夫人轉側向內。不言。既死。帝追悼不已。使齊人李少翁爲追魂之術。一日鍾山有香草。東方朔採獻。帝懷之。即夢李夫人。因名懷夢草。

六宮誰第一。天子負情癡。耽花豈獨癖。爲看不多時。臥而思。影何翩翩而垂垂。立而望。步何姍姍而遲遲。眞耶幻。是耶非。瑟瑟兮帷風吹。盼彼美兮魂歸。細認還疑不是伊。

當壚曲

司馬相如家貧。遊臨邛。邛富人卓王孫聞爲令貴客。招之飲。酒酣。請相如鼓琴。卓女文君寡而好音。竊聽之。相如聞其美。以琴心挑之。文君悅而奔焉。相與馳歸。家徒四壁。無以爲業。乃賣其車騎。酤酒於臨邛之肆。文君親爲當壚。相如著犢鼻褌。與傭保雜作滌器于市中。氣豪甚。

君挑琴。妾知音。君提壺。妾當壚。君脫鷄鶩勸妾醉。妾暈芙蓉報君媚。夫作酒家傭。妾作酒家婦。噫嘻吁嗟乎丈夫。何不高車駟馬臨帝都。而乃著禪滌器仰鼻息于臨卽之酒徒。吁嗟乎。

出塞曲

昭君齊國王穠女。獻于元帝時。宮人既多。帝不能別房帷。乃令畫工圖之。披圖召幸。于是宮人爭賂畫工。昭君自恃其貌。志不苟求。工遂毀其狀。會單于入朝。求美人爲閼氏。帝敕以宮女賜焉。昭君抑鬱。自請掖庭令求行。單于臨辭。帝召女示之。昭君豐容靚飾。光射漢宮。顧影徘徊。竦動左右。帝悔欲留之。重失信于異域。遂與匈奴。昭君即戎服乘馬。提一琵琶。出塞而去。

颯颯寒風和鬢簾。紫臺青塚吞聲泣。廟堂戰勝仗蛾眉。詎曰佳人傾城國。肉食者鄙謀帷幄。畫工之賤操黜陟。長抱琵琶鎖玉門。嗚呼佳人難再得。黃沙攪地翼天飛。不改塚草青青色。嗚呼佳人難再得。徒殺畫工亦何益。

紈扇歌

班婕妤少負才名。成帝選爲婕妤。有寵。上嘗遊後庭。欲與同輦。婕妤辭。上賢之。及飛燕姊妹用事。譖其咒詛。考問之。對曰。修正尙未蒙福。爲邪欲以何望。使鬼神有知。必不受不臣之愬。如其無知。雖愬何益。上直其對。置不問。婕妤恐久見危。乃求養太后于長信宮。作紈扇歌以自傷其遇。

扇擎于前。月圓于天。今夕何夕。與子流連。一解扇藏于篋。月圓復缺。樂不可再。悲曷其極。二解光映碧空。皎潔誰同。長信月冷。其奈秋風。三解嗟嗟紈素。合歡見妬。避熱趨涼。毋逢薄怒。四解

赤鳳來

趙宜主身輕腰細。若人手執花枝。顫顫然。因善蹻步。行號爲飛燕。流寓長安。日習歌舞。後藉陽阿主力得入。幸拜爲皇后。寵冠六宮。肉肌盈實。其初承恩時語也。帝嘗與后共泛太液池。令所愛侍郎馮無方吹笙。中流風起。后揚袖曰。仙乎仙乎。去故而就新。甯忘懷乎。帝曰。無方爲我持后裾。無方

捨笙持后履。久之風霽。后泣曰。帝恩我。使我仙去不得。泣數行下。帝愈愛焉。又嘗通于宮奴燕赤鳳。宮中爲作赤鳳來曲。

火德衰。赤鳳來。肉肌盈。實齒痕在。仙乎飛去。寤忘懷。豐有餘。柔無骨。六宮環視。都無色。浴蘭室。避風台。燕啄皇孫。最可哀。

姊妬我

合德宜主妹。宜主旣貴。樊嬃爲言于帝。帝遣舍人呂延福以百寶鳳毛步輦迎合德。合德謝曰。非貴人姊召。不敢行。願斬首以報。延福還奏。嬃爲帝取后五采組文以召合德。遂因后以進。帝大悅。號爲溫柔鄉。謂嬃曰。我老是鄉矣。時披香博士淖方成在帝後。唾曰。此禍水也。滅火必矣。後封昭儀。昭儀見后。好爲兒拜。又嘗與后爭通燕赤鳳。后怒。以杯抵昭儀曰。鼠子敢嚙人乎。昭儀曰。穿其衣。見其私足矣。安在嚙人乎。樊嬃扶昭儀爲拜。后亦泣。儀拜且泣曰。姊寧忘長夜苦寒。使合德擁姊背耶。今忍自相搏耶。后亦泣而罷。帝聞其事。畏后不敢問。以問昭儀。昭儀曰。姊妬我耳。以漢家火德。故

以帝爲赤鳳事隱。後以媚藥進帝。帝崩。太后使理其事。遂嘔血而死焉。
鸞誥驚聞下九重。鳳輦百寶宮車從。不夜珠照玉人兩。金霞帳擁雙芙蓉。五采
組文姐召妹。姊作貴人妹兒拜。丈夫富貴易驕人。何況區區女子輩。願相憐。母
相傾。姊妹本是同根生。穿衣見私何必爭。石華廣袖留姊吐。點點滴滴成花朵。
可畏人言水滅火。非妹不知姊死所。奈何姊妬我。

十八拍

蔡文姬名炎。中郎女也。幼慧。工文詞。中郎絕愛之。漢末遭亂。爲匈奴左賢
王掠去。陷其中數年。生二子。常鬱鬱不得志。作胡笳十八拍。淒怨哀咽。聞
者流涕。後曹操念中郎舊誼。遺金贖歸。以嫁董祀。胡笳十八拍。遂流傳中
國焉。

寂寂江山如故。渺渺家園何處。夢魂仍逐塞雲飛。依稀尙記來時路。死爲漢鬼
生胡婦。縱有離愁誰訴。何如紅淚滴黃沙。灑作秋風秋雨。

江東秀

漢末喬公有二女皆國色。流寓江東。孫氏兵起。伯符納大喬。以小喬妻周瑜。未幾伯符卒。瑜佐其弟權。破曹軍於赤壁。後瑜亦早夭。

東吳萃俊物。妙選得孫郎。辛苦參帷幄。戎服助紅妝。江以南。鼓聲震。江以北。風雷迅。大兒伯符小公瑾。可憐銅雀漏春光。長江水。赤壁火。八十萬曹軍。爲猿鶴。爲蟲沙。爲灰燼。幸哉兵一交。伯圖定。惜哉鼎三分。將星殞。生瑜生亮。扼英雄。錯恨佳人多薄命。

玉人兩

蜀甘后。沛人也。玉質柔肌。姿態光艷。先主召入。致白紗帳中。于戶外望者。如月下聚雪。時河南獻玉人高三尺。乃取置后側。曰。不意我玉人。乃有兩也。于是嬖寵者。非惟嫉于后。亦且妬于玉人也。

懷璧者奚罪。抱璧者奚泣。品而重之。抵兼金之萬鑑。比佳人兮二而一。謂玉爲人。溫潤而身。謂人如玉。不雕不琢。何以失之。吳魏得之。蜀君不見。枕戈待旦兮。消壯士之髀肉。玩物喪志兮。亂英雄之心曲。彼美人兮。安臥帳中兮。何不鋤而

去之曰非吾族。

淩波曲

甄后本袁熙婦。魏武破湖北。中郎將世子丕獲之。見其美。遂納焉。魏武聞之情不懌。曰。今年殺賊爲此奴。盖亦有意于甄也。後文帝即位。立爲后。陳留王子建作惑甄賦。復以其名不雅。改爲洛神賦。亦寓意甄云。

燃荳其釜中泣。乘飛鳧波中立。有心得無心失。殺賊今年爲此奴。洛水神交夢有無。父兄子弟爭一偶。獨不念彼亦袁家之新婦。

墜樓哀

綠珠姓梁。白州博白縣人也。生雙羊角山下。美而豔。時石崇爲交趾採訪使。以眞珠三斛致之。珠善吹笛歌舞。崇嘗作懊儂曲。贈焉。趙王倫黨孫秀使人求之。崇不聽。秀怒。乃譖崇于倫族之兵至。崇顧珠而泣曰。我今爲爾獲罪矣。珠號慟曰。願效死于君前。遽墜樓而死。崇棄東市。時人名其樓曰綠珠樓。

生珠江。死金谷。珠沉珠碎。季倫族。值得眞珠聘三斛。黛蛾綠。顏色不隨人反覆。掌上珠。貴重不共絮飄。逐燕啄香泥。葬落紅。片片桃花鬼夜哭。

錦廻文

蘇若蘭名蕙。扶風寶渚妻也。年十六。歸于寶渚。渚甚敬之。後渚納寵姬趙陽台。置之別所。蘇求而獲焉。苦加捶辱。渚甚恨之。及渚鎮襄陽。邀陽台同往。蘇往不與偕行。音問遂隔。于是悔恨自傷。織錦廻文。五采相宣。瑩心耀目。其錦縱橫八寸。題詩三十餘首。計八百餘言。顛倒反覆。皆成文章。名曰璇璣圖。一時讀者不能盡通。蘇笑謂人曰。徘徊宛轉。自成文章。非我家人莫之能解。遂發蒼頭賁送襄陽。渚覽錦字。感其情。迎蘇至漢南。恩好如初。良人天涯去不返。雲山翹首千重巘。迴腸百結織迴文。文成不覺玉容減。一寸絲絲不斷皆愁思。一行字字端詳皆血淚。郎留意。顛倒縱橫湏記。須記取。糟糠莫使輕相棄。新人想必勝如花。故園春色多憔悴。願郎留意新故須同視。

西陵歌

蘇小小。錢塘名妓也。有西陵歌。情致移人。膾炙人口。

郎乘青驄馬。妾乘油壁車。邂逅西陵路。迴風送落霞。郎情無厚薄。妾情無淺深。有如西湖水。松柏結同心。

步步蓮

潘妃名玉兒。齊東昏侯拜爲貴妃。嘗鑿地爲金蓮花。令妃行其上。曰。此步步生蓮花也。後梁武入建康。見妃色美。欲納之。將軍王茂諫曰。亡齊者此物也。不可留。遂殺之。

一步東昏傾。再步梁師入。三步建康失。爲蓮花。爲禾黍。爲荆棘。千秋難辨。蹈荒色。噫吁嘻。齊庭有鬼不廟食。先見禁門相喋血。非關蓮步美人跡。試問亡梁又何物。

女從征

木蘭姓花氏。北魏人也。時發卒戍邊。木蘭憫父年老無子。代之行。在邊十二年。始得歸。同戍之人。竟莫有知其爲女子者。

軍有令。弗可違。堂有親。弗可委。健兒生女。請勿悲。爲王前驅。代父荷戈。君看女。却是門楣。我聞在昔。拓拔擾宇宙。旁午軍書風雨驟。花家有女。貌如花。彎弓抽矢。停織綉。金印大如斗。奏凱慰白首。一身許國。全親兩無負。嗟彼株守戶。老死牖。生生死死。不出婦人手。腐草累累骨已朽。世無奇男子。雌木蘭誰其偶。

無愁曲

馮小憐。穆黃花。從婢也。因愛衰。以五月五日進之。號爲續命。慧黠善彈琵琶。後主愛之。立爲淑妃。帝嘗與共獵。晉州告急。帝將還。淑妃請更殺一圍。帝從其言。及至晉州。城已沒矣。作地道攻之。城陷十餘步。將士乘勢欲入。帝敕且止。召淑妃共觀。妃妝點不獲時至。周人以木塞城。遂不下。又與並騎觀戰。陳稍却。妃恠曰。軍敗矣。帝與並奔。師遂潰。時號無愁天子。後齊亡。入長安。後主向周武帝乞妃。周武仍賜焉。

春宮傳試馬。烽火遍郊野。內人罷回獵。新妝傾城國。山河百二棄。敝屣琵琶一曲愁亡矣。吁。金蓮生步南齊蹶。黃花留蒂北齊滅。不願長封歸命侯。願乞小憐。

老溫柔。家亡國破亦何柔。

赤樹謠

陳張貴妃名麗華。髮長七尺。光可鑑人。瞻視盼睐。照映左右。後主起臨春。結綺望仙三閣以居之。妃常于閣內靚妝憑檻。宮中望之飄飄若神仙焉。與諸狎客共賦詩。互相贈答。採其尤豔麗者。被以新聲。名其曲曰玉樹後庭花。後隋滅。陳後主與妃共入景陽宮井。因號胭脂井。相傳後主與妃淚染所致云。

漢有陰麗華。文叔思娶妻。陳有張麗華。後主爲選妃。一終后。一作俘。胭脂井上血模糊。玉樹流光不可誣。得婦不當如是乎。嗚呼阿麼空有好頭顱。叔寶心肝未全無。

破鏡詞

陳太子舍人徐德言之妻。後主叔寶妹。封樂昌公主。陳將亡。德言知不保。謂曰。以君之才色。國亡必入權貴之家。斯永絕矣。倘情緣未斷。猶冀相見。

宜有信物。乃破一鏡。各執其半。約曰。他日必以正月望日。賣于都市。可以相訪。及陳亡。其妻果爲越公楊素所得。寵嬖殊甚。德言流離至京。遂以正月望日。訪于都市。有蒼頭賣照者。大高其價。人皆笑之。德言直引至其居。言其故。出半照合之。題詩以寄。陳氏得詩。涕泣不食。素知之。愴然。即召德言。還其妻。仍厚遣之。遂偕歸江南。以終老焉。

七尺菱花。八寶妝。美人相對。生輝光。美人一去。明月冷。青鸞無復。嫦娥影。最憐奩匣。滿塵封。猶染當年。點淚紅。人生不幸。遭離亂。致使圓光。剖作半。鏡兮鏡兮。縱復完鏡。中人非昔日。顏。

青目鑑

楊素守西京日。李靖以布衣獻策。素踞胡床而見。靖責之。素改容謝焉。時妓妾羅列。內有執紅拂者。負殊色。獨目靖。靖既去。而執紅拂者。臨軒問姓名。居止。靖具以對。妓誦而去。靖歸逆旅。其夜五更。急聞叩門而聲低者。靖啟視。則紫衣紗帽人。杖一囊。問爲誰。曰。楊家紅拂妓也。延入。脫衣去帽。再

拜。靖驚答之。叩來意。曰。妾侍楊司空久。閱人多矣。無如君者。來相就耳。靖曰。如司空何。曰。彼尸居餘氣。不足畏也。計之詳矣。幸無疑焉。問其姓名。曰。張。問其伯仲之次。曰。最長。觀其肌膚形狀。言詞氣息。真天人也。于是偕與雄服策馬排闥而去。

長安古今一棋局。朝暮夜趨多碌碌。重天富貴倚冰山。龍蛇不辨羣無目。尸居氣。楊司空。出羣雄。李衛公。中原鹿。共馳逐。此也雄飛。彼也雄伏。海上豪定局。猶待東南角。王者師執拂。凝眸早已卜。

長門怨

隋煬帝建迷樓。後宮無數。多不得進御。有侯夫人者。忽自縊于棟下。臂懸錦囊。左右取進。得自感詩三首。妝成詩一首。自傷詩一首。皆情至之語。不忍竟讀。帝反覆傷感。親往視其尸。猶色如桃花。乃厚葬之。選女中使賜自盡。

國色難邀寵。幽宮祇自憐。君恩誠已遍。妾命奈無緣。貌不因人妬。情能任棄捐。

淚盡羞鸞鏡。血枯啼杜鵑。悲莫悲于恩波相承不及泉。

秀色餐

隋煬帝幸江都。一日憑龍舟檻注視。見殿脚女吳絳仙。長黛柔肌。迴異群輩。召幸焉。將拜。婕妤又因絳仙已嫁玉工萬群。故已之。擢爲龍舟首。機號曰。崆峒夫人。由是殿脚女爭效爲長黛。司官吏日給螺子黛五斛。內人尙多不給。帝常吟持機篇。賜絳仙。謂左右曰。古人云。秀色可餐。若絳仙真可療肌矣。

持短掉。持短掉。三千殿脚羞花貌。描長黛。描長黛。三千殿脚摹嬌態。玉工有婦眞玉人。秀可療肌色可餐。誰將十斛波斯螺。勾出廣陵新月痕。千載尙銷魂。無怪當年看煞隋家風流之至尊。

司花女

隋煬帝遊廣陵。長安貢御車女袁寶兒。年十五。纖腰愁態。寵愛特厚。適洛陽進合蒂花云得之嵩山。塢中人不知名。采者異而貢之。帝因賜名曰迎。

輦花花香濃芬馥。惹袖移日不散。嗅之令人減睡。醒酒。帝即以賜寶兒。號曰司花女。

君王愛花花傍輦。美人司花花貌覩。十分春色滿隋堤。第一迎鑾一枝選。旭日臨花花態愁。宿雨潤花花半酣。司花顰袖花影移。司花垂肩花魂語。十里紅樓曉風吹。風香憐護司花女。

來夢兒

煬帝荒淫。沉酣失度。每睡須侍兒韓俊娥搖動振聳。方得美睡。因呼俊娥爲來夢兒。

夢揚州。花月愁。夢巫峰。雨露濃。阿麼夢蝴蝶。俊娥傳羽翼。阿麼夢蕉鹿。俊娥爭角逐。嗚呼迷樓月。觀鰐脂冷。秋草雷塘夢未醒。淚零淒雨咽悲風。夜台無復姮娥影。

女主昌

武氏初爲太宗才人。賜號武媚。貞觀末年。太史占曰。女主昌民間。後高宗

欲立爲后。褚遂良諫。帝不聽。許敬宗曰。田舍翁歲收十斛麥。尙欲易婦。況天子乎。帝遂決。后旣立。與帝垂簾並聽政。帝不能制。及高宗崩。后廢廬陵王而自立。改國號爲周。恣爲淫穢。大興殺戮。然見事明決。用人盡才。故雖女主當陽。不及于亂。時亦有負名望若狄仁傑輩咸翼戴之。恬不爲耻。中宗返政。後人猶許以爲返周爲唐云。

金輪御世仙根覆。陽消陰亢果殺戮。一時鬚眉變婦人。彈冠傅粉眞膏沐。咄哉武媚。若將男子擬爾匹。性殘刻。前孟德。性狡淫。後海陵。爾立七廟。誰爲爾添羽翼。爾設五刑。誰爲爾興羅織。朝聞告密反舌鳥。夕聞援救叩頭蟲。咄哉武媚。千古絕一世雄。立后功。許敬宗作帝力。狄仁傑。

玉尺評

婉兒上官儀之女也。母夢人授玉杵而生。幼慧多才華。武后時沒入掖庭。中宗反政。立爲昭儀。駕幸昆明池。令諸詞臣賦詩。婉兒登玉尺樓。評其次第。時沈佺期宋之問各自負一時冠。未分甲乙。私語曰。今日我二人次第。

定矣。毋得爭。是時衆人詩之不佳者。盡隨風飄落。盈覆玉階。獨沈宋兩人詩未下。各屏息以待。頃之一帋飛落。二人愕然。拾而視之。則沈句也。評曰。二人詩實相韻。煩。但沈詩收聯怯。不及宋餘勇可賈。二人服其敏。各無辭而退。

夫人負鬢眉。巾幘作座主。昆池誇量才。沈宋建旗鼓。盧耶駱耶羞同伍。臨天下者韋與武。太平家。安樂府。紛紛鷹犬爭門戶。筆如龍。文如虎。有才無行無足數。嗟彼蛾眉玉尺亦輕取。

樓東怨

梅妃姓江氏。年九歲。能誦二南。謂父曰。我雖女子。期以此爲志。父奇之。因名之曰采蘋。高力士使閩越。見其美。選歸侍上。大見寵幸。妃性愛梅。所居悉植梅。遂號梅妃。及太真入宮。寵愛漸移。太真忌而智。妃性仁慈。柔無以勝。竟爲太真譖。遷于上陽東宮。妃抑鬱無聊。作樓東賦。獻上。倍極淒涼哀感。上覽之情動。懼拂太真意。不果復召。遣中使封珍珠一斛密賜妃。妃不

受題句返封。中有何必珍珠慰寂寥。令使者進上。上命樂府以新聲度之。號一斛珠。

名花初入上陽宮。晴日含芳弄曉風。亭北沉香春爛漫。風風雨雨妬樓東。海棠開。江梅落。解語香。冰心薄。肥綠成陰瘦枝弱。空留月影伴樓東。吁嗟乎寂寥難把珍珠却。

馬嵬坡

楊妃小字玉環。宏農華陰人。開元二十二年冊爲壽王妃。武惠妃薨。後宮鮮當意者。或言壽王妃之美。二十八年。使高力士取妃于壽邸。度爲女道士。號太真。天寶四載。冊爲貴妃。進御之日。奏霓裳羽衣曲。是夕。授金釵鈿合爲定情焉。後通于安祿山。祿山出入禁中無忌。嘗爲洗兒戲。上知之。付之一笑。及祿山出鎮范陽。舉兵反。思至長安日。取貴妃爲后。上幸蜀。駕至馬嵬。六軍不發。殺貴妃兄國忠。并索貴妃。上不得已。賜妃自盡。後至劍門。作雨零鈴曲。皆悼貴妃也。

君不見五侯七貴聯雲騎。丞相門楣仗女弟。又不見蛾眉淡掃風流姨。金門走馬朝天帝。誰知樂極却生悲。半夜漁陽鼙鼓催。六軍不發馬嵬驛。始悔卯翼大腹兒。霓裳歇。羽衣裂。天子不能庇家室。倉皇割愛謀生拙。絕代紅顏化黃土。行人莫歎馬嵬路。前車試讀樓東賦。

朝天詞

太眞第三姊虢國夫人者。在諸姨中尤爲美豔。得幸于上。月給錢十萬。爲脂粉資。虢國自矜豔麗。每出入禁中。常素面朝天。故杜甫有詩咏其事。誌實也。賜第在宮之東南。與國忠秦韓相對。雕梁畫棟。窮極奢侈。入朝恒與國忠並轡。人皆笑之。後因馬嵬之難。死于亂兵焉。

有女有女乘玉驄。揚鞭顧盼鳳闕東。新妝墮馬映旭日。內家導節上陽宮。上陽花放春如錦。一枝穠豔難與並。錦匿間道走奇兵。淡掃遠山開新境。貴妃姊。天子姨。披香殿。進昭儀。漢家故事傳軼史。九重雨露古無私。君不見朝天素面天顏喜。蛾眉妬煞玉環姊。

西廂月

鶯鶯姓崔。名徽。小字鶯鶯。號雙文。博陵人也。偕母護喪歸長安。及蒲東。適有叛兵掠蒲。因寓普救寺之西廂。同寓有張生者。與蒲將善。請兵護之。不及于難。其母甚德之。設饌宴張。令子女出拜。鶯垂鬟接黛。雙頰斷紅。光彩射人。張一見而惑焉。乃倩鶯婢紅娘。私通衷曲。紅初難之。既因生情迫切。乃爲持生所綴春詞二首。以投鶯。久之。復携彩箋以示生。曰。鶯所命也。中有待月西廂之約。及期。生赴之。鶯以禮責生。不及于亂。生悵然而出。踰數夕。生方獨寢。無聊。紅忽捧鶯而至。授生綢繆。永夕無一言。雞鳴。紅復促鶯去。如是者幾一月。生因賦會真記。及詩三十韻。以貽之。後生赴長安。文戰不利。復貽書于鶯。鶯緘報之書。累千言。情辭婉轉。言與淚俱。無非怨生始亂終棄也。生每持緘以示友。故同時楊巨源爲賦崔娘行。或曰。會真記。乃元微之所作。蓋託名于張云。

西廂月。皎皎潔潔誰圓缺。三三五五千古懸。玉人綰就相思結。憶昔嬌姿初束。

髮。庭院深深阿母挈。十三學畫眉。描取新勾月。十四學彈琴。斜抱雲和月。十五學弄簫。吹徹碧天涼夜月。整待十七賦三星。鐘冷無如夜氣沉。光落牆東花動影。薄衫不禁露華侵。彩雲散。香塵滅。人去西廂寂。阿誰問取舊時月。

妾薄命

霍小玉故霍王女也。王沒後。偕其母出居長安之勝業坊。時隴西李益負才名。以少年試天官。玉慕其風調而委身焉。定情之夕。若瓊林玉樹。互相激射。益此時幾疑身之入仙境矣。中宵玉忽流涕。恐後色衰見棄。益命侍兒牽帷執燭。援筆而書盟詞。詞甚懇切。及後益得官返鄉。約之任迎。玉歸家。竟別娶盧氏女。踰年不通音問。玉抱恨成疾。懨懨將至不起。益復至長安。路過玉門。每迂道而避焉。忽一日有豪士衣黃衫。策駿騎。挾益直達玉所。玉已徵夢梳洗而候。含睇視益。不能出言。坐皆歔歔。頃之。豪士致酒餚。玉舉杯酌地。謂益曰。我爲女子薄命。如斯君是丈夫負心。若此。飲恨黃泉。皆君所致。擲杯長慟而絕。後益寢處。輒見玉焉。豈玉尙不能忘情于李乎。

君丈夫。妾女子。薄命之薄。至于是。負心之負。何若此。中道棄捐。已可傷。鬱鬱奈何。令人死。死者今已矣。生者恐難爲情耳。十郎十郎。須記取。憐取新人。莫作故人視。天長地久。從今始。妾薄命。君休已。

燕子樓

盼盼關氏。徐州張建封愛姬也。尙書沒後。盼盼念舊不嫁。十餘年獨居一小樓。名曰燕子。因作詩以寓意焉。時白樂天見其詩。愛之。遂和其韻。又贈句以相諷。盼盼得詩。讀之。泣然下淚。曰。自我公逝。妾非不能死。恐千載以下。以我公重色。有從死之妾。傷公盛德也。于是乃作詩答白。遂不食死。紅樓飛燕子。九十逗春光。明霞方啟戶。美人正曉妝。蹁躚泥塗金屋。營窟不辭勞。朝夕雙飛逐。春色去。樓外落花知何許。歸燕啾啾猶戀主。樓中人。樓中燕。送熱迎涼雨。風楚孤影單。樓吾與汝。非吾與汝誰共語。嗟乎哉。他日空梁落燕泥。殘脂剩粉同埋處。

惜黃花

李易安名清照。宋濟南李格非之女。適趙明誠。明誠雅好書卷。夫婦相得。日事鉛槧。堆積書史。以決勝負。及靖康中。金人南侵。奔走不定。所蓄殆盡。明誠亦病死。易安誅之極哀。再適張汝舟。未幾反目。多悔恨之詞。有漱玉集三卷行世。簾捲西風人比黃花瘦。漱玉詞中語也。

嗟汝黃花。何不凌霜暴。日披風躡月。而乃墮乃金。減乃色。弱乃骨。爾何弗如梅。耐彼寒威。抑爾何弗如蘭。傲彼衆香。爾何弗勵爾晚節。天嬌卓立。爲松爲柏。嗟汝黃花。惜哉空灑西風泣。

斷腸吟

朱淑真。錢塘人也。幼警慧。早失父母。適夫村陋。淑真抑抑不得志。自傷非偶。作詩多幽怨之音。宛陵魏瑞輯其所遺詩名之曰斷腸集。

我欲留春春不住。我欲送春春不去。可知不忍覩春光。爲覩春光易斷腸。楊柳絲絲繫恨。梨花片片銷魂。掩重門。怕黃昏。冷流蘇。濕淚痕。夜雨零鈴聲。聲滴愁人兩耳聽不得。曉風苔砌滿落紅。斷腸百結啼鵲血。

女黃冠

伯顏破臨安。六宮盡北轅。昭儀王清蕙。題滿江紅詞于驛壁。音調激昂。結曰。願嫦娥相顧。肯從容。隨圓缺。文文山見之。爲之惋惜。曰。夫人于此少商量矣。亦作二詞以和之。于是膾炙人口。和者林立。後入北。乞爲女道士黃冠以返故鄉。

南渡衣冠凌夷也。鬚眉若個男兒者。君不見補天正氣。燕市血灑。撼天怒濤。崖山骨捨。烈士殺身甘殉名。美人出世眞耶假。塞上烽烟塞上塵。碧天難問姮娥寡。哀哉窮笠雲鬟返故鄉。大江南北無宗社。

十香詞

遼懿德皇后蕭氏。母夢明月入懷。復升中天。爲天狗所食。驚寤而生。后姿容絕世。兼擅詩詞琵琶。觀音其小字也。清寧元年冊爲后。是日后方出閣升坐。忽有白練一段。自空吹落。上有三十六三字。后問何意。左右對曰。此天書敕后領三十六宮也。玉飾首金飾足。觀音爲后。皆宮中頌后語。后嘗

作回心院詞以望幸。伶官趙惟一演爲曲。耶律乙辛欲傾后。使宮婢單登作證。誣后與惟一私通。更使人作十香淫詞。令登給后手書。及后所題懷古詞爲據。密奏上聞。上大怒。命參知政事張孝傑與乙辛窮治其獄。酷刑煅煉。皆爲誣服。獄具上。猶未決。孝傑指后懷古詞文致之上。意乃決。族誅惟一。敕后自盡。遂符白練之徵。

古人亦有言。無才便是德。三復十香詞。椒房增歎息。玉飾首。金飾足。觀音爲后千古絕。三十六宮人第一。底事叛家奴。流香授彩筆。點與染。因妬嫉。風與波。起羅織。黠哉乙辛。明月入懷飛而食。忍哉孝傑。法吏下石蔽天日。哀哉懿德。惜未聞婦人無才便是德。回心院。生荆棘。十香詞。悲何極。

月下笛

元順帝寵妃程一寧未得幸時。嘗于月下登翠鸞樓。倚闌弄玉龍笛。情極悲愴。帝聞而召幸焉。謂寧曰。玉笛卿之三弄也。可封爲圓聚侯。自是寵愛日隆。改其樓名爲奉御樓。

天子方耽天魔舞。宮人自弄月下笛。月下笛。花枝泣。羊車未知何所適。銀河倒瀉銅壺滴。一聲吹徹翠鸞樓。萬里關山聞裂石。按玉龍。心如搗。君王若不惜蛾眉。賤妾何辭長門老。韻悠揚。聲杳渺。倩風吹落餘音願向君前繞。

薄皇后

徐妙錦中山王達第三女也。長兄輝祖殉難時抗節繫獄。次兄增壽圖出降。爲建文帝所手戮。姊卽仁孝皇后。后薨。帝欲聘之。妙錦矢志不從。遂守貞不嫁。至宣德中入宮朝張太后。自稱徐達第三女。宮人竊私語曰。此薄皇后而弗爲者。

有所思。自古有讓天子無讓皇后。有之自中山王達第三女始。父居開國功。姊亦侍宸宮。妃后尋常耳。名節垂青史。有所思。賤妾生無富貴骨。願稱故臣徐達女。不樂與高皇帝子匹。至尊委禽敢請辭。有所思。長兄魏國抗節且釋囚。次兄定國乞降身亦死。思何起。思何止。思之思之。電火光華。妙錦悟之。早久矣。

負明山

臨淄妓王翠翹能新聲。善琵琶。徙居海上。倭入寇掠之去。爲塞王越人徐海號明山和尚者所得。海故嘗與翹善。絕愛幸之。寵爲專房。會中丞胡梅林勦寇無策。遣華老人誘海降。海怒欲殺之。翹爲救得釋歸。于是中丞更遣華資金珠賄翹。且陰許海以富貴。令海屠其黨以自拔。翹力贊海。海勉從之。及事成。胡負約。以重兵出不意擊海。海倉卒赴水而死。凱旋大享軍士于幕府。令翠翹行酒。酒酣與亂。醒後悔之。仍以翹功高。乃賜所調永順酋長。翹與渡錢塘。泣而歎曰。明山遇我厚。我以國事故悞誘殺之。不意戮一酋更屬一酋。何面目復生世間乎。竟投江而死。後胡亦以非罪斃。獄人咸以爲負心之報云。

飄以忽。海水立。猖與狂。海波揚。吏胥誅索居無所。徒手水濱走絕土。爲良命如草。作賊名如虎。可憐沿海民。日怕東南風。豪哉海上雄。舊歡擁帳中。汪洋大海盤踞出。沒難與爭鋒。中丞將紅顏仗。誘殺降。奇功上。噫異矣。首功不錄。何可辱。宗憲歡翠翹哭。一身爲國殉錢塘。死見明山何面目。寄語中丞善保富貴母。反

覆不然且爲明山續。

廣陵花

小青姓喬氏。家廣陵。生而夙慧。丰神逸豔。年十六。歸武林馮生。生性蠢俗。婦又奇妬。遷青于孤山別業。以幽之。青悵抑無聊。作詩多哀婉之音。令人酸鼻。惟婦之戚屬有楊夫人者。常憐而顧焉。居久之。鬱鬱成病。倩畫工圖其眞。設梨漿以爲奠。一慟而絕。妬婦索其遺詩盡焚之。所存於世者惟寄楊夫人書一。古詩一。七絕十餘首。詞一闋而已。茈茈居士乃爲之作傳。好事者每以詩爲憑弔云。

是廣陵花。何以吹折于武陵之妬風雨耶。貌而才。薄命固無足嗟。吁嗟乎。瘦影憐秋波。無命奈若何。孤燈吟夜雨。有恨向誰語。維貌而才。有一于此。其能免于妬風雨之殘摧。何況並臻其絕佳死矣哀哉。阿青阿青。尙何須顧影而徘徊。

紅橋曲

張紅橋。閩縣人。居於紅橋之西。因以自號。豪右爭欲聘之。悉不從。曰。必得

才如李青蓮老事之耳。于是操觚之士咸託五字爲媒。張第置之無所答。永泰王偁尤所鍾念。至稅其隣以居。竊窺張睡起。投以絕豔佳詞。張怒其輕薄。終不許。福清林鴻道過偁居留宿。亦托鄰嫗投句。張捧詩啟齒。援筆而和。隣嫗返命。爲通殷勤。乃委禽焉。鴻遂舍其家以外室處之。定情之夕。各以其字箋詩互韻。爲瓊瑤之報。唱和香奩。情好日篤。將一年。鴻有金陵之游。乃作大江東詞。以爲留別。張亦依韻賦答。其後往來詞札甚多。皆各踵其前韻。張因念鴻成疾。未幾鴻歸。已鬱鬱而卒。後鴻每過紅橋。輒爲之神癡終日。

美人自古生南國。相思子綴板橋側。遙天巧喙一飛鴻。長棄雙蛾添黛色。大江東去鴻書稀。午夜紅橋燈火微。寄語玉人消減樣。願郎記取帶腰圍。自分紅顏甘薄命。可憐黃土埋青鏡。瘦骨輕軀病避風。嬌花耐得幾回病。步橋東。盼歸鴻。歸鴻無信月華空。倚遍闌杆染淚紅。

返生香

我邑葉工部幼女名小鸞。字瓊章。別字瑤期。少稟夙慧。一門皆負麗藻。而瑤期才色尤獨絕。惜未笄而卒。卒後復有審戒詞一卷。托牘以呈。無葉堂甘神寄跡處也。其他愁言麗句。俱流傳于午夢堂集返生香中。

汾湖諸葉。葉葉爭輝。連枝競艷。幼最蛾眉。香流午夢。粉泣子規。夕秀凝粧。兮飄玉屑。曉霞入戶。兮落珠璣。那知仙夢難留。好花不再。匿鏡捐黃土。粉盒埋紅淚。無葉堂中落葉聲。返魂不響三山佩。

石柱悲

秦良玉者。石柱土司女官也。秦氏世忠貞。其父兄皆以征調歿于王事。故良玉得以女襲爵。能馭下。善將兵。數與流冠戰。皆捷。思陵有御製詩褒美之。後流冠犯蜀。蜀撫邵捷春束手無策。棄險不守。良玉亟見邵曰。蜀之險在邊。若賊進。險則大事去矣。今盡調我溪洞卒。可二萬人。足制賊。不必他兵助。乞中丞移鎮發餉。邵不能從。辭以督師借蜀爲壑。甯撤險待死。良玉扼腕而出。及蜀破。良玉以帚召其下。蓋土司遇至急事。以箬調兵。謂能食

者即赴。以帚則掃境內無遺矣。于是與賊苦戰。一軍盡沒。同時總兵左良玉擁重兵避寇打糧。百姓苦于賊寇如梳。兵如篦。明末謠言官軍殃民甚于賊也。

明季丁陽九。一時兩良玉。男觀望中原。女馳驅西蜀。惜哉同名不同志。倚官作賊男兒事。天生石柱女將軍。爲國赴難請長纓。嗚呼寇如梳。兵如篦。寧南軍過靡子遺。不然何以皇圖墮。寇如麻。兵如帚。掃我境內除小醜。闖乎獻乎幾授首。天子聞之錫優詔。剪逆還師跋扈討。淩煙閣寫美人貌。毋奈將星墜西南。沙場先塗紅顏腦。噫嘻男爲賊導女國殤。左軍未散鼓聲死。秦軍旣潰氣飛揚。良玉良玉孰可羞。孰可傷。

河東君

柳如是。本姓楊。名愛。柳其寓姓也。逸麗工詩。年二十餘。歸虞山錢宗伯。時錢已黜顏。給背雙鬢斑白。柳則盛鬢堆鵝。凝脂竟體。燕婉之夕。錢曰。我甚愛卿如雲之黑。如玉之白也。柳亦曰。我亦甚愛君髮如妾之膚。膚如妾之

髮也。相顧大笑。傳爲美談。宗伯爲作我聞室以居之。戲稱之爲柳儒士。謂人曰。此我高弟。亦良記室也。與之聯句于絳雲樓。更討論于古今文翰。良辰勝節。携之放舟湖山佳處。留連唱和。望者疑爲神仙。後宗伯捐館。其族聚衆交訐于其室。索資無厭。柳軟語欸留之。闔戶自經。令家人急馳報官。于是盡縛凶黨置之法。時人頌其節者。謂牧齋寔有愧于柳云。

如是本佛言。何來入我聞。昔日窺青眼。今日拂絳雲。絳雲樓高勢接天。章台過客願執鞭。海之東。江之南。名花無數爭鮮妍。長條獨有故人憐。膚如玉。髮如漆。相憐相愛紅絲結。膚如髮。髮如膚。憐卿愛卿本丈夫。君領東林袖。妾居北里首。縱不富貴亦風流。壓倒江南花社詩壇齊。却走君虧晚節妾完貞。妾命薄。君顏厚。嗚呼夫沾泥絮婦喬松。白髮天死紅顏壽。

司畫奴

睺娘者。姓易氏。世居松陵之舜水鎮。父好蓄古畫。令睺掌之。呼爲畫奴。復因其星眸流盼。更名爲睺娘。甲申歲。海內鼎沸。睺偕父母避兵于午溪。姑

家故居。悉爲灰燼。亂稍定。父母返家。葺故廬。睵留故處。姑孀居不謹。通於中表潘生。生因其姑而以情詞逗睵。睵嚴拒之。怒辭歸家。匿不以故告父母。恐累于姑之行也。潘固已婚某氏。離其婚。倩其姑求婚于睵之父母。尙未許。姑又附耳密語於睵母。誣睵與生有他故。父母不得已。遂許焉。議婚之事。睵不知也。及入贅。揭帳見良人。卽佻生也。乃大慟曰。姑悞我。伉儷之際。非其本懷。後生挈之歸家。因無行。爲人所黜。怒睵不爲禮。日加叱詈鞭楚。睵中夜作書遺父母。遂自縊。及晨。父母得書。長慟而至。生已舉室潛踪矣。乃殮睵。挾其婢聞香以歸。後數日。忽有豪士躍馬提劍。從碧眼奴排門突入。睵柩前。大呼曰。負心人已殺之矣。解囊疾馳而去。視之中有生頭。髑髏其姑。未幾亦爲盜掠去。人咸以爲睵冤所雪云。

松陵之僻。舜水之濱。天生佳麗。仙貌盈盈。幼掌芸籤。長司畫城。爲憐慧性。爰錫芳名。嗟乎烽烟四起。兮鳳凰飛。殘枝悞集。兮狐鼠窺。長舌工讒。兮肆萋菲。委身瑣類。兮惟一死。噫嘻。縱然天下誠多美。庸奴何福能消此。我欲使恨筆描黛。淚

墨辜態。寫出佳人嫣然睞。是耶非耶。昨夢花間美人在。

七歌哀

魏于雲者。原傳失其字。浙之嘉善人也。家本富。于雲少負夙慧。姿態明秀。其父延師教之。與松陵袁華同學。華與雲乃中表兄妹。故得唱和無間。居久之。二人遂私有紅絲之訂。雲日促華求婚于父母。且曰。我母愛子。求之事必獲濟。白首之盟。可指日而定也。華每託辭以緩其期。既而雲年及笄。華亦歸家。二三年不通音問。雲屢以書招之。華性寡恩。情竟中衰。雲書盈篋。悉置之若無聞。求姻之事寂如也。父母以雲年長。將字同邑他姓。雲情急。復致書于華。并附絕命七歌。誓以身殉。華始情動。求媒於雲父之密友。華有異母兄某者。性最殘刻。聞其事。潛往魏門辱詈。意欲挾此以居奇。于是雲父母竟許他姓所求。不日而納聘焉。至是而雲死志遂決。乃焚其平日所作。中夜醉其婢。復修數柬。多訣別之語。遂投繯而逝。晨起。父母見之。血漬手書宛然。哀而不忍違其志。乃招華付以遺詞。聞者皆爲流涕。後袁


華亦不知其所終。

七歌哀。哀哉。狂且負微才。薄命之薄薄。于紙吹落彩雲作飛灰。可憐魏女目無珠。汗泥浪擲無瑕軀。可憐袁子胸無血。甘作傷心人情滅。我讀七歌絕命語。愁言未竟淚如雨。紅顏薄命一何多。于雲惜遇非其侶。王魁李益得君三。負心公案可同參。七歌哀。哀何似。自悞早拚一死耳。九轉迴腸猶如此。我恨袁華不足誅。于雲嗚咽泉臺裏。

古豔樂府跋

仇實父二十四美人真蹟。凡四脫稿。未三百年。已如威鳳。即藏弄家且亦不能枚舉其名矣。余從祖吸江嘗彙古今名媛。各以本事製爲樂府。兼繫小傳。自先秦以迄國初。凡五十人。珠光璀璨。令人色舞眉飛。余嘗戲謂樂府固佳。再得丹青妙手。如實父輩各繪小影。左圖右詩。襲貯檀几。當不必更憂相如四壁也。甲午秋日。侄孫復吉識。

香艷叢書三集卷三終



香艷叢書

第三集

HQ
1737
1175
11/2

香艷叢書

三集卷四

比紅兒詩註自序

唐摭言羅虬辭藻富瞻與宗人隱鄴齊名咸通乾符中時號三羅廣明庚子亂後去從鄜州李孝恭籍中有紅兒者善肉聲嘗爲貳車屬意會貳車聘鄰道虬請紅兒歌而贈之繪綵孝恭以貳車故不令受所貺虬怒拂衣而起詰旦手刃（吉按雅雨堂刊本摭言手刃下有紅兒二字）絕句百篇號比紅兒詩大行于世據摭言有手刃二字太平廣記遂衍爲羅虬手殺紅兒等語余思虬果因孝恭之阻當怒在孝恭與紅兒何涉虬乃遷怒於無能弱女亦不成丈夫矣其詩何傳乎且虬原序並無怒意細閱摭言詰旦手刃卽接絕句百篇似有譌字闕文然讀至終篇眞紅兒歿後憐之而作也手刃之事未知有無而紅兒則因詩而如繪矣潞河客館枯坐無聊友人以故實來問者旣縷答之因裒集分註各詩之下亦博覽之一助也乾隆壬寅日南至嘉興沈可培識



比紅兒詩註

嘉興沈可培向齋著

唐羅虬原序。比紅者。爲雕陰官妓杜紅兒作。貌麗年少。樸智慧悟。不與羣女等。余知紅者。乃擇古之美色。灼然稱於史傳者。優劣于章句間。遂題比紅兒一百首。

雲間翡翠一雙飛。水上鴛鴦不暫離。寫向人間百般態。與君題作比紅詩。此百首總冒以翡翠鴛鴦情好之密。叙情好之由。

姓氏堪侵尺五天。芳名占斷百花鮮。馬嵬好笑當時事。虛賺明皇幸蜀川。唐俚語云。城南韋杜。去天尺五。首句切杜。唐書。安祿山反。元宗幸蜀。至馬嵬驛。將軍陳元禮。以禍由楊國忠。欲誅之。會吐蕃使者遮國忠馬。訴無食。軍士呼曰。國忠與虜謀反。遂殺之。上出驛門。令收隊。軍士不應。元禮對曰。國忠謀反。貴妃不宜供奉。上令力士引妃於佛堂縊殺之。此言紅兒美於玉環。明皇因寵玉環。以致幸蜀。眞爲不值。

羽化嘗聞赴九天。只疑塵世是虛傳。自從一見紅兒貌。始信人間有謫仙。
如杜蘭香是天上謫仙。然徒聞其名耳。今見紅兒。始知真有謫仙。非虛傳也。
月落潛奔暗解攜。本心誰道學單棲。還緣交甫非良耦。不肯終身作羿妻。

（王充論衡）羿請不死藥於西王母。羿妻姁娥竊以奔月。託身於月。是謂蟾蜍。
（洛神賦）感交甫之棄言兮。文選註。鄭交甫遵彼漢皋臺下。遇二女與
言曰。顧請子之珮。二女解與交甫。交甫受而佩之。超然而去。行十餘步。探之
即亡矣。回顧二女亦亡矣。言紅兒解佩貽我者。因前所見之人。俱不足以
配其美。故未肯學姁娥之單棲耳。

長恨西風送早秋。低眉深念嫁牽牛。若同人世長相對。爭作夫妻得到頭。
（續齊諧）桂陽成武丁有仙道。謂其弟曰。七月七日。織女當渡河。又云。織女
暫詣牽牛。世人至今云。織女嫁牽牛也。（述異記）天河之東有美女人。乃天
帝之子。機杼女工。年年勞役。織成雲霧綃縑之衣。天帝憐其獨處。嫁與河西
牽牛之夫婿。自此竟廢織紉。帝怒責歸河東。但使一年一度相會。牛女惟

一年一會故得長生耳。甚言紅兒之美爲之夫者。不惜喪身也。即萬楚卻令今日死君家之意。

曉日雕梁燕語頻。見花難可比他人。年年媚景歸何處。長作紅兒面上春。匿匣千山與萬山。碧桃花下景長閑。神仙得似紅兒貌。應免劉郎憶世間。

（幽明錄）漢永平五年。剡縣劉晨阮肇入天台山。度山出一大谿。谿邊二女子姿質妙絕。遂留半年。懷土求歸。既出。親舊零落。邑室改異。無復相識。訊問得七世孫。

五雲高捧紫金堂。花下投壺侍玉皇。從道世人都不議。也應知有杜蘭香。

（唐高駢女仙傳）杜蘭香者。漁父得三歲女于洞庭之岸。十餘歲。靈顏姝瑩。殆天人也。忽有青童來携女去。臨去謂父曰。我仙女杜蘭香也。有過謫于人間。期已滿。今去矣。後於洞庭包山降張碩家。授以舉形飛仙之術。碩亦得仙。筆底如風思湧。泉賦中休漫說嬋娟。紅兒若在東家住。不得登牆爾許年。

（宋玉好色賦）天下佳人。莫如臣東家之子。增之一分則太長。減之一分則

太短。著粉太白。施朱太赤。嫣然一笑。惑陽城。迷下蔡。然此女登牆闕。臣三年至今未許也。

照耀金釵簇膩鬟。見時直向畫屏間。黃姑阿母能判剖。十斛明珠也是閑。

（樂府）東飛伯勞西飛燕。黃姑阿母長相見。言紅兒直是天孫。倘黃姑阿母肯捨得。則不惜十斛明珠以聘娶之也。

知有持盈玉葉冠。翦雲裁月照人寒。紅兒若戴當風帽。直是瑤池會上看。

（穆天子傳）天子觴西王母于瑤池之上。西王母爲天子謠曰。白雲在天山際。自出道里幽遠。山川間之。將子無死。尙復能來。天子答之曰。予歸東土。和治諸夏。萬民平均。吾顧見汝。比及三年。將復而野。

擬將心地學安禪。爭奈紅兒笑靨圓。何物把來堪比似。野塘初綻一枝蓮。

（洛神賦）灼若芙蕖出淥波。

濃豔濃香雪膩枝。裊烟和雨曉風吹。紅兒被掩妝成後。含笑無人獨立時。淺色桃花亞短牆。不因風起也聞香。凝情盡日君知否。還似紅兒淡薄妝。

以桃花比新妝之豔。

樓上嬌歌裊夜霜。近來休數踏歌娘。紅兒漫唱伊州徧。認取輕敲玉韻長。於伊州聽新韻之嬌。

火色櫻桃摘最初。仙宮知有世間無。凝情盡日君知否。眞似紅兒口上朱。

（白香山詩）櫻桃樊素口。

明媚何時讓玉環。破瓜年紀百花顏。若教貌向南朝見。定卻梅妝似等閒。

楊太眞小字玉環。蘇詩玉環飛燕誰能嗔。古詩碧玉破瓜時。壽陽公

主人日臥牕下。梅花點額。卽依以爲妝。曰梅妝。

宿雨初晴春日長。入簾花氣靜難忘。凝情盡日君知否。眞似紅兒舞袖香。

暖塘爭赴蕩舟期。行唱菱歌著豔辭。爲問東山謝丞相。可能諸妓勝紅兒。

（晉書）謝安雖受朝寄。然東山之志。始終不渝。李太白詩謝公自有東山

妓。金屏笑坐如花人。

初月纖纖映碧池。池波不動獨看時。凝情盡日君知否。眞似紅兒舞罷時。兩叶

戲水源頭指舊蹤。當時一笑也難逢。紅兒若肯迴桃臉。豈止連催舉五烽。

（史記）幽王以褒姒爲后。褒姒不好笑。幽王爲烽燧。例有寇至。則舉烽火。諸侯悉至。至而無寇。褒姒乃大笑。幽王悅之。爲數舉烽燧。其後不信。諸侯不復至。

世事悠悠未足稱。嬾將閒事更爭能。自從命向紅兒斷。不欲留心在裂繪。

（帝王世紀）妹喜好聞裂繪聲。又褒姒好聞裂繪。

休語如皋一笑時。金鏐中臆錦披離。陋容枉把雕弓射。射盡春禽未展眉。

左傳。

總是紅兒媚態新。莫論千度笑爭春。任伊孫武心如鐵。不忍軍前殺此身。

（史記）孫子以兵法見吳王。王曰。可試以婦人乎。曰。可。王乃出宮中美女百

八十人。孫子分爲二隊。以王之寵姬二人爲隊長。皆令持戟。約束旣布。乃設

鈇鉞。于是鼓之右。婦人大笑。鼓之左。婦人復大笑。孫子乃斬左右隊長。

越山重疊越溪斜。西子休憐解浣紗。得似紅兒今日貌。肯教將去見夫差。

（吳越春秋）越王以吳王好色於苧蘿山得鬻薪之女。二曰西施。曰鄭旦。飾以羅縠。教以容步。三年。使范蠡獻之。

一舸春深指鄂君。好風從度水成紋。越人若見紅兒貌。綉被應羞徹夜薰。

（說苑）越鄂子皙。泛舟于新陂之中。乘青翰之舟。張翠蓋。會鐘鼓之音。越人擁楫而歌曰。今夕何夕兮。舉舟中流。今日何日兮。得與王子同舟。山有木兮。木有枝。心說君兮。君不知。于是鄂君乃揄修袂而擁之。舉綉被而覆之。自隱新從夢裏來。嶺雲微步下陽台。含情一向東風笑。羞殺凡花盡不開。

（宋玉高唐賦）昔者先王嘗遊高唐。怠而晝寢。夢一婦人曰。妾在巫山之陽。高唐之岨。旦爲朝雲。暮爲行雨。朝朝暮暮。陽台之下。五代劉鬲侍兒王氏有艷色。人號爲花兒羞。見（五代史）。

南國東鄰各一時。後來惟有杜紅兒。若教楚國宮人見。羞把腰身並柳枝。
（管子）楚王好小腰。而美人省食。（尹文子）楚莊好細腰。一國皆有飢色。
檻外花低瑞露濃。夢魂驚覺暈春容。憑君細看紅兒貌。最稱嚴粧待曉鐘。

波平楚國浸星辰。臺上君王宴早春。畢竟章華會中客。冠纓虛絕爲何人。

（韓詩外傳）楚莊王賜羣臣酒。日暮酒酣。左右皆醉。殿上燭滅。有牽王后衣者。后挖冠纓而絕之。言于王曰。願趣火視絕纓者。王曰止。立出令曰。與寡人飲。不絕纓者不歡。於是冠纓盡去。不知王后所絕者誰。羣臣歡飲而罷。傾國傾城總絕倫。紅兒花下認真身。十年東北看燕趙。冷眼何曾見一人。

（古詩十九首）燕趙多佳人。美者顏如玉。

今時自是不諳知。前代由來事見爲。一笑陽城人便惑。何堪教見杜紅兒。
注同第九首。

青史書時未是真。可能纖智却強秦。再三爲謝齊王后。要解連環與別人。

（戰國策）秦昭王常遣使者遣君王后。玉連環曰。齊多智。能解此環否。后引椎椎破之。謝秦使曰。謹已解矣。別與人言要解連環。須俟紅兒也。

繡帳鴛鴦對刺文。博山微暖麝凝薰。詩人若見紅兒貌。悔道當時月墜雲。

博山香爐也。

薄粉輕朱取次施。大都端正亦相宜。只如花下紅兒貌。不藉城中半額眉。

（後漢書）長安城中謠云。城中好高髻。四方高一尺。城中好廣眉。四方且半額。城中好大袖。四方全匹帛。

陌上行人唱黍離。三千門客欲何之。若教粗及紅兒貌。爭肯樓前斬愛姬。

（史記平原君列傳）平原君家樓臨民家。民家有躡者。槃散行汲。平原君美人居樓上。臨見笑之。明日躡者至平原君請曰。臣願得笑臣者頭。平原君笑應曰。諾。終不殺。居歲餘。賓客門下舍人稍稍引去者過半。平原君怪問之。門下一人前對曰。以君不殺笑躡者。以君爲愛色而賤士。士即去耳。平原君乃斬笑躡者美人頭。造躡者門謝焉。其後門下乃稍稍來。

樂營門外柳成陰。中有佳人畫閣深。若是五陵公子見。買時應不惜千金。

（漢書原涉傳）郡國諸豪及長安五陵諸爲氣節者皆歸慕之。

青絲高綰石榴裙。腸斷當筵酒半醺。置向漢宮圖畫裡。入胡應不數昭君。

（劉歆西京雜記）漢元帝時匈奴求美人爲關氏。上按圖畫以昭君行。及召

見。貌爲後宮第一。帝悔之。窮案畫工。皆棄市。毛延壽與焉。

詔下人間選好花。月眉雲鬢盡名家。紅兒若向當時見。繫臂先封第一紗。

（晉書胡貴嬪傳）泰始九年。晉武帝簡良家子女。以充內職。自擇其美者。以絳紗繫臂。

通宵甲帳散香塵。漢帝精神禮百神。若見紅兒醉中態。也應休憶李夫人。

（漢書外戚傳）李夫人早卒。武帝憐之。圖畫其形於甘泉宮。上思念不已。方士齊人少翁言能致其神。乃夜張燈燭。設帷帳。令上居他帳。遙望見好女如李夫人之貌。不得就視。上益悲感。作詩曰。是耶非耶。立而望之。翩何姍姍其來遲。

芳姿不合並常人。雲在遙天玉在塵。因事愛思荀奉倩。一生閒坐枉傷神。

（世說）荀奉倩妻曹氏。有豔色。妻常病熱。奉倩恒以冷身熨之。事亡人弔不哭而傷神。未幾奉倩亦卒。

薄羅粧翦越溪紋。鴉翅低從兩鬢分。料得相如偷見面。不應琴裏挑文君。

（梁武帝西州曲）雙鬟鵝雛色（史記）司馬相如素與臨邛令王吉善富人卓王孫爲具召之必欲盡酣吉日聞長卿善琴請撫之以自娛時卓王孫有女文君新寡竊聽之相如以琴心挑之文君遂夜奔相如與之歸成都輕小休誇似燕身生來占斷紫宮春漢王若遇紅兒貌掌上無因著別人（漢書）成帝微行過陽阿公主家悅歌舞者趙飛燕召入宮爲婕妤貴傾後宮（荀悅漢紀）趙善舞帝悅之號曰體輕

雕陰舊似逞嬋娟有個紅兒賽洛川常笑世人多誕誕今朝眞見火中蓮

（宋傅亮芙蓉賦）表麗觀于中沚開郁烈于蘭堂在龍見而萌秀于火中而結房（維摩經）火中生蓮花是名爲希有在欲而行禪希有亦如是（永嘉禪師證道歌）在欲行禪知見力火中生蓮知不壞（唐張謂蓮花寺詩）樓殿總隨烟燄盡火中何處出蓮花

誰向深山識大仙勸人山下引春泉定知不及紅兒貌枉却工夫溉玉田（搜神記）羊公雍伯雒陽人父母亡葬于終山遂家焉山高無水公汲作義

漿於坂頭。行者皆飲之。三年。有一人就飲。以一斗石子與之。云。玉當生其中。又語云。後當以此得婦。言畢不見。乃種其石數歲。時時獨視。見石子生玉。北平徐氏女甚美。行人多求不許。公乃試求焉。徐氏笑以爲狂。乃戲曰。得白璧一雙。來當爲昏。公至種石處。得五雙。以聘徐氏。遂以女許之。天子異之。拜爲大夫。於種玉處四角作大石柱各一丈。中央一頃地曰玉田。

京口喧喧百萬人。競傳河鼓謝星津。奈花似雪爭雲髻。今日天容是後身。

（史記天官書）牽牛爲犧牲。其北河鼓。河鼓大星上將。婺女其北織女。織女天女孫。奈女耆域因緣經萍沙王從伏寶中入。登樓就之。明晨當去。奈女曰。若其有子。當何所與。王則脫手金環之印以付奈女。言訖。揮奈花黑白爭妍。誰知紅兒乃即是花身也。

鍊得霜華助翠鈿。相期朝謁玉皇前。依稀有似紅兒貌。方得吹簫引上天。

（列仙傳）簫史善吹簫。作鳳鳴。秦穆公以女弄玉妻焉。作鳳樓。教弄玉吹簫。

感鳳來集。一日隨鳳飛去。

巫山洛浦本無情。總爲佳人便得名。今日雕陰有神豔。後來公子莫相輕。
合用巫山洛神兩事。言後人若有才如曹植者。定當移洛神而賦雕陰也。
舊恨長懷不語中。幾回偷淚向春風。還緣不及紅兒貌。卻得生教入楚宮。

左傳

恨裊西風日半沈。地無人跡轉傷神。阿嬌得似紅兒貌。不費長門買賦金。

（漢武故事）帝年數歲。長公主問曰。兒欲得婦否。曰欲得。指女阿嬌好否。曰若得阿嬌。當以金屋貯之。（漢書）武帝陳皇后頗妬。別在長門宮。愁悶悲思。聞司馬相如工爲文。奉黃金百斤爲相如文君取酒。相如乃作長門賦以悟主。皇后復得幸。按阿嬌陳皇后名。

輕梳小髻號慵來。巧中君心不用媒。可得紅兒拋醉眼。漢王恩幸一時迴。

（飛燕外傳）趙后飛燕之父馮萬金。通於江都中尉趙曼之妻。曼妻江都王孫女姑蘇主也。有娠一產二女。長曰宜主。次合德。皆冒姓趙。宜主即飛燕。合德新沐膏。九曲沉水香爲卷髮。號新髻。爲薄眉。號遠山。黛施小朱。號慵來粧。

衣故短。繡裙小袖。李文禮。淖方成見曰。此禍水也。滅火必矣。

自有閑花一面春。臉檀眉黛一時新。殷勤爲報梁家婦。休把啼粧賺後人。

（華嶠漢書）梁冀妻孫壽色美。善爲妖態。作愁眉啼粧。墜馬髻。折腰步。齟齬笑。以爲媚惑也。

漢皇曾識許飛瓊。寫向人間作畫屏。昨日紅兒簾外見。大都相似更娉婷。

（班固漢武帝內傳）帝見西王母。王母自設天厨。命侍女王子登彈八琅之璈。又命侍女董雙成吹雲和之笙。石公子擊昆廷之金。許飛瓊鼓震靈之簧。婉凌華撫五靈之石。范成君擊湘陰之磬。段安香作九天之鈞。（唐高駢女仙傳）開成進士許纏夢到瓊台。見仙女三百餘。內一人許飛瓊。遂賦詩云。曉入瑤台露氣清。坐中惟有許飛瓊。塵心未盡俗緣在。十里下山空月明。及成。又令改第二句云。天風飛下步虛聲。云不欲世間知有我也。

紅兒不向漢宮生。便使雙成漫得名。疑是麻姑惱塵世。暫教微步下層城。

註同上

馮媛須知住漢宮。將身只是解當熊。不聞有貌傾人國。爭得今朝更比紅。

（漢書孝元馮昭儀傳）初爲婕妤。上幸虎圈鬥獸。熊逸出圈。攀檻欲上。馮婕妤直前當熊而立。上問人情驚懼。何故前當熊。對曰。猛獸得人而止。妾恐熊至御座。故以身當之。帝驚歎。自是倍敬重焉。

辭輦當時意可知。寵深還恐寵先衰。若教得似紅兒貌。占却君恩自不疑。

（漢書孝成班婕妤傳）成帝游後庭。欲與婕妤同載。辭曰。觀古圖畫。聖賢之君。皆有名臣在側。三代末主。乃有嬖妾。今欲同輦。得毋近似乎。上善其言而止。

曉向牕紗與畫眉。鏡中長欲助嬌姿。若教得似紅兒貌。走馬章台任道遲。

（漢書張敞傳）敞爲婦畫眉。長安中傳張京兆眉嫵。有司以奏。上問之。對曰。臣聞閨房之內。夫婦之私。有過于畫眉者。上愛其能不責備也。又張敞爲京兆尹時。罷朝會。走馬章台街。

鳳舞香飄繡幙風。暖穿馳道百花中。還緣有似紅兒貌。始得迎將入漢宮。

千里長江旦暮潮。吳都風物尙纖腰。周郎若見紅兒貌。料得無心念小喬。

（吳志周瑜傳）瑜從孫策征皖城得喬公二女。皆有國色。策自納大喬。瑜納小喬。

鋒鏑縱橫不敢看。淚垂玉筋正洄瀾。應緣近似紅兒貌。始得深宮奉五官。

（魏畧）初袁紹子熙娶甄后。及鄴破。文帝見后顏色非凡。稱歎之。太祖爲迎娶焉。按丕初爲五官中郎將。

拔得芙蓉出水新。魏家公子信才人。若教瞥見紅兒貌。不肯留神賦洛神。

（魏志）曹植初求甄后不遂。殊不平。黃初中入朝時。甄后已死。文帝以后所

遣玉鏤金帶枕資之。植還渡洛川。作感甄賦。後明帝見之。改爲洛神賦。

前代休憐事可奇。後來還有出光輝。爭知晝臥紗牕裡。不得神人覆玉衣。

（魏志）文昭皇后以漢光和五年十二月丁酉生。每寢寐家中。髣髴見如有人持玉衣覆其上。父常怪之。

捨卻青蛾換玉鞍。古來公子苦無端。莫言一匹追風馬。天驥牽來也不看。

明吳郡錢希言戲瑕云。梁簡文樂府有愛妾換馬。樂府解題云。愛妾換馬。舊說淮南王所作。疑淮南王即漢劉安也。有詞。今不傳。後閱獨異志載魏任城王曹彰性倜儻。偶逢駿馬愛之。其主所惜也。彰曰。余有美妾可換。唯君所選。主因指一妓。彰遂換之。馬號曰白鵲。後因獵獻于文帝。此于淮南之說。理較長矣。乃宋人詩話。指鮑生以四絃換韋生紫叱撥爲愛妾換馬。此開成後事也。何其謬歟。簡文樂府結語。有眞成恨不已。願得路旁兒。言旁人譽馬乘者。盡力馳死也。盖本于應劭風俗通。引古諺曰。殺君馬者道旁兒。一語。唐人張祐詩。恩勞未盡情先盡。暗泣嘶風兩意同。尤佳。

魏帝休誇薛夜來。霧綃雲縠稱身裁。紅兒秀發君知否。倚檻繁花帶露開。

魏文帝迎薛夜來。焚腹題國石葉香。此香疊之如雲母。能辟厲。（段成式詩）欲重羅綺嫌龍腦。須爲尋求石葉香。

謝娘休漫逞風姿。未必娉婷勝柳枝。聞道只應嘲落絮。何因得似杜紅兒。

（晉書）王凝之妻謝道韞。安西將軍奕之女也。叔父安常內集。俄而雪下。安

曰。白雪紛紛何所似。兄子朗曰。撒鹽空中差可擬。兄女道韞曰。未若柳絮因風起。安大悅。

總傳桃葉渡江時。只爲王家一首詩。今日紅兒自堪賦。不須重唱舊來詞。

（古今樂錄）桃葉歌。王子敬作也。詩云。桃葉復桃葉。桃樹連桃根。相連兩樂事。獨使我殷勤。又曰。桃葉復桃葉。渡江不用楫。但渡無所苦。吾自迎接汝。

（樂府集）桃葉王獻之之妾。妹曰桃根。今秦淮有桃葉渡。

重門深掩幾枝花。未勝紅兒莫太誇。玉柄不能探物理。可能虛上短轅車。

（晉書王導傳）妻曹氏性妬。導甚懼。乃密營別館。以處衆妾。曹氏知之。將往焉。導乘短轅轎車。猶恐遲之。以所執麈尾柄。驅車而進。

一抹濃紅傍靨斜。粧成不語獨攀花。當時若是逢韓壽。未必埋蹤在賈家。

（晉書賈充傳）韓壽字德眞。美貌。賈充辟爲掾。充女窺之而悅焉。遂潛通音好。時西域貢奇香一著。人經月不歇。帝以賜充。其女密盜以貽壽。充秘之。遂以女妻壽。

斜凭欄杆醉態新。歛眉凝盼不勝春。當時若遇東昏主。金葉蓮花是此人。

（南史）齊東昏侯寵潘貴妃。嘗鑿金爲蓮花以貼地。令妃行其上曰。此步步生金蓮也。東昏侯即齊主寶卷。

渡口諸農樂未休。竟陵西望路悠悠。石城有個紅兒貌。兩漿何因向莫愁。

（梁武帝詩）河中之水向東流。洛陽女兒名莫愁。又（鄭谷詩）石城昔爲莫愁鄉。莫愁魂去石城荒。

一曲都緣張麗華。六宮齊唱後庭花。若教比並紅兒貌。枉破當年國與家。

（南史）陳後主起臨春結綺望仙三閣。與貴妃張麗華居之。文士張範王瑳等爲狎客。君臣酣歌賦詩。採其尤艷麗者。被以新聲。有玉樹後庭花。臨春樂等曲。

鳳拆鸞離恨轉深。此生難負百年心。紅兒若向隋朝見。破鏡無因更重尋。

（古今詩話）陳太子舍人徐德言尙樂昌公主。見陳政日衰。德言謂主曰。以君之才華。國亡必入豪家。儻情緣未斷。猶期再見。乃破鏡各執其半。約他日

以正月望日。賣于都市。及陳亡。主果歸楊素。德言訪于都市。有蒼頭賣半鏡者。大高其價。德言引至旅邸。言其故。出半鏡合之。乃顯詩云。鏡與人俱去。鏡歸人未歸。無復姮娥影。空留明月輝。主得詩。悲泣不食。素知之。召德言至。還其妻。因命主賦詩。口占曰。今日何遷次。新官對舊官。笑啼俱不敢。方信作人難。

陷却平陽爲小憐。周師百萬戰長川。更教乞與紅兒貌。舉國山河不值錢。

（北史馮淑妃傳）妃名小憐。工歌舞。後主惑之。周師之取平陽。帝獵于三堆。晉州告急。帝將還。淑妃更請殺一圍。帝從其言。

金谷園中花正繁。墜樓從道感深恩。齊奴恰是來東市。不爲紅兒死更冤。

（干寶晉紀）石崇有妓綠珠。美而工舞。孫秀使人求焉。崇方登涼觀。臨清水。婦人侍側。使者以告崇。崇出妓妾數十人曰。任所擇。使者曰。受旨索綠珠。崇曰。綠珠吾所愛重。不可得也。使者還告秀。秀勸趙王倫殺之。（嶺表錄）孫秀勸趙王倫。矯詔收崇。崇謂綠珠曰。我爲爾得罪。珠泣曰。當效死于君前。遂自

墜于樓下以死。齊奴崇小字也。

蘇小輕勻一面粧。便留名字著錢唐。藏鴉門外諸年少。不識紅兒未是狂。

（樂府廣錄）蘇小小。錢唐名娼也。南齊時人。（吳地記）嘉興縣前有晉妓錢塘蘇小小墓。

虢國夫人照夜璣。若爲求得與紅兒。醉和香態濃春裡。一樹繁花壓綉幃。

（杜子美詩）虢國夫人承主恩。平明上馬入宮門。却嫌脂粉污顏色。淡掃蛾眉朝至尊。

金縷濃薰百和香。臉紅眉黛入時妝。當時若向喬家見。未敢將心向窈娘。

（唐書武承嗣傳）喬知之婢窈娘。美且善歌。奪取之。知之作綠珠篇以諷婢。因恨死。承嗣怒。告酷吏殺之。詩云石家金谷重新聲。十斛明珠買娉婷。昔日可憐君自許。此時歌舞得人情。君家樓閣不曾難。好將歌舞借人看。富貴雄豪非分理。驕奢勢力橫相干。別君去君羞不忍。徒掩芳袂復紅粉。百年離別在須臾。一代紅顏爲君盡。

逗玉濺盆浴殿開。邀恩先賜夜明苔。紅兒若是三千數。多少芳心是死灰。

（拾遺記）泰始中祖梁國獻蔓金苔。色如金。若縈聚之大如雞卵。投于水中。光出照目如火。生水上。宮人有幸者。以金苔賜之。照耀滿室。著衣襟如火光。名曰夜明苔。

幾拋靈髻恨金墉。淚洗花顏百戰中。應有紅兒些子貌。却言皇后長深宮。從道長陵小市東。巧將花貌占春風。紅兒若是當時見。未必伊先入紫宮。
（晉書）秦符堅滅燕。慕容冲姊爲清河公主。年十四有殊色。堅納之。冲年十二亦有龍陽之姿。堅又幸之。姊弟專寵。宮人莫進。長安歌之曰。一雌復一雄。雙飛入紫宮。

能將一笑使人迷。花豔何須上大隄。疎屬便同巫峽路。洛川直是武陵谿。三吳時俗重風光。未見紅兒一面妝。好寫妖嬈與面看。便應休更賦眞孃。
（吳地記）眞孃吳國之佳麗也。行客才子多題詩墓上。墓在虎邱。

天碧輕紗只六銖。宛風含露透肌膚。便教漢曲爭明媚。應沒心情更弄珠。

（列仙傳）鄭交甫見二女佩兩明珠。大如雞卵。解以贈之。

君看紅兒學醉妝。誇裁宮纈研裙長。誰能更把閒心力。比並當時武媚娘。

（樂苑）舞媚娘大舞媚娘。並羽曲調也。唐高宗永徽末。天下歌舞媚娘。未幾立武后。按陳後主已有所歌。則永徽所歌。蓋舊曲云。舞亦作武。

鸚鵡娥如裏露紅。鏡開眉樣自深宮。稍教得似紅兒貌。不嫁南朝沈侍中。

（異聞錄）梁東宮常侍沈警。後入周爲上柱國。奉使秦隴。途過張女郎廟。酌水具祝。暮宿傳舍。忽一女。郎來共寢。自稱張女郎。名潤玉。贈警以金合歡結。至旦而別。後使回至廟中。於神座後得一碧箋。有詩云。飛書報沈郎。尋已到衡陽。若存金石契。風月兩相忘。

浸草漂花繞檻香。最憐穿度樂營牆。殷勤留滯緣何事。曾照紅兒一面妝。妝成渾欲認前朝。金鳳釵雙逐步搖。未必慕容宮裏伴。舞風歌月勝纖腰。

（晉書）慕容廆。鮮卑人。曾祖莫護跋。慕燕代人。多冠步搖。乃襲冠。諸部因呼爲步搖。後誤爲慕容。

琥珀釵成恩正深。玉兒妖惑蕩君心。莫教回首看妝面。始覺曾虛擲萬金。

（周秦行紀）潘妃自稱玉兒。

畫簾垂地紫金牀。暗引羊車駐七香。若是紅兒此中住。不勞鹽篠灑宮廊。

（晉書）武帝掖庭並寵者衆。莫知所適。乘羊車恣其所之。宮人乃取竹葉挿戶。鹽汁灑地。以引帝車。

一首長歌萬恨來。惹愁飄泊水難迴。崔徽有底多頭面。費得微之爾許才。
崔徽河中倡。裴敬中使河中。與徽相從者累月。敬中使還。徽不能從。情懷抑鬱。後數月。白知退將自河中歸。徽乃託人寫真。因奉書知退曰。爲妾謂敬中。一旦不及卷中人。徽且爲君死矣。元微之爲作崔徽歌。

昔年黃閣識奇章。愛說眞珠似竊孃。若是紅兒夜深態。便應休說繡衣裳。

奇章公牛僧孺封。吟牕散錄。李愿姬眞珠。後爲牛僧孺妾。眞珠沐髮以手捧髻。挿金釵于兩鬢間。

吳興皇后欲辭家。澤國宮臺展曙霞。今日紅兒貌傾國。恐須眞宰別開花。

（陳書）後主沈皇后吳興人。身居儉約。惟尋閱釋典。陳亡入隋後。自廣陵過江。于毘陵天靜寺爲尼。名觀音。

人間難免是深情。命斷紅兒向此生。何似前時李丞相。枉拋才力爲鶯鶯。

（元微之會真記）貞元九月。執事李公垂。宿於余靖安里第。語及於是。公垂卓然稱異。遂爲鶯鶯歌以傳之。崔氏小名鶯鶯。公垂以名篇。按李紳字公垂。唐武宗初拜中書侍郎平章事。

休道將軍出世材。盡驅諸伎下歌台。都緣沒個紅兒貌。致使輕教後閣開。

（晉書王敦傳）敦嘗荒恣于色。體爲之弊。左右諫之。敦曰。此易事耳。乃開後閣。驅婢妾數十人並放之。

共嗟含恨向衡陽。方寸花箋寄沈郎。不似紅兒些子貌。當時爭得少年狂。金粟裝成扼臂環。舞腰輕轉瑞雲閒。紅兒若在開元末。羞殺新豐謝阿蠻。

（開元遺事）至德中。上復幸華清之宮。從官嬪御多非舊人。上于望京樓下。命張野狐奏雨霖鈴曲。上四顧淒涼。不覺流涕。新豐女伶謝阿蠻善舞凌波。

曲舞罷。阿蠻因進金粟裝臂環。曰。此貴妃所賜。上視之。淒然垂淚。

梔子同心。寔露垂折來。深恐沒人知。花前醉客頻相問。不贈紅兒贈阿誰。

梁徐悱妻劉令嫺。摘同心。梔子贈謝娘。詩曰。兩葉雖可贈。交情永未因。同心何處恨。梔子最關人。

髻綰濃雲立曙軒。我來猶愛不成冤。當時若見紅兒貌。未必相看有此言。

（妬記）桓司馬以李勢女爲妾。桓妻拔刀往李所。欲斫之。見李在牕前梳頭。髮垂委地。姿貌絕麗。結髮歛手向主。曰。國破家亡。無心以至。若能見殺。猶生之年。神色閑正。主乃擲刀抱之。曰。我見猶憐。何況老奴。

倚檻還因有所思。半開香閣見嬌姿。可能得似紅兒貌。若遇韓朋好殺伊。

（列異志）大夫韓朋妻美。康王奪之。朋怨。王囚之。朋遂自殺。妻亦自投台下而死。遺書于帶。曰。願以屍還韓氏合葬。王怒。令埋之。兩塚相望。經宿忽見文梓生二塚上。根交于下。枝交于上。

花落塵中玉墜泥。香魂應上竊娘隄。欲知此恨無窮處。長倩城烏夜夜啼。

此百首之結言紅兒已歿而思之無窮也。烏夜啼。宋臨川王坐廢。夜聞烏啼。獲赦。製烏夜啼曲。

比紅兒詩注一卷。吾家向齋先生所纂也。先生結佩命騷。抱琴安雅。暝寫玉台之序。簾押一雙。偷箋錦瑟之題。絃猜十五。偶憑墨戲。小懺情癡。證奩體而翻書。續香聞于識字。拜烏細訂。脂畫冰鏤。剔蠹冥搜。金迷紙醉。說豔瑯嬛記。外。鴛襪成材。耽奇笠澤書中。榴裙失繡。錄徵妮古。遇桃枕以能名。詩到無題。問犀通而得解。非所知者。獨麗色。抑雅好之在國風也。用是硯受螺煤。欄薰麝月。紛披俊語。便成鉛黛之雌黃。芟在外篇。猶作荃蘭之職志。

乾隆庚戌五月既望長洲宗後學清瑞跋

附錄

元辛文房唐才子傳

羅虬詞藻富贍。與族人隱鄴齊名。咸通閒稱三羅。氣宇終不逮廣明。庚子亂後。去從鄆州李孝恭爲從事。虬狂蕩無檢束。時雕陰藉中有妓杜紅兒善歌。

舞姿色殊絕。嘗爲副戎屬意。會副戎聘鄰道。虬久慕之。至是請紅兒歌。贈以
繪綵。孝恭以爲副戎所盼。爲從事歌。則非禮。勿令受貺。虬不稱意。怒拂衣起。
詰旦。手刃殺之。孝恭以虬激已。坐之頃會赦。虬追其冤。于是取古之有美女
有姿艷才德者。作絕句一百首。以比紅兒。當時盛傳。此外不見有他作。體固
凡庸。無大可采。序曰。紅兒美貌年少。機智慧悟。不與群妓等。余知紅者。擇古
灼然美色。優劣于章句間。其卒章云。花落塵中玉墮泥。香魂應上竊娘隄。欲
知此恨無窮處。長倩城烏夜夜啼。情極哀切。初以白刃相加。今曰余知紅者。
虬實一狂夫也。且聲律之道大爽。姑錄爲笑譚耳。

比紅兒詩注跋

宋方性夫注比紅兒詩一卷。載在郡齋讀書志。至直齋書錄解題。已不著錄。是
原本之軼久矣。茲嘉禾同年沈公向齋補注。卷軸縱橫。蓋雖屬游戲筆墨。而獅
子搏兔。亦用全力也。哲嗣竹岑廣文。近携公手稿見眎。因亟錄入叢書。用誌欣
賞。丁丑季秋震澤楊復吉識。

某中丞夫人

失名

已故皖撫某中丞。性漁色。後房粉黛如雲。猶是未饜所欲。聞良家女有殊色者。啗以重金。許以並嫡。百計營求。必達其目的。而後已。既入門。則亦以待尋常婢媵者待之。貧家閨秀。墮其術中。無如何也。時常州某貢生。性譎而甚有城府。膝下一女。待字閨中。豔名噪遠。近中丞聞之。謂是可以利餌。而計誘也。因遣心腹風示貢生。謂夫人病久。亟思得人以主中饋。如女公子來。嬪當待以正室禮耳。致送聘儀二千金。惟婚期須在一月內。妝奩有無不計也。貢生知其意。慨然允之。略備荆布。草草于歸。一切儀文並不挑剔。一若甘心受愚也。者。瀕行付女票千金。並授以計。女亦心領神會焉。成婚後。中丞豔女色。雖名分未正。而寵愛頗深。女略識文義。亦能書。偶與談公事。發議頗中肯綮。中丞益敬而愛之。一日。閨者忽傳進驛站遞來山東巡撫公文一角。朱印爛然。中丞啓封閱之。則山東巡撫之咨文也。內並附奏片大意。謂據安徽巡撫某某咨稱。東省災荒。居民流離失所。殊深憫惻。今妻某氏節省日用經費。並典質釵環。湊集紋銀一千兩。由莊

號。滙。至。東。省。請。爲。散。給。災。區。此。係。出。自。愚。忱。斷。不。敢。奏。請。獎。勵。等。語。伏。查。救。災。恤。鄰。古。人。所。難。出。自。婦。女。尤。爲。罕。見。今。皖。撫。某。之。妻。某。氏。憫。念。災。況。慨。捐。巨。資。自。非。刑。于。之。化。安。能。致。此。爲。敢。據。情。奏。聞。應。如。何。獎。勵。之。處。出。自。逾。格。恩。施。非。臣。所。敢。擅。請。云。云。某。月。某。日。奉。旨。安。徽。巡。撫。某。某。之。妻。某。氏。著。給。予。樂。善。好。施。字。樣。准。其。自。行。建。坊。欽。此。中。丞。閱。竟。自。思。並。無。此。事。而。關。防。印。信。又。在。內。署。決。非。他。人。所。能。僞。爲。心。知。爲。女。所。播。弄。而。事。已。上。達。天。聽。萬。難。轉。移。祇。得。隱。忍。不。發。而。某。某。之。妻。某。氏。則。已。綸。綍。昭。宣。正。名。定。分。矣。蓋。某。貢。生。當。嫁。女。時。早。已。胸。有。成。竹。二。千。金。之。聘。儀。慨。然。不。辭。者。固。將。別。有。作。爲。也。踰。數。年。中。丞。病。歿。家。屬。扶。柩。歸。吳。下。寓。廬。蘇。撫。某。中。丞。親。往。弔。奠。貢。生。女。自。喪。幃。葡。葡。出。控。訴。其。子。之。違。逆。中。丞。撫。慰。再。三。允。著。親。族。將。遺。產。勻。分。女。始。無。言。蓋。其。處。心。積。慮。固。以。得。握。財。產。權。爲。目。的。幸。而。得。之。志。已。足。矣。然。女。父。當。時。設。計。之。工。密。雖。智。者。亦。未。易。窺。破。顛。預。如。某。中。丞。宜。乎。墮。其。術。中。而。無。如。何。也。

妖婦齊王氏傳

失名

蜀中妖婦齊王氏。軍中稱爲齊二寡婦。姿容絕艷。而驍勇特甚。兼善幻術。時桂
涵羅思舉赴營投効。勒制軍以都司札付二張。元寶二錠給之。限七日斬齊王
氏首級。遲則軍法從事。二人易服往探齊王氏擁衆屯大寺內。夜臥紗帳中。一
足翹帳外。室中燃巨燭如白晝。檐下持刀護者四十人。二人登樹伺之。竟夜不
得其便。因相商曰。逾限當死。不勝亦死。不如徑往取之。遂各執巨斧從樹躍下。
持刀者四散。辟易。齊王氏躍起。從床中飛出一鞭。幾爲所中。倉猝中斫其一足。
而出。俄而賊營大擾。舉火如星。二人仍從樹上穿葉攀枝而遁。持足以獻。勒疑
其僞。後知齊王氏受傷。越日死。遂復優賞之。有黑丫頭者。每戰作先鋒。尤爲勇
悍。曾一日手斬總兵二人。官軍望而畏之。有徽人裴某。能手舉五百觔。隨其同
鄉某監司在營。一日大帥議出隊。裴出跪帳前。求派差使。帥問何人。監司稟稱
係伊隨僕。不諳軍規。當責懲之。帥曰。此人頗有胆氣。令帶百人出隊。獲勝而回。
賞以六品頂帶。裴大喜。過望月餘。又領衆巡行遙見一女子單騎持槍至衆兵

望。見。盡。逃。裴。自。念。一。女。子。耳。殺。之。當。不。費。力。策。馬。直。前。舉。矛。刺。之。女。略。一。舉。手。裴。已。翻。身。入。溝。內。幸。素。習。水。性。見。女。下。騎。俯。首。尋。覓。遂。從。水。中。躍。起。矛。中。其。喉。女。出。不。意。仆。地。而。死。即。登。岸。拔。刀。斬。其。首。以。歸。因。所。殺。一。女。子。不。敢。報。功。私。與。同。列。言。之。索。觀。其。首。乃。黑。丫。頭。也。立。聞。于。帥。亦。大。喜。超。擢。參。將。後。官。副。將。而。終。

老狐談歷代麗人記

鵝湖逸士

蘇州雲巖山爲吳王舊宮。有館娃宮。及西施梳粧臺故址。有某生者。讀書山下。蕭寺。生風儀俊拔。年少才閎。好學不倦。雖盛暑必苦哦。不輟。恒至四更始罷。一夕讀吳越春秋。至吳王納浣紗女事。附髀歎曰。吾獨恨不能一見此人。忽聞窗外低聲應曰。我在此。生驚。凝神傾聽。乃曰。美人於二千年後。尙有靈耶。窗外復應曰。我已在此。生推窗視之。則月明如晝。一麗人年約三十許。絕世無雙。雖圖畫中未之見也。生大喜。啟戶出揖之。延入坐齋中。酌以佳茗。問所由來。麗人答曰。實告君。我非西子。我乃西子化身也。聞吾子讀書懷古情韻深長。不覺觸我意緒。旣蒙殷勤留客。不妨作長夜之談。以答雅意。生叩以姓氏。答曰。我乃胡氏。我非鬼。亦非人也。生問何謂西子化身。答曰。吾族求仙者。必先擇世之麗人。而摹仿之。五百年而形似。又五百年而神似。其人之尤麗者。則必千年而形似。又千年而神似。若其人之尤極麗而間世不一出者。則形似神似期又益遠焉。至神似其人。則由人而仙。又當如由物而人之年數。其期愈久。則其所成就亦

愈高。我生於吳宮。在吳子壽夢之世。稍長。而心知慕道。適有吳王長女在宮。習禮丰姿韶秀。冠於吳國。余日夕慕效之。魯昭公遙聞其美。娶爲夫人。所謂吳孟子者也。孟子年十五而嫁魯。余亦隨往。摹仿繼聞。夫差納越女西施。余復回吳效之。厥後雲遊四海。聞有傑出之麗人。必傾心嚮慕。不辭跋涉而往從之。至今逾二千年。余閱人不啻千數。百其尤麗而不爲余所見者。蓋亦希矣。生曰。求仙而必慕麗人。何也。胡氏答曰。此就吾族中雌者言之耳。大抵天地菁英之氣。所萃在男。則爲才士。在女。則爲麗人。吾所見麗人。約須分爲三等。有超軼一時之麗。有跨越一代之麗。此其人皆已至地仙神仙之地位。有橫絕千古之麗。則必天仙之偶。謫人間者。吾族慕之效之尤難。形似蓋麗人之與仙人。是一是二。故吾族求仙者。必由是而入焉。生曰。子所見之麗人。可枚舉而告我乎。胡氏答曰。吾非不肯告子。恐子之不我信也。吾周遊所見。與子讀書所聞。其同者什三。異者什七。何則。書史之所記爲美者。或因被寵於將相王侯。聲勢烜赫。或因見詠於文人學士。篇什流傳。遂爲後人所豔稱。然吾每慕而往觀之。則往往名不副。

實蓋盛名之下。雖不乏人。亦有寂然無所稱述。而容色絕麗者。吾子或未之知也。生曰。請嘗言之。胡氏曰。吾初學道時。聞前輩嘗言。衛莊夫人。莊姜。晉獻夫人。賈姬。文夫人。文嬴。秦穆公女。弄玉。及楚所虜之息嫪。皆豔麗絕倫。德性貞淑。然吾不及見之矣。但見前輩時。效之。而未能得其髣髴也。生曰。賈姬爲晉惠公所烝。息嫪爲楚文王夫人。不皆失節乎。胡氏曰。此皆左氏紀事之疏也。惠公所烝。乃賈姬之姪。楚文夫人。乃息嫪之姊。若賈姬實先獻公而卒。息嫪被虜而自殺。春秋大事表。及劉向列女傳。可攷也。若吾所歷見者。有莊重一流。如漢之邢夫人。及昭帝之上官后。蜀先主之吳后。晉穆帝之后。何法倪。宋哲宗之孟后。遼道宗之后。蕭觀音后。女蘇克滴公主。明武宗之夏后。太康伯張國紀之第三女。寶珠。此數人者。類皆姿相豐。端體格。碩碩莊重。而彌寶其麗。有妍秀一流。如魯昭夫人。吳孟子。秦武王之后。魏貞姬。漢成帝之許后。蜀李勢之女。晉之綠珠。北齊李希宗之長女。瑩娥。文宣李后之女。溫慧公主。陳之張麗華。周世宗之小荷后。宋欽宗之后。朱淑貞。金衛王之女。岐國公主。元泰定帝之薩都巴拉皇后。明

之費宮人及福王選后徐瑤英此數人者類皆儀容婀娜丰韻嫣然妍秀而共見爲麗有窈窕一流如漢之魯元公主公主之次女佩琬哀帝之后傅嬀君平帝之王皇后三國時孫翊之妻徐氏吳景帝之后朱佩蘭此數人者類皆淡雅絕俗舉止大方窈窕而不失爲麗有俊俏一流如西楚之虞姬漢之李夫人卓文君三國時之孫夫人北魏之木蘭隋之紅拂女此數人者類皆體質脩碩纖腰綽約或具英雄之俠氣或稱巾幗之名流俊俏而適成爲麗凡此三十五人皆山川靈氣所鍾並世無其儔匹所謂超軼一時之麗也其尤麗者則有如楚平王夫人伯嬴之明眸秀項面如鵝蛋伯嬴之女季芊亦醅類其母漢皇后陳阿嬌之蛾眉檀口陰麗華之隆準豐頤三國時甄后及大喬小喬之皎若朝霞灼若芙蓉修短得中穠纖合度隋宣華夫人之瓊姿花貌唐楊玉環之豔質豐肌崔鶯鶯之繡口錦心垂鬟接黛凡此十人皆兩間精氣所萃孕育數百年而一出者所謂跨越一代之麗也若其絕麗之尤者皆天上神仙偶在人間尤屬寥寥以余所見若吳宮西施其一也昔闔閭殺吳王僚而有其國僚愬之上帝

帝乃命西施下降人間。以傾吳國。西施亦自殺。以殉所謂扁舸。隨范蠡者。誤也。越三百年而得漢惠帝之皇后張嫣。后實惠帝女甥。魯元公主之長女。年十四而守寡。幽閉空宮。蓋終身一處女也。又百年而得王昭君。昭君之事。膾炙人口。無庸贅述。又五百餘年而得北齊文宣皇后李祖娥。不幸生於季世。又嫁高氏。無禮之家。迭遭污辱。幾至玉碎花殘。此殆上帝所譴。特令多受磨折。初非后性之不貞也。又千餘年而得明熹宗之皇后張寶珠。后遭逢閣監。幾被傾危。厥後流寇入都。而自縊。又受誣謗於世。要皆定數然也。此五人中以張嫣張寶珠爲最。頤長肌體亦最豐。豔論德性亦以兩人爲最優。漢后稍偏於柔。明后稍偏於剛。然皆有淑聖之德。其守身亦最爲貞潔。五人之貌亦莊重亦妍秀。亦窈窕亦俊俏。不可以一格名。然論其獨至之處。則漢后張嫣以淑靜而絕豔。明后張寶珠以端嚴而絕豔。高后李祖娥以秀慧而絕豔。西施以靚雅而絕豔。昭君以豐整而絕豔。皆屬亘古所無。所謂橫絕千古之麗也。生曰。西施昭君則既知之矣。彼三人之麗。何以不甚著聞。胡氏曰。此正目見與傳聞之異也。夫漢之張后以

幽置空宮而人不知其麗尤難效者在嫣然一笑之時兩旁口輔微暈波痕高之李后以遇人不淑而人幾忘其麗尤難效者在秋波善睐神光動人昭君亦然明之張后以被讒遭謗而人未傳其麗尤難效者在翠眉若畫脈脈含顰西施亦然此皆天仙之麗而非諸麗人所及也生日子所取之麗人止此而已乎胡氏曰以天地之大二千餘年之久何地無麗人何時無麗人但余所心儀者不過百二十人此五十人者皆見於書史其餘皆子所不知大抵瓊姿淑質埋沒於荒邨窮巷寂寞之中而余物色得之者也總此百二十人之中余得形似者不啻十之八九惟於最上等之五人僅能肖其十之四也若夫趙飛燕合德武則天之流貌非不麗而陰險妬悍之性慕之適足爲害又如班昭蔡文姬左貴嬪謝道蘊輩才學非不閎博而貌實不揚吾輩慕效麗人要以形貌爲先務而才學抑其次也生日今夕得聞緒論昭若發矇自此以往請每夕至敝齋暢談可乎胡氏曰不然吾學道將成周遊名山洲島訪求師友以此間爲生長之地偶爾玩月到此不意與子有一夕之緣粗述所見之梗概然願子秘不以

示人彼驟聞之者必駭而不信。且發古今未發之秘。亦學道者所忌也。於是羣雞報曉。東方漸明。胡氏曰。吾去矣。生方欲申後約。已倏忽不知所在。生惘然就寢。明日起而書之。未嘗示人。余與生至友也。偶窺其篋。見此記。大異之。乃默識而錄之。旋爲生覺。窘甚。力懇余勿誌其姓名云。

宮詞序

吾友大臨少負雋才妙領英絕芙蓉之句散落人間薜荔之衣依然舊物泰機不遇徒織寒女之絲韜玉自傷久擲他人之綫歎蛾眉之易妬託鳩鳥以何時斯平子所以結美人之愁而初明不禁落通天之淚者也嗟乎文人偏宕才子經奇佛助不羈自然蛺蝶飯顆太瘦易感杜鵑遂乃含情小碎之篇涉想大羅之記近探勝國遙託宮詞上言朝會之多儀不同縣叢中紀歲時之勝事率類柳圈至於並輦承恩貫魚登寵宮中香滿何處夜來掌上風迎恐其仙去此如犬子賜一杯之露曼倩偷千歲之桃飛箋窄堵坡前落筆沈香亭子也若迺池中蒲葉亦復苦愁篋裏扇紈忽然捐棄甚至秋孃金縷商婦琵琶此如倦客飄零孤臣放逐梁閒玳瑁海燕竟無主人塞外葡萄玉驄不逢善相浮雲南北溝水東西步兵慟其窮途楊朱泣於歧路者矣詞宕知歸亂來終雅至如南都閨位後主小樓宰相得浪子之名宮人唱無愁之曲玉兒何能報主小憐遂已破家夫復何言闕如而已昔者長吉作體多爲阿環仲初擅場半緣花藥豈若句

中著眼絃外有音恍惚爲荒臺神女之祠髣髴有養卒才人之感方今 盛世
篤厚前朝吾邱無帶劍之人西陵容上脯之祭憑茲詞客不畏鸚鵡前頭況是
君家尤添珊瑚故事儻使聞之協律定諧玉笛涼州或亦比作遊仙不緣銀河
織女云爾康熙甲戌陽月慕廬韓莢序

宮詞

長州徐昂發大臨著

白玉闌干生紫煙。雲金門聳接三躔。柘黃帕子綳綾帶。草本齊呈御榻前。
芙蓉液進萬年觴。小小針枝彈鬢旁。製就珊瑚紅蝙蝠。齊天兩字嵌中央。
奠告先師九聖前。入春初啟小經筵。綴行金繡東西立。微見香搖鶴頂煙。
寶冊炎炎玉檢盛。書追鐘鼎自分明。大家特譙黃扉老。樓鳳金杵出鹿羹。
鞭聲初歇御香來。豹尾槍齊雉扇開。卓影辟邪黃絹裏。內璫橫抱傍金臺。
女官紫袖拂東風。揭帖傳來暖閣中。寶璽歲行三萬顆。金盆磨洗鵲文紅。
奉先殿裏薦新筍。紫杏青梅趁麥秋。記得舊京遺勝事。撿花五百最風流。
閱稼南臺五月天。綠楊垂影見平田。桔槔水足鳬鷖喜。飛入昭和小殿邊。
風清刻漏傳銀箭。日引花叢覆玉階。上直宮人都避路。內監來換午時牌。
禁城煙樹晚低迷。刻漏分明鐘鼓齊。收盡金鈴七十二。宮鴉翔噪各東西。
午門喚仗頒新厯。內裏齊簪寶萬年。金感鮎魚攢赤荔。珠排梵字印花鈿。

珠翠裝花綺結樓。勾芒前後簇春毬。少年竄改諸生服。暗向宮中挽土牛。
祕殿朝開徹玉鋪。立春春繭供忪盂。九蓮菩薩昇雲後。雙樹長懸多寶珠。
先蠶壇接采桑壇。儀適先呈內殿看。從祀歸來紗帽側。暮春花信麥風寒。
油幢羽葆曉童童。積翠坊頭舊偃松。都督勳階誇第一。笑他魯樹受秦封。
盤龍錦段製屏風。金碧山川細染烘。七里瀨邊三尺水。釣車橫在夕陽中。
武英殿裏錦帷開。繡領花冠命婦來。趣喚內人供餅餌。紅餠點出似瓊瑰。
嵯峨煖閣切清霄。毬染驪留羃紫綃。一部雲璈兩行燭。喧傳步輦過天橋。
小步風前響玉琚。教成歌舞十三餘。昨朝新選王妃入。撥向元暉殿裏居。
別殿昭儀夢賜蘭。平明排宴敕中官。六宮都送金絲合。一樣盤龍爪拉冠。
小部檀槽倚玉箏。宮厨百品擷精英。霓裳仙子前頭立。夾案更番細數名。
細奏仙韶獻樂方。深宮讌罷夜猶長。欲分蘭燭親書卷。寶炷潛燒起馬香。
皴染何須破墨煤。滇南新採石屏回。移時五岳簾邊立。爲看雲龍出海來。
龍山十二疊層臺。甲煎香濃寶殿開。到處簾鉤齊放下。御前一帶滾燈來。

釵叢新插鬧蛾兒。轉憶春遊後苑時。撲得一雙花蛺蝶。殘鬚重與換銀絲。
煙中花朵開銀樹。火裏珠璣簇蜃樓。比似投壺天一笑。魚龍百戲等閒休。
門鎖瓊花曉霧籠。紅絃銀甲奏東風。賜來鳳尾江南橘。裹在雙蟬錦帕中。
乘鸞仙女畫青紗。團扇新裁繡帶斜。當直宮奴傳賜宴。鮮魚璧鮓趁桃花。
小山子畔展氍毹。戲賭藏鈎百草輪。忽地回身龍吻過。隱花裙上落明珠。
女伴相邀看紫藤。夢中聞喚不曾應。酉時忽唱金牌到。夾道銅樓已點燈。
宣賜名花殿晚春。紅蘇不記舊香痕。內家齊插花枝了。拜舞金階謝至尊。
宮柳長條一帶青。木蘭小槳掠蜻蜓。水花岸葉開無數。獨採中流九子萍。
蝶翅蜂鬚繞藥叢。錦盆堆裏領春風。趙昌粉筆徐熙墨。小字金泥碧葉中。
漆合金描小鳳皇。奩邊移飼馬頭娘。晝長閒過蠶池畔。桑椹收來一半黃。
飛虹橋北立松杉。曲磴鈎迴見石巖。繞到凌雲最高處。紅花碧刺挽輕衫。
舟裝龍鳳結樓臺。錦紵蘭橈次第開。側舵天鵝房畔過。鴛鴦鷓鴣點波迴。
龍舟泛罷鼓淵淵。射柳分明驟錦韉。看過數番驃騎走。綵毬高處鞠場圓。

五毒宮紗馱玉環。榴花猩色點垂鬟。金韉細馬輕馱去。夾輦從登萬歲山。
水榭風簾細細香。荷花荷葉繞池塘。採將玉蛹華房實。把共銀芽嫩菜嘗。
水殿紗幮繞玉螭。好風亭午忽來時。剡溪湘浦生秋思。閒寫宣皇撒扇詩。
魚蝦萍藻滿方池。膠漆丹青出手時。玉座前頭呈戲本。齊吹畫角颭紅旗。
乞巧山邊奠玉杯。鵲橋宮扇合歡裁。持鍼暗禱占年命。恰有紅蛛掛鏡台。
范簪妙作女牛形。獅象紛排薦綠醺。臺上試鍼先得巧。整妝重祝拜雙星。
翠旄絳節一層層。鬻鑠金猊香霧升。一派仙璫雲漢轉。玉熙宮畔點河燈。
寶幢法鼓動清冥。殿角明珠綴列星。卸却髻梁釵燕子。紅袍黃領念番經。
鵲橋銀漢舞衣紅。閑在珊瑚小架中。邀得並房宮女到。木犀花下鬥秋蟲。
法酒齊分秋露香。蟹螯初劈白于霜。剝成蝴蝶推銀盃。蘇葉還傾洗手湯。
桂花涼露滴珠胎。西內齋宮撒斗魁。三十六聲丹鳳響。遙傳靈藥九天來。
天閑雲錦爛生輝。珠鞍香韉繡作韉。選得七龍俱上駟。承恩最有玉麟飛。
涵碧亭邊野菊斑。初三斜月照彎環。梨園小部清歌發。殘拍猶傳鄭隱山。

調鷹內苑草猶青。野雉驚飛入杳冥。玉爪一雙雲裏出。旋摩台畔落紅翎。
鳳喙金泥玉靶橫。窄衫盤鶻掠風輕。莫欺月暈長眉女。親扈君王獵虎城。
佳人殿覆黑琉璃。萬乘親迎踐密期。不怙深恩還諫獵。斷腥應得比樊姬。
千古優俳郭舍人。君王一笑頓生春。百回過錦人間戲。駭女癡兒總未眞。
打稻紛紛戲繞場。扶犁稚子浴蠶娘。縑車秧馬村家物。演作秋來一日忙。
金距花冠各樣題。門棚明日要鉤稽。五更立武樓中絕。早點紅燈待貼雞。
太液池通銀漢流。斗牛擎霧攫雲遊。曉來忽報池冰立。花草蒙茸捧玉樓。
金鳳刺衣圭刻短。玉虬注水漏聲孤。香醪煖逼紅籬炭。先酌縣羊太子圖。
池冰四合日爭光。紅板低欄編樣裝。兩岸繩竿飛迅下。玻璃鏡裏放冰床。
玉戲初看第一巡。雲階月地白鱗鱗。滿宮眉黛春山遠。偷眼三千埽雪人。
爐香綈兒裊輕烟。應制新詞夜自編。襲取玉紅書小字。沉沉疊鼓燭花偏。
承恩玉輦奉追隨。繡帶東風葉葉吹。鑿歷門邊穿徑去。歸來誦得透玲碑。
階約臘雪爛銀砂。煖洞薰開五色芽。明日玉芝移宴處。隔簾奏進牡丹花。

紅籬廠裏閒如雲。錦段堆牀五色分。却與彩妝裁窄袖。更無緣分製宮裙。
巧樣宮幃彈燕釵。彩妝揮羽立庭階。笙歌叢裏看燭歲。院院香燒拍板柴。
學畫雙蛾寶鏡開。珊瑚舊匣卸妝台。移盛眉子彎環硯。小篆旁題女秀才。
蠻撥犀槌色色新。六么催按第三巡。纏頭自向君王乞。不用從來豆葉銀。
赭黃小袋疊金丸。烏柘新弓挂寶鞍。愛聽栗留花外囀。背人飛過不曾彈。
一樹濃葩綺閣前。萬重羅幕護香妍。花枝自覺三春暮。偏得東皇分外憐。
大高元殿聳青冥。倚寵曾邀玉輦行。密誓御書蟲蝕盡。君恩深重妾緣輕。
鵲鷺學語畫眉青。選得良家八九齡。掛項夜光珠一串。驕人新賜出坤寧。
紫襦雙帶唾痕浮。挽得東風小蝶留。一片綠陰花樹下。人前初試背身愁。
藕花微白芡花紅。屬玉低飛水面風。明月也隨人意好。官家今日宿舟中。
華堂開向玉河濱。寶串香消舊日春。好把銀箏藏繡袋。碧雲長拜畫中人。
漫倚傾城巧笑存。可憐命薄亦休論。傷心雨露春風句。縱被陽和未被恩。
鳳撥調絃奏琵琶。海棠時節降金車。自憐解語東風藥。不及回龍觀裏花。

京師生小識繁華。寂寂深宮怨落花。長記耍青攜姊妹。女兒節裏倍思家。
碧鸚鵡語對紅樓。促拍哀絃唱石州。伏日縱饒長命菜。可能消得一生愁。
望斷羊車不復來。自憐薄命類輕埃。虬龍冢畔回身立。願奠霜眉酒一杯。
絳趺落處霞三尺。素藥開來玉一叉。好乞芭蕉園裏住。輕煙細雨獨醫花。

題宮詞卷後

邱南汪 琬鈍翁

裏頭阿監已無存。處處原陵野色昏。誰是宣陽門鷄叟。向人雪涕說開元。
招悵宮娃有廢斜。繚垣荒徑入田家。春風麥飯無人灑。吹落棠梨滿地花。
祕籍如新寶璽紅。標題一色錦綾同。平原小楷龍眠畫。流落慈仁賈肆中。
御柳宮鶯歲月賒。遺民不記舊官家。江南少俊才如海。獨爲東京錄夢華。

德州田 雯綸霞

石城輦道苔封久。舊巷紅牆雨壓欹。却怪徐郎偏作態。野花黃蝶譜宮詞。
安世房中曲莫傳。淋池游讌幾何年。笑它南渡無愁在。不入玉台新咏篇。

白頭飛盡夜啼鳥。天寶遺聞記得無。曲項琵琶聲未絕。螭紅寒淚作珊瑚。

長洲韓 莢慕廬

華清何處雨如塵。遺事傳來語語真。一曲新翻河滿子。可憐無復舊才人。記得當年璧月時。君裁摩頂石鱗兒。滿宮蓮色紅綃上。可是前身江總持。宮體君家久擅名。多才不偶可憐生。玉谿錦瑟長依託。認取無題別有情。

四明周斯盛鐵珊

鬼火青熒欺白晝。豎毛人立嗥豺狖。云是誰家帝王宅。金屋瓊台連結構。蛟螭築尾盤紅泥。鳬鴨銜珠攢碧瑩。脈斷江山土石枯。煙昏日月騏驎門。蟬衫鈿帶散行雲。淒涼輦道埋銅獸。徐陵賦筆鐫珊瑚。宮體裁成斷語秀。冰綆調箏聯雁飛。玉牙捍撥單鳳奏。總向斜行字裏來。墨灑古香朱印籀。故宮曲澗哀湍激。宮柳招腰波綠皺。句驪新樣製蠻鞞。爲君舞破東風袖。君不見冬青樹老鷓鴣啼。龍蛻無靈苔蘚厚。不及年年寒食天。玉鈎花草春如舊。

研溪惠周惕元龍

蜀錦裊長迴楚舞。胡槽柱短咽湘絃。不須更綴斜行字。一曲霓裳便惘然。（大臨云詩成後亡失大半）

鼎湖龍馭已無歸。舊頓蒼苔冷翠微。獨有金鳧留不住。時時還向日南飛。六宮遺跡已成塵。無復金蓮點繡茵。每憶夜深花影句。可憐空妬詠詩人。玉女牕扉曉霧籠。黃旛百尺下相風。九成原是隋家舊。更有何人識故宮。

吳江吳 權超士

一束香詞曲未終。萬年枝上五更風。空聞露掌生苔碧。豈有寒鴉帶日紅。箏語乍停移雁柱。鶻聲不斷接秋蟲。何戡已去張徽老。誰與淒涼吊故宮。故宮禾黍不禁秋。瑣事流傳抵夢游。時有才人垂紫袖。空教方士覓丹邱。琵琶南內回頭望。罽栗西風滿地愁。憶向天津橋上記。拍中清淚未曾收。

卷四

三

集

天啟宮詞自序

楊鐵崖稱宮詞爲詩家大香奩僕謂此皇家大竹枝也道細事而不入于俚作
豔語而不傷于巧總不許村學究道隻字始唐人爲之原本離騷美人之思自
寫其情而不及事雖云宮詞亦曰宮怨至王秘監仲初則以上家起居充依密
記如漢秘辛璫璫瑟瑟者悉著之祇言事而不言情特命之曰宮詞後人遞相
祖述寵之爲可補二史諸小說之闕繇是宮詞與宮怨有間矣僕今此詞竊欲
顰效仲初而仲初所詠事皆行樂僕則幽悽哀惋纏綿悱惻大抵多怨音云蓋
熹廟在御時閹嫗交訐椒難卒發掖庭姪娥惴惴晨夕不自保稽事揣情當有
一種牢愁憂受之況所以其言似頌似諷似慰似懟往往有欲言者不能出諸
口或心不欲言而不覺言又及之憂讒畏讒自怨怨人情之所至亦何能已已
矧風有綠衣終風雅有白華皆怨祖也綱常變而懲創明獨不可與言天啟宮
詞耶癸未三月秀水蔣之翹楚樨氏

卷四

三

集

天啟宮詞

秀水蔣之翹楚穉著

先皇百二舊神都。三殿重輝紫極圖。宣押鴻臚趨護戟。拜恩五等一門俱。（時皇極三殿告成。忠賢晉秩上公。魏良卿封甯國世襲給鐵券）

文華開著五雲堆。柘帕盤龍進璽來。陛下自今辭白版。爐烟不動北辰嵬。（河南撫臣程紹表進玉璽上御文華殿受璽慶賀）

排空金殿旭雲光。第一千官肅鷺行。御側何人偏指顧。挿冠貂尾幾多長。已叶河清三日兆。鏘鏘又見鳳歸昌。小臣漫進呈祥賦。不用房中製樂章。（三年二月鳳凰集于宋州翰林待詔宋啟明獻賦）

十二龍旂大閱翻。冠軍更識聖人尊。九邊羽檄防秋急。只在親勞細柳屯。（閣臣沈淮請復內操爲忠賢設內鎮守之基）

繡桷金鋪天上頭。颯然笳鼓似邊州。觀兵豈爲誇雄武。一洗天河萬里秋。（忠賢導上以武每月愆恩御操內兵賞賚甚渥）

韓鐸朝聞出未央。打毬夜散鬥鷄場。老臣不解君王意。祇乞重繙日講章。（元輔葉向高揭請溫習講過經書）

絲鞭聲肅退金鑾。一字班行盡內官。珠纔已垂新式樣。蟒紋貼裏又加欄。（舊制內臣佩牙牌纔以紅線忠賢創爲珠纔又改蟒貼裏膝欄下復加一欄曰三欄貼裏）

梳妝墮却北台坡。校地平光好試戈。貂珥軍容天寶並。不推神臂擅宣和。（內校場在蕭后梳妝台之東北台之西北臺即乾德殿是也）

掖庭底事見兵符。介冑威嚴可有鬚。闔地殷訇雷礮激。高張毳幕演平吳。（每操試紅衣大砲宮闕悉爲震動）

阿誰走馬御階前。雲繞花韉電作鞭。明主自知好手眼。應弦驚落玉連錢。（忠賢馳馬御前上射殺其馬）

草枯風疾露方晞。西籞尋常正掩圍。手斫兎狐貪目睊。淋漓血染袞龍飛。（忠賢以慘殺導上游獵時上必手剗狐兎以首體異處目尙轉動爲樂睊目動也）

小隊戎裝扈蹕回。煙銷三眼夕陽頽。競誇左射雙鶻落。寧願長楊諷諫才。（忠賢素善左手。穀弦每多奇中。）

銜花紫鳳集宸軒。大樂春官禮數煩。徧賞紅羅臨樺燭。阿誰不識母儀尊。（元年四月二十七日大婚發冊奉迎皇后張氏）

十二笄聯燦紫磨。扇簾雲簇月生波。兩行引贊交迎跪。撒果爭聞唱得多。（撒帳果卽唐宋撒帳錢遺製世俗合番至今有此。但皇家宮人撒之盛于帝后衣裾。云得子多也。此爲張后而詠）

大事多教屬廠臣。手營窄殿秘如神。氍毹恰受三人坐。藻井勾闌色色新。（上性喜土木。日夕躬自營繕。小房瑇樓刻畫工師莫及。非親瞻內臣不得見）

墀開七寶障流蘇。巧鑿銅缸輪灌殊。灑瀑潰珠勞睿思。水尖宛轉弄胡蘆。（上自作水戲。用大缸盛水覆以桶鑿孔設機。啟閉灌輸。使其水上注。借力衝擁圓木。毬盤旋宛轉久而不墜）

咸安爨燭壁流輝。六院沉沉月影微。暗屬管絃休作徹。夜深龍馭醉無歸。（客氏初住乾西直房後遷咸安穆廟陳皇后宮也）

賢良特薦策書騫。雉尾朝開豹尾翻。玉管斜揮親擢士。臚傳信國好兒孫。（舊制御批第一甲三名卷用玉管筆時首科狀元文震孟）

大官無膾惜芳牙。玉食須供自外家。乞得餘泔爭問訊。珠盤擎著漫矜誇。（上大官進膳皆客氏名下內官辦送名曰老太家膳）

珥筆追隨侍起居。殿頭無事職成虛。但看御酒供來旨。錄得佳名百十餘。（御酒房所造不過竹葉青數種忠賢在外造辦轉于御茶房進上有金盤露荷花藥佛手湯君子湯瓊酥天乳等名）

櫻桃灼爍北園春。看守朝來報貢新。時薦寢宮猶未入。剔金盒裡送夫人。（北果園櫻桃其實美于他產內廷最爲珍味）

中貴承恩寵錫殊。尙方珍異世間無。鐸針新樣團雙鳳。吉字口銜青亞姑。（鐸針以金銀珠寶鑲成近侍釘居帽中其名有大吉胡蘆萬年吉慶等名）

翩翩翠蓋引鸞輿。輦道西開不用除。急敕信王陪羽獵。勗勤宮裡正繡書。（莊烈帝于天啓二年册封信王居勗勤宮）

臨河神蜃豢如蚕。銀盒盛將帝澤涵。蟬鬢秀才嬌代語。付教放著黑龍潭。（二年十月有龍見北花房河下長數寸鱗爪畢具太監宋縉裝盒進呈宮中傳看放黑龍潭中）

羽衛宜春曉色蒼。三宮禋獻鬱金黃。千群女侍排當立。縞帶微沾俎豆香。（元年六月二十三日爲光廟孝和皇后禫服之期上率三宮詣城南宜春宮行祭奠禮）

平明坐版入宮來。鐸響繚垣未見迴。乞賜一顆龍紐篆。銀黃突兀壓妝台。（客氏在宮乘轎內官抬走儼如先朝嬪妃止缺一青蓋五年四月賜客氏金印方二寸四爪龍紐重二百兩）

回龍別觀百蘼勻。錦瓣黃鬚夢上辰。不是天香並傾國。如何亦得倚闌頻。（回龍觀多海棠花時駕幸客氏從焉）

樹蔭觚稜月色高。螭幻騶唱列旌旄。繞簫競起嬌心怯。抹額盤龍舞孟勞。（上時習舞刀劍于乾清殿中夜不休）

青紅錦罽地衣光。秘殿安排蹴鞠場。卻見背身驚蹋送。綵珠偏打御肩旁。（長樂宮于萬厯四十四年改名永壽時爲忠賢與上打毬之所）

便殿時臨草本呈。歲荄雲縟九花明。中璫密奏緣何事。指点梁山泊上名。（崔呈秀進天鑒同志點將諸錄于忠賢備錄東林諸人姓名指爲邪黨其點將錄則以水滸傳天罡地煞分配諸人忠賢託王體乾奏處爲一網打盡之計）

沉碧光凝鑰庫錢。欣看聖號有開先。魏梁南詔何堪數。拜啟君王兆萬年。（司鑰庫積歷代古錢內得天啟錢大小數枚上徧問臣下無知者今按梁蕭莊魏元法僧并南詔陳友諒皆有此號）

光開閭闔護雲螭。鹵簿千官泊玉墀。此日嵩呼傳萬歲。初年猶記喚哥兒。（泰昌元年上已登極李選侍猶稱之曰我哥兒）

蓬萊宮闕掖庭參。複道秋陰墜石楠。聖母日繙經史閱。侍兒盡解誦周南。

彤史更環似有情。無端輦路碧苔生。相應夢失砂按枕。鸚鵡窺人簾外明。（中宮張后性端靜好讀書習字客氏憚后遂於上前離間之陰置名下陳德潤爲坤寧宮管事訶后動靜）○彤史女官名屬尙衣局二人掌后妃羣妾御于上所書其月日）

鏗鉤鐘鼓辟雍開。象輅初臨遽引回。聞說先皇儀注舊。從容曾賜一茶來。（五年三月六日上視學釋奠忠賢擅改儀注凡賜坐大臣不得賜茶逼上即起駕還宮）

一人穆穆只垂裳。章奏無勞擁象牀。河下金璫互批閱。甲痕鈴記費籌量。（凡章奏付王體乾梁棟石元雅李永貞涂文輔諸監分看遇要處即鈴一白紙條復於面葉上用指掐一重痕關白忠賢）

畫艦龍函詔使呼。元黃朱綠出三吳。上公裝束年來別。萬壽金袍換却無。（內臣佩服向有定制忠賢剏造織金壽字喜字紗紬儼然于上前服之）

兩坊官叶第三廳。誤說書章字字馨。逢著講期都詔免。黃金鎖兒自晶瑩。（經

筵御案上有鎮書金獅二枚）

怪底宜男獨早秋。璇宮虛擬見虹流。薺花漫蘸芝蔴水。百子池邊暗卜油。（上生三子俱不育○時宮中呼油曰芝蔴水避御名也）

隨班奉帚入明光。素面朝天不用妝。共聽咸安新約束。敢將脂澤污君王。（忠賢留客氏于內以鈴制宮壺妃嬪而下無不唯唯）

忽賜金苔滿院輝。薺薇露晞熨宵衣。橫陳此夕眞恩數。明日還愁事又非。（時宮人往往有進御而得禍者）

兩雄並倚勢斷斷。二魏無如大魏馴。嚙昔楊前驚夜閣。聖明原識意中人。（初魏朝與忠賢同屬客氏私人曰大魏二魏一夕于乾清暖閣爭寵相毆時已丙夜上驚起曰客嬪只說心裏要誰管事我替你斷客素憎朝猥薄意向忠賢上遂斥朝）

奏獲祥麟照殿圖。張羅爭看抵明珠。馬蹄牛尾麕身樣。綉出針床總不殊。（青州王家曠產麒麟撫臣李精白疏奏獻圖○燕都謂慌忙曰張羅）

縹飛玉蟲倚層霄。漫學泉台望眼超。影動層波翻貝闕。白頭宮監說神堯。（萬
厓中建乾德殿于護城河上游高八丈一尺廣十七丈磴道三分三合而上金
碧照耀倒影入水如鮫宮仙闕忠賢導上殿爲內校場）

颯颯霜蹄汗血光。天閑十二紫茸韁。殿中漫唱幽州曲。不放沙場放獵場。（上
與忠賢俱好馬邊帥每以馬進御馬監獨盛于前代）

初度纔知保嫗尊。爭遺綵履貼金鴛。瓊枝到處霞生臉。御手親傳不謝恩。（客
氏生日上爲臨幸陞座設宴賞賚甚優彼亦自視八母之一居之不疑）

歌徹咸安分外妍。白翎青鵠入冰絃。四齋供奉先朝事。華嶽新編可尙傳。（神
宗孝養兩宮嘗設有四齋近侍二百餘名習戲承應一日兩宮陞座演新編華
嶽賜環記中有權臣驕橫寧宗不振云政歸寧氏祭則寡人神宗矚目御容不
懌）

龍寢經春在外庭。深宮不夜鑰長扃。妝成空有如花貌。阿妹無端學祭星。（始
影星女子于夏至夜候而祭之好顏色）

頻年蜀道棘王師。不信蛾眉豎綉旗。飛奏昨宵來便殿。桓桓韎韐愧男兒。（四川宣撫石砭女官秦良玉也有疏載實錄）

露旭籠牕花霧冥。嬌鶯無語只梳翎。宸居咫尺應同夢。誰扣金盆不肯停。（忠賢在直房晨起漱口自擊金漱盆盡力大響聲徹御榻）

浮檀梳成日影移。承宣牌子喚嫌遲。玉雲側掠輕移袖。怕著新娥開掃垂。（宮人春日咸戴鬧蛾掠風撩草鬢翹生動）

煙韁垂楊芳草平。弓鞬齊尙踏青名。自憐金粟裁痕減。寧用花裙曳地行。（客魏主持內政後宮衣食俱爲減損）

日轉繚絙影欲低。辛夷窗下語黃鸝。裏頭金彈非時挾。莫向君王著意啼。（上好挾彈放馬銃近侍在宮中亦皆習之二年有暖殿王進在御前放銃銃炸打去左手幾危聖躬）

閒承熊席玉雕牀。多恐君王每易忘。退食便如成隔世。遲回嬌步怯西廊。（上性善忘所用之人爲客魏擯斥即不復記憶問及）

禮成方澤恣歡遊。戲影雙雙一葉舟。不爲被除求度厄。袞裳濺却奏無憂。（五年五月十八日上祭方澤回。即幸西苑。忠賢與客氏于大船宴飲。上携小奄暖殿高永壽劉思源泛胖艫。上手自刺篙。二監佐之。相顧失笑。舟覆。二監溺死。上以管事譚敬赴水救免。）

渥注飛駟捲紅埃。五鳳門。輦逐扇開。莫怪封章留玉案。無人知是涿州來。（忠賢往涿州進香。凡章奏要務託李永貞石元雅涂文輔各派站馬疾馳取忠賢可否。）

書編昇上炯龍眸。黃帕青緇內局收。遮莫黨人似元祐。盡稱要典等陽秋。（閣臣顧秉謙進呈三朝典要起萬厯乙卯至天啟辛酉以挺擊紅丸移宮三事翻案成書。因科臣揚所修請也。）

朝巡西苑逐金丸。擘手橫飛暮險干。一騎馳來催賜酒。嘶啼又聽入咸安。王恭廠裏事聞初。鄭重徒勞太史書。不改蓬萊雲五色。至尊豈用省愆居。（安民廠即王恭廠。六年五月六日廠遭火災。計震塌房屋萬餘間。壓死男婦五百

餘人下詔百官修省。○世廟建省愆宮在文華殿西北。凡遇天災凶眚居此以示脩省。天啟末雖災異疊見。此宮塵封久矣。

初無曼倩隱金門。聖主能存乳哺恩。珍重羊車過別院。離瑜慘淡照黃昏。○離瑜二星名主婦人服節明。則後宮奢侈微則儉約。

上黃明服肅靈階。殊澤新承儼燎柴。翠葆繽紛神宴娛。吾皇隕祉只清齋。○六年冬魏良卿代祀圖丘。○娛音同嬉。音上聲。又音霑。隕音頽。下墜也。摧也。

銀花畫燭自安排。風射朱櫺月上階。願化飛蛾撲前殿。挑燈趣起玉鸞釵。○客氏每日清晨入乾清。暖閣侍帝甲夜後回咸安宮。

漫論打鴨著鴛驚。春恨時隨碧草生。裏玉縈香已何限。始知無寵是深情。○客氏在內時有勒死箠死宮人。昇出太安門外。故云。

宮瓶祕色露葵萼。入供絲絲繪佛圖。翠靨金蟬常卸却。蕭然一樣似皇姑。○宮中素多茹菜事佛者。至此時尤甚。○萼音誇。義同華。又音孚。榮也。

絲髻銀勒動銜塵。禁樹投丸不畏人。向說椒房此無賴。如今不是霍家人。○忠

賢曾枷死皇親五人）

出班阿監特增輝。進得驪駒玉帶圍。敕賜新蹄隨放仗。元光一道捷於飛。（忠賢初遇聖節同王體乾等于乾清宮朝服行禮自良卿晉封卽改簪纓出班行禮致詞如公侯例）○忠賢進馬甚多中有飛元光者賜玉帶賞抹布刀兒如管事之秩）

玉河橋畔柳條多。酒泛樓船著柁羅。浪給司房銀豆粒。老公拍手至尊歌。（乾清門西有石梁如虹直跨金海通東西之往來者曰玉河橋）○凡宣召內監某衆必接聲叫某人上召忠賢衆接聲曰叫老公而不名

宣索尋常院本看。紅衣抹額按吹彈。擅場最是王癩子。合殿春風笑紫蘭。（五年後御前凡撒科打院本有鐘鼓司僉書王癩子名朝進抹臉詼諧多稱頌忠賢每獲賞資御顏亦爲之霽）

風閣松棚結綺層。外家各別有炎蒸。妾心自識涼如水。敢乞天厨一賜冰。（客氏體肥畏熱夏日於咸安宮起大涼棚上復賜冰不絕）

葵榴初纈藥闌敷。綵線珍成續命需。遙聽塞垣烽火急。真人剛進辟兵符。
（每歲元旦端午真人府進符篆貼各宮門上）

飛鳳三花逐電流。例逢躡柳拜前旒。八珠穿得都班賞。奪取頭標勝一籌。
（午日大駕幸萬壽山閱御馬監勇士跑馬名曰射柳即金元躡柳遺制（唐時外牧歲進馬印以三花飛鳳故有馬鬣剪三花之語）

招招黃帽綉旗衝。三翼乘流羯鼓從。何用船頭鱗鬣活。中央萬乘是真龍。
（五日苑中競渡上親御龍舟撾鼓）

鱗魚冰黨玉鱗鱗。千里紅船薦廟新。何事年來遞偏晚。外頭傳食已嫌陳。
（四五年後凡薦新時物廟中御前未曾供用而客魏處已飽飫多時或轉致上前上亦不問）

內苑擎天金作柱。漢家承露玉雕盤。側身偷覩迷離甚。欲挾飛仙倒景看。
（五年八月皇極殿前立金柱百官入賀）

海鏡江瑤百寶并。黃紗籠蓋尙侯鯖。後宮私做填倉會。骨董家厨也學烹。
（上海鏡江瑤百寶并黃紗籠蓋尙侯鯖後宮私做填倉會骨董家厨也學烹）

喜用炙蛤鮮蝦燕菜鯊翅諸海味十餘種共膾一處食之。○京師正月二十五日進酒食名曰填倉貴賤皆然。

金餞蒨花合鈿螺。冰糖虎眼雜絲綢。內中侍從叨恩啜。寧問櫻桃舊畢羅。○甜食房製絲綢虎眼糖法不外傳。進供御用兼備賜各宮及大臣等屬也。○畢羅即餠饌餅也。餞音創蒨音菱。

何處初寒賜錦裘。手携龍卵報瓊羞。君王果得昭儀寵。妾願年年長信秋。○客氏蒙上賞甚渥。每以滋味悅上。上贊嘆不已。○上牡馬之外腎甚益。人名曰龍卵。十月間御饌內官家最重之。

承恩未見賞羅新。病坐蒼龍夢據身。天子南郊嚴祀典。誰爲奏喚內醫人。○三年上南郊之日。宮中有馮貴人以德性貞靜。荷上寵客。魏恐其露已橫。暴乘其微疾。立刻掩死。

香輿仙珮碧雲鬟。千騎緋袍侍從殷。呼殿只疑鑾隊出。火城如畫照珠還。○客氏暫歸私第。必于五更出宮。儀從甚盛。緋袍玉帶者在前。擺隊步行。隨從幾數。

千人）

暫向咸安歸里第。明駝促賜幾曾閒。夫人又約前來晚。月隱宮門不上環。（客氏在家賜賚無虛日。不久即還宮。亦必于五更時云）

漫言票擬盡塗鴉。中旨音傳玉不瑕。憑仗緘題工報密。廠東端屬閣臣家。（忠賢擅政各衙門章奏俱不繇閣。票特用內旨生殺。予奪惟忠賢與體乾爲之。）○閣臣魏廣微凡有密札達東廠。皆用閣揭貼紅簽。用小白文印記于上。題曰內閣家報）

瑟居蠕霓儼神明。狗監攢頭嗑狗羹。嚙已皂囊隨入手。橫腰硬拆讀高聲。（忠賢性貪饕。好狗肉。涂文輔等每日烹熟携于乾清大殿內。忠賢體乾輩手奪口噉。須臾立盡。）○舊制掌印率秉筆太監看文書。俱在直房。忠賢用事。竟于乾清大殿之上硬拆實封。高聲朗誦。忠賢不識字體。乾又爲講解。○霓音孽西京賦。直蠕霓以高居）

日見囂書東塞煙。王師犄角駐朝鮮。昭容敕捧將軍賜。玉劍光寒照錦韉。（四

年十一月賜毛文龍劍一口大紅蟒衣一襲加官左都督

九楹翼翼露華繁。恭薦明禋裸獻敦。繞宇金支靈儼屬。貂勳醴格賚曾孫。(七

年七月魏良卿代饗太廟填祝版)

溽暑耽觀水傀儡。秋風打稻卻聞歌。依稀過錦無人問。哲婦讒夫世儘多。(鐘鼓司有水傀儡戲秋收打稻戲又有過錦戲約計百回備及世間昏庸受欺奸讒巧詐情事雖市井商匠雜要把戲皆可承應祖宗設此無非欲以廣後人耳目也)

海青橘律閒錢吹。隊舞金獅按拍遲。尋撞蹣跚徧丹陛。無情鎖子若相隨。(乾清丹陛上向有金獅二大座)

貼地蛇行唱不休。西涼假面互相投。巧生背向天顏喜。乞賞纖纖拜兩頭。(一倌童貼地唱歌驚躍數四備極疾徐之態忽于尻間又出一頭以兩足作手拱揖周旋首尾不可辨)

皇史宬輕晒曝時。繇來祖德曷勝思。不無人識欽天頌。一榻門東透玲碑。(皇

史竄藏歷代實錄之處其東則追先閣欽天閣透玲碑在焉世廟置欽天頌中言祖德宗功創業守成皆非易事教戒子孫勒之于碑碑瑩潤如玉故名○玲言匣）

次第排當進牝驥歡呼萬壽却生陽。綉添綵絢龍紋爛。共拜堯天似日長。（舊制萬壽節內官進馬烹廟萬壽在十一月十四日每年天下進長至表官俱同入賀）

毫濡粉本一枝梅。九九粧殘取次開。幘入消寒無俗句。成都才子舊刪裁。宮中冬至日畫青梅一枝爲瓣八十一日染一瓣九九盡而春深矣上書九九消寒歌舊皆俚鄙之語近易新詩係正嘉間楊慎改定者）

靜掩朱扉已二更。金輿忽地照前楹。上房莫漫忙供奉。只索階前一送迎。（上于三宮及有名號嬪妃不過經歲一二幸客魏恐有親疎之嫌多方離間故在乾清宮暖閣居多總之彼二人不離左右而已）

聞徵往事夢徒勞。顚頓慵梳媿玉搔。亦有嫠容偏可悅。君王疑是駐顏膏。（客

氏係定興縣民侯二妻嫠不多年受封時將四十顏色如二八許。

曲宴經年空復情。擲彈莫怪手旋生。縱令盡解歌章色。誰向君前敢奏聲。（絃索止唱北調亦有以南曲入之名歌章色此正德間頓仁隨駕至北流傳者）細針七孔影浮波。繪乞雲龍雜水荷。不是日中偏更巧。憎看牛女晚乘河。（七月七日宮中設乞巧山子兵仗局進乞巧針其事與古不同午間曝盎水于日中生膜投針則浮看水底針影有成雲龍花草形者謂得巧其影如椎如絲如軸則以爲拙徵也）

太液池開菡萏風。花容人袂一般紅。時興紈素雲華動。彷彿行雲出峽中。（時夏服尙用紈素俗云懷素是也內襯白紗外有自然活紋如水之波如木之理故云）

秋深御宿禁梨霜。酒泛縹緲月轉廊。纖玉剝殘雙郭索。落花舞蝶唾生香。（八月宮中進蒸蟹用指甲挑肉淨盡以胸骨入跪完整或列爲花或綴爲蝶以示巧○唐武后時季秋梨花杜相曰陰陽瀆則爲災）

麻衣金翅欲空群。對御難爭主客分。奮勇但希當一笑。須須却拜大將軍。（燕都呼蟋蟀爲須須。疑本蠕蠕而轉誤者也。）

秋深永卷井梧飛。漏促銅虬燭影微。嘻昔嬭娥恩未盡。繡鴛重拆補寒衣。（東李妃簡重寡言光廟託撫莊烈儼若己出承奉徐應元王文政俱忠賢腹心藉勢驕蹇供用不備憤鬱致疾卒）

先朝嬪御竹痕滋。髣髴陶匏歲歲思。銅雀不勞施總幕。相臣跪進二陵詩。（元年十二月元輔葉向高祇謁定慶二陵還恭進詩章上宣付史館）

旄鉞朝麾散縹煙。鷹飛兔走自鈎弦。大家此日眞能武。故事如聞正德年。西苑鳴鑾芝火揚。橫吹鼙鼓唐宮門。侍女拈香立。候徹鴛鴦瓦上霜。魚鑰生衣不見春。舞鸞收黛只知顰。先皇貴幸今存幾。珠匄無光燭紫宸。（光廟趙選侍素與客魏不合上登極即賜死選侍列光廟所賜珠翠金玉之物于几再拜痛哭乃投繯）

瓊沼翳然水一方。風生珠翠夾亭涼。內人共啜銀苗菜。芳茜先供點御湯。（坤

寧宮後園曰瓊茹池曰瓊沼有亭曰浮翠曰澄瑞夾立于池上○宮中夏日尙新嫩藕芽曰銀苗菜上愛新蓮子作湯

天子當陽正少年。生來不肯戀嬋娟。公卿都未穿黃襪。候寢熏衣若箇前。黃襪乳母服南史召卿使著黃襪注欲使輔幼主也○客氏每日天將明即進殿候上醒至御前甲夜始出

長春被黜復何論。摒擋誰能拾淚痕。無賴昨宵猶夢幸。深憐不死是君恩。范慧妃爲客氏所譖失寵李成妃侍寢爲范乞憐客氏偵知之遂革去妃號絕飲食妃素慮此預蓄乾糲于僻處得延數日不死客氏怒稍解黜爲宮人自長春宮退居乾西直房

何事丹陵遲暮生。葳蕤獨閉未全明。傷心飲徹簷頭水。萬歲潛呼三兩聲。張裕妃有娠踰期未產客魏恚其異已譖上絕其飲食會大雨匍匐簷下啜溜水數口臨絕猶呼萬歲爺不已

簷釘風颭月棲檐。宮正來巡夜獨嚴。不信六宮秋一色。天家每自覓龍鹽。宮

中女官有宮正司宮正一人正五品掌糾察宮闈責罰戒令之事○龍鹽龍交時所遺有益幃箔）

禁甬驚看列樹疎。玉鞭金鐙蹠無虛。如今台省知清晏。三載誰曾有諫書。（各宮馳道有大松棗核桃等樹皆祖宗二百餘年培植之物西苑古松數株俱封三品食料忠賢因導上走馬悉令除去）

香飄御幄出山陲。萸菊迎鑾放故期。四海不知歌帝力。當筵一曲奏攢眉。（五年重九駕幸萬歲山登高宴飲鐘鼓司太監邱印執板唱維陽橋記攢眉黛鎖不開一套明年登高仍唱此曲）

崔嵬新構半天中。異鳥何來睥睨風。休怪爰居馨祀事。蜚廉曾出未央宮。（六年皇極殿工成有大鳥似鴛鴦頻來殿上呼號似梟非梟其聲咯咯然）

角觝魚龍總是雲。昭忠曼衍岳家軍。風魔何獨嘲長脚。長舌東牕迴不聞。（上好閱武戲於懋勤殿設宴多演岳忠武傳奇至風魔罵秦檜忠賢時避之）
千秋令節自中宮。叱撥嘶風御獵雄。故命翟車參後乘。豈無恩幸肯當熊。（六

年十月六日值中宮千秋節上幸內校場圍獵張后同往及暮乃還

高元法會演孟蘭。箇箇西僧紫袖寬。澤畔魂歸旛影亂。波羅蜜供佛燈寒。（西苑溺死暖閣二人加贈乾清宮管事是年中元命忠賢于大高元殿作佛事薦之○甜食房製進波羅蜜爲佛供）

考工釐正六宮多。湛黑施丹費揣摩。御漆原同宣漆樣。黃金煜爚不稱倭。（上好弄油漆凡所使器具皆御用監內官監辦進作料上手爲之成而喜喜不久而棄棄而又成不厭也○宣廟青宮時剔紅填漆俱經裁定後廠製終不及前○倭漆中雜金屑砂粒粒光色瑩然亦爲時所重

玉戲崖公興未闌。懋勤營窟禦宵寒。紅虬催上剛烹熟。又報傳湯灌牡丹。（上于懋勤殿造火炕冬日御之○草橋園丁于冬日能支宮中三季之花土窟藏之火炕烜之十月中旬牡丹已進御矣紫蛇紅妖爛如春日）

仙姬翦水散瑤芳。堆象鏤獅侍彤旁。警蹕一聲雷影動。親持玉尺減增量。（上于宮中凡嬉戲鄙事無不親自經營或有緊切本章王體乾等奏聽上曰你們

用心行去知道了）

生駒浴罷渥洼池。雲散天街若敢騎。天子自來鞍轡熟。不須調習幾多時。
南苑春深籞柳繁。露含垂線淚珠漣。老奴一去無消息。掃地潛聞幼監言。（忠
賢欲害司禮監太監王安遂降南安海子淨軍命提督劉朝絕安飲食數日不
死復縊殺之）

九微列處御筵憑。隊隊笙歌擁毵毵。蜃炬龍膏空門影。芙蓉開徧十三層。（上
元乾清宮壽星殿安七寶牌坊及方圓鰲山燈有高至十三層者）

鰲山燈火出墀隅。逢勃千枝萬藥萼。跪地金錢輸喝采。長明塔峙絡珍珠。（歲
暮二十四日起至正月十七日止每夕于乾清丹陛上扎烟火時至二十日之
後猶未絕也有壽帶葡萄架珍珠簾長明塔種種名色）

星毬蓮炬燭銀毵。龍袞旁邊翠袖誰。聞說宣宗三閣老。召登玉殿試燈詞。（凡
上有宴賞舊例偕中宮者概罷去唯客魏無不同之）

風沈銀蒜綉簾長。祇奉隄隄侍女皇。請得素馨宣貢紙。洛神摹却十三行。（中

宮張后善楷書○宣德中綿料貢箋邊有宣德五年造素馨紙印

櫺門潛來內上林。羅衣輕試柳邊陰。逡巡避衆閒擗。一笑拚輸草裏金。(坤寧宮後園名內上林○時宮人所挿鬧蛾尙用眞草蟲夾以葫蘆形如豌豆大名草裏金一枝值二三十金)

雪溝泥盡泛春缸。敕賜金魚唼藻雙。跪拜前來歸院亟。化生爭弄出珠窗。(二月疏濬各宮溝渠大銅缸汲新水于魚藻池取金魚養之)

乍聞浣姬話淒然。鶴語天寒在往年。一月兩朝渾似夢。傷心千古有紅鉛。(泰昌元年李可灼進紅鉛丸事詳實錄諸書)

寵殊中外冠彤庭。偶見依憑乞未靈。詛去呪來如有恨。聖明亦自奮雷霆。(自五年來客魏有所違忤上時怒罵呪恨形於詞色)

傳火千門曉未銷。黃金四目植雞翹。執戈偃子空馳驟。不逐人妖逐鬼妖。(大雉隸鐘鼓司○偃音震童子也大雉用之出後漢書禮儀志)

綵旒翩翩進綵妝。猗猗闔戟兩班行。共誇身手都如活。更比當年分外長。(惜

薪司以炭塑將軍高二三尺許用金綵裝畫如門神唯手與面存炭質名曰綵妝于臘月二十四日奏安各宮門旁其制與獸炭等耳忠賢特增大之倣傀儡法手眼俱動高八九尺或丈餘衣以綾絹佩以弓刀

上苑今朝共咬春。土牛舁入逐芒神。青陽左个瞻龍氣。銀勝先教賜廠臣。（立春日無貴賤皆啖生蘿蔔名曰咬春）○先春一日大京兆迎春畢塑小春牛芒神以京兆學生舁入朝百官拜賀訖賜春羅幡勝諸臣戴歸私第

鋪宮新列望還非。暈碧裁紅憶裕妃。切切太平懷未寐。坐依簫局曉光微。（裕妃事見前注）○罰有罪宮人提鈴警夜徐行正步其聲若四字曰天下太平云

寶仗西臨久不開。樞臣起草出新裁。灑灑零露仙方飲。願作金莖萬壽杯。（上自七年五月不豫至八月間總不離枕席樞臣霍維華進仙方零露飲并蒸法器具詳載酌中志略）

阿母生貪椒屬尊。抄名十五進宮門。豈知此日蛾眉賤。誰薦披香拜特恩。（元

年春選婚京輔之內民間以上年少希微寵澤有女者多樂報名

辟寒犀貯罨雕牀。尋憶初年事事傷。妙選俄聞三輔地。幾多錯配較儂強。（選婚之令聞于江浙民間婚嫁紛紛多有錯配者）

撲幕殘花撩亂春。誰傳紅壁可銷顰。聯牀姊妹休相恤。鸚母無情巧伺人。（范

慧妃李成妃事見前注）

宣賜生朝入謝恩。攢犀盤託鬱金尊。辭歸只在西墀畔。稱祝琅然盡子孫。（忠賢生于隆慶戊辰正月晦日自上元後餽遺者每早乾清西墀幾滿至正日綬帶齊擁若市千歲千千歲之聲殷訇若雷）

啟禎宮詞

侯官高 兆固齋著

朱衣報喜老宮官。仁德門前舞蹈歡。回奏青宮星月下。銅壺初滴五雲端。
祖宗內令守宮人。誰敢紅顏媚至尊。空把閒情私對食。一同兒女過青春。
府中妳口盡如花。玉食羅衣學內家。願得鋪宮多喜信。小房移住近文華。
鑰庫錢文辨六宮。分明天啓字當中。官人識出蕭梁號。爭把詩書笑相公。
詞林教授內書堂。手帕龍涎作贄將。遇著芳辰常放學。歌詩魚貫兩三行。
金龍印匣疊黃巾。鳳彩門中捧監臣。宣付中書教篆寫。印文傳是客夫人。
鬧蛾簇簇帽簷簪。如豆葫蘆貴抵金。爲愛應時元日景。先期分遣外間尋。
小盒黃封馬上持。平巾冉冉共星馳。遙看正義街西去。知賜夫人炙蛤蜊。
玉食三時派監臣。更番添直客夫人。盒房碟局趨如鶩。暖殿朱衣列幾巡。
監官教習館初開。紗帽宮袍女秀才。晝漏稀聞春日永。殿門爭望換牌來。
蕉霜千杵似香塵。虎眼窩絲製出新。旋領監中金盒貯。御前催進賜何人。

紅衣玉帶簇紗籠。小轎如雲輦路中。抬過乾清門外去。掌司稱是盛安宮。
炮鳳烹龍玉食方。代將文雉有成章。一從私進西乾所。東廠嘗聞大膳房。
萬疊琉璃八寶光。黃金合縫號無梁。永陵一閉希臨御。時拾丹沙向玉床。
兩兩金魚玉帶圍。朱絲搖曳午風吹。御前竟日承呼徧。喚節還穿按景衣。
新來秉筆接封章。捧匣先呈各直房。夜半宮門私遞出。批紅清曉進君王。
蟒衣騎馬膝飛魚。禮監班崇衆不如。每日協恭堂裡去。牙牌交接掌紅書。
寢宮魚鑰下銅函。御幄重興判醉監。不欲分明傷乳媼。魏朝勒病解宮銜。
綠蟻香浮琥珀光。廠臣私進御茶房。傳聞貴戚希恩寵。外宅屏人授釀方。
千嬰門北玉階長。宮月如燈照直房。一自承恩升六局。下班常帶御爐香。
寶冊初成進紫宸。六宮耳目一時新。監官早向南薰殿。烹鹿宣勞賜閣臣。
牙章密奏佩監臣。事件新來密似塵。月晦封呈米貴賤。先朝此意爲親民。
烏紗青鬢態娉婷。寶璽丹符掌掖庭。近日廠臣多異數。宮監奏發不曾停。
聖代相承孝養尊。慈甯宮內問安頻。義平門外停清蹕。銅鶴階前立似人。

暖閣聲聞接外廷。崔家小錄最惺惺。內中近日閒調笑。多說江南浪子星。
先朝選侍禮非常。賜得紅羅共斷腸。遙哭德陵開寶篋。宮人禮拜向雕梁。
才見鋪宮奏禮儀。宮門絕食又逾期。內家每望簷前雨。交掩朱衣哭裕妃。
蓮花門外任春風。爭寵承恩總夢中。閒數園林松柏歲。白頭相對噉鸞宮。
長春恩寵冠當時。薄命君前救慧妃。一謫乾西金屋閉。宮街惟有月明窺。
金榜新題永壽宮。赭黃龍幄望當中。廠公蹴踘時來此。喝采聲高散午風。
萬歲山前寶殿鐙。鼇山高起十三層。笙歌繞攢煙花下。頭白宮人憶定陵。
龍墀爆竹散春雷。法樂臨風北斗回。警蹕聲過香霧裏。朱衣十道滾燈來。
朝退乾清蠟炬紅。叩頭聲徹玉墀中。蟒衣不散金猊畔。知是回身拜廠公。
諸陵果廠獻時新。綠筍櫻桃馬上頻。不及皇船南內進。鱗魚冰養白如銀。
中秋紫蟹進鮮來。琥珀盈筐一尺堆。剔出比誇蝴蝶似。玉簪花畔勸金杯。
諸司元夕侍天顏。駕轉乾清放直班。一色蟒衣燈景補。重來玉陛看鼇山。
金花宮帽柳枝偏。新賜羅衣向御前。彩架遙看天外起。六宮都教戲鞦韆。

監中御馬賜名封。戲賞刁兒每數重。獨有飛元光最愛。陞來玉帶勢如龍。
畫炭泥香造彩裝。宮門安放映春光。年來進得如人似。衣錦持兵列兩行。
法部伶官演岳秦。懋勤殿畔避權臣。一從承應王癩子。打諢今無阿丑人。
銅樓燈火夜青熒。一望宮街似落星。腸斷日精門下路。滿身風露把金鈴。
艾虎青蒲綉絳紗。金泥寶扇畫朱砂。聽談西苑龍舟好。都羨長隨各外家。
木池水戲做紗屏。宣白時誇小御伶。真有魚龍游荇藻。更來仙佛渡滄溟。
寢殿春光列監臣。尙冠初進九華巾。宮前水戲重陳列。正練晴空似瀉銀。
齋宮幸罷游西苑。太液池心蕩鳳舟。天護眞龍出波浪。金壺玉案沒中流。
御前牌子似花枝。宮裡群呼作女兒。太液池中扶不起。龍香親繞法筵悲。
聞道回龍觀裡回。海棠千樹殿前開。六宮誰似花枝在。能使年年玉輦來。
白玉欄干紫玉橋。侍臣書榜在雲霄。漫誇石上魚龍巧。鱗甲波瀾勢動搖。
七夕金鍼進印監。掌宮催著鵲橋衫。旋來乞巧山前立。守看蛛絲結玉函。
封過文狸內裏稀。貓房近侍鎮相隨。朝朝肉食關支飽。臥看花前蛺蝶飛。

貴顯宮人滿御前。尙衣隨直五更旋。官家閒說珠袍事。猶有傷心萬歷年。
歲歲新秋損玉顏。登高隨幸兔兒山。羅衣日暮秋風起。擎著黃花對立班。
四壁塗椒百蘊香。紅籬獸炭疊銅瓶。內家只愛宮房暖。誰解調和及小王。
長日坤甯只習書。化行要使比關雎。六宮七載憑當御。共道君恩亦不如。
文樓經廠最清班。皇史宬中日月閒。一自官家眷東顧。圖書將出向人閒。
秉筆書紅禮監尊。梓材丹護聖人親。萬幾爭羨多能事。三殿工成合有神。
至日宮中添線無。承恩齊向御前趨。金錢銀葉隨宣賜。更賞消寒九九圖。
鐘磬風微宮殿深。西番寶像坐森森。千秋漢玉爲供養。宣德銅盤細網金。
內府芳辰賞賜偏。宮人隨例拾金錢。坤寧近日千秋節。止口銀枝向殿前。
深宮欲令識民艱。圖繪屏風列座間。怪底武英諸畫士。高人寫出富春山。
派學番經祝至尊。法螺瓔珞笑旁人。三朝跳步英華殿。誰識弓鞬一寸辛。
銀豆金錢向掉城。御前拋擲角輸贏。開原失後俱消歇。十載關支賞賜輕。
直房人語細如煙。暖閣分頭立內員。宮婢下班交耳語。外間封事奏楊漣。

乾清宮裏萬幾餘。牌子坊間日買書。問著詞臣綸閣下。楸枰棋局止羣居。
端門左去是神宮。洒掃司香領印公。此地不教人畜犬。玉衣虛殿在其中。
聖躬自夏未垂裳。八月宮中幸藥房。一色紅紗金壽字。裁衣賜著近前璫。
金餅靈露賜樞臣。內裡依方進聖人。市月汪汪空減膳。懋勤殿外孰沾巾。
大監平明入問安。紙花捧出血紋丹。宣來院使薰香過。寢殿前頭跪細看。
客奶承恩出禁門。梓宮辭見斷人魂。赭黃小袂焚燒哭。道是冲年齒髮存。
令節宮中賜鐸鍼。明珠簇簇鏤黃金。信王府內諸承奉。特賜同關帽上簪。
北苑門前兒小龍。碧鱗搖日看傾宮。特宣錦覆黃金盒。送入龍潭波浪中。
慈慶宮中日問安。禎祥已數黑龍蟠。誰知躍井黃金鯉。放入江湖生紫瀾。
朱柄青紗曲蓋輕。宮中遮向駕前行。天家豈少珍珠繖。祖制相承不敢擎。
龍衣專敕造臨安。近侍常誇是美官。一自君王登大寶。不因差點致凋殘。
碧瓦雕梁象一宮。高高雙闕北宸中。神聖具禮黃金像。直殿三時尙膳同。
坤寧宮裡奉恩暉。日日平明宿直歸。前殿鐘鳴回首處。滲金圓頂五雲飛。

二氏宮中像設榮。寶幢千尺與雲平。官家恭已如神聖。一日都教送外城。
祕書寶扇宣臨寫。精一堂間每日西。花下緋衣環玉檻。風前絳帖壓金猊。
寢宮安置夜如何。簾外分班跪拜過。散向直房銀燭下。金鈴聲到殿門多。
暖閣重簾曉日含。御門朝退自辰參。宸居恭默無他好。頗愛書臨虞世南。
瓊苑春和紫禁深。石山魚沼備登臨。皇家止此爲游幸。不似劉郎看上林。
圓殿南頭樓閣黃。玉河橋下水湯湯。青松數樹還如畫。空與宮鴉坐夕陽。
宸翰時濡小墨欄。宮人捧定鴨頭丸。案前一硯青綾匣。不是沉香與白檀。
當軒紅日五雲舒。六字高懸聖祖書。西北黃扉離地起。累朝臨御省愆居。
年年西內看秋收。旋磨台前侍冕旒。呈扮農家諸故事。幽風那得羨姬周。
寶牕朝旭映垂裳。御座文書覆柘黃。小樣金爐高一尺。時來宮監跪焚香。
紫禁霏霏瑞雪交。君王祈穀詣南郊。玉階遠望齋宮處。天外元燈動寶旂。
丹梯玉磴絕人寰。鳴鹿呦呦翠柏閒。近侍行過多指說。外家浪道是煤山。
玉食朝朝薦奉先。宮中製作最精虔。御前皇膳非無及。致孝親承列聖傳。

藉田隨侍向郊南。歸把三推禁裡談。宮嬪一時齊望幸。苑中何日看親蠶。
丹碧凌霄俯九重。螭頭雙繞紫金龍。宮簾一一垂黃錦。小監彤墀立仗恭。
高品夫人侍起居。南門宣示手精書。仁昭殿內時臨御。笑語無容近綺疏。
兩宮封冊一時俱。祖制甯教禮數殊。坐愛內家稱賀後。女官宣贊引皇姑。
憂深寇盜久齋居。手閱封章每夜除。慈聖自通瀛國夢。大官始進奉先餘。
六瓣青紗爪拉冠。袍房大布製來寬。天家皇子非從儉。要識民間織紵難。
兩王出閣館初開。宣使宮人侍往來。講罷雙雙紅板轎。青羅小傘日中回。
畫屏金碧日瞳瞳。寶鏡光分黼黻中。開著前星門北望。冬寒聞道正移宮。
暖殿晨趨甲夜回。提爐香霧滿蓬萊。六宮宮眷誰能比。奉聖恩深莫浪猜。
移宮賜膳日尊榮。板屋抬從內裡行。獨有名封難請乞。青山圓蓋不教擎。
劉監還朝景物非。舊時老伴對沾衣。大家亦說南邊好。勿戀深宮賜與歸。
啟禎宮詞跋

固齋先生爲八閩騷壇巨手。余于全閩詩話睹其數作。皆超脫雄渾。嗣響盛唐。

顧以未見全集爲憾茲宮詞一編其隸事雖與陳蔣王徐四家不甚同異而清辭麗句駸駸乎欲駕而上之亟爲錄登俾閱者如觀金谷珊瑚愈出愈奇而不致晒其床上疊床也庚子初冬吳江沈林蕙識

香豔叢書三集卷四終

宣統二年三月付印
同年三月出版

香艷叢書

(四冊定價大洋一元)

上海棋盤街平和里內

國學扶輪社

上海六馬路吉慶坊內

國光活版部

上海棋盤街平和里內

國學扶輪社



版權所有

外埠分發行所

成都 北都 北京 天津 天京 保定 山西

粹源 記書 官書 各書 官書 各書 文書
局莊 局坊 局坊 局坊 局坊 局坊 局

總發行所

校刊者 印刷所

廣東 漢口 長沙 南京 杭州 蘇州 湖州 寧波

會文 廣益 鴻文 啓新 德記 振新 羣益 汲經
學社 書局 書局 書局 書局 書局 書局 齋

國學扶輪社出版廣告

諸家


評大

香豔叢書	嚴幾道	林琴南	譚復生	章太炎	春酒堂文集	全謝山文鈔	吳摯甫詩集	吳摯甫文集	方望溪	戴南山	聊齋文集	胡稚威文集	魏默深文集	校名龔定盦全集	顧仲恭文集	錢牧齋文鈔	王壬秋全集	國朝文匯
------	-----	-----	-----	-----	-------	-------	-------	-------	-----	-----	------	-------	-------	---------	-------	-------	-------	------

共十集四十冊


四冊	三冊	二冊	八冊	一冊	五冊	六冊	二冊	四冊	四冊	七冊	二冊	四冊	十二冊	十二冊	十二冊	十二冊	十二冊	壹百冊
----	----	----	----	----	----	----	----	----	----	----	----	----	-----	-----	-----	-----	-----	-----

洋十元	洋一元二角	洋一元五角	洋八角	洋二元五角	洋五角	洋一元	洋二元	洋六角	洋一元五角	洋二元	洋二元	洋一元	洋二元	洋二元	洋二元	洋二元	洋二元	洋三元
-----	-------	-------	-----	-------	-----	-----	-----	-----	-------	-----	-----	-----	-----	-----	-----	-----	-----	-----



特
設
廉
價
部







第四集

香豔叢書

國學扶輪社印行





H2
1767
H95
1715

香艷叢書四集目錄

卷一

趙后遺事

金縷裙記

冥音錄

三夢記

名香譜

清尊錄

蜀錦譜

春夢錄

牡丹榮辱志

芍藥譜

花經

花九錫

卷二

瑤臺片玉甲種上編

瑤臺片玉甲種中編

卷三

瑤臺片玉甲種下編

閨律

續豔體連珠

勝朝彤史拾遺記

卷四

勝朝彤史拾遺記

香艷叢書

四集卷一

趙后遺事

宋 秦醇

余里中有李生世習儒術而業甚貧余嘗過其家牆角一破筐藏古抄書數十冊中有趙氏瑣事雖紙墨脫落尙可觀覽余就李生乞之以歸補正編次成篇傳諸好事者

趙后腰骨尤纖細。善踞步行。若人手執花枝。顫然。他人莫能學也。在主家時。號爲飛燕。入宮後。復引援其妹。得幸爲昭儀。昭儀尤善笑語。肌骨秀滑。二人皆天下第一色。色傾後宮。自昭儀入宮。帝益希幸東宮。昭儀居西宮。后日夜欲求子爲自固久遠計。多用小犢車載年少子與通。帝一日惟從三四人往。后宮后方與人亂。不知也。左右急報。后驚遽出迎帝。冠髮散亂。言語失度。帝因亦疑焉。帝坐未久。復聞壁衣中有人嗽聲。帝乃去。由是帝有害后意。以昭儀故。隱忍未

發一日。帝與昭儀共處。帝忽攘袖。瞋目直視昭儀。怒氣怫然。不可犯遽。自離席。伏地謝曰。臣妾族孤寒。下無強近之親。一兄得備後庭。驅使之列。不意獨承幸。御濃被。聖私立于衆人之上。恃寵邀愛。衆謗來集。加以不識忌諱。冒犯威稜。臣妾願賜速死。以寬聖抱。因涕淚交下。帝自引昭儀曰。汝復坐。吾語汝。汝無罪。汝之姊。吾欲梟其首。斷其手足。置溷中。乃快吾意。昭儀曰。何緣而得罪。帝言壁衣中事。昭儀曰。臣妾緣后得備後宮。后死。則妾安能獨生。況陛下無故而殺一后。天下有以窺陛下也。願得身實鼎鑊。體膏斧鉞。因大慟。以身投地。帝驚。遂起。持昭儀曰。吾以汝之故。不害后。第言之耳。汝何自恨若是久。昭儀方就坐。問壁衣中人。帝陰窮其迹。乃宿衛陳崇子也。帝使人就其家殺之。而廢陳崇。昭儀往見后。言帝所言。且曰。姊曾憶家貧寒。飢無聊。姊使我共鄰家女爲草履。入市貨履。市米。一日得米。歸遇風雨。無火可炊。飢寒甚。不能成寐。使我擁姊背同泣。此事姊豈不憶也。今日幸富貴。無他人戕我。而自毀敗。或再有過。帝復怒。事不可救。身首異地。爲天下笑。今日妾能拯救也。存歿無定。或爾妾死。尙誰攀乎。乃泣。

涕不已。后亦泣焉。自是帝不復往后宮。承幸御者。昭儀一人而已。昭儀方浴。帝私窺之。侍者報昭儀。昭儀急趨燭後。避帝。瞥見之心愈眩惑。他日昭儀浴。帝默賜侍者。特令不言。帝自屏罅覘。蘭湯氤氳。昭儀坐其中。若三尺寒泉。浸明玉。帝意思飛揚。若無所主。帝常語近侍。自古人主無二后。若有。則吾立昭儀爲矣。后知昭儀以浴盆寵幸。乃具湯浴。請帝以觀。既往。后入浴。裸體而立。以水沃之。后愈親近。而帝愈不樂。不幸而去。后泣曰。愛在一身。無可奈何。后生日。昭儀爲賀。帝亦同往。酒半酣。后欲感動帝意。乃泣數行下。帝曰。他人對酒而樂。子獨悲。豈有所不足耶。后曰。妾昔在主宮時。帝幸其第。妾立主後。帝視妾不移目。甚久。主知帝意。遣妾侍帝。竟承更衣之幸。下體常污御服。童欲爲帝浣去。帝曰。畱以爲憶。不數日。備後宮。時帝齒痕猶在。妾頸。今日思之不覺感泣。帝惻然懷舊。有愛后意。傾視嗟歎。帝欲畱昭儀。先辭去。帝遇暮方離后。而后因帝幸心爲姦利。經三月。乃詐託有孕。上牋奏云。臣妾久備掖庭。先承幸御。遣賜大號。積有歲時。既因始生之日。復加善祝之私。特屈乘輿。俯臨東掖。重沐恩施。再承幸御。臣妾數

月來內宮盈實。月脉不流。愛食美甘。不異常日。知聖躬之在體。夢天日之入懷。虹初貫日。總是珍符。龍據妾胸。茲爲嘉瑞。更約蕃育神嗣。抱日趨庭。瞻望聖明。踴躍臨賀。謹此以聞。帝時在西宮。得奏。喜動顏色。答云。因閱來奏。喜慶交集。夫妻之私。義均一體。社稷之重。嗣續其先。任體方初。保綏宜厚。藥有性者。勿舉。食無毒者可親。有求上字。勿煩牋奏。口授宮使可矣。兩宮候問使交至。后慮帝幸見其詐。乃與宮使王盛謀。自爲之計。盛謂后曰。莫若辭以有妊者。不可近人。近人則有所觸焉。觸則孕敗。后乃遣王盛奏。帝不復見后。第遣問安否而已。俯及誕月。帝具浴子之儀。后召王盛入宮中。謂曰。汝自黃衣郎出入禁掖。吾引汝父子俱富貴。無憾。吾爲自利長久計。託孕。乃吾之私意。實非也。已及期。子能爲我謀焉。事成。子萬世有後。利盛曰。臣爲后取民間才生子。携入宮爲后子。但事密不泄。亦無害。后曰。可。盛訪郭外有生子者。纔數日。以百金取之。以物囊囊之。入宮。見后。既發器。則子死。后驚曰。子死安用也。盛曰。臣今知矣。載子之器氣不泄。此所以死也。臣當穴其上。使氣可出入。則子不死。盛得子。趨宮門。欲入內。子

驚啼尤甚。盛不敢入。少選復携之趨門。子復如是。盛終不敢携入宮。盛來見后。言子驚啼事。后泣曰。爲之奈何。時已踰十二月矣。帝頗疑訝。或奏帝云。堯之母十四月而生。堯后所姪。當是聖人。后終無計。乃遣人奏帝云。臣妾昨夢龍臥。不幸聖嗣不育。帝但歎惋而已。昭儀知其詐。乃遣人謝后曰。聖嗣不育。豈日月不滿也。三尺童子。尙不可欺。況人主乎。一日。手足俱見。妾不知姊之死所也。時後庭掌茶宮女朱氏生子。昭儀曰。從何而得也。乃以身投地大慟。帝自持昭儀起坐。昭儀聲呼宮吏蔡規曰。急爲吾取子來。規取子上。昭儀語規曰。爲吾殺之。規修慮未行。昭儀怒罵曰。吾重祿養汝。將安用也。不然。吾併戮汝。規以子擊殿礎。死投之井。後宮宮人孕子者皆殺之。後帝行步遲澀。氣憊不能御女。有方士聞而獻丹。其丹養於火者百日乃成。先以大甕貯水滿。乃下丹水中。水卽沸。又易去復貯新水。如是十日不輟。丹乃成。帝日服一粒。頗能行幸。一夕在大慶殿。昭儀醉連進十粒。初夜絳帳春濃。帝笑聲吃吃不止。及中夜昏昏。不能起坐。聲息聞然。昭儀急起。秉燭視帝。精出如泉溢。有頃。帝崩。太后遣人理昭儀。且急窮帝。

得疾之端。昭儀乃自絕。后在東宮。忽寐中驚啼甚久。侍者呼問方覺。乃言曰。適吾夢中見帝。帝自雲中賜吾坐。帝命進茶。左右奏帝云。向日侍帝不謹。不合啜此茶。吾意既不足。吾又問帝。昭儀安在。帝曰。以數殺吾子。今罰爲巨龜。居北海之陰水穴間。受千歲水寒之苦。乃大慟。後梁時。北鄙大月支王獵如海上。見巨龜出於穴。其首猶貫玉釵。顚望波間。惓惓有戀人之意。大月支王遣使問梁武帝。帝以昭儀事報之。

(完)

金縷裙記

韋氏子舉進士。門閥甚盛。嘗納妓于洛。顏色明秀。尤善音律。韋曾令寫杜工部詩。得本甚舛。妓隨筆改正。文理曉然。年二十一而卒。韋悼痛之甚。爲羸瘠。棄事而寐。意其夢見。一日。家僮有言。嵩山任處士有返魂術。韋召而求之。任命擇日齋戒。除一室。舒幃焚香。仍須一經身衣。以導其來。韋搜衣笥。盡施僧矣。惟餘一金縷裙。任曰。事濟矣。是夕。絕人屏事。且以暝近。悲泣爲誠。然蠟炬於香前。曰。觀燭燃寸。卽復去矣。韋潔服歛息。一稟其言。是夜。食寢俱止。河漢澄明。任忽長歎。持裙面幃而招。如是者三。忽聞吁歎之聲。俄頃。暝幃微出。斜睇而立。幽芳凝怨。若不自勝。韋驚起泣。任曰。無庸恐迫。以致倏逝。韋忍淚揖之。無異平生。或與之言。領首而已。時夜將半。歛欲逼之。紛然而滅。韋乃捧幃長慟。既絕而蘇。任生曰。某非獵食者。哀君情切。故來奉救。徒思無益。嗣後不必真懷。韋欲酬之。不顧而別。韋嘗賦詩曰。惆悵生前簇蝶裙。春來猶見伴行雲。不是布施剛留得。安得相逢此夕君。生以此鬱鬱不懌。逾年而歿。

續漢書曰。漢明德皇后禿裙不緣。五行志曰。獻帝時。女子競爲長裙。其上甚短。西京雜記曰。趙飛燕立爲皇后。其弟上錦織成裙。晉東宮舊事曰。皇太子納妃。有絳紗複裙。絳碧結綾複裙。丹碧紗紋雙裙。紫碧紗文雙裙。紫碧紗文繡纓雙裙。紫碧紗縠雙裙。丹碧杯文羅裙。晉宋舊事曰。崇進皇太后爲太皇太后。備絳碧紗雙裙。絳絹欄_屬裙。湘絳紗複裙。白絹裙。

(完)

冥音錄

唐 朱慶餘

廬江尉李侃者。隴西人。家於洛之河南。太和初。卒於官。有外婦崔氏。本廣陵倡家。生二女。既孤且幼。孀母撫之以道。遠子未成人。因寓家廬江。侃既死。雖侃之宗親居顯要者。絕不相聞。廬江之人。咸哀其孤藐。而能自強。崔氏性酷嗜音。雖貧苦求活。常以絃歌自娛。有女弟薩奴。風容不下。善鼓箏。爲古今絕妙。知名於時。年十七。未嫁而卒。人多傷焉。二女幼傳其藝。長女適邑人丁玄夫。性識不甚聰慧。幼時每教其藝。小有所未至。其母輒加鞭箠。終莫究其妙。每心念其姨曰。我姨之甥也。今乃死生殊途。恩愛久絕。姨之生乃聰明。死何蔑然。而不能以力祐助。使我心開目明。粗及流輩哉。每至節朔。輒舉觴酹地。哀咽流涕。如此者八歲。母亦哀而憫焉。開成五年四月三日。因夜夢寐。驚起號泣。謂其母曰。向者夢姨執手泣曰。我自辭人世。在陰司薄屬教坊。授曲於博士李元憑。元憑屢薦我於憲宗皇帝。帝召居宮一年。以我更直穆宗皇帝宮中。以筆導諸妃出入一年。

上帝誅鄭注。天下大酺。唐氏諸帝宮中互選妓樂以進神堯太宗二宮。我復得侍憲宗。每一月之中五日一直長秋殿。餘日得肆遊觀。但不得出宮禁耳。汝之情懇。我乃知也。但無由得來。近日襄陽公主以我爲女。思念頗至。得出入主第私許我歸。成汝之願。汝早圖之。陰中法嚴。帝或聞之。當獲大譴。亦上累於主。復與其母相持而泣。翌日乃灑掃一室。列虛筵設酒果。髣髴如有所見。因執筆就坐。閉目彈之。隨指有得。初授人間之曲。十日不得一曲。此一日獲十曲。曲之名品殆非生人之意。聲調哀怨。幽幽然鵲啼鬼嘯。聞之者莫不歎欷。曲有迎君樂正商調三斛林歎分絲調四秦王賞金歌小石調二廣陵散正商調二行路難正商調三斛林歎十四疊秦王賞金歌十八疊廣陵散十八疊行路難正商調二上江虹正商調二晉城仙小石調二絲竹賞金歌十八疊紅牕影正商調二雙柱調四十疊十曲畢。慘然謂女曰。此皆宮闈中新翻曲。帝尤所愛重。斛林歎紅窓影等每宴飲卽飛毬舞蓋爲佐酒長夜之歡。穆宗敕修文舍人元稹撰其詞數十首甚美。醺酣令宮人遞歌之。帝親執玉如意擊節而和之。勅秘其詞極切恐爲諸國所得。故不敢泄。歲攝提地府當有大變。得以流傳人世。幽明異路人鬼道。

殊。今者人事相接。亦萬代一時。非偶然也。會以吾之十曲獻陽地天子。不可使無聞於明代。於是縣白州。州白府。刺史崔璿親召而試之。則絲桐之音。搶縱可聽。其差琴調。不類秦聲。乃以衆樂合之。則宮商調殊不同矣。母令小女再拜求傳十曲。亦備得之。至暮決去。數日復來曰。吾聞揚州連帥取汝。恐有謬誤。汝可一一彈之。又留一曲曰。思歸樂。無何州府果令送至揚州。一無差錯。廉察使故相李德裕議表其事。小女尋卒。

卷一

四

集

三夢記

唐 白行簡

人之夢。異於常者有之。或彼夢有所往而此遇之者。或此有所爲而彼夢之者。或兩相通夢者。天后時。劉幽求爲朝邑丞。嘗奉使歸。未及家十餘里。適有佛堂寺。路出其側。聞寺中歌笑歡洽。寺垣短缺。盡得覩其中。劉俯身窺之。見十數人。兒女雜坐。羅列盤饌。環繞之而共食。見其妻在坐中。語笑。劉初愕然。不測其故。久思之。且思其不當至此。復不能捨之。又熟視容止。言笑無異。將就察之。寺門閉。不得入。劉擲瓦擊之。中其疊。洗破。迸走散。因忽不見。劉踰垣直入。與從者同視殿廡。皆無人。寺扃如故。劉訝益甚。遂馳歸。比至其家。妻方寢。聞劉至。乃敍寒暄。詎妻笑曰。向夢中與數十人同遊一寺。皆不相識。會食於殿庭。有人自外以瓦礫投之。杯盤狼藉。因而遂覺。劉亦具陳其見。蓋所謂彼夢有所往而此遇之者矣。

元和四年河南元微之爲監察御史。奉使劍外踰旬。予與仲兄樂天隴西李杓

直同遊曲江。詣慈恩佛舍。徧歷僧院。淹留移時。日已晚。同詣杓直修行里第。命酒對酌甚歡暢。兄停杯久之曰。微之當達梁矣。命題一篇于壁。其詞曰。春來無計破春愁。醉折花枝作酒籌。忽憶故人天際去。計程今日到梁州。實二十一日也。十許日。會梁州使適至。獲微之書一函。後寄紀夢詩一篇。其詞曰。夢君兄弟曲江頭。也入慈恩院裏遊。屬吏喚人排馬去。覺來身在古梁州。日月與遊寺題詩。日月率同。蓋所謂此有所爲而彼夢之者矣。

貞元中。扶風竇質與京兆韋旬同自亳入秦。宿潼關逆旅。竇夢至華岳祠下。見一女巫。黑而長。青裙素襦。迎路拜揖。請爲之祝神。竇不獲已。遂聽之。問其姓。自稱趙氏。及覺。具言於韋。明日至祠下。有巫迎客。容質妝服皆所夢也。顧韋謂曰。夢有徵也。乃命從者視囊中得錢三環與之。巫撫掌大笑。謂同輩曰。如所夢矣。韋驚問之。對曰。昨夢二人從東來。一髯而短者。祝醕陵錢三環焉。及旦。乃徧述於同輩。今則驗矣。竇因問巫之姓氏。同輩中曰。姓趙氏。自始及末。若合符契。蓋所謂兩相通夢者矣。

行簡曰。春秋及子史言夢者多。然未有載此三夢者也。世人之夢。亦衆矣。亦未
有此三夢。豈偶然也。抑亦必前定耶。予不能知。今備記其事。以存錄焉。

行簡云。淮安西市帛肆。有販粥求利而爲之平者。姓張。不得名。家富於財。居光
德里。其女國色也。嘗因晝寢。夢至一處。朱門大戶。槩戟森然。由門而入。望其中
堂。若設燕張樂之爲。左右廊皆施幃幄。有紫衣吏引張氏于西廊。幃見少女如
張等輩十許人。皆花容綽約。釵鈿照耀。既至。促張妝飾。諸女迭助之。理澤傅紛
有頃。自外傳呼侍郎來。自隙間窺之。見一紫綬大官。張氏之兄。嘗爲其小吏。識
之。乃言曰。吏部沈公也。俄又呼曰。尙書來。未有識者也。逡巡復連呼曰。某來。某
來。皆郎官以上。六七個坐廳前。紫衣吏曰。可出矣。群女旋進金石絲竹。鏗鐃震
響。庭署酒酣。王并州見張氏而視之。尤屬意。謂之曰。汝習何藝。能對曰。未嘗學
聲音。使與之琴。辭不能。曰。第操之。乃撫之而成曲。與之箏亦然。琵琶亦然。皆平
生所不習也。王公曰。恐汝或遺。乃令口受吟詩。鬟梳嫺俏學宮妝。獨立閒庭。納
夜涼。手把玉簪敲砌竹。清歌一曲月如霜。謂張曰。且歸辭父母。異日復來。張忽

啼寤。手捫衣帶。謂母曰。尚書遺詩矣。索筆錄之。母問其故。泣對以所夢。且曰。殆將死乎。母怒曰。汝作魘爾。何以爲辭。乃出不祥言如是。因臥病累日。外親有持酒肴者。又有將食來者。女曰。且須膏沐澡淪。母聽良久。豔妝盛色而至。食畢。乃徧拜父母及坐客曰。時不留。某今往矣。因授衾而寢。父母環伺之。俄爾遂卒。會昌二年六月十五日也。

(完)

名香譜

宋 葉廷珪

蟬蠶香

交趾所貢。唐宮中呼爲瑞龍腦。

茵犀香

西域獻。漢武帝用之。煮湯辟癘。

石葉香

魏文帝時。腹題國貢。狀如雲母。可以辟疫。

百濯香

孫亮爲四姬合四炷香衣。香百濯不落。因名。

鳳髓香

唐穆宗藏眞島出。焚之崇禮。

紫述香

述異記云。又名麝香草。

都夷香

洞冥記云。香如棗核。食之不饑。

荃蕪香

燕昭王時。出波弋國。浸地則土石皆香。

辟邪香。瑞麟香。金鳳香。

唐同昌公主帶玉香囊。芬馥滿路。

月支香

月支國進如卵。燒之辟疫百里。九月不散。

振靈香

十洲記云。聚窟洲有樹如楓葉。香聞數百里。

返魂香。震檀香。驚精香。返生香。却死香。

月支國一香五名。屍埋地下者。聞之即活。

千畝香

述異記云。以林名香。

翻齊香

出波斯國。入藥。治百病。

龜甲香

述異記云。卽桂香之善者。

兜末香

本草。漢武帝西王母降。焚是香也。

沉光香

洞冥記云。塗魂國燒之有光。

沉榆香

拾遺記。黃帝封禪。焚之。

蘅蕪香

漢武帝夢李夫人授此香。

百蘊香

飛燕浴身用此。

月麟香

文帝宮中愛女號袖裏春。

辟寒香

焚之可以辟寒。

龍文香

漢武帝時外國進。

千步香

南郡所貢焚之千步內猶有香氣。

九和香

三洞珠囊曰玉女擎玉爐焚之。

九真香青木香沉水香

皆合德上飛燕襪中物。

罽賓國香

楊牧席間焚之。上有樓臺之狀。

拘勿頭華香

拘勿頭國進香。聞數里。

精祇香

出塗魂國。焚之辟鬼。

飛氣香

珠囊曰。眞人所燒。

五枝香

燒之十日。上徹九重。

羯布羅香

西域記云。樹如松。色如冰雪。

大象藏香

因龍鬪而生。若燒一丸。興大光明。珠如甘露。

兜婁婆香。牛頭旃檀香。

出典釋。

明庭香。明天發口香。

出胥陀寒國。

迷迭香

出西域。焚之去邪。

必栗香

焚之去一切惡氣。

揭車香

本草。焚之去蛀辟臭。

刀圭第一香

唐昭宗賜崔胤一粒。終日旒旒。

曲水香

香盤卽之。似曲水像。

鷹嘴香

番人出。焚之辟疫。

乳頭香

曹務光理趙州。用盆焚云。財易得。佛難求。

助情香

安祿山進。玄宗含之。筋力不倦。

夜酣香

湯帝迷樓所夢也。

雀頭香

魏文帝遣使於吳求雀頭香。

伴月香

徐鉉月夜露坐焚之故名此。

雞舌香

漢侍中刁存事。又尚書郎含雞舌香奏事。

安息香

出三佛齊國。

亞濕香

出占城國。

金顏香

出大食真臘國。

神精香一名荃蘿一名春蕪

出波弋。卽前荃蕪香也。其皮如絲。可以爲布。

沉光香。明庭香。金磬香。塗魂香。
元封中。外國所獻。

蓬萊香

卽沉水香結未成者。成片如小芝及大菌之狀。

鷓鴣斑香。思勞香。

出日南。如乳香。

橄欖香

狀如黑膠。炙燒毫粒。經旬不散。

(完)

清尊錄

宋 廉宣

政和初。冀州客次中。或言某官之家有異事。語未畢。而某官者至。因自言某妻生一男一女而死。某既再娶矣。一日亡妻忽空中有聲。如小兒吹呌子狀。三二日輒一至。某問之曰。君亦有形乎。曰有之。卽見形如平生。叙舊感泣。然近人輒引去。常相距十許步。因謂曰。昔爲夫婦。今忍不相親。於是相與坐堂中。某起執其手。則堅冷如冰鐵。妻勃然掣手去。後五日。乃復來。慍曰。前日遽驚我。何耶。某再三謝之。竟不可近。久之。後妻忽夢其先祖云。汝夫前妻爲怪。乃陰府失收耳。今已召捕且獲。後數日果絕。

建炎初。關陝交兵。京西南路安撫使司檄諸郡。凡民家畜三年以上糧者。悉送官。違者以乏軍興論。金州石泉縣民楊廣。貲鉅萬。積粟支三十年。因是悒悒得疾。廣故豪橫。兼并其鄉鄰。甚患苦之。既病篤。絕惡見人。雖妻子不得見。自隙窺之。則時捽所藉稻藁而食之。日所食方數尺。乃死。斂畢。棺中忽有聲。若蹢躅者。

家人亟呼匠欲啓棺。匠曰：此非甦活，殆必有怪，勿啓。其子不忍啓之，則一驢躍出，嘶鳴甚壯，衣帽如蟬蛻然。因繫之隙屋中。一日其子婦持草飼驢，忽跳齧婦臂流血。婦羸暴忿怒，取抹草刀刺之立死。廣妻遂訴縣稱婦殺翁。縣遣修武郎王直臣往驗之，備得其事。

興元民有得塗遺小兒者，育以爲子。數歲，美姿首，民夫婦計曰：使女也，教之歌舞，獨不售數十萬錢邪？婦曰：固可詐爲也。因納深屋中，節其食飲，膚髮腰步皆飾治之。比年十二三，嫣然美女子也。携至成都，教以新聲，又絕警慧，益秘之，不使人見。人以爲奇貨，里巷民求爲妻不可。曰：此女當歸之貴人。於是女僧及貴游好事者踵門一覲面，輒避去，猶得錢數千，謂之看錢。久之有某通判者來成都，一見心醉，要其父必欲得之。與直至七十萬錢，乃售。旣成券，喜甚，置酒與客飲，使女歌侑酒。夜半客去，擁而致之房。男子也大驚，遣人呼其父母，則遁去，不知縱跡。告官召捕之，亦卒不獲。時張子公尹蜀云。

鄭州進士崔嗣復預貢入都，距都城一舍，宿僧寺法堂上。方睡，忽有聲叱之者。

嗣復驚起視之。則一物如鶴色蒼黑。目炯炯如燈。鼓翅大呼甚厲。嗣復皇恐避之。廡下乃止。明日語僧。對曰。素無此怪。第旬日前有叢板堂上者。恐是耳。嗣復至都下。爲開寶一僧言之。僧曰。藏經有之。此新死屍氣所變。號陰摩羅鬼。此事王碩侍郎說。

狄氏者。家故貴。以色名動京師。所嫁亦貴家。明艷絕世。每燈夕及西池奉遊。都城士女。謹集自諸王邸第。及公侯戚里中貴人家。帘幕車馬相屬。雖歌姝舞姬。皆飾璫翠。佩珠犀。覽鏡顧影。人人自謂傾國。及狄氏至。靚粧却扇。亭亭獨出。雖平時妬悍。自銜者。皆羞服。至相忿。詆輒曰。若美如狄夫人邪。乃相凌。我其名動一時如此。然狄氏資性貞淑。遇族遊群。飲澹如也。有滕生者。因出遊觀之。駭慕喪魂魄。歸悵悵不聊生。訪狄氏所厚善者。或曰。尼慧澄與之習。生過尼。厚遺之。日日往。尼愧謝問故。生曰。極知不可。幸萬分一耳。不然且死。尼曰。試言之。生以狄氏告。尼笑曰。大難大難。此豈可動邪。具道其決不可狀。生曰。然則有所好乎。曰。亦無有。唯旬日前屬我求珠璣。頗急。生大喜曰。可也。卽索馬馳去。俄懷大珠。

二囊示尼曰。直二萬緡。願以萬緡歸之。尼曰。其夫方使北。豈能遽辦如許償邪。生亟曰。四五千緡。不則千緡數百緡皆可。又曰。但可動不須一錢也。尼乃持詣狄氏。果大喜。玩不已。問須直幾何。尼以萬緡告。狄氏驚曰。是纔半直爾。然我未能辦。奈何。尼因屏人曰。不必錢。此一官欲祝事耳。狄氏曰。何事。曰。雪失官耳。夫人弟兄夫族。皆可爲也。狄氏曰。持去。我徐思之。尼曰。彼事急且投他人。可復得邪。姑留之。明旦來問報。遂辭去。且以告生。生益厚餉之。尼明日復往。狄氏曰。我爲營之。良易。尼曰。事有難言者。二萬緡物。付一禿媼。而客主不相問。使彼何以爲信。狄氏曰。奈何。尼曰。夫人以設齋來院中。使彼若邂逅者。可乎。狄氏頰面搖手曰。不可。尼慍曰。非有他。但欲言雪官事。使彼無疑耳。果不可。我不敢強也。狄氏乃徐曰。後二日我亡兄忌日。可往。然立語亟遣之。尼曰。固也。尼歸及門。生已先在。詰之。具道本末。拜之曰。儀秦之辨。不加於此矣。及期。尼爲治齋具。而生匿小室中。具酒殺俟之。哺時。狄氏嚴飾而至。屏從者。獨携一小侍兒。見尼曰。其人來乎。曰。未也。唄祝畢。尼使童子主侍兒。引狄氏至小室。牽簾見生及飲具。大驚。

欲避去。生出拜。狄氏答拜。尼曰。郎君欲以一卮爲夫人壽。願勿辭。生固頎。秀狄氏頗心動。睇而笑曰。有事第言之。尼固挽使坐。生持酒勸之。狄氏不能却。爲盡卮。卽持酒酬生。生因徙坐。擁狄氏曰。爲子且死。不意果得子。擁之卽幃中。狄氏亦歡然。恨相得之晚也。比夜散去。猶徘徊顧生。挈其手曰。非今日幾虛作一世。人夜當與子會。自是夜輒開垣門。召生無闕夕。所以奉生者靡不至。惟恐毫絲不當其意也。數月。狄氏夫歸。生小人也。陰計已得。狄氏不能棄重賄。伺其夫與客坐。遣僕入白曰。某官嘗以珠直二萬緡賣第中。久未得直。且訟于官。夫謬貽入詰。狄氏語塞曰。然。夫督取還之。生得珠。復遣尼謝狄氏。我安得此。貸于親戚以動子耳。狄氏雖恚甚。終不能忘生。夫出輒召與通。逾年。夫覺閑之嚴。狄氏以念生病死。余在太學時親見。

崇寧中有王生者。貴家之子也。隨計至都下。嘗薄暮被酒。至延秋坊。過一小宅。有女子甚美。獨立于門。徘徊徙倚。若有所待者。生方注目。忽有騶騎呵衛而至。下馬於此宅。女子亦避去。忽忽遂行。初不暇問其何姓氏也。抵夜歸。復過其門。

則寂然無人聲。循牆而東。數十步。有隙地丈餘。蓋其宅後也。忽自內擲一瓦出。拾視之。有字云。夜於此相候。生以牆上剝粉戲書瓦背云。三更後宜出也。復擲入焉。因稍退十餘步伺之。少頃。一男子至。周視地上。無所見。微嘆而去。既而三鼓。月高霧合。生亦倦睡欲歸矣。忽牆門軋然而開。一女子先出。一老嫗負笥從後。生遽就之。乃適所見立門首者。熟視生愕然曰。非也。回顧嫗。嫗亦曰。非也。將復入。生挽而却之曰。汝爲女子。而夜與人期至此。我執汝詣官。醜聲一出。辱汝門戶。我邂逅遇汝。亦有前緣。不若從我去。女泣而從之。生携歸逆旅。匿小樓中。女自言曹氏。父早死。獨有已一女。母鍾愛之。爲擇所歸。女素悅姑之子某。欲嫁之。使乳嫗達意於母。母意以某無官弗從。遂私約相奔。墻下微嘆而去者。當是也。生旣南宮不利。遷延數月。無歸意。其父使人詢之。頗知有女子偕處。大怒。促生歸。扁之別室。女所齎甚厚。大半爲生資。所餘與嫗坐食垂盡。使人訪其母。則以亡女故。抑鬱而死久矣。女不得已。與嫗謀下汴。訪生所在。時生侍父官閩中。以至廣陵。資盡不能進。遂隸樂籍。易姓名爲蘇媛。生游四方。亦不知女安否。數

年自浙中召赴闕。過廣陵。女以倡侍。謙識生。生亦訝其似女。屢目之。酒半。女捧觴勸。不覺兩淚墮酒中。生懷然曰。汝何以至此。女以本末告。淚隨語零。生亦媿歎流涕。不終席。辭疾而起。密召女納爲側室。其後生子。仕至尙書郎。歷數郡。生表弟臨淮李從爲余言。

大桶張氏者。以財雄長京師。凡富人以錢委人。權其子而取其半。謂之行錢。富人視行錢如部曲也。或過行錢之家。設特位置酒。婦女出勸。主人皆立侍。富人遜謝。強令坐。再三乃敢就。張氏子年少。父母死。主家事。未娶。因祠州西灌口神。歸過其行錢孫助教家。孫置酒數行。其未嫁女出勸。容色絕世。張目之曰。我欲娶爲婦。孫皇恐不可。且曰。我公家奴也。奴爲郎主丈人。隣里笑怪。張曰。不然。汝不過少錢物耳。豈敢相僕隸也。張固豪侈奇衣飾。即取臂上古玉條脫與女。且曰。擇日納幣也。飲罷去。孫隣里交來賀曰。有女爲百萬主母矣。其後張別議婚。孫念勢不敵。不敢往問期。而張亦恃醉戲言耳。非實有意也。逾年。張婚他族。而孫女不肯嫁。其母曰。張已娶矣。女不對而私曰。豈有信約如此而別娶乎。其

父乃復因張與妻祝神回。邀并飲其家而使女窺之。既去。曰。汝見其有妻。可嫁矣。女語塞。去房內。蒙被臥。俄頃卽死。父母哀慟。呼其隣鄭三者告之。使治喪具。鄭以送喪爲業。世所謂件作行者也。且曰。小口死勿停喪。卽日穴壁出瘞之。告以致死之由。鄭辦喪具。見其臂有玉條脫。心利之。乃曰。某一園在州西。孫謝之曰。良便。且厚相酬。號泣不忍視。急揮去。卽與親族往送其殯而歸。夜半月明。鄭發棺欲取條脫。女蹶然起。顧鄭曰。我何故在此。亦幼識鄭。鄭以言恐曰。汝之父母怒汝不肯嫁而念張氏辱其門戶。使我生理汝於此。我實不忍。乃私發棺而汝果生。女曰。第送我還家。鄭曰。若歸必死。我亦得罪矣。女不得已。鄭匿他處以爲妻。完其殯而徙居州東。鄭有母。亦喜其子之有婦。彼小人不暇究所從來也。積數年。每語及張氏。猶忿恚。欲往質問前約。鄭每勸阻防閑之。崇寧元年。聖端太妃上仙。鄭當從御。娶至永安。將行。視其母。勿令婦出遊。居一日。鄭母晝睡。孫出僦馬直詣張氏門。語其僕曰。孫氏第幾女。欲見某人。其僕往通。張驚且怒。謂僕戲已。罵曰。賤奴誰教汝如此。對曰。實有之。乃與其僕俱往視焉。孫氏望見張。

跳跟而前。曳其衣。且哭且罵。其僕以婦女不敢往解。張以爲鬼也。驚走。女持之益急。乃擘其手。手破流血。推仆地立死。備馬者恐累也。往報鄭母。母訴之有司。因追鄭對獄具狀。已而園陵使上鄭發冢罪。該流。會赦得原。而張實推女而殺之。應死。雖奏獲貸。猶杖脊。竟憂畏死獄中。時吳拭顧道尹京傳其事云。建炎初。劇盜張遇起江淮間。所至噬螫無噍類。衆且數十萬。其裨將馬吉者。狀絕偉。善用兵。然頗仁慈。每戒軍士勿妄殺人。曰。爲盜脫饑耳。得食則已。奈何廣殺。凡俘獲士人及僧道。輒條別善遇之。有疾病。視其起居飲食甚篤。士卒得女以獻者。置別室。訪其親戚還之。無所歸者。擇配嫁娉。由是遇帳下譖之曰。是收軍情者。遇怒。掃塲欲斬之。呼至。數其罪。嘻笑自若。曰。賊殺賊。豈湏有罪邪。何云云。如是我死固分耳。既就地坐。瞑目合爪。視之死矣。遇雖殘忍。亦爲變色。左右至流涕。古稱得道至人。以至佛菩薩多隱盜賊牢獄屠釣中。以其救人如吉殆是耶。

富韓公謝事居洛。一日。邵康節來謁。公已不通客。但戒門者曰。邵先生來。無早

晚入報。是日公適病足臥小室。延康節至臥床前。康節笑曰。他客得至此耶。公亦笑指康節所坐胡床曰。病中心怍怍。雖兒子來立語遣去。此一胡床。惟待君耳。康節顧左右曰。更取一胡床來。公問故。答曰。日正中。當有一綠衣少年騎白馬候公。公雖病。強見之。公薨後。此人當秉史筆記公事。公素散康節神其言。因戒閹人曰。今日客至。無貴賤立爲通。既午。果范祖禹夢得來。遂延入。問勞稠疊。且曰。老病卽死。念平生碌碌無足言。然蟲懷朴忠。他時筆削必累君。願少留意。夢得惶恐。叵測。避席謝後十餘年。修裕陵實錄。夢得竟爲修撰。韓公傳此事。尹侍郎說。

雷申錫者。江西人。紹興中。一舉中南省高第。廷試前三日。客死都下。捷音與計踵至鄉里。其妻日夜悲哭。忽一夕。夢申錫如平生。自言我往爲大吏。有功德於民。故累世爲士大夫。然嘗誤入死囚。故地下罰我。凡三世如意時。暴死。前一世仕久連蹇。後忽以要官召。纔入都門而卒。今復如此。凡兩世矣。要更一世。乃能以償宿譴耳。其事可以爲治獄者之戒。

右清尊錄廉宣仲布所撰或謂陸公務觀所作非也蓋二公同時後人因誤指耳至大改元三月華石山人識

卷一

四

集

蜀錦譜

元 費著

蜀以錦擅名天下。故城名以錦官。江名以濯錦。而蜀都賦云。貝錦斐成。濯色江波。游蜀記云。成都有九璧村。出美錦。歲充貢。宋朝歲輸上供等錦帛。轉運司給其費。而府掌其事。元豐六年。呂汲公大防始建錦院於府治之東。募軍匠五百人織造。置官以涖之。創樓于前。以爲積藏待發之所。榜曰錦官。公又爲之記。其畧云。設機百五十四。日用挽綜之工百六十四。用杼之工五十四。練染之工。一紡繹之工百一十。而後足役。歲費絲權以兩者一十二萬五千。紅藍紫蒨之類。以斤者二十一萬一千。而後足用。織室吏舍出納之府。爲屋百一十七間。而後足居。自今考之。當時所織之錦。其別有四。曰上貢錦。曰官告錦。曰臣僚襖子。錦曰廣西錦。總爲六百九十疋而已。渡江以後。外攘之務十倍承平。建炎三年。都大茶馬司始織造錦綾被褥。折支黎州等處馬價。自是私販之禁興。又以應天北禪鹿苑寺三處。置場織造。其錦自眞紅被褥而下。凡十餘品。於是中國織

紋之工轉而衣衫椎髻缺舌之人矣。乾道四年又以三塲散漫遂即舊廉訪司潔已堂。剏錦院。悉聚機戶其中。猶恐私販不能盡禁也。則倚宣撫之力建請於朝。併府治錦院爲一。俾所隸工匠各以色額織造。蓋馬政既重則織造益多。費用益夥。隄防益密。其勢然也。今取承平時錦院與今茶馬司錦院所織錦名色著于篇。俾來者各以時考之。

轉運司錦院織錦名色 卽成都府錦院

上貢錦三疋花樣

八答量錦

官告錦四百疋花樣

盤毬錦

簇四金鵬錦

葵花錦

八答量錦

六答量錦

翠池獅子錦

天下樂錦

雲鴈錦

臣僚襖子錦八十七疋花樣

簇四金鵬錦

八答量錦

天下樂錦

廣西錦二百疋花樣

眞紅錦一百疋

大窠獅子錦

大窠馬大毬錦

雙窠雲鴈錦

宜男百花錦

青綠錦一百疋

宜男百花錦

青綠雲鴈錦

茶馬司錦院織錦名色

茶馬司須知云逐年隨蕃蠻中到馬數多寡以用折傳別無一定之數

黎州

皂大被

緋大被

皂中被

緋中被

四色中被

七八

行錦

瑪瑙錦

叙州

眞紅大被褥

眞紅雙連椅背

眞紅單椅背

南平軍

眞紅大被褥

眞紅雙窠錦

皂大被褥

青大被褥

文州

犒設紅錦

細色錦名色

青綠瑞草雲鶴錦

青綠如意牡丹錦

真紅宜男百花錦 真

紅穿花鳳錦

真紅雪花毬露錦

真紅櫻桃錦

真紅水林檎

錦

秦州細法真紅錦

鵝黃水林檎錦

秦州中法真紅錦

紫皂段子

秦州麤法真紅錦

真紅天馬錦

真紅湖州大

百花孔雀錦

真紅飛魚錦

四色湖州百花孔雀錦

真紅聚

八仙錦

二色湖州大百花孔雀錦

真紅六金魚錦

(完)

春夢錄

元 鄭禧

城之西有吳氏女。生長儒家。才色俱麗。琴棋詩書。靡不究通。大夫士類稱之。其父早世。治命宜以爲儒家室。女亦自負不凡。余今年客于洪府。一日媒嫗來言。女家久擇壻。難其人。洪仲明公子戲欲與余求之。余辭云已娶。不期媒嫗欲求余詩詞。達于女氏。余戲賦木蘭花慢一闋。一日女和前詞。附媒嫗至。乃曰吳氏之族見此詞。喜稱文士之美。但母氏謂官人已娶而不可。然女獨憐余之才。賡唱迭和。復命乳母來觀。且述女意。雖居二室。亦不辭也。囑余托相知之深者。求啓母意。歸余。然余在城之日淺。相知者少。謬囑意山長吳槐坡者。往說其母。終亦不從。有周氏子。懼余之成事。挾財以媚母氏。母乃矢於從周。遂納其定。禮女號泣曰。父臨終。命歸儒生。周子不學無術。但能琵琶耳。我誓不從周氏。因佯狂擲冠于地。母怒。歐之女。發憤成疾。病且篤。母乃大悔。懼逆其意。卽以定禮付媒。嫗以歸于周。然女病竟無起色。因以書遺余曰。妾之病。實爲郎也。若生不救。抱

恨於地下。料郎之情。豈能忘乎。臨終。又泣謂其青衣名梅藥者曰。我愛鄭郎。生也爲鄭。死也爲鄭。我死之後。汝可以鄭詩詞書翰密藏棺中。以成我意。未幾果卒。嗚呼。文君之於相如。自昔所難。而況夫婦之間。多才相配。世之尤難者乎。夫以女之才如是。而憐余之才。又如是。齊眉相好。唱和百年。豈非天下之至樂者乎。而況其家本豐殖。復有貲財者哉。乃厄母命之不從。發憤成疾。抱恨而死。嗟夫。紅顏勝人多薄命。亘古如斯。而況才色之兼全者乎。驚綵雲之易失。痛黃壤之相遺。亦徒重余之臨風悵快耳。恨何言也。抑余非悅於色也。愛其才也。感其心也。今具錄往來詞翰于後。覽者亦必昭余之悽愴也。延祐戊午永嘉鄭禧天趣序。

丁巳歲二月廿六日。余寄木蘭花慢云。倚平生豪氣。冲星斗。渺雲煙。記楚水湘山。吳雲越月。頻入詩篇。菱花皎潔。劍光零亂。算幾番沉醉。樂生前種得仙人瑤艸。儂家五色雲邊。芙蓉金闕正需賢。詔下九重天。念滿院琅玕。盈襟書傳。人正韶年。蟾宮近傳芳信。姮娥嬌艷待詩仙。領取天香第一。縱橫禮樂三千。翼日女

氏和云愛風流俊雅看筆下掃雲烟。正困倚書窓。慵拈針線。懶咏詩篇。紅葉未
知誰繫。慢躊躇。無語小闌前。燕子知人有意。雙雙飛度花邊。殷勤一笑問英賢。
夫乃婦之天。恐薛媛圖形。楚材興念。喚醒當年。纍纍滿枝梅子。料今生無分共
坡仙。贏得鮫綃帕上。啼痕萬萬千。二月廿九日女密令乳母來觀。三月一日
再賦前腔云。望垂楊裊翠。簾試捲。小紅樓。想鸞珮敲瓊。鸞妝沁粉。越樣風流。吟
懷自憐豪健。洒雲牋。醉裏度春秋。有唱還應有和。纖纖玉映銀鈎。犀心一點暗
相投。好事莫悠悠。便有約尋芳。蜂媒纔到。蝶使重遊。梅花故園憔悴。揖東風。讓
與古稍頭。況是梅花無語。杏花好好相留。女氏再和云。看紅牋寫恨。人醉倚夕
陽樓。故里梅花。纔傳春信。先認儒流。此生料應緣淺。倚窻下雨。怨共雲愁。如今
杏花嬌艷。珠簾嬾上銀鈎。絲羅喬樹欲依投。此景兩悠悠。恐鶯老花殘。翠消翠
減。辜負春遊。蜂媒問人情思。無緣應只低頭。夢斷東風路。遠柔情。猶爲遲留。余
觀所和兩詞。其才情標致。豈可得哉。此余所以深不能忘也。再賦詩三首云。銀
牋寫恨奈情何。料得情深歛翠娥。須信梅花貪結子。東風著意杏花多。翠袖籠

香倚畫樓。柔情猶爲我遲留。何時共箇鴛鴦字。吟到東風淚欲流。兩才相遇古來難。重寫芳情仔細看。莫待後時空自悔。不如聞取舞雙鸞。吳氏和云慈親未識意如何。不肯令君畫翠娥。自是杏花開較晚。梅花占得舊情多。殘紅片片入書樓。獨倚危闌覺久留。可惜才高招不得。紅絲雙繫別風流。今生緣分料應難。接得新詩不忍看。謾說胸襟有才思。却無韓壽與紅鸞。詩尾又繫數語云屢蒙佳什。珍藏篋笥。福淺緣慳。不成好事。母命伯言。不期違背。一片真情。番成虛意。勤讀詩書。好圖名利。故里梅花。依然夫婿。數語贈君。盈盈垂淚。余復爲儷語以寄遺恨。因達于女氏云。切以詩書相過。罕見于夫婦之間。詞翰先投。乃求于聲臭之表。字含玉理。韻染蘭香。悵故里之梅花。綵傳春信。比芳園之杏蕊。無奈風儂。復令乳母來觀。預遣女媒通好。謂先君是定。猶遣在耳之言。矧才子如斯。不忝齊眉之願。倘得百年而諧老。雖居二室而不辭。妙語難忘。芳心可掬。既窈窕之慨然。許鄭何聖。善之必欲。從周事既相違。分亦何淺。幕底阻牽於紅線。石上空磨於玉簪。誰令慵暴之男。強投雁幣。痛失文章之壻。怒擲蟬冠。脉脉春愁。盈

盈妝淚。念欲挾文君而夜遁。終不忍爲。竟辜杜牧之春遊。實成深恨。猶勸詩書之勤讀。極知恩愛之愈深。嗟伉儷之無緣。徒唱酬之相與。此日落花愁裏去。遙想芳塵。它時折桂月中歸。必貽後悔。茲憑四六。用表再三。願深思賢父之言。庶免抱終身之歎。難期面叙。幸冀心融。又續以詩云。畫梁雙燕舞輕塵。只見新詩不見人。夜夜相思飛蝶夢。東風著意杏花春。風流才思古難全。若得相逢不偶然。有約綠楊門下過。珠簾半捲露嬋娟。吳氏答書云。伏以鍾天地之秀氣。偉矣儒人。含閨閣之芳情。孤哉幼女。兩才相遇。方圖結於紅絲。一語敗盟。又空成於畫餅。詩詞寄恨。蜂蝶傳情。先人之遺訓昭昭。曾已告母。慈母之嚴命切切。乃不諒人。鄭郎將故里之梅花憔悴。周子戀芳園之杏蕊嬌羞。齊眉之好已休。衆口湖之辭不息。龜占未吉。雁幣輒修。經史不得聞。琵琶奚足聽。鴛鴦枕上夜夜相思。蝴蝶夢中時時歡會。深沉院宇。無路可求。寂寞簾櫳。有緣終遇。雖後死幼玉也。尋柳氏。奈今生文君未識。相如勒此申酬。伏祈丙照。復和前詩二首云。才高豈肯困泥塵。雁塔名香第一人。却笑此生緣分淺。可憐辜負兩青春。琴棋書畫

藝皆全。一段風流出自然。院宇深沉簾不捲。想君難得到嬋娟。是日吳氏又寄領。呈其工夫精巧云。此是十年工夫。所繡者若此。余復作詩云。領中垂繡蹙雙鸞。幼小工夫此最難。日久羅襦香欲褪。多情拆寄鄭郎看。落花時序易消魂。忍看雲賤沁粉痕。近日慙慙香玉瘦。可憐和淚倚重門。繡線慵拈夢乍醒。風流誰畫柳眉青。琵琶聲裏昭君怨。莫向它時不忍聽。嫩柳嬌依道韞家。東風何事苦驚鴉。流鸞欲往頻回首。盡日愁腸惱落花。吳氏答書云。某早忽然洪妳至。欲遣一書。奈家事冗。人事多。竟弗克。午間再辱雲賤披味。恍如會晤之爲快。中間此事。苦爲母氏所阻。故作痴伴狂。此數日。周子稍緩其事。但兩受凌辱。被打氣憤成疾。不離枕席。亦是因君耳。恐天不假之以壽。萬一抱恨而歸。亦爲君耳。如天從人願。因緣有在。此事尚可成就。中間多惑。十一安人恩意。如三五日病可却至。洪府相謝。亦可以見。興言至此。悲涕漣漣。先生千金之軀。不可因賤妾而成疾。但以堅心爲念。好事亦不在匆忙。衷腸非筆可盡。切祈尊照。又詩二絕云。淚珠滴滴濕香羅。病裡芳肌瘦減多。怪得夜來春夢淺。不知今日定如何。青衣扶

起鬢雲偏。病裡情懷最可憐。已自慙慙。無氣力。強擡纖手。寫雲牋。吳氏臨終答書云。哀哉。古人云。春蠶到繭絲方盡。蠟燭成灰淚始乾。誠哉是言也。一自女媒通好之後。妒情之輩。登奴門者。其說不一。有云。先生貧者。有云。子多者。有云。妻妒行者。奴聞之。若風過耳。但以真心而待。况兼母與伯以奴之身。色才藝俱全。豈可爲人次妻。而周舍挾財以媚母氏。遂以一紅一書爲定。奴乃泣涕不已。兩被母凌。以致成病。而相思之情。又何可勝言。念欲竊香相隨。奈千方百計不可。而此病愈危。昨日兩奉佳音。且喜且泣。母氏而今已作噬臍之悔。有通容處。但奴魂飛不定。神亂不常。雖師巫醫卜。無所不至。而病略不減。先生自宜將息。不可因賤妾而失寐忘食。以郎之才。不患無好色之妻。以奴之命。真恐不見有才之郎。若此生不救。抱恨於地下。料郎之情。豈能忘乎。然妾之死。無身後之累。郎若成疾。則故里梅花。青青梅子。將靠之誰乎。倘得病安必見。臨終哽咽。不知下筆處。奴扶憊拜上。吳氏既終。余以文寄祭云。嗚呼。昆山玉樹。閨苑瓊葩。豈人間之凡植。復獨冠於仙花。儲芳絕艷。吐日春華。祥雲爲蓋。皓月爲家。俄驟驚爲怪。

雨。瘞遺綵於塵沙。悲玉鸞而自惜。愁翠鳳而空嗟。嗚呼哀哉。玉容如在。瑤珮何之。生也何待。死之何爲。染芙蓉以爲色。裁錦繡以爲詩。琴彈綠綺兮。冰雪爲絲。畫鉛粉澤兮。烟霞爲姿。牙籤縹帙兮。融融奧旨。紋楸玉子兮。了了玄機。閨房之秀。誰其似之。謝家柳絮。詎足比斯。余也惜年冉冉。負志奇奇。投鯨竿兮。學海之驚濤。透翠衣兮。詞苑之蕨蕢。鵲風孤退。鵬雲自垂。楚山古木。湘水蕪祠。泣娥英兮。愁牽翠衣。吊靈均兮。空抱瓊芝。悠悠徒返。渺渺遐思。抱英懷之未擢。矧窈窕之相知。始之以女媒而通好。申之以乳母而傳書。是耶非耶。物理茫茫。色可得而有兮。才孰儷而孤芳。形不可得而見兮。心殷殷而愈彰。迨夫女夢之初覺。余亦攬涕而成章。胡言路阻。莫奠壺觴。千古萬古。遺恨空傷。又悼亡吟二首云。特寫青牋幾往來。佳人何自苦憐才。傷心春與花俱盡。啼殺流鶯喚不回。相見愁無奈。相思自有緣。死生俱夢幻。來往只詩篇。玉珮驚沉水。瑤琴愴斷絃。傷心數行淚。盡日落花前。余召箕仙卜問得一詞云。緣慘雙鸞香魂猶自多迷戀。芳心密語在身邊。如見詩人面。又是柔腸未斷。奈天不從人願。瓊銷玉減。夢魂空有。

幾愁多怨。四月朔。余再調木蘭花慢云。任東風老去。吹不斷。淚盈盈。記春淺。春深。春寒春煖。春雨春晴。都來助與詩人興。更落花無定。挽春情。芳艸猶迷舞蝶。綠楊空悞流鶯。玄霜著意。搗初成。回首失雲英。但如醉如痴。如狂如舞。如夢如驚。香魂至今迷戀。問眞仙消息。最分明。後夜相逢何處。清風明月。蓬瀛是日。再召箕仙。一道童降筆詞云。今日瑤池大會。羣仙不肯來臨。眞華傳語鄭郎君。記得相嘲妒行。好个木蘭花慢。休題相契分明。君還要問那香魂。正在仙宮聽命。吳氏之母痛憶之甚。亦死一子。年長不慧。移居鄉村。此眞可慘哉。余又作哀文云。嗚呼。茫茫九泉。愛莫起之。靈之容忽有遠矣。中心藏之。何日忘之。靈之心其可忘乎。蚺蟻在堂。蛸蠨在戶。靈之家蕩然矣。天長地久。恨無絕期。靈之恨其可絕乎。使靈之至此者。誰之咎歟。母氏之無明見。伯氏之無理言也。當是時。二老果無尤余之意。姑舒徐數日。而冀圖擇壻。誰得而閒之。矧先君之治命。若見之昭昭者乎。龜占未吉。雁幣輒修。其靈之死。在此而不在彼也。靈之容固不可得而見之矣。靈之恨。靈之心。與余相悲快者。果無幽冥之隔也。邪。余嘗過靈之家。

但見門掩夕暉兮。艸沿堦而春色憐人。疑爲我而來兮。空彷彿乎靈之魂獨在也。吾意靈飄霞佩於太清兮。擬羣仙於瑤池。逶迤而不忍去兮。欲與余而追隨。余因知靈之同心兮。雖同往而何辭。忽返魂乎故鄉兮。念衆離之無依。靈書勉余以自愛兮。何既死而忽遺。繫母氏之念而死兮。諒雖悔而曷追。余報卿以一死兮。其奈修短之有期。嗚呼。嚆昔之夜。忽有擁雙髻而泣者。非靈也耶。恍一夢之驚覺。空伏枕而漣漪。愴余懷之鬱結。重抑憤之哀詞。母知天知。有知無知。吾獨自知爾。嗚呼哀哉。友人共閱此女詞情事迹。可傷。作詩悼之云。結髮因緣豈偶然。如何契闊便登仙。可憐一點真才思。辜負韶華二十年。磊落襟懷亞淑真。琴棋書畫更超倫。惜哉周鄭番成怨。底不當初早嫁人。女子文章天下少。男兒才學豈應無。滿懷空有詩書料。負个卿卿旦夕呼。不見佳人亦可傷。傷他非命爲才郎。杏花夢斷東風曉。空把新詩寫數行。黃子侑敏讀之有感云。春樓珠箔捲東風。幾度偷彈淚粉紅。艷質豈期黃壤隔。香魂應逐綵雲空。解將遺事留身後。盡忘前言在耳中。杏蕊梅花俱一夢。悠悠深恨鎖幽宮。汪庭材子才云。犀心

鬼穎屢通津。未識嫦娥一面新。興盡故園梅已謝。情留別塢杏初春。將身輕許志雖失。在耳不忘言可遵。生死幽冥千古恨。臨風披閱爲傷情。徐子文天賚。和黃韻云。杏花初破怯春風。未識芳心一點紅。詞翰往來傳意密。死生夢幻轉頭空。素知分淺鴛幃裏。預許名魁雁塔中。杳杳幽魂何處覓。眞華消息報仙宮。先生沈君清和黃汪韻云。落花一掃夜來風。枉駕相思寄斷紅。梅信日聞魚水遠。杏香還逐燕泥空。情懷琴瑟千春恨。怨入琵琶一夢中。門掩滿庭詩思遠。令人惆悵館娃宮。仙境何由一問津。但吟佳句覺清新。不知中道夢中夢。如坐上陽春復春。空想綵鸞緣有分。可憐司馬意難遵。白頭老去吟猶苦。羨爾忘形似有神。眞子述後序云。眞子述者不欲知其姓字故作此名昔者孔子繫周易。其辭有曰。言行君子之樞機也。樞機之發。吉凶榮辱之主也。是以子張問行。孔子則以言忠信行篤敬者答之。其學干祿也。孔子又以言寡尤行寡悔者告之。蓋一言一行。實乃君子立身之大節。可不慎歟。今衛陽鄭天趣讀聖人書。將以爲祿仕也。其未遇時。嘗館于洪氏舍。而城之西吳氏女。與之有文學之好。天趣乃以其往來詩詞文翰。

編爲春夢錄。以示於人。且自爲之序。言其女之自甘爲二室。然痴小女子。不能持其志。而輕身以許人。固多有之矣。天趣以爲得之。如俯拾地芥。吁其愚真不可及也。夫今觀其初達女詞。則有嫦娥嬌艷待詩仙之語。實所以挑之也。而女士則以薛媛圖形寄南楚材事而和之。有云。料今生無分共坡仙。亦可謂止乎禮義者矣。鄭子當於此時灰心可也。乃復懷瞻睠。既有梅花故園樵悴杏花好。好相留之詞。反不如聞早舞雙鸞之句。心迹顯然。而謂之樂而不淫可乎。女答之。則曰。恐君難得見。嬋娟。蓋已截之之意矣。於是天趣復有儷語以貽之者。夫婦之稱。齊眉之好。又曰。念欲挾文君而夜遁。終不忍爲。旣念之矣。其心果不忍爲之乎。特欲爲之而不能耳。且如此女。動心拂性。亂其所爲。違母之命。持不嫁。凡子之說。以至殞其軀而弗悔。實天趣導之也。其罪容可隱乎。且序又曰。況其家本豐殖。而有資財者乎。吁。此一言。足以見其貪戀顧惜之心。而惑之甚者也。雖然。又曰。非余悅其色也。愛其才也。非徒愛其才也。惑其心也。愚獨以爲。非徒愛其才也。實貪其財也。非徒惑其心也。實慕其色也。文中子曰。一夫一婦。庶人

之職也。今天趣有妻在室。有子在家。而猶寓人門館。苟慕妻子。則何以少艾爲。而況鍾於情。形於言。言之不足。又從而咏嘆之者乎。然聽其言也。則有踰東家牆而摟其處子之心。欲其言寡尤也難矣。言之忠信者如是乎。觀其行也。蓋欲淫於新昏而棄其舊室也。要其行不寡悔也難矣。行之篤敬者奚取焉。然吳氏母之不從正也。其女之思可哀也哉。女子情固不足取。惜乎天趣學而優則仕者也。顧其行言若斯。士君子立身之大節已虧。宜乎不容於堯舜之世。詩云女也不爽。士貳其行。士也罔極。二三其德。鄭子吳姬皆有之矣。噫。春夢一錄。非所以爲榮實所以爲辱。迨其前程之識。未知果天趣之筆。若果天趣之筆。余不得而助其悽愴也。遂復爲儷語以斷其後。雖曰刺時。亦自難之也。非徒能言之亦允蹈之也。其詞云。蓋聞有德者先須正己。無瑕者可以戮人。事宜變通。時有可否。爰觀鄭子。錯愛吳姬。才美雖可誇。名教未足數。廣文先生。官獨冷。斐然成章。深閨少女。嬌復痴。喜而不寐。有唱還應有和。多才又遇多能。公子得之於辭婚。既慎其始。佳人自嗟於薄命。鮮克有終。胡爲戀杏蕊之嬌羞。而欲棄梅花之憔悴。

悴。雙鸞早舞。豈能樂爾妻孥。一雁傳書。安可便爲夫婦。母乃養小而失大。未免棄舊而憐新。爲之也難。言之非忤。彼美人之多情無定。寧不動心。而先君之治命是遵。亦有立志。婢媚難見。珠簾故嬾。上於銀鈎。信禮不持。羅襦乃拆。寄於繡領。苟甘心於二室。實屈已於偏房。不出正兮。豈能叶於琴瑟。斯爲下矣。空寄怨於琵琶。祇自辱兮。未之思耳。然女子之嫁也。故母氏而命之。若曰無緣。或云非偶。周鄭等耳。亦何親而何疎。秦晉輔之。當別卜而別選。章臺柳乃肯攀折。遂負倉庚之好音。洛陽花是處芬芳。竟與鴛央而同夢。旣失自生之慈愛。空能守死之遺言。女不爽而死無名。士極罔而貳其行。暗求鳳也。鄭亦不能無罪焉。強委禽焉。周當分受其責也。傷中道人倫之廢。嘆前程事業可知。慕文章而論其財。斯人之過也。哀窈窕不淫其色。夫我乃行之。昔幼卿結髮以求親。月如有約。若倩女離魂而覓壻。雲本無心。夫居鰥者尙不忍爲。而得偶者何須多愛。縱橫禮樂三千字。因此作虛名。寂寞金釵十二行。付之於分定。雖故獲乘軒之寵鶴。然終愧釣渭之非熊。歎龍虎榜之方登。奈鳳凰池之遽奪。若是彼夫之愚。得似非

君子之所爲。春事悠悠。總是綠楊風後絮。秋陽皜皜。依然丹桂月中花。常擬兩
人事。貴人空嗟。好事成虛事。古既有春秋之作。今何無月旦之評。饒舌以言。餽
寧甘得罪於鄭。如心而爲恕。居然行歸於周。倘或反身而誠。庶幾克己復禮。彼
丈夫也。吾何畏彼哉。舜何人哉。有爲者亦若是。不揣小子之狂簡。聊布箴規。尙
賴達人之大觀。特加斥正。

(完)

卷一

三

四

集

牡丹榮辱志

愚叟丘璩

花卉蕃撫於天地間。莫踰牡丹。其貌正心。莖節帶蕊。聳抑檢曠。有剛克柔克。態遠而視之。疑美丈夫女子。儼衣冠當其前也。苟非鍾純淑清粹氣。何以標全德於三月內。迂愚叟順造化意。以榮辱志其事。欲姚之黃爲王。魏之紅爲妃。無所忝冒。何哉。位既尊矣。必授之以九嬪。九嬪佐矣。必隸之以世婦。世婦廣矣。必定之以保傅。保傅任矣。則彤管位矣。則命婦立。命婦立。則嬖倖愿。嬖倖愿。則近屬睦。近屬睦。則疏族親。疏族親。則外屏嚴。外屏嚴。則宮闈壯。宮闈壯。則叢脞革。叢脞革。則君子小人之分達。君子小人之分達。則亨泰屯難之兆繼。繼之者莫大乎善也。成之者莫大乎性也。稟乎中。根本茂矣。善歸已。色香厚矣。如是則施之以天道。順之以地利。節之以人欲。其栽其接。無竭無滅。其生其成。不縮不盈。非獨爲洛陽一時歡賞之盛。將以爲天下嗜好之勸也。

姚黃爲王

名姚花以其名者。非可以中色斥萬乘之尊。故以王以妃。示上下等夷也。
魏紅爲妃

天子立后以正內治。故關雎爲風化之治。妃嬪世婦所以輔佐淑德。符家
人之卦焉。然後鵲巢采蘋采芣列夫人職以助諸侯之政。今以魏花爲妃。
配乎王爵。視崇高富貴一之於內外也。

九嬪

牛黃

細葉壽安

九蕊眞珠

鶴翎紅

鞋紅

潛溪緋

朱砂紅

添色紅

蓮葉九蕊

世婦

麤葉壽安

甘草黃

一捻紅

倒暈檀心

丹州紅

一百五

鹿胎

鞍子紅

多葉紅

猷來紅

今得其十。別求異種補之。

御妻

玉版白

多葉紫

葉底紫

左紫

添色紫

紅蓮萼

延州紅

駱駝紅

紫蓮萼

蘇州花

常州花

潤州花

金陵花

錢塘花

越州花

青州花

密州花

和州花

自蘇臺會稽至歷陽郡好事者衆栽植尤夥八十一之數必可備矣。

花師傳

莫莢

指佞草

蒲蓮

燕胎芝

螢火芝

五色靈芝

九莖芝

碧蓮

瑤花

碧桃

花彤史

同穎禾

兩歧麥

三脊茅

朝日蓮

連理禾

蘆葡花

長樂花

花命婦

上品芍藥

黃樓子等

粉口

柳浦

茅山冠子

醉美人

紅纈子

白纈子

黃絲頭

紅絲頭

蟬花

重葉海棠

出蜀中

千葉瑞蓮

花嬋倖

中品芍藥

長命女花

出蜀中

素馨

茉莉

荳蔻

虞美人

出蜀中

丁香

含笑

男真

鴛鴦草

出蜀中

女真

七寶花

石蟬花

出蜀中

玉蟬花

出蜀中

花近屬

瓊花

紅蘭

桂花

娑羅花

棣棠

迎春

黃拒霜

黃雞冠

忘憂草

金鈴菊

酴醾

山茶

千葉石榴

玉蝴蝶

黃酴醾

出蜀中

玉屑

花疎屬

麗春

七寶花

出蜀中

石瓜花

出蜀中

石巖

千葉菊

紫菊

添色拒霜

出蜀

羞天花

金錢

金鳳

山丹

吉貝

木蓮花

石竹

單葉菊

滴滴金

紅雞冠

矮雞冠

黃蜀葵

千葉郁李

花戚里

旌節

玉盤金盞

鵝毛金鳳

出蜀

瑞聖

瑞香

御米

都勝

玉簪

花外屏

金沙

紅薔薇

黃薔薇

玫瑰

密有

刺紅

紅薇

紫薇

朱槿

白槿

海木瓜

錦帶

杜鵑

梔子

紫荊

史君子

凌霄

木蘭

百合

花宮闈

諸類桃

諸類李

諸類梨

諸類杏

紅梅

早梅

櫻桃

山櫻

蒲桃

木瓜

桐花

栗花

棗花

木錦

紅蕉

花叢脞

紅蓼

牽牛

鼓子

芫花

蔓陀羅

金燈

射干

水蕒

地錦

地釘

黃躑躅

野薔薇

薺菜花

夜合

蘆花

楊花

金雀兒

菜花

花君子

溫風

細雨

清露

暖日

微雲

沃壤

永晝

油幕

朱門

甘泉

醇酒

珍饌

新樂

名倡

花小人

狂風

猛雨

赤日

苦寒

蜜蜂

蝴蝶

螻蟻

蚯蚓

白晝青蠅

黃昏蝙蝠

飛塵

妬芽

蠹

麝香

桑嫫蟧

花亭泰

閏三月

五風十雨

主人多喜事

婢能歌樂

妻孥不倦排

當

僮僕勤幹

子弟韞藉

正開值生日

欲謝時待解

醒

門僧解栽接

借園亭張筵

從貧處移入富家

花屯難

醜婦妬與隣

猥人愛與嫌

盛開值私忌

主人慳鄙

和園賣與屠沽

三月內霜雹

賞處着基鬪茶

筵上持七八

盛開債主臨門

箔子遮圍

露頭跳足對酌

遭權勢人乞接頭

剪時和花眼

正歡賞醕酒

頭戴如廁

聽唱辭傳家宴

酥煎了下麥飯

凋落後莒蒂掃

園吏澆濕糞

落村僧道士院觀裏

按姚黃爲王下予曾見某氏抄本作姚爲重華之後裔黃如中央之正色遙
遙帝胄以土德王萬乘之尊名足稱矣是否好事臆改姑附錄之以俟考庚
戌三月天壤王郎識

(完)

芍藥譜

宋 王觀

舊譜如緋單葉、白單葉、紅單葉，不入名品之內。余自熙寧八年官江都，又得八品焉。非平日三十一品之比。皆世之所難得。今列于左。舊譜三十一品，分上中下七等。此前人所定，今更不易。

上之上

冠羣芳

大旋心冠子也。深紅堆葉。頂分四五旋。其英密簇。廣可及半尺。高可及六寸。艷色絕妙。可冠羣芳。因以名之。枝條硬。葉疎大。

賽羣芳

小旋心冠子也。漸添紅而緊。小枝條及綠葉，並與大旋心一同。凡品中言大葉小葉堆葉者，皆花葉也。言綠葉者，謂枝葉也。

寶粧成

髻子也。色微紫於上。十二大葉中密生曲葉。回環裹抱團圓。其高八九寸。廣半尺餘。每一小葉上。絡以金線。綴以玉珠。香欺蘭麝。奇不可紀。枝條硬而葉平。

盡天工

柳浦青心紅冠子也。於大葉中小葉密直妖媚出衆。儻非造化。無能爲也。枝硬而綠。葉青薄。

曉粧新

白纈子也。如小旋心狀。頂上四向。葉端點小殷紅色。每一朶上。或三點。或四點。或五點。象衣中之點纈也。綠葉甚柔而厚。條硬而絕低。

點粧紅

紅纈子也。色紅而小。並與白纈子同。綠葉微似瘦長。

上之下

疊香英

紫樓子也。廣五寸。高盈尺。於大葉中細葉二三十重。上又聳大葉如樓閣狀。枝

條硬而高。綠葉疎大而尖柔。

積嬌紅

紅樓子也。色淡紅。與紫樓子不相異。

中之上

醉西施

大軟條冠子也。色淡紅。惟大葉有類大旋心狀。枝條軟細。漸以物扶助之。綠葉色深厚。疎而長以柔。

道粧成

黃樓子也。大葉中深黃小葉數重。又上展淡黃大葉。枝條硬而絕黃。綠葉疎長而柔。與紫紅者異。此品非今日之黃樓子也。乃黃絲頭中盛則或出四五大葉。小類黃樓子。蓋本非黃樓子也。

掬香瓊

青心玉板冠子也。本自茅山來。白英團掬。堅密平頭。枝條硬而綠葉短日光。

素粧殘

退紅茅山冠子也。初開粉紅。卽漸退白。青心而素淡。稍若大軟條冠子。綠葉短厚而硬。

試梅衰

白冠子也。白纈中無點纈者是也。

淺粧勻

紛紅冠子也。是紅纈中無點纈者也。

中之下

醉嬌紅

深紅楚州冠子也。亦若小旋心狀。中心緊堆大葉。葉下亦有一重金線。枝條高。綠葉疎而柔。

擬香英

紫寶相冠子也。紫樓子心中。細葉上不堆大葉者。

妬嬌紅

紅寶相冠子也。紅樓子心中。細葉上不堆大葉者。

縷金囊

金線冠子也。稍似細條。深紅者於大葉中細葉下抽金線細細相雜。條葉並同深紅冠子者。

下之上

怨春紅

硬條冠子也。色絕淡。甚類金線冠子而堆葉。條硬而綠。葉疎平稍若柔。

妬鵝黃

黃絲頭也。於大葉中一簇細葉雜以金線。條高。綠葉疎柔。

蘸金香

蘸金蕊紫單葉也。是髻子開不成者。於大葉中生小葉。小葉尖葉一線金色是也。

試濃粧

緋多葉也。緋葉五七重。皆平頭。條赤而綠葉硬。皆紫色。

下之中

宿粧股

紫高多葉也。條葉花並類緋。多葉而枝葉絕高。平頭。凡檻中雖多。無先後並開齊整也。

取次粧

淡紅多葉也。色絕淡。條葉正類緋。多葉亦平頭也。

聚香絲

紫絲頭也。大葉中一叢紫絲細細是也。枝條高。綠葉疎而柔。

簇紅絲

紅絲頭也。大葉中一簇紅絲細細是也。枝葉並同紫者。

下之下

效殷粧

小矮多葉也。與紫高多葉一同。而枝條低隨燥濕而出。有三頭者。雙頭者。鞍子者。銀絲者。俱同根而土地肥瘠之異者也。

會三英

三頭聚一蔓而開。

合歡芳

雙頭並蒂而開一朶相背也。

擬繡韉

鞍子也。兩邊垂下。如所乘鞍狀。地絕肥而生。

銀含稜

銀緣也。葉端一稜白色。

新收八品

御叙黃

黃色淺而葉疎。葉差深。散出於葉間。其葉端色又微碧。高廣類黃樓子也。此種宜升絕品。

黃樓子

盛者五七層。間以金線。其香尤甚。

袁黃冠子

宛如髻子。間以金線。色比鮑黃。

峽石黃冠子

如金線冠子。其色深如鮑黃。

鮑黃冠子

大抵與大旋心同。而葉差不旋。色類鵝黃。

楊花冠子

多葉白心。色黃漸拂淺紅。至葉端則色深紅。間以金線。

湖纈

紅色深淺相雜。類湖纈。

黽池紅

開須並萼。或三頭者。大抵花類軟條也。

(完)

卷一

三十三

四

集

花經

宋 張翊

翊好學多思致。世本長安。因亂南來。嘗戲造花經。以九品九命升降次第之。時服其允當。

一品九命

蘭 牡丹

蟠梅

酴醾

紫風流 睡香異名

二品八命

瓊花 蕙

巖桂

茉莉

含笑

三品七命

芍藥 蓮

簪蔔

丁香

碧桃

垂絲海棠

千葉桃

四品六命

菊 杏

辛夷

豆寇

後庭

忘憂

櫻桃

林禽

梅

五品五命

楊花

月紅

梨花

千葉李

桃花

石榴

六品四命

聚八仙

金沙

寶相

紫薇

凌霄

海棠

七品三命

散花

眞珠

粉團

郁李

薔薇

米囊

木瓜

山茶

迎春

玫瑰

金燈

木筆

金鳳

夜合

躑躅

金錢

錦帶

石蟬

八品二命

杜鵑

大清

滴露

刺桐

木蘭

雞冠

錦被堆

九品一命

芙蓉

牽牛

木槿

葵

胡葵

鼓子

石竹

金蓮

(完)

花九錫

唐 羅虬

花九錫亦須蘭蕙梅蓮輩。乃可披襟。若芙蓉躑躅望仙山木野草。直惟阿耳。尙錫之云乎。

重頂帷障風

金剪刀 剪折

甘泉 浸

玉缸 貯

雕文臺座 安置

畫圖

翻曲

美醕 賞

新詩 詠

附韓熙載五宜說

對花焚香有風味相和其妙不可言者

木犀宜龍腦

醖釀宜沉水

蘭宜四絕

含笑宜麝

簷葡宜檀

附陳仲醇花寵幸

梅芬傲雪偏饒吟魂

梨花帶雨青閨斷腸

海棠桃李爭豔綺席

芳桂一枝足開笑語

以此引類連情境趣多合

附袁中郎花沐浴

浴梅宜隱士

浴牡丹芍藥宜靚粧妙女

浴木樨宜清慧兒

浴菊宜好古而奇者

香豔叢書四集卷一終

杏蕊嬌春最憐粧鏡

荷氣臨風紅顏露齒

牡丹芍藥乍迎歌扇


幽蘭盈把堪贈侑儔


浴海棠宜韻致客

浴榴宜艷色婢

浴蓮宜道士


浴臘梅宜清瘦僧





香艷叢書

第四集



香艷叢書

四集卷二

瑤臺片玉甲種上編

明施紹莘子塾箸


合鏡詞和閨生作 有序

閨生有章臺人得之甚艱。向日曾相與賦問桃瞥見諸詞。何其悲淒怨慕。今以折桂手作偷花漢。了不煩峴崙老奴黃衣客之力。而殘燈側小窓畔。竟有向人話舊矣。此時之樂。恍惚夢境。無怪乎閨生亟被之筦絃也。篷窓夜雨。伸繭屬和。聊識閨生一時盛事。且見吾輩亦有出頭日如此。

南商調金索掛梧桐

安排錦綉窩。修訂鴛鴦譜。莫話歡娛。且話當初苦。記尊前一諾。初轉秋波。却不道花命艱辛。受折磨。郎奔馳。京國東西路。妾死守空閨。日月梭。從頭數。星星記得。怎模糊。真箇是怨處。恩多恨處。情多今証了。恩情果。

東海



前腔

曾記愛裏過也。向愁中坐。越是分離。越把心腸鎖。沙家事若何。付南柯。不嫁三郎頭。不梳寧使做。吞酸忍楚痴兒女。決不似拋冷趨炎。歹丈夫。非閒可歷。遭情却忒多魔。到如今歡處悲多。却又是悲處歡多。攪亂了相攙和。

前腔

怎車乾。恩愛河推不動。相思磨。祆廟燒完。漸近藍橋路。今朝出網羅。到鳳凰窠。爭氣潘郎成就。奴羞慚了。搬唆誹謗。銷金口塗抹了。長短方圓。畫餅圖從今呵。刀山變做軟衾窩。眞箇是悲處歡多。況更是歡處歡多。把歡字渾身裹。

前腔

郎登折桂科。妾有奔琴路。就天樣高牆。怎隔得伊和我。滔天浪不波。渡銀河。眷屬團圓住大羅。從前苦楚。將歡娛補把。此後歡娛。做曲子歌。擎杯賀人間花事。等榮枯。我也曾歡處悲多。悲處歡多。可合撰悲歡譜。

言言眞至字字做策情根。艷種綉口錦心。何其幽微曲折。如是也。沈德

生

闌生此番情案須作一傳使後之觀者知其辛苦萬狀方知此詞字字
信史 顧淡止

夢花詞有序跋

偶叩花房。忽成春夢。情知得鹿之非真。聊且書蕉而作記。蓋將鐫之巫雲
片石而藏諸南柯郡樓也。

南商調梧桐樹

屏山錦綉開。衾枕溫香在。了却因緣。還却鴛鴦債。奇逢命裏該。也是娘拖帶。今
夜燈前心事纔明白。盟山一座。填情海。

東甌令

星前祝。月底猜。月底星前今半載。花顛柳橫多艷。畢竟有前程。在臉邊。情淚
一時揩。竟穩取貼香腮。

大聖樂

婚姻事。天自安排。戰心兵。今奏凱。非干色膽天來大。氤氲使遣教來。好向奇花隊裏爭先採。只是分淺卑人怕。未該鴛鴦兩字喜。從來撩草自今端楷。

解三醒

從此後花。瀟月酒。從此後瑟靜琴諧。從此後藥爐經卷。償花債。從此後給酒縫裳。試慧才。從此後風幃雪案。親描黛。從此後香几燈窓。看綉鞋。重思揣恍。一似當年驚喜夢裏人來。

尾文

貧無長物把風流買。但筆底奇葩將艷史裁。且將就休嫌嫁秀才。

予初非好色。直是多情。每爲憐花時。生痴夢。但柳絮隨風。從來未曾結果。而桃源問渡於今。忽地成仙。花譜初修。且喜名題綉榜。書仙下謫。多應天配詞人。水雲一旦化成膠。真稱遇合。山海千秋。堅似鐵。無限高深。自知骨相煙霞窮措大。豈應有此。或云心腸錦綉。工句字焉可無言。乃晚翻聲蘭永新。鑄粧臺業鏡。雖然過眼。成花千紅。萬紫畢竟至人無夢。

一覺三生纔醒來脂粉叢中已挿入龍華會裡矣自跋

從來文人借花事作文章每每吹影鏤塵而要非本色好如子野此詞曲寫柔情刺心入骨及觀其序跋夫豈流連惑溺者哉人謂子野爲墮花業予將謂子野爲証花果眉公跋

予讀古人詞雖名家如陳大聲梁少白亦不過明衍恬瞻而已未必字字刻畫句句尖艷如子野者每讀此篇令人意中冉冉如風花之舞存人評

舟居旅懷有跋

南仙呂入雙調惜奴嬌

飄泊寒塘歎人生何苦別離如是鴛鴦字輕拆好如兒戲曾記寶鴨同宵寶瑟同朝寶笙同醉今日獨自在蓼花汀空想霧鬢雲佩

前腔

如痴鎮日凭欄不曾離一片雨山烟水閒心計數徧鴉凶鵲喜傷悲燈盞兒昏

香字兒溫。風窗兒碎。判死就。做道鐵心腸。怕也難堪此矣。

門寶蟾

當歸。蛙角蠅頭。把心花意。盡等閒拴住。想樓前楊柳。濕烟鋪地。應是香燼冷翠。幃。腮珠。搥繡衣。可憐伊。你敢是薄命佳人。我豈認薄情夫婿。

前腔

無謂。捨玉拋香。把取涼休。却畫眉荒廢。問風流底事。一身客寄。迢遞江岸遠望。迷清宵夢。當歸猛鷺。回只有剩枕單衾。人隔際天烟水。

錦衣香

別離。愁難迴避。別時言心牢記。況有針線親拈。巧裁親製。口脂猶是。污征衣。怎教伴我。草店寒鷄。啓窓兒。一望大江西。平蕪如地。眼看人歸去。隻身偏滯。秋山似劍。割人腸碎。

漿水令

上燈花。渾如猜謎。酒消愁。終難療醫。便宜討盡。一雙眉。秋風透衣。宿雨沿堤。無

滋。味。增。瞋。睡。清。清。悶。把。牙。兒。抵。渾。如。在。渾。如。在。烟。中。夢。裡。爭。飛。出。爭。飛。出。這。愁。圍。

尾文

香羅一幅封回去。上寫斷腸詩句。四邊多是淚痕湮處。

予有釣舡曰隨庵辛酉文戰泝大江抵金陵遂舟居不復假館每到山水勝處便刺篙休焉山有面背隱現水有曲折平遠兩涯烟柳有高低疎密乃船之去就斜橫可以隨緣選勝詭遇徵奇時天又陰晴不定山雨欲來風月如掃朝霞夕照水面通紅新雁寒鴉點散影沒更隨時觸目之奇觀也獨伊人之思有不能爲情之甚耳因爲長歌以紀之他日重遊此情味當猶在江山烟雨間也

自跋

辛酉之役予與子野盤桓於隨庵者十餘日山水風月相與領略俱人生未有之樂時見子野多作詩詞絕不了試事予戲曰此行何爲乎來哉子野笑曰子見昔年闍牘乎如某某者亦峨然進賢則吾與爾正恐

詞貴來逼人耳。烟景召人心氣皆旺。且撇却眼前花了。理千秋業可乎。已而與予皆鍛羽而歸。一番辛勞。竟成灰飛。而子野情言至今猶然在。牘燈下較讐細閱。真堪字字不朽。乃知吾輩終不當以彼易此也。韓巨

卿

言情宛轉。綢繆填詞。蒼勁迥逸。情種詞仙。一人占斷矣。朱君深

贈石城董夜來有序跋

余落魄風塵。銷沉壯志。秋波浩蕩。感岸上之愁蘋。宿雨連綿。夢江南之芳芷。蓋悲哉之氣多感。而黯然之魂易驚。柔情縹緲。能無伊人之思。奇福難銷。孰是東家之子。偶尋花圃。忽睹仙妃。問姓則雙成。是其前生。詢名則夜來。乃其再世。年同碧玉。婷婷之致可知。骨抵輕雲。裊裊之容何限。有心人誰能堪此。多情種未免流連。乃寄艷於詞葩。聊紀情於夢蝶。

南仙呂月兒雲

花星偏照。前宵夢兒好。偶到花叢裏。瞥見如花貌。生怕人瞧。背燈兒覷着了。他

不道兒夫至。俺不道冤家到。俺忍不住偷將冷眼挑他。羞臉微紅一線潮。

桂枝香

逡巡戲調。剛才微笑。誰知事到其間也。暗地俏聲低叫。却教人怎生。却教人怎生。眞個是柳慵花笑。抵不得酒容歌貌。俊多嬌。身輕女史。應呼趙有。福檀郎。豈姓蕭。

不是路

幻出藍橋。眞叶秦樓。一曲簫。奇逢到合歡頭上。夜枝交福雞招。解開螺髻。烏雲裊半。驪酥胸白玉。銷誰承料。鴛鴦牒上掛姻緣號。怎生推調。怎生推調。

排歌

綉戶風清。金貌篆消。西窓隙月偷瞧。一雙蝴蝶綴花梢。一對鴛鴦浴暮潮。惺惺語半是。嘲惱娘常是。撒心焦。低低問半是。招泥娘常是。撒春嬌。

皂羅袍

如此掛人懷抱。把情根一瓣種活心苗。梨魂已被杜鵑銷。楊花一任春風鬧。屏

間燈燼餘花自飄枕邊茉莉餘香亂拋於中。有事郎知道。

大聖樂

映窓紗旭日初高。惜嬌眠。嫌起早。碧欄杆外鸚哥叫。枕痕沁印紅桃。且喜玉臺
此夜留溫嶠。只是金屋何年貯。阿嬌情痴怎了。趁娘行。睡着揭帳偷瞧。

解三酲

忘不得香沾片腦。忘不得汗漬鮫綃。忘不得破瓜年紀身材小。忘不得鰥客蛾
眉韻味高。忘不得蓮花吐瓣尖尖舌。忘不得束素重封窄窄腰。千般好。忘不得
千金一刻。刻刻良宵。

皂角兒

歎酸丁天付情苗。向青樓姓名流落。誰承望。性忒憐花。却隨處。每逢花報。似伊
家。比花嬌。同柳寵。近今無從古少。也容囉。喚一言低告。伊家聽着。但從今花朝
月夕。可是魂勞。

尾文

揚州花夢痴難覺。夢逐西風到處飄。却被奇花又纏住了。

戊午文戰予以首秋八日赴金陵旅邸枯坐蕭條若僧適衝雨晚出自鈔課街循文德橋而西卒飲於朱伯瑞寓飲散從子楚安仲禺中輩偕行微雨如毛酒力彌勁忘其所之之迢遞也乃邂逅董姬於燈影之下視其年可十三雙鬟初掠眉目道穎細骨柔肌如何搏掬花心酒境於此雙妙遂定交焉問其小名曰月哥乃以夜來字之而贈之以詞蓋原其名且志其時其事也

有記

妙詞雋豔無比直愧剩粉殘紅不堪承當耳已付蔣三哥玉簫度之一夕旦便新聲盈耳矣今夜惡雨不敢復望高車中秋月色定佳正足下文戰凱旋時也幸過擎杯聽新曲兒且手撥琵琶以待

夜來柬中語

萬斛奇香彌天花艷古人麗情駢語簡翰如山求其如此才情恐溫柳輩尙須羅拜床下耳

張子楚

予既薙髮例不得讀綺語偶過三影齋子野出小詞示我不覺神味洒
洒善哉參寥之言譬如不事口腹人見江珧柱能無一朵頤蓋正不須
作空花觀其尖艷處皆其血性處大可助人機鋒予請以子野爲師甘
吃痛棒也 蓮儒師

予長子野十五年猶記其兩髻垂垂不謂筆鋒直咄咄逼人如此歲戊
午薄遊金陵與子野流連文酒者月餘因得識夜來於燈月之下枯禪
老眼訝爲異人初謂夜來當以綺句爲贈已而見子野詞歎曰無庸吾
輩局外人作隔靴搔癢語 王禹中

閨詞 有跋

南仙呂入雙調步步嬌

翠被香濃春寒夜小閣燈花謝窓紗月影斜照着離人曲曲欄杆下
嗟自嗟呀早日長人去今宵也

山坡羊

急。颼。颼。隔。簾。風。大。冷。清。清。隔。窓。花。亞。瘦。岩。岩。曾。經。病。來。悶。懨。懨。扭。得。身。兒。起。半。
思。他。三。分。又。恨。他。春。光。如。許。如。許。春。無。價。怎。地。離。家。拋。人。得。下。思。他。是。真。耶。是。
假。耶。恨。他。是。痴。耶。是。夢。耶。

解三酲

思則思文人骨格皆風雅。思則思翰苑文章的大家。思則思風流畧不喬聲價。
思則思些事何曾肯使乖。思則思宵眠爲我煨金鴨。思則思睡起教他拾繡鞋。
難拋下。思則思藏闔門草會賭金釵。

前腔

恨則恨良宵負了千金價。恨只恨春病緣誰逐日加。恨則恨書來舊套寒暄話。
恨則恨要我通宵夢着他。恨則恨虛名也掛傍人口。恨則恨是我當初一念差。
丟開罷。恨則恨傳來謊信說便歸家。

皂角兒

寄一股傳情玉釵。兼一幅搵啼羅帕。情知他未必思量。且胡亂試他心麼。若果。

是。分。歪。渾。是。歹。他。既。然。我。索。性。一。勾。都。罷。伊。家。負。我。非。奴。負。他。偏。是。你。甜。
美。語。花。上。生。花。

尾文

可憐虛度歡娛夜。那一夜燈前不歎嗟。將一幅新詞和淚寫。

字字新思言言柔韵古今情詞不啻充棟然非枯淡無味則塵俗可憎
如此新韵可以前無古人抑亦難爲繼起者矣陸五如

五如予心友也猶記此詞脫稿適以原草裹藥五如偶來見之驚喜散
藥滿案袖携而去遂爲好事者所傳乃南及鴛湖而北及金閶焉今小
詞行且付梓而五如墓木拱矣蕪詞之墨如新心友之骨已朽燈下偶
閱評辭不覺五內欲裂也自記

懷懷舊

南黃鐘畫眉序

孤燈伴愁寂。院落沉沉雨花滴。更流螢冷淡。候蟲啾唧。今宵裡。數恨三年方寸。

內量愁千尺。合眼前無限。心頭事。過去了。怎生留得。

前腔

當年正今夕。兩個團圓起和立。記燈光影子。一雙東壁相携手。只惜從前誰料得。尙餘今日。合前

前腔

從今與伊隔。彩鳳青鸞沒消息。歎蕭郎真個路旁行客。朱門老一段青春人世。過幾番寒食。合前

前腔

燈前展書跡。小字蠅頭噴香墨。料從今之後。半行難得。花箋上日月時辰應變。做怨時愁刻。合前

滴溜子

漫說道從來兩心鐵石。更誰知別後夢魂空憶。就哭得淚乾何益。今生要見他。甚時日。浪信傳來怕多不的。

鮑老催

追思那日。奇花一朵。親手摘。春風被頭。驚鳳匹。是錦繡。緣繁華。命風流。敵巫雲。柔軟。嫌風急。柳線輕搖。嫩無力。真個是相憐惜。

滴滴金

花開並蒂。花遭劈。線結同心。線還拆。揚州夢有回來日。將海誓。丟山盟。息且把。韓香返壁。從今一場春事。畢好。歹來生和你再相覓。

雙聲子

黃昏立。黃昏立。細雨洒。尖風急。青燈側。青燈側。眠不穩。空勞憶。眼見得。眼見得。畫不出。畫不出。似亂花飛過。怎生邀勒。

尾文

從今勾却風流筆。須把從來念頭息。只恐陡上心來。消未得。

一聲一淚一字一珠。蓋賦情之深。自能窮思之變。將從來相思套語。一切洗却。獨寫其意中之意。情外之情。如一幅新翻人錦。自然文綵煥然。

不須更付染人也。願聞生。

旅懷

北仙呂八雙調二犯江兒水

相。思。滋。味。嘗。不。了。相。思。滋。味。破。題。兒。才。做。起。想。前。宵。我。你。今。夜。東。西。忍。教。他。在。
夢。兒。裡。俺。燈。下。寫。烏。絲。他。機。中。製。錦。詞。他。冷。落。空。閨。俺。潦。倒。江。隈。攪。春。魂。眼。睜。
睜。多。不。要。睡。無。靠。無。依。這。淒。涼。無。靠。無。依。無。頭。無。尾。這。思。量。無。頭。無。尾。只。落。得。
滿。青。衫。冷。熒。熒。多。是。淚。兒。

前腔

荒。村。自。守。挨。不。過。荒。村。自。守。妙。人。兒。在。心。上。有。就。甫。離。心。上。也。在。眉。頭。易。沾。身。
難。放。手。俺。潘。郎。滿。髻。秋。他。蕭。娘。滿。鏡。愁。他。花。命。判。休。俺。花。債。判。酬。儘。今。宵。恁。淒。
涼。多。自。受。玉。嫩。香。柔。只。爲。你。玉。嫩。香。柔。天。長。地。久。害。得。俺。天。長。地。久。兀。似。有。實。
不。不。一。塊。兒。咽。不。下。喉。

沽美酒

半開窗。半掩窗。燒短燭。照空床。只擁着衾窩。薰好香。忒寂寞。好淒涼。衣單薄。淚洒惶。空廊外。風吹葉响。荒村裡。雨寒鷄唱。我呵。自不合。住在東牆。你呵。又不合。立。在西廂。呀。却做出。今宵。這般。淒愴。

前腔

風兒急。夜又長。燈花結。咬銀缸。想前暮。私情一兩樁。真堪憶。怎能忘。若忘記。有蒼蒼。衫袖上口。脂猶亮。枕頭上。淚光溶。漾。我呵。儘判個。此心爲娘。你呵。也索要好。心待郎。呀。甘爲你。受這般。冤障。

清江引

隨風近。遠村鐘响。窓帟看看亮。孤身又曉行。柳色河橋颺。儘耽着。這相思。幾時和你講。

予結習不除。艷句日積。癸亥春末始付小童歌之花月之下。偶有新聲。亦復隨時換譜。右詞皆偶然口占。或止一章半折。因其語意相入。彙而成篇。乃詞家百衲琴也。自記。

情文雙妙詞林雋品甲子桃花下子野曾命小童以大小忽雷叶而歌之其聲頗逸宕纏綿至今耳根猶嫋嫋有生氣也予家有小童曰紅兒雪兒亦善三絃提琴但恨所譜不通院本諸舊曲今俟花影集成當令樂部盡譜之滿床絃索從此塵土一新矣子念跋

吾松絃索幾絕統近來諸名家始稍稍起廢然不久便散逸樂天詩有曰歌舞教成心力倦蓋此事亦大費心力只宜付散人迂叟以閒中日月搜討逸事庶幾有成耳子野避地空山絕跡城市日撰新聲令宗工名手商榷翻度差爲絃索興滅繼絕時時率諸童過予頑仙廬絲竹嘈嘈隨風飄揚村姑里叟皆負子憑肩而聽亦山林快事也始予開徑東余得奇石戲名曰絃索坪每月底花下有狎客携紅裙坐此吹洞簫彈琵琶適子野塹土西余得石平直小童六人恰好盈坐子野請于予欲乞此名名之予曰子但遣我一鐵笛我便當以此名爲贈蓋予有童善吹笛而子野諸童善絃索各得其所應有也眉公跋

兒避跡西余與子野盤桓花月者四十餘日幾有結茆松干之約常聽
慧童繁絃脆管而就中尤酷愛此詞子野每索飲十杯命歌一解不知
爲却此詞醉幾回矣 薛嗣嗣

王元美謂北曲多詞情南曲多聲情子野以南詞韵語作北詞且簫管
絃索合而翻度宜其聲情詞情灑灑傾聽也丙寅季春夜醉秋水庵因

題記 王季長

閨恨有跋

南商調十二紅

山坡羊 一團花看看消瘦。十分嬌看看非舊。傍粧臺。痛跌菱花沒來由。乾淨
因他醜。五更轉。想他們沒進止。無前後。分明看得人將就。你戀着何等烟
花。不怕神前盟咒。園林好。痛前生多應欠修。可眞個燒香斷頭。竟半路遭
池毒手。江兒水。干得教人一件件落人之後。玉交枝。荒茶廢酒好風
光。何曾去遊生疎。一向琵琶手。這幾日忘記梳頭。五供養。痴心堅守。却做

出酸疼。萬般症候。看花心。膽怯。擡面何人羞。問爲着誰來。花性多收。好姐姐。
曾記搬唇口。有無數。前頭後頭。虧心硬手。你如此做人。忠厚。主山頹。思
量眞個歹。細追求。幾番兒。跌綻繡鞋勾。鮑老催。九分是休。恩人反敦成敵。
頭不慙。不慙把我丟。川撥棹。下寶將他咒。有蒼天在頭上頭。瞞不得照淚。
燈篝。瞞不得照淚。燈篝。拚告你陰司。奴先死休。嘉慶子。奴把誰來記。上心
頭。你把誰來放下心頭。奴苦苦相思你。一筆勾。僥僥令。般般聽你哄。件件
罪根由。甚日歸來。拿着手。不痛打。承招不罷休。尾聲。恩情自比天長久。就
恨你。終須寬宥。只要你歸來。多放手。

大抵情不深。則恨不毒。閨詞至于恨。而無遁情矣。每見院本舊曲。從無
閨恨竊謂其情波有限。乃別譜新聲。擷翻恨字。纔覺相思於此。痛人他
時。閨思閨怨等篇。正不及情語耳。自記

咬定恨字。無限波瀾。可稱能品。不愧雋才。此直是海神廟一帋狀詞耳。
誰爲刀筆深文。如是閨生評。

妾初度偶言 有序跋

窮村僻遠三徑成蒿雨暮風潮還往竟絕洞花幽草時以翻經繡佛之暇
相與尋討烟霞勾當香茗此中幽趣豈堪語忙人乎乃因其初度播之聲
歌而私命其篇爲北山迂叟房中之樂

南中呂漁家傲

今日裡把往事從頭作話題不覺的日子三千年頭又入我你容顏俱蒼矣各
添年紀俺守着經卷丹爐你只是荆釵布衣但年年花謝花開花開時進酒卮
剔銀燈

你姻緣事誰知在這裡前生事便嫁窮酸也何媿幾間屋正與翠巍巍前山對
幾個人只在艷騰騰羣花內終年終日如此桑海變俺和伊兀是不知

地錦攤花

謝天公安頓咱和你命福不低樂田園案舉眉齊醉月吟風鬪茗圍棋永相依
享用些太平日

美娘兒

折花折花來上壽。花香點繡衣。把酒把酒雙勸飲。紅潮臉上脂。檀郎豪俊會填詞。歌兒舌脆音律細。一簇一簇瓊簫沸。似月滿秦樓跨鳳時。

予山居在東西二余之間其地土肥水滑宜花便木丙辰冬作半閒精舍在山腹明年作就麓新居在山足不五六年樹可蔭人而竹皆抱孫矣更以亭臺庵閣點綴其間雖不事華飾然自是幽微妍穠春花發艷秋木隕黃屋角參差巍巍前山對幾個人只在艷騰騰羣花內蓋實錄也夫吾輩進不能膏雨天下若退又不能桔槔灌園是真天地間一腐草亦烏用此四大爲予自分無洪福不敢負淡緣凡移花接果之方開畦疏水之法莫不悉心悉力爲之今幸有小成花木暢茂禽留不去山隱轉奇橋柳臺松古秀嫵媚春深秋早日美風恬得與村翁漁叟觴花間竹於其間或令椎髻孟光携東閣中人饋花紅調竹粉媒花鬥草以爲樂蓋用志不分天遣食報予既易之以勞復享之以淡庶幾不取罪

於彼蒼而予之筋骸骨血亦差不爲人間真棄物耳予嘗有詩曰蒼生
久矣無霖雨三徑何曾有旱荒筋力未嘗無用處要銷花福爲花忙蓋
用以自勗不敢甘自暴棄孤負老天眷顧盛心也自跋
扭聲色入煙霞將風情用花月趣淡彌真境冷逾熱子野可謂巧于享
受矣陳壽卿

星劍霞衣仙風道骨豈眞脂粉中人耶性夙評

與妓語舊感贈有序

蝶睡醒來花心謝了忽到趙家重看合德因逢虢國轉憶太眞舊事相與
攢愁笑痴心又來做夢乃振詞壇旗鼓驚開花陣心兵

南仙呂入雙調步步嬌

未許芳心全灰死想起前頭事當初見你時姊妹隨肩記得排行次自分會無
期却誰知夢裡重逢此

江兒水

燈下重偷覷。予心有所思。幾千番。變到今朝。地措蕭郎。又見蘇卿。妹兩嗟呀。盡說相逢處。有可音書容。寄答道。而今就姊妹。音書沒紙。

園林好

記當日你。猶然未笄。驗身材。早長於去時。笑我也添年紀。你換了。舊容儀。我換了。舊情痴。

玉交枝

我今老矣。漸腮邊鬢鬢有鬚。當初花柳和雲雨。今日是筆硯琴書。心窩忘了。定情詩。眼睛暈了。鴛鴦字。笑當初痴耶。忒痴。索性有今朝忘記。

人月圓

忽忽想當初。妝前見你。姊妹梳頭爭學髻。到如今喬綰青絲。到如今喬綰青絲。畢竟有三分似得伊。記些些。是與非。痛今生。長別離。

僥僥令

鴛鴦曾打結。織錦舊填詞。是你姐姐。月下花前。般般事。倒付與我和伊。作話題。

尾文

從今爲你重提起。有便信須教遞與伊。只說檀郎忘了矣。

吾輩情之所鍾。每見遺粉殘膏。猶是銷魂欲死。況見其妹乎。當時唐玄漢成。直於太直。飛燕情種。既深。遂覺艷根柔蔓。綿引不已。從太真而虢國。從飛燕而昭儀。卽至愛移于遠。條然使于飛燕。淺必不至于合德。深也。故予嘗謂漢之成。更情深于唐之玄。此言甚似解人語耳。自跋

寫情傳恨語。語幽深。蓋身經是境。自是摹神。倘不悲而泣。正恐其淚不

下耳。徐合明

宛如小窓對語。可與幽閨記拜星月並傳。巨卿評

拚則而今拚了。忘則怎生便忘得。王元白

絃索詞

北南呂罵玉郎

手抱琵琶彈怨詞。把俺哀腸事。慙與誰。天生我。你配雄雌。有何疑。俺與你明白。

夫妻怕旁人怎的怕旁人怎的。怎不日夜相隨。倒拋人路岐。倒拋人路岐。我你
豈鶯鶯君瑞。可只是哥哥妹妹。雖不會合。豈牽絲。雖不會合。豈牽絲。却也曾焚
香設誓。天地皆知。俺聞之。那王魁負了心期。終有日。捉將去。海神相對。

前腔

再把淒涼。慙與伊。好和歹。是你妻。怎瞞心昧。已把奴欺。任施爲。覷得人似脚底
黃泥。忍教人受虧。忍教人受虧。眼見得玉碎花飛。病岩岩。怎醫。不記得一雙兒
跪。不記得一頭兒睡。把許多繡帳溫香。把許多繡帳溫香。倒做了單衾血淚。飯
醉茶痴。俺尋思。甚來由枉費心機。倒被他貼天飛。拿他不住。

前腔

下實磨牙咒罵伊。就是你歸不得書也歸。看行行征雁帶愁飛。淚雙垂。可知俺
玉體香肌。倒痴心待伊。倒痴心待伊。受用些月帳風幃。冷清清夢回。冷清清夢
回。痛咬得鴛衾兒碎。推開了枕頭兒睡。却誰知業障冤魂。却誰知業障冤魂。悄
悄的夢中來。至強做夫妻。恨冲天。那冤家還要無知。俺只是罵幾聲薄倖賊。將

與你斷恩絕義。

小窓兒女語恩怨相爾汝。此中己自有琵琶聲。不須更付冰絃檀板方知其妙也。眉公評

婦人言辭思路自有一種幽沉憤懣之意。此詞模擬曲盡而措辭更質直真。至似近俚俗。正絃索詞妙處也。若稍被文彩。便非本色矣。填詞貴道地信哉。友夔評

重陽恨。有跋

南南呂香遍滿

重陽時候。籬邊看花愁不愁。借問花前人在否。伊心敢是休。咱心怎便丟。猛凝花下眸。恍立在我前後。

懶畫眉

當初記得在妝樓。正病起。騰騰舉止羞。眉兒低蹙。暮山愁。要引他開口費多少。心機在上頭。

梧桐樹

同登翡翠樓。共飲茱萸酒。淡粉芙蓉。正是開時候。南枝曾折伊之手。這度開時。他竟在天南沒盡頭。西風綠鬢依然否。若是相思定比黃花還瘦。

浣沙溪

把連理分將鸞鏡剖。要知他信息無由。殷勤贈下同心扣。空錦袋熏香篋內收。離別久。儘寸寸肝腸兒被伊割。不然呵也蹙個眉頭。

劉潑帽

滿城風雨初晴後。照離人月滿床頭。消愁聊且邀紅友。倒愁心上事多非舊。

秋夜月

看看罷休。全不應伊之口。罪犯風流應難宥。些些撇下他安否。忍撇得許久。忒下得毒手。

東甌令

千般恨。萬種愁。辜負重陽一段秋。黃花隊裡無紅袖。獨自登高後。見征鴻。嘹嘯。

過南樓帶得信來不

金蓮子

休。休。休。花箋字跡伊親手。有一個伊名兒在上頭。只落得向燈前。一星星想出舊風流。

尾文

今生未審重逢否。料十分中間難得九。空一度重陽。一度愁。

城南戴氏居有芙蓉一區。早發而茂。庚戌九日。曾就花前爲泛菊之飲。今且兩年於茲。人在天南。夢不可得。而芙蓉如面。籬菊宛然。清歎不足繼之。悲歌不覺一字一淚也。壬子重陽記。自跋

不淚而啼。無聲而泣。深情密意。只以淡言平語中出之。若草草看過。寧

知其爲無窮之慨也。

性夙評

美秀溫文。綢繆宛轉。而俯仰嘻噓。不堪多讀。張瑞齡

七夕閨詞

南南呂梁州序

羅衣初試。新涼纔長。恰到穿針樓上。一團歡笑。針鋒。月色微茫。早是珠凝仙掌。風定梁塵。半縷庭烟漾。隔年牛女也。也成雙。偏有個人間薄倖。郎如眉。月與眉相向。畫眉人遠。空惆悵。心上事。到眉上。

前腔

綺疏深掩。朱門閉上。一葉高寒初响。玉堦羅襪。新聽蟋蟀涼。況早是絲牽連愛。膾饌同心。十字縈蛛網。從教得巧也。也悲傷。只巧織迴文封寄。郎郎飄蕩。把奴撇颺。空夢回殘月。窺鴛帳。眼下淚。滿衾上。

前腔

歎良辰。今歲無雙。豈花容來年無恙。怕經秋瘦損。一似敗荷模樣。可是潘愁鬢。老沈賦魂消。打扮無心想。深深深拜也。炷心香。願莫染秋來鏡裡霜。香暗。蕤心自想。心頭有話。和誰講。口中話。在心上。

前腔

賞芳辰。姊妹飛觴。強梳粧。十分時樣。怕匣中團扇。可能往日風光。生怪鴉鬟。聒絮不解人愁。染甲爭喧嚷。輕輕步也立。西廂見月照當年。舊粉牆傷往事。成悵惘。把蒼苔立遍。誰偎傍。鞋底露透幫上。

節節高

金風透右廂。敝虛涼。流螢幾點。粘羅幌。傾葡萄。釀浸茉莉香。掩芙蓉帳。剛才出浴衣輕爽。風吹薄翠釵頭响。何事檀郎愛分離。把良宵容易輕拋颺。

前腔

當初話夜涼。靠西窓。把三郎故事。閒論講。願連枝長。比翼雙生人天上。而今眼下。遭魔障。來生爭不成。虛謊想。別有銀河在人間。無風咫尺。生波浪。

尾文

勾消不盡相思帳。一度穿針一斷腸。從此秋宵夜夜長。

閨詞作梁州序。如以淨脚扮旦。終是雄爽有餘。柔韻不足。右詞殊不宜。

清板隻簫當爲歌場作廢。但中有雋語。似亦不可概棄也。自記

十年前曾讀此詞句字小異今一經竄定遂楚楚花艷足稱名篇 王石

公

眼前故事翻弄自新而舉止妍和自是大家風範 呂鳴諧

春思

南南呂楚江情

飛花打繡窓。零星滿床。枕邊檻外垂綠楊。偏生鶯語罵流光。也把心期自數。心香自裝。叫一聲知心着意俊俏娘。你下得風流。害俺春思蕩。害得俺閒時也是忙。閒時也是忙。慵時也是慌。熱沸在心肝上。

前腔

淒涼立小廊。身單影雙。楊花滾滾人斷腸。柔魂一縷待離腔。也分明是俺依稀是娘。只覺道嬌嬌滴滴脂粉香。把餓眼昏花權當嬌模樣。且書兒寫幾行。書兒寫幾行。夢兒做幾場。總記入相思帳。

皂羅袍

沒事幾回痴想。但把他儀容畫了。頂禮燒香。衾窩獨自也叫娘行。就虛空也。把魂靈傍更把生辰八字。裝於繡囊。餘香剩粉。沾在繡床娘。你可在枕邊衾畔。衣裾上。

子野老於情痴花夢時。作予每每規之不遣餘力。今觀此詞。風情逸興。殆出於性生。或亦花命使然乎。如此才情。自然隨處發越。拈花弄柳。總

是錦心繡腸。不須以周程張朱困其藻艷也。

伯瑞跋

骨韵玲瓏。致味道逸。摹神入妙。刻畫深微。聖於詞者矣。

徐長與

閨詞

南仙呂九迴腸

鬢兒邊黃花不戴。窓兒下鸞鏡慵揩。香爐茗碗。無心擺。軟騰騰骨瘦如柴。才還又欠是相思債。有重無輕。是花命災。誰拖帶。明明是你冤家害。再不干奴命安排。漂沉苦海。撈難起。圍困心兵。打不開。只索向銀缸畔。把虧心罵。又心疼。你不覺淚盈顙。

前腔

鬆解了團花的帶。寬褪了弓字兒鞋。一床絃索空閒在。怪酸疼玉腕難擡。鮫綃
帕上有盟言在。奈鴻雁雲中無便信來。伊心歹。奇花輕易容他採。却等閒認做
應該。他痴心不願三生願。我怨氣常修一口齋。只落得真心待倩。傍人去尋芳
信。寄個小金釵。

秀艷纏綿聲聲哀怨。尖新熨貼兩極其妙。沈友蘭

卷二

四

集

瑤臺片玉甲種中編

明施紹莘子埜著

東海黃公輯

村中夜懷 有跋

南商調二郎神

和衣睡。這一段淒涼爲着誰。水國霜清寒徹髓。分明夢裡醒來人在天涯。聽不得風吹窓上紙。方信道夜長如是。渾欲死。撇不下心頭一個人兒。

集賢賓

盈盈祇隔衣帶水。來時密約佳期。眼見得差池三日矣。况一紙音書難寄。般般爲你知。知多少雨啼風涕。羅帕裡請看取一行行淚。

黃鶯兒

心病煞難醫。只當歸。是妙藥兒。今宵症候難存濟。冷一陣是甚的。熱一陣又爲誰。更眼花錯喚名和字。鎮如痴。伊難負俺。難負俺恁相思。

貓兒墜

一燈相伴。加被更添衣。守寡淒涼。渾似此枕頭香膩。是誰的憐伊。實實是前宵枕上人兒。

尾文

幾番還自披衣起。茶冷香消。寒似水。聽敗葉敲門。疑是你。

是夜宿韓巨卿齋。偶有所懷。臥不成寢。乃起坐燈下。磨墨伸紙。凡得古詩三律。詩一。南北宮長調。各一已。而天明花日在窓。親故以予之至也。少長並集。見諸綺語。爭錄之。而去頃刻間。徧布墟落。更歲餘。予復詣巨卿。見其村中小兒。大學序首空處。有徧書予詞者。亦大可笑矣。自記

喬夢符寄遠折桂令云。飯不沾匙。睡如翻餅。氣若遊絲。曲寫相思。模樣可謂多情矣。乃子野則曰。冷一陣是甚的。熱一陣又爲誰。又曰。守寡淒涼。渾似此鍾情之甚。更覺過之大。凡情患不足。不患有餘。世間忠孝俠烈。總發乎情者耳。子野嘗有詩云。從來江海淚。花成自古乾坤情。字裏的是名言。彥容評

子野生負風流命。饒花福。每逢奇麗。不禁縈牽。戊午冬日。過余村居。予爲設雞黍。進尊罍。擬盡歡洽。乃微睨子野。意中惘惘。若有所失。夜宿竹雲齋。臥而復起。挑燈吮毫。苦吟達曙。予蚤起。見諸詩詞。曲寫悲淒景況。因爲和韻。有好把新詞。先寄與相思。滋味要伊憐之。句子野笑曰。子誠知我哉。幸毋投轄。致令予負心期也。至次夕。留詩案頭。中宵逸去。異哉。何情痴至此。雖然。予觀古來才人。恒遇佳人。然當其分離阻隔。遑遑魂銷。欲死發諸咏歌。以子野之才之遇。而欲其含藻斂華。作無情鈍漢。此實難矣。蓋惟箇中人。諳箇中味。如子野始可謂識得情字耳。能讀斯詞者。必天下深情人也。庶有知子野者哉。韓大進巨卿跋。

懷舊重和彥容作

有跋

南黃鐘畫眉序

心頭轉淒惻。舊恨餘歡。總堆積。歎一場花事。十分狼籍。他做下影裡恩情。我贏

得畫中悲憶。合。看看逐旋隨流水。過今日。又還明日。

前腔

曾經苦分拆。還有個相逢。在他日。怕從今見你。就再生難必。曾記你絮語叨叨。畢竟也信音寂寂。合前。

前腔

花儔與月匹。難道心腸竟如墨。料重門深鎖。雁書無策。就做道。今日辜恩。畢竟是當初難得。合前。

前腔

依希有消息。聞道伊家尙相憶。就一些難信。也堪疑惑。眼皮上。越有思量。心坎裡。轉添鶻突。合前。

滴溜子

誰承望。恩情兩下分。劈倒浪。想來生和你相覓。幾個黃昏。白日教人挨不起。這時刻。索取憂愁。報伊憐憶。

鮑老催

重思細憶些些好處。郎知得手托腮兒過時日。這幾時行忘止。坐忘食。淹淹瘦損腰兒窄。鏡裡看看減顏色。爲着你真相直。

雙聲子

眞難得。眞難得。寵柳意嬌花格。眞可惜。眞可惜。輕閃下。都收拾。沒計策。沒計策。生死隔。生死隔。是一對冤家兩辜心力。

尾文

佳人才子風流籍。未許卑人多占得。該有今朝這分拆。

彥容曰爾懷舊詞已極美妙得無江郎才盡乎予曰有情可摹無才可盡若云才盡則尺幅立窮若云摹情則天大樣花箋願借一幅乃因其和作復重和之終恨句字有限未寫得其萬一耳

自記

子野長於才自深于情才情二字固是相生嘗借唐之詩方子野之詞大抵如崔賈之雄偉而無館閣氣如元白之流利而無排偶氣如錢劉

之清藻而無佻率氣如郊島之澹遠而無寒瘦氣如崔鶯薛濤之香豔而無粉脂氣如齊己靈一之機警而無蔬筍氣其在初唐則十三家也其在盛唐則李杜也下逮晚唐雖句雕字選間奏新聲寧易闡其堂奧

耶 彥容評

情波滾滾隨地江河尺幅之間濤頭萬狀

張調卿

四景閨詞

北雙調八不就

恰收燈又近清明只覺道花事凋零又添些鬼病鬼病伶仃冷落瑤琴生疎錦瑟打疊銀箏今宵夢前宵夢全然沒准千遭信萬遭信看看半句無憑恨咬牙根痛剪香雲痛的是挫過芳年恨的是錯盼錯盼書生

前腔

看醺醺自占柔條間屈指幾度春歸何曾似這度這度魂消愁劈蓮心驚看夜合怯聽芭蕉搖紈扇悲紈扇怕秋風又早掩羅袖恨羅袖偏生粉淚痕交指冷

瓊簫帳冷。絞綃枕頭邊。茉莉花香。你怎生的孤負孤負。良宵。

前腔

聽寒蛩聲滿床頭。這壁廂月在東窗。那壁廂雁過雁過。南樓獨杵砧敲。空床夢杳。親筆書修生離別死離別。堅心耐守。今生債。前生債。判個一例都酬。釵股誰收。匣鏡誰留。記當初夜夜良宵。到如今日日日。日三秋。

前腔

映窗紗雪間梅花。不覺的一味相思。消除了一歲一歲年華。誰共圍爐。誰同寶鴨。誰聽琵琶。千不信萬不信。終須被耍。千不是萬不是。只是當初自差。我豈殘花。他認做間茶。他既然現不思量。我怎生的恩愛。恩愛常賒。

此等詞本被絃索須帶肉麻。當在不文不俗之間。方入詞家三昧。右詞似亦夢見一斑者。每花月之下。令兩童以三絃簫管。淒聲度之。宛然一

燕趙佳人。攢眉酸涕矣。自記

和彥容重會西湖佟姬留別之作 有跋

南南呂宜春令

春將盡。春意濃。陡春心。雲期雨蹤。那人情重。當年綺席親陪奉。把恩情付與湖山。到今日。枕頭春夢。情悰忘他不得。再尋花洞。

太師引

趁東風。一片晴帆動。擺蘭橈。平湖鏡中。看無盡青山如畫。況更是綠水。啣空詩筒。茗碗和春。甕怎少得。那人相共。心頭事。今年去年。曾記得。雙携手。在曲水橋東。

瑣窗寒

到如今人去。橋空。髣髴當初旖旎容。記紅鞋底印。半折如弓。衫裁小樣。六銖猶重。淡雙眸。一泓波瑩。想儂般般件件。總朦朧。怎生問信尋踪。

三段子

隔花轉東。過青樓。深深幾重。兜的便逢。看花容。如今轉穠。好似春風到處。花心動。花心開。處。蜂偷擁。眼口相依。這情深重。

東甌令

分離後。沒雁鴻。怎料今朝得再逢。輕輕窗下親摩弄。肩臂相捱擁。奈新歡舊恨。積重重。如在夢魂中。

三換頭

湖山翠籠。載伊情。種迷離笑也。春心忒濃。娘行恩寵。向衾窩款款。把溫香軟情。偷送一覺。鴛鴦夢。香肌兩下烘。這樣親偎。怕甚麼。勒煖輕寒。柳絮風。

劉潑帽

冰輪一片松梢湧。候卿卿睡眼朦朧。枕邊溜却金釵鳳。莫放鬆。這良夜。休輕送。大聖樂

奈些些。幾夜情。驚業魂靈全被哄。多應別後相思重。因此上。十分濃。正是人歸。恰在花叢裡。春色偏生錦陣中。餘懽剩。恐只恐怕。從今去。後雲雨無踪。

越恁好

相携手。怎鬆繾綣全何用。終久是分離。硬個心腸。且去也。看秦簫再弄。怨雙雙。

飛燕各西東。歎人生。幾番多。被離愁。哄臨歧泣別太匆匆。

尾文

春風吹得離情重。楊柳堤邊一樣濃。何日樓頭香再擁。

古人詩識每以爲諱。予竊笑之。興到吮毫。未嘗有所避就也。右詞適在毗陵舟次。對客揮洒。疎率平淡。第粗成句字而已。歸來出示彥容讀。至況是來時未必逢彥容。拍案曰。何作此不祥語。予笑曰。不意達人亦爲斯言。明年春盡。彥容將赴心期。而姬計忽至。偶然胡言真欲成識耶。嗟乎。佳人難再得。花夢不多作。每披此詞。想見當時朱欄畫舫中。胡然而天胡然而帝。今日化爲東風亂蝶。夜雨哀燐。粉面魂儘付柳啼花。晒檀郎於此。能不動心。恨天寡緣而高高不可問。恨人負心而冥冥不復知。乃轉而咎予曰。詞識詞識。殆無聊之極思。而情深之致語也。予亦甘爲有心人受過矣。自跋。

悼亡妓爲彥容作有序跋

修姬乃西湖名姝也。彥容素與遊。嘗兩度遊湖。屢有贈答。昨歲寄彥容詩。有記否。斷橋橋上月。爲郎揩淚爲郎歌。之句。風流蘊藉於此。可思。今歲清明。桃李正發。彥容將赴心期。出示懷舊四闋。予賞其婉麗。久之。因許屬和。不兩日而姬訃至矣。適在泖上。作清明感桃詞。未竟。使發。因寄語彥容。尋當相示也。彥容復曰。兄作定佳。但恐挑人人面桃花之感耳。予感斯言。因得桃花人面春風之句。而以荳蔻郎心夜雨儷之。聊以志彥容之感。且以當和作耳。嗟嗟彥容。世事轉眼。可悟空色。清明感桃詞。願以爲藥。壬子清明後十日記。

南仙呂桂枝香

時時心裏看看夢裏桃花人面春風。荳蔻郎心夜雨。記前春見伊。前春見伊。伊道你且今年歸去。我准明年待你。竟誰知地下無消息。人間長別離。

前腔

再逢何地。要逢何計。高樓歲歲春深。海燕年年胡語。問伊家怎的。伊家怎的。你

曾寄斷橋詩句。郎也寄新詞與你。竟誰知。郎才柳絮沾泥日。妾是梨花魂斷時。

前腔

意中人。去眼中人。淚傷心。荒草新墳。腸斷亂鴉枯樹。想今番別離。今番別離。郎儘相思爲你。你便相思無據。竟誰知。燭灰眼下空含淚。蠶老心中枉掛絲。

前腔

去年滋味。今年憔悴。當初誓海盟山。到此夢花兒戲。數年年此時。年年此時。不見舊遊之侶。只到舊遊之處。竟誰知。一向同香閣。而今泣路歧。

子野云。桃花人面春風。豈惹郎心。夜雨石萍云。夕陽邊草綠。郎心銀缸畔。鴛紅妾枕。皆駢麗中情語。年來花運百六歌場板蕩風流。一線猶在斯人古。云佳人難再得。直其然乎。子野填詞吊之。當使香魂艷魄與西冷小小俱不死矣。彥容評

修姬葬孤山之麓。張九娘葬西冷橋畔。一坏荒塚。斷送風流情。烟意月之下。不知粉魅花魂。尙能作綺羅絃管。當年伎倆。平哀哉。哀哉。予嘗欲

作卜詞吊合之或曰與子有何交涉亦勞費筆墨乃爾予曰野草庭花
吾輩見之亦有意思此豈皆枕席間物哉予終當了是願作雙花薄命
吟明歲遊西湖當於寒雲荒莽中揚杯以酌之自記

贈嫩兒有跋

南南呂嬾畫眉

葡萄花下閉門居。小小房櫳。厮稱渠。眉兒淡掃。畧施朱。清俊麗兒素。眞管領春
風。盡不如。

前腔

偶然相見。落花餘。衫子新裁紅杏初。溫柔香軟。骨如無。愛把眉兒鎖。淥老賺人
一寸波。

前腔

溫香脈脈遞衣裾。慙媿蕭郎是姐夫。前生緣分。道如何。恁樣看承。我問取。卑人
折福無。

前腔

暝烟初合落花多。潛遣青衣將小字呼。燈前密語一更初。片腦煨殘火。正窻外。初三月似蛾。

前腔

有人窗裏解流蘇。泥得檀郎不奈何。窮酸也得近冰膚。今夜休輕挫。知費了。繾綣司中印幾顆。

前腔

驀然分別兩情辜。郎上孤舟妾綺疏。懸懸望眼兩模糊。無數西江路。只哄得。蕭娘。哀淚珠。

前腔

相思今夜破題初。獨向西廂月底哦。一場花夢又南柯。納悶支頤坐。驗瘦損腰圍一寸多。

前腔

娘○行○且○自○強○支○吾○郎○不○是○青○樓○薄○倖○徒○衷○腸○一○段○在○春○羅○須○着○意○加○留○護○這○是○折○証○相○思○一○吊○符○

嫩兒姓沈氏色不踰中人然善歌初見淡然已而亦微微近人而時露俠士風無婦女氣談話信宿頗極歡匆匆別去遂成各天以後兩訪之皆不得見今且聞其從人矣恐後晤無期空有芙蓉面楊柳眉耳燈下偶閱舊詞酷思其人乃細書數語爲他日半幅遺照也

自記

嫩兒從人時曾以一緘寄予浮沉兩年始達雖或出倩代手然不忘故人封完舊物情深義決真可云俠試反復書詞其人可想而其事可傳因附記于此其辭曰清江一別遂易歲年江南渭北人遠心近誰言雲水萍花恐非個中人語也別後浪游金焦間會有夙約風絮便當沾泥矣但古詩有云生憎寶帶橋頭水半入吳江半太湖正不知誰淺誰深春天雨枕秋夜風幃孤燈殘夢此豈重門深鎖所能限也悠悠此情未知何極奉羅一段折証相思向寶之秘之異香熏之古錦襲之只令渠

見淚痕耳未嘗敢輕出示人雖然今日之事情不可割義不可留謹繫同心仍送左右豈忍等秋雲哉但使足下謂兒爲薄倖人以歧路視之從此心花稍開眉結稍熨則委骨窮塵所甘心矣時移事改生死離隔洒淚書懷封緘盡濕千萬珍重遠大爲期膩粉柔香不堪丈夫在意也
又自記

此小聚散耳遂成花史一段大關目有此公案恐子野他生復受花業玉妃有言爲此一念又不得居此爲天爲人心再相見噫可懼哉吾輩情根纏綿不知何時稅駕矣請子野勇猛懺悔則個眉公跋

夜窗話舊 有跋

南仙呂八聲甘州

鴛鴦牒上把雲英姐姐配定裴航談何容易。薰面便教相傍。勾消幾許相思帳。收拾無邊年少場。方纔有。今宵細語空窗。

前腔

記當日畫樓相訪。正朦朧睡起。半嫩梳粧。兜的覷上。從此不教拋放。曾深談雨枕銷金帳。曾泣誓風燈蕭寺房。也曾守淒涼。楓落吳江。

不是路

不厭疎狂。許我真心學孟光。親供狀。就輪迴也。願作鴛鴦。怎生忘。把池邊樹影。做談心幌。將峰外松臺。做拜月堂。相偎傍。一場花夢。拚勞攘。儘他覓障。儘他覓障。

解三醒

我也曾錦衾羅幌。我也曾路雨橋霜。我也曾把香心。月夢潛來往。我也曾封寄。啼痕十萬行。我也曾軟偎珠翠。將花心養。我也曾抹殺鬚眉。將浩氣藏。風流帳。爲風流兩字。摟得人荒。

前腔

你如今繡房鴛帳。你如今琴兒爐香。你如今舞裙歌扇。拋塵網。你如今伴先生。月句花觴。你如今不愁心上。鴛鴦曠。你如今冷看人間脂粉。狂休謙讓。真個是。

情因証果。花籍生光。

尾文

空窗。一夜閒論講。個裏悲歡。有一萬場。把天比情還未是長。

二十年前一夢空依稀。猶記夢花紅。而今短鬢侵尋白。閒話風流落照中。此予乙丑春日花前感舊詩也。夫人生七十謂之古稀。而初十年太少。後十年太老。中間止五十年。而坐困於塾師者。幾十年。羈纏於病冗者。幾十年。幽沉於風雨者。幾十年。所存幾何哉。而粉債花魔。酒兵愁陣。又無日不煎熬。熱沸爲生。亦良苦矣。幸有一字訣曰忘庶。以寡情得安樂法耳。奈何絆繫情根。常在心口。當年童心業已多事。又復爲之追思。記憶點算。狂花舊事。縈纏業緣。增重何時得解脫哉。右詞乃十年前舊案。花影集成。予擬刪去。彥容曰。事不須憶。而詞則可傳。爾但作空花觀。聽天下着相人。臨文感歎可也。乃仍附之卷中。令如夕陽之在疎林半。

明半滅云爾 自跋

七夕後二日祝如姬初度

南中呂好事近

花種降瑤池。管領人間花事。偏生及此。天孫昨夜歡會。金風玉露。向高樓洗出。秋如水。百日紅似有意。拈花並頭蓮。可爲你成對。

千秋歲

翠紅圍。排比做神仙會。共獻祝酒映蛾眉。鱸膾蓴絲。鱸膾蓴絲。擺列着江南早。秋風味。香翻袖。花蒸氣。紅潮面。人微醉。歡暢文園裏。俺烟霞地主。你羅綺花魁。

前腔

兩相宜。可不是天婚配。百歲事今日纔起。月信花期。月信花期。待與你醉婆婆。典珠沽翠。風流事。俺生來會繁華。夢你休慙媿。但歲歲人相對。做雙星姊妹配。滿月夫妻。

越恁好

綵毫佳句。綵毫佳句。俺文齊。又福齊。喜卑人有福。把卑人配了你。桃花郎姓崔。

瓊漿人嫁裴。把香馥馥一枝花。待移入繡幃。嬌小小年紀兒。就從今白首兒。寸步相隨。同心膾。連愛絲。咱兩個長歡會。向黃姑笑道俺不輸你。

雙乘鳳

願從今拋却歌衣歌衣。願從今重修艷史艷史。梁鴻婦。寶家妻。伸月誓。赴花期。草隨步。絮沾泥。

前腔

願從今荆布釵衣釵衣。願從今香茗琴棋琴棋。常蝶幸。未花媒。風前句。月中杯。把生花筆畫山眉。

鳳毛兒

尊前獻祝團歡喜。這壽酒多應是合巹杯。風光甚美。可知道勝事良緣。又有個天公幫襯你。

子野情根引蔓隨地下。種觀此詞則香馥馥一枝花。又將移入繡幃矣。獨不顧人間饒眼愁妒欲死乎。雖然如此好詞香艷鮮美千金一字庶

幾無慙以當一斛珠。恐人間正少此買花錢。他人安得爭買也。包稱先

寄人構字有跋

南商調金索掛梧桐

花間宿雨收。細疊花茵皺。雨雨晴晴。一個人孤守。歸期怎逗留。過中秋。又早看。
看二十頭。音書浪得傳人口。你在天涯何處樓。眉兒皺。將紛紛淚點灑寄東流。
問當初。假傍人不問。今宵夢見人不空。夢裡人依舊。

前腔

鴛鴦湖畔舟。西子臺前柳。一望天南。怒雨驚風驟。淒涼立小樓。見濤頭。銀屋翻。
空罨素秋。此時遙憶人安否。更添上眉峰兩點愁。空僝僽。這般般件件總難丟。
要與君說個因由。問個因由。二十後歸來否。

前腔

思量無斷頭。往事空回首。暮暮朝朝。漸漸添新瘦。金錢暗自投。淚雙流。看幾片。
青蛱個個愁。分明許下歸時候。怕人在天涯還逗留。揩衫袖。把淚珠收去又慙。

眉頭想人生幾度中秋早虛了一度中秋況歸期未必中秋後

前腔

梁間隻燕愁。鏡裡雙鸞剖。書信重封不盡還。傳口書憑征雁投。怎生留惆悵。臨封幾度抽你看時料。把眉兒皺。我倒怪修時忒。恁愁君知否。這書來之後盼望回頭須知道。日日江樓夜夜燈。籌好消息何時有。

此詞予既寄贈後爲彥容潛錄適遊西湖因口授一歌姬纔一過便能了了再夕卽歌之段家橋風流俊逸坐客銷魂者久之夫一經美人之口便傾動一時如此予自分何緣消此奇福且花事已休芳心灰冷名傳樂部空屬可憐耳予曾有詩曰夢破揚州事有無近來只合叩維摩誰知猶有空名在却被人偷譜艷歌又曰而今非復舊情痴誰遣新聲似昔時好比仙人天上去人間傳得步虛詞蓋爲此而作姬姓顏行第一聞是慧人未得一觀時爲惘然

自跋

開元中高適王渙之王昌齡齊名偶拈小詞便爲敦坊偷譜一日小飲

旗亭諸姬所唱皆昌齡絕句而不及渙之爲之色動因指諸姬中
一最美者謂兩人曰姑稍俟之倘我詞出此子口則爾兩人當以我爲
師俄而雙鬢撩袂長歌聲絕雲漢則渙之詞矣渙之爲之大叫狂噓顏
姬事與此正相類蓋詞出美人卽蕪詞亦有生氣况綿婉清新如子野
此詞者哉且冥契之符莫知其然而然子野之神韵顏姬之慧心當別
有作其合者又不直在聲音句字間也彥容跋

相思

平言淡語只如白話此詞家最上白描手所貴乎本色者此也蔡叔文

北雙調閨怨蟾宮

掩重門夜永沉沉聽一派寒砧怯一派寒砧映窗楞月在庭心篩一簇花陰怕
一簇花陰抵牙兒慢思量是一個知音第一個知音記他們喜孜孜抽一隻鸞
簪贈一隻鸞簪到如今有夢難尋烘一會孤衾擁一會孤衾

前腔

亂紛紛花撲窗紗。驚一樹栖鴉。定一樹栖鴉。悶懨懨倚得身斜。覺一陣寒些。更一陣寒些。托瑤琴寫意兒。學一段梅花。彈一段梅花。聽雁兒飛過也。這一隻呀。呀。那一隻呀。呀。擁衾兒。叫一聲天。那兒見一刻冤家。夢一刻冤家。

前腔

果然的夢見伊人。驚一陣風聲。惱一陣風聲。夢回來重剔殘燈。又一瓣花生。更一瓣花生。淚痕交衾和枕。這一片如水。那一片如水。俺知他他知俺。總一種傷情。恁一種傷情。既伊家知俺。傷情判一個殘生。儘一個殘生。

前腔

漸天明白發東窗。臥一半空床。剩一半空床。意昏迷眼悞心慌。叫一聲娘行。錯一聲娘行。惱心情抽身起。顛一領衣裳。倒一領衣裳。眼睛前。身上那一件思量。這一件思量。怎能彀。便見娘行。有一段淒涼。說一段淒涼。

煞尾

淒涼。淒涼。忒淒涼。教俺和誰講。便教就見娘。也勾不盡相思帳。多應是相思價。

兒。今。夜。長。

宛轉之思縷縷如訴每讀一過令人神魂徘徊調卿評

爲顧寶雲作有跋

南中呂泣顏回

見面勝聞名。十郎一樣看承。郎之緣分。前生做下。今生花前月下。沒包彈。一對人。厮稱。覷冤家。這樣銷魂。其間事。怎得由人。

前腔

鸞衾。鸞枕。有人溫端的是嬌花細柳。輕雨柔雲。孤燈背後。一絲誓血微腥。幽期密訂。這雙心。兩耳親盟。証論奇逢。賽過雲英。論知音。說甚文君。

普天樂

任檀郎。心腸硬。沾着手。無乾淨。天生個天生。個有福張生。偏招注有眼鶯鶯。真心至誠。多應是鴛鴦牒。日下僉名。

古輪臺

歎酸丁。幾人能勾。傍娉婷。尊前幸得。偎紅袖。須判命。一對蛾眉。已該應。傾國傾城。況花韻鶯喉。香肌玉骨。微微眼角。上留情。怕的是。回眸暗覷。險些兒。勾攝人魂。便做道。今生今世。來生來世。生生世世。也願隨君。推郎命。從今一定。犯花星。

尾文

東風吹得楊花緊。意馬明朝報起程。待別却臨邛。又入茂陵。

顧寶雲生性多情。沾泥又起。琴心甫貼。復訂花盟。此番情案。幾令小玉占夢矣。予因以小詞投之。雖極言其花福之奇實。規之也。幸而白頭吟賦。司馬車回。然亦岌岌乎成薄倖人哉。自跋

雋美不可言。新思尖語。波委雲集。詞壇老宿。有袖手眼熱而已。但謂予薄倖。予則何敢。予爲沾泥絮久矣。正恐子野作天涯芳草耳。彥容評

相思

南南呂嬾畫眉

暗燈微雨。小窗紗隔。個簾兒。一樹花。猛然身子。覺寒些。把錦被烘烘者。怎麼錦。

被溫香不見他。

步步嬌

筆硯如今多拋捨。顛倒朝和夜。慌張飯與茶。勉強支吾。畢竟都魑魅。若不早見伊家。怕儂軀怎更支吾也。

山坡羊

一星星記伊頑耍。一椿椿記伊甜話。分明的人在天涯。捻空的浪把他模寫。模寫他依稀似得他。思量一徧又是模糊者。幾度嗟呀。幾番驚詫。因他眼睛兒常是花。爲他喚人兒多半差。

江兒水

恨殺風前馬。心驚月底鴉。算相逢應在芙蓉榭。到如今又早梅花大。怕差池更過清明屆。斬眼芙蓉重謝就。此際相逢怕憔悴。潘郎頭白。

玉交枝

了緣填債受冤家。千般苦來。痴心信却書中話。浪驚疑鵲噪燈花。不堪春草闌。

池蛙。怎禁寒食梨花謝。向雙星安排。兕他擁單衾。安排夢他。

園林好

我記你曾投鳳釵。你怎忘了曾偷繡鞋。料得你繡鞋還在。你怎忍便丟開。你直恁做人歪。

僥僥令

看看芳信假。點點淚痕加。海誓山盟渾當耍。怕有日神明計較他。

尾文

相思滋味如何也。似芳草無邊着柳花。看衣帶今朝又瘦些。

摹寫難摹情恍恍若畫正恐寫生家寫人皮毛未能寫人肺腸耳沈德生

贈薛小濤有序

夫艷魂不死每幻秀於蛾眉情種無根忽敷榮於綵筆所以文人手澤遇韵事而生花從來錦陣鉛華借才情而流艷小濤氏天付柔香人稱雋品

標韵鮮明似濯錦中流之錦襟期皎滌如娥眉半月之眉依然名士風流
故是胆豪神雋無媿美人本色堪稱骨細肌豐洗箏笛耳而學琴解傳幽
怨以草書法而作畫自寫春嬌鶯喉象板已絕唱於當筵月韵花妖直鍾
奇於千石蓋浣花溪畔有前因偏生姓薛想萬里橋邊曾寄跡恰好名濤
雖則無雙還堪作對云爾乙丑春半清和景和偶携歌扇扇桃花艷驚人
面共舉霞觴觴夜月醉死春魂枕邊燈下道人恐無此風情眼際眉頭吾
輩終當爲情死若非艷句填情誰信文心有錦用是短章寄意永令花事
傳疑長曲歌成而三生案定矣

南商調長相思

殢風朝。悶雨宵。就不關情魂已勞。鏡中人面銷。怨花飄。尋夢遙。況見多嬌心轉
焦。把一肩花擔挑。

二郎神

聞人道。你曾住成都萬里橋。把千古風流多占了。嬌紅韵粉。分明是一朵天桃。

却解語。佯羞含淺笑。添多少。酒懷詩料。人世少。是天上飛來花月之妖。

集賢賓

清明前後春正好。烟花欲妒春嬌。倒形得烟花。慙媿了。況花老。輸人年少。鞋弓襪小。伴着俺短衫烏帽。嬌嬈嬈。全不管窮酸餓眼偷瞧。

黃鶯兒

象板叶鸞簫。臉霞生。一線潮。酒容歌貌天生妙。有緣怎逃。無福怎銷。想卑人花命。該花報。雨雲朝。怕巫山夢裡。未必有這多嬌。

貓兒墜

阮郎憔悴早荒了。舊情苗。歎滿眼狂花零亂了。而今重把。艷魂招。人笑人笑。我花債多頭。老不相饒。

尾文

惜花心性多縈惱。不供養。奇擎不肯饒。怕這樣情痴就吾輩少。

絕世風流心口雙韻 汪子評

贈別和彥容作

南正宮錦纏道

慘。西。風。送。行。人。蘋。香。水。邊。一。晌。奈。周。旋。伴。離。觴。些。些。野。水。荒。烟。多。只。在。三。朝。上。
就。歸。來。也。渾。如。幾。年。怪。的。是。順。風。兒。緊。扯。伊。船。臨。別。又。把。衣。牽。這。斑。斑。的。是。緣。
何。淚。漣。要。伊。家。把。眼。看。須。記。得。區。區。爲。恁。這。盈。盈。望。眼。甚。時。乾。

玉芙蓉

相。携。越。可。憐。頃。刻。人。難。見。歎。明。朝。兩。地。又。還。各。天。前。宵。燈。下。看。挑。線。今。夜。床。頭。
裏。薄。綿。伊。言。道。匆。匆。便。還。願。檀。郎。莫。瘦。了。俊。潘。安。

山桃犯

辜。負。了。重。陽。宴。羞。殺。了。黃。花。面。霎。時。離。恨。重。重。見。花。鈿。翠。減。粧。案。粉。脂。紅。嫩。餘。
香。汗。破。題。兒。今。夜。無。眠。

尾文


只。因。悞。識。春。風。面。恰。是。前。生。夙。世。緣。這。度。分。離。好。掛。牽。


予與子野同受知 駱沆翁老師始幸識荆讀一家言稿苧城詩社以子野爲慧業文人也繼得讀諸詩詞雋韵幽情遺世獨立令人嘆服以爲神仙中人其傳諸宙合壽之百禩有必然而無疑者區區以帖括名世所以知子野者淺矣敢拈出以質之同志 諸公永評

情言娓娓悽愴纏綿真欲刺人心墮人淚使關馬再生猶未知孰爲瑜亮也 唐叔揚評

子野先生素與家君遊善憶余垂髫時猶得望見色笑每讀新詞輒知愛慕繕寫數篇秘爲帳中鴻寶茲幸覩花影全編如入五都市中珍寶臚列令人心醉目眩口不能言擬以錦囊襲之異香薰之盥手凝神而後讀庶不負予曩日愛慕初心云爾 唐迪畏跋

柔韵秀熨是詞林作家手 子念評





香豔叢書

第四集



香艷叢書

四集卷三

瑤臺片玉甲種下編

明 施紹華子塾著

東海黃公輯



夏景閨詞 有跋

南仙呂八雙調步步嬌

夢破秦樓簫聲咽。簾外如珪月。雕欄。卍字斜。茉莉初簪。點點堆堆雪。寶袜半痕遮。晚涼天一味兒。渾嬌怯。

山坡羊

度琵琶。纔彈又歇。壓秦箏。纔搗又劣。揷犀梳。纔拈又慵。照菱花。纔架又瑯瑤。跌趁流螢。新篁小徑斜。齊紈戲撲。扯淡還聊。且百合花殘。並頭蓮謝。咨嗟如何。信沒些傷嗟。如何夢沒些。

江兒水

記得歡娛夜。涼堂浴罷者。掩青團。共就荷亭月。那人兒。親自低聲說。月盈虧。我和你。無圓缺。誰料冤家惡劣。月缺重圓。偏我和你。常常離別。

玉交枝

尋思痛切。歹心腸。方纔覺些。鮫鮓曾把盟言寫。一行行。字脚兒斜。你當初。哄我十分呆。我如今。判個千般拙。我何曾。半點心邪。你枉人心。成何豪傑。

解三醒

不記得。分疼襯熱。不記得。翠擁紅遮。不記得。紫薇花。磴羅衣卸。不記得。海神爺。下場頭。看看沒半些。本分的。歡娛。逐旋。賒好虧心者。怎不把鞋跟。踏着脫下空靴。

川潑棹

偏是涼添夜。你醉平康。競狹斜。枉教人短歎長嗟。枉教人短歎長嗟。慘斑斑。腮邊淚血。儘包籠。忍耐些。有蒼天。知道些。

僥僥令

這恨難分說。全然好似呆。就是你鉄打心腸。真是鉄怕見了我恓惶也。多斷絕。

尾文

風流過犯難容赦。奈前世緣牽。又難放捨。只是等待歸來。把他生痛決。

粵自胡元北聲不勁。南音遂歌諸名家。誠不用沈約韵。亦未曾用中原韵。不過以聲音相近爲韵耳。自後生厭常喜新。而好爲苟難。乃極詆沈韵。而必宗中原。夫沈之被駁。以虞元等韵也。一聲不諧。遺議千古。況中原廢四聲爲三聲。上去入顛倒錯亂。至於如此。而猶可爲訓乎。五音出於五行。五行有金木水火。而土寄位焉。所以四時有春夏秋冬。而土寄旺焉。然則五聲之爲四聲。自然之理也。廢而爲三。是爲何說乎。將四時亦缺一而可乎。且平上去入。隨聲自叶。乃天籟之自然。如天腴腴鉄欲少一聲。不得欲多一聲。亦不得果如中原韵所云。將至腴字竟止矣。可乎。不可乎。甚矣中原韵不韵也。要是胡元入主北聲。亂華剛勁乖劣。幾不成響。周德清乃因其舛謬。著而爲書。令人知胡元某字。即中華某字。

聲音雖有不同而真是卒不可混六經音義由此終天不泯此德清之苦心當諒之聲响之外者也安得不以意逆志反以鵠舌爲師而非毀先賢哉故予嘗謂中原韵爲攘夷功臣而亦爲賢智戎首揭帖韵尤爲乖戾予極恨其詭窒右詞偶戲爲之不過嚴于用韵以苦難筆墨耳敢不大伸正論爲詞林護法也哉自跋

揭帖韵極難工此却洒然至於入情深至構語秀特尤見名士風流子還評

癡愁嬌怯宛爲佳人寫炤擬其姿韵所謂意似近而既遠若將來而復旋者耶韓有一評

感亡妓和闇生作有序跋

張九娘名冠烟花些些多罷顧三郎筆揮珠玉字字可憐說淒涼則生前死後惱心腸無可奈何道微悟則影外身中這面目似曾相識十年痴夢總是無何有鄉滿眼花畢竟非安頓處古今是一紙休書諧老的夫妻

還假人世乃千場戲本裝成之脚色原非閻王勾魂帖來時躲在何處太
上陽生符眼前活得甚人今朝之愛種情苗白日見鬼後日之妖狐硬鹿
青塚良朋請看紅粉如花到底恩情在否好戲綠雲埋土如今冤債填無
蓋惟其假合所以真離若要破機關休開情竇用是續調于詞仙庶使破
情于夢蝶

南商調二郎神

煙花夢到今日因緣一旦空粉債花魔閒打哄從今以後春花夜月秋桐那個
是當年人面孔空剩粉遺香荒塚風流種分付與春老啼鵲一陣東風

集賢賓

持行姊妹悲遠送須臾換白穿紅但水次新添一個塚早又被路人說動描情
畫籠黃泥裏些些何用真沒用一任那老鴉調弄

黃鶯

縈網破窓紅舊穿衫衣架東可憐猶是衣香重容銷鏡銅鞋空綉弓梅花帳底

人無夢。隅花叢。鸚哥喚你不見你開籠。

貓兒墜

千年長夜春夢了。殘鐘桃李無言。歲歲風牛羊。踐踏耍頑童。杉松好一個。膩粉濃香。斷送其中。

尾文

可憐一覺烟花夢。仔細思量。何用休把你愛子情苗心上種。

閨生詞云。鸚哥不見空架掛。廂東予曰。鸚哥喚你不見你開籠。此語更使人悽然也。九娘朱顏皓齒。花韵鶯喉。種種可憐。予一見銷魂。頗有倚玉之意。而幽期一悞。竟不重來。不一月已爲商人婦。更替月而綠陰生子矣。且竟坐是死矣。紅顏薄命可痛。可惜爲填誄詞。作他生緣耳。自記
花貌棘心千古薄命。閨生云。年來年去白日老。青銅子野云。千年長夜春夢了。殘鐘皆可憐。句也。馬東籬百歲光陰。應謝不敏。彥容評

風情和彥容作

雨中呂駐雲飛

腴腴。透。巡。慣。向。人。前。賣。至。誠。畧。把。欄。杆。凭。留。下。弓。鞋。印。親。道。你。是。逢。迎。又。未。知。
心。性。且。按。納。痴。心。花。下。潛。身。等。一。陣。風。篩。花。露。冷。幾。陣。衣。衫。風。露。冷。

前腔

等。個。黃。昏。躲。在。沉。香。六。角。亭。大。胆。握。身。進。他。並。不。來。睺。問。親。你。是。俏。人。人。該。做。
些。身。分。着。實。假。他。畧。畧。蒙。回。應。道。偏。是。冤。家。慌。得。緊。偏。是。酸。丁。饞。得。狠。

前腔

夜。半。三。更。人。在。衾。窩。喚。小。名。夢。裡。輕。輕。應。所。事。頻。頻。問。親。兩。意。軟。而。溫。枕。頭。作。
証。驚。耐。春。酣。柳。耐。風。兒。緊。眞。是。蕭。娘。心。性。穩。還。是。蕭。郎。心。地。忍。

前腔

悄。悄。冥。冥。偷。啟。南。軒。小。角。門。送。出。蒼。苔。徑。犬。吠。花。兒。影。親。低。囑。兩。三。聲。心。期。重。
訂。句。值。千。金。白。地。容。支。領。莫。道。書。生。是。薄。福。人。豈。敢。蒙。恩。做。薄。倖。人。

沈青門睡窻絨率多此體少白旣已屬和予復爲之效顰今得子野作

如村姑里婦見毛嬙西施自覺掩袂無色請一切抹殺彥容評

摹寫曲盡比西廂月下佳期折似猶有未到處五如評

贈人有跋

南仙呂八雙調步步嬌

一自匆匆相逢後配定鴛鴦偶霞箋燈下修倩做媒人畧展偷花手字字淚花浮摺成方勝同心咒

山坡羊

盼藍橋瓊漿未籊署河陽花星未偶寡臨叩命抵楊花病文園人比黃花瘦要圖他鴛配共鸞儔判教使盡使盡機和穀嬾向茶前愁添酒後難休似引線風箏怎肯休難丟似上釣魚兒怎肯丟

五更轉

喜相逢朱明候載卿卿一葉舟相携素手素手當胸扣只見清盼流波輕顰低岫一時問忙了心和口幾回錯喚錯喚名兒謬當不起臂暈雙鬢香沾羅袖

園林好

住蘭橈尋芳小洲。印弓鞋苔前半鉤。早把香茵蹴皺。花落處。露釵頭。花密處。溜釵頭。

江兒水

小步金蓮困。清歌玉版浮。軟嬌嬌楊柳和腰瘦。熱惺惺。檀紐蓮心扣。淡暖秋水和眉皺。把俺骨髓春風熏透。兩袖雙籠。只覺臂環頻溜。

玉交枝

秦樓楚岫。儘風流齊肩並頭。枕前親解芙蓉扣。猛撩人被底鞋勾。夢回窗外鬼痕收。微微香噴金猊獸。喜今宵書生志酬。怕今生娘恩未酬。

玉胞肚

佳期迤逗。恰相逢驪歌馬頭。鴛鴦湖瀾瀾孤飛。姑蘇臺雲雨凝愁。只見遠山疊疊水悠悠。人在天涯無盡頭。

玉山頽

分離未久。淚珠兒何曾暫休。好姻緣。今在天涯細思量。早向眉頭。般般得愁守。幾個黃昏時候。白鷗飛抹處。見伊舟。把離恨從前一筆勾。

三學士

當日裡分飛渡頭。誰承望聚首樓頭。重將張敞眉親畫。手把韓家玉再偷。鴛枕夢回初月上。人俱在小雲兜。

解三醒

忘不得燈前命酒。忘不得花底藏鈎。忘不得枕邊字字同心咒。忘不得惜嫩憐柔。忘不得殷勤親把香囊繡。忘不得含笑頻回扇底眸。些些有把些些恩愛記在心頭。

川撥棹

結得姻緣就。這門就直到頭。儘熬他別恨離愁。儘熬他別恨離愁。終有日蘭房畫樓軟心腸。分外柔慢工夫着意守。

嘉慶子

早見朶朶蓮花謝小洲。又見新筍成班粉淚流。那人兒何處淹留。也應須粉怨紅愁。病染相思甚日瘳。一分兒眉上頭。十分兒心上頭。

饒饒令

青鸞應有匹。丹鳳豈無儔。我你海誓山盟。須着手笑殺那妒風流。巧舌頭。

尾文

從今耐着心兒守。直到成雙始罷休。不枉了一樣心腸兩處有。

予幼有所惑。相聞未見。便挑以小詞。不知作詞人爲何如面目也。越三日。始往訪焉。正如榮陽生墜策時相對恍然。更十餘日。乃以一葉載之。往來東西二余。及天馬細林諸山中。未幾。遂有金閨構李之別。莫樂之。新知翻成莫悲之。生別情至。文生不能已。已因綜其事。以長言寫之。雖詞不甚工。然情案不可不存也。自記

此非綺語。當是慧業。歎嬌嬌楊柳和腰瘦。等句。正元詞所謂通身旖旎。徹膽風流也。比西廂。嚶嚶鶯聲。花外轉。更爲警策。彥容評

此予少作也但媚中欠老耳至其尖秀處亦自不俗

又自記

集彥容舟中時蘇王二姬在坐有序

季春八日風日和美彥容乃折簡招賓攜樽命妓若蘇若王皆松之冠也彥容能使之來且能使之不去其爲絃管尊疊生色多矣是時雨過燕忙芹肥水香乃放舟中流隨潮上下每過樹則綠不見天逢花則紅欲妒面兼之遠山如眉岸草若帶池春甫萍小風微波而浴鷗出沒如與人戲此時之樂不言可知也未幾月上詞客影亂而琵琶按拍猶未慵休客有欲醒不能辭醉不肯者古稱佳人可以奪命不已信乎嗟夫吾輩於白駒隙裏偷取百年如此勝會自算有幾若不紀以筆墨恐又作夢中花耳聊寫數言情境未露正如畫家粉本畧得其梗槩也癸丑季春十二日且閒亭

識

南商調金索掛梧桐

江潮雪賺堤岸草煙鋪地綠柳陰中撐個船來至詩筒和酒卮更歌姬浪用春

光好似泥好山留我從教住啼鳥催人未許歸春滋味一觴飛罷一觴飛只見
酒暈蛾眉酒污羅衣眞寵柳驕花隊

前腔

郎情色眼饑妾貌花心忌一對尊前默默團歡喜清歌隔水西日低時煙裏山
光晚更奇船爲歌舞攢排處岸是煙花簇就的歸還未前村樹裡酒旗低索要
爛醉如泥再典春衣共了理春生計

前腔

船如一葉飛人似雙花倚自由人醒也渾如醉春香透玉肌撲微微畧嗅教
人也是迷支持郎眼千般媚更襯起春光一倍奇如何說除非沉醉可酬伊須
知道醉聽新詞醉擁名姬就醉死誰迴避

前腔

看看月上時對港將船刺再洗尊疊供奉多能事紛紛醉拂衣鬪琴碁楊柳梢
頭月漸低晚粧換了逾精神細韻生時半忬怩迎如避豔歌淺笑總相宜只

見客要辭歸。未肯辭歸。醉又到醒田地。

秀艷如花新裁似錦。摹情寫景宛轉入妙。可謂極文人之致矣。君泰評

秋閨

南商調二郎神

西風裡。這一對愁眉。越慘。悽。屈指光陰能有幾。與他別後。又早是木樨開矣。幾次曾將書寄伊。爲何的伊書不寄。朦朧地。可下得紅樓。十里有個人兒。

啄木兒

非伊歹。我命低。嫁做風流蕩子妻。他只管賣弄青春。却誰知我玉容憔悴。春山不似當時翠。秋波渾改前頭媚。怕這樣容光怎見伊。

三段子

當初問伊。這芳春如何別離。他的性痴。說今年多應未歸。恩情似海無窮際。可能瞧得能容易。帶上同心也怎生忘記。

前腔

玉孫路迷。老靡蕪天涯。馬蹄金風又淒。刺鸞針閨中授衣。看看又做冬生計。寒衣好倩誰人遞。把眼底思量。做夢中歡會。

滴溜子

此日裡。此日裡。愁伊。恨伊。何日裡。憐伊。惜伊。共在夜香深處。西窓密語。時指着花枝。教覷花開出去。怎直到花老。纔歸。

尾文

佳期未審何時是。日日江頭盼望伊。只怕花老依然人未歸。

怨而不怒哀而不飲傷其國風之遺乎 公選評

別石城羅采南和彥容作 有序

彥容素豪俠。不善飲而喜看人飲。酒不好色而喜遊戲。聲妓然未免一二染指者。近歲好道幾平木鷄。今年予善病半載。不相見。謂彥容真沾泥絮矣。適金陵歸。出小詞相示。是又何爲者。吾擬規之。但其詞麗婉絕倫。予既不忍不和。而使多作藥語。予又不得爲韻人。故依其聲和之。而寓吾意于

末或者檀板敲殘兩耳聽熟聽至卒章忽進一步一切色膽其當下空花
乎雖然規者百之一順者十之九未必無益或正有損人將曰抱薪救火
火益熾吾將曰長君之惡其罪小

南商調字字錦

勾。消。宿。世。緣。撞。見。風。流。臉。如。何。不。愛。他。宮。扇。和。羞。掩。可。憐。人。曾。見。萬。萬。千。千。
千。个。不。似。伊。家。可。憐。誰。知。緣。慳。分。淺。枕。邊。人。兒。水。邊。方。纔。水。邊。看。看。天。際。遠。把。
一。對。共。巢。鸞。做。一。對。各。天。鴛。好。个。淒。涼。你。俺。你。還。須。念。俺。你。還。須。念。俺。今。宵。那。
裡。山。山。水。水。風。風。雨。雨。况。又。是。思。思。想。想。愁。愁。悶。悶。痴。痴。指。望。夢。中。相。見。

不是路

路。遠。天。綿。漸。不。見。人。兒。只。見。船。况。船。不。見。他。芳。心。一。片。在。江。南。是。何。年。翠。幃。香。
裡。重。酬。願。錦。繡。叢。中。再。插。肩。君。休。看。滿。江。煙。水。和。離。眼。怕。倚。欄。一。徧。憶。人。千。徧。

鵲踏枝

吾。鄉。遠。日。頭。邊。吾。鄉。遠。日。頭。邊。便。有。信。也。難。傳。賓。鴻。也。待。明。春。轉。從。今。去。從。今。

去。一。日。兒。三。年。真。个。是。要。見。他。也。難。要。夢。他。也。難。耐。蒼。天。不。行。方。便。偏。生。的。
風。順。開。船。

尾文

郎才女貌人中選。配定前生夙世緣。只怕世上空花一斬眼。

宋元人填詞每用疊字乃祖文選諸賦體也李易安聲聲慢云尋尋覓
覓冷冷清清淒淒慘慘戚戚西廂記云悄悄冥冥潛潛等等待那齊齊
整整孌孌婷婷姐姐鶯鶯趙明道云燕燕鶯鶯花花草草攘攘勞勞多
多少少媚媚嬌嬌亭亭孌孌鸞鳳交沒下梢空耽了些是非非受了
些煩煩惱惱又云他風風韵韵艷艷妖妖月月朝朝雨雨雲雲喬夢符
云鶯鶯燕燕春春花花柳柳真真事事風風韵韵嬌嬌嫩嫩停停當當
人人徐甜齋云山山水水詩詩酒酒古古今今若此之類不可盡述然
以填南曲更難子野則云今宵那裏山山水水風風雨雨况又是思思
想想愁愁悶悶痴指望夢中相見俊舌巧心宛似神工鬼斧正貴耳集

所謂公孫大娘舞劍手矣 查容評

春閨月夜

南商調集賢賓

珠簾半捲。窺月明。照珠箔。銀屏冷。浸樓臺。高下影。轆轤院宇。沉沉鴉棲不定。怕要睡。花心難穩。人寂靜。粉牆上一線痕生。

啄木兒

登樓望。傍砌行。恰是疎鐘第一更。倚欄杆。學曲奏箏。猛照出隻身另。記當年曾把雙肩並。正花梢牆角。蟾生暈。笑拔下金釵賭雨晴。

黃鶯兒

音信未分明。說來的欠個真。空教人向嫦娥問。問他幾聲。何曾應聲。多應合受淒涼運。笑痴心。嫦娥今夜早也悔長生。

貓兒墜

晚粧初罷。和月坐彈琴。舊曲離鸞入手生。淒淒楚楚一聲聲。薄倖怎的負此良

宵一刻千金。

黃鶯兒

小妹袖籠燈。喚燒香。禱月明。沉煙一縷迷花徑。輕輕訴聲。欲言又停。隄防小妹乖心性。沒心情。低頭無語。長歎兩三聲。

貓兒墜

隔花深處。小犬逗金鈴。吠過沈香六角亭。秋波斜泥認誰人。何曾無過柳影。花陰露滴三更。

尾文

遠將舊事從頭省。曾在碧桃花下等。今夜花空篩月影。

春月如珪。殘花委露。金缸微明。繡戶半扃。當此淒其。能無悵惋。被詞仙一一譜出。宛似兒女語。小窓中。幾令蘭畹。不香。玉臺失豔。妙絕。妙絕。查

容評

惜別和彥容作有序

彥容具吾輩眼力其于水玉眷戀可知且水玉亦以茂陵屬彥容矣不
意爲有力者先得彥容爲之動心形于言色予謂大凡情事不可不合
又不可不離譬如豚羊之屬日在口頭幾于嚼嚙何如江珧熊掌不可
致之物常使人得之想中爲無窮味也乃綴小詞極道想中味曰請君
消受

南仙呂入雙調步步嬌

眼。際。人。兒。分。離。了。這。別。如。何。好。恩。情。沒。下。梢。恁。樣。前。程。夢。裡。誰。知。道。放。了。又。心。
焦。猛。擡。頭。總。是。相。思。料。

醉扶歸

生。巴。巴。拆。損。姻。緣。號。眼。睜。睜。擷。翻。彩。鳳。巢。情。知。你。別。後。准。思。量。鎮。爭。如。也。不。分。
離。好。從。今。月。夕。與。花。朝。怕。悲。歡。兩。地。空。猜。料。

皂羅袍

多。只。爲。伊。花。貌。循。章。臺。做。了。恨。種。愁。苗。蕭。郎。從。此。路。人。瞧。小。名。把。做。真。真。叫。楚。

天雲外秦樓自高。檀郎身畔餘香又消。看看就裡無消耗。

好姐姐

當初也愁便拋。就分離。分離。忒早一場花事。頓做了水面蘋。痴心料除非判死期。秋廟或者乘機守渭橋。

香柳娘

記伊家去時。記伊家去時。簇芳藤。轎粉腮。珠淚紛紛掉。又牽衣幾遭。又牽衣幾遭。細語絮叨叨。定要郎知道。你從今去了。你從今去了。留下淚。鮫鮓越看越煩惱。

尾文

朱門一閉。青春老看是分離。又兩宵。今日明朝。怎麼好。

情幽微語尖秀墨氣雲流隨處散彩

德生評

贈人有序

花夢覺來無夢心。禪了處皆禪。忽然遇着旖旎花。乃眼前花耳。偶爾賣弄。

文字禪亦嘴頭禪乎

南南呂嬾畫眉

尊前。瞧見。那冤家。頭一個。風流。定數。他水晶簪子。插梅花。忒煞。撩人。價斜刺裡。剛剛。覷着。咱。

賺

暈臉潮霞。就害死相思。有甚差。溫甜話。端詳。句句。綻心花。可憐他。粧弄。脂粉。嬌難畫。韵做心腸。性好。拏相逢。乍他。佯羞。不揣。還相。迓掉。他不下。閃他。不下。

皂角兒

穿一雙花幫繡鞋。簇一團着人溫。擗把風流。盡數收來。颺愁煩。要人牽掛。我本是。夢餘花泥裡。絮病相。如慵內翰。也有些。魍魎。銀河咫尺。何年泛槎。肯許我。桃花渡口。飯否胡麻。

尾文

道人也說風情話。豈是情痴未醒耶。便算做情痴。題寄者。

道人也說風情話。正王辰玉所謂豪傑簿上寫相思。神仙眼裏滴紅血也。從來有根器人。每於粉黛叢中認取本來面目。不知者便以爲火宅矣。眉公記

韻人作俊語。自然字字韶令。若第強作解事。恐未免帶學究氣。文人氣耳。君深評

有寄

南仙呂桂枝香

支頤獨坐。支筇獨步。不晴不雨時。光不癢。不疼。情緒。你文君寡居。俺相如著書。奈滿地落花飛絮。況滿眼暮雲春樹。寄雙魚。你肯償花債。眞予美。俺不負心期。是丈夫。

賺

也者之乎。難道中間一件無。且把痴人做。安排眞正做兒夫。抱妍姝。繡幃錦帳。重重護。解下香羅。見白玉膚。親夫婦。揮毫自把催粧賦。俺此心纔足。此心纔足。

長拍

曾向燈花。曾向燈花。傾心暗許。從此花枝有主。設盟設誓。寫心言親記圖書。並不厭寒儒。怎使俺這幾日相思受苦。似口嚼黃連沒處吐。怕苦盡甘來還是虛。空教人打卦與占課。竟不知鴛鴦號牒裡。命福何如。

短拍

俺是文冤。俺是文冤。伊真花祖。得成雙是美玉沾諸。何用更踟躇。第一個痴人是汝。第二個痴人是我。怎生的花事模糊。

尾聲

媒人也不得閒張。主自把衷腸自說。與待他日成雙。做折証符。

直如白話自記

凡詞中用疊句極不宜耳。根桂枝香應用兩疊句。今予改爲二駢語。雖與舊似譜訛。然於音律實協。當不見訶於詞林也。卷中有祝如姬詞。越恁好疊句。亦已改去。大荒中有修月戶予便爲人世間修詞手。不亦可。

乎又記

幽期有跋

南南呂香遍滿

蟾。勾。起。影。花。陰。悄。然。門。已。扃。把。指。彈。彈。揮。不。應。弓。身。潛。自。聽。輕。輕。嗽。一。聲。回。頭。
怕。有。人。閃。過。茶。蘼。徑。

嬾畫眉

香。風。一。陣。觸。人。心。忽。聽。得。東。角。門。開。猛。一。聲。看。他。剗。襪。下。堦。行。未。敢。高。聲。問。怕。
色。眼。昏。花。認。錯。人。

二犯梧桐樹

嬌。痴。不。肯。行。蹙。殺。檀。郎。命。似。朶。仙。花。到。手。還。難。近。殷。勤。陪。笑。深。相。倩。告。訴。娘。行。
可。惜。教。人。守。二。更。看。他。兩。眼。全。迷。暈。教。道。先。行。怕。前。面。人。來。不。穩。

浣溪沙

芭。蕉。做。裯。書。囊。做。枕。會。風。流。一。對。知。音。窮。酸。餓。鬼。貪。春。甚。把。玉。洞。桃。花。味。細。尋。

魂不定。只見那一雙兒。花下影。看看髻亂釵橫。

劉潑帽

風情今夜纔親領笑。從來口說無憑。擷掀風裏楊花緊。口問心。莫不是神仙境。

秋夜月

低低訴聲。是奴命應招恁。一自相逢。憐奇俊。時時只怕無奴分。到今夜勾消。方纔是意穩。

東甌令

合拜跪告卿卿。可是伊家沒眼睛。花枝倒有卑人分。許我和香寢。安排一片至誠心。盡付海山盟。

金蓮子

轉花陰。弓鞋小不支花徑。行不動。郎心憐甚。直送到轉迴廊。又惺惺絮語進朱門。

尾文

門。閉。了。仍。孤。另。空。齋。衾。枕。冷。于。冰。從。教。不。睡。到。天。明。

沈青門有寶欄杆十二玉亭亭之闌適在柳上客有酷稱其幽豔者余
不勝心熱姑妄言之不覺直欲奪沈之坐時坐客十餘人大聲呼妙爭
取予稿予乃人書一通猶是爭攘不已有一友兼得四帋有四人不得
一焉自記

麗情不難淫豔而難於不俗青門詞非不豔絕而中間親親氣命等語
幾堪噦人矣於此可知二詞優劣

公選評

摹寫曲盡波瀾無窮子野久已聞道如此綺語亦應懺悔

妙喻師

舟次贈雲兒

南商調二郎神

春。雲。卷。看。冉。冉。飛。來。逐。水。仙。曾。記。襄。王。宮。裡。見。輕。盈。膩。滑。最。堪。憐。似。玉。如。綿。忽
一。陣。輕。風。生。暴。煖。早。添。上。暈。霞。如。線。情。性。軟。抵。多。少。花。間。嫩。雨。輕。烟。

集賢賓

珠簾不捲。春夢遠。撩人燈下。屏間霧帳。霞衣餘淚。辭有多少。煖恩柔怨。香添寶篆。早錦被浪花紅亂。重檢點。好記取八字庚年。

黃鶯兒

端的是奇緣。謝娘行。肯見憐。野蜂也得偷花片。怕的是。今宵枕邊。明朝路邊。路傍人。彷彿簾中面。就雁書傳。空題再拜。各自在遙天。

貓兒墜

檀郎羅袖。親得藉香肩。常嗅餘香。聊自遣。朝雲夢斷。楚山前人。天怕從此相思。天上人間。

尾文

何因借得春風。便吹送春雲。到枕邊。說與他。委實相思難過。遣。

醉死香魂銷沉。豔骨風流。蘊藉絕世無雙。

君泰評

決絕詞 有序跋

予舊有情緣。幾拼命死。不謂恩情中道棄絕。深杳無垠。莫測侯門之海樓。

遲難再誰回陌上之車想鸚鵡之在雕籠時常話舊歎了香之圍綉幄歲
結愁新入夢相逢誰知逢處是別驚鴻待信翻嗟信裡堪疑一襟血淚空
留下黑心之符十院燈魂終無望黃衣之力蓋歡隨事去春與人歸但臨
風而歎奈何空銷魂惟別而已只應義命自裁切莫更尋舊夢縱有因緣
爲崇也須直待來生雖負心薄倖似非烈丈夫所爲而守禮閑情豈作兒
女子之態用是屬句瀾翻竊欲命決絕殆莫可誰何而爲是言亦不能無
恨而託綺語也

南正宮普天樂

我才名伊風韵天付與休謙遜只爲我柳苦花辛拖帶你香愁玉損夫妻兩字
兀是名不順使俺一對鴛鴦無投奔你非干負義忘恩俺非干拋脂戀粉却緣
何劈雨分雲

雁過聲

當初你肯我肯就生死終身願跟誰知一語風霜緊怨誰人恨誰人這其間長

短再也休論。俺從頭自忖。青樓薄倖。誰甘認。只休埋怨別人兒。權自忍。

傾杯序

傷神吐甘。甜食苦辛。脉脉自心頭印。想初見。如水逐漸添溫。到熱沸如盆。你便心允。這其間。可有你的恩情。俺的辛勤。到如今。你的眼前身畔。換何人。

玉芙蓉

親他不可親。丟你心難忍。把前情想起。耳聾眼昏。幾番拚死。是心頭忿。尙勉強偷生。爲舊日恩。前生債。今生事。翻指望。後世因。笑姻蹟。倒仗那癡靈神。

小桃紅

收拾你殘脂粉。留下你金蓮寸。把花箋手蹟。常描潤。向衣巾淚漬。時瞧認。記生辰。八字推花運。多只是扯淡殷勤。

尾文

告蒼天。須幫襯。但願你鴛鴦睡穩。我甘認。蕭郎是路人。

吾人未免有情。誰能甘自菲薄。况誓海波乾。盟山石爛。彌天怨氣亦復。

誰能堪此雖然發乎情止乎禮義此學究之言也然於此可得補過法緣至則合緣盡則離此因果之說也然於此可得忍情法豈應妄求無厭爲風流罪人哉予此番情案悠悠成夢境矣每一念至氣盡魂離而義命兩言時舉爲藥所不至於沉疴痼疾者於此得力多也小窓暇日偶檢古詞見四時歡一闕乃按其譜律特製右詞誠思守禮閑情竊欲因文見志云爾後之覽者勿以予爲薄倖人若云薄倖則當有分任其咎者矣庚申月夕秋水庵重題 自跋

字字嘔心當亦有心可嘔耳子野信情種哉彼云守禮予曰多情多情而能守禮益難然則子野真可謂守禮君子矣 湛生評

有懷

南商調黃鶯兒

獨坐小燈前。想人人在那邊。依希天遠人還遠。愁和病煎。雲和雨緣。隔牆閃個芙蓉面。暗情牽。丟他不下心上與眉尖。

前腔

只有影相憐。近三更。人未眠。與他分得相思半。藍橋玉仙。巫山夢緣。終須捨賜些方便。夜如年。今宵過也。明夜又怎流連。

前腔

再想一回看。那人人。實可憐。些些是俺親。瞧見雙彎忒尖。雙鬢畧偏。連嬌帶嫩。和愁怨。告蒼天。如成就也。情愿把命兒拚。

前腔

想下萬千千。問伊家。憐不憐。怕他們忒看相。思賤眉頭也攢。心頭也酸。當初悔識春風面。問蒼天。鴛鴦牒裡。端的有幾分緣。

秀逸不陳瑞齡評

(完)

閨律小序

昔陳文簡公作妬律比附精當字挾風霜設閨閣中盡能讀此不必食鶻鷃之肉而妬疾全消矣惟羅織太深不爲彼美少留餘地使周婆制禮當不若是昔人謂妬極是情深真溫柔鄉閱歷之語彼聞誦洛神賦而自湛因歎美而斫桃花樹者此種痴情深入骨髓可笑亦可憐也或男子日游俠邪沈酣聲色變僅嬖妾粲列成行爲之妻者若越人視秦人之肥瘠漠焉不加喜戚於其心妬則否矣抑何情不相關乃爾耶予反其意作閨律若干條於錦衾角枕之旁寓讀法懸書之意所以保全男子一片婆心非敢爲胭脂虎傳翼聊爲薄情郎作炯鑑耳道光乙巳天孫渡河之夕芙蓉外史識於眉月樓

作閨律成自題絕句四首

判事何曾習五花但憑游戲作生涯
閨房解讀申韓律巾幗人人號法家
公案新翻比附真玉臺明鏡淨無塵
爰書一例歸平允應勝琴堂折獄人
形影都歸約法中士師權畀綺羅叢
一條柱杖雙行燭多少男兒在下風

不妨制禮代周婆議罰休嫌左袒多千古美人齊下拜買絲爭願繡蕭何

閨律

芙蓉外史戲編

吏律凡七條

一凡青樓女子。無論色藝若何。概不准來往。違者照官員私通外國例。杖一百。發外房門。充當苦差。

判曰。鳳子尋芳。易入迷香之洞。鴛兒愛鈔。輕拋買笑之錢。一登歌舞之場。遂陷風流之陣。章臺柳任人攀折。大隄花惹爾顛狂。須防惡疾纏身。冉伯牛空歌芣苢。最恨窮途落魄。鄭元和竟唱蓮花律。以通寇之條。允當眠香之罪。杖懲既決。戈荷難寬。磨玷有期。賜環不吝。

一凡男子有事出門。歸家以日暮爲限。踰時不至。照違限例治罪。若未經稟白。留宿他所。先杖八十。再問有無宿娼情弊。審實另擬。

判曰。花間短晷。盼盡金烏。樓上寒更。燒殘銀蠟。妾向空閨。待燕郎如歧路。亡羊悔將羈鎖。輕開。遂使樊籠。巧脫。試問紅樓。捉醉。何處追歡。且言翠被。

薰香。誰人伴寢。楚岫之間。雲暗度。秦臺之明鏡。高懸。既貪良夜之游。合聽公庭之讞。供如不實。法定加嚴。

一凡遇閨人譴責。不得遷怒小鬟。違者照虐害平民例。答八十。罰跪一炷香。

判曰。唾面自乾。豈復有丈夫之氣。翻羹不怒。亦斷無宰相之懷。乃我方獻其箴規。而彼反遭乎箠楚。秉性依然。拘執借題偏易。發揮身辱泥中。畢竟伊。懼。何。罪。肉。登。几。上。豈。容。郎。虐。無。辜。徒。因。逆。耳。之。言。故。作。劇。牙。之。勢。薄。懲。不。貸。長。跪。笑。辭。

一凡與閨人聚處。不得嗟聲歎氣。作種種不悅之色。違者照誹謗朝廷例。杖四十。罰獨睡一個月。

判曰。紅窺簾隙。初開燭忿之花。綠滿階前。新種忘憂之草。大抵閨房之地。宜多歡樂之思。有何心事難言。惟見眉痕長皺。豈爲鶯啼燕語。惱亂情懷。無非楚館秦樓。牽連愁緒。腹應暗誹。嫌儂拘禁之嚴。翼果能飛。任爾遨遊之便。不須研鞫。徒飾虛辭。決十杖而示懲。請分牀而各夢。

一凡遇閨人責罰婢女。不准代爲乞免。違者照屬員請託上司例。杖四十。卽以該婢應得之罪罪之。

判曰。摧花折柳。儂豈甘心。惜玉憐香。郎何情重。倘念嬌肢費力。不妨代我揮拳。怎當怒氣填胸。輒欲爲伊緩頰。護身符巧。爲遮飾覆盆。冤轉替呼號。毫無皮肉相連。何關痛癢。只覺心腸太軟。慣發慈悲。乞寬解網之恩。恐有同衾之好。諒甘身代。難狗情私。饒舌可憎。扑臀非枉。

一凡男子外間有事。不能陪侍閨人。一日湏至閨中起居數次。違者照無故不朝參公座例。答四十。拘禁內房一個月。

判曰。影隔翠幃。已等山遙水遠。身踰閨闥。便同雁杳魚沈。旣違共食之常。兼失問安之禮。縱談有客。難教鸚鵡呼君。獨繡無人。只賸狸奴伴我。可惜香圍翠幃。蜂慣離衙。緣何燈炮銀釭。燕纔歸壘。比擬朝參之失。允符吏議之公。加以拘攣。申明法度。

一凡婢女分食糕果。不得從旁乞取。違者照簋盞不飭例。姑免答責。罰銀二兩。

充公。

判曰紅梨白棗。羞分奴輩之甘。賸餅殘糕。恥作乞兒之相。豈是清饑莫解。不禁流涎。並非異味難嘗。也思染指。徒貪譴浪。願食嗟來。雖飢渴之常情。亦風流之小過。倘使分羹。示惠易起。黏花惹草之端。如其與塊蒙慙。定學紵臂牽衣之狀。既官箴之有玷。宜闔法所難寬。刑杖姑饒。罰鍰休緩。

戶律凡六條

一凡閨人遇事他出。或留婢女在家。看守房屋。不得乘機引誘。違者照搶奪良家婦女例。加一等杖八十。枷號外房門一個月。

判曰荆蠻跋扈。常存問鼎之心。陽虎猖狂。時作竊弓之想。徒以扞擻之密。難爲寇盜之乘。乃儂因留以巡營。纔可離夫戎帳。而郎已勇於挑戰。竟思挾彼重關。事悔疏防。罪難曲貸。侵邊有禁。那容函谷偷開。專闔獨嚴。不許陳倉暗度。褫褫重責。囊木加刑。毋使息肩。庶期革面。

一凡婢女在旁給使。不准語言戲謔。眉眼傳情。違者照拐騙人口例。杖八十。罰

跪一炷香再聽發落。

判曰。弄月嘲風。怪爾言多輕薄。撩花撥柳。禁他性不顛狂。慣來鸚鵡窻前。戲攪游語。怕向櫻桃樹下。密訂私期。縱非有意。留情亦覺旁觀。不雅莫謂。偶然調笑。个男兒盛德無傷。湏防從此。纏絲小鬼頭。春心亦動。剝膚自取。大杖難逃。屈膝誰憐。瓣香應奉。

一凡親戚年輕婦女往來。雖准其相見。然宜引嫌離坐。不得挨近身體。恣意談笑。致生事端。違者照強娶有夫婦女未成例。杖八十。枷號外房門一個月。

判曰。朱鳥窻前。原不禁劉楨平視。青綾幃外。亦堪共道。韞清談。惟是禮別巾櫛。豈可揜裳聯袂。何況嫌多瓜李。那容浪謔狂言。雖然彼美堅貞。自切投梭之拒。只恐個人佻達。妄邀解佩之歡。隨身未及周防。出語總嫌唐突。合褫衣而重責。并荷校以示懲。

一凡閨人妝奩中物。如釵環釧釧搔頭約指之類。概不許私自送人。違者照偷盜倉庫例。撥一次。敲八十。原物追還。

判曰。鏤鳳雕龍。鈿盒是定情之物。嵌珠點翠。簪環多賠嫁之資。倘逢沽酒留賓。金釵願拔。那許借花獻佛。彤管私貽。因爲雜佩之投。來作大弓之竊。奩開碧玉。錢訝蚨飛。箱啓翠雲。杯疑羽化。探丸自得。祇圖揮霍之豪。胙篋偏工。豈任慢藏之咎。事同蠶食。律並鼠偷。聊示薄刑。責歸原璧。

一。凡庭前雜蒔花卉。祇供閨人插戴。不許折贈鄰家姊妹。違者照糜費錢糧例。拶一次。敲四十。原物追還。婢女傳送并罪。

判曰。采蘭贈芍。無非鑽穴之媒。報李投桃。總是踰牆之漸。自會眉邊染黛。何須錦上添花。任他淡淡梳妝。豈干卿事。要爾紛紛餽送。去助誰嬌。思憑滿苑芳菲。暗遞隔牆消息。漫勞穉蝶引來。窺玉之人。擬託狂蜂帶去。偷香之客。扑臂姑免。械指湏嚴。春從鏡裏追回。罰比泥中加等。

一。凡男子需用箱籠中物件。湏咨稟閨人。親手檢付。不得擅令婢女啓鑰。違者照虧空帑銀例。答八十。婢與同科。

判曰。巧瞞鸚母。偷開翡翠之籠。私喚丫嬛。輕啓葳蕤之鎖。不顧衣裳顛倒。

任將箱籠騰翻可知。室有小君取携甚便。莫謂家無長物。搜索何妨。青衣之側媚堪憎。赤棒之嚴威何在。因援漢律。同廩內府之金。試問秦人。誰掌北門之管。雖非鼠竊。終覺狐疑。先責擅奴。次懲菊婢。

禮律凡七條

一凡尼庵女觀。不准借燒香爲名。私行遊玩。違者照奉行邪教例。杖六十。鎖禁外房門一個月。至僧道寺院不問。

判曰青豆房中。巧鑿藏香之窟。黃花觀內。私開行雨之場。名爲剪髮披緇。皈依清淨。實則貪風愛月。引誘輕狂。只知彌勒龕深。不顧金剛杵猛。豈願耶登蓮界。惟防壻奪瑤光。佛門廣大。而能容閼法森嚴。而莫輓蒲鞭。既試木索。須關如從釋道往還。不在閨房例禁。但無留宿。概免深求。

一凡外間婦女私贈表記。如荷包手絹香串等物。概不許携帶入房。違者照士子懷挾入場例。杖八十。追贓入官。

判曰酒邊喝雉。賭來妙伎香囊。枕畔聞鷄。偷得佳人羅帕。緣訂衾稠之好。

遂邀瓊玖之貽。貪看繡鳳描龍。誇他心巧。愛麝零香。斷粉惹爾魂迷。藏諸懷袖之間。已覺罪無可逭。攔入閨房之內。尤爲法所難容。試援議置之條。允合科場之弊。宜加重杖。并索直贓。暫令小婢收藏。以備下人賞賜。

一凡遇閨人訓飭。當帖耳順受。深自悔過。不許曉曉置辯。違者以鼓噪公堂例。答一百。罰跪一炷香。

判曰。誨爾諄諄。不靳耳提面命。聽余諾諾。還防口是心非。緣何舌竟翻瀾。居然強項。不信頭難點石。太覺頑皮。惟聞一派胡言。藐視三章約法。豈是無疵可索。儂故吹毛。湏知有跡堪憑。郎難置喙。欲懲狡辨。姑予薄刑。曳近牀頭。痛加鞭背。更令泥辱。用肅堂規。

二凡遇親戚閒話。不許談論閨人短處。違者照卑幼辱罵尊長例。杖四十。批頰八十。罰飲洗臉水一碗。

判曰。燦金口。衆但憑人吐雌黃。護玉情深。當爲儂分皂白。豈有同衾鳳侶。反來止棘蠅讒。浪云性情乖張。心堅似石。動謂容顏粗醜。眉遠非山。不嫌。

外客多疏背談可恨。即使細君有過面刺何妨。居然娓娓堪聽。不啻申申其譽。杖臀難宥。挾舌姑寬。應將醜面香湯。爲爾湔腸妙藥。休言脂膩。定要杯乾。

一凡男或因閨人約束過嚴。有意捏造旁人譏訕之辭。冀聳聽聞。察出照妖言惑衆例。答六十。批頰四十。罰飼犬三日。

判曰。蠶尾興歌。要爾關心只甚。蛾眉見嫉。任他嚼舌何妨。乃因防範之嚴。故作招搖之語。術工搗鬼。志在嚇人。豈真川潰難防。不容掩塞。縱使風聞是實。也合包荒。何來詭計多端。假說謗書盈篋。郎自啓讒夫之口。儂寧受悍婦之名。罪合敲牙。刑先杖脊。罰供賤役。庶儆刁風。

一凡遇閨人將有差遣。得不預先躲匿。違者照臨場規避例。答八十。罰跪一炷香。

判曰。疊被鋪狀。自有丫頭服事。煎茶換水。敢令夫子當差。偶然對鏡盤雲。花須爾戴。或者開簾拜月。香要郎燒。無非權當嬌鬢。不算輕勞。貴手豈意。

狡。同。鬼。脫。翻。嫌。驅。使。之。煩。居。然。巧。比。魚。潛。預。作。迷。藏。之。計。不。甘。供。役。偏。愛。偷。閒。例。以。校。士。規。條。無。異。臨。場。丐。免。竹。刑。宜。服。鞠。踞。從。寬。

一。凡。遇。閨。人。對。鏡。理。妝。湏。在。旁。手。進。釵。梳。不。得。與。小。鬟。從。背。後。扮。作。鬼。臉。違。者。照。朝。賀。失。儀。例。杖。四。十。罰。倒。洗。臉。水。兩。個。月。

判。曰。筆。尖。染。黛。畫。眉。爭。羨。張。郎。奩。角。凝。香。碾。粉。曾。傳。簫。史。只。要。多。情。之。夫。增。便。留。佳。話。於。閨。房。乃。毫。無。玩。愛。之。心。反。而。作。擲。拾。之。狀。似。謂。鬟。非。墮。馬。何。湏。貼。翠。塗。黃。定。嫌。貌。愧。沈。魚。不。配。淡。妝。濃。抹。妄。議。綠。牕。之。梳。洗。致。干。烏。府。之。糾。彈。有。忝。朝。儀。湏。繩。閹。律。官。刑。罔。貸。婢。役。速。供。

兵律 凡九條

一。凡。男。子。未。曾。稟。命。私。自。買。妾。別。置。房。屋。潛。往。食。宿。察。出。照。謀。反。叛。逆。已。成。例。杖。一。百。夾。一。次。發。竈。下。婢。爲。奴。永。不。許。入。房。妾。發。官。賣。房。屋。器。具。衣。飾。等。物。查。抄。入。官。知。情。不。舉。者。坐。

判。曰。握。雨。携。雲。別。築。藏。嬌。之。館。偎。紅。倚。翠。新。翻。得。寶。之。歌。暗。將。桃。葉。迎。來。

偷把珍珠量去。鴛幃密擁。忍拋並蒂之蓮。鬼窟潛營。巧護旁生之蕉。黑心符誰能遣此。白頭吟於汝安。平縱云買妾無妨。娶何不告。可識停妻有罪。法更難容。須服上刑。痛懲大逆。卽交爨婢。俾作鉗奴。既無伉儷之情。宜絕綢繆之愛。楊枝立遣。瓜蔓全抄。根究加嚴。株連並逮。

一凡男子有事他適。先至閨中稟白。不准私自出門。違者照武弁擅離汛地例。答四十。嚴加審訊。若與婦女有約。乘間竊往。再杖八十。鎖禁外房門一個月。

判曰。柳巷花街。固非君等遨遊之地。茶寮酒肆。亦豈文人徵逐之場。只貪微服而行。不告當官之假。尋爾來縱去跡。累儂挂肚牽腸。先予薄懲。更加嚴鞫。可是玉扉輕叩。潛爲花底之游。或因金鎖偷開。巧赴桑中之約。非西曲之名倡暗誘。卽東隣之美女私招。供狀既眞。爰書立判。朱籤再掣。黑索牢拴。

一凡婢女年已及笄。應聽閨人遠嫁。不得從中牽制。違者照阻撓軍務例。杖六

十。婢仍遣。

判曰懷春有女。剛逢嫁杏之期。獨處無郎。將及標梅之候。祇合售同玉銜。倩彼雉媒。豈宜秘共珍藏。遲他鴛偶。儂方申結褵之誠。爾偏存留帶之思。倘非欲炙涎流。何因越俎。不是看花。眼熟那用遮闌。分明意在偷歡。遂致事多掣肘。杖宜立決。法不容撓。速遣催妝。毋勞妄想。

一。凡閨中情事。不得與外人談論。違者照洩漏軍情例。批頰八十。罰倒脚盆水十次。

判曰閨房之事。有甚畫眉牀第之言。何堪踰闕。徒以供人諧謔。遂同笑柄。談來居然賣爾風流。不礙和盤托出。博得閨堂大噱。爭禁滿座傾聽。細摹雨意雲情。郎顏太厚。盡吐花盟。月誓妾面。增羞爰徵擬罪之條。恰合漏師之例。扑臀姑恕。批頰非試。傾豆蔻之湯。俾識蓮花之味。

一。凡遇閨人訪問外間情事。湏據實供吐。不准隱瞞。違者照地方官諱盜例。杖四十。再訊。

判曰女子善懷。難免尋蹤問跡。男兒薄行。須防竊玉偷香。然來溫嶠之犀形原莫遁。照出秦宮之鏡胆亦應寒。乃不將實事招承。而反用虛言搪塞。非比捕風捉影。那容露尾藏頭。雖然自己含羞。終當告我。豈有外人可道。偏要瞞儂。既圖掩飾之工。須下榜箠之令。事宜根究。語莫枝吾。務得真情。期成信讞。

一凡男子差遣婢女。須先向閨人稟明何事。何往。方准出門。違者照擅調官軍例。答六十。再問有無潛往所處。餽送物件。傳遞消息等弊。審實另擬。該婢不卽首告。私自奉行。并罪。

判曰威原獨擅。私藏闔內之符。令豈自公。誰擊軍中之鼓。不謂無端之差。調反爲有意之隱瞞。豈欲請命而無從。遂至甘心於獲咎。應是報瓊貽玖。暗通黃犬之書。或因密約幽期。藉作青鸞之使。重加榜掠。速卽招供。彼非恃爲腹心。焉肯效其臂指。卽無受賄。亦是獻勤。並制官刑。俾知閨禁。

一凡閨人委辦事件。立卽奉行。不得遷延觀望。違者照違誤軍機例。答四十。事

仍發。

判曰下璇閨之將令。嚴若雷霆。發香閣之兵符。急於星火。傳命比郵籤之速。尅期防羽檄之遲。是宜踴躍以趨公。豈得因循而誤事。何用瞻前顧後。徒存玩法之思。依然陽奉陰違。顯蹈失機之咎。既干軍政。應隸刑書。須遵帷幄之謀。莫待析楊之至。速圖後效。以贖前愆。

一凡閨人遇事他出。將次回家。須在門首恭候。不得遠離。違者照遲誤驛站例。笞四十。罰煎茶三夜。

判曰香飄翠幃。乘來油壁之車。影豔紅牕。迎到沙棠之楫。微遮金扇。生怕人看。低揭珠簾。應聞郎笑。豈是重門寂寂。徒勞龐吠。花陰緣何深院。沈沈但聽鸚呼。架畔殊矢趨承之節。應干疏慢之愆。究從何處陶情。不甘久待。試問今宵挽頸。可要雙眠。姑予輕箠。罰司香茗。欲尋鴛夢。須進龍團。一凡遇閨人燈下鍼黹。須在旁陪伴說笑。不得託故先睡。違者照營務廢弛例。笞四十。罰獨睡一個月。有病免究。

判曰銅荷小剔紅搖一穗之燈。繡譜閒翻彩雜五紋之線。倘肯同消良夜。何妨伴我讀書。縱教閒坐深更也。合遲儂就枕。豈是宿醒未解。不禁倦態難支。先登行雨之峰。身倩誰伴。孤擁薰香之被。夢亦何甘。試聽寒漏聲遙。不顧空房胆怯。宜加懲創。以醒膏肓。既貪永夕之安。且識獨眠之况。如逢小極。合示優容。

刑律凡七條

一。凡閨人年不過四十以上。不准起意蓄妾。違者照圖謀不軌例杖一百。徒半年。期滿釋回。再聽發落。

判曰白傳之買樊素。已在暮年。坡公之納朝雲。亦非壯歲。大抵比房之置。恒爲煖老之謀。乃今則妾尙朱顏。采葑竟遺下體。郎猶青鬢。貪花莫禁狂懷。妄思取媚爭妍。祇是喜新厭故。逆端既兆。春秋嚴誅。意之條。香夢徒縈。帷幄重詰。奸之任。宜懲官杖。俾隸鬼薪。竚待及瓜。再歸司李。

一。凡婢女年過十四以上。男子不得入其臥房。違者照賁夜入人家非姦即盜。

例。杖八十。枷號一個月。若係該婢勾引。依律減一等。婢發官賣。

判曰。顛狂粉蝶。祇防深入花叢。隱現金鱗。偏愛潛藏水底。彼已及破瓜之歲。爾或存啖蔗之心。須知賤列青衣。承恩最易。莫謂近連朱蘭。越境無嫌。棒喝先施。枷懲不貸。或者態工狐媚。妄誇西子之顰。因而語學鶯偷。思擅東君之寵。郎宜末減。婢定難容。速倩蜂媒。售充魚媵。

一凡變童鬼客。以及年少優伶。概不准交接。違者照結納匪類例。杖一百。罰倒馬桶一個月。與文人往來聽。

判曰。花陰解佩。私邀斷袖之歡。席畔飛觥。遽密分桃之愛。別有兔園。可入居然鳥道。能攀洞許尋源。不顧陰陽顛倒。戰誇背水任教。雲雨掀翻。祇因戀彼後庭。遂至虛儂前席。事同胯辱。罪合肉刑。既喜納汗。宜令滌廁。倘使交來文字。提塵談詩。不妨欺以壺漿。殺鷄爲黍。無庸鼓瑟。速遣調羹。

一凡外間使令。皆用蒼頭。不得私蓄俊僕。違者無論有無情弊。俱照雞姦例。杖八十。枷號一個月。該僕逐出。

判曰忍管不去。難求穎士之收。飲水偏甘。誰似子淵之僕。只要履箱解捧。垢面何妨。但期詩料能馱。蓬頭亦可。祇是尋常之役。何湏婉孌之僮。分明愛彼卯宮。遂欲藏諸甲帳。薰香婢。周防有我。免爾探花。讀書堂。照顧無人。任伊鑽李。既貪烏合。湏置象刑。先撻尻輪。次加頸木。亂風必做。禍水速除。一凡婢女傳送茶湯。不得牽拽衣袖。掣扼手腕。違者照强姦良家婦女例。杖八十。罰樓板上睡十夜。

判曰不是臨歧執別。何湏擊子之祛。並非拯溺從權。豈得援人以手。私遞雙眉之語。陰圖一握之歡。婢子情多。定必隨郎。宛轉女兒。膚好豈容任爾摩挲。但教低捧金甌。非供調笑。倘使頻沾玉體。難免橫陳。因萌染指之思。致取剝膚之痛。休嫌席地。不准同牀。

一凡交游聚處。不許談論他家婦女姿色。及一切穢褻之事。違者照誣告平民例。批頰四十。與談之人立即逐出。永不許往來。

判曰手揮塵尾。居然自詡風流。目豔驚鴻。輒欲共評月旦。妄議瘦肥之態。

兼工淫褻之辭。言之若甚快心。聞者皆將掩耳。修肩廣額。徒供諧謔之資。斷雨零雲。總屬荒唐之語。君偏樂道。儂已私聽。事涉閨幃。罪同誣衊。姑從寬典。僅置薄刑。宜嚴逐客之條。永著絕交之令。

一凡遇閨人臥病。湏終日在房料理湯藥。并聽使喚。不得托故躲匿。違者照罪人逃亡例。杖四十。鎖禁內房。候病起釋放。

判曰。禁寒惜煖。全憑熨體之人。丸藥和羹。較勝粗心之婢。欲識恩情之重。但看疾痰之時。如其憐我呻吟。當必爲儂憔悴。豈意潛藏。恫外。不管醫來。翻因宛轉牀頭。巧從郎便。匿跡祗圖安逸。捧心誰替。摩挲任教。顙額顰眉。疾藜久困。忍使呼漿索茗。鸚鵡空磨。刑象難逃。圖豚立禁。待離鴛枕。始赦鷄竿。

工律凡四條

一凡閨人遇事他出。房中扃鎖箱櫃。不准私自開動。違者照侵蝕公項例。撥一次。敲四十。再問有無偷盜情弊。依律重擬。

判曰守藏人虛空有魚鍵之設。洞垣術巧。忽來狗盜之謀。或因情急呼盧。思偷鳳釧。豈是計圖換酒。故索鸛裘。漫爲蓋篋之搜。竟等嚴關之奪。私開金鑰。撩亂衫裙。重檢香奩。拋零環釧。作賊斷無空過。得賊那許終瞞。僅施敲扑之威。未蔽穿窬之罪。再從嚴訊。冀獲真情。

一凡閨人委辦物件。湏挑選上等精細之物充用。不得以低爛不堪者塞責。違者照承辦工程不力例。答四十。發回另辦。

判曰翠鈿珠環。只怕爐工欠巧。杏衫蓉帶。總宜花樣翻新。雖然粗蠢容顏。無須愛好。爭奈嬌痴心性。偏欲爭高。緣何閨閣之需。必較錙銖之值。不是儂貪錢費。湏知佛要金裝。鬢添時式之釵。人因增媚。身曳舊裁之錦。郎亦無光。加以鞭笞。破其慳吝。再令適市。勿惜傾囊。

一凡閨人給予物件。如荷囊繡帶等類。不許私自送人。違者照盜賣官物例。杖四十。原物追繳。給過之物。一併奪還。

判曰新挑錦綫。繡成五綵之囊。巧度金鍼。刺就百花之帶。中有同心之縷。

暗藏比翼之思。只宜密繫郎腰。豈得輕拋人手。捐同珮玦。徒爲敝屣之遺。投並瓜桃。竟作弁髦之棄。傳觀尙可。脫贈奚甘。倘非索自丁娘。定必貽之子國。唾絨猶賸。枉教工費春纖。佩鞶何存。不僅威收夏楚。湏嚴杖比。務使珠還。

一凡婢女衣裙鞋膝及簪環等物。俱憑閨人賞給。男子不得私製擅與。違者照擅自造作例。杖六十。追贓入官。

判曰。操來箕箒。何須體被羅裳。捧到盤匱。不配額安花鈿。只要衣衫無垢。烏容環瑱生光。乃儂方高德曜之風。不嫌粗服而郎。豈有石崇之富。故遣華妝。分明愛彼麗嬌。因欲投之香餌。倘更施其膏沐。直將寵以專房。法必防微。懲宜從重。仍令返樸。毋許誨淫。

(完)

續艷體連珠

眉

蓋聞遠山有黛。卓文君擅此風流。彩筆生花。張京兆引爲樂事。是以纖如新月。不能描其影。曲似彎弓。可以折其絃。

眼

蓋聞將軍之號。乃喻其大。美人之容。實驚其豔。是以新柳之青垂垂。春風誰識。雙鳳之丹點點。秋水何長。

腰

蓋聞楚宮餓死。因婀娜之難求。沈郎瘦時。知飄飄之有托。是以邯鄲學步。此後無人。金谷啣杯。憐卿獨我。

脚

蓋聞白綾三尺。玉筍一枝。金蓮一雙。沉香步步。是以迴風曲罷。宵娘真是可兒。凌雲態濃。飛燕呼爲仙子。

粉奩

蓋聞飄零致感蝶翅飛來塗飾何多燕支濕處是以何郎掩袖不妨重數秦台
虢國掃眉何必徒譏臣里

鏡台

蓋聞光能照胆一毫不逃其形影每羞鸞六宮輒悲無色是以樂昌巧合可以
慰其流離溫嶠深緣可以結其癡想

玉釵

蓋聞遍結同心頻勞羅帶驚成折股本是花枝是以剔開紅燄飛蛾之救能傳
貼上香釵金鳳之聲欲墜

金環

蓋聞石垂金風前玉立明珠成串月下人來是以照見銀燈却等璜琮之價
聽殘夜漏錯疑驂騑之鑣

眞珠兜

蓋聞龍山風起。飄飄如仙。滄海波深。處處是寶。是以驢背訪梅名士。與美人並重。蚌胎得月。閑愁與離恨同量。

金烟袋

蓋聞紫玉何歸。離魂天上。層台高築。流水人間。是以術傳吐火。考其源得自西方。異可辟寒。售其值却同連璧。

雕毛扇

蓋聞新秋風到。何處迎涼。曲檻人歸。頻呼拾翠。是以紈扇見捐。班姬之辭太苦。風塵能出。謝傅之望猶濃。

花露水

蓋聞荷葉田田。香能徹骨。羅衣薄薄。冷太欺人。是以龍腦成灰。休喚海棠睡起。鮫人有淚。空隨銅狄同流。

(完)

勝朝彤史拾遺記一

蕭山毛奇齡大可著

彤史者。後宮女官名也。其制選良家女子之知書者充之。使之記宮闈起居及內廷燕褻之事。用示勸戒而惜其書。不外傳。予幼時得先子石阡府君教授所藏宮闈記聞一卷。自洪武至萬歷凡十三朝。可謂小備。雖所闕亦無幾。第載事未確。其文不雅馴。予承乏爲史官。值修明史。常圖題起草。得順成弘正四朝后妃列傳。因歷探中秘。以爲必有異聞畸事。可補疏略。而遍搜史竅。但得詳冊封年時及后妃崩薨喪葬諸禮。而他無所有。乃不得已仍取外史所記與實錄稍不符者。草成應之。而拾其餘賸歸而雜之。先子之所藏。復爲斯篇大抵事取可驗甯闕勿備。謂之拾遺。既無彤史。稱彤史者曰非史。官之正史焉。

太祖朝

洪武 孝慈高皇后馬氏。宿州徐王馬公女也。馬之先有宋太保默者。家于宿

之新豐里。

一作閔子卿新豐里

數傳及公。以貲豪里中。善施而貧。元至順間。其母鄭媼生

后卒。公殺人避仇。投所好友定遠郭子興。以后託焉。會江淮亂。子興起兵據濠

州太祖在軍中。子興妻張氏。奇太祖。力勸子興妻太祖以后。曰。是人。有異相。非常。富藉此收之。且馬公不可負也。子興以爲然。遂贅太祖于其家。獨子興子三。與太祖不相能。數數搆太祖間。以他事幽太祖別室。絕口食。后竊懷鑑底飼之。值烝餼饌熱。后乘熱竊其一懷之薄乳。傍乳爲之糜。幸張氏憐后意。皇急陰解之。原評曰。陰解不屬上一節。然急接此句。又急接下一段。則與后冊后諭言照映警切。時諸軍四出。多鹵獻。獨太祖無有。子興怒。后密勾張氏婉轉。且以棗脯薦子興。子興置不問。后善承人意。而知書。精女紅。太祖每出軍。一切軍狀皆屬后。籍簿井井。雖踰時詢之。不少遺。暇卽率諸校妻縫紉衣襦。以備不給。至太祖渡江。后多智。恐元兵躡其後。必相隔。不俟太祖命。急率諸校妻過太平。止繁昌陳迪家。而元兵果扼渡如后慮。后遂于迪家生皇長子焉。時吳漢接境。戰無虛日。后時時贊太祖規畫。嘗謂太祖曰。定天下在得人心。人心者天下之本也。又曰。用兵焉能不殺人。但不嗜殺人。則殺亦罕也。太祖深然之。洪武元年。上卽皇帝位。冊后。旣冊。謂群臣曰。昔光武受命。嘗回思滹沱麥飯。以勞馮異。唐德長孫后。以其能周旋于隱太子。構陳之間。今皇

后同朕起布衣。閱歷憂患。每不憚灼肌體。懷熱食餽朕。此不止麥飯也。至郭氏猜嫌。幾罹不測。后卒能多方彌縫。以脫朕于難。其與長孫之周旋險易何等。語曰。妻者齊也。又曰。家貧思賢妻。非后德齊一。安有今日。其敢以富貴忘貧賤哉。羣臣呼萬歲。既而語后。后曰。妾聞夫婦相保易。君臣相保難。陛下不忘妾。願陛下尤不忘羣臣百姓。原評曰一段雖似馮異傳然文氣直逼西京與後漢稍異乃追封馬公爲徐王。鄭媼爲夫人。以無嗣。且不得公媼死所。乃瘞袞冕置冢。戶立廟新豐里。后歲時饗祀哀焉。清江范孺人者。習女史。后令說古今賢后事。至竇太后。后曰。黃老者何教。而太后好之。曰。黃老者。清靜無所爲。不必爲仁義。而民自孝慈。是其教也。后曰。孝慈卽仁義也。世有舍仁義爲孝慈者哉。左右諸嬪有以明德馬后比后者。后曰。吾安所及之。亦效之耳。第后性本儉。嘗命練故織爲衾褥。以賜貧民。緝裁餘繪帛及織工治絲有荒類者。纂集爲衣帔。以賜諸王公主。身御澣濯。久紕不即易。曰。此弋綈遺法也。周王之國。遺慈母江貴妃從。一作孫貴妃賜以己取御紕衣一杖。一曰。王有過。則披衣杖之。卽違馳以聞。歲蓄六宮皆蔬食。請上賑卹上許之。

后曰。儲備之不先。以致有此。夫賑以卹其後。不如儲之備于先。爲有要也。上深然其言。上意氣豪略。威福多不測。后順事承指。每從容開導。其所補救。有爲外廷所未知者。先是參軍郭景祥。總制和州。或言景祥子不孝。嘗持槩趣景祥。上曰。若此。當誅之。后從容曰。妾聞景祥止一子。獨子者。必驕情也。然亦安至是。且陛下殺一人。而遽至絕人之後。此非細也。母亦廉而後殺之。及廉之果不實。上曰。微后言。幾誤斬郭氏祀矣。李文忠守嚴州。上聽楊憲言。欲召改爲揚州守。后曰。文忠賢。其行信于人。改則失人心。且敵方壓境。守將未易動也。上然之。文忠遂克杭州。春坊李希顏。爲諸王授經。擊王額以管。上怒甚。后解之曰。幾有使製錦而惡其翦者。夫曲謹婦寺之愛也。而以責師傅可乎。宋濂以學士婦里坐孫罪被逮將刑。后念其有師傅功。急進曰。宋學士家居。豈知情者。妾聞里塾延一師。尙終身敬衛之。况官家乎。上曰。此非汝所知也。會后侍上食。舉匕向鏹鼎。潛然而却。上問故。后曰。妾痛宋學士之刑。而欲爲諸兒服心喪也。上聞投箸起。明日赦濂。改安置茂州。吳興民沈秀。貲富侔國。曾爲上犒軍。而築都城三之一。上

思欲誅之。后諫曰。妾聞法也者。所以誅不法也。非所以誅不祥。民富侔國。民自
不祥爾。夫不祥之民。天菑有之。于國法何預焉。乃釋秀戍雲南。嘗令死囚梟都
城贖刑。后曰。以役贖死。仁也。然以久瘼之囚而重之力役。得微仍以役死乎。上
爲罷其役。釋之后。慈愛性成。而尤持大體。嘗曰。施恩必使遍。然推之有差等也。
今民間衆庶。固多艱難。獨念京朝官去井里挈妻子。僮僕犇走事上。而俸入
有限。反多徧謫。差祿之謂何。乃勸帝厚日給。別賜諸饗錢。且請太學生之攜妻
室者。置家糧。名紅板倉糧。皆后恩也。后細務必親。既貴。尤自主饋事。近臣及奏
事官。朝罷必會食。后每取嘗之。卽不旨。必爲上言。責光祿卿。至御膳日上。后必
省視。宮人請自重。后曰。事夫親饋食禮也。且上性嚴急。萬一偶失飪。吾得承之。
汝輩堪此耶。他日羹寒。上翻羹汚后衣。后令燂再進。他無所責。上嘗怒宮人。后
亦怒。令付宮正司治罪。上稍解。問后曰。不自責。付宮人何也。后曰。妾聞賞罰
惟公。足以服人。故明主不以喜怒加刑賞。當陛下怒時。恐有觴重。付宮正則酌
之矣。卽陛下論罪人。亦有司者治之耳。上曰。爾怒何也。后曰。妾之怒。所以解陛

下怒也。后初知書及貴。益好學。嘗謂上曰。法屢更必弊。法弊則奸生。民數擾必困。民困則亂生。上曰。至哉言也。命女史書之冊。嘗俘元寶玉至。陳于廷。后陽認之曰。元有是。何以失之。意者此非寶與。上曰。朕知之矣。后多學。必謂珠玉非寶。惟善爲寶也。后拜曰。如陛下言。原評曰。不以爲諷諫。而以爲街弄多學一語。不可刪去。

洪武十五年八月。后疾。群臣請禱醫。后曰。生死命也。禱醫何益。且醫一不效。或致錄醫。是重吾過也。上問有言乎。曰。陛下與妾起布衣。藉陛下神聖。得貴爲母后足矣。復何言。所願言者。惟陛下求賢人納讜諫而已。是月丙戌崩。年五十一。上悲悼。終身不再立后。九月葬孝陵。葬日各不同。故不錄。以成穆孫貴妃永貴妃江貴妃。祔越日祔太廟。逾年宮人思之。作歌曰。我后聖慈。化行家邦。撫我育我。懷德難忘。懷德難忘。於萬斯年。泌彼下泉。悠悠蒼天。后生懿文太子。標秦王。懷晉王。桐成祖文皇帝。周王橐鞬國安慶兩公主。初諡曰孝慈皇后。永樂元年上尊諡曰孝慈昭憲至仁文德承天順聖高皇后。嘉靖十七年復上尊諡曰孝慈貞化哲順仁徽成天育聖高皇后。初后生成祖有龍見于寢。嘗夢微時野歸。遇賊皆紅。

冠追之。成祖以馬進。扶后執轡。賊見成祖皆避去。后以故鍾愛之。然勿言所夢。及上厭太子柔弱。曰非繼體也。后始以夢告。仍戒勿洩。而其後卒有靖難之事。貴妃孫氏。陳州人。父和卿。以仕元偕妻晁氏至常州家焉。元末兵亂。妃父母相繼死。獨長兄瑛有材幹。辭家遠游。久未歸。妃年十三。隨其次兄璠避兵江都。將以次北還。而江都城陷。璠又死。元帥馬世熊妻得妃育爲女。年十八。未字也。上求有容德者納宮中。人或以妃告。及按果然。遂納之。妃敏慧端麗。而嫺禮法。言動皆中矩。高后嘗謂上曰。古賢女也。妃痛無外家。間一請上求兄瑛所在。久之得瑛官參省。上即位。冊貴妃。位冠諸妃。上妃佐高后相六宮事。高后以慈妃以法皆相濟得治。洪武七年九月癸未。一作庚寅薨。年三十二。上震悼。賜諡成穆。妃無子。祇生四女。上命周王橚主其喪。服慈母三年。皇太子諸王皆朞。并敕詞臣撰孝慈錄。凡庶子爲生母服三年。衆子爲庶母皆朞。推妃恩也。時命有司營厝于朝陽門外褚岡之原。賜兄瑛田租以供歲祀。而其後祔高后陵。郭寧妃。臨淮郭山甫女也。山甫善相人。上龍潛時嘗游臨淮。過山甫家。山甫自

外至。見上大驚。急呼內治饌。治畢。夫婦捧七箸。侍上飲。笑語甚歡。中酒闔外戶。踞曰。公非常人也。自愛。嘗言鍾離有王者氣。當在公矣。上去。山甫謂諸子若曹皆田舍郎耳。而有封侯之相。吾初疑之。今始知以是也。原評曰此等形寫在史公高紀之上乃遣其二子從龍渡江。而親飾妃納一室。侍孝慈皇后行間。洪武三年。封寧妃。孝慈崩。妃攝六宮事。稱皇寧妃。生一子。名橒。封魯王。上甚念山甫。及妃貴。而山甫已死。乃累贈山甫爲營國公。二子皆以開國勳封侯。如山甫言。長子興。鞏昌侯。次英。武定侯。

皇淑妃李氏。壽州人。其父傑。當洪武初。曾以廣武衛指揮北征。戰而死。十七年九月。冊淑妃。以高皇后服闋不立。后進爲皇淑妃。攝六宮事。

郭惠妃者。滁陽王長子郭大舍女。滁陽生三子。皆非命死。獨大舍遺一女。封惠妃。人有相郭氏宅者。曰宅有女。當大貴。初惡其言。至是驗。徐王託孝慈于滁陽。滁陽育之。亦郭氏女也。妃生蜀王。豫王。谷王。及汝陽。永嘉二公主。豫王即代王。胡妃臨淮人。父顯。以世開國功。襲定遼都指揮同知。進都督。旣而改武。爲護衛。

妃生一子。名楨。封楚王。

建文帝朝孝康皇后常氏。懿文皇太子妃。開平王遇春女也。洪武四年。冊爲皇太子妃。既而有疾。薨。太祖哀之。爲輟朝三日。高后素服臨。諡曰懿敬。建文元年。追尊懿文皇太子爲孝康皇帝。廟號興宗。遂尊妃爲孝康皇后。永樂改元。復降稱懿敬皇太子妃。祔懿文陵。其後嘉靖二十年。孝宗張皇后崩。廷臣議尊諡。有以孝康進者。或曰。此興宗皇后諡也。世宗曰。興宗既降尊。襲之何害。遂諡孝康。蓋世宗有微意云。

建文太后呂氏。壽州人。洪武十一年。冊爲皇太子繼妃。國初有呂本曾。仕元爲總管府。已而歸順。官吏部尙書。出爲都轉運鹽使。是其父也。妃生虞懷王雄英。及建文皇帝吳王允熲。衡王允燧。徐王允熿。建文元年。尊妃爲皇太后。靖難兵至金川門。遣人迎太后。太后至軍中。成祖再拜自陳。不得已起兵之情。太后無一言慰勞而返。及返。未至宮。宮中火起。遂于是年七月。隨幼子允熿。居懿文陵。永樂改元。革太后號。復稱皇嫂皇太子妃。

建文皇后馬氏。光祿少卿馬全女。洪武二十八年十月。冊后爲皇太孫妃。建文改元。立爲后。生二子。文燧。文圭。靖難兵入城。而后崩于火。聞者哀焉。

成祖朝永樂

徐皇后成祖后也。武甯王徐達以張夫人妬。太祖爲之娶謝氏。生后而

賢。幼時誦書史。一過不忘。人稱女諸生。然縝慎不狎獵。每觀書。得一善事。必一再思曰。奈何倣之。太祖聞其賢。親召達乞聘爲燕王妃。洪武九年正月。授封冊。高皇后深愛之。曰。眞吾婦也。燕王之國。后理王宮政甚治。乃以居高皇后喪。斷酒肉三年。每語及高皇后。輒流涕。成祖問后。高皇后遺言多可誦。顧何言最要。后能舉之乎。后一一舉之。無所遺。靖難兵起。后留與世子居守。李景隆攻城。城幾陷。后親率諸將校妻擐甲登陴。挾矢石禦之。敵遂以却。洪武三十五年。上即皇帝位。乃以十一月壬辰。冊皇后。后明于治理。每言南北兵爭久。民敝宜急休息。而上方用人。稍稍以新舊爲間。后力爲解釋。有曰。伊呂宮散。即勝朝猶用之。况太祖所遺者乎。原評曰。此學問語。惜以成祖之英敏。而反不及此。后弟增壽。當建文時。曾以國情輸之上。而建文君誅之。至是議贈爵。后不可。上曰。后欲爲漢明德耶。顧今豈以外

戚故封之。竟封定國公。而命其子景昌襲其爵。命下始告。后不謝。曰：「非妾志也。」會冊皇太子及漢趙二王。后以爲太子仁。不可忝主器。而二王不馴。勸選宮僚。且請仍用廷臣兼署之。曰：「一則任使。一則疑隙不生。此高皇帝善制。此宜萬世永遵者。」嘗問陛下所與共治者何也。上曰：「六卿理政務。翰林職論思。皆是也。」后曰：「請得悉召諸命婦觀之。」上許諾。及召入。遍觀喜甚。各賜以冠服鈔幣。且諭之曰：「凡婦相夫。豈止衣服饋食云爾。必將有德行之助焉。古公侯夫人及大夫士之妻。其能助成夫德。載諸簡牘夥矣。今上所共理者。六卿翰林之臣也。爾諸命婦。詎無所以賛于內者。夫百姓安則國家安。國家安則君臣夫婦皆安。此所當共勉者也。且夫朋友之言。有從有違。夫婦之言。婉而易入。爾其思之。」又召翰林學士解縉。黃淮。胡廣。胡儼。楊榮。楊士奇。金幼孜。婁見。柔德。殿各賜勸勉。且賞賚甚至。后嘗輯女憲女誡諸書。採其要者。作內訓二十篇。曰：「德性曰修身。曰慎言。曰謹行。曰勤勵。曰儆戒。曰節險。曰積善。曰遷善。曰崇聖。曰景賢。範曰事父母。曰事君。曰事舅姑。曰奉祭祀。曰母儀。曰睦親。曰慈幼。曰逮下。曰待外戚。又纂古

嘉言善行彙一編。名勸善書。頒行天下。永樂五年七月后疾。上臨問。后以求賢才。明邪正。厚宗室。抑外戚爲請。上納之。旣而謂皇太子曰。往者靖難時。諸從征婦之居留者。皆爲我授兵。嬰城捍敵。往往扯衿纏。瀝粉汗。每愧無以謝之。聞上將北巡。吾欲于此時爲追請恩澤。今不逮矣。又曰。積善如登山。久必高。積惡如穿坎。久必陷。乙未崩。年四十有六。后生仁宗及漢庶人高煦。趙王燧。永安。永平安成。咸寧四公主。上慟曰。吾從此不得聞善言矣。乃爲后薦大齋于靈谷天禧二寺。聽羣臣致祭。光祿卿營齋事。惟謹。十月甲午。冊諡曰仁孝皇后。七年。葬天壽山。升祔太廟。二十二年。仁宗卽位。改葬長陵。上尊諡曰仁孝慈懿誠明莊獻配天齊聖文皇后。

昭獻王貴妃。蘇州人也。隨父宦在京。永樂初。選擇良家女。妃入宮。冊爲昭容。時宮中上下多朔產。略少委曲。獨妃具才德。能從容婉婉以行其意。以故妃佐理宮政。稱愜伏仁孝愛之。永樂七年。仁孝服闋。進貴妃。上自仁孝崩後。在宮多任性。間或躁怒。宮人皆惴惴懼。妃特輾轉調護。徐俟意解。自皇太子親王公主以

下皆重賴焉。十八年七月丙子。以疾薨。上震悼。爲輟朝五日。賜祭諡。照獻貴妃。


命禮臣考高皇帝成穆貴妃故事。一視其喪葬。以寵卹之。


權妃者朝鮮人。永樂七年五月。朝鮮貢女充掖庭。妃隨衆女入。上見妃色白而質復穠粹。問其技。出所携玉琯吹之。窈眇多遠音。上大悅。驟拔妃出衆女。逾月。冊賢妃。授妃父永均爲光祿卿。八年十月。妃侍上北征凱還。而疾至臨城。曰不能復侍上矣。遂薨。上哀悼。親賜祭。諡曰恭獻。命厝其柩于澤縣。敕縣官守之。

時朝鮮所貢女。其見具位號者。復有任順妃李昭儀。呂婕妤。崔美人。四人。皆命其父爲京朝官。順妃父添年。爲鴻臚寺卿。昭儀父文。婕妤父貴眞。爲光祿少卿。

美人父得霖。爲鴻臚少卿。其後永均以宣德一作洪熙中卒。訃聞。上仰推先澤。遣中官賜祭。賜其家白金二百兩。文帛表裡有差。


香齋叢書四集卷三終





香
豔
叢
書

第
四
集




42
1737
475
1116

香艷叢書

四集卷四

勝朝彤史拾遺記二

蕭山毛奇齡大可著



仁宗朝 仁宗皇后張氏。河南永城張麒麟女也。麒麟由兵馬指揮使封彭城伯。生二
洪熙 子一女。即后也。后以洪武二十六年冊燕世子妃。永樂二年四月改冊為皇太
 子妃。時仁宗體肥。腰腹經數圍。而矐矐。上命與諸王馳馬。仁宗辭不能上大恚。
 命有司減仁宗膳。仁宗危甚。會上令監國二王播流言中之。幾易儲。后內寬仁
 宗。而外事成祖。及仁孝皇后甚謹。重得仁孝心。仁孝每言于成祖。成祖亦意解。
 嘗曲宴內苑。仁宗侍成祖。見仁宗色變。睡而詈。移時指后曰。此佳婦。他日當承
 我家。脫微此。廢爾久矣。后起。頓首謝。頃之。忽失后所在。上怪。使覓。后則后方親
 入宮庖。手湯餅出薦。上且感且喜。顧仁孝。原評曰三字人所忽此 仁孝為慰勞
 泣下。乃呼仁宗及后前。劇飲盡懽。乃罷。由是太子得不易。永樂二十二年十月。

仁宗既卽位。命英國公張輔持節冊皇后。明年仁宗崩。宣宗立。尊爲皇太后。凡軍國大事。悉上皇太后叅決。皇太后亦每事諮詢。不敢以聽政自居。擅外廷議。方是時。海內太平。上入奉起居。出侍遊宴。四方貢獻。雖瓜果微物。亦必先上皇太后。然後賞食。兩宮慈孝聞天下。宣德三年。太后游西苑。上親掖輿。皇后皇妃皆從行。泛舟登萬歲山。上捧觴上壽。獻詩頌太后。太后亦賜觴諭上。以保境安民至意。上稽首謝。五年二月。謁長陵獻陵。上親囊韉。騎導至河橋下。騎扶輦行。旣過。復騎。畿民觀者夾道。傍皆感悅。呼萬歲。時陵園父老適迎至。太后顧上曰。百姓以君能安民。故不憚遠赴。趨承踴躍。爭欲得一望顏色。倘無以安之。則天下之望君者不止是矣。上拜謝。及還。上奉太后過農家。召婦女問生業安否。婦女應對俚朴如家人然。太后喜。賜鈔幣飲食。時有以野蔬村酒獻者。后嘗訖。復賜上曰。此農家味。當知之。扈臣張輔、蹇義、楊士奇、楊榮、金幼孜、楊溥。請候見行殿。太后慰勞之。賜酒饌及白金文綺。且曰。爾等皆先朝舊臣。今日之清甯。得展游宴。雖祖宗實祐之。亦卿等輔相力也。其勉導嗣君無忽。輔等頓首謝。是日諭

上作賞春賦。他日上謂士奇曰。太后謁陵還。悉能道汝輩姓名及所行事。謂張輔武臣也。而達大義。蹇義厚重小心。但少斷耳。惟汝能正言無所避。先帝或數不樂。然終能從汝。以致不敗。特三事未從。可悔也。士奇謝。太后遇外戚嚴。兄梟彭城伯。弟昇忠安伯。至醇謹。時諭以恭儉。慈飭保家族。不許預議國事。楊士奇每言昇果賢。非他戚比。卽所議事。鮮非是者。其預令議便。太后終不許。暨宣宗又崩。英宗方九歲。太后謂國福長。君欲召立襄王不果。英宗旣嗣。大臣請太后聽政。太后曰。毋壞我家法。凡事付閣議。然後行。致書兄梟及弟昇。第朝參勿干預一切。特除去宣宗宮中諸玩物。及不急諸務。特勗上以學。又數語洪宣間。委任股肱事。故是時天子尊師傅。興學校。舉任賢才。爲一代極盛。正統二年。太后御便殿。召張輔。楊士奇。楊榮。楊溥。胡濙。入。上東立。近榻。輔等立西。下女官佩刀劍雜侍。太后召輔等前曰。卿等皆舊臣。嗣君幼。幸同心爲社稷計。又語士奇溥曰。先皇帝監國時。念二卿孤忠。及在位。猶時時道之。言在耳。不忘也。士奇等伏地謝。乃顧謂上曰。此五臣皆先朝所簡。帝其重之。凡事非五臣贊決勿行也。先

是中官王振者。在宣宗時。曾以技巧逆上意。後用英宗件讀恩。秉司禮監。惡未著也。然而太后知其奸。故當大臣請垂簾時。太后令一切政務。必閣下議決。越日遣使一至閣。詢若日議若事。俟閣臣列奏。太后親驗之始行。或出振不赴閣議者。必立召振責格其事。其防如此。然終恐振不可制。原評曰。急著此段。則后之懲振自嚴。舊本或遺

此或將此記他處俱失篇法

至是令呼振振。至太后色頓改曰。汝侍帝起居多不法。今賜汝

死。女官抽刃加振頸。帝跪請。五臣隨帝跪。太后曰。此輩誤人國多矣。帝烏知之。既而曰。且以帝及諸公故。寬汝勿再也。由是振終太后世。不敢預大政。七年乙巳十月。太后崩。遣詔曰。吾自洪武中配仁宗皇帝三十餘年。及爲未亡人。又十有八年。今得全歸。從先皇帝地下足矣。惟是國家至重。當以愛人爲保國之本。爾諸臣咸佐帝行仁政。秉忠勤勿懈。諸后妃家遵皇祖訓戒。勿干預國事。喪服遵仁宗遺詔。以日易月。天地祖宗社稷之祭。不可以卑廢。尊及百神之祀。皆循常例勿停。十一月丁巳。上尊諡曰誠孝恭肅明德弘仁順天啟聖昭皇后。越日祔太廟。合葬獻陵。后生宣宗及越王瞻墉。襄王瞻墽。方太后大漸時。召大臣楊

前問國家尙有何大事未舉者。士奇言建庶人立四歲雖已亡。當復其位號。修其實錄。太宗詔有收方孝孺諸臣遺書者死。宜弛其禁。太后默然未答。若不省者。諸臣受顧命遽出。故遺詔不及焉。

宣宗朝
宣德

恭讓胡皇后者。宣宗廢后也。名善庠。濟甯人。父榮。生七女。洪武初。長女

名善園。以才色給事掖庭。充尙宮。頗見任使。榮故。于是時得授錦衣衛指揮。至永樂十五年。有詔選皇太孫妃。司天奏星氣見奎婁。當在濟河間求之。使者下濟甯。因以榮第三女進。則后也。按之合法相。遂于是年冊皇太孫妃。先是鄒平孫忠者。由太學生擢永城主簿。生一女。姣皙而慧。仁宗張皇后永城人也。其母彭城伯夫人。曾見孫氏女于主簿官舍。奇之。會永樂八年。太宗謂皇太孫長。當擇配。彭城夫人稱孫氏女賢。乃因張皇后言于太宗。太宗取孫氏入宮。甫十歲。即令張皇后育之。已七年矣。原評曰此以合傳體叙二后事方有眉目舊史如隔幔張炬絕不明白至是詔選妃。以司天奏故。竟冊立胡氏。而以孫氏爲之嬪。彭城夫人每爲張皇后唧唧。而張皇后賢不言也。原評曰著此句又著下句俱見筋節是時仁宗知其事。故于仁宗嗣位。冊孫氏嬪。

時特賜孫氏得服妃冠服。宣德改元。尊張皇后爲皇太后。皇太后有旨。謂兩家定位久無可議。仍冊胡氏爲皇后。孫氏爲貴妃。故事。冊皇后用金寶金冊。皇貴妃而下。金冊無寶。時宣宗初嗣位。意亦稍稍向孫氏。特爲孫氏請寶于太后。敕尙寶製金寶如后。賜孫氏。當時疑之。既而上頗事遊幸。且好弄。后數數規諷。上稍厭后。適后疾無子。而貴妃宮人有身者。貴妃隱之爲己有。年十一月。宮中傳言貴妃生皇第一子。上遂召張輔。蹇義。楊榮。夏原吉。楊士奇入。諭之曰。朕有一大事。與卿等議。固出不得已。然亦決矣。朕三十無子。而中宮屢身不得育。頃且病。日者言中宮祿命必無子。今貴妃有子。當立爲嗣。夫母以子貴。禮也。特何以處中宮。輔等皆不答。上乃舉后過一二顧。榮進曰。是可廢也。上曰。廢后有故事耶。義曰。宋仁宗廢郭后爲仙妃是也。時輔與原吉。士奇嘿然無言。上特問士奇。士奇曰。臣事帝后。猶子事父母也。甯有爲人子而議廢母者。榮曰。上命也。士奇曰。正惟上命勿輕出耳。輔與原吉是士奇。且曰。此大事。非詳議不可。上曰。不貽外議乎。士奇曰。宋仁宗廢后。孔道輔。范仲淹極言其非。因率台臣十數人。

入諫見黜。夫廷臣非之。至今史冊猶譏之。誰謂無議哉。既退。榮謂原吉曰。上志久矣。恐非臣下所能止者。原吉曰。然。廢之不可也。士奇曰。卽上所舉中宮過。亦何一當廢者。而輕言若是。明日上召榮。士奇至西角門。問曰。昨議云何。榮出懷中紙條。后當廢事以進。上覽未及竟。艷然曰。渠曷有此。顧士奇爾何言。對曰。漢光武廢后。詔書有曰。異常之事。非國休福。宋仁宗廢后。而後復悔之。顧陛下詳慎。幸勿却休福而貽後悔。上不懌。罷。他日又詔問五人。輔原吉對如前。士奇曰。皇太后神聖。豈無旨者。上曰。與卿等議。卽太后旨也。是日議未決。最後乃獨召士奇於文華殿。屏左右。諭曰。朕旬卿。必欲卿處之如何。士奇曰。此非臣所能處也。上曰。雖然。以旬卿如是者。三士奇俯久之。仰而曰。中宮與貴妃無嫌乎。原評曰。有明一代多廢后。自此始。大臣依回處寫出。可惜。曰。無之。頃中宮病踰月。而貴妃日過視。且倍慰也。士奇曰。若然。曷若乘中宮有疾。而陛下導之使辭讓焉。上曰。善。卿第勿言。俟朕入導之。數日復召士奇曰。如卿言。中宮果辭讓。雖太后不許。貴妃亦不受。然中宮意決矣。士奇曰。若此。願陛下待兩宮均等。無厚薄無崇庠。終之始之。昔宋仁宗廢

郭后而恩意彌篤。可監也。上曰。朕不食言。明日以諭義等。義等皆曰。善。上乃敕禮部。皇后自罹多病。不能承饋祀。重以無子。懷謙退。上表請閒。朕念伉儷重。屢拒不納。而后慍再三。不得已。已從所請矣。夫因其謙德而遂尊之。禮也。其稱號服食侍從。悉仍舊。不改如敕。乃更立孫氏爲后。而后竟廢。后乃退居長安宮。性本恬不喜事華飾。至是學清淨。奉黃老爲仙姑。張太后甚憐之。特召入居清甯宮。凡內廷朝會饗宴。必命后居孫后上。孫后常怏怏。英宗立。尊張太后爲太皇太后。孫后爲皇太后。后益謙讓。然視后如故。正統七年。太皇太后崩。后祭奠列名妃嬪中。竟不得與孫后齒。因痛哭不已。踰年亦崩。下外庭議喪禮。時楊士奇病。在告。諸臣就問之。士奇請用后禮葬。諸臣曰。此非內庭意也。士奇面床陰不言。諸臣竟用嬪御禮。別葬於金山。諡靜慈仙師。天順六年。孫太后崩。英宗皇后錢氏嘗事后。知后賢。每爲英宗言。后無罪廢。群臣畏太后殮葬。諡號皆無禮。傷之。英宗問李賢。胡母后以疾請閒耳。諡仙師。豈令典耶。朕欲尊上皇后。諡且飾其陵寢。饗殿神主。皆得更制。如奉先殿式何如。

原評曰。英宗復胡后位號與止宮妃殉葬皆足爲千古法式第

復位號事稍涉私嫌。猶不及孝宗之公。若止殉則度越遠矣。

賢頓首謝稱善。上敕群臣。皇考以胡母后多疾。

聽其請。閒朕以冲齡當母后令終。上諡無狀。心甚缺然。其改議尊諡。令所司修葺陵寢。饗殿如制。七年七月己未。禮部尙書姚夔等議上尊諡曰。胡太后入嬪先皇。久專宮閭。嗣任姒之徽音。慕黃老之清淨。讓位別居。優游卒歲。顧典禮未行。重違素志。尊崇有自。特發宸衷。夫有至行者。必受令名。慎追遠者。可風末俗。先太后謙讓如彼。我皇上克念如此。至德大孝。古今罕有。臣等躬逢盛事。不敢掩忽。謹議上尊諡曰恭讓誠順康穆靜慈章皇后。乙丑修陵寢。甲戌遣駙馬都尉石璟詣陵所上册寶焉。

宣宗繼后孫氏。鄒平人。永樂八年選入宮。十五年爲皇太孫嬪。二十二年改稱皇太子嬪。宣德改元册貴妃。時雖立皇后胡氏。而后以無子且多病。將遜位與妃。妃乃謬敬后。后病。妃故朝夕視。陽爲憂勞。及妃稱有子。后上表退讓。請定國本。妃猶固辭曰。皇后病已自有子。吾子敢先皇后子耶。宣德三年三月以后表遜。故竟册貴妃爲皇后。子爲皇太子。是爲英宗。英宗卽位。上尊號曰皇太后。車

駕北狩。后用于謙策。斥議遷者。而命郕王入監國。社稷安。郕王卽位。尊后曰上聖皇太后。時英宗在迤北。后嘗寄禦寒衣裘。手自縫織。及居南內。后時遣使問候。遺珍饌。且數自入視。會守者王城舒良密謀。伺后入。當白景皇帝。留后南內。后聞始不往。旣而石亨曹吉祥等謀奪門。密白后。后許之。英宗復辟。上徽號曰聖烈慈壽皇太后。先是宣宗冊后爲嬪。時賜嬪冠服。及冊妃。賜妃寶。皆非制。原評曰。此用略筆。後用詳筆。一詳一略。當與胡后記參看。明初宮閨無上尊者。時岷王徽煒。因禮部尙書楊善以請。英宗難之。曰。非祖宗法。貽後議也。其後尙寶卿錢溥。兵部尙書陳汝言。復以爲請。且曰。復辟時。非太后有詔。誰敢提兵入禁門者。今曹石等皆受賞。而太后尊號缺然。是逮卑而反遺尊也。上從之。然而明代之廢后。上后徽號。凡宮闈破例。皆自后始矣。后端慎而有裁決。然故識大體。其待外家皆有法。初王振肆橫。祭酒李時勉遇振車不下。振怒。廉時勉他過。械其首示文廟前。太后聞大驚。召上曰。祭酒者國子師也。至重。卽有罪。奈何戴囊頭辱之。謂觀瞻何。上謝不知。太后大怒曰。卽不知。何用汝作皇帝。帝遣問。知振所爲。立釋之。土木之變。

太后知于謙能任難。卽以侍郎陞本兵。復辟後。太后憐謙忠社稷。以不賞死。面詰上曰。何爲不留謙。上稱悔悟。至若后父忠。在永樂初。爲永城主簿。母董氏。年九十。有子五人。繼宗。紹宗。顯宗。續宗。純宗。及諸孫數十人。並以后故賜官爵。繼宗爵會昌侯。董興。董太夫人弟。亦以奪門功。封海甯伯。然太后無私外家意。時繼宗已侯。復有爲紹宗言者。上謂李賢曰。孫氏授官。必數請而後得之。然太后猶怫怫不樂。曰。我家有何功而冒濫至此。今左右復爲之求恩。謂慰太后心。不知正不爾也。賢頓首稱嘆。因曰。祖宗家法。外戚總不得預政。今會昌侯典禁中。太后知之乎。上曰。近侍初言京營者。所以禁非常。非皇舅領之不可。故與之實。非太后意。且太后未嘗不悔也。會顯宗奴客奪莊田。私造店房。奪佔人貨。上命議如法。其兄會昌侯乘間請。且乞太后念董太夫人。太后曰。豈可以親故飭國法也。敕還田。毀店房。羣械其奴客。戍之。天順四年。清冒迎駕功。許檢舉。繼宗檢舉其子弟家人。共二十餘名。上用李賢言。令革去家人。存子弟名。曰若白。太后不侯矣。六年九月崩。上尊諡曰孝恭懿憲慈仁莊烈齊天配聖章皇后。合葬景

陵主祔廟。

景泰吳太后者。宣宗妃景帝母也。丹徒人。宣宗以宣德中冊吳氏爲賢妃。景帝卽位。尊爲皇太后。英宗復辟。復稱宣廟。皇賢妃。成化中薨。父彥忠。先官都督。卒。子安封安平伯。天順元年削爵。

郭嬪名愛。字善理。鳳陽人。穎悟警敏。有文章名。宣宗聞之。納爲嬪。入宮二十日。卒。嬪自知死期。書楚聲以自哀。其詞曰。修短有數兮。不足較也。生而如夢兮。死則覺也。先吾親而歸兮。獨慚乎予之孝也。心傍徨而不能已兮。是則可悼也。

英宗朝
統天順

正

睿皇后。英宗后也。姓錢氏。直隸海州人。洪武初有錢萬者。以軍功

封昭勇將軍。世襲金吾指揮使。再傳及貴。由金吾指揮使陞中軍都督。追贈安

昌伯。

一作后族微
外家無封誤

娶明威將軍燕山衛指揮僉事包諒女。

一作后父貴以燕山
護衛陞指揮僉事誤

生后。正統六年正月。奉太皇太后懿旨。敕禮部選擇直隸南京鳳陽淮徐河南

山東西陝西官民家女子。年十三至十五。容貌端潔。姿性純美。中禮度者。有司

聘給其父母。親送詣闕。時后年十四。中選迎入宮。八年四月冊爲后。十四年上

北狩。后盡出中宮。所有賞仗變之。佐迎駕費。每夜露告天。罷卽臥地。因壤一股。復以久泣。故傷目。景泰改元。遷后仁壽宮。及迎上還。后乃隨上居南城。上復辟。太監蔣冕白于皇太后。謂后無子。周貴妃有子。請立周貴妃爲后。上怒。立斥之。先是太后陰以上爲子。人無敢言者。至是太后崩。后具言狀。且爲胡廢后白所枉。上始悟。然終莫知母宮人者爲誰也。甚恨。會后弟欽鍾以從征殉。土木難。上念之。欲封其子雄。而后辭甚至。上以是益重后。然終念后無子。恐他日蹈胡后轍。特于彌留時。遺命錢皇后。千秋萬歲後。與朕同葬。大學士李賢書冊藏閣中。憲宗立。上兩宮尊號。周貴妃倚子貴。故不欲與后齒。曰。豈有皇帝非其子而稱太后者。倡言錢后無子。損肢體。久病。當祿胡廢后故事。獨尊上生母爲太后。遂傳貴妃意。使太監夏時集外廷議。大學士彭時李賢交爭之。且曰。胡太后以讓位故。遲于上尊。今太后名位在。未嘗讓也。夏時曰。卽讓何不可。時曰。胡皇后讓位。宣廟在也。先帝已大行。臣子誰敢爲太后讓者。夏時厲聲曰。公等敢二耶。二卽罪矣。彭時仰天立語曰。兩宮同尊。皇上之孝也。臣子所不敢不尊者。正爲皇

上全孝德耳。錢太后已無子。又誰利耶。有太祖太宗之遺法在。又誰二耶。夏時入請命。良久出。令草並尊詔。時復與賢議。特加正宮二字以別之。乃上后曰。慈懿皇太后。而上周后曰。皇太后。當是時。上方營裕陵。時與賢復疏營三壙以俟。而上不之許。成化四年。太后崩。復集廷臣議葬事。彭時首言梓宮當合葬裕陵。主祔廟。故制也。有何議。夏時曰。所議者。謂慈懿無子。損肢體。必難以入山林耳。彭時曰。慈懿母儀三十年。當先皇帝在時。未嘗以損肢體無子違寢御也。夫先皇帝不異室而爲臣子者。反謂其難與同穴。吾未敢聞。況先皇帝遺命在耶。原闕約四百餘字。前既共所尊。而身後更同其享。此後禛觀型所由起也。疏入。再下議。吏部尙書李秉。禮部尙書姚夔。廷臣九十九人。皆議如時言。且曰。萬一大行皇太后與皇太后。千秋萬歲後。不合葬同祔。安保後來無議改者。上曰。卿等言是也。但朕屢請皆未得。乖禮非孝。違親亦非孝。卿等爲朕圖之。明日詹事柯潛給事魏元等疏上。又明日尙書姚夔等合疏上。皆執議如初。內旨猶傳別揆葬地。夔等乃率百官跪伏文華門候旨。自己至申。上諭群臣退。衆叩首曰。不

得旨不退。于是商輅劉定之等皆入內勸上降旨如群臣議。群臣齊聲呼萬歲。退。七月丙子。上尊諡曰孝莊獻穆弘惠顯仁恭天欽聖睿皇后。九月庚申。祔裕陵。然猶異隧。去英宗元堂約數丈。中窆之而虛右壙。待周太后。則隧道通焉。且又不得與于奉先殿配祭。弘治十七年。周太后崩。孝宗問劉健。李東陽謝遷出裕陵圖指示曰。此有二隧。然是隧中通。而是隧獨否。此當日中官爲之外廷未曉也。朕見成化間有彭時姚夔等疏。嘆先朝大臣爲國如此。而猶有遺憾爾。爾健遷等乃極言當時委曲先帝不得已之意。上曰。當時先帝亦惑于形家言耳。司天詔上干陵堂。恐漏風氣。故因循聽之。朕今欲爲之一決。因以指畫帛曰。皇堂窆天地閉。叶音必列反皇堂一通。風氣流行。朕意既定。可無慮此。健等力贊之。他日御便殿。問健等曰。太后祔廟禮如何。健等言。祔二后自唐人始也。祔三后自宋人始也。漢以前一帝一后而已。曩者定議合祔配享。以孝莊太后居左。今大行太皇太后居右。如唐宋故事。臣等以是不敢復請。上曰。二后已非。况三后乎。遷曰。彼三后者。謂一繼立。一生母也。上曰。凡事須師古。太皇太后鞠育朕躬。朕

豈敢忘顧私情耳。祖宗舊制一帝一后。今設並祔。則改壞祖制。自朕始矣。不可。且卿輩尙不知奉先殿祭也。皇祖特座一飯一匙而已。夫孝穆皇太后生朕。朕且設奉慈別祀之。今仁壽宮前殿寬。朕意欲奉太皇太后於此。他日奉孝穆王太后于傍。歲時享祀。如太廟禮如何。原評曰聖主舉動可感東陽對曰。陛下言是也。上曰。雖然。此大事。須卿等確議。時吳寬以禮部尙書掌詹事府事。立議曰。魯頌姜嫄闕宮。春秋考仲子之宮。皆別廟也。漢唐亦然。自宋始祔祭。其禮已謬。然猶是諸帝繼室生前作配。非後世子孫所追尊者。惟李宸妃沒。仁宗悲慟。乃爲追祔。雖至情。然實非禮不足法。上覽議大喜。翼日出奉先殿圖示群臣。指仁壽宮前可廟處曰。廟成并遷孝穆太后於此。皆對曰善。再問再對。遂命爲廟名。孝肅太皇太后殿在仁壽宮前。奉先殿西。其制中奉孝肅。左奉孝穆。中外稱合禮。頃之奏監天欽陵事。歲向不利。內官監亦言英廟寢傍難以輕動。竟不行。上意終不已。就陵殿移英廟神座居中。孝莊居左。孝肅居右。憲宗太后周氏。英宗妃也。昌平人。初入宮爲貴嬪。正統十二年十月生太子。卽

憲宗也。天順元年四月冊爲貴妃。八年正月。憲宗立。尊爲皇太后。與慈懿並成化二十三年四月。上徽號曰聖慈仁壽皇太后。是年十月。孝宗卽位。加尊爲太皇太后。而徽稱如故。太后當憲宗時。憲宗孝。所以事養者備至。五日一朝。燕饗必躬親。每出遊。至尊必躬導寶輿。太后意所欲得。惟恐不得。當稍不豫。卽憂疑見顏色。以故慈懿祔葬事。獨難。太后意久不能決。及孝宗入宮。紀太后暴薨。懼懼不測。太后親育之。飲食起居。必護視。得以無恙。故孝宗之事太后。過於憲宗。日夕問寢膳。定省不輟。太后偶瘍。孝宗夜籲天。適春郊當宴。以太后未安。詔罷太后病已。特詔諭群臣。謂疇昔憲宗以天下養。克盡子道。今皇帝嗣位。實能紹述先志。奉養加厚。予偶嬰瘍疾。皇帝夜起籲天。爲予請命。春郊罷宴。問視惟謹。頃者醫藥奏功。飲食如舊。以昔視今。父子一道。予甚嘉焉。又謂予感帝孝。以爲天下物皆帝所有。無以報帝意。故託之語言。以彰聖德。原評曰。孝宗實有可感語。亦諄切堪念。且命副藏內閣。傳之無窮。而上手是時。亦奉表稱謝。一時中外稱慈孝焉。十一年十月。太后以清甯宮災。遷居仁壽宮。越一年。清甯宮成。太后還居之。先是太后

家以恩澤封者甚衆。太后父能由慶雲伯進侯。加太傅。及死。進贈甯國公。諡榮靖。弟壽嗣慶雲侯。或封長甯伯。尋加世襲。壽子璋瑾瓚瑛。或子瑋璫。皆授錦衣衛指揮千百戶。或嘗與張鶴齡忿爭。聞上。上以太后故不問。至是。或家有賜田。有司請釐正。上難之。太后聞曰。奈何以我故。令皇帝不得守法。使歸田於官。而后有長弟名吉祥者。兒時好游。游即去其家。爾時太后未入宮也。久之不歸。至天順中。爲僧大覺寺。好游如故。晝游他所。夜即宿報國寺伽藍殿中。太后亦忘之。報國寺者。都城宣武門外小寺也。太后夜忽夢伽藍神來告。妃弟在我殿中宿。妃知之乎。其夜英宗夢亦如之。醒而相語。初不信。遣小黃門物色之。至則小黃門見吉祥坦腹臥伽藍殿中。遂擁以行。入白太后。太后時爲妃以告帝。帝召入大喜。使具言生平。太后泣下。因曰。弟爲僧。何如爲皇親耶。吉祥曰。爲皇親何如爲僧。原評曰其前後行徑只此一語已了乃遣還寺。厚賜之。憲宗嗣位。太后爲拓報國寺。建大慈仁寺居之。賜庄田數百頃。其後壽與或歸所賜田。或身後隨見奪。而吉祥庄田藏寺中者。雖至今猶存焉。弘治十七年三月。太后崩。議上尊諡曰孝肅。

貞順康懿光烈輔天成聖太皇太后詔撰冊文未及。上孝宗尋與劉健謝遷議立奉慈殿別祀不祔廟。遂罷諡。仍稱太皇太后。語在睿皇后記。嘉靖十五年遷太后奉慈殿主與紀邵二太后主並祀於陵殿。不繫審純別嫡庶云。王皇妃順天人。與胡惠妃皆有寵。英宗遣命止宮妃殉葬。有云王妃他日宜合葬。惠妃葬桃山。亦宜遷來。以下諸妃皆任其年終次第陪葬。其後惠妃仍葬桃山。諸妃皆別葬金山。然竟無殉者。初太祖以四十六妃陪葬孝陵。其中所殉惟宮人十數人。洪武三十一年七月。建文帝以張鳳李衡趙福張弼汪賓孫瑞王斌楊忠林良李成張敏劉政由錦衣衛所試百戶散騎帶刀舍人進爲本所千百戶。其官皆世襲。以諸人皆西宮殉葬宮人父兄。世所朝朝天女戶者也。成祖以十六妃葬長陵。中有殉者。仁宗殉五妃。其餘三妃以年終別葬金山。洪熙元年七月。宣宗追諡皇庶母貴妃郭氏諡恭肅。淑妃王氏諡貞惠。麗妃王氏諡惠安。順妃譚氏諡恭僖。充妃黃氏諡恭靖。其郭妃二王妃。卽永樂二十三年十月所冊立者。宣宗殉十妃。宣德十年八月。英宗追贈皇庶母惠妃何氏爲貴妃。諡

端靖趙氏爲賢妃。諡純靜。吳氏爲惠妃。諡貞順。焦氏爲淑妃。諡莊靜。曹氏爲敬
妃。諡莊順。徐氏爲順妃。諡貞惠。袁氏爲麗妃。諡恭定。諸氏爲恭妃。諡貞靜。李氏
爲充妃。諡恭順。何氏爲成妃。諡肅僖。其冊辭曰。茲委身而蹈義。隨龍馭以上賓。
宜薦徽稱。用彰節行。嗣後皆無殉自英宗始。惟景泰帝尙以唐妃死。則天順元
年事。在遺詔前。

勝朝彤史拾遺記三

蕭山毛奇齡大可著

景泰朝帝景皇后汪姓。順天人。祖泉金吾左衛指揮使。父瑛中兵馬指揮使。皆以后封。故進都督。正統十年八月。英宗選擇邸王妃。得后而賢。冊立之。十四年。英宗北狩。邸王由監國卽帝位。冊爲皇后。時京師新被鹵。凡死事及老弱殺傷者。暴骨滿原野。后下懿旨。令官校掩埋。且勸帝設齋醮。卹之。第后無子。生二女。而次妃杭氏生一子。名見濟。景泰三年五月。將廢英宗子憲宗爲沂王。而立見濟爲皇太子。議定。后執不可。謂若此。恐礙監國名。夫猶是祖宗之天下。已代之爲帝。而反其子。讓也。讓則公公則賢名皆歸之上。怒曰。謂見濟非而子耶。竟廢英宗子。立見濟。并冊見濟母杭氏爲后。而后竟廢。禮部郎中章綸上弭災疏。首請復中宮位號。以正母儀。忤旨。榜掠幾死。英宗復辟。仍令稱王妃。會景帝晏。駕廷臣議王妃之殉。時杭氏先景帝崩。將及后。李賢曰。景泰妃雖嘗爲后。然旋見幽抑。生亦何有恩而死殉之。且遺二女幼。可憫也。上惻然曰。卿言是。而憲宗時爲太

子雅知后不欲廢。已感后意。因言上令他妃殉。遷后外王府。而留養二女於宮中。當是時。錢皇后在宮。憂勞哭泣。日藉后慰卹。有如妯娌。而孝肅孫太后。以母后烜赫頓失勢。危疑見門閥。賴后事恭謹多保護。願有以報后。至是后淪落。一興一衰。因於后歸國時流涕飲餞。凡在宮所有服御賞器。及其故宮人答應。皆令隨后遷外王府。而於是外王府所蓄。與宮禁等。原評曰。與廢情。形寫得綿邈。后既歸。齋素事佛。每歲時令節。太后與后。猶必召入飲宴。叙家人禮。而二女稍長。亦齋素。矢不下嫁。至憲宗強之始嫁。其一於郡馬王憲。惟后父瑛於天順改元。仍降都督。爲兵馬指揮使。然亦隨進爲錦衣僉事。終后之世。皆無恙。正德元年十二月薨。壽八十。廷臣疑祭葬。王鏊曰。葬以妃祭。以后遂用皇妃禮。合葬金山。明年上尊諡曰貞惠安和景皇后。后性本醇懿。然多執持。不輕徇。英宗既復辟。嘗入內帑。檢故物。問大監劉桓曰。記有玉玲瓏繫腰。今何在。桓言景帝嘗取去。當在汪所。上遣使再三索。皆對以無有。左右勸后出還上。后不肯。既而語人曰。是實有之。但景帝雖廢。亦嘗爲天子七年。一腰繫何不可消受。乃迫取耶。且景之天下。尙

歸之上。何有此數片玉。當上索時。吾實怒而投之井矣。

評曰賢后此節尤不合少舊本多刪句不合

其執持如此。後有言后出攜甚多者。英宗命檢取。得銀二十萬。他物稱是。則所蓄可知矣。后賢而壽。與景帝同齒。閱歷數朝。復位號。而杭氏以景泰七年庚子崩。諡孝肅。祔廟。至天順初。革封號。遷主別室。其一子即懷獻太子。早卒。

唐氏者。景帝妃。都督唐興女也。以景泰七年進宮。八年封皇貴妃。寵幸冠後廷。嘗乘馬隨帝遊西苑。馬驚。妃墮。帝乃命中官劉茂。選御廄之最良者。日控習以待。天順元年二月。革封號。郕王薨。群臣議殉葬。及妃。妃無言。遂殉之。葬金山。

憲宗朝成化

憲宗廢后吳氏。順天人。天順八年七月。冊立為皇后。方憲宗居東宮時。

有宮人甫笄。竊侍太子起居者。即萬妃也。寵甚多。無禮。后立而惡之。摘其不法。

加杖焉。

原評曰后能杖萬妃雖廢何憾舊史猶諱言祇稱帝所寵宮人何威懾乃爾

先是英宗擇太子宫妃。有司以

十二人進。英宗親選得三人。一吳氏。一王氏。一柏氏也。三人皆留居宮中。而第王為首。會孝肅太后與英宗先後崩。憲宗不敢主。復奉太后旨。命禮部選擇三人。選如故。而掌選者為司禮牛玉。遂選立吳氏。至是憲宗怒。謂吳氏德不稱。輕

率好歌曲。不足母天下。且選立非先帝意。下掌選詔獄。重鞠之。詞連后父俊及后弟雄。謂立后時。玉以王氏非已選。說太后更易。而雄俊父子遂賂玉。獄上。上乃白太后。敕諭中宮。爾輕浮粗率。留心曲調。不足以敬承宗廟。表正閨闈。其上皇后冊寶。退居別宮。且下詔群臣。朕仰遵憑几。勉舉大婚。時方在疚。不忍聞命。矧敢知其事。特念皇后位重。當先帝臨御。親爲朕簡擇賢淑。其時已定。王氏儲俟及時。而太監牛玉。朦朧奏請。易選吳氏。禮成之後。朕親見舉動輕率。德不稱位。因察其實。始知非預立者。用是不得已。請命母后。已廢吳氏。閒住別宮。更冊王氏。以仰承先帝遺意。時后父俊已授都督同知。乃敕與其弟雄同戍登州。而發牛玉孝陵種菜。聞者冤之。初典璽局局丞王綸者。侍憲宗東宮。侍讀錢溥。嘗教內書館。綸受學焉。時尙寶司丞朱奎以幼童陪讀。皆相狎。及英宗不豫。溥意綸必入司禮。密遣奎通綸。綸因偕奎造溥宅。歡飲必竟夕。而大學士陳文者。居第與溥隣。每綸至。溥必邀文俱。而是夕獨否。覘之。則屏人語選婚事。然未有屬也。旣而英宗崩。李賢當草詔。文掣賢筆曰。無庸。有草之者矣。錢侍讀與綸綸計。

且代公賢領之未發也。會英宗大殯。綸侍立外。表而襲紹。上患之。玉亦恐綸卽柄用。遂悉數綸過。且發其通溥狀。降綸南京閒住。而謫溥爲順德縣知縣。凡與通者皆得罪。玉勢大振。至是傾玉者。亦互相根株。玉姪侍讀牛綸。甥吏部員外郎孫琮。皆革職。而南京六科給事中王徽。王淵。朱寬。李翔。李鈞等。復群起劾玉。詞連李賢。謂賢與玉通。上重黜徽等。乃罷。然兩家傾陷者。皆借兩后事抵讎。言詞曖昧。多周章。而於是廢立之勢成。竟難挽焉。后退居西宮。適紀氏以懷妊。故懼萬妃不測。居后宮傍。生孝宗。而后保護之備至。孝宗卽位。念后恩命。服膳起居一如母后禮。且將復后位號。而抑於孝貞。遂已之。時邏卒有捕后姪盜幽宮寶器者。召問之。曰。吳后自門隙投出。非盜也。上憐之。置不問。且復官其姪錦衣衛百戶。原評曰。聖主舉動可感。此當與神宗敕穆廟恭妃事參看。正德中。后薨。劉瑾欲焚屍以滅其跡。閣臣

力持之。乃罷。旣而議以妃禮葬。

王皇后。上元人。中軍都督追贈阜國公王鎮女也。英宗初。擇太子妃。以后與廢后吳氏。柏氏。留宮中。意屬后。英宗崩。太監牛玉請太后冊立吳氏。而后與柏居

別宮。憲宗不悅。下牛玉詔獄。仍廢吳后立后焉。時萬妃有寵。吳后與妃不相中。因見廢。后賢而有智。鑒吳氏。一以曲處之。嘗遊西苑。妃車先后行。歲時朝見。不執妃禮。昭德宮醞釀。每加於中宮。帝嘗令妃戎服侍酒。使太監段英掌宮。后一無所忌。成化二十三年。孝宗卽位。尊爲皇太后。孝宗崩。后傳諭內閣。自古帝王能力惇孝行。竭事慈宮。如大行皇帝者。恐不多得。先生輩應定一佳諡傳之。故事上列帝諡。率上十六字。而末統以孝。惟孝宗獨用爲廟諱。感后旨云。弘治十八年。武宗卽位。加尊太皇太后。正德五年。加上尊號曰慈聖康壽太皇太后。十三年二月后崩。合葬茂陵。三月上尊諡曰孝貞莊懿恭靖仁慈欽天輔聖純皇后。祔太廟。

孝穆紀太后者。憲宗妃孝宗母也。賀人本蠻土官女。成化中征蠻。太后在俘中。久之。中宮人選。授女史。以警敏。俾守內藏。時萬貴妃寵而妒。他妃幸上者。皆治使傷妊。卽妊百計使墮。由是他妃勿敢進。上嘗行內藏。紀太后應對稱上意。上悅之。就藏幸太后。萬貴妃察知。恚甚。至不食。嘿俟數月。令婢鉤治之。婢謬報曰。

病瘡。於是貴妃譖太后上前。謫居安樂堂。久之。孝宗生。太后使門監張敏溺焉。敏驚曰。上未有子。今縱不敢使上知。顧奈何棄之。稍哺粉餌。飴蜜。藏之他室。當是時。貴妃雖日伺。無所得。且甚秘。至五六歲。尙不敢剪其胎髮。唯吳太后廢居西內。近安樂。獨往來知其事。時時就哺養。上不知也。他日上召張敏。櫛照鑑。歎曰。冉冉矣。而無子。敏伏地曰。死罪。萬歲見有子。何言無耶。上叱安得有。敏伏地叩頭曰。有。祇恐不能保耳。倘能保。子見在也。上曰。吾自能保之。顧安得有。有安在。敏叩頭言狀。上急起入西內。令召見。使至安樂堂宣旨。后抱孝宗泣曰。事已覺。吾無生矣。兒去。見黃袍有鬚者。兒父也。乃爲孝宗易衣。置小車中。昇之行。既至。孝宗髮被地。走入上懷。牽上衣。上顧視大喜。且泣下曰。我子也。類我。一云太監段英乘間爲妃言。妃念已不復孕。乃啓上召見。非是。原評曰。此段淋瀝不必言。且亦倉卒處。寫得安治與他本所記召見處迥然不同。會其年五月。乾清宮災。外廷憂上無繼嗣者。稍稍見章奏。上乃使司禮監懷恩出。謂大學士商輅等曰。主上有子六歲矣。莫之知。因具道故。群臣聞之。皆大喜。卽請爲命名。擬上不稱旨。上自名之。於是後宮報有子者。相繼至。上乃移太后居永壽宮。數

數召飲酒甚懽。貴妃日夜泣怨曰。群小無狀。不使我知其六月。候上召太后飲。置毒酒中。暴薨。上悲悼之。意貴妃而不敢言。賜諡恭恪莊僖淑妃。張敏懼。亦吞金死。孝宗竟立爲太子。成化二十三年十月。孝宗嗣位。卽以其年十二月。追封皇太后。諡孝穆慈慧恭恪莊僖崇天承聖皇太后。遷葬茂陵。奉主奉慈殿。時貴妃已死。中外譁然。切指貴妃家。監察御史曹璘等。請告貴妃罪於大行皇帝。斥其葬。削其諡號。孝宗不許。曰。何以安先帝。遂已。乃特遣太監蔡用之賀。求紀家得紀父貴。紀祖旺兄弟二人。以聞。上旣悲傷念太后。聞得其家兄弟來。大喜。詔改名父貴爲貴。授錦衣指揮同知。祖旺爲旺。授指揮僉事。賜予金帛第宅莊田。奴婢不可勝計。追贈太后父爲中軍都督府左都督。媼爲夫人。其曾祖祖父亦如之。遣修太后先塋之在賀者。置守墳戶。復其家。而其旣以僞敗也。先是太后在宮中。嘗自語世賀縣姓紀親族。幼不能知也。太監郭鏞陸愷皆聞之。愷故廣西人。姓李。蠻中紀與李同音。因妄稱太后兄。一云愷故無爲州巢縣人。其時冒太后兄世官錦衣百戶。遙嗾鎮守兩廣太監爲訪其族來。而族虛無人。唯愷女兄夫韋父成者出冒之。有司

遂待父成以戚。晚名所居里曰迎恩里。於是貴旺者謀曰。父成本韋氏。而猶冒焉。况我姓李。因詐爲宗系。上有司。有司莫辨也。既而父成詣闕爭。聽者逐父成。而仍不能察貴旺是否。及上使使者修治后先塋。蠻人凡姓李者。皆自稱太后家。數輩見使者。使者訝之。謂紀也。而李及還。奏貴旺不實。上復遣給事中孫珪。御史滕祐。間行連賀間訪之。珪祐微服入。猺獠中察得其僞狀。歸奏上。謫罪鑪等。而戊貴旺邊海。於是數求太后家。竟不得。弘治三年八月庚寅。禮部尙書耿裕奏曰。臣伏見陛下追念太后深渭陽之恩。重力微之痛。魏書力微無舅家使者數輩相訪。見似而喜。上聖之降恩。昊天之極感也。但粵西當大征之後。人民犇竄。歲月悠遠。踪跡難明。陛下求之益勤。恐天下鑿空以應。陛下者益巧。昔者孝慈高皇后。尋求家族。久不克獲。乃立廟宿州。春秋祭祀。以表霜露。今紀太后幼離西粵。賓天已久。連賀非徐宿中原之地。嬪宮無母后正位之年。陛下風木雖悲。訪詢雖切。安能得其要領。獲其疏屬哉。臣愚謂可仿徐王故事。定擬太后父母封號。立祠桂林。春秋致祭。必有在天之靈。來歆明祀者。上曰。孝穆皇太后。蚤棄朕。

躬每一思念。愁焉如割。向謂宗親尙可旁求。甯受百欺。冀獲一是。卿等謂歲久無從物色。請加封立廟。以追慰聖母地下之孝。朕虛有此心。終天痛之。其依我皇祖故事。封后父。推誠宣力。武臣特進先祿大夫柱國慶元伯。諡端僖。后母伯夫人。有司立祠桂林府。歲歲祀。大學士尹直撰哀冊。有觀漢家堯母之門。增宋室仁宗之慟。二語。上燕閒念誦。輒流涕。

邵貴妃者。昌化人。興獻王母也。父林淘。沙軍。杭俗軍衛。多貧人無業。取民屋傍沙淘之。得金以易食。他人則否。後凡淘沙者。卽非軍。亦皆以軍名之。一作妃兵家女。年十

四聘者。七人輒死。有指揮聘之。已上馬矣。墮而死。其父充漕卒。携妃至京。生一女。鬻於杭。鎮守太監。太監愛其慧。爲

授書。讀唐詩。詩餘數千首。稍長。有容色。知禮。太監攜還京。會中宮選掌禮嬪妃。

應選時。萬妃妒甚。妃託微疾。居外宮。未進也。偶夜坐。自詠所製紅藥詩。憲宗過

聞之大喜。遂召幸。原評曰。今人見此。必以爲小。說家言矣。紅藥一本作紅葉。成化十二年。冊爲宸妃。二十三

年。進貴妃。生三子。一興王祐杭。一岐王祐楡。一雍王祐標。興王卽睿宗也。興王

之國。妃不得從。興王作思親詩上妃。妃答之。正德十四年。世宗繼大統。妃老矣。

尚在宮。目盲。喜其孫爲皇帝。摸世宗身頂至踵。乃推本所生。越舊制。進稱皇太后。嘉靖元年三月壬戌。頒詔曰。自古帝王以孝治天下。尊親之禮。其來遠矣。朕祖母邵氏。聖善慈仁。靜專明哲。克事憲祖。贊理內政。燕謀兆祥。澤隆啓祐。濬發慶源。若斯之遠。而徽號未加。朕甚恚焉。其尊稱曰壽安皇太后。大赦。乃封太后弟昌化伯大爲林治墳西湖。費可十餘萬。名邵皇親墳。杭人訛呼爲邵王墳。是年八月。上選婚。初傳昭聖皇太后懿旨。昭聖者。孝宗張皇后也。旣而諭內閣。候壽安皇太后旨行。大學士楊廷和等再疏言。事不歸一。無以昭示中外。仍改傳奉昭聖旨。十一月。太后崩。卜葬椁子嶺。世宗欲祔葬茂林下。廷臣集議。禮部尙書毛澄等。知上意所在。不敢爭。楊廷和言。宋甯宗欲祔孝宗於裕思。諸陵朱熹以爲祖陵不當數興工作。驚神靈。今祔壽安於茂陵。不幾驚憲祖靈乎。如原議便。上猶豫未決。後用工部侍郎賈詠奏。卒合葬茂陵。明年上尊諡曰孝惠康肅溫仁懿順協天佑聖太皇太后。別祀奉慈殿。尊遷主陵廟。改稱皇后。卽孝肅孝穆亦如之。皆前此未有者。太后嘗曰。女子入宮。無生人樂。飲食起居。皆不得自

如如幽繫然。以後選女入宮。母下江南。此我留大恩於江南女子者也。江南人家亦幸無以丐恩澤送女子入宮。當時皆以爲良言。太后姪喜旣爲昌化伯。一年卒於蘭嗣。五年又卒。無嗣。其族人爭襲下吏部。會郭勳張璠方獻夫胡世甯李承勳議。世勳議曰。皇上必嗣邵氏封者。推皇考所自於皇太后。又推皇太后所自於其父母。與其族氏子姓。可謂遠矣。今皇太子子孫不幸皆絕。而爭祀者。又世次不明。誠恐賜之一門之爵。反瀆其百代之宗。祚祀不享。彌滋貿亂。莫若留封爵量加恩澤。不報久之特降旨。令其族人杰嗣伯。又久之。革去其後族人貧。毀邵王墳。拆其石。賣官築湖塘焉。

萬妃青州諸城人。父貴爲本縣椽史。以坐法謫居霸州。妃生四歲。選入掖廷。爲聖烈孫太后宮人。及笄而妍。充小答應給事仁壽宮。憲宗爲太子時。見而悅之。因竊侍太子。旋命司秩。改侍太子宮。有日矣。及卽位。吳后初立。猶以宮人禮視之。加扑責。吳后廢。王皇后繼立。鑒吳后事。每損意優容之。妃亦警敏。故善迎帝后。且籠絡諸嬪御。諸嬪御畏之。無敢忤者。上嘗游幸諸宮。必令妃袴褶爲前。

驅猥褻備至。然猶未立爲貴妃也。成化二年正月。生皇第一子。上大喜。爲遣中使四出祈祐諸山川之神。三月封貴妃。既而皇子薨。妃亦自是不再振。於是大媚忌。絕嬪御進幸。卽偶有進幸者。必藥之。墮其胎。且有從是死者。柏賢妃生悼恭太子暴卒。卽孝宗之生。頂上有寸許無髮。皆藥所中也。時中外洶洶。皆知妃無狀。上將乏嗣。將憂之。言者每勸上溥恩澤。廣御幸。然未敢顯言妃之妒也。惟給事中李森言及之。而妃寵益甚。初居昭德宮。後復移安喜宮。進封皇妃。服用器物。每侈僭在中宮上。會彗星見。六科給事魏元等上疏曰。竊見春來災異疊仍。近者彗星又見東方。光侵台垣。此皆陰陽相薄之所致也。臣聞陰陽分政。不可參貳。頃傳中宮昭德。彼此相亢。一若有參貳之者。曩者大學士彭時。禮部尙書姚夔。每以爲言。陛下謂此係內事。朕自處置。臣等聞命以來。屏息傾聽。將半年矣。而處置未聞。原評曰。彭姚二公疏諫。不另出附見於此。此亦作法。但傳尙食所司昭德進饌。不減中宮。夫宮牆雖深。視聽甚近。祗席雖微。懸象甚著。陛下富有春秋。震位甚闕。豈可以宮廟社稷之大。聽其蠱蔽而不思固國本安民心哉。不聽。妃益驕恣。凡四方

所進獻珍異奇巧必歸之妃。中官卽用事。稍忤妃。立見斥逐。妃所親倖者。出外鎮守。如錢能覃勤。汪直梁芳。韋興輩。皆假貢獻科民財。中外騷擾。至爲妃求福。凡一切祠廟宮觀齋醮懺禮之費。竭水衡輸之。宮中帑藏。爲之一空。上嘗指語芳興曰。帑藏之空。由汝二人。汝知之乎。興懼不敢言。芳仰言曰。臣爲陛下造齊天之福。何爲藏空。卽以所建祠宇歷數之上曰。我或恕汝。恐後人無汝恕者。蓋指東宮也。芳等退而懼。時上方鐘愛興王。或爲芳等謀曰。不如語昭德勸上易之。立興王。是昭德無子而有子。興王無國而有國。如此則共保富貴無已。豈直免禍哉。然之言於妃。先是東宮生母薨。孝肅皇太后養之。每囑之曰。貴妃召爾食。勿食也。旣而妃進太子羹。太子却之曰。疑有毒。不食。妃恚曰。是兒數歲。卽如是。他日魚肉我矣。氣憤不能語。至是力勸上易儲。會泰山震。台官奏東朝有戒心。上覽奏悟曰。天意也。事遂寢。二十三年春。上郊天。大霧。人皆訝之。明日慶成宴罷。上還宮。忽報貴妃薨。妃體肥。是日以拂子撻宮人。怒甚中痰死。上聞報。憮然曰。萬使上去。吾亦安能久矣。爲輟朝七日。諡曰恭肅端慎榮靖皇貴妃。葬天

壽山。初妃父貴。以兵馬指揮使進都督同知。兄通錦衣衛都指揮使。通妻王氏。出入掖庭。大學士萬安呼丘嫂。每邀之來家。敬禮之。朝士倖進者。爭趨通門。弘治初言者藉藉。御史曹璘請削妃諡號。而魚台縣縣丞徐瑱請籍萬氏家。窮治紀太后暴薨狀。孝宗不從。遂已。語具紀太后記。

卷四

四

集

勝朝彤史拾遺記四

蕭山毛奇齡大可著

孝宗朝

弘治張皇后。孝宗后也。興濟人。父櫟。母金夫人。夢月入懷。生后。后當適人。其

所當適者。忽大病。及選爲太妃。則前所當適者病已。孝宗卽位。立爲后。篤愛宮中。同起居。無所別寵。有如民間。伉儷然者。櫟自都督同知封壽甯伯。其卒也。加贈昌國公。子鶴齡嗣后。而鶴齡弟延齡。亦從都督同知。進封建昌伯。並加保傅。其他群從。以後故受中書舍人及錦衣百戶諸官者。不可勝數。帝又爲后立家廟於興濟。土木閎麗。明世外戚之盛。無過張氏者。后知大體。不干預政事。而外家稍盛。多側目。帝陰爲之解。山東副使楊茂元。以何決論事。言水陰象失職。以後故。后怒甚。必殺茂元。上爲后徼茂元至。薄謫之。而御史胡獻論延齡。鶴齡上下之獄。竟解。戶部主事李夢陽言二齡。二齡奏夢陽謗訕。母后當斬。金夫人入泣訴。上下夢陽詔獄。他日上與后夜游南宮。二齡侍酒半。上召鶴齡膝前解之曰。母使我以外戚殺諫臣。鶴齡免冠謝乃已。帝之所以內應后。而外處群臣。

若此。后生武宗及蔚王厚燁。至武宗卽位。尊爲皇太后。正德五年。加慈聖皇太后。武宗崩。太后委政楊廷和。散豹房。收江彬神周下獄。罷威武團練官軍。革皇旂校。而遣各邊鎮守太監之在京者。凡喇嘛哈密諸屬國留侍者。皆使還國。一切政務。皆整飭儲備。以待世宗。世宗入嗣。加稱聖母昭聖慈壽皇太后。已而復進聖帝昭聖康惠慈壽皇太后。初。母太后已用璵議。母本生太后。而以后爲皇伯母。居仁壽宮。十五年。進昭聖恭安康惠慈壽皇太后。二十年八月辛巳崩。諡曰孝康靖肅莊慈哲懿翊天贊聖敬皇后。合葬泰陵主祔廟。后正位中宮。侍孝宗者十八年。歷武宗朝爲太后十六年。及世宗嗣位。又二十年。其長年享尊宮中。比之孝誠張太后。獨太后定策迎立世宗。而世宗事之不以禮。初興國太后迎入宮。后尙以藩妃相視。稍抑之。及上入朝。后頗倨。上以此銜后。當大婚時。初傳昭聖旨。而卽以壽安易之。及三年二月。興國太后誕期。敕命婦朝賀。燕賚倍常。至后誕。獨免賀。修撰舒芬具疏言昭聖誕節。乃陛下承歡之會。所當聚下歡心。以奉事其親者也。今處傳免賀。遠近驚疑。宜別降綸音。以彰至孝。敕

奪俸三月。御史朱淵言。昭聖手携神器。親授陛下。母子至恩。天日昭見。幸值千秋。義應請賀。縱母后固辭。陛下猶宜敦請。豈可以傳免之旨。出自陛下。命建詔獄。又御史馬明衡言。暫免朝賀。在平時則可。當此議禮紛更之時。忽聞報罷。安得無疑。使此旨出自太后。則必有因事拂鬱。生今昔之感。此不可不有以慰之。若出聖意。則母后在宮。恩同一體。豈可以本生嗣統分等殺哉。下北鎮撫拷訊已而。御史陳逅。季木員外郎林惟聰。又言陛下以宮闈之故。罷及言官。其於本生正統之義。軒輊已極。忠臣義士。尙敢慷慨言天下事乎。并逮訊之。會后弟延齡爲人上變。以殺人謀逆坐族誅。原評曰。世宗隱仁大不可問。此篇芝芝具良史筆意。刑部尙書聶賢覆言。無左證。卽有謀。亦未成。世宗怒曰。論謀逆者。謀不謀耳。以成否耶。詰責賢等。使急促窮治。太后皇恐無所出。會哀冲太子生。太后請入賀。上知太后欲有言。謝不見。太后使人請。亦不許。閣臣張孚敬乃上奏曰。延齡過惡有之。顧實未反。且孝宗皇帝。獻皇帝兄也。延齡其懿親。陛下宜推獻皇帝友愛之情。以全椒房之義。毋傷伯母心。世宗降手書曰。親不過同姓。同姓爲逆。其能免乎。天下

者。高皇帝天下。孝宗皇帝守高皇帝之法者。卿慮傷皇伯母心。亦慮傷高孝二廟心耶。孚敬復奏曰。臣何敢爲延齡游說。但臣受恩重。不敢不對。當陛下嗣統時。昭聖太后欲子陛下。在朝諸臣。亦曾多設謬妄惑悞太后。陛下獨用臣言。排破衆議。孝隆所生始尊太后曰伯母。然而朝士歸過陛下。至今未已。茲者延齡被罪。大小臣工。嘿無一言。豈以爲延齡果可誅。太后不足顧哉。誠幸太后一旦不得所安。以深陛下之過耳。夫謀逆之罪。滅人種類。必欲成獄。當坐族誅。昭聖皇太后。獨非張氏人乎。臣又不審陛下可以處此。世宗乃第坐延齡殺人罪。絞降鶴齡。南京錦衣衛指揮。會冬月慮囚。上欲卽誅之。令考問漢薄昭故事。孚敬又奏曰。明律皇家祖免以上親。太皇太后皇太后總麻以上親。皇后小工以上親。皇太子妃大功以上親。犯罪當議。公侯誓券有免死文。延齡戚則皇太后親也。爵則侯也。宜緩與否。似應議。上曰。且爲卿已。既有男子班明者。奏鶴齡私通益莊王。造符呪壓帝星。上逮鶴齡道死。而市人劉東山者。陰賊人也。以他事繫獄。與延齡居。延齡久繫怨望。時採擴故事寫成帙。題其端曰。君道不明。東山

竊取之。他日牢吏弛延齡鉗。繫繼東山。東山不受繼。吏笞焉。東山忿。因挾延齡手書上奏。奏及吏。上復大怒曰。死革無君果矣。召赦東山。加延齡罪斬。而罰諸刑部官前後弛繫者。東山出。益僞張疏草。持喝延齡家。日鮮衣怒馬。恣行長安中。百官畏之。大學士夏言曰。誰能治此。御史陳讓曰。讓能。一日東山怨其父。彎弓射之不中。父告讓。讓窮捕東山。東山急。反誣讓諸子與延齡通。並爲壓星圖。壓鎮聖母皇上。其圖凡五十。向年班明所言皆實。延齡家人往來仁壽宮。盜內藏。伺上動靜。皆御史讓陰主之。上大怒。逮讓等與延齡俱移繫詔獄。東山因益株引所不快。定國京山諸公侯俱坐繫。太后至衣敝襦席藁爲延齡請。上猶不許。陳讓從獄中上書曰。東山等結搆奸黨。瀆毀聖躬。妄連宮禁。陛下有帝堯既睦之德。而東山敢言漢武巫蠱之禍。陛下有帝舜底豫之孝。而東山敢言暴秦遷母之事。若復赦不誅。則將睚眦殺人如郭解。離間骨肉如江充矣。且天下未有忍於弑父。而可以預人家國事者。唯陛下詳察。書奏不省。會按詔獄者指揮王佐。謬與東山知。次第誦之得其情。牘上反坐。乃始械死東山。出讓等。而延齡

竟長繫不釋。暨后崩而延齡誅矣。始鬱故宦族鄉貢入太學。父爲夔州守有聲。從兄歧爲都御史負侃侃名。獨二齡以外戚故墮其家。聞者悲之。

沈氏選侍名璠。蓮鳥程人。昭慶富民沈秀後也。秀行萬三。洪武初徙家雲南。而其族仍留烏程。父廷禮仕於朝。弘治初被選入掖庭。孝宗試選女知書者。命爲守宮。論氏援筆立成。其發端曰。甚矣秦之無道也。宮何必守哉。孝宗悅。擢居第一。使給事御前。賜名曰女學士。弟溥舉人官通判。氏有寄弟試春官詩。傳於外。鄭金蓮者。初名王女兒。武城中衛軍卒鄭旺女也。幼鬻之高通政家。因採入內。備選侍。得侍上寢。其後遷周太后宮。侍太后。名鄭金蓮。宮中有訛言皇太子爲鄭金蓮生者。時皇太子已冊立。會金蓮父旺陰結內使劉山求自通。山遂與言若女鄭金蓮。卽皇太子母也。在周太后宮。汝何不潛發其事。而受尊享焉。旺聞之大喜。遂稍稍播其語。語聞孝宗。孝宗怒。磔山於市。并論旺死罪。尋赦免。至武宗嗣位。旺悻悻以爲及今不卽發。則何待矣。乃仍爲浮言如初。而市僧王璽覲與旺共厚利。因於正德二年十月二十八日。璽密携旺潛入東安門。喧言國母

鄭娘娘幽居太後宮若干年矣。欲面見皇上。有所奏。東廠執以聞。下刑部訊。無實。擬妖言律。兩人不肯伏。大理寺駁讞者再。乃具獄誣罔議如山例。置極刑。鄭金蓮不罪。

武宗朝正德

夏皇后大興人。

一作上元誤考實錄作大興當是

武宗后也。正德元年冊立。其父儒初

授錦衣衛指揮。尋陞中軍都督府都督同知。時監察御史杜旻上言。人君處貴戚患在不教。蓋其人多起側微。一旦姻連帝室。非乞田請爵。則侵官罔利。以所與居者。非端謹之士。未嘗聞禮義之訓故也。都督同知夏儒。以后父得饗殊錫。恐驕侈易成。罪鑒必至。宜慎選儒生。俾爲師友。吏部議如旻言。乃選老成端潔。堪爲師友者一人。授以訓導之職。令爲儒講學。未幾封儒慶陽伯。尋卒。后以世宗卽位歲。上尊號曰皇嫂莊肅皇后。十四年崩。禮部上喪儀。請上素服冠經帶。舉哀。臣民二十日如禮。上曰。嫂叔無服。又兩宮在上。朕服青足矣。臣民則如母后服耳。禮部尙書夏言謂皇上以嫂叔絕服。則群臣不敢素服見皇上。請暫罷朝參許之。旣而下群臣議謚。故事凡帝后謚並用十二字。至是大學士張孚敬

持異議曰。大行皇后。皇上嫂也。與累朝元后異諡。宜用二字或四字。大學士李時曰。當用八字。而都御史王廷相曰。均帝后也。何殊之有。夏言集上其議。因奏古人尙質。諡法簡。今以漸而增。非獨飾燬。抑亦臣子之情矣。夫少可多多不可少。大行皇后諡。其於皇上服制有無名分尊卑。固不相涉。惟是帝后媲美。妻以夫尊。今列聖元后皆用一十二字。而獨於大行皇后諡文減損。跡涉降殺。二四與八。與禮無據。不如仍用十二字爲當。上曰。朕昔在藩。臣子也。今則無事嫂如母后之義。且兩宮在上。昭聖皇太后于皇嫂。實壓母道不便。其再議。禮部請如孚敬言。用二字。上曰。其用六字數既半。合陰焉。於是上諡孝靜莊惠安肅毅皇后。十五年上忽曰。字不備。不稱配武宗。加孝靜莊惠安肅溫誠順天偕聖毅皇后。十二字如故。

沈賢妃。吳德妃。皆武宗妃也。賢妃父傳。德妃父讓。皆以妃貴。授指揮僉事。故事。選后以二女陪選。正德改元。上大婚。二妃陪后進。慈聖太后。卽命封爲妃。越一月。命禮官上冊妃議。上乃具袞冕告大行皇帝几筵。預命鴻臚寺官設立冊案。

綵輿敎坊司設中和韶樂及大樂。錦衣衛設鹵簿法駕。上御華蓋殿皮弁陞座。傳制執事官舉節冊。由殿左門出。正副二使跪受制。制曰。正統元年九月初七日。皇帝冊沈氏爲賢妃。吳氏爲德妃。卿等其持節行禮。於是執事官舉冊置綵輿中。蓋用黃鼓樂。至右順門。正使持節。副使捧冊。北向授內官。內官賁之。由正門入。詣二妃所。二妃禮服護以扇。宮人隨者各擎執迎節冊入。拜受之。女官宣冊授二妃。而以節授內官賁之。出右順門。授使。使持復節命。於是二妃謁奉先奉慈二殿几筵。詣太皇太后皇太后兩宮行禮。還內殿。上皮弁。皇后具禮服。陞座。女官導二妃詣前行禮。禮畢還宮。方是時。二妃固嫺禮。當太后意。而上甫親政。盡宗廟之敬。動合矩度。一時宮中皆稱之。原評曰。帶叙帶議。皆見筆法。舊史於此處全不曉。且上詳叙冊禮處。舊俱不備。旣而賜后家及二妃家各給庄田若干頃。時奸民投獻者。咸謂近畿土地腴利。饒當佃諸近畿。而近畿之不便者多。怨望至嘉靖改元。奸民覘世宗意薄。無復舊戚恩。遂嗾之上訴。而莊田盡除。

王妃順天人。能詩工筆札。以才色爲武帝所幸。嘗侍上幸薊州溫泉。命妃爲詩。

妃手自書之。刻於石。

附詩

塞外風霜凍異常。水池何事暖如湯。一派流今古。不爲人間洗冷腸。

馬氏馬昂妹。豹房供奉女也。美而豔。江彬白之上。時已適畢指揮有娠。甯庶人僞檄稱

馬指揮妻。非是。

上令中使召迎之。至豹房。馬氏善騎射。解于闐龜茲諸樂。能道番語。遂

絕幸。封兄昂右軍都督。馬氏一門無大小。皆賜蟒衣。內庭中官皆呼昂爲舅。賜

第太平倉東。上嘗從數騎過飲其第。六科都給事中呂經等言。近聞閒住將官

馬昂獻其有孕女弟。輒見狎愛。且覩內降已超授昂右軍都督。臣等惶懼。不知

所爲。夫以失身之婦。而寵奪宮闈。必其人之有異耳。夫天生尤物。亂人聽視。苟

非德盛。鮮不及禍。況其身已失也。今昂及子弟出入禁闥。楊釗之寵重。見今日

昔者王氏封侯。黃霧四塞。昂今拜官。異亦若是。恐失今不治。漸致難測。伏乞誅

昂。并斥孕婦。以遠禍水。御史徐文華亦言。中人之家。尙耻再醮之婦。以萬乘之

尊而顧有是。誰爲陛下進此者。罪可族也。竊料其熒惑聖聽。不過曰是姬姝色

多技能。而又宜子。陛下悅彼甘言。誤蒙寵納。已婚未婚。有身無身。皆所不計。萬

一防杜疏闊。而不韋李園之徒。抵隙以進。所繫豈細故哉。且陛下降等威。削尊

嚴與昂兄弟子姪。嫖服共坐。或共臥起。賞賚無章。倖臣皆降禮而莫敢抗。其權寵可知矣。馬姬專寵於內。昂等擅權於外。欲禍機不發得耶。俱不報。未幾六科都給事中石天柱等。又言馬昂進納孕婦。臣等已疏論。迄今再旬。未蒙進止。豈陛下之意。將爲其有身諱與。秦以呂易嬴而嬴亡。晉以牛易馬而馬滅。彼二君者。特不知而墮其計耳。今陛下知之而復爲之。何也。萬或陛下急於宗嗣。踪跡曖昧。眞僞未明。言之昨舌。宜立賜裁決。蚤絕覬望。御史程起充等。又言內寵爲嬖。是謂女戎。外寵爲幸。是謂男戎。妹喜伐夏。妲己伐商。褒姒伐周。此女戎也。莽卓伐漢。賈趙伐晉。安史伐唐。此男戎也。夫兵戈之顯伐。易知。而中葦之伏機。難測。馬昂兄妹。寵擅後宮。子姪無賴。雜處中禁。臣等昧死有言。未蒙聖斷。夫昂本驕淫暴橫。而濟之以奸。馬姬柔佞多能。而濟之以媚。是兼內外之戎於一家。積夏商周漢晉唐之患於一時也。復不報。後上幸昂第。酒酣召昂妾。昂忤上旨。上怒起。昂懼。乃謝病歸。既後得劉美人而馬氏寵衰。劉美人亦稱劉夫人。太原民劉良之女。世稱美人名良女非是晉王府樂戶楊騰名下妓。

也。正德十二年。上幸大同。駐蹕偏頭關。遍索女樂於太原。美人偕衆妓雜進。上遙見美人悅其色。及聆謳大喜。遂從榆林還。再召之。載以歸。命爲美人。大見寵幸。初居豹房。後漸入西內專寢。飲食起居必與偕。言事輒聽。左右或觸上怒。陰求之。輒一笑而解。江彬諸近倖。雖甚貴倨。見必觸首。以母事之。呼之曰劉娘娘。後上將南征。陰移美人至潞河。約駕先發。而隨以他舟迎美人。美人脫一簪贈上行。且以爲信。曰見簪而後赴。上藏簪衣間。過蘆溝。馳馬失簪。大索數日不獲。去。及至臨清州。上遣中使召美人。美人辭曰。不見簪。非信。不敢赴。上乃獨乘舸晝夜行。徬徨至張家灣。親迎美人。載而南。原評曰此千載韵事且出自實錄而舊史以異詞諱之殊不必然當上發臨清時。倉卒內外從官無知者。既而有數人追及之。亦寥甚。民船爭榜見上舟不能避。抵觸譏訶。湖廣參議杜文縝衝上舟過。怒止之。入其舟。奪一妾行。及上至揚州。每以數騎獵揚州城西。止宿上方寺。後遂無厭。屢出獵。馳突不測。美人諫乃止。時又稱爲夫人。自上方寺至南京。所臨寺觀。檐檐錦繡。梵貝夾冊。有爲上所錫賚者。悉署上與夫人劉氏名字其上。正德十六年。世宗入嗣。用南

京給事王紀言。以爲至尊別號。媒嬖啓侮。不可示天下後世。自今南北。凡大行皇帝御駕所臨。驛置寺觀。有書威武將軍鎮國總督及夫人劉氏名者。悉令撤去。

浣衣王滿堂者。霸州民王智女也。以麗色。嘗與選嬪宮。既而罷歸。恥不肯適人。又時時感異夢。謂必有趙萬興者來聘。當許之。其人貴不可言。里中僧出入智家。知其夢。間以語人。道士段銀。挾妖術聞之。遂潛易姓名。且賂僧。使僧先一日謂智家曰。爾家明日當有大貴人至。詰旦銀至。問其姓名曰。我趙萬興也。智家懽呼羅拜之。遂妻以滿堂。銀乃出妖書。轉相煽亂。愚民既神其夢。及見書大信從之者。日益衆。銀畏事漏。攜滿堂逃之磁陽。既而磁陽人亦信之。有嶧縣儒生潘依道。孫爵杖策至。陰受其術。時背人行。主臣禮。於是銀遂僭號。改元大順。平定。往來牛蘭神仙二山間。久之。銀出行新城。民掩獲銀。并得其妖書。撫按以聞。詔釋愚民之從者。獨斬銀與依道。爵三人西市。乃特降中旨。令勿殺滿堂。沒入之。以官奴送浣衣局。既而召入侍豹房。大幸。世宗嗣位。復出浣衣局。人謂之王

浣衣云。

卷四

四

集

勝朝彤史拾遺記 五

蕭山毛奇齡大可著

世宗朝
嘉靖

興王妃蔣氏。世宗母也。其先徐州人。以尺藉隸京師。父効初授兵馬指揮使。嘉靖間追贈玉田伯。生妃。通詩書。嘗著女訓十二篇。弘治五年。冊爲興王妃。生二子。長岳王厚燦。次卽世宗也。興王薨。妃居邸一年。世宗入繼大統。卽位甫三日。卽奉箋詣藩邸迎妃。而令廷臣議推尊禮。廷臣舉大義。謂宜考孝宗而稱興王爲皇叔父。妃爲皇叔母。議三上不允。時妃已迎至通州。聞稱皇叔母大恚曰。安得以我子謂他人母乎。不肯入。上聞之。啓慈壽太后。願奉母歸藩。而進士張璁者。逆上意。謂宜考興王而母太妃。上大喜。乃始迎妃來。將入宮。禮臣具儀注。謂當由崇文門進。東安門。皇帝出東華門迎而入。不許。再議自正陽門進。大明門承天端門午門之東。從王門入。又不許。崇文門。京師東門也。正陽門者。正門也。御道在焉。王門。諸王所出入門也。上曰。聖母當從御道入朝太廟。於是群臣相顧。爭謂王妃無謁廟禮。不聽。又謂當具諸王妃儀仗。不聽。乃尊稱興獻

太后具太后車服儀仗。竟以太后從正陽門直入。謁奉先殿。不廟見。頃之。加稱興獻皇太后。群臣又力爭。謂稱皇非是。大學士楊廷和至。辭位去。不聽。會清甯宮旁室災。論者謂議禮所致。乃姑稱興國太后。然非上意也。越三年。上尊號曰本生章聖皇太后。當是時。張璠桂萼等揣上意有在。益任情與群臣辨。謂上宜考興獻帝。而母興獻后。去本生二字。乃成禮。上是之。遂以是年秋。尊妃爲聖母章聖皇太后。去本生二字。原評曰此篇以逐節反覆爲章法五年。爲興王作世廟成。奉妃入謁廟。大學士石瑤等力爭之。不聽。七年。加尊稱曰慈仁。九年。頒所製女訓於天下。十五年。四郊廟享禮成。加尊稱曰慶靜貞壽。九月。奉妃謁天壽山七陵。又謁恭讓章太后。及景帝后陵。十六年。奉妃幸金山。命諸臣進賀行殿。十七年。九月。奉妃居慈甯宮。十二月。癸卯崩。諭禮工二部曰。朕皇考獻皇帝陵。遠在承天。升遐之日。尙以諸王禮葬。藩衛淺薄。堂隧狹隘。比者展視山陵。於成祖長陵之北。得支山曰大峪。林崗鬱衍。實爲吉丘。欲起逆梓宮。遷祔於此。朕不敢專。卜告於皇祖。既得吉。卜二三勳輔近臣咸賛曰。宜。爾郡臣其擇期襄事。又諭曰。聖母升遐。

山陵爲重。分遣大臣祭告太峪山頂建顯陵。於是以駙馬都尉京山侯崔元爲奉迎行禮使。兵部尙書張瓚爲禮儀護行使。太監鮑忠爲奉侍官。指揮趙俊爲吉凶儀仗官。又賴太師翊國公郭勛知聖母山陵事。上親幸太峪視之。忽諭曰。獻皇帝體魄藏顯陵者二十年。北遷遙遠。大不甯於朕心。朕將奉慈宮南詣合葬。其議以聞。於是禮臣嚴嵩等議謂靈駕北來。慈宮南舉。共一舉也。而春秋享祀。遠近迴殊。如初議便。上曰。孰謂四海非王土歟。且孝陵何以尙在南也。因止。崔元等母行。第令趙俊往順天啓視元宮。乃上太后尊諡曰。孝慈貞順仁敬誠。一步天誕聖獻皇后。明年趙俊還。謂顯陵不吉。上乃議南巡。九卿大臣許賢等暨左都御史王廷相各疏諫不聽。已而侍郎呂柟給事中曾燧御史劉賢郎中岳倫皆相繼諫不聽。已而太學生陳良鼎上書諫不聽。良鼎下詔獄。上乃至承天作新宮。虛其一以待合葬。工竣歸過慶都。御史謝少南言慶都有堯母墓。佚於祀典。請祀之。上忽曰。帝堯母有墓。洵乎合葬非古也。卽拜少南左春坊左司直兼翰林院檢討。更議聖母葬太峪山。四月。上躬謁長陵。忽召禮臣嚴嵩曰。大

峪山何如純德山耶。仍命崔元護梓宮南祔。七月合葬顯陵。主祔睿宗廟。

陳皇后。元城人。少與諸女擲錢戲。錢四側。既長。紹聖張太后爲世宗選婚。臺官

言大名有佳氣。得后迎入宮。嘉靖元年冊爲后。授后父萬言都督同知。賜第西

安門外。工部尙書趙璜言西安門近宮。治萬言第。請毋過高廣。上怒。逮營繕郎

中葉寬。員外郎翟璘下獄。而封萬言泰和伯。給世券。既而萬言侵牟其縣民。縣

令張好古執萬言家人杖之。好古亦下獄。時上方議禮。以爲禮始自宮闈。每誦

關雎講教化。原評曰先入此數語史筆值上與后坐。張文二妃者嘗茗。上循視其手。后恚。投

盃起。上大怒。后以驚悸忽墮妊。既而崩。當墮妊時。萬言乞妻入視。上以非祖制

不許。至是議喪禮。欲從殺。因裁禮官所上儀注。上立冠素衣。十二日更淺色衣。

聽政西角門。朝兩宮。則具如常服。百官三日臨喪。服十二日。朝則立冠素衣。通

二十七日除。閣臣張璠執不可。請上素衣經帶。十二日乃更服立冠素衣。百官

則素衣經帶侍西角門。通二十七日除。上曰。不如朕言。朕且以九日除矣。璠曰。

不然。天子與后。猶父與母。春秋天王歲有三年之喪二焉。爲后也。古人服妻三

年後世易以期期之喪。諸侯絕旁期也。妻之喪。正期也。日易月殺矣。殺之九月後。若有殺者。則將無也。且甯忍臣子不終君母之服者。上曰。以上有兩宮皇太后故也。終不聽。既而詹事霍韜奏曰。今百官有妻之喪。不當公。古人父在喪。母仗不上於堂。避尊也。臣請陛下立冠素衣。御西角門。十日。即立冠立裳。御奉天門。百官朝則立冠立裳。退則素。二十七日除。謂夫陛下二十七日。皆御西角門。則無辨於大喪也。百官表衣朝中門。則禮不肅敬也。陛下即以立冠立裳御奉天門者。當陽之義也。猶之百官有妻之喪。不當公也。百官退而素。不敢見陛下。避尊之義也。猶之古人杖不上於堂也。庶幾變於禮者之禮也。上可其奏。乃諡曰悼靈皇后。以其年別葬之天壽山嶼兒峪。葬之日。出梓宮玉門。罷辭祖禮。百官一日臨都給事王汝梅諫不聽。十五年。禮部尙書夏言議。謂先后正位中宮。母儀天下者七年。天崩諡悼。雖侔古法。而靈義有六。並非美稱。請下翰林更諡。上意既久釋。乃改諡曰孝潔皇后。其後繼后諡孝烈。先祔廟而后祗祔奉先殿西室。一作西夾室也隆慶初。禮臣議孝潔大行皇帝元配也。宜合葬祔廟。若遵

遺制。祔孝烈。則舍元配也。若同祔。則二后也。皆不合典制。臣竊以。大行皇帝升祔時。宜奉孝潔配。遷葬永陵。孝烈移主陵廟。制曰可。乃上尊諡曰孝潔恭懿慈睿安莊相天翊聖肅皇后。

廢后張氏。世宗第二后也。父楫。錦衣衛指揮僉事。后初入宮。封順妃。嘉靖七年。陳皇后崩。兩宮皇太后。命上自擇諸妃中可者。因下詔曰。皇后之尊。與朕同體。承宗廟。母天下者也。順妃張氏。侍朕以來。克盡禮道。其冊立爲皇后。當是時。上方追古禮。而后甚婉婉。稱上意。每歲祭后。必從上分獻宗廟。方春。率嬪御行親蠶禮。日講章聖太后女訓於宮中。嘗誦翰林所撰內則新詩。使宮人歌之。以當古房中之樂。如是者六年。原評曰。着此段。纔不知其爲風也。至十三年正月癸卯。忽降諭禮部。曰。朕惟陰以相陽。若地承天。妻綱於夫。道在敬順而已。朕元配早夭。進冊張氏。藉其內助。恩遇特隆。近乃不思敬異。罔顧承乾。俟其既悛。竟成終怙。應收皇后冊寶。退閒別所。其天下箋賀。總停如勅。十五年薨。上命喪葬。視憲廟吳后禮。十六年改稱廢后。葬金山。

方后。江甯人。安平侯方銳女。以嘉靖九年選入宮。十年。奉章聖皇太后旨。選九嬪。先是。祖制無九嬪名。自后妃下。雜置諸嬪宮。而間以婕妤昭儀貴人美人諸位號。今史官言明代宮中無昭儀昭華諸位號。非是。雖稍參漢制。要其所以爲儲嗣計。未嘗乏也。至是。特用張璫言。謂上未有子。古者天子立后。並建六宮。三夫人。九嬪。二十七世婦。八十一御妻。以廣儲嗣。陛下春秋鼎盛。宜博求淑女。爲似續計。於是下慈旨。爲九嬪之選。而后居其首。三月后。與鄭氏王氏閻氏韋氏沈氏盧氏沈氏杜氏九人。並受冊。並冠九翟冠。大采鞠衣。圭用次玉。穀文冊。黃金塗。視皇后殺五分之一。至期。上袞冕。告大廟。還服皮弁。御華蓋殿。傳制遣大臣行冊禮。既冊。乃從皇后朝奉先殿。禮成。百官入賀。上仍服皮弁受之。當是時。后冊名德嬪。上以其行禮敬。且升降有儀度。悅之。然未爲后也。原評曰。此篇逐段起伏。皆見筋節。越二年。忽廢張皇后。欲立后。以問夏言。言故逆上意。頓首曰。臣請爲陛下賀。夫天圓而地方者也。上大喜。遂以其年立爲后。而以僖嬪沈氏爲宸妃。麗嬪閻氏爲麗妃。副之。故事。立后。謁內廟而已。內廟者。奉先殿也。上謂天子立三宮。所以承宗廟。故禮經有廟。

見之文。何以不謁廟。下翰林禮部議。議謁廟。是正月壬子。上御奉先殿。遣太傅武定侯勛爲正使。少傅孚敬爲副使。持節冊立。上乃率后謁太廟及世廟。越三日。頒詔天下。明日受命婦朝賀於未央宮。自是之後。上嘗薦高祖及高后尊號。后捧高后主亞獻。上稱其有禮。睿皇后升祔及禁日。后親扶寶幄。尙七挾惟謹。睿皇后祥。后奉几筵。帥嬪御行享祀。皆恭恪稱上意。上嘗特褒之。二十一年十月。上性卞。待宮人多不測。宮人懼。會所幸曹妃及王甯嬪侍上寢。寢酣。宮人楊金英等謀弑逆。用組繫上頸。而以釵股雜刺上腠間。幸繫組倉卒誤爲殊死。結得不縮。金英懼。同事張金蓮者。知事敗。走告后。后馳至解組上。蘇然病悸不能言。后命太監張左高忠捕宮人雜治。詞首王甯嬪。云曹妃者雖不與。然亦知之。后乃傳上命。收曹妃及金英等十餘人。磔於市。并捕斬其族屬十餘人。而籍其家。先是曹妃有容色。上愛之。冊爲端妃。故每侍上寢。至是上稍愈。疑妃寃。曰。端妃我所愛。宜無此心。因德后救已。而翻以妃故憾后。是年進后父銳安平伯爲安平侯。以報后功。二十六年十一月。宮中火。中宮請救后。上不應。后遂崩。已而

復悼曰。后救我。而我不能救后。

原評曰。此以述語爲斷語。純乎史法。

乃欲厚其喪葬禮。且欲重抑

孝潔以厚之。遂稱后爲元后。豫名所葬地曰永陵。遣太傅兼太子太傅成國公希忠爲正使持節。少師兼太子太師吏部尙書文華殿大學士言爲副使捧冊。謚曰孝烈皇后。故事。凡冊謚使臣至宮門。內侍傳節冊以入。上又諭謚后禮重。其命二使上殿。拜命於門內。勿如舊。明年二月喪百日。特修薦事於永禧宮。詔群臣齋戒十日。是日皆素服辦事。五月葬永陵。將葬。禮官請儀注。上命梓宮從中道行。虞嬪如禮。用九數。百官送喪者皆制服。至入朝。以素服加烏紗帽黑角帶。退而以素服素冠辦事。至迎主之日。仍用制服。至善安門外。行安神禮。主還。更以素服素冠辦事。禮畢。除時。廷臣謂踰舊制。且有引孝潔前事爭者。皆不聽。二十八年十一月。后大祥。禮官請安主奉先殿東夾室。先是孝潔葬嶼兒峪。後主不議祔。至十五年。禮官始請祔奉慈殿。邵太后傍。以爲喪服小記有婦祔祖姑之文。因祔主焉。及邵太后遷陵廟。而奉慈殿廢。廷臣議遷孝潔殿於奉先殿旁室。而殿旁地陁。惟斜廊兩廡。難以奉安。於是有奉先殿盡西夾室之祔。蓋迫

於所請也。今請安后主於奉先殿東。則位先孝潔。此明以元后尊后者。而上復不許。謂當祔太廟。下輔臣嚴嵩尙書費案等議。嵩等言祔祖姑禮也。請歲時饗獻。則入太廟。藏主則幄憲廟皇祖妣之傍。以從祔於祖姑之義。而上曰不然。祔禮無遷就者。后雖非帝。然帝之配也。帝自有一定之序。而后卽因之。今后以朕存。不啓櫃不定祝已矣。安有饗在此而主藏彼之禮。其依祖制奉祧仁宗。而祔以朕他日之新序。其勿違。蓋上意尊后。且慮他日祧睿考。故欲乘已生存時預祧仁宗。而借后以定序也。原評曰直斷數語皆舊史所未敢道嵩等謂諭及新序。則非臣子所敢言。乞下廷臣議。上命暫已。待再朞姑藏主皇妣睿皇后傍。明年再朞。奉主睿皇后傍。入享於太廟。位設新序不及祝。而上終欲祔主太廟。命再議。禮部尙書徐階都給事楊思忠。皆以爲不可。餘無言者。時帝使人覘會議得狀。及疏入。怒曰。爾等懷二三心。猶爾耶。此非專論后也。及非子爲親夫爲婦也。第以朕躬論正序定位。禮所應有。乃無肯奉行者。階思忠二人議定卽是矣。於是階思忠惶恐言。臣等愚昧不能仰知聖諭。竊惟周建九廟。三昭三穆。率六

世而祧。至後兄弟相及。亦有不及六世者。國朝廟制。同堂異室。與周禮不同。今太廟九室皆滿。若以聖躬論。仁宗當祧。固不待言。但此係異日聖子神孫之事。而陛下自言之。是自豫廟也。臣聞夏人之廟。五。商以七。周以九。禮由義起。五可七。七可九。九之外亦可加也。請於太廟及奉先殿各增二室。爲十廟。祔孝烈皇后。母祧仁宗。陛下亦無豫焉。上曰。會議當人人盡言。今兩人各一言而止。此會議耶。臣子之誼。當祧當祔。自應上請。而乃自爲見。且禮有一定。苟定矣。何避豫爲。於是階等乃如旨。議上報聞。隨條上祧祔儀注。并請曰。忌祭近矣。望可臣奏。上猶銜初議。報曰。孝烈繼后。非元后。其所配者。又入繼之君。不忌祭。亦可。階等惶恐。請益力。上曰。非天子不議禮。后當祔廟。朕久諭之。顧謂未宜。徒飾繁言。惑衆聽實。欲待題朕主矣。因諭嚴嵩曰。禮官卽從朕言。勉強耳。諸臣爭親爭帝爭祔。爭名三十年矣。至今猶未化耶。今卽不忍祧仁宗。且置后主別廟。他日任臣下處之。令忌日奠一卮酒。不致以仁宗傷衆情也。於是禮臣不敢復言。第請如敕行。許之後二年。六科官表賀正旦。思忠首署名。上猶修前卻。摘其表語詰責。

之杖之百。削籍以杜異議。然當時議臣。從無敢爲孝潔言者。隆慶初。上后尊諡曰孝烈。端順敏惠恭誠祇天衛聖皇后。不稱肅字。且移孝潔配世宗祔廟遷葬永陵。而別祀后主弘孝殿。見陳皇后記。

皇貴妃王氏指揮僉事王隆之女。嘉靖九年選入宮。十年冊爲昭嬪。十五年生皇子戴。生時有他妃夢星官以嬰兒送昭嬪。上異之。是年進昭妃。明年冊爲貴妃。皇子有奇質。嘗見上叩頭曰。兒不敢時時舉手者。以天在上也。上奇其言。至是益重妃。十九年進皇貴妃。二十八年皇子薨。年十有四。時初冠。行冠禮。翼日而病。命太醫視之。不治。忽北面拜曰。兒去矣。端坐而逝。上悼之。諡莊敬太子。明年妃薨。先是閭麗妃生一子薨。諡哀冲太子。至是命妃與閭妃同葬。而以哀冲莊敬二太子祔之。其地在天壽山。已而禮官言妃當與閭妃同祔。主孝潔皇后陵廟。詔可。妃弟朝用累官都督僉事。

杜康妃者。穆宗生母也。大興人。父林。封慶都伯。嘉靖九年。妃應選入掖庭。明年封康嬪。十五年進封康妃。十六年正月皇子生。是爲穆宗。三十三年。妃薨。是時

穆宗以裕王居邸。上下禮部議喪禮。尙書歐陽德等言。累朝皇妃。或未生皇子。或子非居長。而受封國。或子立爲東宮。而先薨。俱與今不同。惟成化中淑妃紀氏薨。所生皇子倫序居長。與妃事相類。但彼時孝宗尙幼也。今裕王既已成婚。禮宜持服主喪送葬。乃議上輟朝五日。裕王主喪。遵孝慈錄。斬衰三年。其儀仗人數。皆視舊有加。上不許。於是輔臣引洪武七年太祖命周王橐服貴妃孫氏故事以對。曰。彼慈母猶爾。況生母耶。上命考賢妃鄭氏例以聞。於是德等復上儀注。制可。敕諡爲榮淑康妃。葬金山。及穆宗入嗣。以隆慶元年正月乙未。諭禮部曰。朕仰荷天眷。嗣守丕基。邇惟慶源所自。我生母榮淑康妃。恩實大焉。朕曩居外邸。奉養之禮。既闕生前。光揚之典。未從身後。追思罔極。痛切於衷。夫孝在篤於所生。愛必由於親始。今朕方以孝治天下。而母恩未報。大禮未舉。其何以表因親之誼。立成教之本哉。昔孝宗皇帝上生母淑妃尊諡。祔葬茂陵。建奉慈殿。大內歲時享祀。萬世稱孝焉。茲當如故事。仰稽懿德。恭薦鴻稱。舉遷祔之上儀。營祀享之專宇。爾禮部其議詳以聞。丙寅上尊諡曰孝恪淵純慈懿恭順贊。

天開聖皇太后。遷祔永陵。祀主神霄殿。

李嬪。延津人。嘉靖十四年十月。夏言請慎選賢淑。補嬪御。以廣儲嗣。上命夫人

女官出諸王館。選擇妃父李拱臣。自詣通政司。上白有女端麗。堪充下陳。因轉

送禮部以請。上曰。此非大臣獻諛也。既係親陳。當從所願。遂令拱臣送至京。既

至。適上行郊祀。夏言請淑女赴諸王館。擇日選視。上曰。淑女至京。適逢郊享。此

高禩之兆也。原評曰。動必引。古然不可已。勅勿赴館。選徑進大內。既進冊甯嬪。無子薨。

穆宗朝穆宗皇后。姓李氏。昌平人。封德平伯李銘女。穆宗爲裕王。冊爲妃。生憲

懷太子。嘉靖三十七年。歿皇邸。穆宗卽位。謚曰孝懿皇后。六年秋。神宗卽位。加

上尊諡曰孝懿尊惠順哲恭仁儷天襄聖莊皇后。合葬昭陵。主祔廟。

繼后姓陳氏。通州人。一作大名父景行封固安伯。嘉靖中。孝懿李皇后爲太子妃。早

薨。冊后繼之。隆慶元年。進爲后。已而后無子。出居別宮。越一年后疾。左右無侍

者。外廷憂之。既疾甚。試御史詹仰庇上疏曰。皇后者。本先帝所賜。以配陛下。陛

下宜遵先帝命。篤宮闈之好。上承宗廟。下以立四方家人之則。舊聞皇后舉止

端肅。久拂聖意。而去歲車駕謁陵園。皇后隨輦。朝野皆慶。以爲相傳或失實。群疑總釋。頃又聞皇后離坤甯。置之別宮。左右失起居。以致抑鬱成疾。陛下又畧無眷顧之意。中外憂懸。萬一不起。如聖德何。亦何以承先帝命。上曰。后無子多病。近移居別宮。冀稍安適。或可從此却病耳。爾不曉內廷事。乃妄言。神宗即位。上徽稱曰仁聖皇太后。六年進懿安。十年進康靜。二十四年七月崩。諡曰孝安貞懿。恭純溫惠。佐天弘聖皇太后。祀奉先殿別室。與孝烈皇后同。先是神宗在東宮時。后病居別宮。而神宗生母李太后者。斯時尙爲貴妃也。神宗每辰謁奉先殿朝帝。及貴妃畢。卽往候后。曰。娘娘寂寞。禮不可曠。后聞履聲。卽喜。疆起。取經書指而問之。神宗應聲答。后且感且喜。貴妃聞妃喜亦喜。原評曰。貴妃和厚。神宗睿孝。兩皆可感。神宗旣嗣。后稱仁聖。貴妃稱慈聖。兩宮旣同尊。而后與慈聖皆賢。素無猜嫌。至是益親謐。神宗又孝事兩宮。一無所間。由是后無疾。優游慈宮者二十五年。神宗嘗設四齋。近侍二百餘人。陳百戲爲兩宮歡。每遇令節。先於乾清宮大殿設兩宮座。使貴嬪請導。上預俟雲台門下拱而立。北向久之。仁聖輿至。景運門。

慈聖輿至隆宗門。上居中北向跪。少頃兩輿齊來前。已復齊至乾清門上起。於是宮中王皇后扶仁聖輿。皇貴妃鄭氏扶慈聖輿導而入。少憩請陞座。自捧觴安几。以及獻饌更衣。必膝行稽首。屏顧攝息。原評曰一段祇摹叙迎宴一節如許詳盡委皙豈非司馬寫生之筆皆從來儀注所未有者。於是始陳戲劇飲乃罷。凡大饗多此類。

勝朝彤史拾遺記六

蕭山毛奇齡大可著

光宗朝
泰昌

光宗后郭氏順天人。萬歷二十九年冊爲皇太子妃。生皇一女。四十一年十一月丁未薨。諡恭靖。四十八年九月進諡恭靖端懿溫惠元妃。熹宗卽位。上尊諡曰孝元昭懿哲惠莊仁合天彌聖貞皇后。遷葬慶陵。主祔廟。后父初封博平伯。進侯。旣死。子振明襲。

王皇后者。熹宗生母也。順天人。初入東宮爲選侍。萬歷三十四年十一月生熹宗。進才人。四十七年三月丁未薨。諡昭肅恭和章懿皇貴妃。熹宗卽位。十一月。上諡曰孝和恭獻溫穆徽慈諧天鞠聖皇太后。遷葬慶陵。祀奉先殿。封后父王昇爲新城伯。昇卒。子國興襲。崇禎末殉難。

孝純皇太后。姓劉氏。海州人。後居河間。父應元。

一作應槐誤
應元號思槐

母徐媼。初入太子

宮爲淑女。萬歷三十八年十二月生莊烈愍皇帝。旋以細故失光宗意。被譴薨。旣而光宗悔。恐神廟知之。戒掖庭勿復言。葬於西山。愍皇帝封信王。進賢妃。天

啓中。信王未之邸。嘗居勗勤宮。間近侍曰。西山有田懿王墳乎。曰有。其傍有劉娘墳乎。曰有。每密封金錢往祭焉。及卽位。上尊諡曰孝純恭懿淑穆莊靜毗天統聖皇太后。遷葬慶陵。而封后父瀛國公。母瀛國太夫人。稱太異數也。弟效祖和陽衛正千戶。封新樂伯。繼祖錦衣衛都指揮同知。姪文炳文耀。錦衣衛指揮同知。後皆加保傅。進都督。上五歲失太后。問左右以遺像。莫能得。傳懿妃者亦東宮淑女也。生皇六女。皇七女。進封懿妃。嘗與太后比宮居。自言宮人有相類者。雜指其眉睫及頰輔間。召太后母瀛國太夫人認之。時武英殿中書梁祝善形摩瀛國太夫人同懿妃出。宮人指示。揣以意。令髣髴爲圖。圖成。敕具法駕鹵簿。由正陽門警而入。上親跪午門迎之。旣入。懸像乾清宮。呼老宮婢及素侍太后者來前。使瞻視。或曰是。或曰否。上爲之雨泣。兩宮皆泣。原評曰。聖主痛心爾猶記瀛國太夫人謝表有云。聖孝難窮。慈容不闕。上揮涕慰勞。卽以所圖四軸賜其一。令供於家。及國破。文炳率家人環哭於孝純像前。閉門自焚。凡死者四十人。乃加傳懿妃封號。賞資太后家及承奉王裕民中書梁祝各有差。上旣追念太后。且自以薄祜富憂勞。於加上太后尊號。時群臣奉冊寶以進。上以手拭

淚歛不能已。故事。生母忌日。不得設祭服。青十五年六月。上以太后故。欲追宣宗以來生繼七后。同建一廟。而祀太后於其末。乃御德政殿。召輔臣及禮部尙書林欽楫。侍郎蔣德璟等議。上曰。太廟制有九。皆一帝一后。祧廟亦然。今祧廟自德懿熙仁四祖外。加以仁宣英憲孝五帝。凡九廟。而其廟已滿。且其制一帝一后。其繼后及生后七位。仍不得入。卽宮中奉先殿。亦一帝一后。雖嘉靖後有以繼后及生后入者。而前此七位尙無祭也。上意在太后而特未顯言。德璟曰。奉先之後有奉慈殿。亦祀繼后及生后者。今雖廢。盍舉行焉。上曰。孝宗皇帝建奉慈而世廟廢之。然尙有弘孝神霄本恩諸殿。不止一奉慈也。德璟曰。內廷規制。臣未之悉。但既有諸殿。則似隨在可奉祀者。上曰。太廟之禮。一帝一后。朕豈敢輕易。惟是奉先地廣。可以恢拓。朕欲將祧廟之主。祫祀奉先。未審可否。德璟曰。大祫之禮。在歲暮。已行於太廟。今復欲以祧廟之主。並入奉先。終恐陋耳。上曰。奉先殿中。已現有繼后及生后七位主矣。德璟曰。此萬歷初始增入。非舊制也。上曰。然。按故事。弘光初。別建奉慈以奉孝穆紀太后。而孝肅孝惠亦並祀。

之嘉靖中遷三主祔陵廟。罷奉慈之祭。至隆慶初。奉安孝烈於景雲殿。更其名曰奉孝。又奉孝恪於神霄殿。萬歷三年。卽奉孝恪孝烈於奉先。而弘孝神霄之祭。又罷。此奉先附祀所由來也。然以朕思之。奉先之祀。既有定禮。則諸殿沿革。歷世可驗。似不若別建一殿。以祀七后爲較便。德璟曰。善。於是闕殿祀太后。而七后共之。崇禎十七年。都城戒嚴。文炳文燿入衛帝時。李邦華請太子南遷。不得及事急。上召文炳及駙馬都尉鞏永固使護行。文炳叩頭言。外戚親臣不藏甲。臣等徒手。安能護皇上搏賊。皆相向哭。旣而城陷。文炳文燿闔門死。

李妃者。光宗選侍也。時宮中有兩李選侍。無所別。因以所居東西宮別之。莊妃居東宮。稱東李。此居西宮。稱西李。然西李最有寵。神宗初。以熹宗早失母。命西李母之。旣而信王亦失母。仍以命西李。會西李生皇八女。遂改命東李母之。皇八女卽後稱皇八妹者也。光宗卽位。妃與鄭貴妃同住乾清宮。時上諭封郭元妃爲皇后。王才人爲貴妃。又諭封李選侍爲皇貴妃。及上不豫。召大臣入乾清宮。上御暖閣。憑几諭曰。李選侍夙保震器。撫育國本。宜速封。如是者再。署禮部

事。侍郎孫如游對曰。今孝端孝靖兩太后。及元妃才人大典未竣。俟四大禮舉後。行未晚也。既而上崩。選侍遂踞乾清宮。因挾制皇長子。邀封皇后。傳言欲垂簾聽政。於是大學士劉一燝。吏部尙書周嘉謨。都給事中楊漣。御史左光斗等。力請移宮。而選侍始跟踰移仁壽殿去。於是移宮之案興焉。熹宗卽位。下詔曰。朕昔幼冲。皇考選侍李氏。恃寵。屢行氣毆聖母。以致崩逝。使朕抱終天之恨。朕雖幼。未嘗忘也。皇考病篤。大臣進內問安。選侍威挾朕躬。使朕傳封皇后。復用手推朕。向大臣覲顏。口傳至今。念及尙合羞赧。朕因避李氏暫居慈慶宮。又令李進忠。劉遜等傳言。每日章奏文書。先呈選侍。方付朕覽。仍欲垂簾聽政。且欲處分御史。所言選侍。他日必有武氏之禍者。朕思祖宗家法甚嚴。從來有此規制否。朕今奉養李氏於嘏鸞宮。俱遵皇考遺愛。有此體恤。外廷誤聽李黨謠譏。實未識朕心之故也。其李進忠。田詔等。皆係盜庫首惡。自干憲法。勿使渠魁賄囑當事。播弄脫罪。卿可傳示遵行。故諭。十二月復下詔曰。朕冲齡登極。仰庇祖宗眷佑。內外清平。以爲大小臣工。開誠布公。定無異議。不意外廷近來乃妄

生謗語。輕聽僞傳。誠有如科臣楊漣所奏者。朕不得不再伸諭。避宮始末。以釋群疑。九月初一日。皇考賓天。閣臣文武大臣。科道等進宮哭臨畢。請朝見朕躬。李選侍阻朕於暖閣。當時司禮監等官設法請朕出見群臣。選侍許而復悔。及朕出煖閣。又使李進忠等請回。如此者至再至三。朕至乾清宮。丹陛大臣扈從前導。選侍又使李進忠等持朕衣不釋。若非司禮監奏請朕前進。不可退。又不能此時顏面存於何處。及至前宮門。選侍又差人數次著朕還宮。不令御文華殿。卿等親見當時景象。安乎危乎。當避宮乎。不當避宮乎。諸宮欲行庇護之謀。先藉安選侍爲題目。使是非溷淆。朝政不甯。輔臣義在體國。爲朕分憂。何不代朕傳諭一言。屏息紛擾。君臣大義何在。如初一日。朕躬視皇考入殮。選侍又阻朕於閣中。不令出入。及翼日恭送皇考梓宮於仁智殿。選侍必欲朕朝見彼後。方許回慈慶宮。明是威挾朕躬。垂簾聽政之意。朕蒙皇考命選侍任照管。亦不住彼宮。其飲膳衣服。皆係皇祖皇考所賜。選侍侮慢凌虐。朕晝夜涕泣。皇考自知其悞。親來勸朕。此其親疎自有分別。

原評曰西晉後多此等文字

諸所行事朕曾閱諭閣

臣不令傳抄。若避宮不早。則爪牙成列。盈虛在手。朕亦不知何如矣。選侍因毆崩聖母。自知有罪。使宮眷王壽花等時來探視。不許朕與聖母下原任各宮娥說話。如有卽捕去重處。朕之苦衷。外廷豈能盡知。今朕奉養選侍及皇八妹。俱從優厚。各官何以猜度過計。藉爲口實。如異日選侍患病而逝。將用人以抵命乎。將歸咎於朕乎。豈不聞聖母之崩。由選侍之毆。可不問乎。邇來各官。不爲聖母。只爲選侍。失其輕重。理法何在。前日刑部執奏父母之恩如天地。履后土則思母德。戴皇天則思父仁。仁人孝子之用心。固宜如此。然父母之仇。不共戴天。朕不加封選侍。以慰聖母在天之靈。奉養選侍。敬遵皇考之意。該部亦可仰體朕心矣。大小臣工。惟知私於李黨。責備朕躬。不顧大義。姑不深究。卿等可傳諭大小臣工。務令和衷。各供乃職。毋得植黨背公。自生枝節。以取罪愆。故諭。天啓元年二月。上復諭曰。賈繼春暗揭流毒。造言誣人。若黑夜行刺。使人莫防。朕本不深究。然自繼春出揭以來。引類彌天。爭端大起。大臣求去。小臣紛囂。威懼繼春。莫敢直言其非。朕皆隱忍。今繼春全不改省。乃昂然肆辨。目無君父。況選侍

移宮以來。未嘗見繼春有疏。明其可否。却借密揭爲櫻鱗逆耳之說。箝制朕躬。要名減罪。姑着照原揭回話。閏二月又諭曰。朕以冲年。皇考見背。仰體在天之靈。敬禮選侍。其移宮一事。大小臣工。連章奏請。始末情節。舉朝共知。獨賈繼春首倡邪說。捏造李選侍雉經。皇八妹入井。播煽流言。誣詆朕躬。若不窮究分明。何以傳信天下後世。乃繼春奉旨回話。初則一揭朦朧。再則遮飾支吾。本欲逮訊。今自認風聞無影。顯自明肆誣捏。姑從輕削籍。永不叙用。當是時。上方厭選侍移宮一案。尙無畸見。獨賈繼春有侍選自經。皇八妹投井之說。以爲當安選侍。故有是諭。而其既客魏用事。而上意遂變。四年七月。詔封選妃爲康妃。羣小愈移宮之名正。不足以殺諸賢。乃創爲封疆一案。緹騎四出。大獄旁午。至五年九月。賈繼春召至。忠賢遂矯詔諭群臣曰。先帝升遐。朕躬嗣服。父子承繼。正統相傳。臣子何得居功。至楊漣左光斗等。妄希定策。串通王安。倡爲移宮之事。捏造垂簾等語。王安奸惡異常。乘機報怨。內外交結。黨衆力強。不許康妃從容奉旨。而逼令琅璫出宮。先帝體尙未寒。言猶在耳。漣等卽有權勢。固亦人臣。乃棄

禮忘君。犯上不道。至於如此。使非賈繼春等明揭於前。天牖朕心。補封於後。將終始蒙蔽。恩禮有虧。卽寸斬楊漣。左光斗。何救於事。况與魏大中。周朝瑞。袁化中。深盟固結。招權納賄。黨護熊廷弼。影壞封疆。鐵案既定。猶貪其重賂。力爲出脫。託汪文言內探消息。暗弄機關。遍樹私人。布滿津要。壞法亂紀。欺蔽朝廷。及汪文言事發。奸謀畢露。自知理屈。乃巧借他題。以掩其罪。信口裝誣。毫無影響。肺肝如見。欲蓋彌彰。朕言念及此。深切痛恨。已將熊廷弼處決。傳首九邊。楊漣等雖追贓身死。而顧大章係同惡之人。卽送法司從重擬罪。爰書旣成。將諸奸罪狀及守正諸臣向來疏揭。并近日屢次明旨。俱着史臣編輯成書。頒行天下。垂示將來。以昭朕孝思。據事直書。毋得迴護。使善惡邪正。炳如日星。而黨與不得借口文奸。飾非亂聽。違者治以妖言惑衆之罪。特諭。由此璫難大起。而國運隨之。要其禍自移宮始。先是熹宗初立時。值九月早寒霜甫下。而宮中李花齊開。咸以爲選侍當封。相顧賀。而其後闖亦李姓。識者謂此草妖云。

東李妃亦光宗選侍也。以別西李妃故曰東李。性簡重。寡言笑。名位素居西李。

前而寵不能及。嘗奉光宗旨。撫視皇五子。皇五子成立。入繼大統。選侍功居多。天啟元年二月。冊封莊妃。客魏用事。妃持正。牴牾。凡宮中禮數。多被裁抑。妃不平。會忠賢同官徐應元。爲承奉正。當謁妃。寡慢不以禮。嘗在妃前。咎宮使。鴟肆無忌。妃以負氣薨。原評曰。此時宮圍極饒氣節。如莊妃裕妃。成妃輩。比比皆是。豈亦東林過激耶。先是皇五子在宮。每日起。拜天畢。退而謁母。選侍亦愛之。嘗夢黑龍蟠殿柱。以告選侍。選侍私自喜。囑勿言。又所居東宮。後有井二。皇五子隨選侍過之。戲汲井。得金魚。汲次井。亦如之。至是泣曰。吾不能奉侍王矣。崇禎初。上念鞠育勞。加上妃封號。與其弟李成棟官。給四千頃。而應元以忠賢敗。發南京賜死。

選侍趙氏者。未有封號。與忠賢客氏不合。熹宗卽位後。矯旨賜死。選侍聞命。出光宗所賜物列案上。沐浴。西向禮佛畢。痛哭自縊。客氏復矯旨用宮人禮葬。而斥其答應王亮等。發鳳陽陵園。

熹宗朝天啓元年。懿安皇后祥符人。張姓。太康伯張國紀女。天啓元年四月。冊爲皇后。后性嚴正。數於上前。以顛倒舊章爲言。蓋指客氏也。客氏橫肆宮闈。后召至。欲繩

以法客魏大恨。遂於宮中播流言。謂后本孫二女。犯辟以女託之生員張國紀。張國紀女之。非己女也。罔上大不道。上亦疑之。幸其說不根。無左驗。乃已。三年后有身。客魏盡逐宮人之異己者。而以其私人承應。后脅痛。假按摩陰傷之。竟損元子焉。時有匿名帖榜於宮門。列忠賢逆狀。并及忠賢黨七十餘人。忠賢怒。疑出國紀。并被逐諸人所爲。而逆黨邵輔忠孫杰等。欲因此興大獄。盡殺諸門戶。而借國紀以動搖中宮。事成則立魏良卿女爲后。劉知選偵知之。首上疏參國紀。梁夢環繼之。禍且叵測。賴閣臣力救得免。熹宗大漸。后折逆奄謀。力與大臣傳遺命。定迎立事。愍帝立。上尊號曰懿安。居慈甯宮。時奄方叵測。左右類伺者皆其黨。后豫戒信王勿食宮中食。及卽位。猶從戚畹家取饋食。進至是上見后。感激盡臣子之敬。乃召還戚臣張國紀於河北。慰之。而論知選夢環以謀危先帝中宮之罪。崇禎十四年。刑科給事中胡周鼎請上后徽號。時國用日匱。上恐舉大典多費。嘆曰。吾之不能盡孝事。貧也。或言周鼎有所授。已下理而頓釋之。曰。恐傷后心。后嘗語周后曰。吾南中嘗有家可居。又曰。延儒誤皇叔。因歷

言延儒罔上事。周后間以聞。上怒詰周后所從來。周后以后對。遽已十七年三月。都城陷。賊渠李昂者。中州人。知后賢。特覓后宮中護衛之。后自縊死。裕妃張氏有嚴性。不爲客魏用。客魏惡之。會妃已有身。鋪宮膺冊妃禮畢。而遲久不乳。遂誣其有後言。矯旨閉禳道中。盡逐其內官及宮婢等。絕其飲食。經數日。天雨。妃力疾匍匐啗簷溜死。乃復矯旨革妃封如宮人例。焚其屍。愍帝嗣始復妃位號。改葬如禮。

李成妃。順天人。天啟四年二月生。皇二女。封成妃。是日地大震。宮瓦皆墮。既而皇二女薨。妃失寵。會張皇后病。皇貴妃任氏以孕。皇三子臨月。成妃仍當夕。上慰之。先是范氏慧妃者。頗見幸。生悼懷太子。封皇貴妃。以忤客氏意。被斥。妃與慧妃好。每見慧妃輒悵惋。至是侍上。長從容爲慧妃乞憐。原評曰事甚可感此一段亦殊勝褚先生客氏聞大怒曰。彼欲樹兵向我耶。遂矯旨革封。幽妃別宮。而逐內庫管理李謙於海子殺之。幸妃故鑒裕妃。預蓄乾食藏領壁間。半月得不死。後乃斥爲宮人而遷之乾西。崇禎元年。詔復妃封號。并饗禮。且請居慈慶後宮。奉

熹宗六妃。惟王良妃。段純妃。居東西兩宮。任容妃。卽皇貴妃。生懷獻太子。不受璫禍。張裕妃。以幽死。李成妃。范慧妃。俱被斥。又有定嬪。襄嬪。恪嬪。皆禁居乾西。崇禎初。復加封冊。使宮中供養如法。他有馮貴人。惡忠賢。擅嘗勸上罷內操。忠賢怒。矯旨謂貴人誹謗。賜死。胡貴人甫爲上所幸。以非忠賢黨。恐見寵。乘上出郊。日掩殺之。而報以貴人暴卒。上不問。

愍皇帝朝
崇禎

莊烈皇后周姓。其先蘇州人。徙居大興。父奎。以醫名。娶繼妻丁氏。生后。家貧。能操作。顧性貞靜。居平不見齒。天啓中。選信王邸妃。以后進。故事。宮中凡選婚。每選一。必以二副者陪。升卽中。選皇太后幕。以青紗帕取金玉跳脫繫其臂。不中。則以年月帖子納淑女袖。而侑以銀幣遣還。時神宗劉昭妃。攝太后寶。而中宮之政。悉稟成於熹宗懿安后。懿安后疑后弱。小將及其次。昭妃力贊之。曰。今雖弱。小他日不長大耶。因冊爲信王妃。上卽位。立爲皇后。以后父奎爲南城兵馬副指揮。進都督同知。旣而封奎嘉定伯。后家本節齋。而入典宮政。務減儉。裁宮中糜費。不爲外家乞恩澤。卽歲時大臣命婦入朝賀。亦賞賚必以禮。

時天下飢饉。府庫虛。上憂勞。議節用。而后所行合上意。上甚敬之。初。神廟以孝養故。設兩宮百戲。自宮中舊戲。以及民間鬻弄。無不備。至是悉裁革。而獨留舊戲。承應如所稱過錦戲者。彷彿古優伶供養。取時事諧謔。以備規諷。時旱蝗。中州賊大起。戲者作驅蝗及避賊狀。后見之。徐謂上曰。有此耶。因掩面泣。上亦泣。是日遂罷戲。原評曰。后語只三字。而仁心靜質。減言。齊事種種聖德。無一不見。上薄於聲色。宮中不兼寵。惟田貴妃者。頗愛之。妃見后稍倨。后每抑之以禮。會歲旦。朝正。妃當詣坤甯宮朝。適天寒雨雪。翟車止門外。不即入。又不令傳免。久之。袁淑妃車至。時淑妃亦進為貴妃。即傳入相見。且故為好語謝之去。於是始傳妃車入。坐朝之朝已遽下。無他言。妃大恨。面上泣訴。妃父教之上書。陽引愆而別為微詞挑之上。在交泰殿與后語不合。上推后仆地。后憤不食。欲自戕。上尋悔。遣中使持貂襦賜后。且問后起居。后勉為一餐。上傳旨令貴妃省愆。退居啓祥宮。三月不召。既而后在永和門看花。請召妃。上不應。后遽令以車迎之。乃相見如初。后嚴正自處。而性最仁。母丁太夫人。入宮必先朝后。始行家人禮。后見母之朝已也。而泣。欲太子為

謝左右力言不可。乃止。後聞寇漸棘。微言曰。吾南中尙有一家居。蓋意在南遷也。上問何從知之后。不語。后凡有所言。不欲盡。且不欲言。外多類此。先是宣懿康昭劉妃者。神宗妃也。萬歷六年立中宮。時隨冊爲昭妃。於嬪嬙中最賢而有年。崇禎改元。上使之居慈甯宮。掌太后印。稱太妃。周后之選。昭妃贊成之。以是也。至是歲節。上必朝太妃。朝畢。坐而饗以茶。上甫就坐。忽欠申。偃栲栳。齟齬徐聞。太妃戒勿驚。命尙衣者覆以帔。左右皆植立。屏息以俟。有頃。上竟攝衣起。謝曰。聖祖時。天下少事。宮中皆晏安。太妃所親見也。至兒子苦多著。北人呼多爲多著實難枝梧。兩夜省文書。自謂年甫踰壯。尙可磨耗。不謂蚤困劣。在太妃前。惛然不自持。一至此。太妃泣。上歸爲后言。后亦泣。時上念寇禍。茹蔬斷庖。割。后見上體瘁。具酒餚爲上解菜。上接瀛國夫人奏。瀛國夫人者。孝純太后母也。瀛國夜夢孝純歸。語上瘁而哭。言動舉止如平時。又云。翼日有爲解菜者。上勿卻也。上持奏入宮。見后解菜。驚詢曰。汝何以爲此。豈亦有所聞耶。曰。無有。外人有導之者耶。曰。無有。因念先后慈在冥冥。尙保惜至此。后亦賢能感先后意。乃出奏示后。

再拜舉筋相向哭。淚溢盤。后生皇長子。及長平昭仁二公主。皇長子已冊立。出閣讀書。昭仁主六歲未封。以居昭仁宮。故名。故事。太子既出閣。非上命不朝。后偶上坐便殿。皇長子以后故來請朝。時案有急奏。則寇破河南報也。上歎曰。兒見母有幾而關我耶。今後竟入朝。勿問也。十七年三月十七日。都城陷。上至宮。曰。事急矣。后卽於上前再拜自經死。大兵定京師。

宣統二年四月付印
同年同月出版

香艷叢書

(四冊定價大洋一元)

上海棋盤街平和里內

國學扶輪社

上海六馬路吉慶坊內

國光活版部

上海棋盤街平和里內

國學扶輪社



版權所有

外埠分發行所

成都 北都 北京 天津 天津 保定 山

粹源官各官各官文
記記書書書書書
莊局局局局局
總發行所

校刊者
印刷所


廣東 漢口 長沙 南京 杭州 蘇州 湖北 寧波

會文書學社
廣益書局
鴻文書局
啓新書局
德記書莊
振新書莊
羣益書局
汲經齋

國學扶輪社出版廣告

諸家
評大


香 豔 叢 書	嚴 幾 道	林 琴 南	譚 復 生	章 太 炎	春 酒 堂 文 集	全 謝 山 文 鈔	吳 摯 甫 詩 集	吳 摯 甫 文 集	方 望 溪	戴 南 山	聊 齋 文 集	胡 天 游 文 集	魏 默 深 文 集	校 名 龔 定 盒 全 集	顧 仲 恭 文 集	錢 牧 齋 文 鈔	王 壬 秋 全 集	國 朝 文 滙
共 十 集 四 十 冊	四 冊	五 冊	二 冊	八 冊	一 冊	五 冊	八 冊	二 冊	四 冊	六 冊	七 冊	二 冊	四 冊	十二 冊	壹 百 冊			
洋	洋	洋	洋	洋	洋	洋	洋	洋	洋	洋	洋	洋	洋	洋	洋	洋	洋	洋
十 元 二 角	一 元 五 角	一 元 五 角	八 角	二 元 五 角	五 角	一 元 二 角	二 元 五 角	六 元 五 角	一 元 二 角	二 元 五 角	二 元 五 角	二 元 五 角	一 元 二 角	二 元 五 角	二 元 五 角	二 元 五 角	三 元 十 元	



特
設
廉
價
部

香艷叢書

第五集




第五集

香艷叢書

上海國學扶輪社印行





HQ
1737
H25
1.17

香艷叢書五集目錄

卷一

玉臺書史

卷二

北里志

教坊記

青樓集

麗情集

荻樓雜抄

琵琶錄

魏王花木志

桂海花木志

楚辭芳草譜

卷三

瑤臺片玉乙種

王翠翹傳

擬合德諫飛燕書

金小品傳

徐郎小傳

頓子眞小傳

妓虎傳

香本紀

楊娥傳

黔苗竹枝詞

黑美人別傳

某中丞

女盜俠傳

女俠翠雲孃傳

記某生爲人唆訟事

記栗主殺賊事

女俠荊兒記

卷四

餘墨偶談節錄（一百三十七則）

五

集

香艷叢書

五集卷一

玉臺書史

錢塘厲鶚太鴻輯

宮闈

漢

孝成許皇后 大司馬車騎將軍平恩侯嘉女也。后聰慧善史書。（漢書外戚傳）

章德竇皇后 扶風平陵人。大司馬融之曾孫也。年六歲能書。家人皆奇之。（後漢書皇后紀）

和帝陰皇后 光烈皇后兄執金吾識之曾孫也。后少聰慧。善書藝。（後漢書皇后紀）

和熹鄧皇后 后諱綏。太傅禹之孫也。父訓護羌校尉。六歲能史書。十二通詩

論語。家人號曰諸生。是時方國貢獻。競求珍麗之物。自后卽位。悉令禁絕。歲時但供紙墨而已。（後漢書皇后紀）

順烈梁皇后。諱炳。大將軍商之女。恭懷皇后弟之孫也。少善女工。好史書。嘗以列女圖畫。置於左右。以自監戒。（後漢書皇后紀）

馮嫫。楚主侍者。馮嫫。卽史書習事。嘗持漢節爲公主使。行賞賜於城郭諸國。敬信之。號曰馮夫人。（漢書西域傳）

王美人。趙國人也。祖父苞。五官中郎將。美人聰敏有才。能書會計。（後漢書皇后紀）

左姬。字小娥。安帝生母也。善史書。喜詞賦。和帝賜諸王宮人。因入清河第。（清河孝王傳）

魏

文昭甄皇后。中山無極人。明帝母。漢太保甄邯後也。父逸。上蔡令。后年九歲。章書。視字卽識。數用諸兄筆硯。兄謂后言。汝當習女工。用書爲學。當作女博。

士耶。后言聞古賢女。未有不覽前世成敗以爲己誡者。不知書何由見之。
(魏志本傳)

吳

吳主趙夫人。丞相達之妹。善書畫。巧妙無雙。能於指間以綵絲織雲霞龍蛇之錦。大則盈尺。小則方寸。宮中謂之機絕。孫權常歎。魏蜀未夷。軍旅之隙。思得善畫者。使圖山川地勢軍陣之像。達乃進其妹。權使寫九州江湖方岳之勢。夫人曰。丹青之色。甚易歇滅。不可久寶。妾能刺繡作列國方帛之上。寫以五岳河海城邑行陣之形。既成。乃進於吳主。時人謂之針絕。雖棘刺木猴雲梯飛鳶。無過此麗也。(拾遺記)

晉

武元楊后。諱豔。字瓊芝。宏農華陰人也。少聰慧。善書。(晉書本傳)

安僖王皇后。諱神愛。琅邪臨沂人也。父獻之。尚新安愍公主。無子。唯一女。後立爲安僖皇后。后亦善書。(張懷瓘書斷)

齊

韓蘭英。韓蘭英。吳郡人。有文辭。宋孝武時獻中興賦。被賣入宮。宋明帝時。用
以爲宮中職僚。及武帝以爲博士。敎六宮書學。以其年老多識。呼爲韓公云。
(南史齊武穆裴后傳)

梁

武德鄰皇后。諱徽。高平金鄉人也。后幼明慧。善隸書。讀史傳。(南史梁后妃
傳)

陳

武宣章皇后。諱要兒。吳興烏程人。本姓鈕。父景明爲章氏所養。因改姓焉。后
少聰慧。美容儀。善書計。能誦詩及楚詞。(南史陳后妃傳)

後主沈皇后。諱發華。吳興武康人也。后性端靜。聰明強記。涉獵經史。工書翰。
(南史陳后妃傳)

沈氏后。德名標發華。允光親署。獨美可嘉。如晚晴陣雲。傍日殘霞。注云今見

署啓一紙（寶泉述書賦）

後主皇后沈氏。吳興人。君理之女。善書。（書史會要）

北魏

文成文明皇后馮氏。長樂信都人也。父朗秦雍二州刺史。坐事誅。后遂入宮。高宗踐極。立爲皇后。后性聰達。學書記。作勸戒歌。三百餘章。又作皇誥十八章。（魏書后妃傳）

宣武靈皇后胡氏。安定臨涇人。司徒國珍女也。言帖爲尼。世宗初入講禁中。諷左右稱后姿行。世宗聞之。召入掖庭爲承華。進爲充華嬪。肅宗踐祚。尊爲皇太后。臨朝聽政。性聰悟。多才藝。略得佛經大義。親覽萬幾。手筆決斷。（魏書后妃傳）

唐

太穆寶皇后。京兆始平人。隋定州總管神武公毅之女也。善書。學類高祖之書。人不能辨。工篇章。而好存規誡。（舊唐書本傳）

則天皇后武氏。諱曌并州文水人也。上元元年。高宗號天皇。皇后號天后。天

下謂之二聖。宏道元年爲皇太后。臨朝稱制。天授元年。后自稱皇帝。改國號周。長安五年。上后號曰則天大聖皇帝。唐書本紀。

唐則天順聖皇后武氏。凜凜英斷。脫去鉛華脂韋氣味。乘高宗溺愛。而窺覲竊起。遂能不出重闈深密之地。駕馭英雄。使人人各爲其用。不旋踵。嘿移唐室。使之善自退託。有周南卷耳之志。則其用心。豈減古賢后妃哉。惜乎不知出此。乃欲以牝鷄司晨。宜乎不克令終。而張柬之等起。而正子明辟也。新史貶而傳之。舊史以爲窮妖白首。良以爲訓。攷其出新意。持臆說。增減前人筆畫。自我作古。爲十九字。曰。天。聖。地。回。日。固。月。○。星。風。君。年。正。惠。臣。曌。照。鳳。載。處。載。園。國。鳳。初。鑿。證。鰲。授。至。人。鑒。聖。匡。生。當。時。臣。下。章。奏。與。天。下。書。契。咸。用。其。字。然。獨。能。行。于。一。世。而。止。唐。之。石。刻。載。其。事。者。知。其。在。則。天。時。也。雖然。亦。本。於。喜。作。字。初。得。晉。王。導。十。世。孫。方。慶。者。家。藏。其。祖。父。二。十。八。人。書。迹。摹。搨。把。玩。自。此。筆。力。益。進。其。行。書。駸。駸。稍。能。有。丈。夫。勝。氣。今。御。府。所。藏。行。

書一夜宴詩（宣和書譜）

武后君臨。藻翰時欽。順天經而永保先業。從人欲而不顧兼金。注曰。則天皇
后。沛國武氏。十護女。臨朝稱尊。號曰大周金輪皇帝。時鳳閣侍郎石泉王公
方慶。卽晉朝丞相導十一世孫。有累代祖父書迹。保傳于家。凡二十八人。緝
成一十一卷。后墨制問方慶。因而獻焉。后不欲奪志。遂盡模寫留內。其本加
寶飾錦績。歸還王氏。人到于今稱之。右史崔融撰王氏寶章集序。具紀其事。
（寶泉述書賦）

薦福寺天后飛白題額。崇福寺武后題額。（歷代名畫記）

周昇仙太子碑。聖曆二年武后撰。并行書（金石錄）

延載初。周允初除鳳閣鸞臺平章事。證聖元年卒。則天爲七言詩傷之。又自
繕寫時以爲榮。（舊唐書周允元傳）

上官昭容。名婉兒。西臺侍郎儀之孫。天性韶警。善文章。自通天以來。內掌詔
命。揆麗可觀。帝卽位。進拜昭容。景雲中諡惠文。（舊唐書本傳）

呂溫上官昭容書樓歌序云。貞元十四年。友人崔仁亮于東都買得研神記一卷。有昭容列名書縫處。〔呂衡州集〕

千福寺額。上官昭容書。〔歷代名畫記〕

臨川公主

太宗女

韋貴妃所生。下嫁周道務。工籀隸。能屬文。高宗立。上孝德頌。

帝上詔褒答。永徽初。進長宮主。恩賞卓異。〔唐書本傳〕

晉陽公主

太宗女

字明達。幼字兕子。文德皇后所生。主臨帝飛白書。下不能辨。

〔唐書本傳〕

貴妃楊氏

宋張端義云。貞定大歷寺有藏殿。其殿藏經。皆唐宮人所書。經尾

題名。皆極可觀。有塗金匣藏心鏡一卷。字體尤婉麗。其後題云。善女人楊氏。爲大唐皇帝李三郎書。〔貴耳集〕

後唐

魏國夫人陳氏

襄陽人也。善書。〔唐書沙陀傳〕

南唐

先后后种氏 江西良家女。性警悟。通書計。(馬令南唐書)

後主昭惠后周氏 小字娥皇。大司徒宗女。通書史。善音律。尤工琵琶。元宗賞其藝。取所御琵琶時謂之燒槽者賜焉。後病亟。以元宗所賜琵琶及常臂玉環親遺後主。又自爲書誥薄葬。(馬令南唐書)

保儀黃氏 江夏人。後主選爲保儀。書學技能多出於天性。後主屬意。會小周專房。品秩不加。第以掌墨寶而已。初元宗後主皆妙於筆札。博收古書。有獻者厚賞。宮中圖籍萬卷。尤多鍾王墨蹟。皆係保儀所掌。(馬令南唐書)

耿先生 軍大校耿謙女。好書善畫。往往有佳句。雅通黃白之術。能拘制鬼魅。奇怪恍惚。莫知其所由來。爲女道士。自稱天自在山人。保大中。因宋齊邱以入宮。元宗處之別院。號曰先生。常被碧霞帳。手如鳥爪。題詩牆壁。自稱比大先生。(鄭文寶耿先生傳)

宮人喬氏 李後主手書金字心經一卷。賜其宮人喬氏。喬氏後入太宗禁中。聞國主薨。自內庭出。其經捨在相國寺西塔院資薦。且自書于後。曰。故李氏

國主宮人喬氏。伏遇國主百日。謹捨昔時賜妾所書般若心經一卷。在相國寺西塔院。伏願彌勒尊前持一花而見佛云云。其後江南僧持歸故國。置之天禧寺塔相輪中。寺後失火。相輪自火中墮落而經不損。爲金陵守王君玉所得。君玉卒。子孫不能保之。以歸甯鳳子儀家。喬氏所書在經後。字極整潔。而詞甚悽惋。所記止此。徐鍇集南唐制誥。有宮人喬氏出家誥。豈斯人也耶。
(王銍默記)

宋

曹皇后 仁宗曹皇后。真定人。樞密使惠武王彬之孫也。性慈儉。重稼穡。嘗于禁苑種穀。親蠶。善飛帛書。(宋史本傳)

慈聖曹皇后。工飛白。蓋習觀昭陵落筆也。先人舊藏一美字。徑二尺許。筆勢飛動。用慈壽宮寶。(老學庵筆記)

向皇后 神宗向皇后。河內人。宰相敏中曾孫。哲宗立。尊爲皇太后。(宋史本傳)

向皇后工行草（書史會要）

安妃劉氏。安妃本酒保家女。初事崇恩宮。宮罷。出居宦者何訢家。內侍楊戩譽其美。復召入。明達貴妃以同姓養爲女。遂有寵。爲才人。進淑妃。政和四年。加貴妃。朝夕侍上。擅愛專席。林靈素以技進。目爲九華安妃。肖像於神霄帝君之左。宣和三年薨。謚明節和文。冊贈爲皇后。（宋史本傳）

明節劉后。一時遭遇。寵傾六宮。忽苦瘵疾。臨終戒左右曰。我有遺祝。在領巾上。候我氣絕。奏官家親自來解。語畢而終。左右馳奏。上至哀慟。悲不自勝。領巾上蠅頭細字。其辭云。妾出身微賤。而無寸長。一旦遭遇聖恩。得與嬪御之列。命分寒薄。至此夭折。雖埋骨于九原。魂魄不離左右。切望陛下以宗廟社稷之重。天下生靈之衆。大王帝姬之多。不可以賤妾一人。過有思念。深動聖懷。况後宮千計。勝如妾者不少。妾深欲忍死。面與君父訣別。謫限已盡。不得少留。冤痛之情。言不能盡。自後左右每欲寬解。必提領巾。上愈傷感。聞者謂李夫人不足道也。林靈素謂后是九華安妃。臨終聞本殿異香音樂。次年有

青城道士見后于巫山。彷彿金釵鈿合云。（錢氏私誌）

憲聖吳皇后。高宗憲聖慈烈吳皇后。開封人。父近以后貴。進封吳王。年十四。高宗爲康王。被選入宮。王卽位。封和義郡夫人。后博習書史。又善翰墨。由是寵遇日至。尋進貴妃。紹興十三年。詔立爲皇后。高宗內禪。稱太上皇后。名所御殿曰慈福。（宋史本傳）

德壽慈福兩宮。御書觀音經共八段。初在碑石庫。嘉定三年。置架設于羣玉堂東偏。（中興館閣錄）

羣玉堂法帖十卷。第一卷有憲聖慈烈皇后御書千文歸田賦。（中興館閣錄）

慈福皇太后喜親翰墨。尤愛蘭亭。嘗作小楷一本。全是王體。流傳內外。故陸升之代劉珙造春帖子有云。內仗朝初退。朝曦滿翠屏。硯池深不凍。端爲寫蘭亭。（蘭亭博議）

憲聖慈烈皇后吳氏。開封人。吳宣靖王近之女。高宗后。博習書史。妙於翰墨。

帝嘗書六經賜國子監刊石稍倦。卽命后續書。人莫能辨。《書史會要》

宋憲聖皇后書養蠶圖。自浴種至翦帛。凡二十四事。使閱者宛然置身田舍。見婦子劫勛不遑之景也。每段下題小字。極其工緻。至元中鄭足老題云。爲顯仁皇后字。后習高皇字。高皇手書九經。每倦則后書續之。人未易辨。金華宋景濂云。圖出於潛令樓。璫璫獲召見以圖上進。上携至宮。憲聖慈烈皇后逐段題之。皇后姓吳配高宗。其書絕相類。謂非顯仁章后書。余攷之。顯仁章后乃高宗母也。從徽宗北轅。老年始歸。憲聖慈烈吳后乃高宗繼后。史稱其善翰墨。則爲吳后書無疑。金華之言爲確矣。《庚子銷夏記》

劉貴妃 臨安人。紹興十八年入宮。專掌御前文字。工書畫。《陳善杭州府志》

劉夫人字希號夫人。建炎間掌內翰文字及寫宸翰字。高宗甚眷之。亦善畫。上用奉華堂印。《書史會要》

三子慶于毘陵得李伯時畫草堂十志。前有奉華大小印。向曾收入劉娘子位者。後有閉關頌酒之裔一印。此雖用劉伯倫事。然于婦人恐不類耳。

楊皇后 寧宗恭聖仁烈楊皇后。少以姿容選入宮。慶元三年四月。進封婕妤。五年。進婉儀。六年。進貴妃。恭淑皇后崩。中宮未有所屬。貴妃與曹美人俱有寵。韓侂胄見妃任權術。而曹美人性柔順。勸帝立曹。而貴妃頗涉書史。知古今。性復機警。帝竟立之。皇子昀卽位。加尊號壽明仁福慈睿皇太后。（宋史本傳）

恭聖仁烈皇后楊氏。寧宗后。忘其里氏。或云會稽人。楊次山者。亦會稽人。后自謂其兄也。少以姿容選入宮。頗涉書史。知古今。書法類甯宗。（書史會要）

太清宮寧宗時建。楊皇后書道德經石幢。（武林舊事）

楊妹子 馬河中遠進御。及賜貴戚畫。寧宗每命楊妹子題署。有楊娃印章。楊娃者。寧宗恭聖皇后妹也。書法類寧宗。以藝文供奉內庭。其蹟惟遠畫見之。

（清賞錄）

楊妹子。乃宋寧宗恭聖皇后妹。其書類甯宗。凡御府馬遠畫。多命題詠。余曾見馬遠松院鳴琴小幅。楊娃題其左方云。閑中一弄七弦琴。此曲少知音。多

因淡然無味。不比鄭聲淫。松院靜。竹樓深。夜沉沉。清風拂軫。明月當軒。誰會幽心。調寄訴衷情。波撇秀穎妍媚之態。映帶縹緗。（韻石齋筆談）

寧宗皇后妹。時稱楊妹子。書法類寧宗。馬遠畫多其所題。（書史會要）

楊妹子題馬遠紅梅。遠在畫院中最知名。余有紅梅一枝。菁豔如生。楊妹子題詩于上。字亦工。按楊妹子者。寧宗恭聖皇后之妹。書法類寧宗。凡御府馬遠畫。多令之題。此幀李梅公見而愛之。携去竟燬于火。余又有女誠一卷。爲馬麟畫。相傳爲寧宗書。實楊妹子書。用御書之印耳。此卷今在畿南士夫家。（庚子銷夏記）

六月二十四日。赴鑑叔招。出馬遠單條四幅。俱楊妹子題。其一白玉蝶梅。重重疊疊。染湘黃。此際春光已半芳。開處不禁風日暖。亂飛晴雪點衣裳。再題晴雪烘香四字。其一著雪紅梅。銖衣翠蓋。映朱顏。未委何年入帝關。（默）被畫工傳寫得。至今猶似在衡山。再題朱顏傅粉四字。其一煙鎖紅梅。夭桃艷杏。豈相同。紅潤姿容冷淡中。披拂輕烟何所似。動人春色碧紗籠。再題霞鋪烟

表四字。其一綠彎玉蝶。渾如冷蝶宿花房。擁抱檀心憶舊香。開到寒梢猶可愛。此般必是漢宮妝。再題層疊冰綃四字。後各有楊娃之章一小方印。與余家所藏妹子題馬遠楊葉竹枝二冊字畫差大。然筆腕瘦嫩。畧相似。二冊楊葉題線撚依依綠。金垂裊裊黃。竹枝題雨洗娟娟淨。風吹細細香。（項鼎鉉呼桓日記）

嘗觀馬和之四小景。有楊妹子各題一絕云。人道中秋明月好。欲邀同賞意如何。華陽洞裏秋壇上。今夜清光此處多。石楠葉落小池清。獨下平橋弄扇行。倚日綠陰無覓處。不如歸去兩三聲。清獻先生無一錢。故應琴鶴是家傳。誰知默鼓無弦曲。時向珠宮舞幻仙。雨洗東坡月色清。市人行盡野人行。莫嫌犖确坡頭路。自愛鏗然曳杖聲。（沈津吏隱錄）

度宗昭儀王氏。會甯郡夫人昭儀王秋兒東宮直書閣能屬文。鶴骨癯貌。度皇自卽位。萬幾之暇。批答書閣式克欽承。皆出其手。（隨隱漫錄）

荊國大長公主。太宗女。幼不好弄。眞宗卽位。封萬壽長公主。下嫁駙馬都尉。

李遵勗主善筆札喜圖史。能爲歌詩。尤善女工之事。（宋史本傳）

魏國大長公主 英宗第二女。神宗時封蜀國公主。下嫁左衛將軍王誥。好讀

古文章。善書札。（宋史本傳）

越國夫人王氏 端獻王頴之妻。作篆隸有古法。（書史會要）

華國夫人韋氏 魏惠獻王愷妻。特封韓魏兩國夫人。（魏王愷傳）

謝翺翠鑠亭避雨詩云。仰面無所覩。梁間有題字。問此何人書。婉婉有弱氣。云昔魏王妃。學書似李衛。乘雲到此山。灑墨在空翠。自注云。亭有魏王妃所題字。尙新。王嘗以成德軍節度鎮明。故妃至其處。（晞髮集）

金

元妃李氏 章宗元妃李氏師兒。大定末以監戶女子入宮。是時宮教張建教宮中。師兒與諸宮女皆從之學。章宗問建宮教中女子誰可教者。建曰。就中音聲清亮者最可教。章宗以建言求得之。章宗好文辭。妃性慧黠。能作字知文義。遂大愛幸。明昌四年封爲昭容。明年進封元妃。（金史本傳）

明

慈聖李太后 神宗生母也。東安人。神宗在位。上尊號慈聖宣文明肅皇太后。

嘗書謙謹持家四字。以貽其父李公。（名山藏坤則記）

慈壽寺神宗爲慈聖皇太后建也。寶藏閣係聖母御筆題。（燕都遊覽志）

文華殿後殿所懸扁。凡十二字。每行二字。共分六行。其文曰。學二帝三王。治天下大經大法。乃慈聖御筆。臣下但見龍翔鳳翥。結搆波磔之妙。以爲御書而實非也。（萬歷野獲篇）

神宗貴妃鄭氏 大興人。父憲成。妃狡媚多智。生皇三子。封皇貴妃。帝寵之。顯

房。崇禎三年七月薨。諡恭恪惠榮和靖皇貴妃。葬銀泉山。（明史豪）

鄭貴妃泥金書觀世音菩薩普門品經一卷。在薨青紙上。梵本刻絲錦裝卷。首題云。大明萬歷甲辰年十二月吉日。皇貴妃鄭謹發。誠心沐手。親書金字。觀世音菩薩普門品經一卷。恭祝今上聖主祈願。萬壽洪福。永享康泰安。裕吉祥。楷法秀整。前繪佛像甚精細。今藏吾杭趙谷林齋中。余題絕句四首。

云。梵夾。盜書出漢京。翼坤（鄭貴妃宮名）題處最分明。依稀買得硯神記。紙上香多蠹不成。巧笑由來雨露偏。佛恩還在聖人前。開函稽首無他願。一筆泥金壽一年。柘館餘閑罷女紅。祝釐不與衆嬪同。也勝密誓含元殿。小字親封玉合中。城南詩老觀空久。（丁君敬身同賦）特賦新詞繼夢華。他日秋山黃葉下。與君禮足九蓮花。

武宗王妃。燕京人。以才色得幸于武宗。侍幸薊州溫泉。題詩自書刻石。今石刻尚存。（列朝詩集）

陳司綵。洪武二十年。詔選民間淑女入宮。分司六尚。陳二妹。字瑞貞。仲裕女也。貌端莊。與焉善。六書曉大義。精女工。嬪嬙皆師事之。人稱爲女中君子。二十四年。命爲司綵。賜歸省。（棗林雜俎）

婁妃。婁妃書倣詹孟舉。楷書千文極佳。江省永和門並龍興普賢寺額。其筆也。後人以其賢。不忍更之。（書史會要）

楊妃。楊妃書法趙文敏。頗得筆意。但偏鋒耳。（書史會要）

安福郡主 寧靖王奠培之長女。工草書能詩。（列朝詩集）

女仙

晉

南嶽魏夫人 諱華存。字賢安。位紫虛元君。領上真司命。（真靈位業圖）

魏夫人左僕射舒之女。太保公掾南陽劉幼彥之室。光祿勳璞之母。天才卓異。少讀莊老及春秋二傳五經百子。後修真得道。夫人善書。（書史會要）

豫章女巫 豫章女巫。太元中有神降之。能空中與人言。且善書。（書史會要）

唐

吳彩鸞 女仙。鸞自言西山吳眞君之女。太和中進士文蕭客寓鍾陵。南方風俗。中秋月夜。婦人相持踏歌。婆娑月影中。最爲盛集。蕭往觀焉。而彩鸞在歌場中作調弄語。以戲蕭。蕭心悅之。伺歌罷。躡蹤其後。至西山中。忽有青衣燃松明以燭路者。彩鸞見蕭。遂偕往。復歷山椒。有宅在焉。至其處坐席未煖。而彩鸞據案如府司治事。所問皆江湖溺死人數。蕭他日詢之。彩鸞初不答。問

至再四。乃語之。我仙子也。所領水府事。言未既。忽震雷迅發。雲物晦冥。彩鸞執手。版伏地。作聽罪狀。如聞謫詞云。以汝泄機密事。罰爲民妻一紀。彩鸞泣謝。諭蕭曰。與汝自有冥契。今當往人世矣。蕭拙于爲生。彩鸞以小楷書唐韻一部。市五千錢。爲餬口計。然不出一日間。能了數十萬字。非人力可爲也。錢囊差澀。復一日書之。且所市不過前日之數。由是彩鸞唐韻。世多得之。歷十年。蕭與彩鸞。遂各乘一虎仙去。唐韻字畫雖小。而寬綽有餘。全不類世人筆。當於仙品中。別有一種風氣。今御府所藏正書一十有三。唐韻平聲上。唐韻平聲下。唐韻上聲。唐韻去聲。唐韻入聲。唐韻上下二。唐韻六。〔宣和書譜〕鍾陵西山有游帷觀。每至中秋。車馬喧闐。十里若闐闐。豪傑多召名姝善謳者。夜與丈夫間立。把臂連踏而唱。惟對答敏捷者勝。太和末。有書生文蕭。往觀。覩一姝甚妙。其詞曰。若能相伴陟仙壇。應得文蕭駕彩鸞。自有綉襦并甲帳。瓊台不怕雪霜寒。生意其神仙。植足不去姝。亦相盼。歌罷。獨秉燭穿大松徑。將盡。陟山扣石。冒險而升。生躡其蹤。姝曰。莫是文蕭耶。相引至絕頂。坦然。

之地。後忽風雨裂帷覆機。俄有仙童持天判曰。吳彩鸞以私欲洩天机。謫爲民妻一紀。姝乃與生下山。歸鍾陵爲夫婦。（誠齋雜記）

仙人吳彩鸞書孫愔唐韻。凡三十七葉。此唐人所謂葉子者也。按彩鸞隱居在鍾陵西山。所書唐韻。民間多有。余所見共六本。此一本二十九葉。彩鸞書其八葉。後人所補。氣韻肥濁。不相入也。（黃山谷集）

裴鉶傳奇載成都古仙人吳彩鸞善書小字。嘗書唐韻。鸞之今蜀中導江迎祥院經藏中佛本行經六十卷。乃彩鸞所書。亦異物也。（張邦基墨莊漫錄）洪龜父朋黨韻亭詩云。紫極宮下春江橫。紫極宮中百尺亭。水入方洲界玉局。雲映遠山羅翠屏。小楷四聲餘翰墨。主人一粒盡仙靈。文蕭彩鸞不復返。至今神界花冥冥。（呂本中紫薇詩話）

樓鑰跋宇文廷臣所藏玉篇鈔云。始予讀文蕭傳。言吳彩鸞書唐韻字。疑其不然。後于汪季路尙書家見之。雖不敢必其一日可辨。然亦奇矣。爲之賦詩。且辨其爲陸法言切韻。茲見樞密宇文公所藏玉篇鈔。則又過之。是尤可寶。

也。既謂之鈔。竊以爲如北堂書鈔之類。蓋節文耳。以今玉篇驗之。果然。不知舊有此鈔而書之耶。抑彩鸞以意去取之耶。有可用之字畧之。有非日用之字而反取之。部居如今本。皆以朱氏別之。而三字五字止。以墨字書之。次序皆不與今合。不可致詰。輒書前歲所與汪氏詩跋於左。庶來者得以覽觀。（攻媿集）

宇文廷臣文孫家。有吳彩鸞玉篇韻。今世所見者唐韻耳。其書一先爲廿三先。廿四仙不可曉。又導江迎祥寺有彩鸞書佛本行經六十卷。或者以爲唐經生書。（硯北雜志）

鮮于伯机有吳彩鸞書切韻一本。其書一先爲廿三先。廿四仙不可曉。字畫尤古。（志雅雜鈔）

龍興紫極宮寫韻軒。世傳吳彩鸞寫韻于此軒。以之得名。予昔在圖書之府。及好事之家。有所寫唐韻。皆硬黃書之。紙素芳潔。界畫精整。結字迥麗。皆人間之奇玩也。（道園學古錄）

虞集題吳彩鸞唐韻眞蹟後。豫章城頭寫韻軒。綉簾窄地月娟娟。尋常鶴唳霜如月。書到人間第幾篇。（道園學古錄）

元詹玉題寫韻軒調桂枝香。紫薇花露。瀟灑作涼雲。點商勾羽。字字飛仙下筆。一簾風雨。江亭月觀。今如許。歎飄零墨香千古。夕陽芳草。落花流水。依然南浦。甚兩兩淩風駕虎。恁天孫標致。月娥眉嫵。一笑生春。那學世間兒女。筆牀硯滴。曾窺處。有西山青眼如故。素箋寄與玉簫聲。徹鳳鳴鸞舞。（鳳林書院草堂詩餘）

彩鸞與文蕭遇。在文宗太和末。而法苑珠林。則寫于天寶年間。豈神仙隱顯。原非時代之可限歟。（陳宏緒寒夜錄）

吳彩鸞龍鱗楷韻。後柳誠懸題云。吳彩鸞世傳謫仙也。一夕書唐韻一部。卽鬻于市。人不測其意。稔聞此說。罕見其書。數載勤求。方獲此本。觀其神全氣古。筆力遒勁。出於自然。非古今學人所及也。時惟太和九年九月十五日題。其制共五十四葉。鱗次相接。皆留紙縫。天寶八年製。（庚子銷夏記）

項氏寶藏吳彩鸞正書唐韻全部。原係鮮于伯機故物。後爲陸太宰全卿所購。名迹也。雖字細僅若蠅頭。而位置寬綽有餘。全不類世人行筆。當于仙品中求之。乃得。（清河書畫舫）

謝自然 華陽貞女也。幼而入道。善筆札。能屬文。（續仙傳）

盧眉娘 永貞元年南海貢奇女盧眉娘。年十四。幼而慧悟。工巧無比。能於一尺絹上。綉法華經七卷。字之大小。不逾粟粒。而點畫分明。細于毛髮。其品題章句。無有遺闕。至元和中。憲宗以金鳳環束其腕。眉娘不願住禁中。遂度以黃冠。放歸黃海。賜號曰逍遙。後神遷。香氣滿室。弟子將葬。舉棺覺輕。卽撒其蓋。惟有藕屨而已。後人往往見乘紫雲遊于海上。（杜陽雜編）

嵩山女子 嵩山女子。佚其名。任生者。隱居嵩山讀書。常夜聞異香。忽一女子開簾而入。年可二十餘。凝態豔質。世莫之見。有雙環青衣左右翼侍。顧謂侍者曰。郎君書籍中取一幅紙兼筆硯來。乃作贈詩一首。筆札秀麗。後三日來。又贈二篇。良久出門。閃閃上空中。去地百餘丈。猶隱隱見于雲間。生以三篇

示於人。皆知其神仙矣。（神仙感遇傳）

曹文姬 文姬本長安倡女也。生四五歲。好文字戲。及笄。姿豔絕倫。尤工翰墨。自賤素外。至于羅綺。牕戶可書之處。必書之。日數千字。人號爲書仙。筆力爲關中第一。後歸任生。三月晦日。偕生乘雲仙去。（劉斧青瑣高議）

曹文姬本長安倡。姿豔絕倫。尤工翰墨。欲偶者請先投詩。岷山任生詩曰。一點塵心謫九天。玉皇殿上掌書仙。莫怪濃香薰骨膩。霞衣曾帶御爐煙。女曰。眞吾夫也。不然。何以知吾事耶。遂事之。五年忽對任曰。吾本天上司書仙女。以情愛謫人寰。二紀將歸。子可偕行。騰雲而去。後以所居爲書仙里。（書史要）

附尼

元

妙湛 比邱尼妙湛。管夫人爲寫長明庵圖。妙湛小行書題其上。（珊瑚網）

名媛

周

魯秋胡妻 雕蟲篆。魯秋胡妻所作。秋胡隨牒遠仕。荏苒三年。桑時閒玩。集爲此書。亦云戰筆書。其體遵律垂畫。纖長旋繞屈曲。有若蟲形。（僧夢英十八體書）

二十二蟲書。魯秋胡婦浣蠶所作。亦曰雕蟲篆。（韋續纂五十六種書）

漢

扶風馬夫人 安定皇甫規妻。不知何氏女也。規初喪室家。後更娶之。妻善屬文。能草書。時爲規答書記。衆人怪其工。（後漢書列女傳）

扶風馬夫人大司農皇甫規之妻也。有才學。工隸書。夫人寡。董卓聘之。夫人不屈。卓殺之。（書斷）

後漢皇甫規妻馬夫人行隸中中品。（韋續九品書人論）

蔡文姬 蔡邕女也。博學有才辨。又妙于音律。興平中亂。沒於南匈奴。曹操贖之。操問曰。聞夫人家多墳籍。猶能記憶之否。文姬曰。昔亡父賜書四千許卷。

今所誦憶。裁四百餘篇耳。操曰。今當使十吏就夫人寫之。文姬曰。男女之別。禮不親授。乞給紙筆。真草惟命。於是繕書送之。文無遺誤。後漢書列女傳。蔡邕得筆法於神人。傳女文姬。文姬傳之鍾繇。古今傳授筆法人名。

我生之初。尚無爲。我生之後。漢祚衰。蔡炎書。淳化閣帖。

蔡炎胡笳引。自書十八章。極可觀。不謂流傳。僅餘兩句。亦似斯人身世耶。

山谷題跋

晉

衛夫人。晉中書院李充母衛夫人。善鍾法。王逸少之師。羊欣撰錄。

衛夫人名鑠。字茂漪。廷尉展之女弟。恒之從女。汝陰太守李矩之妻也。隸書尤善規矩。鍾公云。碎玉壺之冰。爛瑤台之月。婉然芳樹。穆若清風。右軍少嘗師之。永和五年卒。年七十八。子充爲中書郎。亦工書。書斷。

鍾繇傳之衛夫人。衛夫人傳之王羲之。傳授筆法人名。

庾肩吾書品列中之上。

李嗣真書列上下品。云衛夫人正體尤絕。

韋續九品書人論上中品有李矩妻衛夫人正行。

唐人書評衛夫人書如揮花舞女。低昂美容。又如美女登台。仙娥弄影。紅蓮映水。碧沼浮霞。（書苑菁華）

晉衛夫人筆陣圖

夫三端之妙。莫先於用筆。六藝之奧。莫重於銀鉤。昔秦丞相李斯見周穆王書。七日興歎。患其無骨。蔡尚書入鴻都觀碣。十旬不返。嗟其出羣。故知達于其源者少。闇于其理者多。近代以來。殊不師古。而緣情棄道。纔記姓名。或學不該贍。聞見又寡。致使成功不就。虛費精神。自非通靈感物。不可與談斯道也。今刪李斯筆妙。更加潤色。總七條并作其形容。列事如左。貽諸子孫。永爲模範。庶將來之君子。時復覽焉。筆要取崇山絕仞。中兔毛。八九月收之。其筆頭長一寸。管長五寸。鋒齊腰強者。其硯取前涸新石。潤澀相兼。浮津耀墨者。其墨取廬山之松烟。代郡之鹿膠。十年已上。強如石者爲之。紙取東陽魚卵。

虛柔滑淨者。凡學書字。先學執筆。若真書去筆頭二寸一分。若行草書去筆頭三寸一分。執之下筆。點畫波擊屈曲。皆須盡一身之力而送之。若初學者。先大書不得先從小。善鑑者不寫。善寫者不鑑。善筆力者多骨。不善筆力者多肉。多骨微肉者謂之筋書。多肉微骨者謂之墨豬。多力豐筋者聖。無力無筋者病。一一從其消息而用之。

一 如千里陣雲隱隱然其實有形

、 如高峰墜石磕磕然實如崩也

丨 萬歲枯藤

人 崩浪雷奔

丁 勁弩筋節

ノ 陸斷犀象

ㄣ 百鈞弩發

右七條筆陣出入斬斫圖。執筆有七種。有心急而執筆緩者。有心緩而執筆急者。若執筆近而不能緊者。心手不齊。意後筆前者。敗。若執筆遠而急。意前筆後者。勝。又有六種用筆。結構圓備如篆法。飄颻灑落如章草。凶險可畏如八分。窈窕出入如飛白。耿介特立如鶴頭。鬱拔縱橫如古隸。然心存委曲。每爲一字。各象其形。斯造妙矣。書道畢矣。永和四年上虞製記。

晉衛夫人與師帖

衛稽首和南近奉勅寫急就章。遂不得與師書耳。但衛隨世所學。規摹鍾繇。遂歷多載。年廿着詩論草隸通解。不敢上呈。衛有一弟子王逸少。甚能學衛。真書咄咄逼人。筆勢洞精。字體遒媚。可詣晉尚書館書耳。仰求至鑑。大不可言。弟子李氏衛和南（淳化閣帖）

黃長睿云。衛夫人帖。蓋唐初李懷琳作。事見寶泉述書賦。（東觀餘論）

黃山谷題絳本法帖云。王會稽初學書於衛夫人。中年遂妙絕古今。今人見衛夫人遺墨。疑右軍不當北面。蓋不知九萬里。則風斯在下耳。（黃山谷集）

郝夫人 王羲之之妻也。甚工書。（孔元舒在窮記）

謝夫人 字道韞。王凝之妻。安西將軍奕之女也。（晉書列女傳）

道韞有才華。亦善書。爲舅氏所重。（王羲之外傳）

李嗣真書後品云。謝道韞是王凝之妻。雍容和雅。芳馥可翫。列中下品。

韋續九品書人論下上品有王凝之妻謝道韞行草。

傅夫人 郗愔之妻也。善書。（書斷）

韋續九品書人論下上品有傅夫人正隸。

荀夫人 王洽之妻也。亦善書。（書斷）

汪夫人 宣和書譜作江王珉之妻也。善書。（同上）

荀夫人 庾亮之妻也。韋續九品書人論上下品有庾亮荀夫人正行隸篆。

蔡夫人 羊衡母。韋續九品書人論上中品。

桓夫人 唐人書評云。桓夫人書如快馬入陣。屈伸隨人。（書苑精華）

李意如 琅邪王獻之保母也。姓李名意如。廣漢人也。在母家有志行。歸王氏。

柔慎勤恭。善屬文。能草書。解釋老旨趣。（雲麓漫鈔）

宋

謝夫人孔 琳之妻。謝氏亦善書。（書斷）

北魏

李夫人 高慎妻李氏。趙郡李微伯女。豔且慧。兼善書記。工騎乘。（北史高乾傳）

李彪女 幼而聰令。彪教之書學。讀誦經傳。後宣武聞其名。召爲婕妤。在宮常教帝妹書誦授經史。後宮咸師事之。（北史李彪傳）

北齊

魏夫人 章續九品書人論下下品有北齊魏夫人正行。

唐

劉秦妹 馬家劉氏。臨効逼斥。安西蘭亭。貌奪眞蹟。如宓妃遺形於巧素。再見如左之古昔。注云翰林書人劉秦妹歸馬氏。（寶泉述書賦）

劉秦妹善臨蘭亭。及西安帖奪眞。亦唐翰林書人。（法書苑）

房璘妻高氏 太原府交城縣石壁寺鉄彌勒像頌安公美政碑。俱參軍房璘妻高氏書。石壁寺碑乃行書。（學林新編）

房璘妻高氏。嘗書石刻。字畫潔媚。（墨池編續書斷）

太谷縣令安庭堅美政頌碑跋

開元二十九年安公美政頌。房璘妻高氏書。安公者名庭堅。其事蹟非奇。而文辭亦匪佳作。惟其筆畫遒麗。不類婦人所書。余所集錄。固已博矣。而婦人之筆。著于金石者。高氏一人而已。然余嘗與蔡君謨論書。以爲書之盛莫盛于唐。書之廢莫甚于今。余之所錄。如于頔高駢。下至陳遊瓌等書。皆有蓋唐之武夫悍將。暨楷書手輩。字皆可愛。今文儒之盛。其書屈指可數者。無三四人。非皆不能。蓋忽不爲爾。唐人書見于今。而名不知于當時者。如張師邱繆師愈之類。蓋又可。不勝數也。非余錄之。則將遂泯然于斯世矣。余于集古。不爲無益也夫。（集古錄）

撰人姓名殘缺。房璘妻高氏書。開元廿九年三月。（金石錄）

太原府交城縣石壁寺鉄彌勒像頌碑跋

太原府交城縣石壁寺鉄彌勒像頌者。林諤撰。參軍房璘妻高氏書。余所集錄古文自周秦而下。訖于顯德。凡爲千卷。唐居其十七八。其名臣顯達。下至

山林幽隱之士。所書莫不皆有。而婦人之書。惟此高氏一人耳。然其所書刻石存于今者。惟此頌與安公美政頌耳。二碑筆畫字體。遠不相類。殆非一人之書。疑模刻不同。亦不宜相遠如此。又疑好事者。寓名以爲奇也。識者當爲辨之。（集古錄） 林鶻撰。房璘妻高氏行書。開元二十九年六月。（金石錄）

柳夫人 崔簡妻。宗元伯姊。善隸書。爲雅琴以自娛。（柳河東集）

崔瑗 永州刺史博陵崔簡女。嫁爲朗州員外司戶。河東薛巽妻。善筆札。讀書通古今。（柳河東集）

楊夫人 柳柳州宗元室。善翰墨。（書史會要）

金鑾 白氏金鑾。居易女。十歲忽書北山移文。示家人。居易以終南紫石刊之。（書史會要）

陳燕子丁 德宗時人 獨菴比丘道衍法華經跋云。唐僧義道與女人陳燕子丁。共

以小楷細書。是經爲薦。父母解脫清昇。點畫波擎。若出一手。（金華府志）

廉女貞 善隸書。常爲內中學士。（李遠集）

鄧敞妻李氏 鄧敞封敖門生。婚李氏。其父嘗爲福建從事。官至評事。有女二人。皆善書。敞之所行卷。多二人筆跡。敞官至秘書少監。（玉泉子）

關氏 南楚人。圖之妹。甚聰慧。文學書札。圖嘗動人。圖嘗語同僚曰。某家有一進士。但不櫛耳。後圖以妹妻常修。關氏與修讀書二十餘年。才學優博。越絕流輩。咸通六年登科。（南楚新聞）

薛媛 薛媛濠梁人。南楚材妻。楚材旅遊陳潁。受潁牧之眷。無返舊意。媛寫真寄之曰。欲下丹青筆。先拈寶鏡端。已驚顏索莫。漸覺鬢凋殘。淚眼描將易。愁腸寫出難。恐君渾忘却。時展畫圖看。夫妻遂偕老焉。時人嘲之曰。當時婦棄夫。今日夫棄婦。若不逞丹青。空房應獨守。（全唐詩話）

媛善書畫。妙屬文。（雲溪友議）

封絢 殷保晦妻。封敖孫也。名絢。字景文。能文章草隸。保晦歷校書郎。黃巢入長安。共匿蘭陵里。賊悅封色。欲取之。封罵曰。我公卿子。守正而死。猶生也。終

不辱逆賊手。遂遇害。（唐書本傳）

後唐

李夫人 西蜀名家。後唐郭崇韜伐蜀得之。夫人以崇韜武弁。嘗抑鬱不樂。善屬文。尤工書畫。（書史會要）

五代蜀

黃崇嘏 臨邛人。周庠知邛州。崇嘏上詩稱鄉貢進士。年三十許。祇對詳敏。復獻長歌。庠益奇之。召與諸生姪同遊。善琴奕。妙書畫。翼日薦攝府司戶參軍。胥吏畏服。案牘一清。庠美其風采。欲以女妻之。崇嘏袖封狀謝。仍貢詩曰。幕府若容爲坦腹。願天速變作男兒。庠覽詩驚駭。召見詰問。故黃使君女也。乞罷歸臨邛。不知所終。（玉溪編事）

宋

朱嚴妻 王禹偁贈朱嚴詩云。妻裝秋卷停燈坐。自注云。嚴妻能詩。（小畜集）
安國夫人崔氏 琦韓妻善書札。體法甚老。殊無婦人氣。（安陽集）

楊夫人 夏竦妻楊氏工筆札。宋史夏竦傳。

權太君 天水郡太君權氏。善草隸書。誦數經。能略通其說。臨川集。

武昌縣君郭氏 郭氏曾祖恕。祖遵式。父昭晦。聰明孝謹。能讀書史。善書畫。選歸于皇從孫右監門衛將軍世單。封武昌縣君。歐陽文忠公集。

和國夫人 和國夫人王氏。宗室趙仲輓室。能詩。章善字畫。書史會要。

章煎 章煎友直女。工篆書。傳其家學。友直執筆自高。壁直落至地。如引繩。而煎亦能如其父。書史會要。

唐氏 唐氏能書。梅堯臣泗州觀唐氏書詩云。唐氏能書十載聞。誰教精絕到紅裙。百金買盡蒲葵扇。不必更求王右軍。宛陵集。

史炎 史炎字炎玉。州刺史張閭聘爲冢子祺之配。祺亦有才。倡和成集。名曰和鳴。作字用禿筆。體法古勁。黃山谷與祺父有內親。而祺弟祉亦以進士爲青神尉。山谷親來訪之。炎玉致書。嘗緘綠菜以贈。山谷爲之贊曰。蔡蒙之下。彼江一曲。有茹生之。可以爲藪。蛙蟻衣。采采盈掬。芼以辛鹽。宜酒宜餼。在

吳則紫。在蜀則綠。頌我旨蓄。史君炎玉。（曹學佺蜀中詩話）

徐宏中跋山谷綠茹贊云。按此贊末句言史君炎玉。蓋指眉陽望族史氏女。名炎字炎玉。髻弁資穎嗜學。蘋蘩綫纈。一不介意。善屬文。雅安張闇少卿出守眉陽。聞其才賢。納爲冢嗣子履之婦。炎玉日遊心於編簡翰墨。平生游覽之勝。燕笑之適。與子履詩酒酬唱。格調閑雅。久而盈筐。手自叙次。目曰和鳴集。而少卿之室。于山谷老人爲姑輩。子履實其親表也。因寓書致綠茹爲信。山谷珍其品。以贊謝之。褒其爲古女校書云。紹興甲戌秋徐宏中跋。（式古堂書畫彙考）

慶國夫人邢氏 余與天台謝傑景英爲忘年交。謝趙出也。爲余言外氏丞相家法甚悉。今見邢氏趙夫人手書戒婦子一紙。往往與景英言合。邢尙書趙丞相事具國史。至其故家典型。要自令人起敬。（陳傅良止齋集）

謝夫人 謝夫人譚文初妻。潁川汝陰人。居家雞晨以興。家之事無不遍視。舍此則讀書觀古人書畫。二事皆精。（鄭俠西塘集）

李清照 李清照號易安居士。禮部員外郎格非女。知湖州趙明誠室。易安居士能書能畫。而又能詞。尤長于文藻。迄今學士每讀金石錄序。頓令心神開爽。何物老嫗。生此寧馨大奇。（才婦錄）

李易安一剪梅詞帖

紅藕香殘玉簾秋。輕解羅裳。獨上蘭舟。雲中誰寄錦書來。雁字回時。月滿西樓。花自飄零水自流。一種相思。兩處閒愁。此情無處可消除。纔下眉頭。卻上心頭。右調一剪梅

跋李易安書一剪梅詞云。易安詞藁一紙。乃清閨閣故物也。筆勢清真可愛。此詞漱玉集中亦載。所謂離別曲者邪。卷後無題識。僅有點定兩字耳。（書畫舫）

秦國潘夫人 周必大題秦國潘夫人書云。右靖國元年辛巳。祖妣秦國潘夫人從祖父。初任忻州司法時。與鄭州叔祖母姚氏書。夫人富文忠公彌孫。其云奉文乃運使金紫及奉使太師小字。後批三管散一行。金紫年十四代寫。

常記祖母張秦國道祖父之言。舊小吏事上官極恭。太守禮上法曹與他掾窄褻捧案。此書亦云起五更。每日兩衙極邊小壘。事體尙爾。况藩府乎。今儀門外雖有州縣官於此下馬牌。然皆肩輿直造客位。初到。畧展衙禮。遠不過三日。近則是日亟免。併記此以示後人。嘉泰二年十月旦立石。（平園集）

徐夫人 徐氏諱蘊行。自號悟空道人。臨川蔡教授詵之母。學虞書得楷法。（誠齋集）

徐夫人名蘊行。善讀書。工歐虞筆法。爲通判蔡運妻。以賢婦稱。暮年留心內典。手寫華嚴諸部經。號悟空道人。（撫州府志）

蔡同年之母徐夫人。手寫佛經九十五卷。得唐人筆法。字畫亦細楷。（止齋集）

周必大跋徐夫人所書華嚴經梁武懺

鬱林蔡侯子羽故母徐氏。三衢人。宣和間刑部侍郎諱敷言之女。潛心內典。學虞世南書。嘗手寫華嚴經梁武懺。皆終部帙。所謂女人身得度者。其子將

藏是書于名山。求予一言。予謂夫人爲善如此。郝氏之業。在所不論。二經果報。寧復唐捐。華嚴經云。南方國有長者妻。名曰善慧。見佛神力。心生覺悟。法華經云。比邱尼憍曇毗得佛授記。後名光相如來。予知夫人此念不斷。盡未來世。豈止資其冥福而已。慶元丙辰六月丙寅（平園集）

韓玉父。秦人家于杭。李易安嘗教以詩。後父母以妻閩人林子建。子建得官歸閩。韓自錢塘往三山。比至。林已官旰江矣。復回延平。假道昭武。宿漠口舖。題詩於壁。（四朝詩集）

張夫人。張氏蜀之故家。漢御史綱之後。通判宋若水之妻也。性賢孝。讀書史。善筆札。通古今。識義理。而不肯爲詞章。其方直之操。士大夫或有愧焉。（朱子文集）

游夫人。建安郡夫人游氏。贈光祿大夫黃崇妻。而子則端明殿學士中也。建安建陽人。幼受班昭女訓。通大義。至它組紉筆札之藝。皆不待刻意而能輒過人。（朱子文集）

張穰 張俊有愛妾。乃錢塘妓張穰也。頗涉詩書。俊文字。穰皆與之。柘臯之役。俊發書屬穰。照管家事。穰報後。引霍去病趙雲事。以堅其心。且言今日之事。惟在宣撫。不當以家爲念。勉思報國。俊以其書繳奏。上大喜。親書獎諭。以賜穰。仍加封雍國夫人。（郭翼履雪齋筆記）

胡夫人 黃子由尙書夫人胡氏。元功尙書之女也。俊敏強記。經史諸書。略能成誦。善筆札。時作詩文。亦可觀。於琴奕寫竹等藝。尤精。自號惠齋居士。時人比之李易安云。（齊東野語）

黃尙書子由帥蜀中閣。乃胡給事晉臣之女。過雪堂。行書赤壁賦于壁間。劉改之從後題沁園春一闋。其辭云。按轡徐驅。兒童聚觀。神仙畫圖。正芹塘雨過。泥香路軟。金蓮自拆。小小籃輿。傍柳題詩。穿花覓句。嗅蕊攀條。得自如。經行處。有蒼松夾道。不用傳呼。清泉怪石。盤紆信風景。江淮各異殊。想東坡賦就。紗籠素壁。西山句好。簾捲晴珠。白玉堂深。黃金印大。無此文君載後車。揮毫處。看淋漓雪壁。眞草行書。後黃知爲劉作。厚有饋貺。（張世南游宦紀聞）

陳述古女。陳述古諸女亦多有文。有適李氏者。從其夫仕晉寧軍判官。部使者以小雁屏求詩。李婦自作黃魯直小楷題其上。紅蓼淡蘆欹曲水。幾雙容與對西風。扁舟阻向江鄉去。卻喜相逢一枕中。曲屏誰畫小瀟湘。雁落秋風蓼半黃。雲淡雨疎孤嶼遠。冷清清夢到高唐。（耆舊續聞）

邵安人。安人邵氏道冲。字用之。武經郎林延齡之室。家定海。母朱氏。方娠。夢丹書金篆在霄漢間。生而敏慧。未齠知書。稍長。觀漢書資治通鑑至成誦。歸于林。姑嫜居亡。愛子斥奩具。營喪葬。無靳色。姑疾經年。醫禴備至。人稱其孝。延齡仕不進。一閑十三年。邵安之。觴詠琴奕以相娛。喜繙內典。手書法華圓覺金剛等經。（寶慶四明縣志）

趙夫人。俞似官廣州。鈴轄題英州金山寺壁云。轉食膠膠擾擾間。林泉高步未容攀。興來尚有平生履。管領東南到處山。似妻趙夫人親書此詩于壁。字畫徑四寸。道健類薛稷。（容齋隨筆）

方氏。桐廬人。陳暉經畧子婦。臨蘭亭。并自作草書皆可觀。（畫繼）

李夫人 名至規。號淡軒。宋狀元黃朴之女。長適尙書李珣子。善撫琴畫蘭。爲郎中孫榮甫作九畹圖。自序其後曰。予家雙井。公以蘭比君子。父東野翁甚愛之。予亦愛之。每女紅之暇。嘗寫其真。聊以備閨房之玩。初非以此求聞於人也。（王惲秋澗集）

丁夫人 洪慶善夫人。賢而有文。字畫勁麗。（張綱華陽老人集）

朱淑真 海甯人文公姪女也。文章幽艷。才色清麗。實閨門之罕有。因匹偶非倫。勿遂素志。賦斷腸集十卷以自解。（古今女史）

辛亥冬于京師見宋朱女郎淑真手書璿璣圖一卷。字法妍嫵。有記云。若蘭名蕙。姓蘇氏。陳留令道質季女也。年十六。歸扶風竇滔。滔字連波。仕苻秦。爲安南將軍。以若蘭才色之美。甚敬愛之。滔有寵姬趙陽台。善歌舞。若蘭苦加捶楚。由是陽台積恨。讒毀交至。滔大悲憤。時詔滔留守襄陽。若蘭不願偕行。竟挈陽台之任。若蘭悔恨自傷。因織錦字回文。五彩相宣。瑩心駭目。名曰璿璣圖。亘古以來所未有也。乃命使齎至襄陽。滔感其妙。遂送陽臺於關中。

具輿從迎若蘭於漢南。恩好踰初。其著文字五千餘首。世久湮沒。獨是圖猶有。唐則天嘗序圖首。今已魯魚莫辨矣。初家君宦遊浙西。好拾清玩。凡可人意者。雖重購不惜也。一日家君宴郡倅衙。偶于壁間見是圖。償其值得歸遺予。於是坐臥觀究。因悟璿璣之理。試以經緯求之。文果流暢。蓋璿璣者。天盤也。經緯者。星辰所行之道也。中流一眼者。天心也。極星不動。蓋運轉不離一度之中。所謂居其所而斡旋之處。中一方。太微垣也。乃疊字四言詩。其二方。紫微垣也。乃四言回文。二方之外四正。乃五言回文。四維乃四言回文。三方之外四正。乃交首四言詩。其文則不回也。四維乃三言回文。三方之經。以至外四經。皆七言回文詩。可周流而讀者。紹定三年春二月望後三日。錢塘幽棲居士朱氏淑真書。首有璿璣變幻四小篆。後有小朱印。予向見斷腸集。不載斯文。（池北偶談）

朱億女。尚書朱億女。郡人也。淑行婉質。工琴書。至道初。裴愈奉使兩浙。聞其才藝。奏之。召至宮師。既入京掖。賜號白花蓮夫人。後出俗。刺血書蓮花經一

部。改賜慈濟廣慧大師。（洪武蘇州府志）

吳氏三一娘。樓鑰云。今玉編惟越本最善。末題云。會稽吳氏三一娘寫。問之越人。無能知者。楷法最精。（攻媿集）

王排岸女孫。廬陵王排岸之女孫。眉目秀麗。能琴棋。善翰墨。失身富家。常鬱夕不樂。慕名勝而終焉。郡有朱淵未第。其室寢廢。家事不治。經鬱一妾。頗難其人。隣媼云。排岸女孫歸久。試與官人謀之。朱笑曰。恐無此理。行成以八百券爲質。一至其家內外之事。皆若素定。（貴耳集）

元

管夫人。管夫人道昇。字仲姬。趙魏公室。延祐四年。封魏國夫人。翰墨詞章。不學而能。心信佛法。手書金剛經至數十卷。以施名山名僧。天子命夫人書千文。敕玉工磨玉軸。送秘書監裝池收藏。又命孟頫書六體爲六卷。雍亦書一卷。且曰。令後世知我朝有善書婦人。且一家皆能書。亦奇事也。（松雪齋集）

管夫人書牘行楷。與鷗波公殆不可辨同異。衛夫人後無儔。（容臺集）

管夫人題漁父詞

遙想山堂數樹梅。淩寒玉蕊發南枝。山月照。晚風吹。只爲清香苦欲歸。南望吳興路四千。幾時閒去雪水邊。名與利。付之天。笑把漁竿上畫船。身在燕山近帝居。歸心日夜憶東吳。斟美酒。膾新魚。除却清閒總不如。人生貴極是王侯。浮利浮名不自由。爭得似。一扁舟。弄月吟風歸去休。（右漁父詞）

仲姬書

吳興郡夫人。不學詩而能詩。不學畫而能畫。得于天者然也。此漁父詞皆相勸以歸之意。無貪榮苟進之心。其與老妻強顏色。雙鬢未全斑。何苦行吟澤畔。不近長安者異矣。皇慶二年十二月十八日子昂書。（清河書畫舫）
管夫人手寫璇璣圖詩。五色相間。筆法工絕。（居易錄）

管仲姬與中峰帖

道昇和尚拜覆本師中峰和尚大禪師法座前。道昇拜別頂相。動是數載。瞻仰之心。日積不忘。年時得以中首座來都。如見師父尊顏。備嘗道體清安。甚

爲慰喜。道昇手書般若經。報薦先父母深恩。及救薦亡兒女輪迴之苦。極感謝我師大發慈悲。點化亡者。皆得離苦海。我師但起一念何獨道昇公姑父母兒女得生淨土。一切法界含靈。皆成佛道。盡證菩提矣。道昇粉骨碎身。生生世世。報答我師大和尚慈悲深恩。耶。道昇疊蒙賜書。知前年吾師所惠書及錄題經讚法語寄來。至今並未曾收得。不審當先何人送去。聞知快快。道昇一面作書于家間問舍姪去也。去歲以中送去般若經五卷。又蒙本師慈悲展讀點化。又各得題讚。存沒重感我師。道昇宿業本重。每日人事擾擾。不能安靜。長想我師慈悲指教。尋思話頭。但提起終得受用。道昇與良人誠心至願。但得到家。只就家庭修設。拜懇本師大和尚大發慈悲。普度一切鬼神。一切有主孤魂。一切無主孤魂。一切冤親良人。與道昇祖上父母兒女外祖妣奴婢。及一切法界含靈。莫墮三塗惡苦。願皆得早生佛界。此乃良人與道昇心願。已託以中先覆知師父大和尚。今春僕回。又拜吾師惠書及心疏。道昇等拜觀如心。如願。良人見之生歡喜心。尤增感佩。我師如此大發慈悲。度

脫一切衆生。是道昇等七世師父之恩。何以報謝。今因的便。特拜此書報安。更乞善保愛。不宣。六月初七日女弟子管氏道昇和南拜覆。（式古堂畫書彙考）

右趙承旨手牘十一紙。魏國夫人一紙。皆與天目幻住公者。承旨所云悉爲夫人沒後與住商評。欲修事薦嚴時承旨老矣。音詞宛惻。讀之可爲興感。不知當時本老答語。何以寫其憂也。夫人以書般若得公讚歎。致謝云。云皈依之誠。尤爲迫切。本之徒竊通作一卷。今歸黃令公。准東書院藏之。間出以相示。余謂三士皆從菩薩地來。所謂應以比丘宰官信女身而得度者。因緣聚會乃如此。今皆還淨土矣。學士大夫不能釋然于現在之時。而余爲勘破于過去之日。相對一笑。摩挲移日。不獨以其翰墨之妙而已也。吳門祝允明跋（同上）

趙魏公書散滿天下。亦時時獲觀。惟夫人真蹟。爲世罕有。此卷之可貴者。正在是耳。或謂松雪嗜好佛法太過者。彼其時宗社墟矣。黍離之懷。不於

空觀而焉寄此。則在所當慨而不當認夢爲實也。宏治癸亥十月在錦衣君清淮堂書前進士吳郡楊循吉（全上）

子昂書中龍象。當時與之同世者皆沾餘潤。遂成名家。況畫眉閣彥。寧不傳受筆訣與之俱化耶。觀魏國夫人尺一題董其昌（全上）

管夫人家書

余見管仲姬字一卷平安家書付三哥長壽收拆。娘押封。娘書付三哥吾兒。昨日福山寺僧來得五哥六月內書。知汝安好。家中及道院內平善。方得放心可收。香盟寺呈子至。先還借錢一百定。如得入手。可與四五哥大一哥商量交孫行可買東橫錢百戶屋地。并西邊蘿蔔地。及德清園前地。我已分付五哥了。此地若別對付錢買了。卻將此錢好生實封了。付的便寄來。九月間沈山主周年。切須與三定錢。油三斤。米五斗。請十僧燈斛。做汝父母名字。追薦沈山主則箇可憐。此人多與我家出氣力。切湏報答他。書到便與哥哥每說知分付福和萬六道徐慶一等好生與我安排。供養爲好。蘇灣田塍交徐

壽二好生修理。休誤桑樹好生照管澆灌。山上亦宜照管。交梓沛兄令人多接栗樹。多種桑樹。只此不一。七月廿六日。娘付三哥收。此池灣沈氏所藏。子趙奕有跋。（太平清話）

夫人能畫與詩。嘗人觀中宮。命寫梅稱旨。且命題之。詩云。雪後瓊枝嫩。霜中玉蕊寒。前村留不得。移入畫中看。（霏雪錄）

管仲姬竹卷後跋云。操弄筆墨。故非女工。然而天性好之。自不能已。竊見吾松雪精此墨竹。爲日已久。亦頗會意。因大丞相不忽夫人之命。敬寫一卷。鄙拙可愧耳。此卷藏豫章楊寨雲家。（因樹屋書影）

李瓚貽管夫人畫竹卷長丈餘。離披錯落。姿態百出。與怪石犇峭相間。氣韻生動。真奇作也。後自題二句云。竹勢撒崩雲觸石。應是瀟湘夜雨集。皇慶三年秋。日作。道昇下有管氏道昇仲姬二印。（隨草續編）

夫人畫竹風格勝子昂。此幀凡三竿。極其蒼秀。自題一詩云。春晴今日又逢晴。閑與兒曹竹下行。春意近來濃幾許。森森稚子日邊生。字法似子昂。有友

人見而愛之。携去。（庚子銷夏記）

祁縣戴楓仲藏管夫人道昇小畫一幀。有細書小字云。山迴新綺閣。竹掩舊朱門。（池北偶談）

王夫人 夫人字圭卿。號春溫。工書畫。曹文貞公嘗題其書畫卷。第所云漕府參軍時見益者。不知指何人也。（霏雪錄）

曹伯啟題王夫人書畫卷後云。畫傳當代功尤妙。字學前賢體更多。（淞泉漫藁）

八達太夫人 忽都虎郡王太夫人也。長清縣靈巖山寺中碑。至治元年八達氏有詩二句云。巖前松檜時時綠。殿上君王歲歲春。大字刻之。不類婦人筆。（金石文字志）

趙夫人 夫人諱鸞。字應善。雍古部氏中書平章世延女。中書參政許有壬室。則惠慈靜。能琴書。善筆札。（書史會要）

游夫人 雷機母。延祐間。贈建安郡君。善書而有文。（潛溪集）

危郡君 危氏諱德馨。字蘭玉。雷機室。贈建安郡君。通書記。作字有楷法。（潛溪集）

徐氏如珪 鄭天覺妻。通論語孝經大義。工書亦有法。（貝瓊清江集）

劉氏 孟運判妻也。性巧慧。能臨古人字。咄咄逼真。（書史會要）

柯氏 天台人九思之女。通經史。善筆札。（書史會要）

段氏 天佑之女。能詩章。善筆札。（書史會要）

士女曹妙清 自號雪齋。錢塘人。善鼓琴。工書。行書點墨皆有法度。三十不嫁。風操可尚。嘗寫詩寄鐵崖。鐵崖答之云。紅牙管帶紫狸毫。雪水初融玉帶袍。寫得薛濤萱草帖。西湖紙價可能高。玉帶袍其硯名。（列朝詩集）

陳自幼 能書。適南潯姚氏。一意奉佛。有手書觀世音普門品。趙榮祿題其後。

（六研齋筆記）

明

高妙瑩 字叔琬。解縉母也。通經史傳記。善小楷。曉音律算數。女工極其敏妙。

(名山藏)

蔡氏 隱士韓奕妻也。讀書通大義。善筆札。嘗書經刻以行世。(張昶吳中人物志)

徐氏 裔出吳之天平山。歸水東陸輿。讀書通大義。知楷法。子霽入翰林。封孺人。(震澤集)

楊夫人 邢子厚妻。盧德水云子厚九嫂。乃楊磐石女弟。書法自成一家。博學能文。過于慈靜。(列朝詩集)

馬氏 名問卿。字芷居。金陵人。陳翰林魯南之繼室也。書法蘇長公。得其筆意。頗與魯南相類。(列朝詩集)

黃氏 遂寧黃簡肅公珂之女。新都楊用修之繼室也。博通經史。工筆札。閨門肅穆。用修亦嚴憚之。寄用修長句。爲藝林傳誦。而用修亦云易求海上瓊枝樹。難得閨中錦字書。讀者傷之。(列朝詩集)

金元賓妻 萬歷時人。元賓爲履吉高足。故書法亦因之。綿麗多態。而閨闈之

氣未除。(王世貞三吳楷法跋)

邢慈靜 貴州左布政馬拯妻。少卿邢侗妹也。書宗李衛。(武定州志)

慈靜善仿兄書。(列朝詩集)

邢夫人慈靜自述詩帖 行書烏絲闌紙本

儂自閨房處女子。聞君博覽通古史。歸君薄海宦遊多。光陰迅度如彈指。萬里黔方道路長。松柏森森雲杳茫。遼陽刀劍如林密。征馬南催鬢如霜。何以君病抱沉疴。與君報國酬英主。日爲三苗亂我黎。君家嘔血歸幽旅。不見夫君舊日容。惟思攜手君所口。君家何處侶煙霞。白雲來處空舒卷。獨伴遺兒歸故鄉。修途萬里多炎涼。昔去雲擁駟馬車。今日孤舟住夕陽。子母寥寥淚暗流。幾番欲葬江魚腹。憶昔白頭人去時。依稀點首將予囑。教子朝夕名未成。春光不駐東流急。小庵日日拜空王。思君不見空斷腸。百鳥啼聲驚夢裏。覺來猶是淚千行。君家功若小邱山。誰與夫君奏廟廊。平生功績皆湮沒。儂身何自見君王。恨殺烏紗能誤人。始知名利如羅網。春去秋來愁又結。坐看

衰草心焦。熱杜宇啼我心中悲。我啼杜宇枝頭血。慈靜自述。（式古堂書畫彙攷）

黃氏 編修趙景妻也。少工楷法。讀書通曉大義。（初學記）

姚氏 號青峨居士。秀州人。姚元瑞女。歸范君和。日讀漢魏以來諸集。摹晉諸家書法。吟咏多散佚。不盡傳。（玉鴛閣遺稿小傳）

徐夫人 徐媛字小淑。副使范允臨之室也。多讀書。好吟咏。與寒山陸卿子唱和。稱吳門二大家。（列朝詩集）

近代名閩以書表著者。吳中爲范夫人徐小淑。趙大家陸卿子。清漳爲柯孝廉配張徽卿。卿寓白下。有女弟子雲濤。月液。與余清瑤君投分。所遺詩札。翔鸞舞鳳。豈僅鸚哥嬌也。（珊瑚網）

徐小淑天上謠墨蹟

洞天去人九萬里。涼風吹雲天似水。珠扉高啟赤霓翔。冰簾漾中素練舉。碧花瑤草簇闌干。張君危坐聽啼鸞。翠蜃吹涎作樓閣。青田小龍耕曉煙。璇宮

桂花秋露滑。吳剛玉斧香凝屑。絳節高飄阿母來。藕黃衫子翠羅鞋。晏香鳴
箏婉華舞。笙歌沸空擁吹臺。自向東王一卮壽。啾啾白麟天半走。貝闕人歸
龍夜吼。右天上謠東海徐媛小淑氏

陸大家 陸氏名卿子。姑蘇尚寶卿師道之女。太倉趙宦光凡夫之妻也。凡夫
棄家廬墓。與卿子偕隱寒山。手闢荒穢。疏泉架壑。善自標置。引合勝流。而卿
子又工于詞章。翰墨流布一時。名聲藉甚。以爲高人逸妻。靈眞伴侶。不可梯
接也。〔列朝詩集〕

陸卿子詩墨蹟

鳴蟬寂無聲。閒夜涼颼發。薜荔覆檐楹。葉際見孤月。流光入房櫳。徘徊照華
髮。撫景一長歎。終古誰不沒。棄世學神仙。徒勞鍊金骨。寒山趙氏陸。〔玉台
翰墨餘芳〕

張徽卿 清漳人。柯孝廉配。寓白下。善書。〔珊瑚網〕

張徽卿詩札墨蹟

綺牕聽得梅花弄。至今暗香猶襲人也。小胸妹告借秋鴻新譜。特遣婢子叩領。贈戴氏二姬一絕附正。雲鬢月面兩相宜。濤作秋波液是脂。我見猶憐而況若。江妃漢女莫猜疑。外曲中衛宛若楊三秀。作容錄呈一品題之。眉社女弟張徽卿。

雲濤 玉液 徽卿女弟子清瑤君贈詩云。妙撫樂毅衍波箋。鉄畫銀鈎字樣圓。姊正臨池洗端石。妹先題葉弄輕煙。（珊瑚網）

雲濤玉液詩札墨蹟

華袞輕于一字褒。儂家姊妹出蓬蒿。媿無芳躅追彤史。浪得虛名動綵毫。

廣陵雲濤煙鬢氏

花牋處處有儂名。欲動春風欲囀鶯。對月瞻雲吟秀句。幽閨一倍使人清。

適楚玉液纖黛氏

葉小鸞 字瓊章。一字瑤期。水部葉仲韶季女。四歲能誦楚詞。工詩多佳句。能模山水。寫落花飛蝶。皆有韻致。日臨子建洛神賦。或藏真帖一徧。靜坐疎香。

閣薰爐茗椀。與琴書爲伴而已。年十七。字崑山張氏。未行而卒。（列朝詩集）
袁氏 名九淑。字君嫵。通州人。錢良眉之妻。四川左布政袁隨之女也。少讀經史。尤深內典。詩文清麗。書法道媚。歸王孫一年卒。年纔十八。有伽音集。（列朝詩集）

沈伯姬 聘黃履素。年十八。早亡。書法似歐率更。（眉公集）

葉紉紉 字昭齊。三歲能朗誦長恨歌。十三能詩。書法遒勁。有晉風。歸趙田袁氏。（列朝詩集）

蔡夫人 李少司馬厚菴說黃石齋先生（道周）配蔡夫人。今年將九十。尙無恙。能詩。書法學石齋。造次不能辨。尤精繪事。嘗作瑤池圖。遺其母太夫人居云。（居易錄）

蔡夫人 黃石齋之配也。花卉一冊共十幅。今藏友人趙谷林小山堂。每幅俱有題句。其山茶云。蜚風蠻雨。浥注鮮明。千葉桃云。不言成蹊。匪繇色媚。芍藥云。折花贈行。黯然消魂。諸葛菜荷包牡丹云。蜀相軍容。小草見之。罌粟云。對

耳米囊可以療飢。萱花剪春羅。云。瞻焉北堂。勿之洛陽。鐵線蓮。云。小草鉄骨。亭亭自立。金絲桃。品字蘭。云。浙江武陵。或滋他族。秋海棠。淡竹。葉云。君子于役。閨中腸斷。月季。長春。云。兩族並芳。四時皆春。此幅上題云。石道人命石潤。蔡氏寫雜花十種。時崇禎丙子小印二。曰石潤玉卿。

鄭珠江太守跋云。石齋先生被難以前。蔡夫人致書。謂到此地位。只有致命遂志一著。更無轉念。諄諄數百言。同于王炎午之生祭。閨閣中鉄漢也。後撫孤立節。死者復生。生者不愧。足當斯語矣。寫生得五代人遺法。一花一葉俱帶生動。所謂爲君援筆賦梅花。不害廣平心似鉄者耶。珠江鄭千仞。

蔡夫人大節在珠江。鄭太守跋語中。今讀夫人自題句云。不言自芳。匪絲色媚。以植品也。對此米囊。可以療飢。以安貧也。小草鉄骨。亭亭自立。以勵節也。君子子役。閨中腸斷。以言情也。睠焉北堂。勿之洛陽。以教孝也。蜀相軍容。小草見之。以勸忠也。言簡意長。得古君子箴銘之體焉。畫之生動鮮妍。後賢惟憚正叔。可以希風。此又第二義云。壬子夏月沈德潛題于靈巖山居。

沈紉蘭 字閒靜。秀水司諫黃承昊妻也。紉幼攻書史。雅善臨池業。以孝行聞。著效顰集。(女史)

馬孺人 翰林陳石亭繼室。陳失配。知馬賢而有文。遂娶之。年八十。不廢吟咏。書法得蘇長公筆意。有芷居稿。(犁居稿)

二方夫人 漢上蕭駕部大茹公夫人。皖城張計部夫人。皆姓方。皆能圖寫諸佛像。又好以泥金繕寫諸經。佈施供奉。(胡之驥詩說紀事)

徐範 吾禾有十三齡女童。能摹諸家體。賣字自活。爲沈伯姬鳳華所書古詩十九首八石。徐媛跋有云。筆彩生芳。墨香含素。歐率更允拜下風。衛夫人終當北面。至自憐每草榻。便作凍蠅。其推重可知矣。(珊瑚網)

徐範縮書聖教序。無一筆不肖。亦無一毫閨幃羞澀態。(恬致堂集)

徐眞木白榆。長于臨古。頗得形肖。其姊範行書。甚有聖教序筆意。名勝白榆。吾禾射圃關西夫子廟碑記。乃其筆也。病癱瘓。自署蹇媛云。(東村隨筆)

徐範正書木蘭詩一紙。行筆秀勁。題云。樵李女子徐範仿吳彩鸞書。今在趙

氏小山堂

梁小玉 武林人。七歲依韻賦落花詩。八歲摹大令帖。長而游獵羣書。作兩都賦。半載而就。著瑯嬛集三卷。列朝詩集。

國朝

黃媛介 字皆令。嘉禾黃葵陽先生族女也。髫齡卽嫺翰墨。好吟咏。工書畫。楷書仿黃庭經。畫似吳仲圭。而簡遠過之。其詩初從選體入。後師杜少陵。清麗高潔。絕去閨閣畦徑。適士人楊世功。蕭然寒素。皆令眴勉同心。恬然自樂也。乙酉鼎革。家被蹂躪。乃跋涉于吳越間。困于樵李。躋于雲間。棲于寒山。羈旅建康。轉徙金沙。留滯雲陽。其所紀述。多流離悲戚之辭。而溫柔敦厚。怨而不怒。旣足觀其性情。且可以攷事變。此閨閣而有林下風者也。無聲詩史。

王阮亭云。禾中女子黃媛介。字皆令。負詩名數十年。近爲予畫一小幅。自題云。懶登高閣望青山。愧我年來學閉關。淡墨遙傳縹緲意。孤峰只在有無間。

（池北偶談）

黃媛介。字皆令。嘉興人。楊世功之配。善詩詞楷書。摹黃庭經十三行。畫山水。小景。有元人筆致。長安閨秀多師事之。（續圖繪寶鑒）

黃皆令女。黃皆令幼女。不知名。吉水遠山夫人朱中楣云。猶記閒坐湖樓。皆令携幼女過訪。髮方覆額。遂能以詠詩寫帖。楚楚可人。今依然夢想間。并裁小詩贈之。瑟瑟輕羅淡淡粧。柳眉鶯語乍調簧。烏雲應拂春山小。紅蕖初含夜雨香。鴛水毓靈多鮑謝。蠅頭妙楷逼鍾王。夢回猶記殷勤別。幾欲箋詩燕子忙。（隨草續編）

姜氏淑齋。膠州宋方伯子婦。姜字淑齋。號廣平內史。善臨十七帖。筆力矯健。不類女子。（池北偶談）

沈無非。嘉興人。項鼎鉉之妻。項鼎鉉云。先室沈無非氏。酷情筆硯。朝夕讀書不倦。尤喜臨池。絕肖褚河南九成宮。有手書所撰朝鮮許士女集小序一首。先爲其兄沈景倩臨摹上木。今記之以爲兒輩存手澤云。是編爲箕國士女許景樊詩若文。秀色逼人。咄咄無脂粉氣。昔稱絳仙可療飢。女豈其儔伍耶。

間剽竊古人如水屋珠扉一二語。然肖景處。故不害爲畫師後身。世母曰龜茲王所謂贏也而易之。無非氏題于密雲之深深齋。呼桓日記。

吳貞閨 字首良。適曹村金氏。書法遒勁。尤精琴理。妹靜閨。字佩典。適汝南周氏。幼摹黃庭。得其筆意。〔翠樓集〕

郭璦 字素汝。長洲人。適埭川顧氏。畫學趙文淑。花鳥推逸品。書法大小俱有古致。〔翠樓集〕

張在貞 字惠婉。天如先生女也。通經史。工琴書。與妹文琳倡和。有月隱合草。姬侍

六朝

墨娥 姑臧太守張憲姣也。嘗代憲書札。〔荻樓雜抄〕

宋

王朝雲 蘇東坡侍妾。朝雲始不識字。晚忽學書。粗有楷法。從泗上比丘尼義冲學佛。亦畧聞大義。〔東坡集〕

朝雲字子霞。錢塘人。蘇子瞻宦錢塘。納爲常侍。朝雲初不識字。既事子瞻。遂學書。粗有楷法。青泥蓮花記。

翠翹 洪內翰侍人。字畫婉媚。書史會要。

翠翹工畫墨竹。每自題其後曰。翠翹戲筆。字畫婉媚。墨氣清潤。繪事備考。

田 錢錢 辛棄疾二妾也。因其姓而名之。皆善筆札。常代棄疾答尺牘。

書史會要。

意真 劉光世侍兒。嚴州烏石寺在高山之上。有岳武穆飛張循王俊劉太尉。

光世題名。劉不能書。令侍兒意真代書。姜堯章題詩云。諸老凋零實可哀。尙

留姓名壓崔嵬。劉郎可是疎文墨。幾點胭脂澹綠苔。鶴林玉露。

厨娘 京師中下之戶。每育女則愛護之。稍長則隨其姿質。教以藝業。用備士

大夫採擇娛侍。名目不一。就中厨娘最爲下色。然非極豪貴家不可用。嘗聞

時官中有嫠人某者。奮身寒素。歷二倅一守。然受用淡泊。不改儒酸。偶奉祠

居里。便嬖不足使令。進饌且大粗率。守念昔留某官處晚膳。出都下厨娘烹

調極可口。適有便介如京。謾作承受人書。託以物色。費不屑較。未幾承受人復書曰。得之矣。其人年可二十餘。有容藝。曉書算。旦夕遣以詣直。旬餘果至。初憇五里頭。特遣脚夫先申狀來。乃其親筆也。字畫端楷。歷叙慶幸。即日伏事左右。末乞以四輪接取。庶成體面。辭甚委曲。殆非庸碌女子所可及。守一見爲之啟顏。及入門。容止循雅。紅裙綠裳。參視左右。乃退。守益喜過望。（暘谷漫錄）

明

何玉仙 號白雲道人。史癡翁之妾。能篆書。（列朝詩集）

張家婢 張天駿家有廝養婢。善書。觀者嘖嘖稱賞。（紫桃軒又綴）

柳如是 柳是字如是。一字蘼蕪。本吳江名妓徐佛弟子。姓楊名愛。柳其寓姓也。丰姿逸麗。翩若驚鴻。性獯慧。賦詩輒工。尤長近體七言。作書得虞褚法。年二十餘。歸虞山錢宗伯。而河東君之名始著。（鈕琇觚賸）

國朝

韓郎中姬 韓郎中聖秋姬人某氏好臨摹晉唐法帖獨廢鍾書韓詰所以對曰季漢正統關侯忠義而斥以賊帥狂悖極矣書雖工抑何足取韓有詩記其事云誰知太傅千年後敗闕端從戎路開（居易錄）

高密單氏妾 高密單氏某妾學右軍楷書似黃庭遺教二經（池北偶談）

名妓

唐

薛濤 字洪度西川樂妓工爲詩當時人多與酬贈武元衡奏爲校書郎（晁

公武郡齋讀書志）

婦人薛濤成都倡婦也以詩名當時雖失身卑下而有林下風致故詞翰一出則人爭傳以爲玩作字無女子氣筆力俊激其行書妙處頗得王羲之法少加以學亦衛夫人之流也每喜寫己所作詩語亦工思致俊逸法書警句因而得名非若公孫大娘舞劍器黃四娘家花託于杜甫而後傳也今御府所藏行書萱草等書（宣和書譜）

元稹以監察使蜀。知有薛濤。難得見。嚴司空潛知其意。每遣薛往。泊稹登翰林。濤歸浣花。造小幅松花牋百餘幅。題詩獻稹。稹寄舊詩與濤云。長教碧玉藏深處。總向紅箋寫自隨。（牧監閑談）

宋賈似道家有薛濤萱草詩。（悅生堂古迹記）

宋

王英英。楚州官妓也。學顏公書。蔡襄教以筆法。晚年作大字甚佳。（書史會要）

梅堯臣贈詩曰。山陽女子大字書。不學常流事梳洗。親傳筆法中郎孫。妙畫蠶頭魯公體。又觀王氏書詩云。先觀雍姬舞六么。妍葩發豔春風搖。舞罷英英書大字。玉指操管濃雲飄。風馳雨驟起變怪。文鯨晝飛明珠跳。（宛陵集）

馬昞。徐州營妓也。性慧麗。蘇軾守徐日。甚喜之。能學軾書。得其彷彿。嘗書黃鶴樓賦未畢。昞竊效書山川開合四字。軾見之大笑。略爲潤色。不復易之。今碑四字。乃昞筆也。（書史會要）

李琪。東坡先生在黃日。每有燕集。醉墨淋漓。不惜與人。至于營妓供侍扇書帶畫。亦時有之。有李琪者。小慧而頗能書札。坡亦每顧之喜。終未嘗獲公之賜。至公移汝郡。將祖行。酒酣奉觴再拜。取領巾乞書。公顧視之久。令琪磨硯墨濃。取筆大書云。東坡七歲黃州住。何事無言及李琪。卽擲筆袖手。與客談笑。坐客相謂。語似凡易。又不終篇。何也。至將徹具。琪復拜請。坡大笑曰。幾忘出場。繼書云。恰似西川杜工部。海棠雖好不留詩。一座擊節盡醉而散。(春渚紀聞)

楚珍。不知姓。本彭澤倡女。草篆八分皆工。董史云。家藏長沙古帖。標籤皆其題署。宣和間有跋其後者曰。楚珍。蓋江南奇女子。初雖豪放不群。終以節顯。吾嘗見其過湖詩。清勁簡遠。有丈夫氣。故知其人不凡。(書史會要)

謝天香。鉅野有穠芳亭。邑人秋成報祭所也。一日鄉耆謀立石其中。延士人王維翰書之。維翰未至。有妓謝天香者。問云。祀事已畢。何爲遲留不飲。衆曰。俟維翰書石耳。謝遂以袖代筆。書穠芳二字。會維翰至。書亭字完之。父老遂

命刻之石。王謝遂成夫婦。後維翰登進士。與天香偕老。青泥蓮花記。

溫琬 甘棠倡。字仲玉。初姓郝氏。本良家子。六歲質明叡。訓以詩書。達旦不寐。日誦千言。能通其大義。喜字學。落筆無婦人體。道韻有格。有得之者。寶藏珍重。之不啻金玉。能染指書。尤妙。宋清虛子甘棠遺事。

陳相 衡陽妓也。歌舞出其類。學書作小楷。山谷集。

嚴蕊 字幼芳。天台營妓也。善琴奕。書畫。書史會要。

天台營妓嚴蕊。字幼芳。善琴奕。歌舞。絲竹書畫。色藝冠一時。間作詩詞。有新語。齊東野語。

趙總憐 能著碁。分茶寫字彈琴。以扇頭乞詞于薌林向子諲。戲贈浣溪紗云。豔趙傾燕花裏仙。烏絲欄寫永和年。有時閒弄醒心弦。茗碗分雲微醉後。紋楸斜倚髻鬟偏。風流模樣總堪憐。向子諲酒邊詞。

蘇翠 蘇氏建甯人。淳祐間。流落樂藉。以蘇翠名。能八分書。書史會要。

蘇翠。咸淳間供奉樂部。善寫墨竹。亦工梅蘭。扶疎朗潤。曲盡其致。頗自矜貴。

每一圖成。必以八分書題之。（繪事備考）

延平樂妓。劉克莊後村詩話云。延平樂籍中。有能墨竹草聖者。潘廷堅爲賦。念奴嬌。美其書畫。末云。玉帶懸魚。黃金鑄印。侯封萬戶。待從頭。繳納君王。覓取愛卿歸去。（劉後村集）

楊韻。湖妓楊韻。手寫法華經。每舉筆。必先齋素盥沐更衣。病死之夜。其母夢韻來。別云。以經之力。今卽往生。烏程縣廳吏蔡家作女。時蔡妻方娠。是夜夢有肩輿及門者。迎之。則韻也。云來寄宿。寤而生女。其母他日來視女。爲之啞然一笑。人咸異之。（郭彖睽車志）

元

梁園秀。劉氏。名梁園秀。歌兒也。才藝精妙。喜文墨。能作樂府。時吟小詩亦佳。字畫楷正。（書史會要）

梁園秀。姓劉氏。行四。歌舞談謔。爲當代稱首。喜親文墨。作字楷媚。間吟小詩亦佳。所製樂府。如小梁州。青哥兒。紅衫兒。圜墀兒。賽兒令等。世共唱之。（夏）

伯和青樓集

明

姜舜玉 號竹雪居士。隆慶間舊院妓。工詩兼楷書。列朝詩集。

林奴兒 號秋香。成化間妓。風流姿色冠于一時。學畫于史廷直。王元父二人。筆最清潤。落籍後。有舊知欲求見。因畫柳枝于扇。詩以謝之曰。昔日章台舞細腰。任君攀折嫩枝條。從今寫入丹青裏。不許東風再動搖。無聲詩史。

沈周題妓林奴兒畫。調寄臨江仙云。舞韻歌聲都摺起。丹青留箇芳名。崔徽楊妹自前生。筆愁煙樹杳。屏恨遠山橫。描得出風流意思。愛他紅粉兼精。未曾相見儘關情。只憂相見日。花老怨鶯鶯。石田詩集。

馬湘蘭 馬姬名守真。小字元兒。又號月嬌。以善畫蘭。故湘蘭之名獨著。所居在秦淮勝處。列朝詩集。

馬湘蘭雙鉤墨蘭立軸。傍作篠竹瘦石。氣韻絕佳。題云。翠影拂湘江。清芬瀉幽谷。壬申清和月。寫于秦淮水閣。湘蘭子馬守真。又雙鉤墨蘭小軸。題云。幽

蘭生空谷。無人自含芳。欲寄同心去。悠悠江路長。丙申春日。湘蘭守眞子。二軸今藏余友廣陵馬半槎齋中。

薛素素。姿度妍雅。能書。作黃庭小楷。尤工蘭竹。下筆迅掃。各具意態。又善馳馬。挾彈。能以兩彈丸先後發。使後彈擊前彈。碎于空中。又置彈于地。以左手持弓向地。以右手從背上反引其身。以擊地下之彈。百不失一。絕技翩翩。亦青樓中少雙者。(甲乙剩言)

范夫人徐小淑。贈素素詩云。連城聲價舊名姬。着紙芙蓉香粉奇。彩筆揮雲誇濯錦。誰言蜀女擅稱詩。幽蘭九畹墨花淋。走馬章台彈撲金。却買輕車駕油壁。西陵松下結同心。

馬如玉。桃葉妓。善楷書。詩奕奕有致。國華王孫社中人也。(姚旅露書)

馬如玉。字楚嶼。本張姓。家金陵南市樓。徙居舊院。熟精文選。唐音。善小楷。及八分書。(列朝詩選)

朱無瑕。朱馥名無瑕。字泰玉。桃葉妓。工楷書。畫蘭能詩。(露書)

朱無暇字泰玉。桃葉渡邊女子。幼學歌舞。長而淹通文史。工詩善書。時人以方馬湘蘭云。（列朝詩選）

顧文英 善書。以碧絲作小行楷。綉之盛鏡囊。以寄所歡。（俞琬綸集）

卞賽 秦淮妓。後爲女道士。自號玉京道人。工小楷。善畫蘭鼓琴。亂後游吳梅村。學士作聽女道士卞玉京彈琴歌贈之。（板橋雜記）

卞賽 字賽賽。自號玉京道人。莫詳所自出。或曰秦淮人。知書工小楷。能畫蘭。僑虎邱之山塘。所居湘簾。斐几嚴淨。無纖塵。雙眸泓然。日與佳墨。良紙相映。徹晚依良醫保御氏。刺舌血爲書法華經。既成。自爲文序之。（梅村集）

王少君 名曼容。白皙而莊。清揚巧笑。殊有閨閣風。其居表以長楊。人遂呼爲長楊君。學字于周公瑕。學詩于余宗漢。學琴于許太初。爭以文雅相尙。（潘之恒曲中志）

郝文姝 字昭文。金陵妓。居珠市。領其談吐。慷慨風生。下筆成琬炎。幾令衛夫人收泣。而以貌列中品。姝由由然不屑也。甯遠李大將軍物色之。載媵車中。

方督師遼東。置諸掌記間。稱內記室。凡奏牘悉以屬。潘之恒鸞嘯小品。

郝文姝。珠市妓。爲人文弱。清致逼人。余嘗在其齋頭。見信筆作報札。頃刻數百言。字不減黃庭。信佳秀也。露書。

郝賽。名婉然。字葦珠。珠市妓。麗容媚態。楷書有昭文門風。著調鸚集。露書。

郝藝娥。名婉然。工寫宣示帖。珊瑚網。

趙麗華。字如燕。小字寶英。南院妓。自稱昭華殿中人。如燕父銳。以善歌樂府。供奉康陵。如燕年十五。籍隸教坊。能綴小詞。被入弦索。予嘗得其書畫扇。楷法極佳。後題云。乙卯中秋。同西池徵君質山學士集海濱天香書屋。書此。竟聞任兵憲在陸涇。禦倭大捷。奏凱回。亦快事也。沈嘉則爲作傳。有云。趙雖平康美人。使具鬚眉。當不在劇孟朱家下。今卽其題扇數語。豪宕可知。靜志居詩話。

李貞孌。字淡如。桃葉妓。工書畫。著韻芳集。露書。

梁昭。吳姬。字道昭。故以善歌名。爲人儀度澹雅。綽約若仙。習琴能碁。作小楷。

有東方讚曹娥郡筆法（識小錄）

孫瑤華 字靈光。金陵曲中妓。歸新安汪景純。讀書賦詩。屏却繁華。汪仲嘉有代蘇姬寄怨所歡詩。一時詞客屬和成帙。吳兆熊尤岸然自負。靈光詩一出。皆閣筆歛衽。景純子駿聲以手述示余。詩詞皆清勁婉約。真閨房之秀也。（列朝詩集）

楊宛 字宛叔。金陵名妓也。能詩有麗句。善草書。歸茗上茅止生。止生重其才。以殊禮遇之。（列朝詩集）

茅止生云。宛叔歸予。年纔十六。能讀書。工小楷。其于詩游戲涉獵。若不經意。鮮潤流利。（鍾山獻序）

董其昌云。楊宛書。非直媚秀取姿。而迴腕出鋒。絕無媚骨。（書史會要）

汪歷賢題楊宛叔蘭亭臨本詩云。獨就規模出新意。更留粉本與蘭亭。雙鈎響榻誰能事。直喚昭陵片箴醒。（香祖筆記）

楊蕙娘 名曉英。秦淮女郎。工黃庭小楷。（珊瑚網）

沙嫩 名宛在。字未央。桃葉妓。善絃管。著蜨香集。（露書）

沙宛在。名彩姝。擅臨蘭亭。（珊瑚網）

楊叔卿 喜學麻姑壇。一染齊紈。司易百錦。大足掩映林下風。（珊瑚網）

靈異

宋

李媛 蘧兄子碩送客餘杭步伍亭。就觀壁後得淡墨書字數行。彷彿可辨。筆迹遒媚。如出女手。云夜臺夜復夜。東山東復東。當時九龍月。今日白楊風。後題云。李媛書。詳味詩句。似非世人所作。亭後荒閒有數十塚。疑塚間鬼憑附而書。（春渚紀聞）

紫姑 政和二年。襄邑民因上元請紫姑神爲戲。既書紙間。其字徑丈。或問之曰。汝更能大書否耶。卽書曰。請連黏襄表二百幅。當爲作一福字。或曰。紙易耳。安得許大筆也。曰。請大麻皮十斤。縛作令徑二尺許。墨漿以大器貯。備濡染也。諸好事因集紙筆。就一富人麥場。鋪展聚觀。神至書云。請一人繫筆于

項其人不覺身之騰蹕往來場間。須臾字成。端麗如顏書。復取小筆書于紙角云。持往宣德門。賣錢五百貫文。既而縣以妖捕羣集之人。大府聞取就鞫治。訖無他狀。卽具奏知。有旨令就後苑再書驗之。上皇爲幸苑中臨視。乃書一慶字。與前書福字大小相稱。字體亦同。上皇大奇之。因令于襄邑擇地建祠歲祀之。(春渚紀聞)

雜錄

宋

南陽驛女子。靖康間京畿士人。往往南竄。鄧州南陽縣驛。有女子書字清婉。留題于壁云。流落南來自可嗟。避人不敢御鉛華。却思當日鶯鶯事。獨立東風霧鬢斜。(馬純陶朱新錄)

盱江驛舍婦人。劉仙倫云。盱江驛舍中。有婦人書一憶字。筆勢頗姿媚。游子明王相之皆題詩其後。率予同賦。陽台雨歇行雲杳。天闊鴻稀春悄悄。鸛鵲孤眠怨芳草。夜夜相思何日了。妾非無聲不敢啼。妾非無淚不敢垂。柔情

欺損青黛眉。春風着人瑣。綠牕書字寄心曲。細看香翰婉且柔。中有閒愁三萬斛。向隅棄筆惆悵時。此情默默誰得知。無緣相見空相憶。不如當日休相識。(松山集)


明

曇陽子 曇陽子書陰符經跋云。曇陽子手書陰符經。貽學使徐公。是經論者以百言演道。百言演法。百言演術。徐公仕宦至中大夫。歸不待年。其于法于術。用誠有所未竟。而茲所可竟者。神仙抱一之道耳。然其大致則一矣。道之真以治身。其緒餘以治國家。其土苴以治天下。有味乎先民之言。或謂是受之元女。或謂軒轅氏與玉女論陰陽六甲。退而自著其事。曇陽子居嘗好書。是經。夫豈以二女自命耶。余復覩所貽王廷尉元美經。鳥跡龍文。若出造化。其原反終始。又必軌于正經。余不敏。無能知曇陽子。故爲徐公跋而歸之。(宣城梅鼎祚鹿裘石室集)

玉臺書史跋


閨閣工書。代不乏人。立言家。曾未聞有彙輯之者。頗爲缺典。今得樊榭先生是編。雅人韻事。良足千秋矣。是編蒐羅之備。惟李心水女世說雅可伯仲。彼名媛璣囊。綠牕女史諸書。舛鄙蕪淺。恐未能望其項背也。丙午四月望日震澤楊復吉識

香艷叢書五集卷一終



香艷叢書

第五集



40
1237
H95
18

香艷叢書

五集卷一

北里志序

自大中皇帝好儒術特重科第故其愛媚鄭詹事再掌春闈上往往微服長安中逢舉子則狎而與之語時以所聞質於內庭學士及都尉皆聳然莫知所自故進士自此尤盛曠古無儔然率多膏粱子弟平進歲不及三數人由是僕馬豪華宴游崇侈以同年俊少者爲兩街探花使鼓扇輕浮仍歲滋甚自歲初等第于甲乙春闈開送天官氏設春闈宴然後離居矣近年延至仲夏京中飲妓籍屬教坊凡朝士宴聚須假諸曹署行牒然後能致于他處惟新進士設宴顧吏故便可行牒追其所贈之資則倍于常數諸妓居平康里舉子新及第進士三司幕府但未通朝籍未直館殿者咸可就詣如不恡所費則下車水陸備矣其中諸妓多能談吐頗有知書言語者自公卿以降皆以表德呼之其分別品流衡尺人物應對非次良不可及信可輟叔孫之朝致楊秉之惑比常聞蜀妓



薛濤之才辯必謂人過言及覩北里二三予之徒則薛濤遠有慚德矣予頻隨計吏久寓京華時亦偷游其中固非興致每思物極則反疑不能久常欲紀述其事以爲他時談藪顧非暇豫亦竊俟其叨忝耳不謂泥蟠未伸俄逢喪亂變輿巡省嶠函鯨鯢逋竄山林前志掃地盡矣靜思陳事追念無因而久罹驚危心力減耗向來聞見不復盡記聊以編次爲太平遺事云時中和甲辰歲孫棨序

孫棨唐翰林學士居長安中頗有介靜之名其撰北里志風韻爾雅雪簷子青樓集崔令欽教坊記莫能逮也此志不典無補風教然天子狎游膏梁平進粉黛之妖幾埒鄭衛萬乘西巡端由北里作志者其有憂患乎陳繼儒識

北里志

唐 孫榮著

泛論三曲中事

平康里入北門東回三曲。卽諸妓所居之聚也。妓中有錚錚者。多在南曲中。曲其循墻一曲。卑屑妓所居。頗爲二曲輕視之。其南曲中者。門前通十字街。初登館閣者。多於此竊游焉。二曲中居者。皆堂宇寬靜。各有三數廳事。前後植花卉。或有怪石盆池。左右對設。小堂垂簾。茵褥帷幌之類。稱是。諸妓皆私有所指占。廳事皆彩版。以記諸帝后忌日。妓之母多假母也。俗呼爲爆炭。不知其因。應以難姑息之故也。亦妓之衰退者爲之。諸女自幼丐有。或傭其下里貧家。常有不調之徒。潛爲漁獵。亦有良家子。爲其家聘之。以轉求厚賂。誤陷其中。則無以自脫。初教之歌令。而責之其賦甚急。微涉退怠。則鞭扑備至。皆冒假母姓。呼以女弟。女兄爲之行第。率不在三旬之內。諸母亦無夫。其未甚衰者。悉爲諸邸將輩主之。或私蓄侍寢者。亦不以夫禮待。多有遊惰者。於三曲中而爲諸倡。所象養必號爲廟客。不知何謂。比見東洛諸妓體裁。與諸州

飲妓固不侔矣。然其羞七筓之態。勤叅請之儀。或未能去也。北里之妓。則公卿與舉子。其自在一也。朝士金章者。始有叅禮。大京兆但能制其昇夫。或可駐其去耳。諸妓以出里艱難。每南街保唐寺有講席。多以月之八日相牽率聽焉。皆納其假母一緡。然後能出於里。其於他處。必因人而游。或約人與同行。則爲下婢而納資於假母。故保唐寺每三。八日。士子極多。蓋有期於諸妓也。有一嫗號汴州人也。盛有財貨。亦育數妓。多蓄衣服器用。常賃於三曲中。亦有樂工聚居其側。或呼召之立至。每飲率以三錢。繼燭卽倍之。

天水僊哥

天水僊哥。字絳眞。住於南曲中。善談謔。能歌令。常爲席糾。寬猛得所。其姿容亦常常。但蘊籍不惡。時賢雅尙之。因鼓其聲價耳。故右史鄭休範仁表嘗在席上贈詩。嚴吹如何下太清。玉肌無奈六銖輕。雖知不是流霞酌。願聽雲和瑟一聲。劉覃登第年十六七。永寧相國鄴之愛子。自廣陵入。舉輜重數十車。名馬數十。駟時同年鄭賓先輩扇之極嗜。欲於長安中。天水之齒甚長於覃。但聞衆譽天

水亦不知其妍醜。所由輩潛與天水計議。每令辭以他事。重難其來。覃則連增所購。終無難色。會他日天水實有所苦。不赴召。覃殊不知信。增繒不已。所由輩又利其所乞。且不忠告而終不至。時有戶部府吏李全者。戶部練子也居其里中。能制諸妓。覃聞立使召之。授以金花銀榼可二斤許。全貪其重賂。徑入曲追天水入兜輿中。相與至宴所。至則蓬頭垢面。涕泗交下。舉簾一覩。亟使昇回。而所費已百餘金矣。

楚兒

楚兒字潤娘。素爲三曲之尤。而辯慧。往往有詩句可稱。近以退暮爲萬年捕賊官郭鍛所納。置於他所。潤娘在娼中。狂逸特甚。及被拘繫。未能悛心。鍛主繁務。又本居有正室。至潤娘館甚稀。每有舊識。過其所居。多於窓牖間相呼。或使人詢訊。或以巾箋送遺。鍛乃親仁諸裔孫也。爲人異常兇忍且毒。每知必極笞辱。潤娘雖甚痛憤。已而殊不少革。嘗一日自曲江與鍛行。前後相去十數步。全版使鄭光業昌國時爲補袞道。與之遇。楚兒遂出簾招之。光業亦使人傳語。鍛知之。

因曳至中衢。擊以馬箠。其聲甚冤楚。觀者如堵。光業遙視之。甚驚悔。且慮其不任矣。光業明日特取路過其居。偵之。則楚兒已在臨街牕下弄琵琶矣。駐馬使人傳語。已持彩箋送光業詩曰。應是前生有宿冤。不期今世惡因緣。蛾眉欲伴巨靈掌。鷄肋難勝子路拳。祗疑嚇人傳鐵券。汾陽王有鉄券免死罪。今則無矣。蓋恐嚇之辭。未應教我踏金蓮。曲江昨日君相遇。當下遭他數十鞭。光業馬上取筆答之曰。大開眼界莫言冤。畢世甘他也是緣。無計不煩乾偃蹇。有門須是疾連拳。據論當道加嚴箠。便合披緇念法蓮。如此輿情殊不減。始知昨日是蒲鞭。光業性疎縱。且無畏憚。不拘小節。是以敢駐馬報復。仍便送之。聞者皆縮頸。鍛累主兩赤邑捕賊。故不逞之徒。多所效命。人皆憚焉。

鄭舉舉

鄭舉舉者。居曲中。亦善令章。嘗與絳真互爲席糾。而充博非貌者。但負流品。巧談諧。亦爲諸朝士所眷。常有名賢釀宴。辟數妓。舉舉者預焉。今左諫王致君。缺右紹鄭禮臣。穀夕拜孫文府。儲小天趙爲山。崇皆在席。時禮臣初入內庭。矜誇

不已致君已下倦不能對。甚減歡情。舉舉知之。乃下籌指禮臣曰。學士語太多。翰林學士雖甚貴甚美。亦在人耳。至如李隲。劉允承。雍章亦嘗爲之。又豈能增其聲價耶。致君已下皆躍起拜之。喜不自勝。致禮臣因引滿自飲。更不復有言。於是極歡。至暮而罷。致君已下各取彩繪遺酬。孫龍光爲狀元。名僊文舉狀元在乾符五年頗惑之。與同年侯彰臣。潛杜寧臣。產崔勛美。趙延吉。光逢。盧文舉。擇李茂勳。弟茂萬等數人。多在其舍。他人或不盡預。故同年盧嗣業訴。醵罰錢。致詩於狀元曰。未識都知面。頻輸復分錢。苦心親筆硯。得志助花鈿。徒步求秋賦。持盃給暮饘。力微多謝病。非不奉同年。嗣業簡辭之子少有詞藝無操守之譽與同年非舊者爲都知分管諸妓俾追召云復分錢也今左史劉郊文崇及第年亦惑於舉燭即倍新郎君更倍其數故云坐久覺狀元微晒良久乃吟一篇曰。南行忽見李深之手舞如蜚。令不疑任爾風流兼蘊藉。天生鄭都知。

牙娘

牙娘居曲中。亦流輩翹舉者。性輕率。惟以傷人肌膚爲事。故硤州夏侯表中。淨

相國少子及第中甲科。皆流品知聞者。宴集尤盛。而表中性疎猛。不拘言語。或因醉戲之。爲牙娘批頰。傷其面。頗甚。翼日期。集於師門。同年多竊視之。表中因厲聲曰。昨日子。牙娘抓破澤顏。同年皆駭然。裴公俛首而晒。不能舉者久之。裴公墳其年主司今小天趙爲山。每因宴請。偏眷牙娘。謂之郡君。爲山內子。予從母妹也。甚明悟。爲山頗憚之。或親姻中。聞爲山屬意牙娘。遂以告其內子。他日爲山自外歸。內子謂爲山曰。今日顏色甚悅暢。定應是見郡君也。爲山愕然久之。無言以答。亦終不敢詰其言之之所來。

顏令賓

顏令賓居南曲中。舉止風流。好尚甚雅。亦頗爲時賢所厚。事筆硯。有詞句。見舉人壽禮祇奉。多乞歌詩。以爲畱贈。五彩箋常滿箱篋。後疾病且甚。值春暮。景色晴和。命侍女扶坐於砌前。顧落花而長歎。再四。因索筆題詩云。氣餘三五喘。花剩兩三枝。話別一樽酒。相邀無後期。因教小童曰。爲我持此出宣陽。親仁已長。逢見新第郎君及舉人。即呈之。云曲中顏家娘子。將來扶病奉候。郎君因令其

家設酒果以待。逡巡至者數人。遂張樂歡飲。至暮。涕泗交下。曰。我不久矣。幸各制哀挽以送我。初。其家必謂求賻。送於諸客。甚喜。及聞其言。頗嫌之。及卒。將瘞之日。得書數篇。其母拆視之。皆哀挽詞也。母怒。擲之於街中。曰。此豈救我朝夕也。其鄰有喜羌竹劉駝。駝聰爽能爲曲子詞。或云嘗私於令賓。因取哀詞數篇。教挽柩前同唱之。聲甚悲愴。是日瘞於青門外。或有措大逢之。他日召駝。使唱。駝尚記其四章。一曰。昨日尋僊子。轎車忽在門。人生須到此。天道竟難論。客至皆連袂。誰來爲鼓盆。不堪襟袖上。猶印舊眉痕。二曰。殘春扶病飲。此夕最堪傷。夢幻一朝畢。風花幾日狂。孤鸞徒照鏡。獨燕懶歸梁。厚意那能展。含酸奠一觴。三曰。浪意何堪念。多情亦可悲。駿奔皆露膽。麝至盡齊眉。花墜有開日。月沉無出期。寧言掩丘後。宿草便離離。四曰。奄忽那如此。夭桃色正春。捧心還動我。掩面復何人。岱岳誰爲道。逝川寧問津。臨喪應有主。宋玉在西鄰。自是盛傳於長安。挽者多唱之。或詢駝。駝曰。宋玉在西。莫是你否。駝晒曰。大有宋玉在。諸子皆知私於樂工及鄰里之人。極以爲耻。遞相掩覆。絳直因與諸子爭金。相

謔失言云。莫倚居突肆。既而甚有恨色。後有與絳真及諸子昵熟者。勤問之。終不言也。

楊妙兒

楊妙兒者。居前曲從東第四五家。本亦爲名輩。後老退爲假母。居第最寬潔。賓甚翕集。長妓曰萊兒。字蓬僊。貌不甚揚。齒不卑矣。但利口巧言。詼諧臻妙。陳設居止處。如好事士流之家。由是見者多惑之。進士天水光遠。故山北之子。年甚富。與萊兒殊相懸。而一見溺之。終不能捨。萊兒亦以光遠聰悟俊少。尤諂附之。又以俱善章程。愈相知愛。天水未應舉時。已相昵狎矣。及應舉。自以俊才。期於一戰而取。萊兒亦謂之萬全。是歲冬。大誇於賓客。指光遠爲一鳴先輩。及光遠下第京師。小子弟自南院徑取道詣萊兒。以快之。萊治容盛飾。立於門前。以俟。榜小子弟輩馬上。念詩以謔之。曰。盡道萊兒口可憑。一冬誇媚好聲名。適來安遠門前見。光遠何曾解一鳴。萊兒尙未信。應聲嘲答曰。黃口小兒口沒憑。逡巡看取第三名。孝廉持水添瓶子。莫向街頭亂梔鳴。其敏捷皆此類也。是春萊兒罷

耗久不痊於光遠。京師以宴下第者謂之打耗。光遠嘗以長句詩題萊兒室曰。魚鑰獸環斜掩門。萋萋芳草憶王孫。醉憑青瑣窺韓壽。困擲金梭惱謝鯤。不夜珠光連玉匣。辟寒釵影落瑤樽。欲知明惠多情態。役盡江淹別後魂。萊兒酬之曰。長者車塵每到門。長卿非慕卓王孫。定知羽翼難隨鳳。却喜波濤未化鯤。嬌別翠鈿枯去袂。醉歌金雀碎殘樽。多情多病年應促。早辦名香爲返魂。萊兒亂離前。有蘭闥豪家。以金帛聘之。置於他所。人頗思之。不得復覩。萊兒以敏妙誘引賓客。倍於諸妓。權利甚厚。而假母楊氏。未嘗優恤。萊兒因大詬假母。拂衣而去。後假母嘗泣訴於他賓。次妓曰永兒。字齊卿。婉約於萊兒。無他能。今相國蕭司徒。遣甚眷之。在翰苑時。每知聞問爲之致宴。必約定名占之。次妓曰迎兒。既乏丰姿。又拙戲謔。多勁詞。以忤賓客。次妓曰桂兒。最少。亦窘於貌。但慕萊兒之爲人。雅於逢迎。

王團兒

王團兒前曲自西第一家也。昨車駕反正。朝官多居此。已爲假母。有女數人。長曰小潤。字子

美。少時頗籍籍者。小天崔垂休。名微本字似之及第時年二十變化年溺惑之所費甚廣。嘗題

記於小潤髀上。爲山所見。名就今字哀求近贈詩曰。慈恩塔下新泥壁。滑膩光

華玉。不如何事博陵崔。四十金陵腿上逞。歐書。垂休本第四十後改爲四次曰

福娘。字宜之。甚明白。豐約合度。談論風雅。且有體裁。故天官崔知之。侍郎嘗於

筵上與詩曰。名澹贈詩方在內庭怪得清風送異香。娉婷僊子曳霓裳。惟應錯認偷桃客。

曼倩曾爲漢侍郎。時爲內庭戶部侍郎次日曰小福。字能之。雖乏風姿。亦甚慧黠。予在京師

與羣從少年習業。或倦悶時。同詣此處。與二福環坐。清談雅飲。尤見風態。予嘗

贈宜之詩曰。彩翠僊衣紅玉膚。輕盈年在破瓜初。霞盃醉勸劉郎飲。雲髻慵邀

阿母梳。不怕寒侵緣帶寶。每憂風舉倩持裾。謾圖西子晨粧樣。西子元來未得

如得詩甚多。頗以此詩爲稱愜。持詩於牕左紅牆。請予題之。及題畢。以未滿壁

請更作一兩篇。且見戒無艷。予因題三絕句。如其自述。其一曰移壁回牕費幾

朝。指環偷解薄蘭椒。無端鬪草輸鄰女。更被拈將玉步搖。其二曰寒繡紅衣餉

阿嬌。新團香獸不禁燒。東鄰起樣裙腰闊。刺蹙黃金線幾條。其三曰試共卿卿

戲語。麤畫堂連遣侍兒呼。寒肌不奈金如意。白獺爲膏郎有無。尙校數行未滿翼。日詣之。忽見自札後宜之題詩曰。苦把文章邀勸人。吟看好箇語言新。雖然不及相如賦。也直黃金一二斤。宜之每宴洽之際。常慘然悲鬱。如不勝任。合坐爲之改容。久而不已。靜詢之。答曰。此蹤跡安可迷而不返耶。又何計以返。每思之不能不悲也。遂嗚咽久之。他日忽以紅箋授予。泣且拜視之。詩曰。日日悲傷未有圖。懶將心事話凡夫。非同覆水應收得。只問僊郎有意無。余因謝之曰。甚知幽旨。但非舉子所宜。何如又泣曰。某幸未係教坊籍。君子倘有意。一二百金之費爾。未及答。因授予筆。請和其詩。予題其箋後曰。韶妙如何有遠圖。未能相爲信。非夫泥中蓮子雖無染。移入家園未得無。覽之因泣不復言。自是情意頓薄。其夏予東之洛。或釀飲於家。酒酣數相囑曰。此歡不知可繼否。因泣下。洎冬初還京。果爲豪者主之。不復可見。曲中諸子多爲富豪輩。日輸一緡於母。謂之買斷。但未免官使不復祇接於客。至春上巳日。因與親知楔於曲水。聞鄰棚絲竹。因而視之。西座一紫衣。東座一縷麻。北座者徧通。反甲麻衣對米孟爲糾。其南二妓乃宜之與母也。因於棚後候其

女傭以詢之曰。宣陽綵纈鋪張言爲街使郎官置宴。張卽宜之所主也。時街使令坤爲敬瑄。二綰蓋在外艱耳。及下棚。復見女傭曰。來日可到曲中否。詰旦詣其里。見能之在門。因邀下馬。予辭以他事。立乘輿語。能之團紅巾。擲予曰。宜之詩也。舒而題詩曰。久賦恩情欲託身。已將心事再三陳。泥蓮旣沒移栽分。今日分離莫恨人。予覽之悵然馳回。且不復及其門。每念是人之慧性可喜也。常語予本解梁人也。家與一樂工鄰。少小常依其家。學針線。誦歌詩。總角爲人所誤聘。一過客云入京赴調選。及挈至京。置之於是。客給而去。初是家以親情接待。甚至累月後。乃逼令學歌令。漸遣見賓客。尋爲計巡遼所嬖。韋宙相國子及衛增常侍子所娶。輸此家不啻千金矣。間者亦有兄弟相尋。便欲論奪。某量其兄力輕勢弱。不可奪。無奈何。謂之曰。某亦失身矣。必恐徒爲因尤。其家得數百金與兄。乃慟哭永訣而去。每遇賓客話及此。嗚咽久之。

俞洛眞

俞洛眞有風貌。且辯慧。頃曾出曲中。值故左揆于公貴主許納別室。于公琮尙

廣德公主。宣宗女也。頗有賢淑之譽。從子獵。冒其季父。于公柄國時。頗用事。曾貶振州司戶。後改名應舉。左揆爲力甚切。竟不得。後投跡今左廣令孜門。因中第。遂佐十軍。先通洛眞而納之。月餘不能事諸媵之間。彰其迹以告貴主。主卽出之。亦獲數百金。遂嫁一胥吏。未朞年而所有索盡。吏不能給。遂復入曲。携胥一女。亦當時絕色。洛眞雖有風情。而淫冶任酒。殊無雅裁。亦時爲席糾。頗善章程。鄭右史仁表常與詩曰。巧製新章拍指新。金疊巡舉助精神。時時欲得橫波盼。又怕回詩錯指人。離亂前兩日。與進士李文遠渭渥之弟。今改名滌。其年初舉。乘醉同詣之。文遠一見。不勝愛慕。時日已抵晚。新月初升。因戲文遠題詩曰。引君來訪洞中僊。新月如眉拂戶前。領取嫦娥攀取桂。便從陵谷一時遷。予題於楣間。訖先回。間兩日。文選因同詣南院。文遠言前者醉中題姓字於所詣。非宜也。回將撤去之。及安上門。有自所居追予者曰。潼關失守矣。文遠不肯中返。竟至南院。及回。固不暇前約。聳然而歸。及親仁之里。已奪馬紛紜矣。乃遂奔竄。因與文遠思所題詩。直識詞也。

王蘇蘇

王蘇蘇在南曲中。屋室寬博。庖饌有序。女昆仲數人。亦頗善諧謔。有進士李標者。自言李英公勣之後。久在大諫王致君門下。致君弟姪因與同詣焉。飲次。標題曰。春暮花株遶戶飛。王孫羣勝引塵衣。洞中僊子多情態。畱住劉郎不放歸。蘇蘇先未識。不甘其題。因謂之曰。阿誰畱郎君。莫亂道。遂取筆繼之曰。怪得犬驚雞亂飛。羸童瘦馬老麻衣。阿誰亂引閒人到。畱住青蚨熱趕歸。標性褊頭面通赤。命駕先歸。後蘇蘇見王家郎君。輒詢熱趕。

王蓮蓮

王蓮蓮。字沼容。微有風貌。女弟小僊已下數輩皆不及。但假母有郭氏之癖。假父無王衍之嫌。諸妓皆攫金特甚。詣其門者。或酬酢稍不至。多被盡畱車服。賃衛而返。曲中惟此家假父頗有頭角。蓋無圖者矣。

劉泰娘

劉泰娘。北曲內小家女也。彼曲素無高遠者。人不知之。亂離之春。忽於慈恩寺。

前見曲中諸妓同赴曲江宴。至寺側下車而行。年齒甚妙。粗有容色。時遊者甚衆。爭往詰之。以居非其所。久乃低眉。及細詢之。云門前一樗樹子。尋遇春雨。諸妓分散。其暮予有事北去。因過其門。恰遇轎車返矣。遂題其舍曰。尋常凡木最輕樗。今日尋樗桂不如。漢高新破咸陽後。英俊奔波遂喫虛。同遊人聞知。詰朝詣之者。結駟於門也。

張住住

張住住者。南曲所居卑陋。有二女兄不振。是以門甚寂寞。爲小鋪。席貨草剉薑果之類。住住其母之腹女也。少而敏慧。能辨音律。鄰有龐佛奴與之同歲。亦聰警。甚相悅慕。年六七歲。隨師於衆學中。歸則轉教住住。私有結髮之契。及住住將笄。其家拘管甚切。佛奴稀得見之。又力窘不能致聘。俄而里之南有陳小鳳者。欲權聘住住。蓋求其元。已納薄幣。約其歲三月五日。及月初音耗不通。兩相疑恨。佛奴因寒食爭毬。故逼其牕以伺之。忽聞住住曰。徐州子看看日中也。佛奴龐勛同姓。傭書徐邸。因私呼佛奴爲徐州子。日中蓋五日也。佛奴甚喜。因求

住住云。上巳日我家踏青去。我當以疾辭。彼卽自爲計也。佛奴因求其鄰宋嫗爲之地。嫗許之。是日舉家踏青去。而嫗獨畱。住住亦畱。住住乃鍵其門。伺於東牆。聞佛奴語聲。遂梯而過。佛奴盛備酒饌。亦延宋嫗。因戲謾寢。所以遂平生。既而謂佛奴曰。子旣不能見聘。今日後時矣。隨子而奔。兩非其便。千秋之誓。可徐圖之。五日之言。其何如也。佛奴曰。此我不能也。但願保之。他日住住又曰。小鳳亦非娶我也。其旨可知也。我不負子矣。而子其可便負我家而辱之乎。子必爲我之計。佛奴許之。曲中素有畜鬪雞者。佛奴常與之狎。至五日。因髡其冠。取丹物託宋嫗致于住住。旣而小鳳以爲獲元甚喜。又獻三縉于張氏。遂往來不絕。復貪住住之明慧。因欲嘉禮納之。時小鳳爲平康富家。車服甚盛。佛奴傭於徐邸。不能給食。母兄喻之。鄰里譏之。往往終不捨佛奴。指堦井曰。若逼我不已。骨董一聲卽了矣。平康里中。素多輕薄小兒。遇事輒唱住住誑小鳳也。鄰里或知之。俄而復值北曲王團兒假女小福爲鄭九郎主之。而私於曲中盛六子者。及誕一子。榮陽撫之甚厚。曲中唱曰。張公吃酒李公顛。盛六生兒鄭九憐。舍下雄

雞傷一德。南頭小鳳納三千。久之小鳳因訪住住。微聞其唱。疑而未察。其與住住昵者。詰旦告以街中之辭。曰。是日前佛奴雄雞因避鬪飛上屋傷足。前曲小鐵鑪出小福者賣馬街頭。遇佛奴父。以爲小福所傷。遂歐之。住住素有口辯。因撫掌曰。是何龐漢打他賣馬街頭田小福。街頭唱舍下雄雞失一足。街頭小福拉三拳。且雄雞失足。是何謂也。小鳳旣不審。且不喻。遂無以對。住住因大哈遞呼家人隨弄小鳳。甚不自足。住住因呼宋媼。使以前言告佛奴。奴視雞足。且良遂以生絲纏其雞足。置街中。召羣小兒共變其唱。住住之言。小鳳復以住住家噪弄不已。遂出街中以避之。及見雞跛。又聞改唱。深恨向來悞聽。乃益市酒肉復之。張舍一夕宴語甚歡。至旦將歸街中。又唱曰。莫將龐大作菽。翹音團。龐大皮中的不乾。不怕鳳凰當額打。更將雞脚用筋纏。小鳳聞此唱。不復詣住住。佛奴初傭徐邸。邸將甚憐之。爲致職名。竟裨邸將。終以禮聘住住。將連大第。而小鳳家事日蹙。復不侔矣。

附錄

胡證尙書

胡證尙書質狀魁偉。膂力絕人。與裴晉公度同年。公嘗狎遊。爲兩軍力士十許輩。凌轢勢甚危窘。公潛遣一介求救於胡。胡衣皂貂金帶。突門而入。諸力士睨之失色。胡後到。飲酒一舉三鍾。不啻數升。盃盤無餘瀝。逡巡主人上燈。胡起取鐵燈臺。摘去枝葉。而合其跗。橫置膝上。謂衆人曰。鄙夫請非次改令。凡三鍾。引滿一遍。三臺酒須盡。仍不得有滴瀝。犯令者一鐵躋。自謂燈臺胡復一舉三鍾。次及一角觥者。凡三臺三遍。酒未能盡。淋漓逮至並坐。胡舉躋將擊之。羣惡皆起。設拜叩頭乞命。呼爲神人。胡曰。鼠輩敢爾。乞汝殘命。叱之令去。

裴思謙狀元

裴思謙狀元及第後。作紅箋名紙十數。詣平康里。因宿於里中。詰旦賦詩曰。銀缸斜背解鳴璫。小語低聲賀玉郎。從此不知蘭麝貴。夜來新惹桂枝香。

鄭光業補哀

鄭光業新及第年。宴次。有子女卒患心痛而死。同年皆惶駭。光業撤筵中器物。

悉授其母。別徵酒器。盡歡而散。

楊汝士尙書

楊汝士尙書鎮東川。其子知溫及第。汝士開家宴相賀。營妓咸集。汝士命人與紅綾一匹。詩曰。郎君得意及青春。蜀國將軍又不貧。一曲高歌紅一匹。兩頭娘子謝夫人。

鄭合敬先輩

鄭合敬先輩及第後。宿平康里。詩曰。春來無處不開行。楚潤相看別有情。好是

五更殘酒醒。時時聞喚狀元聲。

楚娘字潤卿
妓之尤者

余頃年往長安中。鰥居僑寓。頗有介靜之名。然惚率交友。未嘗辭避。故勝遊狎宴。常亦預之。朝中知己。謂余能立於顏生子祚生之間矣。余不達聲律。且無耽惑。而不免俗。以其道也。然亦懲其事。思有以革其弊。嘗聞大中以前。北里頗爲不測之地。故王金吾式令狐博士瀉皆目擊其事。幾罹毒手。實昭著本末。垂戒後來。且又焉知當今無之。但不值執金吾曲臺之泄耳。王金吾

故山南相國起之子。少狂逸。曾昵行此曲。遇有醉而後至者。遂避之床下。俄頃又有後至者。仗劍而來。以醉者爲金吾也。因梟其首而擲之。曰。來日更呵殿入朝耶。遂據其牀。金吾獲免。遂不入此曲。其首家人收瘞之。令狐博士。瀹相君當權日。尙爲貢士。多往此曲。有昵熟之地。往訪之。一旦忽告以親戚聚會。乞輟一日。遂去之。瀹於鄰舍密窺見母與女共殺一醉人而瘞之室後。來日復再詣之宿。中夜問女。女驚而扼其喉。急呼其母。將共斃之。母勸而止。及旦歸。告大京尹捕之。其家已失所在矣。以博士事不可不具載於明文耳。

頃年舉子皆不及此里。惟新郎君恣遊於一春。近不知誰何啟迪。嗚呼有危梁峻谷之虞。則回車返策者衆矣。何危禍之惑甚於彼而不能戒於人哉。則鼓洪波遵覆轍者。甚於作俑乎。後之人可以作規者。當力制乎其志。是不獨爲風流之談。亦可垂誠勸之旨也。述才慧。所以痛其辱重廩也。述誤陷。所以警其輕體也。叙宜之。所以憐拯已之惠也。叙洛眞。所以誠上姓之容易也。舉令賓。所以念蚩蚩者。有輕才之高見也。舉住住。所以嘉碌碌者。有重讓

之明心也。引執金吾與曲臺。所以裨將來爲危梁峻谷之虞也。可不戒之哉。

卷二

五

集

教坊記

唐 崔令欽

西京右教坊在光宅坊。左教坊在延政坊。右多善歌。左多工舞。蓋相因習。東京兩教坊俱在明義坊中。右在南。左在北也。坊南西門外。卽苑之東也。其間有頃餘水泊。俗謂之月陂。形似偃月。故以名之。

妓女入宜春院。謂之內人。亦曰前頭人。常在上前。若其家猶在教坊。謂之內人家。敕有司給賜同十家。雖數十家。猶故以十家呼之。每月二日十六日。內人母得以女對。無母則姊妹若姑一人對。十家就本落餘內人並坐內教坊對。內人生日則許其母姑姊妹等來對。其對所如式。

樓下戲出隊。宜春院人少。卽以雲韶添之。雲韶謂之宮人。蓋賤隸也。非直美惡殊貌。居然易辨明。內人帶魚。宮人則否。平人女以容色選入內者。教習琵琶三絃箏篋等者。謂搗彈家。

開元十一年。初製聖壽樂。令諸女衣五方色衣。以歌舞之。宜春院女教一日。便

堪上場。惟搗彈家彌月乃成。至戲日。上令宜春院人爲首尾。搗彈家在行間。令學其舉手也。宜春院亦有工拙。必擇尤者爲首尾。首旣引隊。衆所屬目。故須能者。樂將闋。稍稍失隊。餘二十許人舞曲終。謂之合殺。尤要快捷。所以更須能者也。

聖壽樂舞衣襟皆各繡一大窠。皆隨其衣本色製就縵衫。下纔及帶。若短汗衫者。以籠之。所以藏繡窠也。舞人初出樂次。皆是縵衣。舞至第二疊。相聚場中。卽於衆中從領上抽去籠衫。各納懷中。觀者忽見衆女咸文繡炳煥。莫不驚異。凡欲出戲。所司先進曲名。上以墨點者卽舞。不點者卽否。謂之進點。戲日。內伎出舞。教坊人惟得舞伊州五天重來疊。不離此兩曲。餘盡讓內人也。垂手羅回波。樂蘭陵王春鶯半社渠。借席烏夜啼之屬。謂之軟舞。阿遼柘枝黃鸞拂林大渭州達摩之屬。謂之健舞。

凡樓下兩院進雜婦女。上必召內人姊妹入內賜宴。因謂之曰。今日娘子不須唱歌。且饒姊妹並兩院婦女。於是納妓與兩院歌人更代上舞臺唱歌。內妓歌。

則黃幡綽贊揚之。兩院人歌。則幡綽輒訾詬之。有肥大年長者。卽呼爲屈突干。阿姑。貌稍胡者。卽云康太賓阿妹。隨類名之。標弄百端。諸家散樂。呼天子爲崖公。以歡喜爲蜺斗。以每日長在至尊左右爲長入。

筋斗。裴承恩妹大娘善歌。兄以配竿木侯氏。又與長入趙解愁私通。侯氏有疾。因欲藥殺之。王輔國鄭衙山與解愁相知。又是侯鄉里。密謂薛忠王琰曰。爲我語侯大兄。晚間有人送粥。慎莫喫。及期。果有贈粥者。侯遂不食。其夜裴大娘引解愁謀殺其夫。衙山願擎土袋燈旣滅。衙山乃以土袋置侯身上。不壓口鼻。其黨不之覺也。比明。侯氏不死。有司以聞。上令范安窮究其事。於是趙解愁等皆決一百。衆皆不知侯氏不淹口鼻而不死也。或言土袋綻裂。故活。是以諸女戲相謂曰。自今後縫壓壻土袋。當加意夾縫。縫之更無令開綻也。

坊中諸女。以氣類相似。約爲香火兄弟。每多至十四五人。少不下八九輩。有兒郎聘之者。輒被以婦人名號。卽所聘者。兄見呼爲新婦。弟見呼爲嫂也。兒郎有任宮僚者。宮忝與內人對。同日垂到內門。車馬相遇。或褰車簾呼阿嫂。若新婦。

者同黨未達。殊為怪異。問被呼者。笑而不答。兒郎既聘一女。其香火兄弟多相奔。云學突厥法。又云我兄弟相憐愛。欲得嘗其婦也。主者知。亦不妬他。香火即不通。

蘇五奴妻張少娘善歌舞。有邀迓者。五奴輒隨之前。人欲得其速醉。多勸酒。五奴曰。但多與我錢。喫鎚子亦醉。不煩酒也。今呼鬻妻者為五奴。自蘇始。
范漢女大娘子。亦是竿木家。開元二十一年。出內有姿媚而微慍。氣也。

曲名

- | | | | | | |
|-----|-----|-----|-----|-----|-----|
| 春光好 | 賀聖朝 | 夜半樂 | 繞殿樂 | 度春江 | 獻天花 |
| 迎春花 | 奉聖樂 | 破陣樂 | 泛舟樂 | 衆仙樂 | 和風柳 |
| 鳳樓春 | 千秋樂 | 還京樂 | 拋毬樂 | 大定樂 | 美唐風 |
| 負陽春 | 泛龍舟 | 天下樂 | 清平樂 | 龍飛樂 | 透碧空 |
| 帝臺春 | 泛玉池 | 同心樂 | 放鷹樂 | 慶雲樂 | 巫山女 |

繞池春	滿園春	長命女	武媚娘	杜韋娘
柳青娘	楊柳枝	耆柳含烟	耆楊柳	倒垂柳
浣溪沙	浪淘沙	撒金沙	紗牕恨	金篦嶺
隔簾聽	恨無媒	望梅花	望江南	好郎君
想夫憐	別趙十	憶趙十	念家山	紅羅襖
烏夜啼	墻頭花	摘得新	北門西	糞羊頭
河瀆神	二郎神	醉鄉遊	醉花間	燈下見
醉思鄉	太邊郵	太白星	剪春羅	會佳賓
當庭月	思帝卿	歸國遙	感皇恩	戀皇恩
皇帝感	戀情深	憶漢月	憶先皇	聖無憂
定風波	木蘭花	更漏長	菩薩蠻	破南蠻
八拍蠻	芳草洞	守陵宮	臨江仙	虞美人
映山紅	獻忠心	臥沙堆	怨黃沙	遐方怨

怨胡天

送征衣

送行人

望梅愁

阮郎迷

牧羊怨

掃市舞

鳳歸雲

羅裙帶

同心結

一捻鹽

阿也黃

却家雞

綠頭鴨

下水船

畱客住

離別難

喜長新

羌心怨

女王國

繚踏歌

天外聞

賀皇化

五雲仙

滿堂花

南天竺

定西番

荷葉杯

感庭秋

月遮樓

感恩多

長相思

西江月

拜新月

上行杯

團亂旋

喜春鶯

大猷壽

鵲踏枝

萬年歡

曲玉管

傾杯樂

謁金門

巫山一段雲

望月波羅門

後庭花

西河獅子

西河劍氣

怨陵三臺

儒士謁金門

武士朝金闕

搯工不下

麥秀兩歧

金雀兒

瀟水吟

玉搔頭

鸚鵡杯

路逢花

初漏滿

相見歡

蘇幕遮

游春苑

黃鍾樂

訴衷情

折紅蓮

征步郎	洞仙歌	太平樂	長慶樂	喜回鑾
漁父引	喜秋天	大郎神	胡渭州	夢江南
濮陽女	靜戎煙	三臺	上韻	中韻
下韻	普恩光	戀情歡	楊下采桑	大酺樂
合羅縫	蘇合香	山鷓鴣	七星管	醉公子
朝天樂	木筵	看月宮	宮人怨	歎疆場
拂霓裳	駐征遊	泛濤溪	胡相問	廣陵散
帝歸京	喜還京	遊春夢	柘枝引	畱諸錯
如意娘	黃羊兒	蘭陵王	小秦王	花黃發
大明樂	望遠行	思友人	唐四姐	放鵲樂
鎮西樂	金殿樂	南歌子	八拍子	魚歌子
七夕子	十拍子	措大子	風流子	吳吟子
生查子	胡醉子	山花子	水仙子	綠鈿子

金錢子

竹枝子

天仙子

赤棗子

千秋子

心事子

胡蝶子

沙磧子

酒泉子

迷神子

得蓬子

剉碓子

麻婆子

紅娘子

甘州子

歷刺子

鎮西子

北庭子

采蓮子

破陣子

劒器子

獅子

女冠子

仙鶴子

穆護子

贊普子

番將子

回戈子

帶竿子

摸魚子

南鄉子

大呂子

南浦子

撥棹子

河滿子

曹大子

引角子

隊踏子

水沽子

化生子

金娥子

捨麥子

多利子

毗砂子

上元子

西溪子

劍閣子

嵇琴子

莫璧子

胡攢子

唧唧子

翫花子

西國朝天

大曲名

踏金蓮

綠腰

涼州

薄媚

賀聖樂

伊州

甘州

泛龍舟

采桑

千秋樂

霓裳

玉樹後庭花

伴侶

雨霖鈴

柘枝

胡僧破

平翻

相駢逼

呂太后

突厥三臺

大寶

一斗鹽

羊頭神

大姊

舞大姊

急月記

斷弓絃

碧霄吟

穿心蠻

羅步底

回波樂

千春樂

龜茲樂

醉渾脫

映山雞

吳破

四會子

安公子

舞春風

迎春風

看江波

寒鴈子

又中春

翫中秋

迎仙客

同心結

大面出北齊蘭陵王長恭性膽勇而貌婦人自嫌不足以威敵乃刻木爲假面臨陣著之因爲此戲亦入歌曲

踏謠娘北齊有人姓蘇顰鼻實不仕而自號爲郎中嗜飲酗酒每輒毆其妻妻銜悲訴於鄰里時人弄之丈夫著婦人衣徐步入場行歌每一疊旁人齊聲和之云踏謠和來踏謠娘苦和來以其且步且歌故謂之踏謠以其稱冤故言苦及其夫至則作毆鬪之狀以爲笑樂今則婦人爲之遂不呼郎中但云阿叔

子調弄。又加典庫。全失舊旨。或呼爲談容娘。又非。

烏夜啼。宋彭城王義康。衡陽王義季。帝囚之潯陽。後宥之。使未達。衡王家人扣二王所囚院曰。昨夜烏夜啼。官富有赦。少頃使至。故有此曲。亦入琴操。

安公子。隋大業末。煬帝幸揚州。樂人王令言以年老不去。其子從焉。其子在家彈琵琶。令言驚問此曲何名。其子曰。內裡新翻曲子。名安公子。令言流涕悲愴。謂其子曰。爾不須扈從。大駕必不回。子問其故。令言曰。此曲宮聲往而不返。宮爲君。吾是以知之。

春鶯囀。高宗曉聲律。晨坐聞鶯聲。命樂工白明達寫之。遂有此曲。

記曰。夫以廉潔之美。而道之者寡。驕淫之醜。而陷之者衆。何哉。志意劣而嗜慾強也。借如涉畏途。不必皆死。而人知懼。溺聲色。則必傷天。而莫之思。不其惑歟。且人之生身。所稟五常耳。至有悅其妻而圖其夫。前古多矣。是違仁也。納異寵而薄糟糠。凡今衆矣。是忘義也。重衽席之虞。輕宗祀之敬。是廢禮也。貪耳目之玩。忽禍敗之端。是無智也。心有所愛。則覲冒。苟得不顧宿諾。是棄

信也。敦諭履仁蹈義修禮。任智而信以成之。嗚呼國君保之。則比德堯舜。士庶由之。則齊名周孔矣。當爲永代表式。寧止一時稱舉。儻謂修小善而無益。犯小惡而無傷。殉嗜慾近情。忘性命大節。施之於國。則國風敗。行之於家。則家法壞。敗與壞不其痛哉。是以楚莊悔懼。斥遣夏氏。宋武納諫。遽絕慕容。終成霸業。號爲良主。豈比高緯以馮小憐滅身。叔寶以張貴妃亡國。漢成以昭儀絕冢嗣。燕熙以符氏覆邦家乎。非無元龜。自有人鑑。遂形簡牘。敢告後賢。

卷一

五

集

青樓集序

君子之於斯世也孰不欲才加諸人行足諸已其肯甘於自棄乎哉蓋時有否泰分有窮達故才或不羈行或不揜焉當其泰而達也園林鐘鼓樂且未央君子宜之當其否而窮也江湖詩酒迷而不復君子非獲已者焉我皇元初并海宇而金之遺民若杜散人白蘭谷關已齋輩皆不屑仕進乃嘲風弄月留連光景庸俗易之用世者嗤之三君之心固難識也百年未幾世運中否士失其業志則鬱矣酤酒載嚴詩禍叵測何以紓其愁乎小軒居寂維夢是觀商顏黃公之裔孫曰雪簑者携青樓集示余且徵序引其志言讀之蓋已詳矣余奚庸贅竊惟雪簑在承平時嘗蒙富貴餘澤豈若杜樊川贏得薄倖之名乎然樊川自負奇節不爲齷齪小謹至論列大事如罪言原十六衛戰守二論與時宰論兵論江賊書達古今審成敗視昔之平安杜書記爲何如邪惜乎天慙將相之權弗使究其設施廻翔紫薇文空言耳揚州舊夢尙奚憶哉今雪簑之爲是集也殆亦夢之覺也不然歷歷有如此者又嘗佐貴人樽俎姚闔二公在焉姚偶言

暮秋時三字闕曰怡雲續而歌之張應聲作小婦孩兒且歌且續曰暮秋時菊
殘猶有傲霜枝風西了却黃花事貴人曰且止遂不成章張之才亦敏矣

青樓集

元黃雪蓑著

曹蛾秀

京師名妓也。賦性聰慧。色藝俱絕。一日鮮于伯機開宴。座客皆名士。鮮于因事入內。命曹行酒適遍。公出自內。客曰伯機未飲。曹亦曰伯機未飲。客笑曰。汝以伯機相呼。可爲親愛之至。鮮于佯怒曰。小鬼頭敢如此無禮。曹曰。我呼伯機。便不可。却只許爾叫王羲之也。一座大笑。

解語花

性劉氏。尤長於慢詞。廉野雲招盧疎齋趙松雪飲於京城外之萬柳堂。劉左手持荷花。右手舉杯。歌驟雨打新荷曲。諸公喜甚。趙卽席賦詩云。萬柳堂前數畝池。平鋪雲錦葢漣漪。主人自有滄洲趣。遊女仍歌白雪詞。手把荷花來勸酒。步隨芳草去尋詩。誰知咫尺京城外。便有無窮萬里思。

珠簾秀

姓朱氏。行第四。雜劇爲當今獨步。駕頭花旦軟末泥等。悉造其妙。胡紫山宣慰嘗以沉醉東風曲贈云。錦織江邊翠竹。絨穿海上明珠。月淡時。風清處。都隔斷落紅塵土。一片閒情任春舒。挂盡朝雲暮雨。馮海粟待制亦贈以鷓鴣天云。憑倚東風遠映樓。流鶯窺面燕低頭。蝦鬚瘦影纖纖織。龜背香紋細細浮。紅霧歛。彩雲收。海霞爲帶月爲鉤。夜來捲盡西山雨。不著人間半點愁。蓋朱背微僂。馮故以簾鉤寓意。至今後輩以朱娘娘稱之者。

趙眞眞楊玉娥

善唱諸宮調。楊立齋見其謳張五牛商正叔所編雙漸小卿怨。因作鷓鴣天。哨遍耍孩兒煞以詠之。後曲多不錄。今錄前曲云。煙柳風花錦作團。霜芽露葉玉裝船。誰知皓齒纖腰會。只在輕衫短帽邊。啼玉靨。咽冰絃。五牛身去更無傳。詞人老筆佳人口。再喚春風在眼前。

劉燕歌

善歌舞。齊參議還山東。劉賦太常引以餞云。故人別我出陽關。無計鎖雕鞍。今

古別離難。兀誰畫蛾眉遠山。一尊別酒。一聲杜宇。寂寞又春殘。明月小樓閒。第一夜相思。汨彈至今膾炙人口。

順時秀

姓郭氏。字順卿。行第二。人稱之曰郭二姐。姿態閑雅。雜劇爲閨怨最高。駕頭諸旦本亦得體。劉時中待制嘗以金簪玉管鳳吟鸞鳴擬其聲韻。平生與王元鼎密偶疾。思得馬板腸。王卽殺所騎駿馬以啗之。阿魯溫參政在中書。欲矚意於郭。一日戲曰。我何如王元鼎。郭曰。參政宰臣也。元鼎文士也。經綸朝政。致君澤民。則元鼎不及參政。嘲風弄月。惜玉憐香。則參政不敢望元鼎。阿魯溫一笑而罷。

小娥秀

姓邵氏。世傳邵三姐是也。善小唱。能曼詞。張子友平章甚加愛賞。中朝名士贈以詩文盈軸焉。

杜妙隆

金陵佳麗人也。盧疎齋欲見之。行李匆匆。不果所願。因題踏沙行於壁云。雪暗山明。溪深花早。行人馬上詩成了。歸來聞說妙隆歌。金陵卻比蓬萊渺。寶鏡慵窺。玉容空好。梁塵不動歌聲悄。無人知我此時情。春風一枕松牕曉。

喜春景

姓段氏。姿色不逾中人。而藝絕一時。張子友平章以側室置之。

聶檀香

姿色嫵媚。歌韻清圓。東平嚴侯甚愛之。

南春宴

姿容偉麗。長於駕頭雜劇。亦京師之表表者。

李心心楊柰兒袁當兒于盼盼于心心吳女燕雪梅

此數人者。皆國初京師之小唱也。又有牛四姐。乃元壽之妻。俱擅一時之妙。壽之尤爲京師唱社中之巨擘也。

宋六嫂

小字同壽。元遺山有贈臂栗工張觜兒詞。卽其父也。宋與其夫合樂。妙入神品。蓋宋善謳。其夫能傳其父之藝。滕玉霄待制嘗賦念奴嬌以贈云。柳顰花困。把人間恩愛。尊前傾盡。何處飛來雙比翼。直是同聲相應。寒玉嘶風。香雲捲雪。一串驪珠引。元郎去後。有誰著意題品。誰料渴羽清商。繁絃急管。猶自餘風韻。莫是紫鸞天上曲。兩兩玉童相並。白髮梨園。青衫老傳。試與畱連聽。可人何處。滿庭霜月。清冷。

周人愛

京師旦色姿藝並佳。其兒婦玉葉兒。元文苑嘗贈以南呂一枝花曲。又有瑤池景呂總管之妻也。賈島春蕭子才之妻也。皆一時之拔萃者。王玉帶馮六六玉樹燕王庭燕周獸頭。皆色藝兩絕。又有劉信香。因李侯寵之名尤著焉。

秦玉蓮秦小蓮

善唱諸宮調。藝絕一時。後無繼之者。

司燕奴

精雜劇。聲名與宋郭相頡頏。後有班真真。程巧兒。李趙奴。亦擅一時之妙。

天然秀

姓高氏。行第二。人以小二姐呼之。母劉嘗侍史開府高。丰神艷雅。殊有林下風致。才藝尤度越流輩。閨怨雜劇。爲當時第一手。花旦駕頭。亦臻其妙。始嫁行院王元俏。王死。再嫁焦太素。治中焦沒後。復落樂部。人咸以國香深惜。然尙高潔凝重。尤爲白仁甫李溉之所愛賞云。

國玉第

教坊副使童關高之妻也。長於綠林雜劇。尤善談謔。得名京師。

張玉梅

劉子安之母也。劉之妻曰蠻婆兒。皆擅美當時。其女關關。謂之小婆兒。七八歲已得名湘湖間。

王金帶

姓張氏。行第六。色藝無雙。鄧州王同知娶之生子矣。有謔之於伯顏太師。欲取

入教坊承應。王因一尼爲介。通問於太師之夫人。乃免。

魏道道

勾欄內獨舞鷓鴣四篇打散。自國初以來。無能繼者。妝旦色有不及焉。

玉蓮兒

端麗巧慧。歌舞談諧。悉造其妙。尤善文揪握槊之戲。嘗得侍於英廟。由是名冠京師。

樊事真

京師名妓也。周仲宏參議嬖之。周歸江南。樊飲餞于齊化門外。周曰。別後善自保持。毋貽他人之誚。樊以酒酌地而誓曰。妾若負君。當剗一目以謝君子。亡何有權豪子來。其母既迫於勢。又利其財。樊則始毅然。終不獲已。後周來京師。樊相語曰。別後非不欲保持。卒爲豪勢所逼。昔日之誓。豈徒設哉。乃抽金篦刺左目。血流遍地。周爲之駭然。因歡好如初。好事者編爲雜劇。曰樊事真金篦刺目。行於世。

賽簾秀

朱簾秀之高弟。欠耍俏之妻也。中年雙目。皆無所覩。然其出門入戶。步線行鍼。不差毫髮。有目莫之及焉。聲遏行雲。乃古今絕唱。

天錫秀

姓王氏。侯總管之妻也。善綠林雜劇。足甚小而步武甚壯。女天生秀。稍不逮焉。後有工於是者。賜恩深。謂之邦老趙家。又有張心哥。亦馳名淮浙。

金獸頭

湖廣名妓也。貫只歌平章納之。貫沒。流落湘湖間。酸齋嘗有老鶴啄之諠。

周喜歌

字悅卿。貌不甚揚。而體態溫柔。趙松雪書悅卿二字。鮮于困學衛山齋都廉使公及諸名公皆贈以詞。至今其家寶藏之。

王巧兒

歌舞顏色。稱於京師。陳雲嶠與之狎。王欲嫁之。其母密遣其流輩開喻曰。陳公

之妻。乃鐵太師女。妬悍不可言。爾若歸其家。必遭凌辱矣。王曰。巧兒一賤倡。蒙陳公厚眷。得侍巾櫛。雖死無憾。母知其志。不可奪。潛挈家僻所。陳不知也。旬日後。王密遣人謂陳曰。母氏設計置我某所有富商約某日來。君當圖之。不然恐無及矣。至期商果至。王辭以疾。悲啼宛轉。飲至夜分。商欲就寢。王搯其肌膚。皆損。遂不及亂。既五鼓。陳宿構忽刺罕赤鬪縛商。欲赴刑部處置。商大懼。告陳公曰。某初不知。幸寢其事。願獻錢二百緡。以助財禮之費。陳笑曰。不須也。遂厚遺其母。携王歸江南。陳卒。王與正室鐵皆能守其家業。人多所稱述云。

王奔兒

長於雜劇。然身背微僂。金玉府總管張公置於側室。劉文卿嘗有買得不直之誚。張沒流落江湖。爲教師以終。

時小童

善調話。卽世所謂小說者。如丸走坂。如水建瓴。女童亦有舌辨。嫁末泥度豐年。不能盡母之伎云。

于四姐

字慧卿。尤長琵琶。合唱爲一時之冠。名公士夫皆有詩贈之。後有朱春兒亦得名於淮浙。

平陽奴

姓徐氏。一目眇。四體文繡。精於綠林雜劇。又有郭次香。陳德宣之妻也。亦微眇。一目。韓獸頭。曹皇宣之妻也。亦善雜劇。皆馳名金陵者也。

趙偏惜

樊孝闌奚之妻也。旦末雙全。江淮間多師事之。樊院本亦罕與比。

連枝秀

姓孫氏。京師角妓也。逸人風。高老點化之。遂爲女道士。浪遊湖海間。嘗至松江。引一鬢髻曰閨童。亦能歌舞。有招飲者。酒酣則自起舞。唱青天歌。女童亦舞而和之。眞仙音也。欲於東門外化緣造菴。陸宅之爲造疏語。多寓譏諷。其中有不比尋常鉤子曾經老大鉗槌百煉不同萬夫難敵之句。孫於是飄然入吳。遇醫

人李恕齋。乃往日舊好。遂從俗嫁。之後不知所終。

王玉梅

善唱慢調。雜劇亦精致。身材短小而聲韻清圓。故鍾繼先有聲似磬。圓身如磬。槌之誚云。

李芝秀

賦性聰慧。記雜劇三百餘段。當時旦色號爲廣記者。皆不及也。金玉府張總管置於側室。張沒後。復爲娼。

朱錦繡

侯耍俏之妻也。雜劇旦末雙全。而歌聲墜梁塵。雖姿不逾中人。高藝實超流輩。侯又善院本。時稱負絕藝者。前輩有趙偏惜樊孝蘭溪。後則侯朱也。

樊香歌

金陵名姝也。妙歌舞。善談諠。亦頗涉獵書史。臺端雖鴈角峨峨。悉皆愛賞。士夫造其廬。盡日笑談。惜壽不永。二十三歲而卒。葬南關外。好事者春遊必携酒奠。

其墓。至今率以爲常。

小玉梅

姓劉氏。獨步江浙。其女匾匾姿格嬌冶。資性聰明。能雜劇。號小技。後嫁末泥安。太平常鬱鬱而卒。有女寶寶。亦喚小技梅。藝則不逮其母云。

楊買奴

楊駒兒之女也。美姿容。善謳唱。公卿士夫翕然加愛。性嗜酒。後嫁樂人查查鬼。張四爲妻。憔悴而死。貫酸齋嘗以髻挽青螺裙拖白帶之句譏之。蓋以其有白帶疾也。

張玉蓮

人多呼爲張四媽。舊曲其音不傳者。皆能尋腔依韻唱之。絲竹咸精。蒲博盡解。笑談亶亶。文雅彬彬。南北今詞。卽席成賦。審音知律。時無比焉。往來其門。率多貴公子。積家豐厚。喜延款士夫。復揮金如土。無少吝惜。愛林經歷嘗以側室置之。後再占樂籍。班彥功與之甚狎。班司儒秩滿北上。張作小詞折桂令贈之。末

句云。朝夕思君。泪點成斑。亦自可喜。又有一聯云。側耳聽門前過馬。和泪看簾外飛花。尤爲膾炙人口。有女倩嬌粉兒數人。皆藝殊絕。後以從良散去。余近年見之崑山。年餘六十矣。兩鬢如黛。容色尙潤。風流談謔。不減少年時也。

趙眞眞

馮蠻子之妻也。善雜劇。有遠梁之聲。其女西夏秀。嫁江閨甫。亦得名淮浙間。江親文墨。通史鑑。教坊流輩。咸不逮焉。

李嬌兒

王德名妻也。姿容姝麗。意度閑雅。時人號爲小天然。花旦雜劇特妙。江浙駙馬丞相常眷之。李生辰相君致賀禮。遇公燕則遣以馬腰截。至今歌館以爲盛事。

張奔兒

李牛子之妻也。姿容丰格。妙於一時。善花旦雜劇。時人目奔兒爲溫柔旦。李嬌兒爲風流旦。

龍樓景丹墀秀

皆金門高之女也。俱有姿色。專工南戲。龍則梁塵暗。簫。丹則驪珠宛轉。後有芙蓉秀者。婺州人。戲曲小令。不在二美之下。且能雜劇。尤爲出類拔萃云。

賽天香

李魚頭之妻也。善歌舞。美風度。性嗜潔。玉骨冰肌。纖塵不染。無錫倪元縝有潔病亦甚愛之。則其人可知矣。

翠荷秀

姓李氏。雜劇爲當時所推。自維揚來雲間。石萬戶置之別館。石沒。李誓不他適。終日却掃焚香。誦經。石之子雲壑。萬戶孫伯玉。萬戶歲時往拜之。余見其年已七旬。鬢髮如雪。兩手指甲皆長尺餘焉。

趙梅哥

張有才之妻也。美姿色。善歌舞。名雖高而壽不永。張繼娶和當當。雖貌不揚而藝甚絕。在京師曾接司口奴排場。由是江湖馳名。老而歌調高如貫珠。其女口章能傳母之技云。

陳婆惜

善彈唱。聲遏行雲。然貌微陋而談笑風生。應對如響。省憲大官皆愛重之。在絃索中能彈唱□□曲者。南北十人而已。女觀音奴亦得其彷彿。不能造其妙也。

汪憐憐

湖州角妓。美姿容。善雜劇。湏古伯經歷甚屬意焉。汪曰。若不棄寒微。當以側室處我。湏遂備禮納之。克盡婦道。人無間言。數年湏沒。汪髣髴爲尼。公卿士夫多訪之。汪汨其形。以絕衆之狂念而終身焉。

米里哈

回回旦色。歌喉清宛。妙入神品。貌雖不揚而專工花旦雜劇。余曾識之。名不虛得也。

顧山山

行第四人。以顧四姐呼之。本良家子。因父而俱失身。資性明慧。技藝絕倫。始嫁樂人李小大。李沒。華亭縣長哈刺不花置於側室。凡十二年。後復居樂籍。至今

老於松江。而花旦雜劇。猶少年時體態。後輩且蒙其指教。人多稱賞之。

李芝儀

維揚名妓也。工小唱。尤善慢詞。王繼學中丞甚愛之。贈以詩序。余記其一聯云。善和坊裡。驕驢搆出繡花來。錢塘江邊。燕子銜將春色去。又有塞鴻秋四闋。至今歌館尤傳之。喬夢符亦贈以詩詞甚富。女童童善雜劇。間來松江。後歸維揚。次女多嬌。尤聰慧。今留京口。

李真童

張奔兒之女也。十餘歲。即名動江浙。色藝無比。舉止溫雅。語不傷氣。綽有閨閣風致。達天山檢校浙省。一見遂屬意焉。周旋三歲。一作載達秩滿赴都。且約以明年相會。李遂爲女道士。杜門謝客。日以焚誦爲事。至期達授諸暨州同知而來。備禮取之。後達沒。復爲道士。節行愈勵云。

眞鳳歌

山東名妓也。善小唱。彭庭堅爲沂州同知。確守不亂。眞侍以機辨圓轉。欲求好。

於彭一日大雪。彭會客深夜方散。真託以天寒不回。直造彭室。彭竟不辭。後竟甚密。

大都秀

姓張氏。其友張七樂名黃子醋。善雜劇。其外脚供過亦妙。

喜溫柔

曾九之妻也。姿色端麗。而舉止溫柔。淮浙馳名。老而不衰。江西亦有喜溫柔姓孫氏。其藝則不逮焉。

金鶯兒

山東名姝也。美姿色。善談笑。搗箏合唱。鮮有其比。賈伯堅任山東僉憲。一見屬意焉。與之甚昵。後除西臺御史。不能忘情。作醉高歌紅繡鞋曲以寄之。曰。樂心兒比目連枝。肯意兒新婚燕爾。畫船開。拋閃的人獨自遙望關西店兒。黃河水流不盡心事。中條山隔不斷相思。常記得夜深沉人靜。悄自來時。來時節。三兩句話。去時節。一篇詩。記在人心窩兒裡。直到死。由是臺端知之。被劾而去。至今

山東以爲美談。

一分兒

姓王氏。京師角妓也。歌舞絕倫。聰慧無比。一日丁指揮會才人劉士昌程繼善等於江鄉園小飲。王氏佐樽。時有小姬歌菊花會南呂曲云。紅葉落火龍褪甲。青松枯怪蟒張牙。丁曰。此沉醉東風首句也。王氏可足成之。王應聲曰。紅葉落火龍褪甲。青松枯怪蟒張牙。可詠題。堪描畫。喜觥籌席上交雜。答刺蘇頻斟入禮。廝麻不醉呵。休扶上馬。一座歎賞。由是聲價愈重焉。

般般醜

姓馬。字素卿。善詞翰。達音律。馳名江湖間。時有劉廷信者。南臺御史劉廷翰之族弟。俗呼曰黑劉五。落魄不羈。工於笑談。天性聰慧。至於詞章。信口成句。而街市俚近之談。變用新奇。能道人所不能道者。與馬氏各相聞而未識。一日相遇於道。偕行者曰。二人請相見。曰。此劉五舍也。此卽馬般般醜也。見畢。劉熟視之。曰。名不虛得。馬氏含笑而去。自是往來甚密。所賦樂章極多。至今爲人傳誦。

劉婆惜

樂人李四之妻也。與江右楊春秀同時。頗通文墨。滑稽善舞。迥出其流。時貴多重之。先與撫州常推官之子三舍者交好。苦其夫間阻。一日偕宵遁。事覺。決杖。劉負愧。將之廣海居焉。道經贛州。時有全普菴撥里字子仁。由禮部尚書。值天下多故。選用除贛州監郡。平日守官清廉。文章政事。敷歷臺省。但未免耽於酒色。每日公餘。即與七夫酣飲賦詩。帽上常喜簪花。否則或果或葉。亦簪一枝。一日劉之廣海。過贛謁全公。全曰。刑餘之婦。無足與也。劉謂閹者曰。家欲之。廣海誓不復還。久聞尚書清譽。獲一見而逝。死無憾也。全哀其志而與進焉。時賓朋滿座。全帽上簪青梅一枝。行酒。全口占清江引曲云。青青子兒枝上結。令賓朋續之。衆未有對者。劉歛衽進前曰。能容妾一辭乎。全曰。可。劉應聲曰。青青子兒枝上結。引惹人攀折。其中全子仁。就裏滋味別。只爲你酸留意兒難棄舍。全大稱賞。由是顧寵無間。納爲側室。後兵興。全死節。劉克守婦道。善終於家。

小春宴

姓張氏。自武昌來浙西。天性聰慧。記性最高。勾欄中作場。常寫其名目。貼於四周。遭梁上。任看官。選揀需索。近世廣記者。少有其比。

孫秀秀

都下小旦色也。名公巨卿多愛重之。京師諺曰。人間孫秀秀。天上鬼婆婆。

事事宜

姓劉氏。姿色歌舞悉妙。其夫玳瑁。歛其叔象牛頭。皆副淨色。浙西馳名。

簾前秀

末泥任國恩之妻也。雜劇甚妙。武昌湖南等處。多敬愛之。

燕山景

田眼睛光妻也。夫婦樂藝皆妙。

燕山秀

姓李氏。其夫馬二。名黑駒頭。朱簾秀之高第。旦末雙全。雜劇無比。

荆堅堅

善唱工於花旦。雜劇人呼爲小順時秀。

孔千金

善撥阮。能曼詞。獨步於時。其兒婦王心奇。善花旦。雜劇尤妙。

李定奴

歌喉宛轉。善雜劇。勾欄中曾唱八聲甘州。喝采八聲。其夫帽兒王。雜劇亦妙。凡妓以墨點破其面者。爲花旦。

羅春伯聞見錄載陳子翁題蔡奴像曰。觀全盛時風塵中人物。尙如此嗚呼。盛哉。余於青樓集不能無感云爾。至正丙午夏五月。郡人夏邦彥書于風月樓中。

卷二

五

集

麗情集

宋 張君房

浣沙桂子

霍小玉侍兒之名。

遣策郎

鄭生過李妓宅。見娃徘徊不能去。詐遣以駐馬。後訪自呼曰。前遣策郎也。

卷中人

唐裴散中爲察官。奉使蒲中。與崔徽相從。散中回。徽以不得從爲恨。久之成疾。自寫其眞以寄裴。曰。崔徽一旦不如卷中人矣。

寄淚

灼灼錦城官中奴。御史裴質與之善。裴召還。灼灼每遣人以軟紅絹聚紅淚爲寄。

環者還也

崔郎寄張生信有玉指環云。環者還也。

燕子樓集

盼盼徐之名倡。張建封納之于燕子樓。張卒。盼盼思之。問者輒答以詩。僅三百篇。名燕子樓集。

秋雲羅帕

賈知微曾城夫人杜蘭香既別。贈賈秋雲羅帕。裏丹五十粒云。此羅是玉女繅玉蠶繭以織成。

沈翹翹

文宗時宮人有白玉方響。以犀爲椎。以紫檀爲架。後出歸秦氏。秦出翹製曲。以寄之。名曰憶秦郎。

非煙

咸通中武公妓也。善擊甌。其隣趙象窺見。因門媼以玉葉牋題詩寄之。非煙以連蟬錦香囊并碧花牋贈象以通其意。

薛瓊瓊

開元中第一等手。中官楊羔潛還。崔懷寶飲羔薰香酒曰。此以春草所造。羔令崔作詞。方得見瓊瓊。崔曰。平生無所願。願作樂中箏。近得佳人纖手子。研羅裙上放嬌聲。

柳枝娘

洛中里孃也。聞誦義山燕臺詩。乃折柳結帶。贈義山乞詩。

香兒

元載妾薛瓊英。幼以香雜飲食啖之。長而肌香。

卷二

五

集

荻樓雜抄

闕名

張香橋昔有女子名香。與所歡會此故名。一曰女子姓張名香。

煬帝時洛陽獻合帶迎輦花。帝令袁寶兒持之。號司花女。

魏夫人有弟子善種花。謂之花姑。

眞宗宴近臣。語及莊子。忽命呼秋水。至則翠鬟綠衣小女童也。

姚月華筆札之暇。時及丹青。花卉翎毛。世所鮮及。然用以自娛。人不可得而見。

賞爲楊達畫芙蓉匹鳥。約略濃淡。生態逼真。

長安士女遊春野步。遇名花則設席籍草。以紅裙遞相揜掛爲宴幄。

揚州太守圃中有杏花數十株。每至爛開。張大宴。一株令一妓倚其傍。立館曰

爭春。宴罷夜闌。人云花有歎聲。

姑臧太守張憲代書札伎墨娥。

趙魏公夫人管道昇善書畫。吾竹房嘗題其所畫竹石。竹房有一私印。是好嬉
子三字。卽以此印倒用於跋尾。人皆以爲竹房之誤。魏公見之曰。此非誤也。這

瞎子道婦人會作畫倒好嬉子。

琵琶錄

唐 段安節

琵琶法三才。象四時。風俗通云。琵琶近代樂家作。不知所起。長三尺五寸。法天地人五行。四絃象四時。釋名琵琶。本胡中馬上所鼓。吹手前曰琵琶。引手却曰琵琶。因以爲名。漢遺烏孫公主入蕃。念其行速思慕本朝。使知名者馬上奏琵琶以憫悅之。琵琶有直項曲項者。蓋便於關軸也。樂錄云。琵琶本出於絃鼗。而杜摯以爲秦之末世。苦於長城之役。百姓絃鼗而鼓之。古曲陌上桑間。范曄石苞。謝變孫放孔偉阮咸。皆善此樂。東晉謝鎮西在大市樓上彈琵琶。作大道之曲。世說云。謝仁祖在北牖下彈琵琶。有天際之意。又朱生善彈琵琶。至大官。貞觀中。裴賂兒彈琵琶。始廢撥用手。今所謂搗琵琶是也。白秀真使蜀便回。得琵琶以獻。以遼遼檀爲槽。其木溫潤如玉。光采可鑒。金縷之虹。又蹙之成雙鳳。貴妃每奏於梨園。音韻淒清。飄若雪外。開元中。梨園則有駱供奉。賀懷智。雷海清。其樂器或以石爲槽。鵝鷄筋作絃。用鐵撥彈之。安史之亂。流落外地。

有舉子曰白秀才。子弟寓止京師。偶值宮娃內弟子出在民間。白卽納一妓爲跨驢之樂。因夜風清月朗。是麗人忽唱新聲。白驚遂不復唱。逾年因遊靈武。李靈曜尙書廣設筵。白預坐末。廣張妓樂。至有唱何滿子者。四坐傾聽。俱稱絕妙。白曰。某有伎人聲調殊異於此。促召至。短髻薄粧。態度閒雅。發問曰。適唱何曲。曰。何滿子。遂品調舉袂發聲。清響激越。諸樂不能逐。部中亦有回琵琶。聲韻高下。然揭菴郎指無差。遂問曰。莫是宮中口二否。伎復問曰。莫是梨園駱供奉否。二人相對。汎瀾欬歔而已。

建中中有康崑崙稱第一手。始遇長安大旱。詔兩市祈雨。及至天門街。市人廣較勝負。及鬪聲樂東街。則有康崑崙琵琶最上。必謂街西無敵也。遂請崑崙登綵樓彈一曲。新翻謂錄安。

以爲名悞
稱大腰

至街西。豪俠閱樂。東市稍誚之。而亦於綵

樓上出女郎抱樂器。先云我亦彈是曲。兼移於風香調中。及撥聲如雷。其妙絕入神。崑崙驚愕。乃拜爲師。女郎遂更衣出見。乃僧也。莊儼寺僧。本俗姓段也。翌日德宗召入內。令教授崑崙。段師奏曰。請令彈一調。及彈。師曰。本領何雜。兼帶

邪聲。崑崙驚曰。師神人也。臣少年初掌藝時。側於隣家女巫處。授一品絃調。後乃累易數師之藝。今段師精識如此。玄妙也。段師奏曰。且遣崑崙不近樂器十年。候忘其本態。然後可教。許之後。果盡段師之藝也。

元和中。有王芬。曹保之子。善才。其孫習納。皆精此藝。次有裝興。奴與曹同時。納善運撥。若風雨。然不事捏絃。興奴則善於攏撚。指撥稍軟。時人謂納右有手。興奴左有手。

武宗初。朱崖李白太尉有樂人廉郊者。師於曹綱。盡綱之能。嘗謂其流云。教授人多矣。未嘗有此惺靈弟子也。郊嘗詣平原。別於池上彈琵琶調。忽有一片方鐵躍出。有識者謂是琵琶鐵也。蓋是指撥精妙。律呂相應耳。

安節門下有樂吏楊志善。能琵琶。其姑尤更妙絕。本宣徽弟子。後出宮於永穆觀中住。自惜其藝。常畏人聞。每至夜深方彈。志善懇求教授。終不允。且曰。吾藝死不傳人。楊乃賂其觀主。求寄宿於觀。竊聽姑彈弄。仍以自繫脂皮鞢帶。以指畫帶。記其節奏。遂得一兩曲調。明日詣姑彈之。姑大驚異。楊即實陳其事。姑意

方回。乃盡傳之。

文宗朝有內人鄭中丞。中丞當時宮人官也善胡琴。內庫有琵琶二號大小忽雷。因爲題

頭脫損。送在崇仁坊南趙家料理。大約造樂器悉在此坊。其中有趙二家最妙。時權相舊吏梁厚本有別墅。在照應縣之西南。西臨御河。垂釣之際。忽一物流過。長七尺許。上以錦纏之。令家童接得就岸。乃秘器也。及發。開視之。乃一女郎。容色儼然。以羅巾繫其頸。遂解其領巾。伺之。口鼻尚有餘息。卽移入室中。將養經旬。方能言語。云我內弟子鄭中丞也。昨因忤旨。令內人縊殺。投於河中。錦卽是弟子臨刑相贈爾。及如故。卽垂汨感謝。厚本本無妻。卽納爲室。自言善琵琶。其琵琶今在南趙家料理。恰值訓注之事。人莫有知者。厚本因賂其樂器匠購得之。至夜分方敢輕彈。後值良辰。飲于花下。酒酣不覺。卽彈數曲。是時有黃門放鶴。私于牆外聽之。曰。此是鄭中丞琵琶聲也。竊窺之。翌日達上。聽。文宗始嘗追悔。至是驚喜。遣中使宣詔問其由來。乃赦厚本罪。任從匹偶。仍加錫賚焉。

戚通中有米和。

卽米萊加字也。父喜唱歌。

由從道尤妙。後有王連兒。

連兒名金兩。

魏王花木志

闕名

思惟

思惟樹。漢時有道人自西域持具多子。植於嵩之西峯下。後極高大。有四樹。樹一年三花。

紫菜

吳郡邊海諸山。悉生紫菜。

木蓮

木蓮葉似辛夷。花類蓮。

山茶

山茶似海石榴。出桂州。

溪蓀

溪蓀如高梁薑。生水中。出茆山。

朱槿

重臺朱槿似桑。南中呼爲桑槿。

蓴根

蓴根羹之絕美。江東謂之蓴龜。

孟娘菜

江淮有孟娘菜。並益肉食。

牡桂

牡桂葉大如苦竹葉。葉中一脉如筆跡。

黃辛夷

衛公平泉莊有黃辛夷。紫丁香。

紫藤花

吳苑生。

鬱樹

鬱樹高五六尺。其實大如李。色赤。食之甘。

盧橘

盧橘。蜀生。有遺客橙。似橘而非。若柚而香。冬夏華實相繼。或如彈丸。或如拳。通歲食之。亦名盧橘。

楮子

南方記楮子如梅實。二月花。七八熟。土人鹽藏之。味辛。出交趾。

石南

石南樹野生。二月花。實如燕子。八月熟。民採取之。曝乾。取皮作魚羹。和之尤美。出九真。

都勾似栢欄木。中出屑如麪。可取爲餌。食如桃榔。

茶葉

茶葉似梔子。可煮爲飲。其老葉謂之茅。葉謂之茗。

卷二

五

集

桂海花木志

宋 范成大

上元紅

上元紅。深紅色。絕似紅木瓜。花不結實。以燈夕前後開。故名。

白鶴花

白鶴花如白鶴。立春開。

南山茶

南山茶葩萼大倍中州者。色微淡。葉柔薄有毛。別自有一種。如中州所出者。

紅荳蔻花

紅荳蔻花叢生。葉瘦如碧蘆。春末發。初開花。先抽一榦。有大籜包之。籜解花見。一穗數十蕊。淡紅鮮妍。如桃杏花色。過重則下垂如葡萄。又如火齊。纓絡及剪綵鸞鳳之狀。此花無實。不與草荳蔻同種。每蕊心有兩瓣相並。詩人託興曰。比目連理云。

泡花

泡花。南人或名柚花。春末開。蕊圓白如大珠。既折則似茶花。氣極清芳。與茉莉素馨相逼。番人采以蒸香。風味超勝。

紅蕉花

紅蕉花。葉瘦類蘆簪。心中抽條。條端發花。葉數層。日折一兩葉。色正紅如榴花。荔子其端各有一點鮮綠。尤可愛。春夏開正。歲寒猶芳。又有一種根出土處特肥飽如膽餅。名膽餅蕉。

枸那花

枸那花。葉瘦長。略似楊柳。夏開淡紅花。一朵數十萼。至秋深猶有之。

史君子花

史君子花。蔓生。作架植之。夏開一簇。一二十葩。輕盈似海棠。

水西花

水西花。葉如萱草。花黃。夏開。

裏梅花

裏梅花。即木槿。有紅白二種。葉似蜀葵。采紅者連葉包裹黃梅。鹽漬暴乾以薦酒。故名玉修花。春夏之交大發花。且實枝頭碩果罅裂。而其旁紅英粲然。併花實折釘盤筵。極可玩。

添色芙蓉花。晨開正白。午後微紅。夜深紅。

側金盞花如小黃葵。葉似槿。歲暮開。與梅同時。

卷二

五

集

楚辭芳草譜

宋 謝翱

江離

江離之草。屈原幼時所先採。蓋自其初度。則固已扈江離辟芷矣。張勃云。江離出臨海縣海水中。正青似亂髮。楚辭之于江離。畦而種之。則非水物。本草蘼蕪一名江離。又云被以江離。揉以蘼蕪。又不應是一物也。

薰草

世以薰草蓋卽薰草。臭如蘼蕪。可以已厲。故古之被除。以此草薰之。因謂之薰草。王逸章句云。茵薰也。今之零陵香。

茵

按王逸云。茵卽薰。司馬云大芝。支遁云。舜華。則王說恐非。七諫云。飲茵若之朝露。卽莊子所謂朝茵者。豈此耶。

蘭

離騷云滋蘭九畹。又云光風轉蕙。汜崇蘭。蘭草大都似澤蘭。其香可着衣帶者。是素問云治之以蘭。除陳氣也。皆槩指香草可見。

蕙

蕙大抵似蘭。皆柔莢。其端作花。蘭一莢一花。蕙一莢五六花。香次于蘭。楚辭蘭每及蕙。畹蘭而畝蕙也。汜蘭而轉蕙也。蕙殺蒸蘭藉也。

杜若

杜若一名杜蘅。苗似山薑。花黃赤。子大如棘。九歌湘君曰采芳洲兮杜若。將以遺兮下女。湘夫人云。搴汀洲兮杜若。將以遺兮遠者。杜若之爲物。令人不忘。搴采而贈之。以明其不相忘也。

菖

楚辭以芳草比君子而言菖者最多。蓋今香白芷也。出近道下濕地。可作面脂。其葉可用沐浴。故曰浴蘭湯兮沐芳。

薜蘿

芎藭之苗葉爲薜蘿似蛇床而香。魏文帝以薜蘿蘭香雜之以薜蘿藏衣中。故少司命曰。秋蘭兮薜蘿。羅生兮堂下。綠葉兮素枝。芳菲菲兮襲予。古詩有云。采薜蘿。

卷施

卷施草拔心不死。江淮間謂之宿莽。說見郭璞贊。故離騷經曰。朝搴阰之木蘭兮。夕攬洲之宿莽。非宿草也。

茱萸

離騷云。薜蘿施以盈室兮。判獨離而不服。皆指惡草。異茱萸之茱。

菊

菊季秋寒露後五日始有華。華得土之正色。離騷夕餐秋菊之落英。觀崔實費長房九日採菊語。則茱萸延齡自古已然。

荃

荃昌蒲也。一名蓀。楚辭曰。數惟蓀之多怒兮。蓀佯聾而不聞。辭言香草皆以喻。

臣唯言蓀者喻君。蓋蓀于藥爲君也。

薜荔

離騷云貫薜荔之落蕊。王逸章句曰。薜荔香草而生藥實也。

款冬

款冬葉似葵而大。叢生。花出根下。十一十二月雪中出花茂悅。郭氏曰。款凍也。故楚辭云。款冬而生兮。凋彼葉柯。

艾

蕭與艾本皆香草。離騷則薄之曰。戶服艾以盈要兮。謂幽蘭其不可佩。然要之庶人所服之蘭蕙則有間矣。

葍

葍葍蒿也。其葉似艾。白色。長數寸。高丈餘。好生水邊。大招云。英酸葍葍。不沾薄只。王逸曰。蒿繁草也。葍香草也。

莎

莎莖葉都似三稜。和香用之。招隱云。青莎雜樹兮。蘋草羅靡。

匏

匏瓠也。可剗以涉水。按楚辭。王褒九懷。稱援匏瓜兮接糧。

蓼

蓼生水澤。楚辭曰。蓼虫不知徙乎葵菜。言蓼辛葵甘。蟲各安其故。不知遷也。

茨

茨蒺藜也。布地蔓生。細葉。子有三角。狀如菱而小。刺人。生道上。按七諫曰。江離棄于窮巷兮。蒺藜蔓乎東廂。

蔞

蔞生水。中實兩角。或四角。一名芰。離騷曰。製芰荷以爲衣兮。集芙蓉以爲裳。蓋芰葉雜選。荷葉博大。有爲衣之象。而芙蓉若可緝者也。

蘋


蘋葉正。四方中拆。如十字。根生水底。葉敷水上。天問曰。靡萍九衢。言其枝葉分

爲衢道。猶今言花五出六出也。

萍

萍無根。浮水而生。楚辭曰。竊哀兮浮萍。汎淫兮無根。





香艷叢書

第五集



HQ
1237
H75
V.19
香艷叢書

五集卷三

瑤臺片玉乙種

花底拾遺集上

江 詒秋珊著

東海黃公輯



粵黎美周花底拾遺新安張山來補之弄筆之暇摘其語之尤香艷者輒填小令一闋

雙調南歌子

春。孰。姊。妹。爲。嫩。蕊。乞。晴。

細。瓣。禁。寒。勒。微。香。帶。雨。封。一。春。芳。事。惜。倥。偬。央。及。東。皇。吹。散。絮。雲。濃。奏。換。章。

書。綠。衣。催。紙。翦。紅。雕。樞。私。祝。共。喁。喁。憐。取。含。苞。豈。蕊。未。經。風。

甘州子

金籠懸鸚鵡作花監

小園無主亂紅歛。邀蝶使。遲鶯兒。綠衣巧舌善言詞。憑管領。遮莫誤芳時。訴衷情。薛濤箋。榜種花事。宜。

桃花一幅費端相。新譜摘羣芳。今年恰喜逢閏。好做箇十三行。愁命薄。惜流光。緩商量。葉閒覓蝨。樹底師陀。都要濃妝。

雙調連理枝 花朝慵病強起

偏是花同命。偏是春朝病況。又今朝。百花生日。教人怎。困。恁。腰。肢。無。力。弱。難。扶。待。如。何。安。頓。淺。跋。弓。鞋。寸。畧。整。蓬。鬆。鬢。怯。怯。風。前。儘。自。支。持。向。春。問。訊。鎮。韶。光。偏。在。病。中。過。怕。簪。花。舞。分。

江城梅花引 花時深閉小閣怕觸香煙

近來肺病怯熏衣。屏相思。卻相思。拚掩窗紗。寂寞度芳時。避了鶯兒兼燕子。留春住。願春還。恨將離。將離將離。莽天涯。夢未癡。魂已癡。夢也夢也。夢未覺。生怕人知。賸有花前嬌喘。一絲絲。香霧那禁。沉速重。簾下也。尙殷勤。問侍兒。

相見歡 碧紗窗下暮疏影作刺繡譜

花枝窗外扶疏。月來初。照出幾枝疏影倩人扶。新花樣。憑誰勑。費描摹。祇是幾行題款。怎生書。

長相思 寒食後寫落花詩寄人

惜殘紅。憶殘紅。閒來覓句咒東風。春歸愁煞儂。

流水西。流水東。花落關心誰

與同。多事情郵筒。

醉太平 佩忘憂草羞人喚作宜男

當人自羞。無人淚流。佳名祇說忘憂。佩萱花並頭。女兒莫愁。生兒阿侯。宜男真箇宜。不奈蕭郎遠游。

愁倚欄令 拈鳳仙染甲彈箏

纖纖弦上春生。調銀甲。猩紅幾星。一曲未成。花亂落。妬煞歌脣。十三行柱分明。恁碎點脂痕。粉痕。莫被桐花。么鳥。覺挂損朱繩。

蝴蝶兒 晏起知有夜雨步出芳階

夜深時。夢兒知。小樓春覺起來遲。悔教花滿枝。苔滑堦生翠。寒添步怯移。已教溼絮厭香低。怎禁風又吹。

生查子 采相思豆

但采合歡花。莫種相思樹。把酒祝東風。誤入相思路。
紅豆縱相思。不向天涯去。采得欲遺誰。怕檀郎妬。

醉花間 踏青拜花田古塚

來花裏。去花裏。願向花間死。春夢幾時醒。一冢土花紫。
湔裙過上已。澆酒酬花使。花魂倘返。香枝發。須連理。

點絳脣 卷繡閣閨蘭

羅幙重重。竟體芳蘭初罷繡。素心冷透。休讓風吹又。
預儲幽香。耐得寒時候。春依舊。晴窗暖晝。尚有梅花瘦。

浣溪沙 折荷花寄藕絲纏臂

未到相憐意已癡。折來佳藕早相思。爲郎續命戲纏絲。
蓄臂香留紅一角。苦心涼蹙翠雙眉。問郎剛道莫相宜。

傷春怨 亂風時一聲嬌怨

已爲花愁落。錦幃留春耽閣。忽地亂紅飛。最恨阿姨情薄。
茵溷隨緣託。一樣。

傷漂泊。恁地咒東風。可消了。心頭惡。

醜奴兒 埽檻外待鄰姬踐約

鄰家姊妹芳年共。祇隔垂楊。邀過東牆。準備花前細評量。
闌干曲曲紅飛遍。掃却苔香。添了鱸香。約畧臺前竟早粧。

散餘霞 七夕懸素心燈乞巧

秋宵瓜果庭前供。莫聘錢浪用。香蕊編箇燈兒。照雙星好夢。
壓閒愁涼重。鵲橋珍重。歸來怕宵深露凍。今宵阿誰巧送。

更漏子 胭脂徑上縱橫小履跡

宿雨霽時紅狼籍。弓弓小印成行。爲因花裏捉迷藏。閒踏碎羣芳。
花徑窄。輦誰量。苔痕綠到鞋幫。溼泥滿徑迹猶香。啣教燕子忙。

憶少年 綠荷池自放鴛鴦

雙雙同宿。雙雙同浴。荷花香裏臨風正。交頸怕蓮歌驚起。
五色低飛毛映水。自調持侍兒休使。多情愛離別。對鴛鴦羞死。

金蕉葉 佇立柳絮風前

梅教開向春前落。而今是隨風飄泊。南北東西。天涯何處。浮生託。不信春情恁薄。驀然往事思量着。枉癡心誤了盟約。看他落向誰邊。儘恨當時錯立損苔堦一角。

憶秦娥 怨枝上啼鶯却惜花不敢驚起

春晝暖。金衣不解春深淺。春深淺。驚回一覺。天涯夢短。啼聲俏壓花枝軟。莫教零亂殘紅點。殘紅點。惱煞春人情。盡不管。

清平樂 闌草濕羅裙

紅閨女伴。不鬪看花眼。芳草多情都入選。那羨謝家鬢剪。佳名也占羣芳。花茵團坐何妨。忽地羅裙濕了一汪兒水。都香。

花底拾遺集中

相思兒令 玉蘭片學寫春詞

句索丁娘豔。花揀辛夷片。自屑。藥丸。吮兔毫。學寫箇鴛鴦。券。細字蠶眠辨。浮向鷗波面。墨未乾時。瓣已乾。生憎一雲春光換。

畫堂春 抱小鼓催花作酒政爲意中人緩急

金尊傳去落誰家。匆匆響歇三摠。意中人隔繡簾。遮險不爭差。手把雙枝重起。拚教斟滿流霞。無情羯鼓有情花。底事欺他。

阮郎歸 插寒梅檀口輕呵

月明輕勾鶴猶醒。重寒偎膽瓶。橫斜位置費沉吟。呵開凍一層。蘭氣息。玉溫存。幽香冷透心。臙脂吹暖活春痕。金閨返斷魂。

錦堂春 觀落紅有悟飯依空王

賸粉零星易散。殘香委地都消。繁華縱好旋零落。魂倩阿誰招。碧海三生不返。朱顏一霎終凋。虛空打破浮生夢。寂寞度芳朝。

朝中措 明月綠陰長歎

雅鋤手把落紅埋。芳草滿天涯。恁是月明春盡。綠陰夜少。人來鶯花易散。空餘翠影。鋪滿苔堦。獨自一聲長歎。誰憐作惡情懷。

醉花陰 消渴吸香露

驚覺一聲春曉夢。酒病宵來重。花露未全消。吸向枝頭。舌底香微送。珍珠幾葉凝脂凍。顫釵頭么鳳。漫道唾花飛。潤到歌喉。涼沁心兒縫。

極相思 侍兒分部司栽灌

名花百種都栽。分咏檢詩牌。花神位置。花奴管領。遞報花開。風雨關心休草草。學分曹御史。齊來經秋怨晚。臨寒待秀。各種安排。

太常引 上秋千飛紅如雨

自攀綵索轉香輪。不脫鬱金裙。裙底扇芳塵。驚起花魂一星。雲堆鴉鬢。風生翠袖。催落雨。續紛到地。却無聲。漫贏得。空堦綠陰。

梁州令 揀古今名姬與花名合編作列傳

花是人兒影。人是名花真本。美人情重合司花。名花誰把人兒並。美人易老。名花損。拈出閒來品。龍門合傳差近。嗤儂費却閒脂粉。

西江月 芙蓉水醺筆自寫春容

雙淚斷紅鏡裏。一燈慘黑窗前。影兒相伴有誰憐。作了曇花一現。醺到芙蓉。香水寫來芍藥芳箋。幾回把筆細端研。他日真真誰喚。

江月晃重山 墮馬急挽垂楊

玉勒嬌嘶芳草。金鈎軟踏香塵。鞭絲無力晚風生。如飛去。一躍賭身輕。弱柳綠搖有影。嬌花紅墮無聲。垂條攀住戰凌兢。粧倭髻。險作墜樓人。

滿宮花 就流紅送老蠶蛾稱是薄倖事

繭水香。縹車巧。桑葉成陰春老。落紅流水送將歸。預祝明年蠶好。花落溶溶波渺渺。別是一般懷抱。負他辛苦繭同功。恁把情絲斷了。

月中行 百花生日約鄰姬共祝

鉤車香伴祀花神。花底弄瑤笙。明朝又道。百花生日。相約拜香塵。春來百種。

芳菲豔。偏賺得百樣漂零。算他薄命總無分。怎說不同庚。

憶故人 自繡梅花帳

門掩黃昏。天寒合入羅浮夢。怕遲明月。鶴猶醒。製就梅花洞。一丈蛟鮪不用。別繡出枝橫影縱。冰心獨抱。翠羽雙棲。寒香供奉。

滴滴金 數花鬢

開時已覺春無賴。玉溪生詩花鬢柳眼各無賴紛垂恁蕤蕤態。指尖拈粉看模糊。怕蹙損眉黛。誤作推敲詩境界。吟成字。莖撚壞。採香等煞。報衙蜂看日高。曬。

怨三三 梧葉落取製爐灰

博山未盡鷓鴣斑。留住香烟。尙覺氤氲觸鼻尖。爐灰薄。要重添。秋風梧葉穿簾已蝕盡青蟲碧。蟬燒却寸心難。經過塵劫。便近旃檀。

竹香子 剪桐葉作弓鞋樣

臨却書兒仍綠。剪作弓鞋樣。曲雙鳧。飛去便封侯。莫笑金蓮蹙。纖纖掌上。一握鳳兒么也。歛香宿。秋風篩影月兒高。正挂半灣素玉。

玉蝴蝶 折柳作同心結

東風軟透腰肢。嬾與妬雙眉。搖蕩一絲絲。同心是幾時。
丁香原有結。折柳試編之。遮莫唱將離。同心遺阿誰。

太平時 洗桐

坐聽秋聲樹底多。應婆娑。生生翠幹幾摩挲。奈塵何。
自汲井華還洗淨。倚衫羅。晚涼一葉鬢邊過。露姁娥。

攤破浣溪沙 紉五色紗囊貯花種

仙露曾收掌上珠。綵囊重自剪羅襦。珍重花前親採擷。貯來無。
佳種分收香篤耨。芳名合寫句珊瑚。不繫胸前懸肘後。笑奚奴。

清商怨 擲花蕊賺金魚

池水風吹欲皺。看纖鱗春晝。嫩蕊初開。戲將春意逗。
細沫珍珠吹就。誤唼啞。濺溼衫兒袖。驚散苔痕。深深潛碧溜。

捉拍醜奴兒 燈下位置花影

對影夜嫌孤。翦取花枝作畫圖。疏疏密密窻前態。玉瓶微動。金缸緩剔。煞費躊躇。坐久怕模糊。挹蘭膏。自下金鋪。夜深未忍拋離去。輕移寶帳。金鈎不下。夢裏相扶。

華清引 噴水潤薜苔

半憎綠影上空庭。不長苔痕。自將春水澆遍。應從灑處生。連朝花事缺春陰。幾枝憔悴芳魂。管教堦下立。濕翠上衣襟。

花底拾遺下

黎張二公所撰得詞若干闋。覺有未備。爰復廣爲搜討。取見之記載者。復得詞若干闋。

望江東 觀浮萍羨楊花再世

無奈隨風作飛絮。已覺是今生誤。來生知否在何處。可有箇來生路。浮蹤特也無憑據。勝化作朝來露。芳菲零落總無數。問誰向來生遇。

入塞 夜聽芭蕉葉上雨

夜初涼。忽瀟瀟打紙窗。奈窗前葉葉。不管攪愁腸。袞一方。帕一方。一燈聽時坐也妨。倚枕兒睡。損海棠。綠陰不合種成行。愁又長。漏又長。

雙雁兒 簪桃花銷恨

春來閒事總相兜。千萬種滿心頭。落花飛去祇添愁。奈雲鬢。妬溫柔。一溪春水碧如油。把舊恨付東流。門前休倚莫登樓。去年人似舊不。

傾盃令 枇杷花裏閉門

暖閣薰愁。重簾膠影。門閉深深寒晝。筆底凍雲呵透。枝上梅魂猶瘦。模糊三徑苔封就。自圍爐蕭閒時候。春風管領誰識。自抱琵琶僂僂。

紅窗睡 燒紅燭照海棠睡起

最好惺忪春意態。怕禁寒花魂涼。壞無端。永夜空垂淚。是春心無賴。嬌夢初回。愁壓黛。相伴向紅閨深處。無人境界。一枝蜂蠟看影兒都愛。

東坡引 將離贈勺藥

春來春又去。那得常相遇。郎心本是無憑據。送郎花下路。送郎花下路。離愁別恨。天涯何處。花不語。情難訴。一聲珍重休分付。留郎真箇誤。留郎真箇誤。

於中好 薔薇露盥手誦郎詩

吟成佳句教儂和。傍妝臺粉沾脂澆。薰香祇是閒功課。舌未誦。香生唾。盥來仍向花前坐。算仙露。仙才真箇。嬌音流處聲無那。似花底吹笙過。

臨江仙 贈同心人梔子

眼角眉梢暗度。未言已結同心。衆中私語不分明。一枝花遞與。兩意莫沉吟。

未展芭蕉心一寸。休將肥瘦閒評。須知潔淨此花身。浪同松柏下。油碧待西冷。

杏花天

穀雨前採茶

清明過卻春深了。展旗槍碧痕尙早。嫩牙初摘纖纖爪。宿露五更猶飽。聽一路和歌聲繞。貯紅丁甕須封好。梅花積雪曾親掃。看取松烟嫋嫋。

惜分釵

對菱花鏡

深閨面。無人見。菱花自認空中豔。鏡中顏。阿誰憐。花底相逢。不似從前年。年。鬢雲亂。啼妝換。新來怕作離魂倩。儘無言。淚如泉。盡日臨粧。愁損香奩。慙慙。

鷓鴣天

留得枯荷聽雨聲

翠蓋亭亭未忍刪。空房墮粉莫思蓮。縱然憔悴金莖露。猶有秋聲到耳邊。空。悵望。憶田田。鴛鴦驚起一雙眠。愁人慣聽淒涼響。祇待瀟瀟暮雨天。

思帝鄉

香桃如瘦骨

人已非。落紅誰得知。漂泊與他同命。綠先肥。玉骨自憐一把怯。風吹。莫被垂楊。覺妬腰肢。

杏園芳 吹葉嚼蕊

不聞絲竹飛聲。祇疑天籟生成。采花擷葉避傍人。口生春。
抑揚莫漫猜簫管。聽來格外淒清。模糊香氣已消魂。況分明。

鳳啣杯 病容扶起種菱絲

秋來留取鏡兒看。步淩波先怯宵寒。況是新愁撩亂。意闌珊。已辜卻藕花殘。
強支起。尙憑欄。攪香泥一碧灣環。臨水無端照出瘦容顏。生被病纏綿。

長命女 手牽苔絮長蕤花

蕤絲瘦。浮萍綠。向方塘繡。湘波搖處皺。蒙茸翠縷粘衫袖。秋時候。風起水蘋香。
歸心郎暗逗。

小重山 鬢濕杏花烟

二月江南春雨晴。看花人早起。徑縱橫。髻鬟偏處。眉飛英。香霧散。猶自不分明。
樹樹有啼鶯。小樓殘夢。昨宵誤聽行來。緩緩可憐生。蟬翼重添潤。入脂痕。

琴調相思引 王鵬汲水桐花井

一院西風落葉低。每將玉虎自牽絲。輾輾頻轉。怕有斷腸時。郎信銀餅傷久。墮妾心。古井復誰知。綠幺小鳥底。事向人啼。

河滿子下塔自折櫻桃花

惱煞玉窗頻見。妝成不語沉吟。莫被蕭郎錯愛。更無樊素知音。緩步拘來一朵。渾疑髮不勝簪。

眉峯碧天寒袖倚修竹

那得薰香坐。又斜陽墮。婢子牽蘿補屋難。偏颯颯霜風大。冷色壓珠顆。寒意欺爐火。除卻脩脩竹。斲竿零丁祇有淒涼我。

唐多令簾捲西風人比黃花瘦

秋鬢怯蓬鬆。秋花冷處濃。透簾櫳幾陣西風。纔上輕衫涼到骨。驚暗裏。換秋容。花影澹于儂。花魂傲不同。卷真珠問訊籬東。試取尊前憔悴態。花較與。阿誰工。

虞美人摘葉餞蠶

和薰送暖香堪浴。嫩葉宵添足。初眠未到且從容。辛苦何時博得繭同功。
來綠淨揩塵網。試聽揮毫響。饑時添換飽宜防。棟花風過休透一絲涼。

選

王翠翹傳

莆田余懷澹心著

余讀吳越春秋。觀西施沼吳。而又從范蠡以歸於湖。竊謂婦人受人之託。以艷色亡人之國。而不以死殉之。雖不負心。亦負恩矣。若王翠翹之於徐海。則公私兼盡。亦異於西施者哉。嗟乎。翠翹故娼家。辱人賤行。而所爲耿耿若此。鬚眉男子。媿之多矣。余故悲其志。綴次其行事。以爲之傳。傳曰。

王翠翹。臨淄人。幼鬻於倡。冒姓馬。假母呼爲翹兒。美姿首。性聰慧。携來江南。教之吳歛歌。教之彈胡琵琶。則善彈胡琵琶。吹簫度曲。音吐清越。執板揚聲。往往傾其座客。平康里中。翹兒名藉甚。然翹兒雅淡。顧沾沾自喜。頗不工塗抹倚門術。遇大腹賈。及僧父之多金者。則目笑之。不予一盼。睽溫語。以是假母日忿而笞罵。會有少年私翹兒金者。以計脫假母。而自徙居嘉興。更名王翠翹。云當是時。歙人羅龍文。饒於財。游俠自喜。與翠翹交驩最久。兼睚小妓綠珠。而越人徐海者。狡佻無賴。方爲博徒所窘。獨身跳翠翹家。伏匿不敢晝見人。龍文故喜壯

士。傾身結友。與海一見如故。接臂痛飲。推所暱綠珠與之薦寢。海亦不辭。酒酣耳熱。攘袂持杯。附龍文耳語曰。此一片土。非吾輩得意場。丈夫安得鬱鬱久居人下乎。公宜努力。吾亦從此逝矣。他日苟富貴。毋相忘。因慷慨悲歌。居數日別去。徐海者。杭之虎跑寺僧。所謂明山和尚者是也。居無何。海入倭爲舶主。擁雄兵海上。數侵江南。嘉靖三十五年。圍巡撫阮鶚於桐鄉。翠翹綠珠皆被擄。海一見驚喜。命翠翹彈胡琵琶以佐酒。日益寵幸。號爲夫人。斥諸姬羅拜。翠翹旣已寵愛無比。凡軍機密畫。惟翠翹與聞。乃翠翹陽爲親暱。陰實幸其覆敗。冀歸國以老。淚漬漬常承睫洗面也。會總督胡宗憲開府浙江。善用兵。多計策。欲招致徐海。使戕麻葉陳東。而離散王直之黨。迺遣華老人賁檄招降。海怒縛華老人將斬之。翠翹語海曰。今日之事。生殺在君。降不降無與來使。海乃釋其縛。畀金而遣之。老人歸告宗憲曰。賊氣方銳。未可圖也。然臣睨海所幸王夫人者。左右視有外心。或可藉以殲賊耳。而羅龍文者。微聞是語。自喜與翠翹舊好。乃因幕府上客山陰徐渭以見於宗憲。宗憲以鄉曲故。降階迎揖曰。生亦有意功名富

貴平。吾今用君矣。與語大悅。遂受指詣海營。攝舊日任俠衣冠。投刺謁海。海亟延入。坐上座。置酒握龍文手。曰。足下遠涉江湖。爲胡公作說客耶。龍文笑曰。非爲胡公作說客。乃爲故人作忠臣耳。王直已遣子納欵。故人不乘此時解釋甲兵。他日必且爲虜。海愕然曰。姑置之。且與故人飲酒。錦繡音樂。備極豪侈。倜然自以爲大丈夫。得志於時之所爲也。酒半。出王夫人及綠珠者見龍文。龍文改容禮之。竟宴語不及私。翠翹素習龍文豪俠。則勸海遣人同詣督府輸款。解桐鄉圍。宗憲喜。從龍文計。益市金珠寶玉。陰賂翠翹。翠翹益心動。日夜說海降矣。海信之。於是定計縛麻葉。縛陳東。約降於宗憲。至桐鄉城。甲冑而入。是時趙文華。阮鶚。與宗憲列坐堂。皇海叩首謝罪。又謝宗憲。宗憲下堂摩其頂曰。朝廷今赦汝。汝勿復反。厚勞而出。海旣出。見官兵大集。頗自疑。宗憲猶憐海。不欲殺降。而文華迫之。宗憲乃下令。命總兵俞大猷。整師而進。會大風縱火。諸軍鼓譟乘之。賊大潰。殲焉。海倉皇投水引出。斬其首。而生致翠翹於軍門。宗憲大饗參佐。命翠翹歌吳歎歌。遍行酒。諸參佐或膝席。或起舞。捧觴爲宗憲壽。宗憲被酒大

醉。簪。亂。亦。橫。槩。郭。袖。與。翹。兒。戲。席。亂。罷。酒。次。日。宗。憲。頗。媿。悔。醉。時。事。而。以。翠。翹。賜。所。謂。永。順。酋。長。翠。翹。既。隨。永。順。酋。長。去。之。錢。唐。江。中。恒。悵。悵。搥。牀。歎。曰。明。山。遇。我。厚。我。以。國。事。誘。殺。之。斃。一。酋。又。屬。一。酋。吾。何。面。目。生。乎。向。江。潮。長。號。大。慟。投。水。死。

外。史。氏。曰。嗟。乎。翠。翹。以。一。死。報。徐。海。其。志。亦。可。哀。也。羅。龍。文。者。世。稱。小。華。道。人。善。製。烟。墨。者。也。始。以。游。說。陰。賂。翠。翹。誘。致。徐。海。休。兵。可。謂。智。士。然。其。後。依。附。權。勢。與。嚴。世。蕃。同。斬。西。市。則。視。翠。翹。之。死。猶。鴻。毛。之。於。泰。山。也。人。當。自。重。其。死。彼。倡。且。知。之。况。士。大。夫。乎。乃。倡。且。知。之。而。士。大。夫。反。不。知。者。何。也。悲。夫。

張。山。來。曰。胡。公。之。於。翠。翹。不。以。賜。小。華。而。以。賜。酋。長。誠。何。心。乎。觀。翠。翹。生。致。之。後。不。能。卽。死。居。然。行。酒。於。諸。參。佐。前。其。意。有。所。屬。從。可。知。已。其。投。江。潮。以。死。當。非。報。明。山。也。

擬合德諫飛燕書有序

延陵吳從先著

成帝既傾心合德。日遠正宮。飛燕輒命宮人。召輕薄少年。載以繡輦。淫酒無度。合德憂不測。日夜惶恐。上書諫。

婕妤臣合德。致書皇后姊陛下。臣聞日以陽德。月以陰德。升墜之間。天地晦明。故皇后父事天。母事地。兄事日。姊事月。晦蝕之際。后避宮。減讌樂。濯心磨神。以示失德。而坤象改纏。古今以來。影響不僭。勿謂深宮。何異大廷。勿謂長夜。如月之明。勿謂玉石火焚。而焜母儀。天下后德。惟人臣竊見。帝堯試舜。俾之皇英。後宮作式。萬國玉帛。垂裳拱手。而天下以清。朝覲時巡。風移俗改。實賴贊襄。于二女臣伏思賤時。合絮擁背。姊妹形影。即或雪夜。獨出花陰。久冷。臣惟含息待命。不敢私有指擬。何也。以身之託者。輕也。及召見別宮。試之錦帳。臣之驚怖。震髓震心。而竟有三日之愛。迨于流丹。雖帝之儉姊。甚而臣之戴天深。此時知陛下乃天授。非復人間血肉也。後宮寵眷。篤厚彌年。貴爲皇后矣。人主之心。何常專。

定。能。無。外。幸。而。皇。后。不。鄙。臣。陋。重。錫。珍。寶。持。節。召。入。豈。期。皇。帝。比。翼。比。目。卜。晝。卜。夜。且。逸。萬。幾。以。慰。深。宮。臣。非。不。時。勤。帝。念。勸。進。后。宮。而。帝。意。未。解。終。見。遲。留。然。臣。之。心。有。如。日。者。近。聽。赤。鳳。之。歌。卿。雲。之。舞。卽。陛。下。能。自。爲。樂。而。臣。之。深。心。婉。曲。憂。死。誠。恐。他。人。乘。其。間。言。故。臣。從。容。于。皇。帝。曰。貴。人。姊。性。至。妬。且。善。虐。萬。一。天。有。所。不。聰。臣。之。骨。亦。粉。矣。及。皇。帝。親。以。日。盟。而。臣。之。怔。忡。稍。定。夫。豈。薄。于。陛。下。哉。第。臣。之。顏。未。能。久。住。臣。之。愛。豈。得。長。居。天。威。罔。諶。逆。鱗。倘。銖。臣。有。疎。辱。伺。臣。隙。者。借。以。投。奸。斯。何。日。也。臣。願。陛。下。數。二。女。之。聖。全。兄。妹。之。懽。翻。然。一。新。勃。然。自。艾。允。孚。有。終。不。使。九。嶷。專。美。斑。竹。徒。聞。臣。德。幸。甚。

金小品傳

延陵吳從先著

寓內之交何梅臣者。咸曰。貯一龍陽君於琉璃屏中。令梅臣摸索。可得其心矣。然而事有不盡然者。露花夕月。猶銷南國之魂。玉蝶畫梅。未醒西樓之夢。焉有翡翠橫肩。援琴合膝。而能兀焉自立者也。武林金小品者。媚挹掌珠。詩裁薄倖。長支雞骨。身弱反飄。名著譜中。多恨風流無主。神飛區外。誰言湖色可憐。有探之者。咄嗟而已。秦樓住吹簫之侶。時號劉卿。六橋放採蓮之舟。自呼小品。偶從片石竊窺。鹿苑霞花。豈意何郎已發中元真誥。計隱初陽。不干一事。息心丹枕。薄彼三秋。澹泊以明得意。卽椎髻而前。守約以示無求。當淒清逾樂。何期西風鍛大鵬之翮。郎有乖張。而南山習比翼之飛。伊無損異。廣陵濤橫。潑湖湄耳。食神仙可就。野狐子糾。焚暗室口。稱兒女何常。賂其里戚。兼賂從事。驅彼戎車。且驅茵褥。固詭奇而曲致。耐色變而難搖。雖奪之金夫而射之石虎。腸堅過男子。志潔擬秋霜。豈知殺人之毀屢來。則投杼者至。而售璞之泣逾亂。則孽心潛萌。

令。好。修。之。女。怨。士。德。之。不。長。而。鑠。金。之。奸。快。計。成。之。能。徙。沉。寃。霜。同。於。六。月。輕。
薄。恨。積。於。三。年。藉。非。兪。生。有。舌。則。玉。之。自。焚。也。向。令。吳。子。無。腸。將。璧。之。終。碎。乎。
踵。小。品。而。起。者。南。屏。有。當。壚。之。文。君。金。陵。與。眞。州。有。愛。才。之。小。玉。况。又。有。不。盡。
知。者。乎。何。龍。陽。之。能。牢。籠。梅。臣。也。嘲。分。紅。袖。香。映。青。樓。

徐郎小傳

延陵吳從先著

自天上降石麒麟而徐家兒郎相者多取骨勝若轉英異之骨而白面疑若平叔者則今日之徐芳是芳固吳兒父以負犇白門因依常侍爲命常侍從來以聲歌爲生平樂以紫綉富錦隊遂置芳於屏後五色衣充部芳獨驚其艷壓諸兒無不似飄風之葉者好事輩亦因其艷爭艷之誰謂海棠之無香也仙郎五如常互爲媼妍笑無定情於午夜令余從紫氍毹窺之神乎影乎不可端倪爲笑爲嘖幾易面目歌舞之場情態固多變而此則於情態外自爲情態不可知也矧可度也夫態至於不可知不可度卽鬼神亦不必究且曰白面兒乎彼自且不能知不能度安得不令諸兒步趨其韵乎仙郎五如又何必求定情乎余正作前魚論而忽得此節固知若輩之鍾情者正在泣中之乞憐而釀無窮之情與態也噫石麟其灰乎天何不惜而漫爲此錫乎雖然天下事盡如戲場小兒若輩則又戲中作戲矣又何論哉

卷三

五

集

頓子眞小傳

延陵吳從先著

頓子眞名淑行五。秦淮女子。時秦淮頓氏典教坊。故多女子充樂部。脂粉剩水。可膩桃葉之波。錦隊花間。五色重影焉。觀樂者多物色小五。名遂獨豔。然素心自照。不願以色事人。惟寤寐才士。曰長沙妓遇少游。不難以身殉也。相士二年而得鄒生。謂鄒生爲定情矣。謀贖蛾眉。自以金藉。鄒固浪於錦琵琶隊中。貽知己羞。致教坊辱子眞者不置。反而求之。不得於心。乃以死償。遂投之池。閣以自溺。聞者憐而吊之。爲情死之慘。曲中至奇。嗚呼噫嘻。此快事也。屈原死。忠。曹娥死。孝。子眞死。癡。夫人得其情。則生不得其情。則死。至於情死。情而性。癡而眞。死忠。死孝。同念也。青樓女郎。紛於情。而子眞惟一。非不以情死。而子眞必思而終。千古一情。安得不以二情者所敵。故一死不獨愧紛於情者。而二情者不知何。以生子眞之情自得也。故足快也。嗚呼。水國有春龍女。爲儷。菱花開鏡。荇帶牽衣。不爲青泥之蓮花。則爲飄風之萍梗。濯錦鴛鴦。又不堪相對以往也。因以悲。

喜兩念紀之短言。若其微曲。有詞人諸傳在。予不贅。

妓虎傳

延陵吳從先著

鄴下以文章哮吼。人人目之爲繡虎。散關以氣力呼吸。人人目之爲癡虎。千古豪名。史冊著異。有劉秦生者。注名秦淮。私嘗曰。金陵風流。六艷六燼。不願久居此。當在山水間。與清風明月。博一笑耳。遂流寓虎林。居秦樓焉。不事膏沐。不彫幃幕。率意任情。或嘯歌。或瞑目坐。或狂跳。或親擊櫓中流。或居山頂茆棘中。浪飛鵬逝。不易踪跡也。美少年曙就者。見清譚。鋒立輒戢。景去矣。惟江都遺民。詩才酒興。稱敵手也。一時洽應者。武林有何仙郎。王晉公。卓左車。平湖有俞僧密。稍未見屈。時虎林虎逸出。行人歛跡。秦生獨以得聞虎嘯爲快。移居葛嶺之巔。就大樹密篠中。始洋洋意得也。一日折柬諸名勝。施供具。一殼覆醺。塊色非常。客相覲。秦生一手舉箸。一手持杯。大叫食虎肉。客衆胆落。而秦生已食盡矣。適潘子木自新安至。仙郎觴之。秦生之居。秦生席大樹下。樹有五色薔薇。羅纏樹末。青條倒飛。花片風吐。鋪叙几案。粲如列錦。秦生輒滿席置杯。命行酒。約客各

識花色。以花浸爲政。於是子木盡歡。日以繼夜。曰生平第一豪飲也。客歲遊姑蘇。有生某。來自淮上。慕秦生之風而謁之。秦生亦當意。置酒高會如平原。然秦生已知某爲所親來。行李貲酒。不辨卽往。秦生一日祖道而遣。某辭以他故。秦生呵之曰。丈夫作兒女態耶。亟去。毋戀我。某以爲賣己也。強行焉。及去而探其篋。凡所供用。靡不畢具。某心德之。盟諸獨已。比所親以二十萬緡贈某。遽持至。酬秦生。秦生意其必報。分其半。悉召平日知己。及有詩酒才者。偕集。豪呼痛飲。碎千金而立贈之。潛歸虎林。囊無儲物。嗟乎。古今人情。見富貴則狎。睚之貧窮。不擠亦已厚矣。乃能揮金不顧。不以貌取。赤幘自岸。旁若無人。真有吞吐之胸次。其繡虎耶。癡虎耶。甯野目之曰妓虎。

香本紀有序

延陵吳祿先著

若夫使君勞南陌之車。煙雲遍野。韓壽醒東樓之夢。薄倖彌天。遂使異種沉淪於絕域。仙踪遺老于飛巖。無論目所未經。良亦耳不期食。覓哉譜帙。冤矣芳魂。近番逸典。偶蝨殘書。揚其高風。流之青翰。蓄唵叭而若珍。甕檀丸以稱富者。或能訪於殊方。俾得徵之外史。作本紀。

滅陽山有神農鞭藥處。山上紫陽觀中有千年龍腦。葉圓而背白。無花實。香在樹心中。斷其樹。膏流出。作坎以承之。清香爲百藥之祖。西方林羅短吒國有羯布羅香。幹如松。葉異。溫時無香。乾後折之。狀如雲母。色如冰雪。亦名龍腦。燕昭王二年。波戈國貢茶蕪。香焚之。着衣則彌月不絕。浸地則土石皆香。着朽木腐草皆鬱茂。以薰枯骨。則肌肉立生。

齊桓公伐山戎。得聞遐草。帶者耳聰。香如桂。莖如蘭。

漢文帝聘靈芸。道側燒石葉香。其石重疊如銀母。善辟惡疾。腹題國所進。

芸香草。死可復生。實於衣書辟蠹。漢種之於蘭台石。

漢武帝常夕望東邊有雲起。俄見雙白鵠集台上。化爲幼女。舞於台。握鳳管之簫。撫落霞之琴。歌青吳春波之曲。帝開暗海玄落之席。散明天發日之香。香出胥池寒國。有發日樹。日從雲出。雲來掩日。風吹樹枝。卽拂雲開日光。

武帝息延涼室。夢李夫人授帝薝蔔香。帝驚起。香起着衣枕間。歷月不歇。帝改爲遺芳夢。

兜木香。燒之去惡氣。除疾疫。武帝時兜渠國獻如大荳。塗門上。香聞百里。關中大疫。燒此香則止。死者皆起。

園客濟陰人。種五色香草。服其實。忽有五色蛾集。客薦之以布。生華蠶。蠶食香草。得繭一百二十枚。大如甕。有一女自來助繅。每一繭繅六七日。繅絕。女與客俱仙。

昭帝元始元年。穿地植菱荷。一莖四葉。實如圓珠。可以飾佩。歲蕤芳馥。徹十餘里。宮人嚼之。口中香透脈理。名曰含香。

元封中起方山像。燒天下異香。有沉光。精祇明庭。金磬塗魂。帝張青檀之燈。青檀有膏如淳漆。削置器中。以蜡和之。香然數里。

光。和元年。波七國獻神精香。卽荃蘂。一名春蕪。一根百條。皮如絲。織成爲春蕪布。握一片。滿室皆香。婦人帶之。終身芬馥。

飛燕浴五蘊七香湯。合德浴荳蔻湯。成帝謂后不如婕妤。后乃燎百蘊香。

孫亮作瑠璃屏風。甚瑩徹。每於月夕。與愛姬朝沐。麗居洛珍。潔華四人同坐。外望之如無隔。合四氣香。凡經幸處。香氣沾衣。歷年彌盛。百浣不歇。因名百濯香。月氏國使者獻香。曰東風入律。百旬不休。青雲千呂。連月不散。意中國有好道之君。故搜奇蘊異。而貢神香。乘沉牛以濟弱淵。今十三年矣。香能起天殘之疾。下生之神藥也。卽聚窟州返魂樹。其形如楓。其葉香聞數百里。伐其根心於玉釜中。煮汁。更火煎之。如黑飴。可令丸。一名驚精。一名振靈。一名返生。一名人鳥精。一名却死。人卽有瘞者。聞其香亦活。

龍涎香。蘇門答次國西去一晝夜。有龍涎嶼。獨峙南巫里洋之內。浮滯海面。波

激雲騰。每至春。羣龍交戲於上。而涎遺。國人駕獨木舟。伺龍出。沒而採之。其涎初若脂膠。黑黃色。頗有魚腥氣。久而成塊。焚之清香。

唐太宗問高州首領馮盎云。卿去沉香遠近。盎曰。左右皆香樹。然其生者無香。惟朽者香耳。

麝形似獐而小。其香在陰前皮內。別有膜裹之。春分取其生者佳。唐鄭注赴職河中。姬妾騎百餘。皆帶麝。氣逆人鼻數里。所過路瓜盡死。一蒂不收。名爲瓜惡香。

紫木香。卽桂香之美者。一名仁蘭。一名金杠。一名麝香草。出蒼梧桂林二郡。今吳中有草。色如紅藍而甚芳。

婆斯國馥齊香。皮青色薄。而極光淨。葉如阿魏。每三葉生於條端。無花實。八月伐之。至臘月更抽新條。極滋茂。七月斷其枝。有黃汁。其狀如蜜。入缶。香氣透徹。且治病。

無石子。出波斯國。葉如桃而長。三月開花。白色。花心微紅。子如彈丸。

紫釰樹。眞臘國出。條枝鬱茂。葉如橘。冬不凋。花白色無實。天大雨霧。霑其樹枝。條卽出紫釰。

都夷如棗核。食一片則歷月不飢。以粒如粟米許。投水中。俄而滿大盂。降眞香。出黔南。又生大秦國。又生南海山中。主天行時氣。宅舍怪異。並燒悉驗。神仙傳云。燒之引鶴降。

藿香樹。生千歲。根本甚大。伐之四五年。木皆朽敗。惟中節堅固。芬香獨存。

萬歲棗木香。出三佛齊。樹類絲瓜。冬取根曬乾者香。

安息樹。如苦楝。大而直。葉類羊桃。而長。中心有脂作香。又樹脂其形色類核桃。禳不宜乾燒。然能發衆香。故人取以和香。

艾納。松皮上蘚衣也。合諸香燒之。其烟團聚。青白可愛。

篤耨樹。如杉檜。香藏於皮。皮老而脂自流溢者。名白篤耨。冬月因其凝而取之。名黑篤耨。盛之以瓢。碎瓢而熱之。亦香。名篤耨瓢。

遠暫香。出眞臘者爲上。伐樹去木而取者。謂之生速。樹仆木腐而香在者。謂之

熟速。其樹木之半存者。謂之暫黃。而熟者。爲黃熟。通黑者。爲夾箋。又有皮堅而中腐。形如桶。謂之黃熟桶。

三佛齊有乳香樹。樹似榕。以刀礮之。脂溢於外。凝結而成。其品十有六種。有滴乳。餅乳。袋乳。黑楊。纏末之別。

奇南出占城山。酋長禁民不得採取。取數片。置之衣帶間。不思溺。

阿膠參。出佛林國。皮色青白。葉細兩兩相對。花似蔓青。正黃。子似胡椒。赤色。研其脂。汁如油。極青。又治癩。

麻樹生斯調國。其汁肥潤。其澤如脂膏。馨香馥郁。可以熬。香美如中國之油也。婆利國有婆律樹。高八九丈。瘦者亦能生龍腦。肥者出婆律。又名木五香。根旃檀。節沉。花鷄舌。葉藿香。膠薰陸。清桂。馬蹄。鷄骨。賤香。同是一本。取法先斷其木根。積年皮幹俱朽。心與節不壞者。乃香也。細枝緊實。爲清桂。黑而沉水。爲沉半。浮半。沉爲鷄骨。最粗爲賤。浮者爲檀。似馬蹄爲馬蹄。似牛頭爲牛頭。又有熟結。生結。沉之良者。惟瓊崖等州有。在土中不剝剔而成者。謂之龍鱗。亦有削之自

卷咀之柔勒者。謂之黃蠟。

高仙芝伐大樹。得訶黎勒。五六寸。置抹肚中。覺腹痛。仙芝以爲祟。欲棄之。問大食長老。長老云。此香人帶一切病消。其作痛者。吐故納新。

波斯國有樹。葉黃黑色。經寒不凋。二月開黃花。心微碧。刻其葉。有膠如飴。六七月堅凝。爇之通神明。辟邪惡。

芸薇菜。其根爛熳。春夏葉茂。秋蕊冬馥。其葉供祭。供客。且能止渴。人採其莖。帶之。香氣歷日不歇。

巴東有眞香茗。其花白色如薔薇。煎服。令人不眠。令人無忘。

遙香草。其花如丹。葉細長而白。花葉俱香。扇馥數里。其子如薏。中實甘香。食之不飢渴。體如香草。

鬱金芳草。釀之以降神者。可佩。宮嬪每服之。禱衿。

寶雲溪僧舍。盛冬客至。不然薪火。煖香一炷。滿室如春。

公主下降。乘七寶步輦。四面綴香囊。貯辟邪瑞麟香。皆異域所獻。

蜜香花。生天台山。一名土常山。苗葉甚甘。人用爲藥。香甜如蜜。

苾芻。西天草。體性柔軟。引蔓傍布。馨香遠聞。佛經中所謂解脫知見香。

迷迭。西都香草。可佩服。

蕩車香。殺蠹魚及蛀艸。生彭城。高數尺。白花。凡樹木蛀。煎此香冷淋之。

蘼蕪。一名蘼蕪。留夷。杜蘅。芳芷。薜荔。

胡繩。綠萐。芎藭。芳薤。皆楚辭所注。

葳蕤。苞荔。薜荔。青蘋。皆高原所生。

甲香。大者如甌。面前一邊直攪長數寸。闌殼坼坼。有刺。雜衆香焚則香。獨焚則臭。一名流螺。今造合香家所須用。能聚衆香。使不浮散。

楊娥傳

劉鈞著

楊娥者滇之奇女子也。其祖父世爲黔國公家。武藝教習。娥之兄曰楊鵝頭。藝尤精。然與娥角力。輒負。娥貌美而趨捷。過人。黔府護衛張小將者。美少年也。以勇力聞。鵝頭以其妹妻之。娥年十六歸。張氏隆武二年也。時黔國公沐天波奉永明王。是年安南土酋沙定洲叛。陷昆明。天波出犇楚。雄娥夫婦及鵝頭踵至。從之。而西。明年流寇孫可望入滇。天波犇滇西。傲外後。永明王兵敗。犇雲南。吳三桂追之。王與天波走緬甸。天波命娥夫婦衛王。時流寇四起。道塗梗塞。娥與張奮力捍禦。無能當之者。王始得達緬。吳三桂索王急。緬人執以獻。天波與從臣數百人皆死之。娥聞之曰。吳三桂何人。彼獨非大明臣子耶。後永明爲三桂所弑。張悲憤成疾。卒。娥遂從兄歸。昆明賣酒。平西王府西日施脂粉。御金翠。靚粧艷服。自當壚。纖腰玉貌。見者驚爲天人。吳藩帳下執袴子弟。聞麗人當壚。皆來肆中。飲既醉。游談謔浪。稍稍侵娥。娥視其壯健者。提之如提孩童。置諸狗

寶沸湯澆之。羣驚起來。奪娥略以手揮之。皆倒地。負痛逸去。明日聚惡少數十人。噪而來。娥出之街中。羣聚圍娥。娥聳身一躍。疾於鷹隼。自衆頭上飛出。立於圍外。衆相顧驚愕。不敢動視。娥則神色不變。意甚暇。衆遂散。娥亦不復賣酒矣。吳三桂聞之。欲納娥。娥忽中寒疾。亟鵝頭往視之時。已深夜。入其房。一燈碧色。寒風颯然。牀頭設永明王與其夫張之靈鵝頭呼妹不應。就視之。奄奄然僅存一息。娥頭撫之泣。娥忽躍然推兄曰。汝亦健兒。何作女子態耶。遂啓其襟。颺然出一匕首。寒光射人。不可逼觀。娥左手把兄袖。右手執匕首。東向指曰。吳三桂逆賊殺吾王致吾夫死。絕域誓不與之共天地。故覓此報仇物。以待之。計吾之貌與藝足以動之。故忍耻自眩。冀老賊聞而納我。吾計成矣。不幸疾死。此天不欲我爲國家報仇也。言已一慟而絕。猶握匕首東指云。

黔苗竹枝詞

大興舒 位立人

黔於漢屬西南夷唐宋以來曰蠻曰獠洎明始設府州縣種類日漸繁息則曰苗曰蠻曰獠曰峒曰狔狔曰狔狔曰狔狔曰番曰木老曰六額子曰猓猓曰猓猓其自粵遷至者又有若獠若獠若獠與猓與猓咸隸屬焉然皆得名之曰苗是真所謂苗裔也苗既居處言語不與華同其風俗飲食衣服各詭駭不可殫論余從車騎之後輒以見聞所及雜撰爲竹枝體詩且爲之註蓋不啻郭景純作山海經圖贊吳道子畫地獄變相也設非親歷其境驟而示之以所作不幾致疑於海上之木山中之魚哉夫古者輶軒采風不遺於遠而劉夢得作竹枝詞武陵俚人歌之傳爲絕調余誠乏夢得之才又所記謾瑣無足當於采錄而以一書生萬里從征往來柳雪橫槊而賦磨盾而書將以是爲鏡歌一曲之先聲焉

西南夷一首

嫁得槃瓠不自由。岑山存水遠來遊。無因石室功臣表。狗尾如貂續未休。

槃瓠高辛氏之畜狗也。銜犬戎吳將軍頭獻闕下。帝酬其功而妻以少女。槃瓠遂負女走入南山石室。三年生六男六女。自相夫婦。衣服製裁皆有尾形。號曰蠻夷。詳見范史西南夷列傳。此蓋苗子之始祖矣。苗以山之高者爲岑。

水分流曰存。

高辛一作南辛

夜郎一首

流水淙淙市夜郎。浣紗人見竹三王。年年飽喫桄榔飯。不信人間有稻粱。初有女子浣於遯水。見三節大竹流入足間。聞哭聲。剖竹得一男。歸養之。長而自立爲竹郎侯。以竹爲姓。漢武帝殺之後。封其三子民爲立竹王三郎神。祠其地。桄榔木可爲麪。百姓資食焉。

牂柯蠻一首

且蘭江上戰船閒。南去莊豪竟未還。留得瓢笙作歌舞。一條冷水萬荒山。莊躋至且蘭。檣船步戰。牂柯檣船也。宋時牂柯蠻入貢。令作本國歌舞。一

人吹瓢笙如蚊蚋聲數十輩宛轉舞以足頓地爲節名曰水曲按史漢皆作莊躋范蔚宗作豪郭青螺考辨謂當從後漢書

東謝蠻二首

絡額金銀壓兩肩。皮冠革履去朝天。分明山海圖經贊。那擬周書王會篇。

唐貞觀初東謝酋入朝冠烏熊皮若注旄以金銀絡額被毛皮韋行滕著履顏師古上言昔周武王時遠國來朝太史次爲王爲篇今當寫作王會圖詔可

紅絲早已繫綢繆。牛酒相邀古洞幽。底事相逢不相識。謝郎翻比謝娘羞。東謝皆姻不避同。姓以牛酒爲聘女歸夫家夫羞澀避之旬日乃出其俗男女皆椎髻緇以絳垂於後

南平獠一首

新製通裙稱體量。竹筒三寸綴明璫。夜深留客千欄宿。細說當年劍荔王。婦人橫布二幅穿中貫其首號曰通裙美髮髻垂於後竹筒三寸斜穿其耳

富者飾以珠璫人皆樓居梯而上名曰干欄其酋姓朱氏唐時稱劍荔王云

狎苗一首

淺草春開跳月揚。聘錢先乞紫檳榔。隔年一咲占歸妹。抱得新兒認舊郎。

狎家在五代時楚王馬殷自邕管遷來其種有三曰補籠卡九青仲散處貴陽平越都勻安順南籠各郡屬風俗相同每歲孟春會男女於平野曰跳月地曰月場各爲歌唱合意則以檳榔投贈遂爲夫婦而昏成三日婦卽別求他男與合非生子不能歸也

按平越府今改爲直隸州南籠府今改爲興義府

宋家苗一首

識字畊田不記年。男昏女嫁兩茫然。似渠打鴨休相咲。勝索開門一種錢。

宋家在貴陽相傳爲春秋時宋國裔楚蠶食上國俘其民而放之南海遂流爲夷頗通漢語文字男帽女笄將嫁男家遣人往迎女家則率親黨笙楚之謂之奪親俗誠可咲然今人嫁女之家有索開門錢者竟至攘臂請益則其異於苗子也幾希

蔡家苗一首

卿卿氈髻我氈裳。做夏匆匆興不常。幾見鴛鴦能作冢。銷魂人贈返魂香。
蔡人爲楚所俘在貴筑。清平修文清鎮諸縣暨大定之威甯平遠州男女製
氈爲衣。婦人以氈爲髻飾以青布。若牛角狀長簪。綰之夫死將以婦殉。婦所
私挾衆奪之去。乃免其聚會親屬椎牛跳舞名曰做夏。

龍家苗二首

狗耳苕亭綰髻螺。鬼竿影裏兩婆娑。明珠薏苡偏相似。腸斷征蠻馬伏波。
龍苗種有四。一曰狗耳。龍家在廣順州康佐司。男子束髮而不冠。婦人辮髮
螺髻。上指如狗耳形。春時立木於野。謂之鬼竿。男女旋躍而擇配。衣以五色
藥珠爲飾。貧者代以薏苡。

拋卻殘春趁早秋。紙錢一陌喚牽牛。看他被髮伊川野。何不蠶娘祭馬頭。
一曰馬鐙。龍家婦人作冠若馬鐙。然以七月七日祭於墓。又大頭龍家曾竹
龍家其俗約略相似。

花苗一首

牛角傳歡復幾時。聲聲銅鼓賽叢祠。無端飛出金蠶箭。擲破雞黃又鬧屍。
花苗居大定貴陽遵義各屬。每會必擊銅鼓飲酒。注牛角中好蓄蠱毒。夜飛
而飲於河。有金光一線。謂之金蠶。每以殺人。否則反噬其主。故雖至戚亦必
毒之以洩蠱怒也。人死則集親友歌唱屍側。曰鬧屍葬。瘞以雞子。擲地下。之
不破者爲吉。

黑苗三首

馬郎房底好姻緣。樓指佳期又幾年。插徧青山黃竹子。嚶嚶還索鬼頭錢。
都勻之八寨丹江鎮遠之清江黎平之古州。其近山者爲山苗。近水者爲洞
苗。有土司者爲熟苗。無管曰生苗。又有高坡苗。皆衣黑總曰黑苗。結昏則鄰
建空房名馬郎房。未昏嫁者。遇晚聚歌情稔。則以牛隻行聘。合巹三日。女歸
母家。或半年始一返。女父母向壻索頭錢。不與。或另嫁有壻女。皆死。猶向女
之子索者。則謂之鬼頭錢。凡人死一月後。其生前所私男女。各插竹於壻前。

祭焉

兩姓姻緣接舅姑。鄉風世世畫葫蘆。外甥錢少遲歸妹。從此羅敷自有夫。
清江昏嫁姑之子。定爲舅媳倘舅無子。必重獻於舅。謂之外甥錢。否則終身
不得嫁。或召少年往來。謂之阿妹。曰妹諱之也。

耶頭洞。嶙畫鴻溝。醢菜藏來各幾秋。準待來年吃牯臙。鬼堂風雨自啾啾。
黑苗以上戶爲耶頭。下戶爲洞嶙。雖男女多苟合。然洞嶙不敢通耶頭。犯則
死期至矣。所得羔豚雞犬鴟鴞之屬。死則連毛臙置之甕中。層層按納。俟其
螂蛆臭腐。始告缸。成名曰醢菜。珍爲異味。愈久愈貴。問苗子之富。則曰藏醢
桶幾世矣。又每十三年畜牡牛祭天地祖宗。號祭曰喫牯臙。每寨公建祖祠。
名曰鬼堂。

青苗一首

不借雙雙大小同。渾難撲簸辨雌雄。低頭爭似擡頭好。布自青青笠自紅。
修文鎮甯黔西皆有青苗。在平遠者或稱箐苗。男女皆著草履衣。亦無別惟。

其首則婦人蒙青布一幅男子戴紅藤笠非是幾不知烏之雌雄矣

紅苗一首

織就班絲不贈人。調來銅鼓賽山神。兩情脈脈渾無語。今夜空房是避寅。
紅苗惟銅仁府有之衣服悉用班絲女紅以此爲務擊銅鼓以歌舞名曰調
鼓每歲五月寅日夫婦別寢不敢相語以爲犯則有虎傷

白苗一首

折得蘆笙和竹枝。深山酣唱妹相思。蠟花染袖春寒薄。坐到懷中月墮時。
白苗之習略同花苗其服先用蠟繪花於布而後染之既染去蠟則花見焉
蘆笙者編蘆管爲笙有簧男女相會吹以倚歌歌曲有所謂妹相思妹同庚
者率淫奔私暱之詞貴定龍里皆有衣尙白故曰白苗

西苗二首

山塍高下接青黃。今歲豐收是滌場。便要椎牛祭白號。萬山簫鼓鬧斜陽。
西苗居平越之清平歲十月收穫後以牝牛置平壤延善歌祝者導於前男

女童數十百輩隨之歌舞。歷三晝夜。乃屠牛以報豐年。名曰祭白號。
一曲山謠兩鬢花。月毬拋後女歸家。野田豈有宜男草。更遣婁豬定艾緞。
凡苗類有跳月之習。西苗製花毬於唱歌時擲所歡以結昏。亦非生子弗歸
也。

東苗一首

半臂青青織錦闌。淺裙百疊不知寒。一梳飛上崑崙月。便是君家黑牡丹。
東苗有族無姓。雜處貴筑龍里清平衣。尙淺藍色。短不及膝。婦人花衣無袖。
惟兩幅遮前覆後。著細褶。短裙。輓髮盤頭。籠以木梳。故用唐人墨池雪嶺之
事爲詠。

天苗二首

華胄周南太覺遙。葛根難庇遠椒聊。山風夜夜吹枯骨。倒挂收香綠鳳么。
天苗一名天家。多姬姓。自以爲周之後。在廣平州人死不葬。以藤蔓束之樹
間。

豆蔻梢頭月似鉤。山花開近女郎樓。不知誰撇青蘆管。一夜春情散不收。
其在天壩者女子年近十三四卽構竹樓野外處之聞歌而合此較黑苗之
馬郎房更奇

克孟牯羊苗一首

山房縹緲際青天。百尺梯頭踏臂眠。纔到三更春夢覺。淚花一斗聽啼鵑。
廣順州之金筑司有苗曰克孟牯羊擇懸崖鑿竅而居不設牀第構竹梯上
下高者或至百仞親死不哭笑舞浩歌亦曰鬧屍明年聞杜鵑聲則舉家號
泣悲不能勝曰鳥猶歲至親不返矣

平伐苗二首

長裙雌豸短裙雄。吹入山前一陣風。我亦青袍似春草。泥他蓑影作漁翁。
平伐苗在貴定之小平伐司以地名也男女皆著裙男子裙短婦人裙長然
無袴或學他苗製袴則又不裙彼袴與裙終身不相識也男子入市則衣草
衣蔽蔽如漁蓑顧影自喜蓋以爲盛服云

木槽埋趁一身寬。論定何須更蓋棺。略倣南朝通替式。不知曾許再開看。
平伐人死盛於木槽而瘞之。有底無蓋。獨木所成。此與殷淑妃通替棺頗類。

紫薑苗一首

洞門側側掩萊蕪。三尺黃泥冷未塗。從此天邊飛破鏡。分明女子重前夫。
紫薑苗在都勻所屬。以十一月朔爲歲節。閉戶把忌七日而啓犯者。以爲不祥。夫死妻嫁而後葬曰喪有主矣。

陽洞羅漢苗二首

月場難築避風臺。衣尾匆匆隔夜裁。試問裙腰腰上帶。唾絨一幅爲誰開。
羅漢苗在黎平府婚姻。亦以跳月成女子。長裙無袴。加布一幅刺繡垂之。於前名曰衣尾。

髻上疎比項下錢。生苗居後熟苗先。不愁雙鬢鴉堆重。又製銀環壓到肩。
婦人挽髻額前插木梳於上。富者以金銀作連環耳墜。項下刺繡一方。飾銀錢焉。昏或先外家不則。卜他族遠者曰生苗。然仍跳月。

谷蘭苗一首

織錦簇簇花有痕。織布縷縷家無禪。月中織布日中市。織錦不如織布溫。
其在定番州者。則有谷蘭苗。定番多織苗錦。而谷蘭獨工於布。其布最精密。
每遇場期入市。人爭購之。遂有谷蘭布之名。皆深山遙夜機杼軋軋所成。顧
不自衣也。

九股苗一首

牛尾槍開夜有聲。傭中佼佼鐵錚錚。當年鑄就六州錯。丞相原來是老兵。
苗之剽悍莫過於九股。在凱里司武鄉侯南征戮之殆盡。僅存九人。遂爲九
股。散處蔓延。頭戴鐵帽。後無遮肩。前有護面鐵兩片。卽鑄於帽身。披鐵鎧如
半臂。自腰以下用鐵鍊。周圍形如環垂。及於足坐。則縮而立。則伸。下以鐵片
纏其股。若韃璫。琮有聲健者。結束尙能左牌右桿。銜利刃。踰嶺若飛。蹂兩足
無冬夏皆赤。生時卽漆其脚底也。其子母礮名牛尾槍。尤極猛惡。前明楊應
龍之叛。九股實羽佐之。應龍伏誅。而不敢問罪。九股至。本朝雍正九年經

略張廣泗合楚粵黔三省官兵勦撫然後搜繳兵甲建城安汛焉

紅狝狝一首

三寸桐棺一栗牌。山圍皮骨水湔骸。淚珠若到家親殿。憑仗紅裙細細揩。
男女桶裙以紅布爲之曰紅狝狝。殮以棺而不葬或置巖穴間或臨大河不
施蔽蓋樹木主識其處曰家親殿歲時展埽之

花狝狝一首

羊樓高接半天霞。杉葉陰陰狝狝家。減卻腰圍餘幾許。桶裙量就一身花。
狝狝種不一所在多有男女以幅布圍腰旁無襠績謂之桶裙花布爲花狝
狝屋宇去地數尺架巨木上覆杉葉如羊棚稱爲羊樓

水狝狝一首

擾家捕魚魚欲愁。占得烟波老未休。只道誅茆山上住。誰知結屋水中洲。
餘慶施秉等地有名擾家者善捕魚雖隆冬亦能入淵故曰水狝狝

剪頭狝狝一首

不作劉伶荷鍾埋。焚如真是突如來。心長髮短君休笑。留得相思一寸灰。
剪頭疣瘡在貴定。男女蓄髮寸許死。則積薪焚之。性皆嗜酒入市者。無不陶然。

打牙疣瘡一首

有意齊眉結壻歡。無端鑿齒做人難。青唇吹火今宵事。口血分明尚未乾。
打牙一種多在平遠黔西。其俗女子將嫁必先折其二齒。否則妨夫家殆。所謂鑿齒之民歟。又剪前髮而留後髮。則取齊眉之意。

鍋圈疣瘡一首

平遠州中鬼畫符。傳來面具。有於菟。雖然不作招魂賦。且盡生前酒一壺。
此種惟在平遠州。其俗嗜飲尙鬼。有疾則延鬼師。以虎頭一具。用五色絨裝飾。置簸箕內。禱之親死。側置其屍。謂使其不知歸路。其曰鍋圈者。婦人以青布束亂髮。肖其形也。

披袍疣瘡一首

底事裁衣似打包。風風雨雨自披袍。卻嫌針線尋無迹。織徧山羊五色毛。
披袍亦在平遠州。男女衣服長僅尺餘外。披以袍方而闊洞。其中從頭籠下
前短後長左右無袖裙。以五色羊毛織成亦無褶。

木老一首

放鬼纔過七七期。更傳畫鬼祀靈旗。無端食指今朝動。問是槃瓠第幾支。
木老所在多有。有父母死長子閉戶居四十九日。乃延巫薦祝名曰放鬼祀鬼。
則用五采旗其族同姓不昏異姓不共食犬。

狠兜一首

櫛就風鬟墮馬妝。雙心一祿繡鴛鴦。不妨徑向君家宿。行到深山藥箭香。
狠兜亦苗也。施秉黃平皆有之。女子多美者短衣偏髻繡五采於胸前。人謂
之則笑而從焉。善爲藥箭埋所居之遠近。觸之機發往往傷人。

狠獮一首

山家風露竹牆低。鹿眼玲瓏望欲迷。從此不愁牛礪角。夜深封到一丸泥。

狎獮卽陽荒其種最繁都勻石阡施秉龍泉黃平餘慶黎平龍里皆有之荆
壁不塗門戶不扃出入以泥封之餘俗與諸苗略同

八番一首

八番女兒日夜忙。畊田織布勝於郎。長腰鼓敲老虎市。今年香稻滿椎塘。
八番在定番州其俗男逸女勞男皆仰給於女剗木作臼曰椎塘臨炊始取
稻把入臼舂之以寅日爲市凡燕會則擊長腰鼓爲樂

六額子一首

空山埋後纔三尺。冷水澆來又一回。不信膏肓容二豎。招魂入骨錦囊開。
六額子有黑白二種皆在大定府風俗相同人死葬亦用棺至年餘則發冢
開棺取枯骨刷洗之至白爲度以布裹骨復埋一兩歲仍取刷洗如是七次
乃凡家人有疾則謂祖先之骨不潔也

裸羅四首

蜀道曾揮濟火戈。部民四十八羅羅。阿誰賜得銀鳩杖。謝表簽名曲曲蝌。

獬獬本盧鹿而誤爲今稱漢時有濟火者從武侯破孟獲有功封羅甸國王
卽安氏遠祖千餘年世長其土勒四十八部部之長曰頭目其等有九曰九
扯最貴者曰更苴不名不拜賜鏤銀鳩杖凡有大事取決焉次則慕魁勾魁
以至黑乍皆有職守亦有文字類蒙古書

錦緞招魂野色寬。精夫紅葬骨難寒。未妨月沒教星替。梅額新加耐德官。

其酋死則以錦緞裹屍焚於野子幼不能嗣則妻爲女官耐德獬獬言妻也
其俗婦人用青布纏首多帶銀梅花貼額精夫見後漢書

斷頭掉尾水西城。羅鬼關山行重行。烏蠻鬼大白蠻小。鬼方黑白太分明。

獬獬有黑白二種黑者爲大姓又曰烏蠻白曰白蠻俗皆尙鬼亦稱羅鬼好
畜駿馬善馳驟擊刺其兵爲諸苗冠諺曰水西羅鬼斷頭掉尾

紅泥坡下白羅羅。下姓相逢喚阿和。一帶青山橫作黛。春風吹徧采茶歌。
白爲下姓居普定者曰阿和多以販茶爲業

峒人一首

擷得茅花冷過冬。比肩人似鳥雌雄。此間定是多情地。開出相思草一叢。
峒人冬采茅花爲絮。以禦寒蓋。彷彿蘆花毳矣。夫婦出入必偕。其種在石阡
期谿司及永從諸寨。斷腸草生焉。

蠻人一首

記得牛場又狗場。帶刀入市笑昂藏。草衣男子花裙女。花太短時草太長。
在新添舟行二司居者曰。蠻人以丑戌日爲市期。出入必佩刀。男子以草爲
衣。長過其足。曳而走。作郭索聲。婦人裙皆花繡。然及膝而止。殊不雅觀耳。

獠人一首

暮雨匆匆過綠塍。朝來入市髮鬚髥。生愁女伴多輕薄。新壓青花布一層。
獠人在定番州之羅斛。永豐州之冊亨。俗好野合。亦以此爲榮。婦人私一男
則髻上蒙青花布一方。布愈高而意愈得。凡入市交易。髻上布有積累至數
十層者。同伴皆嘖嘖。豔指稱之。

按永豐州今改爲貞豐州

猺人一首

秋蛇春蚓貯青囊。可有神仙辟穀方。何事居山偏愛水。草根短短樹皮長。
猺之居處無常。必擇近水者。以大樹皮接續引水至家。不用甕桶出汲。常入
山采藥。沿邨寨行。醫有書名榜簿。其字類今所摹鐘鼎款識者。然絕無考證。
而彼珍爲秘藏。愚者亦或謬賞之。又有狝獐狨等種。皆雜居荔波縣。此悉
自粵遷來者。風俗盡同於猺。自檜以下無譏焉。

夔人一首

一串牟尼極樂天。舌端青有妙華蓮。參軍詩思嫵隅躍。正要方音作鄭箋。
夔人在普安州。姓淳而佞佛。嘗持念珠誦梵咒。朗朗可聽。凡諸苗言語不能
相諳者。類皆以夔人通傳。

凡苗之性。類與華殊。順其性則喜。拂其性則怒。至於怒而無所不至矣。故治
苗之術。則必識其性。而馴擾之。今從政者。或未嘗識其性也。又從而取求焉。
逮其無所不至。然後聚而殲旃。彼且不知致死之由。又并不知求生之路。冥
然頑然。駢儻授首。是豈羈縻弗絕之始意。而所謂兵者。蓋不得已而用之者。

也覽此可以思過半矣錢塘王朝梧

黑美人別傳

失名

美人姓花氏。字鶯粟。別號芙蓉。貌光豔而黑。故人以黑美人呼之。先世某本印。度人道咸之際。海禁大開。挈其妻女航海而來。中國厥後椒聊蕃衍。散處二十。三行省。各理煙花業。以治生。黑美人其苗裔也。有某公子者。烏衣風範。濁世翩。翩過黑市。一見而悅之。黑美人工應酬。善伺人意。見公子悅。已益爲殷勤。欸洽。握手談心。遂同寢處。由是茶餘酒後。必一訪黑美人。以爲樂。風雨無間。習以爲。常。既而公子因不可須臾離之。故出重金購之。歸床第之間。其樂融融。如咀蔗。節漸入佳境。亦莫辨其爲溫柔鄉。爲黑甜鄉。但寢斯饋斯而已。以故花謙牌局。諸嗜好。轉因黑美人而時一謝絕。或值要事。他出必挈之以偕行。無何公子日。就。庭瘠形容枯槁。面目黧黑。眠食不時。親朋咸勸公子與黑美人絕。公子亦頗。思與之絕。然雖絕而不能遽絕。覺半日不晤黑美人。其相思之苦。有匪可以言。語形容者如是。者數月終無絕之之法。亦姑聽之而已。公子本中人產。坐是日。耗而家以不支。雖遇奇窘。而黑美人之糜費。竟不能少貶。公子不得已。爰廣求。

戒絕之術。或致書某粵賈。請示機宜。或親訪某滬醫。乞授計畫。時有某友告以一方公子如法試之。稍稍有效。而終強制於是藉官府之力。往某局匿跡數日。乃竟能冷淡不思黑美人矣。黑美人亦以寵日衰。自願下堂。不數月間。公子身體健全。精神煥發。起居飲食頓復其初。一日從友人處復與黑美人遇。虛與委蛇。畧爲交接。舊歡新愛。藕斷絲連。歸涉冥想。寤寐轉輾。戀之如故。不得已又以重金購之。歸再接再厲。情好益堅。至是因暱之久而病癆。諸虛百損。叢集一身。黑美人雅善療病。治氣瘡。河魚疾尤能應手奏效。抑知公子病入骨髓。胃氣久虛。眞陽已痿。惡石美疢。迄無寸效。又以家境日艱。疾竟不起。公子卒後。黑美人猶日侍奉於靈臺。如生時狀。旣葬。除靈始去。而之他。復以困公子者困他人焉。而蒙其毒而死者。至年不可以計數。邇者中國有鑒於黑美人之流毒無窮。於國計民生大有關係。因嚴爲之禁。詔關津吏捕之。無任漏網。而黑美人神通廣大。行賄關說。匿處中華。時於秘密社會。巧使其誘引蠱惑之計。猶幸江之徐屬浙之台屬。以及川粵等省。黑種日就漸滅云。

某中丞

失名

某中丞。旗人。貌都麗。衣飾亦修整。有兄爲某省將軍。某年以事召入都。枉道過中丞任所。駐節某會館。中丞素敬事兄。逐日輕輿詣行館。作深談怡怡如焉。將軍有愛妾。年二十八。輕盈俏麗。眉目似畫。中丞一見心搖搖。不能自持。妾以將軍毫且醜也。眉梢眼角。亦時時流露情意。中丞益惑之。詣行館愈勤。日或兩三至。一日又往。適將軍拜客外出。中丞大喜。奔入內室。約半小時。不意將軍遽歸。見門首有綠呢兩人輿。知中丞已至。匆匆入會客室。不見呼之不應。而中丞問呼聲大驚。立逃。方及闕。遇將軍呼止之。若不聞。徑登輿去。將軍大愕。惘惘入內。闕則愛妾已高懸樑際矣。將軍乃大怒。立命隨役傳中丞。既至。不與交一言。惟怒目視之而已。約三小時。時計針指亥刻。僕從棺殮妾已畢。將軍始厲聲呵之曰。爾猶有面目坐此耶。中丞逡巡出自此。不敢至行館者三日。將軍則又傳之至。曰。爾今日不復念及阿兄耶。然阿兄不忘汝。必喚爾至一觀。爾之面目如何。中丞不敢答。又日日至。將軍則又呵責之曰。爾食皇上家之祿。宜事皇上家之事。

容爾如此清閒。以余處爲消閒地耶。中丞至此。進退不知所計。乃涕泣向將軍。跪請曰。弟誠無狀。無面目對阿兄。然阿兄獨不念二十年前。吾兩人同眠同食。時耶。言訖大哭。將軍亦不覺淚墮如縻。微哂扶之起坐。蓋將軍家本清寒。又少孤。撫中丞若己子。未嘗形影離焉。自此遂爲兄弟如初。而將軍以明日卽行。

女盜俠傳

西陽

朱某江蘇人以諸生捐納知縣需次山東奉撫軍委解餉入都過臨清道宿野店中甫下車有土妓五六輩來獻曲蓋北道風俗妓寮多逐尖站客至唱小曲數齣客給以津錢數百欲留某妓宿則令賁被褥來辨色而行給津錢數弔津錢一百者實五枚當南錢十枚津錢一弔者實五十枚當南錢一百枚其價廉如此然若輩多與响馬賊連合偵探客囊而報告之妓而盜者也朱老行旅心知之又臨清爲响馬淵藪益戒嚴當時見五六輩皆塗脂抹粉手持胡琴或月琴泥身畔喁喁作絮語內有一妓周身黑衣結束偁仄年二十許不御脂粉不攜胡琴雜諸妓中喚客一聲卽退立門簾下諸妓妖嬈萬態或起或立或進或退輒回顧黑衣妓黑衣妓若以目指揮之朱固機警知黑衣妓必諸妓之領袖而舉止之態度眉目之神彩百不類妓其爲响馬賊之俚無疑顧荒村野店暮色淒其無術以脫其危險心房震動如觸電氣耳爲之顫猛然省曰此妓非常人以情哀之或可免乃退諸妓而獨留黑衣妓妓亦欣然留朱乃喚酒與妓對

飲各詢生平。妓自言家貧。不能自活。忍辱爲此。朱具述古名妓歷史。如紅拂梁紅玉事。爲之勸慰。且故意推波助瀾。以激發其豪氣。妓亦悲歌慷慨。泣下數行。朱自道生平遭際險阻艱難之狀。歷歷如繪。妓問此行何爲。所帶何物。朱具述梗概。爲言餉銀幾萬。幾千兩。一無隱諱。談次。聞窗外颯颯聲。揭紙簾。睨視窓櫺外。則大雪迷漫。與微月光線相映。一白無際。顧妓僅御薄棉衣。殊寒甚。朱卽從篋中檢羊皮短帔。爲妓披之時。則殘燈將盡。爐火不溫。朱出燭續膏。仍復對坐談心。終不及亂。俄聞雞唱。妓循例告去。脫帔置土坑上。朱贈銀四兩。又持帔授之。曰。天寒早行。良苦。此薄物爲卿禦寒。勿介意也。妓曰。蒙君憐惜。虛度良宵。受銀已無狀。敢有他。朱曰。所以重卿氣誼耳。牀第之私。非所以褻卿也。何歎爲。妓乃道謝去。行半里許。忽回。朱聞叩門聲。大恐。啟視之。則妓也。朱未及問。妓遽大言曰。實告君。吾盜也。吾父爲响馬領袖。以吾爲香餌。然吾守身甚嚴。有起意亂吾者。立刃之。今猶處女也。蒙君柳下坐懷之義。范叔綈袍之仁。特報君帔。君所需。吾去卽遣人來還。更有一寶物。君収之。天初下雪。泥未湔。可踏雪行。早離此。

朱且驚日喜長跪拜謝妓不顧而去隔一小時有人來還帔並袖出一小囊曰此主人所以贈君者囑君載之以行有無量價值至楊柳青某標局有人來索君卽付之千萬勿誤朱受囊出銀犒使使者曰主人命不得受一錢遂去朱啓囊視之則三角小旗也天旣大明朱促車夫行車夫以危險辭疆而後可將行朱出小旗插車篷上車夫相視愕然曰何由得此此去無憂矣旣行二十里許有騎馬荷槍者二十餘人迎面來摩車而過又回馬盤繞一周諦視小旗遂巡去前行二十里又如此凡行五六日遇如此輩者數十起距楊柳青十餘里卽有人來迎詢之則某標局所遣也引之至局供給豐腴夜闌主人入室詢旗所由來朱乃具述其故面歸之主人曰此貴重物非有大感情者不輕貽也今已出重圍無須此僕將持此以復命不落他人手也朱乃再三道謝而別

卷三

五

集

女俠翠雲孃傳

秋 星

翠雲孃不知其姓氏。山左產年十七八風貌殊可人。雙趺纖小而騰躍上下可丈許。幼業賣解。隨父流轉江湖。行蹤幾徧南北。意氣驕甚。謂所見男子無當意者。自矢終身不字。人曾至上海奏技。其父爲人誣陷。被拘入捕房。女隨往有所剖白。而捕房例嚴禁華人。不許有所陳。遂被囚。不勝其苦。罰鍰乃得釋。女憤然曰。吾國官吏往往不免冤誣人。吾每謂之暴竊竊不平。然尙容人辯訴。也不意西人乃若此。自此遂有仇外意。無何義和團起。女喜請於父往投之。蓋卽團中所謂紅燈照者。女得隸某大師兄麾下。甚見信任。位次頗崇。錫以翠雲孃名號。書之旗幟而賜之所至。恒揭以行。女自是妝束頓易。周身綾錦衣履一碧而貌益豔麗。見者輒疑洛水神姝。女日見團中無紀律行事有類盜賊。頗憂之。然大勢所趨。獨力亦莫能挽。尋聯軍長驅入京師。團衆逃無蹤。女憤甚。激勵其部下人咸願效死。遂與某國兵巷戰。竟日西兵死傷者頗多。女部下人亦傷亡略盡。乃聳身登屋逸去。後團中領佐大半爲西兵嚮導。或爲僕役。且藉西兵之勢。刦

奪戕殺無惡不爲女慨然曰吾誤與若輩共事胡能成然此恥不可不一湔也乃約會飲於某處衆素傾慕女是日到者綦衆女遂宣言曰吾向謂若輩人也不意乃狗彘之不若今君出國亡皆若輩之罪吾謹以若輩謝天下刳然出長劍駢戮之遂去不知所終

記某生爲人唆訟事

失名

夫妻反目之事。誠恒有之。然未有若某事之奇異者。有之。莫某姓若某姓夫婦。因事反目。控諸縣署。經年莫決。其妻乞援於某生。某生素狡猾多智慧者也。應曰。諾。越二日。汝來。余將告汝以制勝之策。越日。某氏往時。天氣酷熱。炎日如火。綠梧蔭中。蟬鳴不已。氏既至。叩門。門啓。一小童出。氏問曰。家主何在。小童答曰。在園中。納涼。卽導氏往。謁見某生。方皮冠狐裘。披雪衣。納涼於竹林中。手持芭扇。仰臥一竹椅上。某氏問計。將安出。某生曰。若如是。夫人之案必勝矣。氏如其術行之。果獲勝。未久。夫妻和睦如初。夫乃詳究其所以獲勝之故。並問出於何人之主謀。其妻俱以實告。夫聞之。卽控某生以唆訟之罪。縣令傳某生至。某生堅辭不認。訊氏堅謂出於某生。主謀並備述。某生在竹林中設謀定計時形狀。縣令聞之。冷笑曰。汝作瘋語乎。令掌其頰。不准吁。若某生者可謂多機變之巧者矣。夫爲人謀事而反累及其身者。皆未得某生之術者也。

卷

五

集

記栗主殺賊事

潮聲

迷信者云。命中犯披麻殺夫。不用刀婦人命。硬可怕。如此有某氏婦者。貌既殊麗。性亦溫存。惟披麻星犯命日者。皆言其有七夫之相。及笄後歸某甲。早死復適乙。三月而亡。於是復改醮於丙。丙死而丁。而戊。皆夭逝。婦雖閱歷多人。屢遭磨竭。然在妙齡時候。情興方濃。對鏡添妝。自歎紅顏薄命。花晨月夕。求鳳恒歌。知之者雖豔其貌。憐其遇。終以前夫爲殷鑒。敢望而不敢。卽久之有某己者。素不信術者語。偵知婦意。遂委禽焉。新婚燕爾。弋雁興歌。女郎才適成眷。屬其樂可知矣。婦以爲連殺數夫。已解披麻之厄。從此當可白頭偕老。永矢百年。詎剛柔相尅。再接再厲。不半載而又失所。天痛恨之下。心如死灰。因一意守貞。不復求人間之樂。蓋婦以日者曾言。當殺七夫。故不敢再上望夫臺矣。然婦本多情。每嫁一夫。必私將前夫之栗主（卽神主牌）携之同往。至是已得六具。扁而納諸床下。夜半忽有偷兒穴壁入。摸得栗主。籠意爲奇貨。攝之欲行。婦聞悉。索聲疑爲栗主。爭風而相鬪也。遂望空虔祝曰。各位夫子。幸勿喧鬧。妾之至此。實


命。不。猶。偷。兒。聽。之。適。適。然。驚。以。爲。彼。暗。伏。多。人。戒。其。勿。爲。聲。響。將。致。余。之。死。命。
故。言。賊。命。不。有。也。婦。又。曰。自。今。以。後。當。爲。君。等。守。節。幸。毋。恐。慌。婦。語。畢。聲。息。寂。
然。明。日。起。視。偷。兒。已。嚇。死。於。床。下。

女俠荆兒記

失名


廣西百色縣有五雷嶺。峯高插雲。山巖中有石穴一。巨蛇潛其間。長十丈餘。圍大一丈。常出噬人。土人畏之。祠爲神。縣官每歲以牛羊致祭。春分前後。巫覡傳蛇神言。令鄉里獻十二三童女。置穴口供神食。不然則禍作。縣官苦之。出重金購貧家女。及有罪者女。養之。屆期盛設香燭彩樂。送童女置蛇神祠旁。前後已用九女矣。乾隆十八年。縣官將祠蛇。索童女苦不可得。邑民俞某者。家甚貧。生七女。其季女名荆兒。年已十五歲。請於父。願應募。父母駭甚。阻其行。荆曰。蛇爲知擇人。而噬巫覡。妄言爾。兒自有術。敵彼幸而成功。一方受其福。不然。僅兒一人受禍耳。且留兒。徒爲父母累。不如賣兒得金。以助家計。固請行。俞某固不肯。昏夜。荆兒潛逃。叩縣官庭。陳來志。請携利劍及毒藥米餅蜜麵。以從。縣官壯之。留置署中。爲之儲備。一切屆期。將送女。巫覡多言。此女不可用。縣官怒斥之。乃舁女及米餅等。至洞口。夜半。蛇出。頭大如甕。雙目閃爍如懸燈。聞米餅及蜜麵香。先噉之。荆兒匿穴旁。以伺其變。頃刻間。毒發。蛇隨地轉動。荆兒揮劍斫蛇中。

其。眼。跳。開。尋。丈。外。蛇。怒。一。蹶。出。穴。外。荆。復。自。後。斬。其。尾。斷。蛇。荆。乘。夜。奔。回。縣。署。
疲。極。而。暈。灌。之。復。蘇。遂。言。斬。蛇。狀。衆。馳。往。洞。口。割。蛇。而。分。之。乃。治。巫。覡。罪。縣。官。
奇。此。女。納。之。爲。子。婦。



香艷叢書

第五集



H2
1737
H25
2620
香艷叢書

五集卷四

餘墨偶談節錄

燕山孫 樓詩樵編

八卦轎

粵西地瘠民貧。鄉村婦女。率多大足。肩挑負販。與男無異。柳州來賓一帶。時有昇肩輿爲生者。如坐客爲男。二女肩輿爲坎。坐客爲女。前女後男。肩輿爲震也。餘倣此。

蘭花菇

昔六祖講經於仁化山中。附近處所。多產南華菰。粵西賀縣亦有之。俗名蘭花菇。某大令宰彼時。中丞按部過縣。詢其地有土娼否。某誤以爲土產。遽答曰有。詢何名。曰蘭花菇。中丞正色曰。曷勿逐之。某始悟。座客爲之胡盧。中丞亦笑。蓋三字實似妓之美名也。



考壻

一日於陳雨亭座中談及伊在永明見有姑蘇被擄才女某某以自作月下即景二詩考壻其詩云水清橋影一弓圓橋下垂楊繫短船釣罷漁翁深睡着游魚逐水戲荷錢又流螢錯落不成紅花影橫街語暗蟲獨坐似嫌宵寂寞月明隔水一聲鐘後聞某司馬以成句猶話寒山半夜鐘詩賺去惜哉

禽言古意

姑姑惡姑姑惡姑不惡妾命薄此前人禽言詩也滿洲宜少耕進士亦有古意云作婦難作姑易姑常怒婦當泣寄語阿姑無太癡今日當思作婦時二詩異曲同工不能爲之軒輊

秋閨怨

仲兄翰卿最喜余童時所作秋閨怨一絕詩云秋閨夜搗鳳仙花要染纖纖玉笋牙爭奈小姑無意緒說儂私製守宮砂謂古今來忠臣義士嫌疑不謹蒙此曖昧者豈少

妓詩

明湖韻事。載妓郭韻樓贈別詩云。裊裊湖邊柳。春絲不盈把。殷勤折贈郎。好策來時馬。雖本於山谷之折柳當馬策。然四語精神注一來字。

題壁詩

曩於清風店旅壁。見某書一絕云。片刻歡娛景易窮。清流竟付濁流中。他時重到迷香洞。應有阿嬌認乃翁。語雖涉於激。然非此棒喝。安能喚醒沉迷耶。某落魄時亦有句云。昔年裘馬御肥輕。曾向迷香洞裏迎。不信黃金揮盡後。居然嘗得閉門羹。讀此則又可破涕爲笑矣。

花憐水

花憐水。粵西瑤山中江名也。三字頗雅。古簾蘇琴舫舍人游瑤日記。有詩紀之。

鶯鶯餅

山右澤郡市中。有名鶯鶯餅者。形似荷葉。雙折微翹。乾脆耐嚼。傳以爲當日雙文餉張生者。徒負佳名。殊鮮真味。

舊凡女史題壁

曩過滹沱旅店。見壁上有舊凡女史詩四絕。悽惋動人。後僅記其秦淮一片。臙脂水都是風流醞釀來之句。其他不復記憶矣。辛未夏五。楊劍潭刺史。以四詩郵示。特亟錄之。詩云。十九年華正好春。飄零無奈落風塵。夢中猶認金閨質。低捲珠簾怕見人。生憐薄命向誰論。風月當場淚有痕。笑語溫柔心宛轉。屈身猶是受人恩。斷梗飄蓬劇可憐。畫中眉意晚春前。玉堂夫婿神仙眷。多少金閨美少年。手把菱花漫自哀。箇中淪落幾仙才。秦淮一片臙脂水。都是風流醞釀來。

背面美人詩

曩在鳳台時。袁禧庭少尉鴻慶。曾誦某題背面美人一絕云。不堪回首應憐汝。果是何心懶對儂。詞意新穎。未經前人道過。

玉台新詠

陳徐陵編玉台新詠。已作亦列其間。髫年誦讀。心常疑之。後閱其書。知南宋時已有兩本。明人重刻。竄亂彌多。張嗣修茅國譜本。更非其舊。惟南宋永嘉陳玉

父本。差可依據。近時馮舒所校。多以為愚。然舒亦不免於臆改云云。由此觀之。徐陵之詩。當是後人竄入。不然復成何體例耶。國朝紀容舒所撰玉台新詠考異十卷。詳列諸本。一一證其是非。引據頗為博洽。讀之可以了然。

古別離

余曩作古別離曲云。但願舟無帆。但願車無輪。使我同心侶。不為遠行人。後隨家君之粵。山東道上。見手車順風。皆使布帆。長江中洋船。皆有火輪。日可千里。又戲成云。但願車有帆。但願舟有輪。願我同心侶。歸來老鄉鄰。

宜少耕詩

宜少耕名綬。壬戌進士。有古意云。夫壻去臨邛。繡閣空春色。妾貌不如人。敢怨耶情薄。得詩人忠厚之旨。其贈偷兒云。無他長物堪言贈。若攬殘書子亦迂。妙語解頤。令人軒渠不已。

心字香

范石湖驂鸞錄云。番禺人作心字香。用素馨茉莉半開者。著淨器薄劈沉香屑。

層相間。封之日一易。不待花薦。花過香成。蔣捷詞云。銀字箏調。心字香燒。廣東新語。屈大均詩。多燒心字是心香。茉莉黃沈共作芳香。是番禺心字好。紫烟一縷結鴛鴦。即謂此也。

小孤山題壁

小孤山在大江之中。危峰峭拔。屹立中流。與彭浪磯相對。故東坡詩中有舟中賈客莫漫狂。小姑前年嫁彭郎之句。往來詞人題咏夥矣。而寫景者多。寄情者少。惟尚鎔一絕云。煙波萬頃盡模糊。壁立誰知有小姑。絕妙凌雲一枝筆。可憐淪落在江湖。情景兼到。當爲此題絕唱。又咸豐中洪秀全之亂。小孤山淪爲賊砦。楚南彭雪琴侍郎玉麟統師江右。克復小姑。有詩紀事云。書生揮指戰船來。江上旌旗一色開。十萬雄師齊奏凱。彭郎奪得小姑回。亦巧合也。

閨怨詩

人之境遇不同。其愛憎亦異。石門吳菊裳閨怨云。春色一庭老。開簾對落花。生憎雙燕子。絮語傍窗紗。陳燦霖亦有閨怨云。獨臥繡窗靜。月明宿鳥啼。不嫌鶯。

妾夢羨汝是雙樓。一怨得直。一怨得婉。

贈雛妓詩

直北道上題壁。每有游戲詩詞。作者不署姓氏。曾見某題如夢令一闋。贈雛妓云。越女生來窈窕。懷抱琵琶輕巧。且莫聽琵琶。先把雙鉤看飽。真好。真好。儂愛通身都小。又某斷句云。可憐人似琵琶大也。抱琵琶笑向人均。一樓惻動人。此生公眼前說法。法也正。未可以游戲目之。

仲初詩

王仲初之當窗却羨青樓倡。十指不動衣盈箱。句本列女傳。引古語刺繡文。不如倚市門之意。船中養犬多食肉。句乃翻諺語。寧爲貧家兒。不作富家犬之意。然不善取材。於詩品終不無少損。無怪後人嘖嘖也。

雪樵詩

誰家兒哭欲腸斷。阿母酣眠正未醒。此鹿雪樵昨夜詩也。村愁情狀。讀之令人笑。

楊柳枝

昔年待試都門。讀書法華禪林。有錫公綸未詳其爵字。投詩數章。其題余集者。愛忘其醜。多諛少規。故未錄。楊柳枝二首。輕輕着筆。是此體正格。詩云。秦淮雨後潤。無塵拂面。和風柳色新。最是水晶簾捲處。綠陰。晷映倚樓人。又東風吹綠短。長條婀娜。輕盈未易描。他日灞陵橋上過。也應不似舊時腰。錄之以報賞音。

調笑詩

父母爲兒女聯婚。相攸則易。窺婦則甚難也。每有趁未納采以前。強其母率女往壻家答拜者。女兒幼小。似知似不知也。戚某初議婚時。某友戲成絕句調之。云。女兒嬌小貌如花。妝罷隨娘往婿家。拜罷姑嫜拜姊妹。不知誰是阿奴他。他字叶韻。頗得女郎口吻。

老舉

粵中呼妓女爲老舉。隨園以爲即舉舉師師之意。余在梧郡游永春花園。壁上見有某書集漁陽絕句一首。云。南湖新漲水連天。花氣薰人又破禪。少日題詩

無恙否。此中曾泊孝廉船。詩有別趣。故錄之。以備一說。或以爲舉與妓。粵音相近。老舉即老妓之訛。其說近是。

山靜主人詩

曹文正公賜第在京師南半截胡同。余於乙丑冬安硯其家。曾孫二人。年皆童稚。架上書不下萬卷。盡飽蟬魚。一日偶檢續鷺湖棹歌一卷。中夾小牋書一詩。云。弓鞋小試下珠樓。翠鎖重門一院愁。燕子似憐人寂寞。雙棲絮語話溫柔。未署山靜主人。楮葉猶新。知非舊物。詢於劉念堂世兄。始知爲孫文定公孫婦某作也。孫夫婦時占脫輻。故詩若寄意。然言爲心聲。讀其詩。可知其遇矣。

癡語入詩

余戚某童時喜讀書。而性最癡。侍官任所。時署中人均呼爲書呆子。一日早起。謂某婢曰。爾昨夜夢見我否。答曰未。大斥曰。我昨夜夢中分明見爾。爾何以未見我。怒扑之。往訴於母曰。癡婢該打。我昨夜夢見他。他堅說未夢見我。豈有此理耶。人咸笑之。髫年時聽長者述說。因不去懷。余之古意詩云。少女牽郎衣。欲

言低俯首。昨夜夢歡來。歡曾夢儂否。即祖此意。

嵌字楹帖

京師伶居妓館。筆墨多有可觀。楹帖一端。尤以嵌字工巧爲尙。前之秋水爲神。玉爲骨。芙蓉如面。柳如眉。無論矣。後之繼者。如如意云。都道我不如歸去。試問卿於意云。何太平云。過眼烟花成太息。當頭風月費平章。玉琴云。花覆茅檐。可人如玉。月明華屋。伴客彈琴。大姑云。大抵浮生若夢姑。從此處銷魂。采珠云。欲采不采。隔秋水。大珠小珠落玉盤。素卿云。樊素情鍾白太傅。長卿意注卓文君。某人代友贈穉青云。徐穉果然名下士。小青原是意中人。數聯皆工整。可玩。

斷句

千古美人全福少。六朝才子至尊多。不知誰人句也。何鐵琴司馬爲余誦之。

女兒紅

揚州土人謂蘿蔔紅而小者爲女兒紅。自初冬賣至晚春。其色嬌豔可愛。錢塘韓就之曰。華揚州畫舫詞有句云。一種柔情人不覺。春心濃透女兒紅。即謂此。

也。

女訓

普蘭巖將軍陀保送女聯珠有句云。出嫁自應遵婦道。居家不似在官時。二句可補入女訓。爲挾貴驕夫者戒。將軍又有春草詩三十首。郭純香司馬和而刊之。常自佩戎馬書生小印。其風流儒雅如此。

紅花埠題壁

曩在春明。於友人處。見有謝韻芳女史絕命書一紙。詞甚委曲。不甚記憶。大致韻芳爲王公子詩婢。自受春風一度。蚌竟含珠。大婦從而媒孽之。逼歸廝養。謝致書乞歸。爲鄰兒誤落。中有三日不來。以阿芙蓉從事之語。書爲宜南坊某會館人檢拾。抄貼各巷。尋其居址。都人士率能言之。嗣在山東紅花埠逆旅。見有天壤王郎題壁五絕詩。意與書詞吻合。殆即薄情之王公子。詩云。漫將容貌擬朝雲。才調原堪敵左芬。記得斷腸詞句好。陶然亭麓一孤墳。果然天壤有王郎。此語回思却亦當。我是負卿復何語。不應飛語聽妻房。華牋尺幅意千重。絮語

叨叨說惱儂。卿事盡教斷養誤。至今遺恨阿芙蓉。傷心悔恨忽交加。一誤何堪
又再差。死後春蠶猶有子。不知今去落誰家。倏然驚地浪濤生。倉卒驅車出鳳
城。劉媪不來卿不死。疑團終古不分明。按詩意謝已飲藥死。王郎始悟似此負
心人。顧安得虬髯公攫之爲下酒物哉。

雙飛燕

舟楫之目。雅俗不同。粵西謂兩人四槳者。曰蜻蜓艇。言如四翼鼓動也。一人兩
槳者。曰雙飛燕。其名尤雅。然未見前人入詠。詩人彭星丞光輔有池南曲云。朝
來折楊柳。折柳織筠籃。採荷花。荷花滿池南。池南農家住。門前垂柳樹。願藉雙
飛燕。飛入花深去。其運用典雅如此。又爲後來添一詩料。

調某廣文賦小星啓

香河陳砥堂先生。官天津學博。時有同事某廣文。履任未久。輒遭奉倩之傷。以
衾裯獨抱。思賦小星。陳爲物色之事。既諧。而廣文教之讀書習字。鍾愛逾恒。陳
戲爲小啓調之。其詞云。司鐸新膺。鼓盆旋賦。重謀鸞續。頻倩蜂媒。詎物色之幾

經。竟低昂而莫就。爾乃尋香妝閣。空憶菱花。因而問渡津門。寄懷桃叶。恰值綠珠有贈。用聯締足之緣。未免紅袖關情。倍踰畫眉之寵。如花美貌。睠言顧之。一廣文姓。咏絮才高。何慚白也。一姬姓。具此靈心慧質。雅宜茹古含今。用將帳底芙蓉。移移作門中桃李。鴛幃悄寂。女博士進而受經。馬帳深沉。莽先生今將傳火。案頭燈影。拂花影之迷離。盒底脂香。蘸墨香而馥郁。向枕邊而問字。雞舌香含。坐牀下以學書。鬼毫磨秃。消受春風。一度彌添滿座之風。沾濡化雨。多番強半。巫峰之雨。探取枕中之秘。講解從頭。隄防胯下之錐。殷勤刺股。多以為富。俾寢饋乎大家。引之入深。得胚胎乎諸子。有時輕攏粉項。面命兼及耳提。有時略接櫻唇。指畫自須口授。有時低垂鴛頸。妙議應有會心。有時尖聳鳳翹。弟子居然高足。倘真精之未得。尚須卿自事鑽研。如一問之可通。問是誰為開茅塞。閒曹無事。鄭康成何嫌往愬之頻。清興既闌。邊孝先又作欲眠之態。此則可補入文章游戲。

子重詩

劉子重秋曹銓福。別號白雲吟客。嗜金石。善畫梅蘭。終日緼袍敝屣。晏如也。在京與余爲石交。遊田盤。歸以紀程詩見示。中有和段甲嶺題壁一首。序云。壁有某女子題詩。以段甲爲斷家。和者甚衆。有斷甲何如作斷家。祇因飄泊在天涯之句。因戲和云。斷得農家不斷心。兩情嶺上白雲深。農家未斷腸。先斷惹得相思。直到今。詩在有無間。如庾默意賦。

新語

百花詩內。欸冬一首云。僧房相遇兩心清。此際無情勝有情。我設一言卿試答。是卿逢我。我逢卿。主人以逢卿者。我逢我者。卿答余謂此語乃慧心禪理。東晉清談。

贈何蘭初名妓詩

女錄事何蘭初者。京師名妓也。解詩善畫。字亦秀潤。本姓濮。以大家女諱稱。今姓涇。縣吳蘭石孝廉契之花晨月夕。避暑消寒。恒與蘭石俱。性尤好靜。閉門謝客時多。故詩畫益進。蘭石爲作遣愁詩三十韵。素縑莊書。蘭初爲裝玻璃龕奉。

之入其室者。知非俗物也。友人曾作蠅頭楷手錄其詩見示。詩云。花發長安望
眼空。五年腸斷鳳城東。美人遲暮辜芳杜。遊子飄零例斷蓬。欲把秋心託明月。
須將春恨語東風。玉釵消息全無準。嗚咽笙篴唱惱公。楚雲縹渺隔巫峰。路杳
人間幾萬重。花底離愁三月雨。樓頭殘夢五更鐘。清歌宛轉頻憐子。舊曲依
稀最懊儂。日暮西風秋瑟瑟。涉江愁殺采芙蓉。鐵板銅琶唱大江。肉兼絲竹遏
吟腔。最難好月常三五。未必鴛鴦定一雙。往事渾疑花對鏡。閒愁辜負酒盈缸。
綠陰幽草空階滿。悶對春風獨倚窗。黃絹新裁絕妙詞。墨花和淚寫烏絲。難尋
舊渡迎桃葉。獨倚東風唱柳枝。蝴蝶閒愁芳草覺。杜鵑春怨夕陽知。英雄兒女
憐同病。走馬章台有所思。綠陰如水送春歸。江草江花怨夕暉。繞院寒深蝴蝶
瘦。畫梁夢穩燕雛肥。蓬萊音信沉青鳥。京洛風塵感素衣。昨夜月明今夜雨。伯
勞東去燕西飛。十斛珍珠聘尙虛。買鄰且喜近仙居。痴心自誓同明燭。病髮殊
難戀曉梳。短筑淒涼燕市月。瑤箋鄭重漢陽書。折花親見門前劇。回憶東風識
面初。夜闌涼意撼庭梧。新月溶溶沒欲無。蕪館張燈飛蝙蝠。畫檐結網羨蜘蛛。

情來燕剪愁難破。擁到鴛衾夢亦孤。十二闌干都倚遍。滴殘清淚到蘼蕪。小院
春晴夕照低。畫簾不捲燕雙棲。林花著雨紅先褪。岸草當風綠易齊。好事多磨
姑惡喚。佳期屢誤子規啼。暮春天氣東風虐。怪煞垂楊盡向西。星辰昨夜麗天
街。西角東張事莫諧。捫腹早知心匪石。消愁那得酒如淮。雙鉤作畫肩相並。七
巧成圖手自排。三五年來如醉夢。相逢何事得開懷。一寸相思一寸灰。玉樓春
盡獨徘徊。月中舊約寒攀桂。笛裡新聲怨落梅。任我青衫添酒債。憑君紅葉作
詩媒。剪刀縱道并州快。祇恐情絲剪不開。準擬桃源好問津。芒鞋重踏軟紅塵。
煙雲幻境看頻誤。風雨迷樓認不真。明月有知應墮淚。好花無恙暗傷春。多情
祇有燕台柳。猶自垂青向舊人。空堂涼雨酒初醺。冰簟銀床夜漏分。飛鳥何依
應似我。錦屏無主最憐君。天邊那有常圓月。嶺上從無不散雲。休道十年成薄
倖。揚州夢醒杜司勳。馬纓樹下掩重門。合共西施住一村。楊柳曉風催別騎。桃
花春水送吟魂。人間變態看雲影。客裏閒愁驗酒痕。臨別贈言須記憶。莫將芳
草怨王孫。曉閣清尊興未闌。滿簾風絮逼人寒。梨雲淡白愁同夢。蘿月昏黃怯

倚闌野馬縱橫催短景。流鶯婉轉惜春殘。當筵莫唱梅村曲。腸斷東風憶畫蘭。
流水光陰去不還。年來事事恨緣慳。秋深病翮傷黃鵠。春鎖雕籠惜白鷗。敗葉
何心辭故樹。癡雲無賴滿秋山。勞勞塵網羈朝暮。頗羨沙鷗野鶴閒。信是三生
石上緣。去來今裏恨纏綿。芭蕉愁重舒還卷。老藕絲長斷復連。韋曲池台春似
海。蕭齋風雨夜如年。花開花謝尋常事。籬溷沾污絕可憐。客窗孤影生涼宵。鈴
索無風自動搖。畫檻秋多紅豆冷。博山香燼綠烟銷。每從無事尋煩惱。賴有行
吟慰寂寥。鎮日爲誰苦惆悵。幾分瘦減沈郎腰。石榴消息幻如泡。怕見三星掛
柳梢。呌月棲鳥寒繞樹。驚秋孤燕病辭巢。漸防愁思催人老。聊借詼諧解客嘲。
我不卿卿誰復爾。莫將心力等閒拋。洛水神珠解漢皋。空江悵望意徒勞。蕊宮
環珮風聲寂。桂府樓台月影高。莊叟寓言賦秋水。靈均幽怨託離騷。半生總被
情魔誤。不信元龍意氣豪。紫陌春歸唱踏莎。落紅啼缺奈愁何。橋邊新柳迎人
慣。江上春帆送客多。對鏡有時愁獨影。通辭何處託微波。攤門無復相關意。惆
悵當年子夜歌。傷心第一是無家。鍊石空勞補女媧。好借梅花成眷屬。莫隨桃

李誤芳華。鶯兒喚夢春難醒。燕子尋巢日易斜。去歲潯陽江上過。月明蘆荻泣琵琶。頻年兵火感滄桑。潦倒詩場與酒場。太瘦餘生雙鬢稿。無多私語一燈涼。寒林葉落驚秋早。孤枕更殘怨夜長。不解近來緣底事。朝朝吟斷九迴腸。暮城畫角太淒清。靜掩虛堂萬感并。魂夢忽驚雙影隻。去留不信一身輕。並無歧路堪傷別。明是年華却怨生。雨雨風風天不管。傷心太半是秋聲。玉搔頭上驪蜻蜒。衫影燈光蕩畫屏。珠箔今宵閒好月。銀河幾日渡雙星。鴛鴦好夢愁驚鴨。螺贏勞身瘁負蜩。風露滿天人悄立。隔窗怨語不堪聽。寂寥心事冷如冰。祇有情根斷未能。兒女多情原是佛。英雄末路半爲僧。中年到處多哀樂。世故從今少愛憎。一卷楞嚴經讀罷。清齋勤禮梵王燈。紉佩湘皋待蹇修。肯拋傾國覓封侯。鵲愁秋漢勞無補。蠶吞春絲死不休。酒入愁腸都化淚。寒催病骨易驚秋。問卿知否蓮心苦。莫向西風怨並頭。溫柔鄉裡畫兼吟。低首妝台有鑄金。春雨白魚書底事。秋風紅豆曲中心。鸚哥晝舞防私語。鸛子朝飛盼好音。檢點征衫驚歲月。酒痕爭與淚痕深。舉杯邀月影成三。半是詩狂半酒愁。我是蓼心偏耐苦。君

同蕉味必回甘。因緣早信前生定。空色都從舍利參。寄語春光須護惜。楊花容易滿江南。連篇別恨賦江淹。禁得新愁逐日添。鹿夢覆蕉終屬幻。蜂房釀蜜爲誰甜。枕邊蛺蝶驚風雨。山上蘼蕪感素縑。萬種牢騷人不識。鄉愁客思一時兼。海邊精衛石頻銜。此恨綿綿口獨緘。修竹猥寒憐翠袖。飛花和淚點青衫。新詩拉雜愁千疊。舊事分明月一函。情海蒼茫風浪險。早尋崖岸好收帆。

鹹水妹

上海蛋戶之爲海娼者。人呼之爲鹹水妹。石龕詩卷中之別有因。鹹水妹絕無滋味。淡巴菰句。卽上海作也。吾恐今之見金夫不有躬。而別締因緣者。尙不僮若輩已也。可歎。

半截美人

可笑畫工無見識。動人情處不曾描。某題半截美人句也。拙直少含蓄。不如李某之丹青。不是無完筆。寫到纖腰已斷魂。如初寫黃庭。到恰好處。正可與前詩作一轉語。

似樣女史詩

國朝閨秀能詩者多。正始二集所選不下數千家。後正雅集續刻又數百家。而及身親見者則甚屬寥寥。茲得芸薊閣詩草讀其序乃知爲海觀察某女公子也。年未及笄。著作盈寸。多有可觀。余最愛其風定殘荷尙有聲七字。謂得靜中趣。

香塚詩

香塚前樹短碣。詩云飄零風雨可憐生。香夢迷離綠滿汀。落盡夭桃。又穠李。不堪重讀。瘞花銘。其銘曰浩浩愁茫茫。刼短詞終明月缺。鬱鬱佳城中。有碧血。碧亦有時盡。血亦有時竭。一縷烟痕無斷絕。是耶非耶化爲蝴蝶。都人士題詠甚多。樊文卿大令詩云長埋玉骨恨難消。惆悵城南路一條。蘆荻蕭蕭聲作雨。吳娘樓上憶殘宵。又草沒荒邱劇可傷。白楊零落不成行。年年多少游春客。偏向孤亭吊女郎。門前車馬往來稀。回首平康舊夢非。不見臨風雙蝶化。殘紅滿地落花飛。彩雲散去渺無痕。小字流傳短碣捫。我輩鍾情還自笑。擬持杯酒酌芳

魂數詩工於取神且妙在不說破

小昉寄遠曲

延小昉秀滿洲人布衣丙寅秋晤於寶竹坡太史齋中談詩移晷而別嗣竹坡以小昉詩見示余最愛其寄遠曲末句云儂心不怨儂不歸只恐日久郎心非雖因舊而益妍

臂花

宣大在北口外土人生子每針腕臂作字或花形涅以藍靛蓋恐有離異可爲誌也其意甚古

看月詞

詩人彭星丞嘗述趙笏君爲夢白先生之兄古樂府有看月極佳云郎住溪南屋妾居溪北樓隔溪同看月月月在樓上頭郎見月不見妾妾見郎不見月吁嗟看月同一時妾獨見郎郎不知從今不恨郎情薄郎情自薄妾自癡不然天上無私光何爲有月專照郎盈盈一水不得語相思大抵皆如此此章新聲古意

全得張王神理。無怪彭子之津津樂道。贊不去口也。

對鏡詞

梁詩拔有對鏡詞云。所恨太分明。不諱妾顏色。語頗含蓄。余因之有悟云。中庭有華月。皎皎含清輝。明能燭萬物。不言人是非。即反用其意。

陰妓詩

曹華卿秀林明湖瓶花詩社陰妓也。有代某寄人二絕極佳云。鈿雀銀蟬玉蕊冠。妝成不出怕人看。如何最是堪憐處。獨立空廊小襪寒。又酒闌歌散太無聊。算定花時訪翠翹。再說相逢說相憶。自從去歲到今朝。末語尤非思索。可到。是深於情者。

課婢圖

一日在廊房頭巷。見畫室懸一課婢圖。筆墨不甚高超。旁題一絕。頗瀟灑可愛。其詩云。日日抄書懶出門。小窗弄筆到黃昏。丫頭婢子忙勻粉。不管先生硯水渾。按書畫皆俗工。不記何人詩也。

段甲嶺題壁

段甲嶺店壁有詩二律。署欵漫滅。人傳誦之。詩云。玉環誰識再來人。客裡年華夢裏身。故劍翻勞今日問。嫁衣爭似舊時新。傳將佳語皆成識。種就浮生未了因。空谷楊花飄上下。任地落溷與沾茵。又輾轉春宵夢不成。舊時女伴總關情。眉痕曲似初三月。心事懸來第四更。空自效顰爲畫餅。憑誰洗手試調羹。癡懷莫笑東鄰婦。徹夜金錢問卜聲。

紅玉墓

紅玉。浙人。失其姓。桂撫陳文簡公詩婢也。工詩善畫。喜棲霞山。年十七卒。葬於山麓。文簡爲建青蘿閣。種桃萬株。春游士女到者無不以酒奠之。書傭李少谷有句云。萬樹桃花繞墓門。青蘿閣廢舊花村。賣錫天氣香成海。一片盈盈倩女魂。墓側產香茗。人呼爲紅玉茶云。

全史宮詞

全史宮詞。爲樂亭史香崖夢蘭著。共詩千餘首。上自軒轅。下至勝國。凡有繫於

宮壺者。悉採輯之。洵爲宮詞之大備。詩亦清新典雅。可步仲初花蕊後塵。此集刊於丙辰年。故偏遠處尙未周至。鄴侯架上。此種亦不可無。

雁門雪

淮陽賀生曉霞者。故大同令某公子也。年少美丰姿。妙詞翰。幼聘同里謝氏女。中表姻親也。中間兵燹流離。兩失音耗。賀以父虧帑無償。羈留雲中者近十稔矣。性疏脫。不視家生產。貧益甚。因依雁門山僧爲居停。一日快雪初霽。有輿從多乘至關。秣馬絆輪。喧闐於外。賀詢之。知爲陝右李鎮軍也。俄一武士引官眷入寺禪寮茶叙。侍婢數輩。中有一喚雪鴻者。年可十五六。尤端雅娟秀。少頃奉主命詣殿然香。賀心醉之。於其足蹟過處。以葦畫地吟哦不已。鎮軍見而異之。逼視則書斷句云。纖纖滿地弓鞋印。好似飛鴻踏雪泥。鎮軍雖武夫。雅好文字。深憐其才。立談半响。議論風生。益奇之。因呼婢出拜。舉以爲贈曰。此十四字媒也。遂命戒後車。約赴幕府。賀遜謝不可。強之乃同行。定情夕。各叙里居家世。始悉女卽所聘謝氏子也。悲喜交集。不覺慟哭失聲。鎮軍聞之大喜。另爲諏吉合

蚤同僚各製詞爲賀。近聞賀已薦升太守矣。鎮軍老無子。賀夫婦事之甚謹。友人唐菊階與賀姻婭也。詳其事爲譜雁門雪傳奇以張之。余嘗謂牛渚月馬當風皆爲武夫生色。併此可爲三矣。

木蘭從征圖

徐癡青來書。箋幅甚闊。玩之爲從征圖。有詩云。十年征戍斷河流。脫甲歸來拜殿頭。笑煞人間兒女子。祇教夫壻覓封侯。不署作者姓氏。後示槐生云爲近人邵廷烈詩。

老少年詩

年華逝水悵如斯。老大焉能勝少時。縱使紅顏真箇好。旁人也說是臙脂。此滄州劉秋舫詠老少年詩也。秋舫以選拔入都。鬱鬱久居。艱於一第。故詩若寄慨然。

可憐詞

綠兒者。梨園伶人也。色藝俱絕。華陰袁聽濤爲作可憐詞四律。人多和之。詩云。

傾城花底喚秦宮。水上鴛鴦雪上鴻。楊柳偶隨燕市綠。櫻桃不數鄭家紅。顰如越女愁俱好。曲顧周郎誤亦工。儂說可憐憐未得。如卿真個可憐虫。又茜紗裙束沈郎腰。不是柔腸骨亦銷。弱貌漫矜張窈窕。戎粧也學霍嫖姚。歌翻楊柳聲聲慢。香印蓮花步步嬌。一曲回波人似海。青燈紅燭可憐宵。又牙根微轉幾聲鶯。低唱無聲勝有聲。一縷情隨眉語度。四條絃和指音清。香分金鈿增長恨。花墮珠樓認小名。吟遍洛神都不稱。只應喚作可憐生。又紫雲魂斷豔陽晨。解識司勳顧每頻。似此情深真欲醉。縱非見慣也相親。二分春好花爭笑。百轉聲柔鳥共嚙。忙殺旗亭眉樣柳。含煙齊效可憐顰。

補錄平頭對

錢塘何必尋蘇小。寶樹居然依謝家。金谷名流饒粉黛。香山詩興到琵琶。河誰擅若蘭。詩湘蘭。畫。恒。毋忘香君扇。文君琴。秋江月。浸冰壺。影。蘅院風敲玉珮聲。蓮花比君子。清風來故人。輕燕受風。衆仙同日。喜喜歡歡。天。地。地。雲。雲。雨。雨。暮。朝。朝。眉。痕。淺。淺。春三月。仙骨珊珊第一花。花香能醉蝶。鶴夢不離雲。

冥配

山右土俗。凡男女納采後。若有夭殤。則行冥配之禮。女死歸於壻塋。男死女改字者。另尋殤女。結爲婚姻。陳吉令葬。冥衣楮飾。備極經營。若婚嫁後。家君宰曲沃時。曾有邑紳三姓。因爭冥配興訟者。習俗錮人。不可解也。

女貞子

詩人姚伯鵬者。貴陽庠生也。咸豐中卒於滇。詩多散佚。友人邵君松篁常述其女貞子一章云。女貞子。子離離。妾夫親手折。贈妾初嫁時。妾心之死死靡他。妾夫一去不還家。女貞離離在妾手。妾夫還家妾骨朽。詩爲某節婦作也。短音促節。餘韻邈然。與王仲初望夫石一篇。可相頡頏。

芙娉女史詩

搭連店旅壁有芙娉女史題詩云。四千里路還家日。廿一年華絕命時。入戶羞稱新媳婦。懸梁誰惜女孩兒。身如秋燕都成客。死到春蠶尚有絲。來往詞人應墮淚。讀儂題壁幾行詩。嗣其兄過此。又題數語於壁云。芙娉妹子亡後。搜其遺

篋其領聯已易爲金玦已成千古恨。玉環重訂再生期矣。

馬嵬詩

林文忠公則徐有馬嵬十詠。余未之覩。惟費盡金錢賈禍胎。嬰龍誰遣入宮來。九原聽罷漁陽鼓。可有胡兒哭母哀。一首爲人傳誦。急錄之。

徐宗海輓妓長聯

李萼仙農部壽蓉述其友人徐宗海茂才輓薨林妓長聯云。試問十九年磨折。卻苦誰來。如蠟自煎。如蠶自縛。沒奈何羅網橫加。曾語郎云。子固憐薄命者。何惜一援手。耶。嗚呼。可以悲矣。憶昔芙蓉露下。楊柳風前。舌妙吳歌。腰輕楚舞。每看酡顏之醉。頻勞玉腕之携。天台無此游。廣寒無此遇。會真無此緣。縱教善病。工愁。拚他憔悴。尙恁地談心遙夜。數盡雞籌。況平時裊裊婷婷。齊齊楚楚。對云。豈圖兩三月歡娛。便拋儂去。望魚長杳。望雁長空。料不定琵琶別抱。私爲渠計。卿豈味夙根哉。而肯再失身也。噫嘻。殆其死矣。迄今豈蕊香銷。蘼蕪路斷。門猶崔認樓已秦封。難招紅粉之魂。枉墮青衫之淚。女媧弗能補。精衛弗能填。少君

弗能禱。尙冀降神示夢。與我周旋。更大家稽首慈雲。乞還鴛帖。合有箇夫夫婦婦。世世生。此聯膾炙人口。或以爲蕭史樓作。楚南某改其詞嘲某童云。試問數十天磨折。却苦誰來。如蠟自煎。如蠶自縛。沒奈何學使按臨。曾語人云。我固非枵腹者。不作第二人想也。嗚呼。可以雄矣。憶昔至公堂上。明遠樓前。飯夾蒲包。袋攜茶蛋。每遇題牌之下。常勞刻板之謄。昌黎無此文。義之無此字。太白無此詩。縱教運蹇時乖。拚他滾跌。猶妄想完場酒飯。得列前茅。況自家點點圈圈。刪刪改改。豈圖兩三次簸翻。竟拋儂去。望魚常杳。望肉常空。料不定科房寫落。爰爲官計。彼自有衡文者。豈將後幾排刷耶。噫嘻。殆其截歟。迄今照壁。慳轅門路斷。羞貽婢僕。賀鮮親朋。愁聞更鼓之聲。怕聽報鑼之響。廩生勿能保。禮房勿能求。鎗手勿能殺。或者祖功宗德。尙有留貽。且錄將長案姓名。進觀後效。合有箇袍袍帽帽。頂頂靴靴。此聯詼諧入妙。鄰於刻矣。

至性詩

榮古香丈有病亟口號一絕云。病亟呼親本至情。夢魂顛倒語分明。此身安得。

常如病時向膝前呼幾聲此與哭一聲叫一聲兒的聲音娘慣聽如何娘不應
同一至性至情所流露也

秋海棠詩

秋海棠爲淚所化詠是題者多拈此字陳陳相因殊令人厭銅陵章完白穗芬
有詩云紅粉粧成對夕曛半偎籬落半牆根娟娟笑靨西風裡不見當年舊淚
痕翻得新而不腐

楊烈女

貴州鎮遠縣秀冲村有女楊氏幼失怙恃依兄嫂居年甫十四適苗匪滋擾其
姊嫁鄰村恐妹受污強暴往迎之至途次遇差役數輩藉口盤結留難久之就
中一年少者握其腕出言調笑女不自堪乘間墜橋下死次日長官詣驗見受
握處筋骨俱青皮肉脫如刀削適符其跡當事者異之旋拘一差囚殺之後戎
馬倉皇亦寢其事謝遂生少宰目擊爲余詳言囑紀其事枕上成句云肯教白
壁玷微疵粉骨齎身也不辭橋下一弓清淨地伊誰爲建女貞祠是夜夢有女

冠一人向余肅拜。問其名不答而去。嗚呼。女果有靈耶。當兆夢於當事。或爲建祠。顧安得有心人。易橋名爲女貞。以慰幽魂云。

女兒亭

秀水朱梧巢麟應。爲竹垞先生侄孫。著有續鴛鴦湖歌百首。拾遺補闕。可稱嗣音。其一云。斷橋曲水古桐涇。一棹猶夷破綠萍。不及皂林塘上路。抽帆直過女陽亭。按女陽亭一名女兒亭。嗣見山陰吳覺先尊尹題竹垞權歌一絕云。曝書亭子題詩句。不減徐熙寫畫屏。賸水殘山都入拍。如何脫却女兒亭。使正續權歌合刊。當無此遺議矣。

梧州竹枝

馬少蓮茂才。粵西人。性風雅。工詩。暇時喜作狹邪游。每遇妓女。褒之則聲價忽增。貶之則杯盤失措。大有崔涯狂士風。嘗作梧州竹枝數十首。極嬉笑怒罵之致。中有一首云。六寸圓膚軟似綿。拋將羅襪坐床前。高翹脚。指多靈動夾住煤頭。好吃烟。讀之不禁失笑。後聞箇中人習以爲常。非此款客不爲親。眞惡作劇。

矣。

閨閣詩

女兒出嫁。新婦歸甯。雖屬韵事。而絕少佳詩。惟隨園有句云。要看崔盧好奩贈。十三經壓女兒箱。又某閨媛句云。匆匆小住又歸家。行李無多一擔賒。添得描金紅盒子。半盛詩草半盛花。閱此覺羅帳香車。黯然無色矣。

馮彩珍

馮氏彩珍者。浙人。父游粵館書記。歿後貧不能歸。氏幼精女紅。善繪事。家數口。賴以存活。尤妙解音律。性耽吟咏。風流倜儻。有名士風。後所適非人。綠衣興怨。鬱鬱以終。其詩不多見。偶於吳月農處得其自傷一律云。疎雨逼窗涼。秋燈夜漏長。狂歌聊當哭。多病厭熏香。短髮悲臨鏡。羞顏嬾下堂。非關郎薄倖。妾自減紅妝。末二句含蓄無盡。使人得言外意。

綠珠井

綠珠井在粵西博白縣城外。人至其地。多留題焉。居瑞徵女史有五律一章云。

荆棘銅駝泣。名園野鶴愁。江山餘一井。兒女亦千秋。夢已分香斷。踪猶濯錦留。芳名誰與共。盼盼有高樓。筆力挺健。自是女郎之秀。

花神記

粵西藩署園中花神記。某方伯作也。王綬庵少尉。向余言之。記云。余闢園於署之東。鑿池於亭之側。土工得骨一具。以告埋香無主。葬玉有方。命別爲掩之。不知何代。亦不知何人也。已而有登紫姑壇來致謝者。曰。妾姓阮氏。字鳳凰。本女校書也。生長安中。流寓粵右。值滇藩吳三桂之變。睢陽人少。人肉無多。魏博兵危。鬼雄有幾。妾與民間寒士王玉峰。定情有約。王旣血刃。妾亦投繯。時則康熙初年也。趙氏一塊肉。昔屬民家。滕王三尺墳。今託官宇。余聞而悲之。因爲傳之。曰。昔小玉之於君虞。雙文之於微之。女之致情於男。古誠有之。茲殆過矣。嗚呼。太白高歌。猶憐飛燕。小青飲泣。傷感孤鸞。惟其能以情死。故能以魄生。拾碎玉於池中。築錢塘蘇小之墓。做乞文於地下。作同州清娛之銘。鳳生於順治初年。歿於康熙初年。生年十九。歿將二百秋矣。生也不辰。烟花寥落。死而不朽。殘骨

續紛。余不敢冒掩骼之仁。亦不能不作葬花之誌。故書其事。且肖其像。使於園中爲司花使云。又詩曰。名園珍重出牆枝。小傳曾刊倚壁碑。葬玉埋香多韵事。有人親志郭公姬。亦韵事也。

校書答客

陽少南孝廉。初游某縣幕。與女校書某識。時女方雛年。越數載重至。陽已于思女亦頽而長矣。一日與舊侶秦壽芝同訪之。秦訝其長。曰。三年不見。何長之速也。陽戲調之曰。女兒家日近男子。故易長耳。女輾然前捋其鬚曰。虬髯公殆亦日近女兒而易老耶。三人相視而笑。語雖詼諧。實足發人深省。

宮詞

宮詞之體。宜美不宜刺。言之可無罪也。然專寫宮闈嬉戲。服御奢華。亦殊失言詩之旨。王仲初花蕊夫人二詩。爲此體之祖。其後作者代有其人。惟非當時臣妾則易着筆矣。仲初百首中。余尤愛其新秋白兔大於拳。紅耳霜毛趁草眠。天子不教人射殺。玉鞭遮到馬蹄前。其聖主仁民愛物之意。隱然言表。頌中寓諷。

斯爲此體當行。

六如亭詩

東坡有妾曰朝雲。姓王氏。隨侍惠州。年三十二歿。葬於惠州小西湖竹橋之西。東坡自額曰六如亭。因姬生前愛誦六如偈也。過客題詩不下什伯。佳者絕少。惟喻少白一絕云。花田寂寞草青青。麥飯誰來吊素馨。修得儂家好夫婿。至今人拜六如亭。洵不愧名作。

不肯紅 無心綠

紹興縑帛有一等似皂而淡者。謂之不肯紅。亦退紅之類。見老學庵筆記。厲太鴻南宋紀事詩云。舞兒二八腰身小。染就春衫不肯紅。卽此也。俗稱淡青色爲無心綠。以之作對。洵稱佳偶。

張秀士

鬼神之事不可遽信其無。尋常果報見於書中者多矣。湖南某科秋試。一瀏陽士子入闈後。夜半忽於卷首大書八絕句。題畢自經死。其詩叙事甚顯。惜僅記

其七。詩云。驀地姻緣已結成。嗚呼一別十三春。而今場屋重相會。郎面依稀認得真。君携奴手入羅幃。奴道親言不可違。郎說還家遣媒妁。隨行六禮聘奴歸。誰料君心異妾心。妾心無日不思君。君歸一載方三月。遺妾何殊陌路人。樓台鼓樂鬧喧嘩。問婢誰家嫁小娃。婢道前年張秀士。而今娶得郭三家。傷心腸斷如刀割。一段閒愁睡不成。今夜月明人靜後。青綾一幅了殘生。今歲神巡赫更威。五更纔許入秋闈。來時尋遍東西廡。誓與郎君結伴歸。一片癡心死未灰。憐儂有約子無媒。滔天罪惡由君作。孽鏡台前訊一回。觀此則輕薄子可思自反矣。

詩女子墓

貴州省城東門外。棲霞山下。有詩女子墓。不詳其名。碑陰刻集唐七絕二首云。聞同姊妹到山家。雲澹風微日已斜。袖裏天香三百斛。隨風散作白蓮花。遙指紅樓是妾家。烏衣巷口夕陽斜。自恨身輕不如燕。銜取香泥葬落花。

玉如女史

布衣陳梅臣之母王玉如女史。山陰人。通經史。工詩畫。于歸後。中年從夫游幕榕城。適寇至。避地江鄉。望外不至。曾口占絕句云。瀟瀟風雨過橫塘。添得書屏一味涼。衆鳥投林栖已定。如何飛燕未歸堂。離懷愁思。情見乎詞。有詩三冊。惜兵燹之後。都爲灰燼矣。

芷香女史詩

桃花馬上劈吟箋。回首家山路幾千。消受軟紅塵十丈。易陽門外月如烟。又朔風吹到滿城雞。鈴柝聲中月向低。記得去年今夜夢。梅花香裡在遼西。此錢芷香女史題壁詩也。于易陽旅店見之。

老妓行

朱子良太守。山陰人。名爾輔。喜吟咏。著有履冰臥雪詩三冊。曾以見示。佳句甚多。余尤愛其老妓行一篇云。春風層層吹簾幕。流鶯無情燕子惡。青樓老大感歲華。含羞無語淚珠落。憶昔少年歌舞場。裙繡芙蓉簪芍藥。旗亭擅名爭纏頭。白玉爲梁金爲屋。秋風春月絲竹聲。朝朝暮暮金尊樂。潯陽江頭度等閒。燕子

樓中守舊約。楊花零落桃花飛。萍自無根蓬自弱。舊時巧樣妝。而今名盛傳。長安舊宅琵琶譜。而今絃索家家撫。君不見舊時教坊諸姊妹。十年前已隨朝貴。字擬句摹極似長慶集中得意之作。可謂唐臨晉帖。幾於亂真。

夜來香

花中之夜來香。直北頗貴。在都時曾以當十錢。百文買花數朶。及至粵西。人多取以入饌。雖煮鶴羹。燂桐。大殺風景。然風味亦頗清美。余謂於餐菊之外。又添一故事。一日與秦壽芝諸君子。酒樓小飲。適有此品。壽芝言此三字對難。其偶余戲拈盞中春不老示之一時。同人頗以爲工。蓋因其本地風光耳。

桃花扇題辭

榮吉甫茂才題桃花扇三絕云。高嶺寒梅鎖寂寥。白門疎柳賸蕭條。行人到此休回首。一瞥繁華抵六朝。桃花零亂不成春。賴有冰紈代寫真。血染幾枝紅灼灼。勝他楚國不言人。激成黨禍國隨淪。如此清流亦未純。看到末流能赴義。讀書人愧說書人。此老滿腔憤慨。概乎言之。

雁字長短句

方玉坤女史順天人。聰慧工詩。長字丁筱舸部郎。丁南旋。久無耗。女士有若蘭之戚。偶賦雁字長短句見意。余於所親處讀焉。其辭曰。丁甯囑付南飛雁。到衡陽。與儂代筆。行些方便。不倩你報平安。不倩你訴飢寒。寥寥數筆。莫辭難祇寫箇一人兩字。碧雲端高叫客心酸。萬一阿郎出見。要齊齊整整。仔細讓他看。遊戲爲之初。無深意。後聞女史錄辭寄丁。丁卽日北上。此與竹影詞人同一用意。

孟秋蝶

余中表兄津門孟小帆茂才繼坤。應院試。咏秋蝶。有多情何忍別黃花之句。宗師擊節賞之。人多呼爲孟秋蝶。

詩尼

蜀中袁稻坡別駕云。在上海時遇一詩尼。法名慧空。年四十許。清修梵行。恒擊小銅鉢。乞施於市。其緣簿二面。一乞檀越施錫。一乞檀越捨詩。就中多有佳作。

題詩者尼亦和焉。暫亦賣詩。每首索錢百文。一日雪後。某閨媛喚其咏冬。閨怨。限八齊韻。尼口號云。昨夜雪初落。寒梅花滿蹊。甫吟二句。某又指押尼字韻。因續云。鄰家何所喜。破曉叫芻尼。蓋釋家呼喜鵲爲芻尼也。聞尼爲某宦家婦。患難相失。以此物色其家人云。

閨房燈

張廷禧。浙人。詠閨房燈。有十分喜事花先報。一點芳心草未灰之句。人嘆其工雅。稱題。

倒坐觀音

人游禪寺。聞木魚鐵馬聲。心跡雙清。有觸斯悟。故琳宮文字。以能啟發人心爲至。空談說偈無益也。京都永定門外有倒坐觀音庵。其聯云。問大士緣何倒坐。恨世人不肯回頭。淺淺語。何異當頭棒喝也。

漢口叢談

烏程范白舫。錯著漢口叢談一書。雜紀鄂江瑣事。詩多有可觀。內載仁和陸筱

飲飛昔館於漢上胡氏。居近狹邪。嘗有漢皋夜市詩云。江頭夜市散初更。醉帽
欹斜白袷輕。茉莉芝蘭香滿路。一街燈火賣花聲。夢醒猶聞隔院歌。香銷酒冷
奈愁何。高歌夜半涼如水。嘒煞簷前紡綫婆。後一首與謝疊山先生蠶婦吟同
一用意。

茗香女士

臨川李茗香女士。韋廬先生女曾孫。工詩善繪。長字大興邵筠生二尹。詩脫稿
多不示人。余偶於其弟一鶴少尉處見之。半焚餘不全之稿。有對鏡一絕云。清
曉臨粧次。相將畫黛眉。看來如欲語。笑問汝爲誰。寫得癡愁情。狀跳躍。帛上邇
來詩律尤細。斷句如竹聲。敲月碎。桐影礙雲流。飛蟲兼落葉。宿鳥擇高枝。諸句
均除淨脂粉氣習。洵爲女郎詩之健者。

瓶鞍

京都娶婦家新婦入門。則以五穀寶瓶授之。使其抱以出轎。又備小鞍以紅氍
覆之。令新人跨過。意取步步平安之兆。蘇氏演義謂國初婚姻。坐於馬鞍之側。

此塞外乘鞍馬之義也。西陽雜俎。今娶婦家新人入門跨馬鞍。鄭餘慶書儀亦有跨鞍之說。是五代前已然矣。惟抱瓶則未見於他書。

綺羅脂粉

姚壽門明經詩多酸餽氣。在山右時蔡楚香舍人編玉台新話。姚袖詩來謁。蔡閱數首。卽獎許歸之。姚殊不樂。一日語蔡友人曰。舍人選詩須潤筆金乎。某曰。不須金。但以綺羅脂粉斯可矣。逾日姚竟如其言。購四事餽之。時以爲笑柄焉。

七夕寄內詩

鎮安歸順州爲粵西極邊之境。黎崧山孝廉申產。邑中名宿也。與家君爲丙午同年。癸酉秋見先生於桂林官廨。以白雲親舍圖見示。中多名人題詠。又碧珊瑚村館詩若干冊待梓。集中佳作林立。余尤愛其客中七夕一絕云。雙星今夕渡銀河。儂尙飄零可奈何。寄語閨人休乞巧。巧妻天上別離多。

明妃曲

梅梅莊先生明妃曲。有自從紙上求傾國。不媚君王媚畫師之句。慨乎其言。彼

蓋自有所以傷心之故。與無金贈延壽。妾自誤平生。同一用意。然非使人媚畫師也。

龍舟竹枝

黔西何名三振新。有龍舟竹枝詞云。一回打漿一聲歌。歌意何曾吊汨羅。似說沿隄多野草。鴛鴦眠向此中多。旖旎風情。頗爲時所傳誦。蕉花軒主亦懸以示人。

子鸞女史

浦子鸞女史。金陵人。隨其尊甫淑和大令。宦游粵西。工書善詩。大令無子。愛之如掌上珍。歷任衝要。凡一切家政。悉委之。皆井井有條。可異者。於牙籌叢脞中。仍吟咏不輟。年甫及笄。著作已盈寸矣。女史與詩史周慎之德配申夫人有金蘭契。故得其詳。其返金陵。以詩留別申某云。數載金蘭意氣投。一朝各別話離愁。暮雲春樹相思際。惆悵關山獨倚樓。別緒環生月欲斜。燈前分袂淚交加。還期異日相逢處。携手同看姊妹花。情到癡時語亦癡。淚清和墨寫新詩。歸舟時

至金陵地。隴上梅花寄一枝。數詩矮箋莊書。筆致秀潤。詩稿不多示人。云此實非傑作也。

結緣豆

京都浴佛日。內城廟宇。及滿洲宅第。多煮雜色豆。微漉鹽豉。以巨籬列於戶外。往來人撮食之名。結緣豆。

銀釧獄

石琴詩鈔。爲宜賓李香雪映棗都轉所著。都轉以名進士。服官楚北。當戎馬倉皇之際。枕戈磨盾。恒吟咏不衰。集中新樂府諸篇。激越蒼涼。尤有裨於風化。其銀釧獄一篇。序爲棗陽富室吳姓女。年十七。幼字史氏。史子長無賴。爲其家所擯逐。女父母憐之。贈以衣裘。女暗脫腕上雙銀釧。納裹中。其父母不知。其壻更不知也。以衣質典庫。庫人疑之。鳴於官。官以爲眞盜也。不致詳詰。斃於杖下。越日女聞之大哭。投繯死。事在咸豐二年。今棗陽官數易。而烈女旌典無聞。棗人每道之。有泣下者。都轉哀其志。爲賦銀釧獄一篇。紀其實。詩云。郎無行。妾薄命。

父。母。誠。郎。郎。不。應。妾。身。未。嫁。淚。流。盡。堂。前。父。母。贈。郎。衣。暗。脫。銀。釧。爲。衣。媵。妾。心。
苦。郎。心。癡。釧。藏。衣。中。郎。不。知。以。衣。質。庫。庫。疑。之。官。惡。盜。賊。不。容。置。辭。血。肉。狼。藉。
千。杖。施。不。愁。打。折。鴛。鴦。枝。郎。尸。僵。妾。眉。鎖。父。母。慰。兒。兒。計。果。我。不。殺。伯。仁。伯。仁。
死。由。我。斷。送。梁。間。花。一。朵。生。不。同。衾。死。同。穴。可。吁。嗟。乎。女。之。生。心。何。深。牛。衣。風。
冷。愁。蘂。砧。女。之。死。氣。何。烈。鏡。台。慘。淡。鵲。啼。血。化。石。磨。筭。風。並。古。篋。篋。徒。唱。奈。何。
語。地。下。逢。郎。却。羞。郎。哭。說。銀。釧。儂。誤。汝。當。時。縣。官。伊。何。人。噫。嘻。爾。亦。有。兒。女。聚。
陽。三。年。天。不。雨。嗚。呼。此。人。此。詩。雖。欲。勿。傳。安。得。而。不。傳。也。錄。之。以。俟。采。風。者。

薄荷油

古者妓女送行。含辛爲泣。事常有之。不然終日送行。那有此副急淚也。兩粵間
多以薄荷油藏帕內。搵目立致潛然。故張修齋別駕梧州竹枝有云。一株樹下
繫行舟。對燭相看雙淚流。儂把鮫綃拭郎面。要知不是薄荷油。卽此也。

昭君詩

昔人謂絕唱之後。不應再作。此固然矣。然各有心得。亦不必盡如是也。貴筑楊

秀峰封翁集中有詠昭君云。不把黃金買畫工。進身羞與自媒同。始知絕代佳人。意卽有千秋。國士風環珮。幾曾歸夜月。琵琶惟許託賓鴻。天心特爲留青塚。春草年年似漢宮。清詞麗句。安見今人卽多遜古人也。

癡語

明知無益。未免有情。詩人多癡。往往如是。余友宗子美筆政。有怨情云。昨宵夢。郎回繫馬門前樹也。識夢非眞。聊尋繫馬處。不癡之癡。甚於癡矣。

陳杏姑

陳心香廣文鑑。粵西名宿也。女杏姑。性孝友。喜吟咏。廣文嘗述其斷句。有竹喧風過處。燈暗月明時。日色初沉岫。江光欲上船。沙盤孤嶼白。霞染半江紅。數聯均韶秀絕倫。無拈脂弄粉之習。廣文衰年。僅一子名魯青。卽女之兄。女史因其病亟。恐媼僕言自縊。乞代兄死。幸救甦。復閱數載卒。以父衰無嗣。憂慮而終。至今廣文言之。猶淚淫淫下也。

輓愛姬春燕

近某達官有愛姬春燕于立夏前一日卒。自書輓聯云：未免有情。此日竟同春去了。似曾相識。何時重見。燕歸來。情詞兼至。嵌字又不著迹。人以爲工。

玉環

在都門日。燈夕猜隱語。有一條云：圓轉其形。溫潤其質。一人一花一物一地。采贈玉連環二枚。數夕未有人揭。偶讀娜嬛記蓮花一名玉環。出三餘帖。余次夕卽以二字揭之。蓋一楊妃名。一睿宗琵琶名。一四川地名。一花別名也。贈采已明言之矣。一時皆未悟耳。

重諧花燭

楊子樓白元爲麓生太守封翁喜吟咏。曾見其自作重諧花燭詩數絕。其一最趣云：老女忙來掃洞房。諸兒捧鏡婦催妝。牙牙學語雛孫笑。爭索同心栢子嘗。可謂極伉儷天倫之樂矣。

碧仙女史

碧仙女史。蒲卜臣觀察蔭枚之姑。母性聰穎。自幼好讀書。手不釋卷。尤愛吟哦。

著有鏡花樓詩稿。咸豐間兵燹頻年。詩稿亦多散失。觀察嘗誦其咏走馬燈尾句云。若教滅却心頭火。定息干戈見太平。讀兄遺稿云。強記未能拋。未忍三更。繚下手抄忙。思歸甯一絕云。使回攜到故園葩。恰值閨人正憶家。同是離根來此地。花應憐我。我憐花。思意清新。是純以性靈爲主。

肉名姬妾

開天遺事。楊國忠冬月。選婢妾肥大者。行列于前。令遮風。謂之肉障。又楊國忠冬月。設妓圍以取暖。號曰肉屏風。又名肉陣。醒心集杭州別駕杜馴亦有肉屏風。天寶遺事。唐申王冬月苦寒。令宮女密圍而坐。曰妓圍。又唐岐王每冬月。于美婢懷中暖手。謂之肉手爐。又楊國忠每食。使衆妾分執肴饌。名肉台盤。耳新嚴世蕃以美女受吐。方咳嗽。美女以口受。謂之肉吐壺。又王天華媚世蕃。織成地衣。令美女三十二人。紅素各半。聞擲點應移某位。則趨位待。謂之肉雙陸。則愈出愈奇矣。

趙景淑女史

合肥女史趙景淑。字筠湄。少有夙慧。喜讀書。嘗集古今名媛四百餘人。各爲小傳。題曰壺史。乃著香奩雜考一卷。徵引詳博。至于韻語。特餘事耳。其論本朝詩。則取王阮亭李丹壑一派。沒時纔廿四。尙未字人。惜哉。

公子行

京洛少年。豪華相競。或櫓蒲一擲。避債高台。或狎昵雛伶。廣求美宅。多營多辱。比比皆然矣。沈起鳳公子行云。入門甲第五侯如。一擲櫓蒲百萬餘。門客莫敢紓薛債。雷家尙有內尙書。雛伶會奏鬱輪袍。喚去尊前伴酒曹。何處通家舊遺第。將來買與鄭櫻桃。二詩切中時弊。乃有爲言之也。

麪娃娃

余在宣府時。每中元節。見土人小兒女。各自外家携歸蒸食。肖人形。大者一二尺不等。呼爲麪娃娃。或云取宜男兆。或云用以饗神。亦諸葛蠻頭之意。究未知人作俑。何所取意也。

嬉婦

粵西納婦。每邀同輩。開房。其間調笑雅俗不同。友人王君某報登孝廉科。其德配爲臨川某氏女。頗嫺文字。合盍夕。陳象九秦壽芝吳月農諸人邀余同往。各有謔詞。次及余。余戲拈瓶花一枝遞伴婆曰。新郎今歲登科。來年瓊林宴中。何可不簪花一枝耶。伴婆以花授之新娘。遂欣然爲郎揜于帽簷。同人又欲觀裙下。堅不允。正窘甚。余曰。他日翰林供奉。仿東坡岐公故事。撒金蓮炬。送歸翰苑。亦佳兆也。新郎狂喜。秉燭促移蓮步。露纖指焉。按今開房。卽抱朴子之所謂嬉婦也。究傷雅道。不足爲訓。

送轎

鄉俗嫁女。兄弟有送至壻家。旣宴而後歸者。謂之送轎。按穀梁傳曰。禮送女。父不下堂。母不出祭門。諸父兄弟不出闕門。送女踰境。非禮也。

掃晴娘

今每苦雨。閨中兒女剪帛作婦人狀。手持竹帚懸于簷際。以祈晴。俗云掃晴娘。王伯文有賀新郎詞詠之。按元初澤州李俊民詠掃晴娘詩云。卷袖拳裳手持

帶挂向陰堂便搖手。則此名亦不自今日始也。

詠明妃

里人張夢九少尉。官山西朔平威遠堡巡檢。鬱鬱下僚。非初志也。有出塞詠明妃詩。起句云。美人之貌。畫工手祇借黃金定。好醜無金難買。本來顏琵琶終出雁門關。四語自爲寫照。其志遇亦可悲矣。

錢塘難婦

錢塘難婦朱袁氏。于己未夏過梧郡。以詩乞食。看斷句云。羞看鏡裡三分瘦。愧作人前半點癡。又千里關山三寸管。半江風雨一番愁。又已破繡鞋經雨滑。半垂羅帕障風微。余尤喜其對鏡云。舊歡如夢事如塵。飄泊天涯抱病身。誰是與儂同下淚。相憐祇有鏡中人。時年甫廿四。人極端莊。其同鄉諸人。擬爲作集腋之舉。數日後卽去梧。不能詳其爲何如人也。

桃花醋

看花阻雨。最是惱人。某友扇頭有王芟舫看桃花爲陰雨所阻。調寄蝶戀花詞。

一闌云。天到花時難作主。纔得春晴。剛要春陰。護商酌。輕雲兼薄霧。積來又怕。成風雨。雨雨風風。愁不住。流水無情。斷却尋芳路。自古妖嬈人。易妬天公也。吃桃花醋。諧語令人解頤。

女史題壁

泉郡客店有女史題壁詩三首云。肩輿得得走天涯。一路狂風撲面沙。盼得夕陽投逆旅。銀紅衫汗換輕紗。晚粧試罷鏡奩昏。眉畫初三月一痕。行到中庭防客見。教鬟先自掩重門。楊花薄命怨前生。飄泊無端又化萍。聽絕雞聲侵曉發。高樓猶有夢甜人。細味詩意。似有風塵之感。而含意未申。尤令人耐味。

邱女史

詠牛女嫦娥詩。率言離別多。衰颯之音。翻案殊難制勝。張幼亦大令七夕詩云。修到神仙好。夫婿也愁無奈。別離何尋常語也。其夫人邱女史和句云。年年此夕會銀河。相見偏愁離別多。笑問人間乞甚巧。團圓兒女待如何。又詠嫦娥斷句云。翻較女牛歡會密。一年一十二團圓。二意均爲他人所未道。雖立意翻新。

却與無理取鬧者迴別。于此尤覘福澤焉。

美人名將

陳眉公書姚平仲小傳後云。人不得道。生老病死四字關。誰能透過。獨美人名將。老病之狀。尤爲可憐。李夫人馬伏波是也。夫紅顏化爲白髮。虎頭健兒化作鷄皮老翁。亦復何樂。西子入五湖。姚平仲入青城山。他年未必不死。直是不見末後一段醜境耳。後佟氏姬艷雪有句云。美人自古如名將。不許人間見白頭。語雖出於此。而簡括勝之。

奴婢

陸放翁之父少師公贈晁以道聯。有奴愛才如蕭穎士。婢知詩似鄭康成。句顧秋水詩。偷臨畫本奴藏筆。貪看斜陽婢倚樓。此奴此婢無獨有偶。洵是可兒。

挑花線

閨中小兒女以采縷迴結。雙手枝撐。一人用將食四指。變幻翻挑。奇巧百出。俗謂之挑花線。亦乞巧遺意。袁瘦芬女史有沁園春詞詠之。宋時婦女作劇有所

爲依經馬者。殆卽此耶。

蘭閨十樂

劉小眉女史。金陵人。髫年卽富才情。桐絲柳絮。彈詠兼長。常集女史。年相若者。閨中結社。日課一詩。女史有蘭閨十樂。同人均有詩分詠之。其目云。曉鏡理粧。晴窗臨帖。畫長讀畫。晚霽澆花。巡簷覓句。隱几觀碁。月下撫琴。燈前問字。夜涼攤卷。午倦烹茶。

花品

桂林高兼侯秀才上聰。沈靜寡言。性耽吟咏。常擇名花爲二十四友。分品賦之。其目梅爲仙品。（見宣和畫譜）水仙爲名品。（見梁書齊武陵王傳）桃爲華品。（見宋書樂志）杏爲貴品。（見酒譜）梨爲素品。（見上官儀請致仕表）牡丹爲榮品。（見易林）虞美人爲生品。（見沈約均聖論）海棠爲佳品。（見劉克莊題跋）芍藥爲選品。（見梁書徐勉傳）常棣爲教品。（見新序）鳳仙爲新品。（見宋書顏峻傳）夜合爲異品。（見江淹山中楚詞）茱萸

莉爲妙品。（見宋史文苑傳）蓮爲靜品。（見秦鎬榮藩邸觀蓮花詩）蘭爲高品。（見宋書羊元保傳）菊爲逸品。（見梁武帝本紀書）秋海棠爲情品。（見後漢書黨錮傳羣芳譜有女懷人不至淚灑階前化爲此花）桂爲靈品。（見江淹菖蒲贊）棉花爲奇品。（見癸辛雜志）蘆花爲幽品。（見宋書明帝本紀）雞冠爲閒品。（見皮日休酒鎗詩）芙蓉爲尤品。（見宋尤蕃釐觀感瓊花詩）老少年爲畫品。（見唐書藝文志）山茶爲寒品。（見梁書武帝本紀）詩多佳構。錄存冶秋集中。此與西溪叢話之三十客。三柳軒雜識之二十客。同一雅韻。彼尙無詩以賦之耳。

題桃源圖

商城黃楓庭先生解組後。林下課孫。親執家務。常讀書有悟。題桃源圖示諸子。云五柳先生別有家。門前萬樹碧桃花。武陵漁父曾來往。指引旁人路便差。

碧雲闌

都門女兒。初蓄額髮。鬢鬆下垂。不便作事。每以彩繩作結。勒于額端。名碧雲闌。

或卽昔人角妓雙螺之遺製歟。

當窗織

吳少白孝廉長庚有當窗織一篇云。霜稜稜。風獵獵。寒燈焰縮紙窗裂。車聲軋軋指流血。不辭指痛摧心肝。但願織成輸縣官。織成一寸輸累匹。那得餘綿暖姑膝。

古別離

甘子飛秀才常寄其細君繡窗偶存詩一冊見示。其古別離云。不唱陽關曲。不折灞橋柳。贈君青銅鏡。此意君知否。願君得意歸來日。當年面目仍勿失。臨江送別指江水。水富貴相忘有如此。聞其伉儷琴瑟甚諧。此遠游時所贈。蓋恐其有臨叩之遇耳。用意甚篤。

祭小星

在都時有同寓某姓小婢焚帟爐中。余撥灰視之。有紙團未盡焦。展視贗斷句云。夜深姊妹陳瓜果。牛女河邊拜小星。署題夏至夜同瘦雲姊作數字。初不解。

所謂藏之篋笥有年矣。偶讀臙脂紀事云。女星旁有小星名始影。婦女夏至夜候祭之。得好顏色。始知前詩之寄意矣。

女兒香

東筦以女兒香爲絕品。蓋土人檢香皆用小女。每藏佳者出。易脂粉。阮嘯霞秀才。腰下荷囊脂粉。好背人偷換女兒香。卽謂此也。

蘇淑文女史

蘇淑文女史有對鏡愛看背後山之句。張幼亦大令時向余誦之。

七夕

黎沛田以負逋羈繫。其友黎蔭棠和其七夕詩。有修到神仙仍負債。算來有巧不爲多之句。

花橋詩

桂林花橋風景極雅。朱靜媛女史鎖有樹影分樵路。山光壓酒旗之句。所的是在實境。女史爲况雨人廉訪太夫人著有澹如軒詩一卷。

風雨懷人圖

許月樵司馬有風雨懷人圖詩帙。當代名流題詠殆遍。司馬尤愛蔣霞舫先生滿江紅詞一闋。時爲人書扇。其詞云。落落晨星。銷魂處。難逢易別。況又是。風風雨雨。淒淒切切。舊夢吹殘楊柳絮。新愁滴碎梧桐葉。這丹青。滿幅畫相思。心如結。訪不到。山陰雪。望不見。峨眉月。坐深宵。挑盡孤燈。明滅。七尺軀。爲若箇。許一腔血。向何人熱。歎成連海上。未歸來。情淒絕。

黃素素名妓

京師名妓黃素素。聰慧多才。雅愛吟詠。嘗有所歡。允爲脫藉。及出都。久無耗。素以瓜仁排字爲詩。黏帕寄之。其詞云。浮雲出遠岫。隨風有還期。郎心似箏柱。游戲無定時。所歡在中州。得書遂遣使。迎之。余最喜誦其句。友人楊劍潭以爲此詩乃馬健三子夜歌二首之一。特附記之。

留人石

粵西橫州伶俐口在江之南岸。上有石狀如女子。號留人石。粵諺曰。廣西有一

留人石。廣東有一望夫山。是也。廣東商賈多贅于西。不返。其婦女輒以此石能留人。西望詛祝。嶺南屈大均曾代爲之詞。詛曰。留人石。莫留人。風吹石。代爲塵。祝曰。留人石。既爲塵。望夫石。復爲人。

風流帖子

蒼梧爲兩粵通衢。三江總匯。士商麇集。佳麗雲屯。邑令簿尉。及丞參下車之始。皆出硃票嚴查。名曰十禁。俗則誤爲十錦矣。禁票之外。則有免單數十張。獲此者。乃無查點之擾。然不過百妓中僅能免一姊妹行得此者。爲光榮焉。美其名曰風流帖子。某少尉蒞任。府幕賓某戲作乞風流帖子詩云。風月尋歡有醉鄉。又逢甘雨潤羣芳。千金擲去春無價。片羽分來喜欲狂。不信沙鷗隨水沒。可憐粉蝶爲花忙。青蚨購得還相贈。莫笑人情紙半張。一聲檀板易銷魂。贏得樽前笑語溫。珍重恍如書鐵券。護持休羨擁銀旛。錦標得路誰先奪。紅袖多情敢憚煩。寄語東君須着意。天涯芳草戀王孫。曾聞伐桂有吳剛。未許名花暖向陽。玉管聲銷金粉地。戈船棹入水雲鄉。何堪白簡霜威振。休問紅燈酒興長。一片黑

風吹未落。橫塘驚散野鴛鴦。桃園風景尚清華。小牒頒來競欲誇。莫遣美人思贈縞。從知仙吏喜栽花。新猷好是行春令。往事何當問水涯。我亦青衫曾顧曲。乞將金簡付名娃。

行路難

吳祭酒行路難之第十七首。余最喜讀之。其詩云。結帶理流蘇。流蘇紛亂不能理。當時羅幃鑑明月。皎皎容華若桃李。一自君出門。深閨厭羅綺。有人附書還。君到長千里。名都鶯花多皓齒。知君眷眷嬋娟子。太行之山黃河水。君心不測竟如此。寄君翡翠之鵲釵。傳璣之墮珥。勸君歸來且歡喜。臥疾空牀爲君起。此詩如怨如慕。如泣如訴。餘音裊裊。不絕如縷。真可泣孤舟之嫠婦矣。讀者如此作者其何以堪。

題洛神

大令所書洛神賦。存者僅十三行。揚州女子胡蕊珊。曾自繡洛神小像于扇。併詩云。不因風雨。谷光佩玉明珠事渺茫。只愛莊書王大令。至今留得十三行。

余於其中表汪菊麓行篋見之。畫之丰神。字之波磔。纖毫畢肖。可稱針神矣。

許靈芬女史

曩于山左道上。李家店旅壁。抄錄吳縣女史許靈芬原唱。及諸和作。刊于初編。余實未知其何如人。及壬申冬返桂林。周昀叔觀察。以詩函見示。述及端委。始知女史爲觀察如夫人也。其賦詩誌感云。當代風騷重品題。空山蕭艾亦無遺。難成蘇氏機中錦。敢示孫郎帳下兒。銀筆自羞同刻楮。玉台應笑困然脂。牽蘿汲甕貧居久。那有吟情似曩時。女史雅擅詩詞。兼工繪事。觀察曾以所畫墨牡丹扇見遺。云在都時。丹青酬酢。悉委女史捉刀。嗣又錄其舊作。如秋夜卽事諸作。均情詞婉約。風調雨雅。無愧作家。

題扇

曩在都門。曾見某校書便面書數語。頗新穎有趣。其詞曰。老僧釀酒。名伎談經。書生踐戎馬之場。將帥掌文章之府。所致雖非本色。而風雅頗耐人觀云云。

馬蘭

史孝廉某工畫蘭。偶題摹馬湘蘭筆意。誤脫湘字。人賦詩調之。有而今有客開生面。專用工夫仿馬蘭句。蓋北地馬蘭花與葉略似。土人蓄以縛物。實賤草也。

輓歌伶聯

京師歌伶名翠琴者。隸春台部。艷絕一時。倏染時疫歿。士夫惜之。嘉興陸眉生輓以聯云。生占百花先。伶於花朝前一日生。萬卉千芳齊俛首。春歸三月暮。伶卒於三月杪。人間天上兩銷魂。

女工雕板

廣東順德縣劊劊手民。多係十餘歲稚女。捉刀余之初集。友人寄刊。以其價廉而工速也。惟訛誤之字。殊不少耳。

宣統二年四月付印
同年五月出版



版權所有

外埠分發行所

成都 北都 北京 天津 保定 山西

粹源 記書 記書 官書 各書 官書 各書 官書 文元
局莊 局 局 局 局 局 局 局

總發行所

印刷所

校刊者

廣東 漢口 長沙 南京 杭州 蘇州 湖北 寧波

會文 廣益 鴻文 啓新 德記 振新 羣益 汲經
社 局 局 局 局 局 局 局 齋

上海棋盤街平和里內
國學扶輪社

上海六馬路吉慶坊內
國光活版部

上海棋盤街平和里內
國學扶輪社


(四冊定價大洋一元)

香艷叢書五集

國學扶輪社出版廣告

薛家三	彭尺木	羅臺山	注大紳	聊齋文集	胡天游文集	魏默深文集	龔定盦全集	顧仲恭文集	錢牧齋文鈔	王壬秋全集	翁山詩外	翁山文外	國朝文匯
合鈔	合鈔	合鈔	合鈔										
四冊	四冊	四冊	四冊	二冊	四冊	六冊	七冊	二冊	四冊	十二冊	十二冊	五冊	壹百冊
洋一元五角	洋一元五角	洋一元五角	洋一元五角	洋六角	洋一元五角	洋二元	洋二元	洋一元	洋二元	洋二元	洋五元	洋五元	洋三十二元

古今說部叢書	佛爾雅	青樓小名錄	香艷叢書	嚴幾道合鈔	林琴南	譚復生	章太炎合鈔	春酒堂文集	全謝山文鈔	吳摯甫詩集	吳摯甫文集	方望溪合鈔	戴南山合鈔
十集													
六十冊	二冊	四冊	共十集 四十冊	四冊	四冊	五冊	五冊	二冊	八冊	一冊	五冊	八冊	八冊
洋十六元	洋六角	洋一元	洋十元	洋一元二角	洋一元二角	洋一元五角	洋一元五角	洋八角	洋三元	洋五角	洋一元	洋二元	洋二元




特
設
廉
價
部

不
能
退
換
辦
理

香豔叢書


第六集



第六集

香豔叢書

國學扶輪社印行



香

鑪

篆

書

計

氣

節

海

HQ
1237
H25
11.21

香艷叢書六集目錄

卷一

漢宮春色

黑心符

竹夫人傳

湯媼傳

周櫟園奇緣記

彩雲曲

苗妓詩

十國宮詞

卷二

門綺梵語錄

特設
廉價部

琴譜序

代少年謝狎妓書

小脚文

冷廬雜識節錄

韻蘭序

卷三

迷樓記

劉無雙傳

步非烟傳

譚節婦祠堂記

月夜彈琴記

附譚節婦對咏三十首

醋說

戲擬青年上政府請弛禁早婚書

自由女請禁婚嫁陋俗稟稿

婦女贊成禁止娶妾律之大會議

擬王之臣與其友絕交書

代某校書謝某狎客饋送局賬啓

懺船娘張潤金疏

遊冶自懺文

問蘇小小鄭孝女秋瑾松風和尚何以同葬於西泠橋試研究其命意所在

冶遊賦

閨中十二曲

卷四

盤珠詞

蠶華室詩選

香艷叢書

六集卷一

漢宮春色

東晉時人撰

漢孝惠張皇后外傳一 并叙跋

曩嘗讀漢書孝惠張皇后傳。疑其敘述稍略。蓋傳中所記。皆呂太后事也。既又讀五行志。其記惠帝四年織室凌室之災。以爲張后失德之徵。幽廢之兆。則又病其傳會太過。若誕嫚不足信。夫宮室之災。事所恒有。而無端歸其咎於初立之張后。不已愼乎。后以童稚入宮。而又早寡。微特不與聞外事。卽宮中事。亦呂太后主之。大臣以呂氏之故。遷怒張后。幽置北宮。亦旣枉矣。作史者。復以其見幽。而加以失德之咎。則又枉之枉焉。予用是閱然傷之。乃潛究史漢諸紀傳。博攷諸史。旁搜稗乘。兼及小說。諸所甄采。凡五十餘種。爲作外傳一篇。越十年。未敢出以問世。適聞永嘉之際。盜發漢陵。有獲漢高惠文景四朝禁中起居注者。流傳至於江左。亟訪得之。又得許負相女經三卷。相漢

宮后妃記二卷。及關中張氏世譜。合而讀之。間取以附益前傳。而張后絕世之容德。與當日被誣幽廢之故。始纖悉無隱情。匪敢矜攷古之詳。亦聊以抒伸枉表微之志云。

漢孝惠皇后。張氏。名嬀。字孟嬀。小字淑君。惠帝姊魯元公主之長女也。初帝爲亭長時。娶呂后。生一女一男。男爲孝惠皇帝。女即魯元公主。高帝二年。漢兵敗於彭城。呂后爲楚所虜。高帝道逢惠帝及公主。載之以行。馬疲虜在。後帝蹶兩兒。欲棄之。滕公常下載之。徐行。面雍樹。乃馳卒得脫。於下邑之間。遂攜入關。是時惠帝方六歲。公主年十二矣。六月。漢都櫟陽。立太子。令諸侯子爲宿衛。公主性甚賢淑。高帝鍾愛之。帝曰。當爲之擇一佳壻。張耳之子敖。方在漢宿衛。年十四。儀容俊雅。甚都。許負相之云。當爲王而侯。且生一德色。兼絕之女。敖未之信。帝愛敖篤。諱乃以公主字之。五年夏四月。敖尙公主。秋七月。嗣爲趙王。移家之趙。公主爲王后。六年三月三日。生一女於邯鄲。有五色雲蓋。王宮隱隱聞空中仙樂聲。敖以其生而嫵媚。名之曰嬀。數歲。即溫默貞靜。未嘗見齒。足不下閣。

張敖嘗語公主曰。阿嬌善氣迎人。舉止端重。他日福未可量。但恐性過慈淑。將受人欺耳。九年。張敖廢爲宣平侯。家屬皆徙長安。會高帝用婁敬策。將以魯元公主嫁匈奴。公主日夜對張敖流涕。阿嬌亦牽公主衣而泣。高帝聞而憐之。呂后復力言於上。乃止。阿嬌當五六歲時。容貌娟秀絕世。每從其母出入宮中。高帝常令戚夫人抱之。啖以果餌。謂夫人曰。汝雖妍雅。無雙然。此女十年以後。迥非汝所能及也。惠帝爲太子時。娶功臣女某氏爲妃。妃亦常抱阿嬌以爲樂。及惠帝卽位。以未除三年喪。不及立后。而妃旋薨。帝感人彘之變。專自韜晦。以酒色自娛。後宮美人甚多。又寵美僮閼孺。與同臥起。惠帝時。郎侍中皆傅脂粉。貝帶鵷鷖冠。化閼孺之習也。時帝方議立后。欲訪名家貴族之女。容德出衆者。太后常憐敖之廢。欲爲重親。以敖女配帝。乃謂帝曰。阿嬌帝室之甥。王家之女。天下貴種。實無其匹。且容德超絕古今。吾選婦數年。無逾此女。帝曰。如乖倫序。何且彼年尙幼。太后曰。年幼不當漸長邪。且甥舅不在五倫之列。汝獨不聞晉文公之娶文嬴乎。帝乃從命。詔羣臣議。納皇后禮。三年春。太后遣長樂少府及宗

正爲皇帝納采。用束帛雁璧馬四匹。並求見女。傅姆八人扶女盛服南面立。年方十歲。太后恐人議其幼也。使自稱爲十二歲。其問名告廟諸禮皆然。然媼體質修嫺亦已儼如十二三矣。望見者皆凝睇橋舌以爲神仙中人。還奏言宣平侯女秉姿懿粹夙嫺禮訓有母儀之德。竊窀之容宜承天祚奉宗廟丞相參太尉勃御史大夫堯及太卜太史等用太牢告廟以禮卜筮吉日。其問名納吉納徵請期典禮隆備皆太傅叔孫通所定也。聘儀用馬十二匹黃金二萬斤。自古所未有也。由是漢天子立后者必稽孝惠皇帝納后故事云。后弟偃尙幼見黃金纍纍在堂上奔入告曰。媼姊皇帝買汝去矣。魯元公主叱之曰。孺子母多言。偃乃挽姊手曰。姊何不出觀。媼用好言遣之。遽遁入房閉戶不出。漢沿秦制每納后妃必遣女官知相法者審視。秋八月詔鳴鳩侯許負至宣平侯第。許負者河內老嫗以善相封侯者也。負引女媼至密室爲之沐浴詳視。媼之面格長而略圓潔白無瑕。兩頰豐腴形如滿月。蛾眉而鳳眼龍準而蟬鬢耳大垂肩其白如面。厥頰廣圓而光可鑑人。厥胸平滿。厥肩圓正。厥背微厚。厥腰纖柔。肌理

賦潔肥瘠合度不痔不瘍無黑子創陷及口鼻腋足諸私病許負一一書之册
催嬌拜謝皇帝萬年嬌忸怩不應勸之數四始徐拜低聲稱皇帝萬年負以狀
密呈太后及惠帝帝覽而大悅付宮史掌之冬十月壬寅詔丞相參御史大夫
堯迎皇后宣平侯第皇后禮服上紺下縹深領廣袖鞞帶霞帔衣長曳地不見
其足首戴龍鳳珠冠黃金步搖簪珥步搖拜辭于張氏之廟理粧之時循例當
用假髻傅姆以后鬢髮如雲請于魯元公主而去之張敖抱女登車稱警蹕入
未央宮前殿天子臨軒百官陪位皇后北面禮官讀册文畢皇后六肅三跪三
拜女官引后至帝前謝恩后拜伏久無音響女官附耳教之后乃稱臣妾張嬌
賀帝萬年其幽韵若微風振簫又如嬌鶯初轉帝爲動容后起退立太尉勃授
璽綬中常侍太僕跪受轉授女官女官以帶皇后皇后拜伏復稱臣妾謝恩訖
卽位羣臣皆就位行禮退皇后乘軟輿入中宮群臣以帝立后不娶于功臣之
家而自私其外甥皆有不平之色后至中宮四壁皆塗以黃金椒芬撲鼻綴明
珠以爲簾琢青玉以爲几旒檀爲牀鑲以珊瑚紅羅爲帳飾以翡翠錦衾繡枕

皆有織金龍鳳。其他陳設諸寶玩五光璀璨不可名狀。帝與后行合巹禮。后從女官之教。奉觴于帝。自稱女甥。阿嬌賀舅。皇陛下萬年。帝笑曰。汝尚仍前稱耶。亦以金樽酌后。后赧然辭不能飲。勉盡一樽。及夕。后端坐牀上。帝秉燭諦視。見后首垂雙鬢。清臚神彩煥發。不傅脂粉而顏色若朝霞映雪。又如梨花帶雨。諸體位置各極其妙。后羞畏俯首。兩旁口輔微暈。如指痕如浪波之沄。帝乃謂后曰。吾向以汝外甥之故。恒避嫌疑。未嘗迫視。不料汝怡人心目。至於此極也。當是時。后年始十歲。雖正位中宮。而帝未嘗留宿宮中之政。俾後宮美人年長者。攝之後宮。見后無權嘗侵侮之。且私議曰。張淑君雖居尊位。實一童女耳。且入宮後。于吾輩將何畏焉。后五日一朝太后。奉案上食。鞠躬屏氣。愉然肅然。帝以后東朝長樂宮。每行經街衢。數蹕煩民。乃築複道屬之長樂宮。后每將出侍。女先移輦入內室。后坐其中。施簾幔焉。乃昇以行。雖宦官宮人或未能一見后。面后每清晨對鏡。理粧有一小鳥五彩畢具。飛集簾外。啼轉若云。淑君幽室裏去。淑君幽室裏去。如是者十餘年。及后徙北宮。後鳥始不復至。四年春三月。惠

帝二十后年十一。帝行冠禮。率皇后見於高廟。宮中孔雀及白鶴見。后過必舞。魯元公主入宮視后。后送迎如家人禮。有依依戀母之意。公主指后向惠帝曰。阿嬌頗如意否。帝曰。阿嬌不類大姊而酷類宣平侯使朕六宮粉黛爲之減色。其端靜慧愿之性則與大姊同時。后弟張偃在側。帝抱而弄之曰。此兒體格頗似其姊。若爲女子亦一佳人也。帝每晨起。特至椒房觀后。盥頤嘗語宮人曰。皇后之色欲與白玉盤匝爭勝矣。又曰。皇后神態儼然。一宣平侯但形模較小耳。因戲呼之曰。張公子。傅姆見帝將至。必先捧金唾盂盛紫薇露進后。以漱檀口。帝常抱后置膝上爲數皓齒。上下四十枚。又研朱以點后唇色。如丹櫻。猶覺點朱之淡也。一日帝至后宫。后方卸裳服。兩宮人爲后洗足。帝坐而觀之。笑曰。阿嬌年少而足長。幾與朕足相等矣。又謂宮人曰。皇后趺圓白而嬌潤。汝輩誰能及焉。五年夏六月。天時溽暑。一夕帝在宮中不能成寐。夜分復起。帝有所最寵美人居東宮。帝思之乃召宮婢數人授以錦衾一紅帕一俾攜至東宮并畀以符驗曰。美人若睡當裹以來。夜深勿有所驚也。東宮者與后宫相近。宮婢誤

以爲中宮也。乃徑叩宮門。傳帝命侍女啓戶。數重以入。宮婢戒勿聲。徑趨后。楊以錦衾裹之。并以帕蒙后首。后驚醒。問故。答曰。帝命也。遂負后疾趨。后曰。既奉帝召。當容我稍整服飾。今無狀若此。豈可以見皇帝。宮婢曰。帝命也。且已出宮矣。願皇后勿聲。后既無可奈何。乃寂然無聲。須臾至。帝所。帝揭帕視之。則嫣然張皇后也。帝乃笑拊之曰。驚汝夢否。后不答。若有微嗔者。帝命置后御榻上。宮婢既退。帝呼后字曰淑君。怒我乎。后徐答曰。妾忝備位中宮。陛下既有召命。當先一日傳宣。豈可輕脫若此。使妾爲宮中妃嬪所竊笑。他日何面目以母儀天下乎。帝謝曰。吾過也。吾召汝。非他聊以消暑耳。時后年僅十二。帝與清談及黎明。侍女皆至。后命取裳服。修容還宮。於是諸美人忌者皆言。后中夜自奔。帝所語浸尋達於外諸大臣。怨呂太后者皆私議曰。張皇后實太后外孫。果非佳種。且年幼。卽若是他日。必無端莊之德。當何以承宗廟乎。六年秋。后年十三。人道始通。而惠帝後宮美人已生子四人。太后性不喜妃妾承寵。甚欲皇后生子。遣使禱祠山川百神。與醫錢數千萬。俾后服藥求子。每夕遣人諷帝宿中宮。后以

帝多病。力勸帝靜養。仍異榻而寢。而太后未之知也。惠帝嬖僮閎。儒者年十五有殊色。請於惠帝曰。臣聞皇后容貌無雙。願一望見。帝許之。適值中秋節。皇后駕幸上苑。觀秋海棠。帝使閎。僮服飾一如皇后。先至上苑。宮人見其絕麗。皆大驚。疑以爲眞皇后也。閎僮登假山。見皇后下輦。步行旋登樓。憑欄眺望。雲髻峨峨。長袖翩翩。羅衫澹粧。足踐遠遊之繡履。履高底長約七八寸。其式與帝履畧同。后偕五六美人同行。而年最幼亦最端麗。其行步若輕雲出岫。不見其裙之動也。閎僮還見惠帝俯首自慚。且曰。陛下有中宮。若此何用。臣等與後宮美人爲帝曰。皇后雖頎然如成人。然年齒過稚。性愁未知人事。若五年以後。汝輩當皆罷黜矣。后性喜種花。而有潔癖。又喜讀書。帝至后宫。聞誦聲清婉。達戶外。笑謂后曰。汝不聞秦始皇焚書之事乎。胡爲亦效腐儒所爲。后起立曰。曩聞妾父張敖嘗言。秦之速亡。半由於此。且陛下聖明天縱。而猶用亡秦之律。竊爲陛下惜之。帝感其言。乃除挾書律。自是古書稍稍出矣。后於宮中。雜植梅蘭桂菊芍藥芙蓉之屬。躬自澆灌。每諸花秀發。羅置左右。異香滿室。其寢榻及文几陳設。

精絕不許侍女近之。惡其不潔也。宮中有沉香木溺器。后每將洩溺。惡其鏗然有聲。墊以落花之瓣。起則隨令侍女滌之。七年春正月。惠帝獵於上苑。俾皇后及諸美人皆騎以從。裝束皆如男子。其袍色或絳或黃或綠。后身御狐白裘。服色深青。裳色純黃。外披紅錦大袍。以紅綃抹額。馳驅交錯。花草生光。皆翩翩如二八美公子。見者不知爲后妃也。而后尤驚艷獨絕。旋卸裝登廁。一野彘突入。犯后。碎其下衣。后尻有微傷。帝方驚惋。失措。后引劍刺彘。殺之。諸美人皆稱賀。后下衣既毀。裂倉猝露體。不自覺。帝笑而指之曰。何肥白也。后方驚悟。羞赧無所措。急呼侍女進下衣。兩頰暈頰。默然無言者半日。夏四月。皇后親蠶。御禮服盛飾以出。乘鸞輅。駕駟馬。張青羽蓋。龍旗九旂。太尉妻膠乘。太僕妻御。前長安令奉引。金鉦黃鉞。鹵簿鼓吹。虎賁羽林騎導前。皇后躬採桑於蠶宮。手三盆於繭館。禮畢還宮。是日長安觀者如堵。諸功臣家婦女皆嘖嘖嘆羨曰。張敖之女。乃有此福。特恨未能一覩其面也。初辟陽侯審食其得幸於太后。惠帝聞之。怒辟陽侯下之獄。將殺之。既而釋之。太后慚怒。又以皇帝無子。而後宮美人多子。

愈不懌。乃議盡斥諸美人。蓋欲令皇后得顯房寵也。帝憂甚。無以爲計。乃哀懇於皇后。俾謀寢其事。后性渾厚。不知妒忌。又素得太后驩心。爲泣言。諸美人無罪。妾媵自以薄祜。不能生子也。太后乃止。五月。太后聞後宮美人有娠。復發怒。將殺之。后爲力請。太后忽生一計。使后佯爲已有身數月者。將俟美人生男。卽名爲皇后。所生立爲太子。后不得已從之。退語其母魯元公主曰。媵於狐媚。委瑣之事。素所深恥。然媵無子。則太后終不樂。而諸皇子亦危。帝益將鬱鬱增疾矣。所以覩顏爲此者。上以娛太后。下以保皇子。中以調和兩宮。而安帝躬耳。太后下詔。皇后孕將達月。可免朝朔望。帝亦累月不至。后宮后深居靜。不出寢闥。一步侍女有黠者。竊相語曰。皇后將育太子。而腹不大。何也。六月。美人生男。太后使取之。裹以文祬。送匿后宮。而殺其母。卽日。太后使宮娥教皇后佯稱腹痛。頃之。則呱呱者已在抱矣。告祭宗廟。立爲太子。羣臣奉表稱賀。越三日。皇后使賜美人以藥物。文綺黃金百斤。或言太后已殺之矣。后驚怛涕泗交頤。紅袖盡濕。密告惠帝曰。妾所以隱忍爲此者。欲救此人耳。今仍見殺。豈非命邪。是時

惠帝後宮已有六子。其名爲后所生者。乃其最幼者也。后撫之。皆如己出。並以時調護。其母是歲帝弟淮南王來朝。王之母故張敖家美人也。敖獻之高帝而生王。故與張氏最親善。至是請於惠帝。願朝皇后。帝曰。汝嫂年未及笄。樸訥畏人。猶童女也。其可以已乎。固請乃許之。王跪拜盡恭。后答拜於簾內。環珮聲璆然起。而肅曰。九叔無恙。遂端坐。無一言亦未嘗仰視王。退而語人曰。吾嫂古今第一麗人。亦第一善人也。八月帝不豫。皇后問疾。帝忽使后登牀。捫其乳而歎曰。阿嬌今已長成。令人愛不忍舍。然汝凝脂竟體。恐後日爲我消瘦矣。有如此人而不能一日爲夫婦之樂。亦命也。夫戊寅帝崩於未央宮。年二十三。后年方十四。哭踊如禮。沐浴如禮。方歛。諸侯王羣臣立殿下。皇后在殿上。東向。太子西向。皆伏哭。諸妃嬪公主宗婦皆從。皇后伏哭。殿上不下百餘人。魯元公主亦與焉。羣臣遙聞之。聲音嬌細而哭。盡哀遠望之。則年最幼而色絕艷。蓋皇后也。后兩目已紅腫如桃。屏去容飾。褰麻滿身。轉益靚麗。光彩照耀殿之上下。皆使聳動。太子卽位。太后臨朝稱制。徙居未央宮正殿。后稱孝惠皇后。仍居中宮之椒。

房。每。日。一。朝。太。后。太。后。欲。乘。此。時。盡。誅。功。臣。后。苦。諫。而。止。其。語。秘。外。人。不。知。也。
是。時。大。謁。者。張。卿。用。事。出。入。太。后。臥。內。后。每。朝。太。后。張。卿。窺。見。后。循。循。如。處。女。
不。問。不。敢。對。不。命。之。坐。不。敢。坐。口。操。趙。音。卿。出。語。人。以。爲。圖。畫。中。所。未。覩。也。且。
曰。欲。識。張。皇。后。但。觀。后。弟。張。偃。蓋。已。十。得。五。六。矣。后。年。十。五。魯。元。公。主。薨。太。后。
使。后。歸。臨。母。喪。后。既。幼。弱。嫠。居。愁。悶。悲。思。乃。作。歌。辭。曰。緊。余。童。稚。兮。入。椒。房。默。
默。待。年。兮。遠。先。皇。命。不。辰。兮。先。皇。逝。抱。完。璞。兮。守。空。牀。徂。良。宵。兮。華。燭。羨。飛。鴻。
兮。雙。翔。嗟。富。貴。兮。奚。足。娛。不。如。氓。庶。之。糟。糠。長。夜。漫。漫。兮。何。時。旦。照。弱。影。兮。明。
月。涼。聊。支。頤。兮。念。往。昔。若。吾。舅。之。在。旁。飄。風。迴。而。驚。覺。兮。意。忽。忽。若。有。亡。牽。羅。
帳。兮。拭。汨。蹤。履。起。兮。徬。徨。羣。雞。雜。唱。而。報。曙。兮。思。吾。舅。兮。裂。肝。腸。冀。死。後。之。同。
穴。兮。儻。觀。地。下。之。清。光。於。是。太。后。命。辟。陽。侯。以。右。丞。相。監。未。央。宮。居。宮。中。侍。太。
后。宮。中。事。無。鉅。細。皆。屬。焉。辟。陽。侯。追。怨。惠。帝。於。孝。惠。皇。后。服。用。起。居。飲。食。裁。抑。
過。半。又。以。后。少。艾。欲。蠱。之。以。報。惠。帝。乃。賂。后。侍。女。問。后。燕。私。之。事。甚。悉。一。侍。女。
嘗。言。曰。我。事。皇。后。最。久。知。之。頗。詳。皇。后。立。不。跛。倚。坐。無。惰。容。起。居。有。常。時。行。止。

有常處飲食之量亦中人以上服玩之好與時俗不同咳嗽在地每生芝草芳澤不御若有蘭香雖盛暑無微汗糞無微臭寐無鼾聲待吾輩整肅而和藹未嘗以疾聲相加然稍有戲言則正色呵止之性至孝聞父母有微疾每徬徨不能食自惠帝崩後未嘗飲酒食肉我所見者如是而已辟陽侯偵知后性畏暑有一室后每避暑其中屏左右獨坐辟陽侯乃曲折作複道屬之椒房之後潛營一室鑽穴隙以窺之每見后兀坐揮扇俄起而徐步有風肅然所御衫襦皆明紗之極薄者日光穿漏雪膚映現全體畢覩后肌體豐艷衣內別有黃絹障胸腹間項下懸七寶金縷鎖臂約碧玉條脫皆希世絕寶外間所未有也辟陽侯微述所見以語人既而后漸覺之嚴訊侍女盡斥諸侍女之受辟陽侯賂者乃泣訴於太后太后敕辟陽侯自新益增中宮守門宦者少帝立四年年五歲而后年僅十八少帝怪母年幼密詢左右乃自知非皇后所生出言曰太后安能殺吾母而名我我壯必爲吾母投仇太后聞言而幽殺之立惠帝第三子常山王宏是爲後少帝年九歲后每歲寒食必詣安陵東向舉哀柔聲悽楚飛鴈

見。后。光。豔。咸。翔。舞。而。下。攫。后。釵。釧。以。去。如。是。者。數。次。乃。張。青。羽。蓋。焉。是。時。太。后。稱。制。諸。呂。擅。權。后。寂。處。深。宮。絕。不。與。聞。外。事。呂。產。呂。祿。以。太。后。春。秋。高。欲。先。自。結。於。后。乃。與。后。父。張。敖。交。驩。歲。時。必。有。饋。獻。入。宮。后。悉。卻。之。或。勸。后。結。納。諸。呂。他。日。可。繼。太。后。臨。朝。后。曰。吾。聞。婦。人。無。外。交。我。未。亡。人。也。可。與。權。臣。往。來。乎。先。是。太。后。以。惠。帝。六。子。殤。逝。幾。半。乃。取。呂。氏。子。太。名。爲。惠。帝。遺。腹。幼。子。封。平。昌。侯。進。封。呂。王。大。臣。益。不。平。之。於。是。惠。帝。兄。弟。齊。悼。惠。王。已。前。卒。趙。王。如。意。趙。王。友。梁。王。恢。燕。王。建。皆。身。死。國。除。惟。代。王。淮。南。王。尙。存。太。后。嘗。召。張。皇。后。謀。曰。我。已。年。老。而。宗。族。尙。強。我。死。惠。帝。諸。子。必。不。安。吾。欲。盡。去。諸。王。何。如。后。力。諫。曰。不。可。妾。聞。葛。藟。猶。能。庇。其。本。根。昔。孝。惠。皇。帝。常。憂。兄。弟。之。不。多。無。以。藩。衛。皇。室。今。諸。死。者。過。半。矣。若。復。自。剪。其。枝。葉。恐。漢。之。天。下。非。復。劉。氏。有。也。其。後。太。后。每。有。陰。謀。后。輒。沮。之。代。王。淮。南。王。等。遂。獲。無。恙。蓋。張。皇。后。保。全。之。力。爲。多。云。後。少。帝。四。年。七。月。太。后。病。篤。召。張。皇。后。告。之。曰。吾。病。若。不。起。汝。可。臨。朝。稱。制。大。將。軍。產。祿。皆。可。屬。以。大。事。祿。女。可。配。帝。爲。皇。后。汝。善。教。之。善。自。珍。愛。勿。哭。泣。過。節。勿。爲。他。

人所圖勉之時。后年二十二。涕泣固辭。自言才略素短。不足以臨制天下。且絳侯曲逆侯等。皆高皇帝舊臣。若畀以夾輔之權。必可以安社稷。呂產言於太后。曰。皇后太稚。貌太姝。性太慈。臨朝實非所宜。太后乃以國事屬產。祿辛巳。太后崩於未央宮。既葬。張皇后徙居長樂宮。呂產怨后之不附已也。乃曰。張敖之女。年少寡居。吾當有以試之。乃選美男子數人。爲長樂宮宦者。既而侍女密說后曰。宦官某某等。年少貌俊。何不召之入侍。且昔太后逾六十而辟陽侯等入侍者。尚十數。皇后年華甚富。而長甘守此寂寞。誰知之者。后窮詰之。盡識其名。乃命宮正盡逐此數人。而譴侍女呂產畏大臣圖已。欲先作亂。與其黨謀欲先入據長樂宮。挾孝惠皇后以臨大臣。或曰。后若不從。奈何。產曰。鸞鳳羈於樊籠。慮其不仰哺於人耶。乃使人說后曰。皇后若與相國同心。可以長保富貴。不然。必見廢於大臣矣。后拂之盡歛。兩宮管鑰。申警守備。令毋入相國產殿門。少帝欲尊后爲皇太后。又以有生母在。或謂宜並尊。或謂宜獨尊生母。詔下羣臣議。議未上而變作。九月庚申。大臣舉兵誅諸呂。呂產知長樂宮有備。走叩未央宮。徘徊

徊不得入。乃以奉孝惠皇后密詔誅羣臣。爲名號召。徒衆莫之應者。乃走劉章。逐而殺之。遂矯少帝符節。斬長樂衛尉呂更始。以兵入宮。圍守孝惠皇后。辛酉。誅呂祿。呂須及樊伉。廢后弟魯王張偃爲庶人。初。惠帝二年。齊悼惠王欲媚太后。獻城陽一郡爲魯元公主湯沐邑。太后欲以封張敖爲魯王。及后初立。惠帝以問后。后曰。不可。外間皆謂太后削宗室。以崇外戚。若封妾父。是斂怨而叢謗也。且取兄弟之邑以封后父。天下後世其謂陛下何。帝悅。曰。汝年雖幼。才識在我之上。乃言於太后而止。

跋曰。孝惠皇后外傳。凡有兩篇。此其前篇也。得諸傳鈔。不傳作者姓氏。但知爲東晉時人所撰。旁搜博采。爲班史翻案。爲阿嬌雪冤。洋洋千言。洵大觀焉。合後篇觀之。殆爲一人手筆。可並讀也。

漢孝惠張皇后外傳二并敘跋

曩嘗哀集羣書。作漢孝惠張皇后外傳一篇。既又讀得漢時遺書。不下十餘種。其所紀張后事蹟。雖大指頗合。亦往往互有異同。究無以辨其孰爲是非。

也。茲重作外傳一篇。其同者約而書之。其異者表而出之。以俟後世洽聞之士云。

孝惠皇后張氏。惠帝之女甥也。名嬌。字淑君。父宣平侯張敖。尙帝姊魯元公主。以高帝四年三月生一女。年數歲。有異人相之曰。此大貴人也。敖問其故。異人曰。昔楚漢之際。有仙女張麗英者。居豫章之南金精山下。衡山王吳芮聞其美。將聘爲妃。儀從至山下。麗英忽升山頂。謂其人曰。我至此不得復下。當爲我鑿磴通道。王乃發卒治道。道既通。則麗英不復見。已飛昇矣。麗英飛昇之後。上帝以漢室將有大變。特令降生人世。以扶漢室。且其塵緣未斷。使之再受磨折。劫盡則復昇仙矣。言畢。異人忽不見。敖使人至豫章訪之。果有其事。并有仙女廟云。因別字女曰麗英。女年十二。端麗窈窕。絕世無雙。惠帝卽位三年。年已十九。未立皇后。太后選女於呂氏。無當意者。於是太后與帝皆屬意張氏女。乃循舊制。詔鳴雌侯許負至宣平侯第。引女嬌於密室相之。還奏帝大悅。太后以嬌容德異於常女。特遣丞相等用太牢告廟。以禮卜筮吉。月日太常叔孫通定六禮。

遣長樂少府及宗正爲皇帝納采。東帛雁璧馬十二匹。聘用黃金二萬斤。自古所未有也。冬十月壬寅。詔丞相參御史大夫堯迎皇后於宣平侯第。后拜辭於父母及張氏之廟。稱警蹕入未央宮前殿。天子臨軒。百官陪位。女官扶皇后降輿。禮服紺上縹下深領。廣袖。輦帶霞帔。衣長曳地。不見其足。首戴龍鳳冠。黃金步搖簪珥。步搖冠前綴珠旒十二。北面就位。人觀者咸嘖嘖私語驚歎。不置。或曰。皇后眞宣平侯之肖女矣。如此方不愧爲天下母。或曰。皇后眉嫵妍秀。他日必少威權。然其類廣圓而絕。豔其準豐隆而絕。美宜其爲天下母。於是執事者數百人環立聳視。但見皇后蛾眉鳳眼。螭領蟬鬢。兩頤豐腴。耳白如面。其溫淑之氣溢於言表。似長公主。而面格長圓似宣平侯。或但遙見其肩背。即已歎爲絕代佳人。禮官讀冊文畢。皇后三肅三跪三叩。稱臣妾謝恩。起立。太尉勃授璽綬。宦官跪授女官。女官跪以帶皇后。后復拜伏。低聲稱臣妾。張氏謝恩。其韵若嬌鶯初囀。又如微風振簫。帝爲動容。后起立卽位。羣臣皆就位。行禮訖。帝與皇后入中宮。行合卺禮。中宮皆以椒塗壁。巍煥軒敞。陳設絕麗。供以名花異卉。傳

姆導后獻爵。敎之稱臣妾。張媽祝皇帝萬年。帝飲畢。酌酒賜后。傅姆捧觴使后飲。之后整襟端坐。以目視鼻。未嘗旁睨。帝注視皇后。見后明眸皓齒。倩輔微暈。如指痕。如浪波之沄沄。不傅粉黛。而顏色若朝霞映雪。又如梨花帶雨。兩頰有微斑十餘點。小逾芥子。其色淡黃。非咫尺以內不能見也。然彌覺姝豔絕倫。諸體位置亦各極其妙。帝出語後宮人曰。皇后嫣然之質。無忝嘉名。然朕所重者。又不在色。而在德。觀其靜懋之氣。如渾金璞玉。令人竟日對之不厭也。先是太后以后年幼。而帝素稱好色。乃戒帝曰。奇花不先時而折。明珠必應候而剖。皇后年齒稍稚。必待長成方能生子。汝知之乎。帝由是多幸後宮美人。每晨起至椒房。觀皇后盥饋對鏡理妝。帝指鏡中曰。汝自視與宣平侯有毫髮異乎。后不覺對影而自笑。漢制。皇后五日一上食。帝宮留宿。惟張皇后即夕還中宮。諸美人咸笑后性之懋。而感其德。四年春正月。皇后見於高廟。三月。帝行冠禮。帝入宮。見后讀書。用后言除挾書律。自是古書稍稍出矣。皇后五日一朝太后於長樂宮。舉案上食。孝敬甚備。太后常稱長公主之能敎女也。於是以四十縣爲皇

后湯沐邑。其璽文同天子。金螭虎紐。特設大長秋家令等官屬。掌財用。則有少府。掌鹵簿。則有太僕。皆優其秩。自是終漢世爲定制。云后溫默恪慎。內有慧心。雖以呂太后之猜忍。后能將順其意。旨終身無間言。會中元節。長公主入宮。帝命皇后設宴如家人禮。公主從容謂帝曰。皇后少不更事。性又樸訥。願陛下寬假而督教之。帝曰。皇后年少德茂。有大家風範。皆大姊之教也。后弟偃亦從入宮。宮人戲之。呼后爲舅母。云五年夏四月。皇后行親蠶禮。乘鸞輅。張青羽蓋。龍旂九旒。太尉妻膠乘。太僕妻御前。金鉦黃鉞。鹵簿鼓吹。虎賁羽林騎爲前導。執法御史在前。皇后躬採桑於蠶宮。手三盆於繭館。禮畢還宮。長安觀者填駢於衢。但見夾道。張紅錦步障。竟未望見鸞輅。太尉妻與后同車。但覺后芳馨滿體。太僕妻掖后登輿。輿后身輕可舉。而並不瘠弱。皆退相謂曰。今日得瞻仰天人。奚啻登仙。且曰。張皇后之美。端重者遜其淑麗。妍媚者讓其莊嚴。明艷者無其窈窕。雖古莊姜西子。恐僅各有其一體耳。當是時。後宮有何美人最得寵於惠帝。常以皇后入宮。在後。侵侮之。每夕自至帝宮。留宿。使其左右拒諸美人。紿之。

日皇后已在內矣。事浸聞於外。羣臣皆竊議曰。張皇后年甫十四。已不自貴重。而淫佻若是。何以承宗廟乎。冬十月。太后偵知。后人道始通。亟望后生子。乃諷帝常宿椒房。帝多內寵。已生皇子五人。外有嬖僮閎孺等。后年尙少。簡靜無慾。見帝日漸多病。勸帝靜養一年。須宿疾良已。始敢承恩。幸帝愛慕后。容德不得已。屏絕內外。寵色專宿椒房。養疾后。仍與帝異床而寢。而太后不知也。方謂皇后寵已顚房。旦夕可得孕。遣使禱祠山川百神。與醫錢數千萬。俾后服藥求子。諸臣亦益訾議。皇后以爲擅寵。或微諷張敖曰。艷女必多淫。后聞之曰。使帝疾果愈。諸臣雖斥我爲淫妬。我無憾矣。六年三月。帝疾漸愈。召諸美人有殊色者。同遊上苑。諸美人誇妍鬥艷。服飾麗都。光映花木。帝遣使召皇后。須臾后澹妝艷飾。珊珊來前。行步如輕雲。出岫不見其裙之動也。帝目逆之曰。神仙中安得有此人。諸美人亦目眩神馳。爽然若自失者。帝軀體素秀偉。后與帝並立。約短二寸。云其秋后有微疾。太后疑有孕。召太醫診脉。宦者引醫入椒房。施黃絹爲帷帳。醫跪帷外。俄聞環珮聲。鏘然自內而出。宦者奏曰。請切脉。侍女捧后手置。

帷外。醫見后手如柔荑。美白不可名狀。悟爲大貴之相。診畢。奏請望舌色。旋聞帷內嚶然有聲。若云無庸者。侍女固請乃始舉帷。瞥見皇后紅衫黃裙。端坐於內。翩若驚鴻。皎如秋月。唇色如朱。櫻一點。后閉目張口示之。轉瞬則帷已下矣。醫乃奏於太后。言皇后氣體不能生子。但其脉尙似處女。殆無孕也。九月太后聞後宮美人有娠。大怒曰。皇帝養病方愈。此輩復蠱惑之。不可宥也。皇后涕泣爲之請命。太后忽曰。然則吾以與汝爲子。汝當佯爲有娠。不可違我言。后欲救美人。且慰太后。而調和兩宮。不得已從之。帝亦佯若信。后有娠者。后初見帝疾漸瘳。許帝以明年三月爲合歡之期。及稱有娠。遂深居靜。并不與帝相見。宮人黠者。頗疑之。曰。皇后將生太子。而腹不大。何也。七年六月。美人生男。太后取送皇后。養之。布告中外。立爲太子。是時后年十六。大臣疑后不能生子。謂爲實年十四。蓋誣之也。太后慮太子生母尙在。或不利於皇后。乃潛遣人縊殺之。皇后趨救。則無及矣。帝宿疾復發。每召皇后侍湯藥。秋八月戊寅。帝疾大漸。皇后及諸美人環繞御榻。帝使后坐榻旁。熟視之。曰。太后愛汝。俾汝稚年入宮。誤。

汝非淺將使汝終身爲處女矣。然婦人以夫爲天。汝旣爲嫠女。恐將受侮於人。奈何。頃之帝崩。年二十三。后哭踊如禮。沐浴如禮。大歛。諸侯王羣臣立殿下。皇后在殿上東向。諸美人公主宗婦皆從。皇后伏哭。后豐容頎體。兩目已紅腫。如桃。哭音嬌細而淒婉。雲鬢如蓬。麻衣如雪。轉益艷麗。殿之上下皆爲聳動。咸私語曰。惠帝棄全盛之天下。尙不足惜。獨惜其棄此幼豔之中宮耳。太子卽位。太后臨朝。稱制。徙居未央宮。行天子事。后仍居椒房。稱孝惠皇后。太后欲盡誅諸功臣。后諫止之。呂后元年。以辟陽侯審食其爲右丞相。監未央宮。如郎中令居宮中。侍太后。辟陽侯追怨惠帝。以張皇后少艾。欲蠱之。乃先結驩於張敖。一日辟陽侯在敖第。見后遣婢二人還家。問之曰。汝等事皇后何事。對曰。司糞溺。辟陽侯曰。嗟乎。吾每見皇后。朝太后。儼若天仙。汝輩何修而得常見其糞溺也。敖告公主。入白皇后。使善爲之備。旣而辟陽侯賂后侍女。使獻錦襪錦袴於皇后。后大怒。焚之。立譴侍女。且泣訴於太后。太后乃責辟陽侯。而嚴爲之防衛。后始得保完節。后幼有潔癖。几榻無纖塵。平時御左右。無疾言遽色。雖盛暑在內。

寢必整襟端坐。未嘗袒裼。熱無微汗。寐無鼾聲。一日偶入浴室。召侍女濯背。侍女見后全體豐豔。其肌膚如凝脂。如美玉。項下懸七寶金縷鎖臂約。碧玉條脫。皆惠帝所賜。希世絕寶也。后身不御薶澤。而滿體芬馥。如芝蘭。侍女戲后背曰。美哉。皇后妾猶愛慕。不忍釋。惜乎先帝之早逝也。后叱之曰。毋多言。少帝立四年。年五歲。張皇后年二十矣。少帝每與后同寢。見后乳猶如處女。怪之。問左右。乃自知非皇后。子出言曰。皇后安能殺吾母而名我。我壯卽爲變。太后聞而幽殺之。立惠帝第三子常山王宏。是爲後少帝。太后又欲除代王淮南王等。后涕泣苦諫。呂氏之人愠曰。張皇后稚年守寡。而力護諸叔。不知避嫌耶。然諸王竟賴以無恙。后年二十四。太后疾篤。召張皇后欲使臨朝。后固辭。乃以後事屬呂產。呂祿。以祿女爲少帝。后七月辛巳。太后崩。少帝聽政。或言宜尊張皇后爲太后。諸大臣弗聽。乃遷后於長樂宮。呂更始爲衛尉。禁后母家。毋許有人出入。后塊處宮中。并不知內外消息。相國呂產謀入據長樂宮。挾孝惠皇后以令羣臣。謂人曰。張皇后孱弱無能。乃掌握中物耳。因使人說后與相國同心。后不從。悉

斂兩宮諸門。鑰戒毋納相國產殿門。呂氏卒。無內援。以敗。九月庚申。朱虛侯既殺呂產。遂矯少帝符節。馳斬長樂衛尉呂更始。分兵守宮門。辛酉。捕斬呂祿及少帝之后。誅呂頹。樊伉而廢后。魯王偃。諸大臣相與陰謀曰。惠帝諸子。若年長用事。吾屬無類矣。可并認爲呂氏子。誅之。所謂去草當芟其根也。乃遣使迎代王。後九月己酉。晦。代王至長安。卽位。夏侯嬰與東牟侯興居入清宮。載少帝出就舍。其夜有司分部誅滅少帝及諸王於邸。諸大臣復相與聚謀。所以處孝惠皇后者。或議誣以淫僻殺之。或議出后使大歸。張氏或欲送后入織室。或曰。孝惠皇后。煢獨可憫。且惠帝聘以殊禮。母儀天下。未嘗失德。豈臣下所宜擅廢。今天子繼惠帝之統。於皇后親則嫂叔。義則臣子也。似宜有崇奉之禮。與太后皇后列爲三宮。則恩義兼盡矣。或曰。昔孝惠皇后殺美人而奪其子。殆一險悍婦人也。若留孝惠皇后於漢宮。是猶蓄雌虎於深山。後必見噬矣。或曰。吾聞后有懿德。殺美人者。呂太后也。且惠帝諸子已被誅。若復置后於死地。吾輩且蒙不韙之名。不如奏天子。使自處之。東牟侯曰。若奏之天子。此以慚德貽君父也。我

請獨受其名。黎明，東牟侯入長樂宮，遷張皇后臥。未起宦者，使宮人趣后起。后盥洗既畢，方欲整理衣物，不許。乃灑泣登車。東牟侯收其印綬，分宦官、宮女五十人使隨侍。皇后其宮中法物、鹵簿及皇后祭服、朝服，皆令有司守之。遂送后入北宮。觀者夾道，后乘素車，有兩侍女驂乘。后兩足在簾下，其履式圓頭。方底與帝履畧同，織以翠羽，飾以金葉，綴以明珠，履長約七八寸。忽風吹簾動，隱約見后半面，咸駭曰：「天人也。」有此福德之相，何以見廢？既而曰：「惠帝在位七年，不失爲令主。今陵土未乾，而諸臣欺其孤兒寡婦，亦太甚矣。」因相與歎息泣下。朝士有掛冠去者。后至北宮，東牟侯擇殿後幽室，閉后與侍女數人於其中。扇鏑深固，飲食糞溺皆從一穴出入。選老宮人二人監之，號爲宮正。乃奏言后黨於呂氏，罪宜幽廢。謹已便宜從事。制曰：「可。」文帝元年，立竇皇后，推恩封薄昭爲軹侯，齊王母舅。駟鈞、淮南王舅趙兼亦皆封侯。帝心知張皇后無罪，乃封后弟張偃爲南宮侯，以慰后心。亦慮后之自殺也。后居幽室三年，每佳辰令節，宮正以鑰啟戶，許出片時。值惠帝忌日，亦許后一出祭拜。拜畢復入。文帝三年六月，

濟北王興居反。敗死。文帝曰：興居所爲皆悖。埋。曩者朕初卽位，興居擅幽孝惠皇后。朕聞后爲人甚賢淑，無微過。乃命竇皇后往北宮省之。竇后名猗房，惠帝時以良家女選入宮。侍張皇后，后待之甚厚。其後出以賜代王。既立爲皇后，數爲帝言張皇后之賢。帝惻然憐之，且知后孤弱無能，爲故欲出后於幽室。云宮正聞竇后將至北宮，謂張皇后曰：汝敝衣垢面，何以見皇后？乃使侍女爲后沐浴，理妝飾，以盛服。竇后至前殿坐定，侍女扶后出自幽室。竇后左右咸指目之，曰：如此美人而久閉此室，可惜也。竇后見后行禮畢，因訴積年契闊之衷。且曰：妾向者辭皇后出宮，皇后年僅十五，今倏忽已十二年矣。而皇后貌益豐，顏益少，善氣益於面，背想見涵養之功，非妾所及也。因請入觀。皇后寢帳后赧然，若有慚色者。侍女導入幽室，竇后見室中之狀，大驚，召宮正責之曰：此事皇帝初不知，皆汝輩所爲也。宮正對曰：此奉大臣及東牟侯之命，謂已奏之天子。妾等安敢違乎？竇后命速培其戶，引張皇后居於正殿，還奏文帝。帝亦歎然曰：如此朕何面目以對惠帝？乃詔羣臣議崇奉孝惠皇后之禮，將設北宮衛尉及太僕。

少府家令等官羣侯恐后一旦得勢。且修前怨。交諫以爲不可。帝惑於羣議。乃詔有司曰。孝惠皇后嘗爲天下母。其起居服膳皆視后禮之半。並增北宮侍女。然亦寥落。與家居無異。有司供用不饒。皇后至手刺女紅。以濟用。侍女見后失勢。又賞賜微薄。不盡聽后使令。惟后初立時。媵婢獨忠於后。云是時惠帝後宮美人千餘。皆在北宮。與后比室而居。頗疑后已被廢。因狎侮之。竊稱之曰。張廢后。或曰。后乃惠帝之元配。舉天下皆其臣子。誰得廢之。乃隱指之曰。幽室中人。或直稱爲張敖之女。后聞之。泣曰。何爲牽及吾父名。一美人與后語。數視后腹。后問之。對曰。妾愛后腰腹。纖妙麗人體格。不當如是耶。然未知后昔年佯爲有娠時。腹亦僅如是大乎。后變色拂衣而起。后年二十九。值薄太后六十生辰。諸妃公主命婦皆上壽。北宮宦者及侍女欲求媚於帝。給后出房。挾以登輿。强扶后往朝賀。倮然就諸貴人命婦之列。又强挾以朝文帝。帝與太后皆悚然降禮。然頗心訝之。以爲出自后意也。后歸而慍甚。鞭笞其旁侍御。悄然不見齒者累月。南宮侯夫人亦於朝賀時見后。歸以語張。偃偃曰。自大姊退處北宮。人皆誤。

謂之廢黜而淒涼。況味亦復難堪。傷哉。吾姊以如此仙姿淑性。而棄擲埋沒於空室之中。此由吾母一時之誤。俾入漢宮故也。既而匈奴爲嫚書。遣漢曰。昔孝惠皇帝與單于爲兄弟。交誼至隆也。今聞其子皆已被誅。皇后張氏貞靜幽嫺。溫恭淑惠。而無故幽廢北室。如忌此人。何不送入匈奴。俾獲早覩天日。昔高帝嘗以魯元公主見許。已而爽約。今其女既配惠帝。單于豈敢有所侵犯。竊願奉迎。供養事以母禮。以答惠帝之厚誼。其語皆中行說教之也。說背漢降匈奴。數繩張皇后之美。以誘單于。使爲嫚書。以愧漢人。漢得書不答。遣使諭之曰。孝惠皇后爲漢國母。誰能廢之。皇帝篤親親之恩。奉之離宮。禮數亞於太后。單于幸勿過聽。單于私問使者曰。吾聞張敖之女爲塞南第一麗人。信乎。使者給之曰。孝惠皇后非以色選。祇緣帝甥得立。聞其兩目蒙視面大。而多黑斑。惠帝憎之。終身不答。以至無子。今復年逾三十。頭童齒豁。宮婢出述其狀。貌殆下中之姿也。單于笑曰。汝母誣汝。國母文帝十二年。后年三十六矣。而惠帝後宮美人有逾四十者。帝憫其怨曠。皆令出嫁。諸美人有悔后者。給之曰。天子憐后。以童女

寡居實未嘗伉儷。先帝聞亦將出而嫁之。以和陰陽之氣。后大怒曰。汝等敢戲侮無禮。速去。無來見我。既而諸美人詣竇后拜謝。左右告后曰。方今世態炎涼。令人悵悵。彼諸美人皆事惠帝。惠帝既崩。則皇后乃一家之主。竟不一來拜辭。而獨謝竇太后何也。后曰。若輩以我爲死久矣。惠帝一生仁厚。而諸子無端被害。諸美人復相率以去。僅留我衰朽之身。爲守空宮。且暮入地。他時逢惠帝忌日。宮中誰復設祭者。因泣下露襟。諸美人聞之。相率詣后拜辭。后仍罄所有私財。各賜黃金數斤。以爲嫁資。皆退而歎曰。張皇后聖德安可及哉。明年竇太后檢椒房法物服玩。將祭服朝服十餘篋。皆極華麗。而尺寸短小。如十二歲女子之服。竇后猶識之曰。此皆張皇后初立時。惠帝精心營製者也。乃悉令送還北宮。又明年匈奴大入蕭關。會有蜚語。謂單于欲攻長安。襲取孝惠皇后者。或言惠帝已絕嗣。無後。所娶張氏女。猶在漢宮。乃尤物也。宜速賜之死。帝曰。孝惠皇后賢人也。有大功於漢。且彼自默處深宮。不知外事。何罪之有。怒斥言者。越二年。后年四十。竇后與后同歲。生值二月生辰。羣臣奉表稱賀。四方貢獻珍奇。

交錯諸公主命婦皆詣中宮賞賚優渥。及后三月三日生辰。北宮闕寂無人聲。惟侍女爲后稱慶而已。文帝有寵姬慎夫人。宮中推爲第一國色。夙聞孝惠皇后淑美。欲與之競。乃託上壽詣北宮。北宮侍女皆驚喜。慎夫人艷飾盛服。顧影徘徊。是時后身長漢尺七尺三寸。慎夫人長七尺一寸。望見后貌端艷靜逸。驚而卻步。行禮既畢。夫人見后柔訥可侮。起立后前。熟視后面曰。始疑皇后爲年已長。今乃如未滿三十者。吾觀皇后丰神殆處女也。退謂左右曰。吾始聞孝惠皇后微有雀斑。以爲瑕疵。豈知得此點綴。轉益美艷。然年已四十而猶羞澀。持重不敢舉首視我。真可憐也。夫人左右亦掉舌流涎相顧曰。今日夫人如孔雀之朝鸞鳳矣。是歲后謁安陵歸。忽夢見惠帝如平生。呼后名曰阿嬌。汝無日不念我自汝徙北宮。我神魂依汝。至此每在空中觀汝。獨愛汝之誠。豈也。汝體貌備四時之氣。春宜鼓琴。宜澆花。宜折柳。宜晨起梳妝。宜倚案讀書。宜舉簾而出。行步珊珊。夏宜圍碁。宜揮團扇。宜披葛納涼。宜竹下小立。宜憑樓眺望。宜臨荷沼面映水。中秋宜對月。宜折桂。宜賞菊。宜以承露盤盥手。宜七夕望牽牛。宜倚。

紅。臆。課。官。人。刺。繡。冬。宜。玩。雪。宜。折。梅。宜。圍。爐。宜。焚。香。靜。坐。宜。剪。燭。清。談。宜。披。狐。裘。御。珠。冠。錦。袍。受。朝。賀。汝。之。丰。趣。惟。我。領。之。最。深。我。早。年。棄。汝。俾。汝。百。端。受。侮。乃。天。所。以。養。汝。之。德。將。玉。汝。於。成。也。今。汝。名。繫。仙。籍。吾。亦。待。汝。同。行。矣。后。以。夢。語。左。右。左。右。問。曰。皇。后。見。先。帝。已。老。乎。后。曰。未。也。左。右。笑。曰。然。則。向。者。后。年。幼。於。先。帝。七。年。今。先。帝。年。幼。於。后。十。八。年。矣。后。默。然。不。應。后。自。二。十。五。歲。以。後。有。幽。憂。之。疾。文。帝。後。元。年。三。月。肝。風。驟。發。宦。者。奏。請。勅。太。醫。診。之。會。長。公。主。嫖。有。微。疾。醫。官。奔。走。未。及。赴。北。宮。不。數。日。后。薨。年。四。十。一。侍。女。聞。空。中。奏。樂。聲。異。香。數。日。不。散。后。既。無。骨。肉。懿。親。在。側。小。斂。時。侍。女。爲。后。沐。浴。驗。視。后。之。下。體。皆。曰。可。憐。哉。后。眞。處。女。也。宮。人。皆。愛。后。體。之。美。豔。不。肯。遽。斂。裸。而。觀。之。曰。過。此。不。能。復。見。矣。或。量。后。諸。體。之。鉅。細。長。短。誌。之。乃。至。隱。微。之。處。無。不。歎。美。閱。一。日。始。得。斂。帝。詔。羣。臣。議。喪。禮。不。以。后。禮。治。喪。去。其。珠。襦。玉。匣。帝。與。羣。臣。皆。不。成。服。不。送。葬。初。惠。帝。時。營。安。陵。皇。后。塋。域。與。帝。陵。對。峙。惠。帝。以。張。皇。后。性。愛。花。特。命。多。樹。花。木。至。是。不。用。合。葬。之。禮。廢。其。故。塋。爲。墟。葬。后。於。安。陵。諸。美。人。冢。次。故。去。塋。二。

里許。不祔廟。不起墳。漢書文帝後元年紀書曰。春三月。孝惠皇后張氏薨。不書葬。不成喪也。不書日。以不發喪。官失其日也。不曰崩。而曰薨。以其退處北宮也。已廢之后。死不書於帝紀。而張皇后獨書。且仍大書曰。孝惠皇后者。惠帝既崩。后無微罪。非臣子所得廢也。后廢居凡十有七年。群臣以呂太后之故。遷怒於后。且欲自文前惡。乃多造誣謗。加以失德之名。其後史官不察。復襲其說。識者病之后。薨百五十餘年。赤眉入長安。發掘漢諸陵。凡用玉匣者。尸皆不壞。面如生。賊乃汙呂后尸。后妃年少者。多被汙辱。群盜妬爭相殺。至數十百人。惟孝惠皇后。以無墳。故竟免發掘。魏晉間。關中民祀后爲蠶神。或祀爲花神。多立廟焉。贊曰。后勸惠帝除挾書律。澤被千古。偉矣。其在漢室。有三大功。勸太后勿誅諸功臣。與謀害代王。及歛諸門鑰。使相國產不得入殿門。呂氏就誅。此其功之最盛者也。代王既立。后乃幽廢。竟無崇奉之禮。蓋地處嫌逼。雖賢如文帝。不能無介然于懷。故待后恩禮頗儉云。夫古聖后賢妃多矣。然容與德皆極美。而幽廢者。惟漢張皇后一人。但賦性柔愿。才畧稍短耳。於戲坤道以靜爲體。以有德而

無才爲正。此後之所以爲至德歟。

跋曰：孝惠皇后外傳凡有兩篇。此乃其後篇也。玩其敘意，乃是一人所作。蓋當時甄采羣書，旁及稗史，不免互有異同。因而兩存其說耳。今觀此文，似較前篇更雅練而翔實。卽從千載下設身置想，殆無非確有之情事。爰並錄之，皆足以垂不朽焉。

漢魯元公主外傳

魯元公主者，高帝之長女也。母呂后生一女一男，女卽公主，男爲孝惠皇帝。高帝爲亭長時，家貧，呂后攻苦食淡。公主年七歲，卽能代母操作，抱哺幼弟。呂后甚賴其力。或盛夏治田，母女皆跣足蓬首，汗流浹面，不知其悴。一日呂后與公主居田中，耨置惠帝坐田畔。有一老父過，求飲，相呂后曰：「夫人天下貴人，所以貴者，乃此男也。」又相公主曰：「此女圓準，故多財，豐下故多福。廣類故不久當大貴。」豈長困於隴畝者哉？呂后頗心異之。及高帝起兵，爲沛公，旋封漢王，其家屬皆居沛。漢二年四月，敗於彭城，高帝使人收家室。太公呂后已爲楚所虜，道

逢惠帝及公主。載之以行。馬疲。追者在後。帝蹶兩兒欲棄之。夏侯嬰常下收載之。既登車。嬰以面向兩兒。使各抱其頸而立。乃馳卒得脫于下邑之間。是時惠帝年六歲。公主年十三矣。公主頗知避嫌。以布蒙面。既而往道旁。洩溺。追者將至高帝。怒。又欲棄之。嬰固請載之。竟免於難。六月。漢都櫟陽。立惠帝爲太子。令諸侯子爲宿衛。并冊封公主。傅姆贊禮。諸妃嬪觀之。曰。公主德性窈窕。周旋進退。亦頗楚楚可觀。惟素居鄉野。不慣爲容飾耳。既而高帝出關。與楚相持。諸姬皆從去。呂后又在楚未歸。宮中無主。公主專攝宮中事。端詳愼默。曲有條理。以時護調。太子飲食寒暖。皆不使失節。高帝以爲賢。三年正月。帝由滎陽馳入關。選諸侯子尙公主。召年少貌美者三十人入內廷聽選。張耳之子敖。年方二十。一神清如冰玉。狀貌雅麗。儀度翩翩。帝見之曰。美哉古之子都。徐公不能過也。屆期。諸侯子入內殿。設鵠射之。帝召公主垂簾觀焉。用秦制也。公主羞畏。不肯出。高帝罵之。乃出。坐於簾內。默然俯首。未嘗仰視。張敖連射皆中的。其餘中者四人。帝先以問公主。皆不答。帝指張敖曰。此眞佳公子矣。公主不覺舉眸一望。

若微解頤者。戚夫人曰。公主曰。心許之矣。帝乃以敖尚公主。公主體修。頤面如滿月。其色微似紫棠。澤以紛黛。彌形端潔。性溫慤。有淑行。漢沿秦制。凡公主下。降。必選宮人年老者。傅之。謂之家令。尚公主者。雖欲入房侍公主。家令不許。不敢擅入也。敖尚公主。惟合。蚤之夕。得侍寢榻。既而數月不得入。一夕伺家令入宮。敖竊侍公主。遂有娠。明日家令知之。對公主。訴。張敖公主爲之泣下。其後公主受制於家令。口欲言而忸怩終不敢留敖宿也。明年三月三日。公主生一女。張敖之母朱氏趨往視之。朱氏者。外黃富人之女也。有國色。少時誤嫁庸奴。不相得。遂去之。其父之客爲擇壻。使嫁張耳。生子敖。年已三十。有六。尚如二八麗人。謂公主曰。余昨夢天上諸神仙。送女儀仗甚盛。一美人冠服莊嚴。端坐輿中。降於余家。此女殆天上謫仙人也。自往摩其頂。女忽對之。嫣然一笑。朱氏驚呼。公主視之。因名之曰嬌。左右皆謂女貌酷似祖母。朱氏亦以其類已也。愛之如掌上珍。其秋九月。楚歸呂后於漢。公主入宮省母。呂后詢知家令隔絕。張敖雅憐公主。因怒家令。言於高帝。罷去之。著爲令。自後公主與敖伉儷。日篤。

敖侍公主亦甚謹。公主有微疾。敖爲按摩肢體。親抱公主登廁。公主雖辭之。而敖不倦也。留侯子張不疑謂敖曰。子之事妻。無乃太勞。敖曰。天家貴女。一喜一怒。家之興廢繫之。且公主甚賢。其姿貌雖非絕麗。而舉止大方。氣象溫雅。靚如秋雲之吐華。月藹如春風之拂名花。實世所罕覩也。於是高帝呂侯皆寵敖甚厚。立敖父張耳爲趙王。時人爲之語曰。不願封侯十萬戶。但願身侍長公主。明年七月。趙景王張耳薨。敖嗣爲趙王。都襄國。尊母朱氏爲王太后。公主爲王后。高帝六年十二月。帝自邯鄲過趙。趙王執子婿禮甚恭。上箕踞慢罵之。公主抱其女出見。上撫玩良久。呼爲玉女。云。公主尙無子。乃謂敖曰。妾惟有一女。王當爲似續計。盍置侍姬。敖固辭。公主飾美姬二人。使侍敖寢。遂連生二子。曰侈曰壽。八年九月。高帝患匈奴強盛。劉敬說上曰。陛下誠能以嫡長公主妻之。彼貪漢重幣。必以爲闕氏生子。必爲太子。因使辯士諷諭以禮節。冒頓在固爲子婿。死則外孫。爲單于。可無戰以漸臣也。若陛下不能遣長公主。而令宗室女詐稱公主。彼亦知之。不肯貴近。無益也。高帝曰。善。遣使徵公主於趙。公主時年十九。

與趙王。日夜對泣。遷延未行。呂后亦泣曰。妾惟太子與一女。奈何棄之。匈奴中帝不得已。先使劉敬往結和親約。其冬十二月。趙相貫高等謀反。事覺。逮捕張敖。至長安繫獄。詔有司錄送敖家屬。別遣宦者先迎公主。公主顧念其女年幼。又見其姑朱氏丰神美艷。恐爲吏卒所侵辱。欲與姑女偕行。有司不許。公主乃厚賞吏卒。灑泣而別。吏卒羈送張敖家屬。每止傳舍。敖母朱氏與諸姬妾及敖女。媯同處一室。從吏或夢明月出於室中。夜起望之。其上常有雲氣。爲五彩龍鳳形。一卒或從室外窺之。見敖母方去冠理髮。豐麗端艷。儼若神仙。不覺心動。欲乘夜犯之。將入戶。則見敖女寢榻前紅光滿室。如是數四。驚怖而止。既至長安。獄吏議夷張敖三族。自公主而外。皆當從坐。公主入宮泣訴。張敖無罪。呂后見高帝。數言張王以公主故。不宜有此。帝怒曰。使張敖踞天下。豈少而女乎。會貫高等力白張敖不反。九年春正月。赦趙王敖。廢爲宣平侯。是月公主適生子偃。帝欲奪公主嫁匈奴。呂后諫曰。中國不能自強。專恃薦女以爲得計。恐貽笑於天下。帝乃使敖尙公主如故。匈奴屢寇邊。索公主。漢使者或給單于曰。公主

有一女甚美。他日年長可代母。遠行。單于信之。始不爲寇。十一年九月。酈侯呂台娶婦。魯元公主往賀。宴於內室。公卿列侯宴堂上。酒酣樂作。忽見一美公子立屏後面。目秀麗。舉止端嚴。公卿咸視。宣平侯曰。此必足下令子。競起視之。問年幾何。婢答云。八歲。饋以果餌。不受。或欲執其手。驚走入內。既復詢之。宣平侯曰。此敖長女也。以素愛之。故飾以男子之服。然其性純慤。而畏人。而於男女之辨尤嚴。故亟走耳。公卿皆嘖嘖歎羨。頃之。公主傳呼將歸第。宣平侯倉猝離席而去。明年四月。高帝崩。公主率女嫺入哭。甚哀。送葬長陵。五月。惠帝卽位。冬十月。齊悼惠王來朝。恐太后害之。謀所以自全者。乃獻城陽一郡爲長公主。湯沐邑尊公主。爲王太后。太后大悅。惠帝二年。匈奴爲嫚書。遣太后大怒。召樊噲議擊之。季布諫而止。乃遣宦者張澤奉書遜辭報之。單于謂使者曰。吾欲索長公主。以踐前約。使者對曰。長公主早嫁張敖。高帝時猶可奪之。今天子乃公主之弟。豈有奪已嫁之姊。以予單于者哉。單于曰。然則公主之女可來代之。使者歸報。太后憐愛外孫女。不忍遣。三年春。以宗室女爲公主。嫁匈奴。而聘女嫺。

以配惠帝。所以杜匈奴之望也。公主廣市長安大梁美婢百人。以媵皇后。會稽仙人朱仲詣闕獻大珠。徑三寸。太后用爲聘禮。公主復以黃金七百斤購之。仲不受。金復獻大珠。徑四寸。光明如月。公主用飾皇后禮冠。冬十月。惠帝立。皇后張氏時。公主任年二十六。惠帝年十九。皇后年十二。公主既以后母益貴。寵而彌自謙抑。當世以爲賢。后立四年。惠帝崩。太后憐后幼弱。嫠居。召公主入椒房。與皇后同臥起。后寢至夜深。必起坐。溺器。颼颼有聲。公主左右窺見。后睡容初醒。如春日海棠。素衫素袴。首不加冠。而盤髻如旋螺。額可鑑人。端豔之色。與燭光相照耀。后微咳。數聲。公主呼后曰。吾兒得無冒寒乎。后既登牀。母子絮絮對語。公主私問曰。汝配先帝數年。果獲一侍枕席乎。后不答。固問之。后嬌音若泣者良久。乃曰。自我入宮。彼已多病矣。公主曰。以汝如此身貌。而終身爲處子。吾每念之。肝腸如割。又問曰。汝糞溺有芳馨何也。后曰。我初入宮。卽飲花露。想以此獲效。然初不自覺也。公主愛后如嬰兒。調護其眠食。居半年。公主始歸第。私謂后曰。吾聞辟陽侯爲人邪僻。今方以右丞相居宮中。汝宜謹自守身。戒侍女勿

妄出入。后如其教人罕得見其面者。呂后元年夏四月。公主薨。太后命孝惠皇后歸臨母喪成服。后年十七。哭盡哀。居喪次兩旬。送葬還宮。又六年。宣平侯張敖卒。賜諡曰魯元王。諡公主曰魯元太后。封公主子張偃爲魯王。其後太后以魯王偃年少孤弱。封其兄侈爲新都侯。壽爲樂昌侯。以輔魯王。呂太后崩。大臣誅諸呂。廢魯王偃。遂廢孝惠皇后。幽之北宮。文帝元年。乃封張偃爲南宮侯。續張氏二年。釋孝惠皇后出自幽室。復以后禮供養。魯元公主冢在惠帝安陵東三十里。次東有張敖冢。與公主同域云。

評曰。魯元固千古賢公主。此文用筆奇麗。亦千古妙文。與孝惠皇后傳雖分兩篇。而事蹟自相貫穿。作者姓氏不可知。合而觀之。其妙可見。

蔣孝廉西征述異記

青溪居士

湖南蔣君名嘉棟。字嘯霞。辛酉舉人。博覽書史。長於歌詩。性謹厚。不妄言。壬戌癸亥間在京師。與余交甚洽。嗣聞蔣君從戎甘肅。浣保同知直隸州。不見將十年矣。同治壬申六月。忽遇之揚州逆旅。握手甚驩。問無恙外。相與沽酒對酌。譚

至夜分不倦。蔣君歷訴近年艱難勞苦之狀。既而各述異聞。蔣君曰。余向讀稗史。每疑所記非實事。乃以今所親歷証之。始知宇宙之大。無所不有。神鬼之說。非盡荒唐也。余以去年二月。催餉至西安。久居無事。每策騎閒遊。徧訪秦漢古陵。但見荒煙蔓草。心竊慨之。作詩憑弔。至數十首。一夕月明如晝。余酒後乘輿步月。獨行數里外。忽有安車八乘。自後而至。華轂蒲輪。珠簾錦幔。璀璨耀目。不類人世所乘者。車中人捲簾玩月。余驟窺之。皆絕代麗人也。車前各有兩侍女。掛轅輿夫在地。傍車疾趨。頗類宦者裝束。其行甚迅。而絕不聞人馬聲。余盡氣追奔。約行十許里。見一大宮殿。入輿。倏忽不見。皆已入門矣。余急隨之。入經門。戶數重。車中人始皆降輿。服飾似非近世人。入一大殿。共坐笑語。殿上椽燭輝煌。陳設絕麗。亦非生平所見。余欲上殿。覺有人呵止。殿下有一叟。亦宦者裝束。導余坐東廊下。余叩以姓名。此人自言田姓。漢文帝時爲北宮宦者。至武帝時。以正直忤江充。被讒而死。上帝憐之。命在此間。永給使令。余問此何宮殿。曰未央宮也。問殿上何人。曰漢宮后妃。問何以至今尙在。曰皆爲花神。凡天下名花。

百餘種。各有一神司之。其歷代后妃。以至民間淑媛。或生前容德兼美。菁英未散。或抱沉寃。以沒精靈。不泯者。皆爲花神。前漢后妃爲神者。僅九人。今其八人在殿上。其一爲花神之主。總領天下花神。俄頃卽至矣。余問諸神。在此何事。曰。今日爲品花勝會。諸神各以其花獻於品花之主。如受而玩賞之。則此花在天。下必馥郁蕃盛。否則須俟五年之後。重爲品題。今日良會。子所以得至此者。蓋以子博古多情。襟懷風雅。故特令子一瞻斯會。以示造化之機耳。因歷指殿上人。告予其纖腰綽約。顧眄生姿。手執桂花者。戚夫人也。其長眉豐頰。修短適中。手執海棠者。武帝陳皇后。卽長門買賦者也。其體長而秀貌妍。而逸手執芍藥者。李夫人也。其貌畧同李夫人。而體更豐整。手執芙蓉者。邢夫人也。其頭上有雙髻。而儀容婀娜。諸美畢具。不可殫述。手執牡丹者。爲王昭君。蓋出塞後。早亡魂依中國。仍返漢宮云。其淡粧靚服。顏若朝霞。手執菊花。爲班婕妤。好其身小。面圓眉嫵。間畧有愁容。手執蘭花者。爲哀帝傅皇后。其舉止矜莊。默然端坐。手執梅花者。爲平帝王皇后。八人中。以王昭君。陳皇后。李夫人。邢夫人。爲最麗。戚夫

人班婕妤好次之。然亦並世所未見也。傳后、王后則貌畧勝中人而已。余方凝神
熱望。忽空中仙樂嘹亮。有仙輿冉冉而降。諸后妃皆出迓。輿中人降輿入殿。舉
步珊珊如輕雲之出岫。厥服上紺下黃。深領廣袖。珠冠繡帶。鳴珮鏘然。厥體頎
碩而俊俏。厥面稍長而兩頤圓滿。如世所謂鵝蛋臉者。廣頰隆準。雲鬢蛾眉。口
如含櫻齒如編貝。嫣然一笑。頰輔有圓暈如指痕。亦莊亦麗。亦澹亦雅。蓋王昭
君、陳皇后輩雖及其姝豔而重厚或不逮也。余因問叟此何人也。曰：惠帝張皇
后也。后既入殿就正位。南面坐。諸后妃皆旁坐。各以其花進獻。后獨接蘭梅各
一枝。插於坐右瓶內。復與諸后妃笑語久之。余以目注殿上而默憶漢書孝惠
張皇后傳。因問叟曰：張皇后並未以容德見稱。漢書本傳且有貶辭。何以獨爲
花神之主？叟曰：吁！子何見之拘也！自古瓊姿麗質或埋沒於窮巷之中。淑德佳
人或幽閉深宮之內。當時無所知名。史冊不及紀載者。何可勝道！其或以中人
之姿而遇一勢燄烜赫者。深寵而極愛之。則往往倖獲美名。後人不能辨也。張
皇后容德兼美。本爲漢代后妃之冠。而史家必貶抑之者。以其見廢也。余乃詳

問張皇后事。叟曰：后乃魯元公主之長女，惠帝之甥。實以淑美得配惠帝，入宮時年僅十一二。惠帝多寵，後宮美人、后幽閒貞靜，絕無妒寵爭妍之事。及惠帝崩，而后無子。呂太后立惠帝後宮之子，名爲張皇后所生。是時后年尚幼，而諸呂擅權，后寂處深宮，絕不與聞外事。然心弗善諸呂，所爲隔絕，不與相通。及大臣誅諸呂，並除惠帝之後，迎立文帝，獨念惠帝皇后尚在，恐有後患，因相與廢張皇后，幽之北宮，復加以失德之名，誣以黨呂之惡，布告天下。此皆大臣之陰謀也。文帝從大臣之請，未爲昭雪。史家不察，因而害之，其冤不白於後世者，逾二千年。然在人世被抑甚者，則天之償之也。獨厚張后，廢在北宮，幽居十有七年，澄心靜攝，得悟大道，此所以爲天下花神之主也。言未已，忽聞傳呼之聲。諸后嬪送張后升輿，紅雲一朵，冉冉向東而去。余問后往何處，叟曰：先至洛陽，蓋歷代舊都，皆歷代后嬪之所會。今夕品花，太抵周歷六七處云。頃之，諸后嬪亦各登輿而去。殿內闐然，叟催余出門。月斜鷄唱，余悵惘慘慄，獨行十餘里，返寓則東方已曙，明日復往，求所謂宮殿者，邈不可得。披榛掃苔，讀一殘碑，乃知爲

未央宮舊址。余於是連夕攜僮步月。躑躅荒郊。冀再有所見。而終無一遇。今年四月。道出西安。余復爲停車數月。嘗夜至其處。仍寂寂無覩也。然余每憶斯事。至今猶在心目中。聊一爲子述之。如此青溪居士曰。此事驟聽甚奇。然世間異事。往往無意中遇之。如子所言。登諸稗乘。非特以廣異聞。亦且有裨史學。此攷古之士所樂聞也。因爲敘其顛末而書之。

卷一

一

一六

集

黑心符

唐于義方著

一妻不能御。一家從可知。以之卿諸侯。一國從可知。以之相天子。天下從可知。蓋夫夫婦婦而天下正。正家而天下定矣。惟女子小人爲難養。近之則不遜。遠之則怨。論語之教也。牝雞之晨。惟家之索。書之訓也。無由遂。在中饋。易之戒也。能循法度。則可以承先祖共祭祀。詩之勸也。威公縱文姜。喪軀而幾亡。魯高祖畏呂氏。召亂而幾亡。漢文帝牽掣于獨孤。廢嫡長立致大業之傾。高宗溺惑于武媚。故失威權。階大周之僭。萬乘尙爾。況庶人乎。又況講再醮。備繼室。旣無結髮之情。常有扶筐之志。安得福祥。免禍幸矣。閔家以蘆絮示薄。許氏以鐵杵表酷。其事歷歷可見。爲夫者。耽少姿。入巧言。房簀之間。夜以繼日。纏愛紐情。牢不可拔。妻計日行。夫勢日削。如鉗礙口。噤不得聲。如絡冒頭。癡不得動。如扭械被身。束縛囚繫。不得自由。而至寒熱飢飽。在彼不在我。出入起居。在彼不在我。使爲不信。惟命。使爲不義。惟命。使爲不忠。惟命。使爲不慈。惟命。使躬行夷狄犬彘。

之所不爲惟命。呼令殺人。則恨頭落之遲。呼令自殺。則恐刀來之晚。極口罵辱焉。迎以笑嬉。盡力決撻焉。連稱罪過。數以犯再拜謝之。役以事健步辦之。曰。舐吾痔。諾而趨。曰。嘗吾便。跪而進。上不知有親。知有吾妻而已。下不省有幼。省有吾妻而已。人方以爲古不聞。今不見。彼尙且流汗積踵。吐血逾胸。悚懼惶惶。戰栗振掉。惟恐妻語之厲。而色之莊也。其效伊何。有家則妻擅其家。有國則妻據其國。有天下則妻指揮其天下。令一縣則小君映簾。守一州則夫人並坐。論道經邦。奮庸熙載。則于飛對內殿。連理入都堂。粉黛判賞罰。裙襦執生殺矣。世雖晚。猶有是非。俗雖澆。猶分善惡。有臣如此。君必亂之。有朋如此。朋必絕之。有閭里如此。隣必去之。有民如此。官必刑之。有子如此。父母必號泣而擯之。有同氣如此。兄弟必紛紜而捨之。有父如此。有祖如此。有叔伯如此。子孫姪如此。必色變心移。東西南北而避之。婦人遂啟口爲雲霧。發喉爲雷霆。展身爲電。轉身爲風。誣春爲秋。改白爲黑。指吳作越。號女作男。無力齟齬。喜不自勝。喜在其間。愚以度日。坐以待盡。或十年。或六七年。或二三年。齒髮日衰。壽命且盡。貨均彼卷。

而懷之。則聯秦合晉之事萌。而請媒通聘之迹見矣。昏丈夫君已不用。友已不齒。鄉已不錄。兄弟不親。子孫不集。人非高于泰山。鬼責深于滄海。其家虛矣。老方悲。其墓臭矣。死尤辱。妻而繼焉。有格言也。就夫言之。乃並枕於菟。連盤野葛。就子孫言之。乃通心鑽徹骨。雖就朋友親族言之。乃一輪車。四墻屋。甚者至於殺夫首子。禍縣刀鋸。冤著市曹。祭祀絕而門庭蕪然。世人恬爲之。悟且畏者無有也。吾年六十。目見耳聞。不可算數。今訓汝等。有妻固所不免。當待之如賓客。防之如盜賊。以德易色。修己率下。妻既正。子孫敢不正乎。萬一不幸。中道鼓盆。巾櫛付之侍婢。鹽米畀之諸子。日授方略。坐享晏安。又或無嗣孤單。則宜歸老弟姪。以心與之。孰敢不盡。若更重婚續娶。定見敗身殞家。至時親友不欲言。子孫不敢諫。兼己惑已悞。難信難處。豈知吾熟諳而預言之。龜鑒在前。無復縷縷立石中寢。永戒來裔。稍越吾言。祖先明神。共賜誅殛。百世循之。眞萬金之良藥也。

顏氏家訓云。江右不諱庶孽喪室之後。多以妾媵終家事。疥癬蚊蟲。或未能

免限以大分故稀閨闔之闕河北鄙于側出不預人流是以必須重娶至于三四母年有少于子者後母之弟與前婦之兄衣服飲食爰及婚宦至于士庶貴賤之隔俗以爲常身沒之後辭訟盈公門謗辱彰道路子誣母爲妾弟黜兄爲傭播揚先人之辭迹暴露祖考之長短以求直已者往往而有悲夫自古奸臣佞妾一言陷人者衆矣况夫婦之義曉夕移之婢僕求容助相說引積年累月安有孝子乎黑心符微傷大雅要自傷弓驚餌之言留之爲顏氏下一注脚于義方萊州右長史

竹夫人傳

宋張 耒文潛著

夫人竹氏。其族本出于渭川。往往散居南山中。後見滅于匠氏。武帝時。因緣得食上林中。以高節聞。元狩中。上避暑甘泉宮。自衛皇后以下。後宮美人千餘人。從上謂皇后等曰。吾非不愛若等。顧無以益我。思得疎通而善。良有節而不隱者。親焉。皇后等謝曰。妾得與陛下親沾渥多矣。而不能有以風陛下。罪萬死。于是共薦竹氏。上使將作大匠銛拜竹氏職。爲夫人。既進見。夫人衣綠衣黃中單。上笑曰。所謂綠衣黃裡者。初。夫人家久見滅。上曰。爾滅亡之餘也。夫人謝曰。妾之滅亦大矣。然夫人未嘗自屈體就帝。帝每左右擁持之。上有所感。時召幸後宮。寵姬而夫人常在側。若無見焉。而諸幸姬等皆相謂曰。是所謂善長者。安能間吾寵。由是莫有妬之者。是時上方郊五時祠太乙。以致神仙。率常齋戒。自祓除而暇。每召夫人有所游幸。諸將軍幸臣等更爲帝扶持夫人。以行。帝亦不疑也。上幸汾陰祠后土。濟汾水。飲群臣。作秋風辭。歸未央。坐溫室。夫人自此寵少。

衰上謂夫人曰。而第歸。善自安。明年夏。吾當召卿。至期。果復召夫人。夫人見上。中不能無小妬。由是罷之。復遣將作大匠。別選他竹氏。使加職焉。夫人居後宮。至孝成皇帝時。猶無恙。是時班婕妤失寵。作紈扇詩見怨。夫人讀之曰。吾與若類也。然爾猶得居篋笥乎。至王莽敗。漢軍焚未央。夫人猶自力出。赴火而死。予大父貞之公。嘗命題竹夫人詩云。悲秋已過。又傷春。待得郎歸荷葉新。守節碎身終不改。知名一似管夫人。時予年十歲。今讀是傳。先得我心。痛大父之不及見也。掩卷嗚咽者久之。

湯媪傳

明吳寬著

媪之先金姓。少昊之苗裔也。夏禹治水功成。別錫之氏。世有從革之德。載周書洪範篇。穆王時有金母。實生媪。媪少遇爲燧人氏之言者。授以水火相濟之術。善養氣。能吐故納新。延年不死。人異之。晝竊觀其所爲。塊處室中。腹枵然。及暮惟飲湯數升而已。人因扣之曰。媪何以壽。對曰。汝獨不聞冬日則飲湯之說乎。吾術止此。他無以告子者。因號曰湯媪。媪爲人有器量。能容物。其中無鉤鉅。而緘默不泄。非世俗長舌婦人比。性更恬淡。貴富家未嘗有足跡。獨喜孤寒士。有召卽往。藁床紙帳。相與抵足寢。和氣藹然。可掬。唐有廣文先生。知其名。召之。媪至。讓抑居下坐。廣文揖而進。媪曰。足下雖冷官。妾則婦人。豈可與公比肩哉。廣文多其讓。與語至夜半。頽然就睡。偶以足加其腹。媪亦不怒。天明更與語。傾倒殆盡。自是廣文非媪寢不安席。嘗曰。和而不流。清而不激。卑以自牧。卽之也溫。惟媪能兼之。人以爲知言。媪復知醫。思以濟世人。謂其滿腔子皆春意也。有貴

介公子犯寒疾。獨臥別室。迎致之。媼初不欲往。或曰。此正媼行仁之秋也。何以拒爲。不得已。行視其疾。已在骨髓。循其經絡。起足厥陰。曰。是非鉄可加法。宜用湯液。從其言。體溫溫。自下起。若飲薑桂然。及視其劑。則其平日所飲者也。公子奇其效。欲留侍終身。諸姬患之。相與讒于公子。曰。媼雖知醫。然晝伏夜見。蹤蹟叵測。其殆鬼物耶。公子尙愼之。媼聞而慍。見曰。吾生平號能容物。至是不覺使人熱中。卒罵曰。家世非寒族。幸自溫飽。無求于世。若輩粉白黛綠。專以色媚人。鬼物眞自謂吾見若輩之殺公子也。竟去。及接他人。終不失和氣。公子亦遂疏之。諸姬更進御。未幾疾復作。竟死。如媼言。媼同時有夫人竹氏。與媼每春秋時輒爲人棄。置相會。默然無怨言。歎曰。人生出處各有時耳。媼自周歷漢唐至宋。已二千餘歲。人謂其猶處子也。閱人雖多。無可以當意者。聞涑水司馬公有清德。欲依之。公得媼恨晚。家有侍妾。不一顧。其夫人亦賢。乃盛飾之以進。卒揮去。旣而公拜相。夜則思天下事。往往達旦不寢。媼進曰。公幸不棄。處我布衾之下。愧無以報德。惟公盡瘁事國。貌日加瘠。幸爲天下自愛。公驚曰。吾久不聞媼言。

媼言甚愛我。願卒聞媼之所以處世者。媼曰。昔在周末。猶及見老子。教予曰。汝惟知足。知足不辱。予謹受教。以至今日。公悟曰。媼殆謂我也。卽謝事。退居于洛後薨。朝廷因有溫國之封。媼後壽益高。雖云得異術。要其先世從革之德所致。不可誣也。

湯媼其來已久。喜孤寒士而不附勢趨炎。器識誠足尙矣。篇中指出鬼物媚人。能枯骨水。孰若此媼善施湯液爲功湧泉。人安可不務靜攝乎哉。

卷一

六

集

周櫟園奇緣記

徐 忠以齋著

河南周櫟園先生亮工爲滁牧。洎任時。州民共觀之。以公少年科第。貌秀雅。咸嘖嘖稱羨。官署前有銀工錢氏女者。年及笄矣。生而美麗。性聰慧。柔和。素自負。不肯偶俗。流一見公。心動焉。退而臥不起。母疑其疾也。問女何苦。女曰。兒之苦。母所不能解也。母訝之。走語父。父致詢。女不言。與之食。不食。如是日餘。錢獨女無子。夫婦愛憐甚。百計誘之。言曰。女自念惟一死耳。因墮淚云。天生我貌。復少假之才。卽當生我名族中。縱不得作顯者婦。不失爲士人妻。今不幸父業賤。以類爲偶。逆計異時。所適不出一銀工而止。曰。然則兒何欲。女曰。兒不言亦死。言亦死。兒欲得事人如新牧周公。品貌科第者。父曰。痴妮子。彼赫奕若此。寧尙無婦。縱未有婦。肯媚汝家耶。曰。兒豈不自揣。第得爲侍妾。死。不恨。父曰。小兒女。全不曉功令。渠爲民父母。敢妾治下女乎。女遂不言。不食如故。竟成疾。父母憂甚。延醫葛生理焉。葛爲滁國士。應酬官衙。得出入于周公所。視女無他疾。惟中懷。

鬱結耳。父母不能諱語之故。葛素有俠腸。曰。小姑母自苦。吾且設策爲汝媒。倘有天緣。幸而成。不可知。宜自愛。勿使憔悴。女遽起。叩頭謝。居數日。公延生入視。脉生按視良久。狀出神。似別有所思者。公曰。吾食飲日稍減。無恙乎。生不答。他視而笑。公復云。生終不答。笑自若。公怒曰。汝目中無我耶。胡語汝。若不聞。生請罪。曰。某見公不覺觸一事。殊可笑。故失對。因問何事。可共聞乎。生故不敢言。公云。第言之。何害。曰。公勿責也。署之前有錢氏女者。旣言復止。公問錢女若何。曰。曩者見公之玉貌。且耳熟。公少年科第。才出羣。女自負。素有姿工。女紅頗知。書誓必人如公者。始事之。爲妾不辭。又度勢萬不能將。餓以死生哀其志。悲其遇而嗤其妄也。是以笑耳。公曰。世有女子憐才若此者乎。情不可負也。今與君約。明晨吾當出謁客。君語彼倚門俾我見。果適我意。我微作首肯狀。以定情。當曲成之。不可則速已。生語女。女自信。曰。吾事必諧矣。晨起署事。櫛沐裙布釵荆。公于輿望之。不禁首肯者三。衆不覺也。女郎入公歸。思所以動夫人者。曰。世間不虞之譽。有出人意外者。吾與卿抵此未久。外間何所聞。乃有銀工女某者。謂夫。

人、大、家、女、賢、淑、世、無、比、彼、不、幸、爲、小、家、子、未、嫻、教、誨、若、得、朝、夕、侍、夫、人、學、閨、範、雖、爲、婢、有、榮、焉、是、不、亦、癡、乎、奚、所、慕、而、若、是、夫、人、曰、甯、有、此、耶、公、曰、我、何、由、知、醫、生、某、笑、其、女、爲、我、述、之、云、爾、也、夫、人、召、生、叩、其、詳、公、已、預、白、生、生、卽、宛、轉、曲、爲、之、詞、以、悅、夫、人、夫、人、曰、有、志、女、子、也、顧、其、貌、如、何、則、以、中、材、對、夫、人、曰、吾、爲、取、之、成、若、志、公、佯、斥、之、曰、君、謬、甚、獨、不、畏、物、議、玷、官、箴、耶、夫、人、曰、吾、籌、之、詳、矣、自、有、處、卽、託、以、治、首、飾、呼、錢、入、畀、之、百、金、與、訂、婚、令、徙、南、都、無、處、吾、境、居、久、之、公、當、詣、省、夫、人、出、釵、珥、幣、帛、之、屬、使、往、娶、焉、既、成、婚、公、入、房、女、却、曰、妾、願、執、箕、帚、今、得、侍、大、人、何、幸、第、未、謁、夫、人、不、敢、奉、衾、枕、公、愛、其、有、禮、勿、強、也、泊、歸、見、夫、人、公、以、前、言、告、夫、人、喜、是、夕、公、入、室、女、又、推、曰、大、人、遠、歸、夜、宿、夫、人、所、妾、不、敢、當、夕、公、悵、然、而、去、夫、人、聞、益、喜、手、秉、燭、送、公、來、曰、妹、尊、我、意、甚、善、吾、已、具、知、之、今、夕、佳、夕、無、負、吉、期、此、吾、命、也、女、乃、從、自、此、女、奉、公、與、夫、人、如、婦、事、舅、姑、惟、謙、益、自、下、事、必、諮、稟、而、後、行、坐、不、敢、共、走、不、敢、偕、飲、食、則、食、夫、人、之、餘、者、曰、妾、心、敬、慕、夫、人、夫、人、所、餘、食、之、若、更、有、味、也、夫、人、乃、愛、之、甚、于、公、公、小、有、齟、齬、夫、人

必慍曰。人舍父母而來事公。且其德性如此。公尙有不足耶。嫡庶相處若姊妹。歡然無間言。各生二子。後公官成。既老。夫人子歸河南。錢氏之子寄居于滁。至今子孫家焉。此滁人駱遇安舟中爲余詳言之也。

貧家小女。縱有才色。然以資格所限。卒爲庸夫偶者。何可勝數。古語云。紅顏薄命不誣也。錢氏恃才色而妄希貴遊。矢願既堅。癡情終遂。可謂有志者事竟成。至若委曲周全。溫柔和順。使公與夫人絕愛憐之。是其才更有足多者。

彩雲曲並序

恩施樊增祥雲門

傳彩雲者。蘇州名妓也。年十三。依姊居滬上。豔名噪一時。某學士銜恤歸。一見悅之。以重金置爲簾室。待年於外。祥琴始調金屋。斯啓攜至都。下寵以專房。學士持節使英。萬里鯨天。鴛鴦並載。至英六珈象服。儼然敵體。英故女主年垂八十。雄長歐洲。尊無與並。彩出入椒庭。獨與抗禮。嘗偕英皇並坐。照象時。論榮之學士代歸。從居京邸。與小奴阿福姦生一女。學士逐福。畱彩寢與疏隔。俄而文園消渴。竟天天。彩故與他僕私。至是遂爲夫婦。居無何。私蓄畧盡。所歡亦殂。仍返滬爲賣笑計。改名曰賽金花。蘇人公檄逐之。轉至津門。雖年逾三十。而豔名不減。疇昔己亥長夏。與客談此事。因記以詩。先是學士未第時。爲人司書記。居煙臺。與妓愛珠有嚙臂盟。比再至。已魁天下。遽與珠絕。珠冤痛累日。竟不知所終。今學士已矣。若敖鬼餒燕子樓。空唱金鏤者。出節度之家。過市門者。指狀元之第。得非霍小玉冥報李十郎乎。余爲此曲。亦如元相所云。甚願知之者不。

爲而爲之者不惑耳。

姑蘇男子多美人。姑蘇女子如瓊英。水上桃花如性格。湖中秋藕比聰明。自從西子湖船住。女貞盡化垂楊樹。可憐宰相尙吳棉。何論紅紅兼素素。山塘女伴訪春申。名字偷來五色雲。樓上玉人吹玉管。渡頭桃葉倚桃根。約畧鴉鵲十三。四未遣金刀破瓜字。歌舞常先菊部頭。釵梳早入妝樓記。北門學士素衣人。暫踏毬場訪玉真。直爲麗華輕故劍。況兼蘇小是鄉親。海棠聘後寒梅喜。侍中居外明詩禮。兩見瀧岡墓草青。鴛鴦絃上春風起。畫鷁東乘海上潮。鳳皇城裏并吹簫。安排銀鹿娛遲暮。打疊金貂護早朝。深宮欲得皇華使。才地容齋最清異。夢入天驕帳。殿游闕氏含笑聽和議。博望仙槎萬里通。霓旌難得彩鸞同。詞賦環球知繡虎。釵鈿橫海照驚鴻。女君維亞喬公壽。夫人城闕花如繡。河上蛟龍盡外孫。虜中鸚鵡稱天后。使節西持婁奉章。錦車馮嫫亦傾城。冕旒七毳瞻繁露。盤敦雙龍贈寶星。雙成雅得君王意。出入椒庭整環珮。妃主青禽時往來。初三下九同游戲。裝束潛將西俗嬌。語言總愛吳娃媚。侍食偏能饜海鮮。投書亦

解繡英字鳳紙宣來鏡殿寒玻璃取影御床寬誰知坤媼山河貌祇與楊枝一例看三年海外雙飛俊還朝未幾相如病香息常教韓壽聞花枝每與秦宮並春光漏洩柳條輕郎主空嗔梁玉清祇許丈夫驅便了不教琴客別宜城從此羅帳怨離索雲藍小袖知誰託紅閨何日放金雞玉貌一春鎖銅雀雲雨巫山枉見猜楚襄無意近陽台擁衾總怨金龜婿連臂猶歌赤鳳來玉棺晝下新宮啓轉塵玉郎長已矣春風肯墜綠珠樓香徑還思苧蘿水一點奴星照玉臺樵青婉變漁童美總帷猶掛鬱金堂飛去玳梁雙燕子那知薄命不猶人御叔子南先後死蓬巷難栽北里花明珠忍換長安米身是輕雲再出山瓊枝又落平康里綺羅叢裏脫青衣翡翠巢邊夢朱邱章臺依舊柳鬢髮琴操禪心未許參杏子衫痕學宮樣枇杷門榜換冰銜吁嗟乎情天從古多緣業舊事煙臺那可說微時管蒯得恩憐貴後萱芳都棄擲怨曲爭傳紫玉釵春遊未遇黃衫客君既負人人負君散灰扃戶知何益歌曲休歌金縷衣買花休買馬塍枝彩雲易散玻璃脆此是香山悟道詩

卷二

六

集

苗妓詩

吳縣貝青喬子木

前人謂夜郎之桑濮。在黃絲驛以東。歸化營風俗淫謬。固亦不減古所云也。客有嫖戀於此者。暇日從而往觀。今夕何夕。見此粲者。失笑遄返。雜綴成詩。異樣烟花亦惹愁。岑雲孖雨結綢繆。宛從魔母窺淫室。却在天家問野樓。錦帶纏胸交十字。銀環押耳妥雙鉤。鬼竿影裡呵交去。贏得檳榔一笑投。

苗謂山之高者曰岑。水之分流者曰孖。天苗一名天家。云出自周後。故多姬姓。女子十三四。構竹樓野外處之。苗童聚歌其上。情稔則合。黑苗謂之馬郎房。獠人謂之麻欄。獠人謂之千欄。田山薑黔書陽載苗婦錦服短衫。繫雙帶於背胸前。刺繡一方。飾以金錢。以予所見。雙帶斜作十字形。交於雙乳間。背綴小錦一方。負物則橫貫其中。以爲紐。耳環大如鉤。下垂至肩。富者多飾以珠貝。纍纍如瓔珞。春時立木於野。男女旋舞以爲樂。獠人曰羅漢樓。龍苗曰鬼竿。呵交。謂飲酒也。狝女饗客。以檳榔爲上品。咀之辛香滿口。

蓋水浸令軟。石賁灰裹萋葉藏之。暱者始出贈焉。

問是槃瓠幾派分。踰堂歡舞一群群。桶裙低露雙趺雪。鬢髭鬆堆半笠雲。醅菜登。杵腥欲避刺黎釀。酒啐成醺恰逢蝎子花開日。婢扒蘆笙宛轉聞。

槃瓠高辛氏之蓄狗也。銜犬戎吳將軍頭獻闕下。帝酬其功。妻以少女。槃瓠負女入南山。生六子六女。自相夫婦。此群苗鼻祖也。詳見范史西南夷列傳。唐宋以前。曰蠻曰獠而已。前明就三苗地設府縣衛。支派遂分。花白青黑紅。以色名。宋蔡以國名。龍仲韋謝以姓名。馬鐙狗耳鍋圈以飾名。又有獠獠木老紫薑郎慈八番九股六額子。獋獠。猺猺。猓猓之屬。種類雖蕃。風俗畧同。故註中雜引諸書。不盡區別之。每以令節。男子吹笙撞鼓。苗婦隨之。婆娑進退。疾徐可觀。名曰踰堂之舞。苗女不履不襪。徒跣而行。圍峒錦于腰。重疊百褶。旁無襞積。謂之桶裙。僅及膝者。謂之短裙。苗拖至地者。謂之長裙。苗長裙苗卽狝家也。歛馬鬣雜人髮束爲髻。大如斗。綴於頂前。上覆竹笠。旁以五色藥珠爲飾。貧者以薏苡代之。此係盛妝。惟跳月時始用之。凡漁獵所獲。

下至蜚蜚蠕動之屬。咸麀於一罌。俟其螂蛆腥臭。始告缸成。名曰醃菜。珍爲異味。愈久愈貴。問至富。則曰藏醃桶幾世矣。刺梨一名送春歸。幹如蒺藜。多芒刺。葩如荼蘼。紅紫相間。鮮豔奪目。他省名野玫瑰。皆花而不實。惟黔中實如安石榴。而差小。味甘微酸。釀酒極香。然不耐飲。雖大戶不及一升。便頭岑岑欲吐矣。飲無杯罌。或用牛角。或插竿於甕。蹲而啐之。只宜冷飲。熱則其臭刺鼻也。黔粵山壁間。三四月多黃花。蕊吐頰絨。蒙茸如繡。許鶴沙東還記程作蝸子花。閔鶴癯粵述作屈子花。自予觀之。卽藏草中之金石斛也。根如蘭。葉如柳。莖多節而叢生。黔書謂苗俗不嫻音律。而蘆笙之制。六管比櫛如羽。獨合於古。余取視之。六管如環。並非排列。惟長管冒匏。短管置簞。稍異耳。跳月時。笙梢懸一葫蘆。中貯水。吹久則簞燥。須時時以水潤之。滇焚間謂好曰嫖扒。見楊升庵奇字韻。

跳花坡抱月場。南拉得春陽。月十三解語。略嫌音帶。鵝勸餐還怕。盡藏蠶伴牽。蘆被情何昵。偷結瓜毬性。亦愁作憂恐。防歸路晚。補籠藥箭半林嵐。

孟春合男女於野以擇偶。名曰跳月。卽馬郎房麻欄杆而合成一會。此苗俗大禮也。歸化苗家恒以教場壩爲月場。其南有峻嶺。名跳花坡。自正月初三至十三。皆跳月之期。兩男對跳。四五女聯臂圍之。滿場凡數百圍。男跳易乏。須互換也。笙聲沸天。兩相諧。則目成心許矣。十三日跳畢。男吹蘆笙於前。女牽帶從之。遶場三匝。相携入叢箐間。先爲野合。名曰拉陽。然必有娠而後得嫁。否則越歲復游牝於牧矣。父曰包。母曰咪。兄曰皮。謂華人曰條。官曰朦。亦曰瞎。一爲序。二爲瘦。三爲大。四爲布。五爲目。六爲逆。七爲索。八爲遮。九爲梭。十爲完。艮挫。朝餐也。艮林。再飯也。艮喬。夕餐也。鷄曰參。鴨曰阿。馬曰虐。犬曰磨。豕曰拜。牛曰批。亦曰商訛。凡此方言。與黔書說鈴諸書畧同。然有音無字。但以華字譯之而已。苗家造蠱。每於端午聚蜈蚣虺蜴於一器。而咒之。積久啟視。留其一則爲蠱。取其涎矢以毒人。奇病百出。卽數年後千里外無得免者。予嘗夜宿苗寨。見空際如流星閃電。問之。則曰放蠱出。飲也。長者爲蛇蠱。圓者爲蝦蟆蠱。而以金蠶爲最毒。蓄蠱之家。潔淨無點塵。投宿者恆以

此爲趨避。蓋一寨中輒有兩三家也。中其毒者。急服白蘘荷汁。猶可解。蘘荷葉如芭蕉。根如薑芽。喜陰木下生。潘岳閒居賦所謂蘘荷根依陰是也。或曰刺蝟能擒蠱。見陸雲士峒谿纖志。苗俗無臥具。恆掘地爲爐。蒸柴而擁以炙。雖隆冬亦裸體相枕也。近歲間以蘆絮爲被。若木棉則僅有矣。跳月時取綠巾結爲小圓毬。視歡者擲之名曰瓜毬。亦曰繡龍。蔡苗會親屬婦女椎牛歌舞。名曰作憂。黑苗兼以賽神。名曰吃牯臟。紅苗則間擊銅鼓。名曰調鼓。諸苗恒用藥弩。夜伏叢莽間獵鳥獸。杜詩莫徭射雁鳴桑弓是也。藥必市諸狝家。狝家凡三種。一曰補龍。一曰青仲。一曰卡尤。皆五代楚王馬殷自邕管遷來者也。治藥之術甚秘。必得粵西所產毒母名駒者合入。始靈。

梅花瘴。起火紅邊。繪蠟春衣。結束鮮。莫謂更直干甚事。應教耐德見猶憐。調和蒟蒻三升醬。屏絕芙蓉一枕烟。閒與歹鷄談往事。傷心姻婭侍皇僊。

黔瘴霜降而息。明春梅花開始發。予以臘月抵黔。陰霾如入雲霧中。一月無四五日晴朗。誤疑爲瘴。久乃知爲罩子。非瘴也。蓋城市皆無瘴。惟陰僻之區。

或數年一發。或數十年一發。初起叢灌間。燦爛作金光。下墜如丸。漸飄散若車輪。非虹非霞。五色滿野。陸劍南避暑漫抄。所謂瘴母其氣香烈。觸之者始如病瘡。旋成黃疽。半載莫救矣。其或數十里。人民鷄犬。靡有子遺。歸化營凡轄十三支。而火紅支地氣最熱。故瘴亦最酷。近年燔山木而髡之。得少衰時。或一發。擊以火器。亦即驚散。用蠟繪花於布而染之。既去蠟。則花紋如繡。盧鹿苗自蜀漢濟火。從武侯征孟獲有功。封羅甸國王。世長其土。最貴者爲更苴。次則慕魁。句魁。罵色。以至黑乍。凡九等。曰九扯。群苗有訟事。涉官者。其長兼理之。耐德正妻也。漢武帝因唐蒙言蒟醬。而用兵西南夷。梁武帝噉之而美。曰與肉何異。予以爲必異味也。抵黔後。徧訪之。不可得。久乃於苗寨見之。花如流藤。葉如葦撥。子如桑椹。瀝其油醃爲醬。味亦辛香。而不甚可口。楊升庵丹鉛錄所考非謬矣。或取其葉裹檳榔食之。亦可辟瘴。呼之爲萋。卽萋弱也。黔人呼罌粟花爲芙蓉。故鴉片一名清芙蓉。自清鎮以西。彌望皆是。華種攢瓣如芍藥。惟夷種單瓣。故結實尤大。薄暮剝其外皮。越宿漿

盜如膏。收而熬之。卽鴉片。不必配以他藥也。凡妓館中。每以此煙媚客。而苗妓獨否。蓋其酋固能嚴禁也。歹鷄猶華言並坐也。嘉慶初。南龍妖婦王囊仙。據洒洞。合七結鬚。以叛。自稱皇仙娘娘。歸化石寨。苗酋班捐金。令妻么香。率男婦八百人往應之。後威勒侯勒保。計擒囊仙。檻送京師。餘黨皆駢戮焉。狐媚何堪。掩袖時。凌波。照影門。芳姿嬌臨。猛已場邊。路歡。開家親殿裏。屍抱子招延巫設祀。避寅先謝客。窺籬招搖禾落坊前。過翠帶紅巾。悔亂披。

苗女亦饒姿色。惜多狐臭。不可近。暱者每掩鼻就之。余於焦溪灘溪間。每見苗女三五成羣。櫛沐於清流急湍之上。頗怪之。後閱通志。知其性喜照水。恆顧影以取媚也。歸化在萬山中。數百里無巨溪闊澗。故遇水益低徊不忍去云。趕場曰猛已。亦曰拜其。余自盤州抵歸化。歷龍場兔場狗場鷄場諸寨。初不解命名之義。及詢諸土人。始知逐日趕場數百里間。按十二辰爲一周也。苗女麇集其間。固一穢墟云。親死。剋木以歛。置諸崇崖峭壁間。不施蔽蓋。旁立木主識其處。名曰家親殿。初殯。集親戚男婦笑歌跳舞。是爲鬧屍。明

春聞杜鵑聲。舉家號哭。曰。鳥猶歲至。親不歸矣。女在室。蒸報旁通。淫奔無忌。卽跳月後。許有家矣。亦必結好數人。名曰野老。聘夫就之。強相合而已。有子。始告知聘夫。延師巫。結花樓祀聖母。聖母女媧氏也。親族男婦歌飲二日。名曰作星。自是有犯。夫遂得以兵刃從事矣。五月寅日。瑾戶伏處。夫婦異寢。親族不相往來。有犯者。謂必遭虎厄。苗俗近漸丕變。婦稚竟有以節孝稱者。道光十二年。麟方伯慶採訪五人。請於朝。以旌之。孝子二。曰喧噶。曰賈香。節婦三。曰扁招。曰禾落。及其子婦曰噶。六月六日爲換帶之期。羣女裸浴於溪澗中。人或薄而觀之。贈以裙帶。則尤喜。嗤者或不得帶歸。而父母以爲恥。野老亦以多爲榮。私一男。則髻上蒙紅巾一方。斜疊若巾。愈高而愈自得。有積至數十層者。同伴咸嘖嘖稱羨云。

海雪畸人夢一場相逢莫是韞雲娘羞他送子煩瓜嫂嬾去迎神祀竹王鑿齒縱教隨狔埋香忍使殉鴛鴦要留阿妹相思曲水曲從伊唱幾章

明季劇湛若號海雪畸人爲苗女執兵符者雲韞娘記室著有赤雅一編舒

鉄雲題赤雅詩。卽譚雲驃雪都無價句。側用雲驃二字。姑從之。凡無子者。親友於中秋夜。飾豔婦抱瓜送於其門。稱爲瓜大嫂。此係黔俗也。苗婦亦效之。昔有女子浣于遯水。見三節大竹。剖視之。得一男。歸養之。長而雄武。衆立爲夜郎侯。漢武元鼎六年。舉國內附。後以事誅羣苗。思之不置。請爲立侯。牂柯太守吳霸以聞。乃立其三子爲侯。因相沿立竹王祠。至今羣苗猶歲時奉祀勿衰云。玃猪種有五。曰花曰紅曰剪頭曰猪豕曰打牙。打牙尤慄悍。而女子頗纖好。將嫁必折其二齒。否則恐妨夫家。蔡苗死夫。必以婦殉。婦所私挾衆奪去。乃免。苗曲有妹想思妹同庚之名。率淫奔私昵之詞。宋時牂柯蠻入貢。令作本國歌舞。一人吹匏笙爲蚊蚋聲。數十人宛轉旋舞。以足頓地爲節。名曰水曲。見宋史。

吳下詩伯首推貝子木。子木少負奇才。足迹半天下。窮愁寞落以終。所著半行庵稿。多憂時感世之作。沈雄堅卓。慷慨激昂。洵吳中之老名士也。稿中有苗妓詩六章。足補陸次雲峒溪纖志所未備。爰鈔存之。春草吟廬主

人跋

卷一

六

集

十國宮詞

長洲秦 雲膚雨

吳

巨燭。毬場。到曉。鐘。楊。花。飛。作。雪。花。濃。君。王。堪。笑。爲。蒼。鵠。臣。下。空。教。夢。白。龍。平。日。羽。衣。耽。自。服。當。年。玉。冊。究。誰。封。丹。陽。宮。裏。來。衫。笏。腸。斷。攀。髯。痛。九。重。

南唐

譜。出。提。鞋。樂。府。詞。風。流。鍾。隱。此。何。時。書。藏。玉。軸。蛾。眉。掌。曲。奏。金。鈴。鳳。管。吹。緇。服。空。勤。披。梵。筴。紅。羅。豈。惜。作。宮。帷。娥。皇。醉。舞。瑤。光。殿。敵。國。量。江。竟。不。知。

前蜀

鬼。子。金。牀。阿。父。空。醉。妝。嬪。女。玉。顏。紅。每。教。狎。客。陪。歡。宴。更。選。良。家。入。後。宮。檀。板。霓。裳。歌。未。罷。綵。毬。錦。障。樂。無。窮。白。衣。旋。見。牽。羊。出。降。表。詞。臣。草。撰。工。

後蜀

觀。燈。恰。值。上。元。辰。步。輦。香。風。碾。畫。輪。梔。子。獻。來。留。野。老。牡。丹。開。出。賞。羣。臣。鴛。衾。

孰得專房寵。犀帶堪悲去。國陳兩袋河山能。幾日紅顏愁作宋宮人。

南漢

侍中冠珮拜瓊仙。神語虛傳帳幄前。碧水池迷蓮葉色。紅雲宴醉荔枝天。綺羅爭鬥花千種。土木空誇賦幾篇。北去劉郎羞執挺。明珠一炬散如烟。

楚

風景名園盡日娛。賦詩陪駕侍臣趨。九龍殿起傷民力。五馬歌成啓霸圖。畫障偏工摩女俠。金經底事誦浮屠。空聞禮佛深宮裏。免得他年殺運無。

吳越

陌上花開滿路香。宮車緩緩返紅妝。弄兒漫說看銀鹿。得子先聞獻玉羊。塔建黃妃誇壯麗。樓名青史更荒唐。當筵愁聽琵琶妓。金鳳歌殘國已亡。

閩

水晶宮裏喜勾留。幾日西湖翠輦遊。瑪瑙杯寒天子醉。鴛鴦花煖美人愁。大牀長枕銷魂樂。豔舞嬌歌轉眼休。何事實皇無策救。任他邊鐫下潭州。


荆南


風光春鎖。渚宮深繡闥。朱甍照碧潯。海內千金求寶馬。殿前十伎奏瑤琴。華筵頻會中朝使。錦段難歡上國心。井底香魂花欲泣。宋師惆悵一朝臨。

北漢

廡中三品飼黃驢。爵賜將軍寵待優。頒物叔皇來玉帶。工書嗣主學銀鈎。兵圍枉自封函告。師敗還聞得疾憂。當日青宮多養子。劉家早已失金甌。


香艷叢書六集卷一終





香豔叢書

第六集



香艷叢書

六集卷二

梵門綺語錄一

杭州慈渡庵某氏女

某氏女曾住上海新聞某里。年不及花信風。舉止闊綽。居恆不事妝飾。裝束靚雅。風流旖旎。望之如藐姑仙子。赫蹏不律。實不能髣髴其一二。第以幽閒貞靜。不苟笑。言人之見之者。知爲大家閨秀也。顧其所居。不御婢媼。祇一年與相若之少年。隨之飲食。必侍出入。必從。或以爲伉儷也。則尊卑之辨。似嚴。或以爲僕役也。則上下之分。從略。兄歟。弟歟。似是而非。又在疑似間。夫惟存而不論。略而不議而已。粵人某操。鬻粟業。持籌握算。滬瀆大腹賈也。偶經其門。見而艷之。洵其房主人爲撮合山。願以重金作下聘。禮主人假索租值。期親詣女。所以意風女。女似首肯。並不問其爲正室爲適室也。但云有父母在一稟。明後俟命。卽定耳。主人以告粵人。粵人喜甚。以爲藍橋玉杵。白裴航不能專美於前矣。然恐女



有反覆。先以三千金託主人轉爲贈。且云衣裳飾品姑俟他時。女故作推卻意。固辭而後受。旋有一聾嫗來謂是其親生母。粵人促主人以婚事請。嫗固充耳不能聞。告語之下無所可否。但作點首狀。一似無不悉遵台命者。粵人又以金珠數事價值巨金。介主人盛飾往請婚期焉。並以五百金爲老母壽。嫗一笑而納之。婚有日矣。今夕何夕。見此粲者。粵人盛備輿馬。倩主人作冰上人相。將至其門。途中觀者咸嘖嘖稱美曰。阿誰豔福。何修得此。孰意事出意外。變起臨時。百兩來迎。雙門緊閉。詢諸鄰右。昨夜遷矣。人面不知何處去。桃花依舊笑春風。主人第徇粵人之情。並非好作證。婚人財非中飽。自是無庸任其咎。惟是鴻飛冥冥。未免咄咄稱怪。在粵人則黃金虛耗。實爲騙局所賣。自不禁狂呼負負。然以女之處心積慮。設計頗工。知蹤跡亦未必有效。遂卽不予深究。付諸無如何而已。由是觀之。安知聾母之非真母。母聾之非真聾。特假是以售其術耳。至飲食必侍出入必從之。年少究爲女之何如人。則殊不可知。林眉月女史浙人也。與女爲同鄉。爲余述女子歷史甚詳。女越產也。其父曾任某縣教諭。女隨父

在任所。闌干苜蓿。冷署清閒。教以讀書。頗覺聰慧。及長。解吟詠。善作小詩。年及笄矣。感悅有彪。空賦懷春之句。射屏無雀。尙虛中選之人。縫人某者。年未弱冠。風流自賞。翩翩少年也。時以裁衣入署。女嘗與之商量尺寸。積久之。下相識。日稔。兩情相洽。至於苟且。女乃竊其父之宦囊金。挾而與之偕行。初則匿居某處。偵騎莫之得。繼以資斧乏絕。不得已。作遁入空門計。皈依杭城慈渡庵。弓足雲鬢。未經薙度。蓋但借佛門以匿跡。非真與我佛有緣者。六根未淨。五蘊非空。又與某道士結不解緣。住持尼屢戒。不能悛會。同庵有沈小姐者。某紳女也。未嫁而夫死。俗稱之爲望門寡。守貞不字。勒破紅塵。繡佛長齋。深耽禪悅。女與之晤。甚沈不知女之所爲。以其性情和易。兩相魚水。遂以禪房密友視之。初不料女之蓄意不良。而心懷叵測也。沈固挾有多金。並在家時之金珠飾物。甚夥。女或約沈以寄香普陀。或給沈以建築庵舍。窮思極想。涎其多金。不數月間。沈之資財爲女騙者。十八九。猶不止此。復欲以人之污已者。污沈。致沈忍之無可忍。訴之無可訴。追悔莫及。羞忿自盡。女由是不容於其庵。爲住持尼所逐。而人言藉藉。

藉武林無女容足地。間關來海上。思欲以賣笑爲生涯。住居新聞時。專使其騙人伎倆。其受其愚。而墮其術者。豈第一粵人哉。相隨之少年。卽當日之縫人也。端莊其面。淫毒其心。是真一女界醜歷史。其敗類未有至於此極者。女史知女顛末。爲余言如此。余聞女史言。得盡女之梗概。余客海上久矣。猶憶昔年曾與女遇。一見卽知其爲風塵中人物。顧以天生麗質。未免有情。探訪之餘。頗涉遐想。幸余以寒素故。未致被其騙。不然其不至步粵人後塵不止厥後數年。音耗杳然。去年偶於同安茶樓見之。齒微長。而風韻一如舊時。有知其近況者。謂現住小東門。與某醫士結露水緣云。

蘇州鳳池庵小馥

官府之斷案也。但憑諸臆見。不詳加研究。以疑獄爲信讞。千古之覆盆莫雪。曾不知其凡幾。若蘇州鳳池庵小馥。真大可憐矣。蘇州盤門內泮環巷。俗稱半泮巷。巷在府學之西。學中泮水出牆外。通城河。河環巷側。故曰泮環。曰半泮者。音誤也。地境荒涼。人跡稀少。屋宇不數十椽。民居僅十數戶。巷中有如意鳳池兩

庵皆尼庵也。山門並列而起。門內有小戶。通往來如意庵。鄉尼二三輩齋魚粥鼓。頗自清修。青夏則灌種蔬菜。秋冬則紡績棉紗。操作勤勞。僅堪度日。鳳池有尼數人。中年某尼。年華半老。性尚風騷。先與一小販營生者。通有年所矣。後以庵中時有梁上君子。相惠顧。因約一織機者。置機其中。篝燈操作。藉以守夜。黃昏人靜時。尙聞機聲。軋軋與梵貝聲相互答。鄰居安之以爲守望相助。莫此爲善也。計織機者。鰥魚寂寂。不耐清宵。中年尼亦以其年穉於小販。其人者不久卽成。苟合得新忘舊。遂與小販疎小販。無如何。惟偶或一往耳。佛界清幽。紅塵隔絕。行爲秘密。鄰里舉不得而知。獨如意庵。洽比爲鄰。庵內且有通徑。鳳池之一舉一動。無不彰彰在其耳目中。綠楊分作兩家春。固非如意諸尼所敢得而知者。春池水縐。甚事相干。一薰一蕕。究難同器。遂禁不與通聞。間且以小戶加扃焉。宣統紀元秋。有一常熟客。過鳳池門。翩翩年少。衣服麗都。手指之上。金戒粲然。織機者見而豔之。僞爲似曾相識者。誘而至庵中。將設計以爲敲詐。地中年尼捧茶餉客。故示殷勤。日暮。崦嵫微露。留髡之意。客悟其命意之所在。因探

懷出銀包拈一枚以贈尼。曰：日云暮矣，行將歸去，不腆之物，留作香金，請俟異時再來。隨喜織機者目覩其懷中金，愈不禁饒涎，欲滴乃示意於尼。曰：賺客多金，何以爲謝？有供佛一壺酒，盍留客一嘗，香積厨風味乎？尼唯唯。客固辭不得，命欲出而門已閉，不得已且入座。焉客固不勝酒力者，數杯之後，頽然醉矣。織機者遽起，取厨刀以殺客。尼從旁贊成之。夜深無援，救人應手卽斃。命遂盡。取客所有密啓門呼小販者，小販居庵側，招之立刻至，告以故，相與棄屍。庵後窪水中而分肥焉。小販歸織機者亦當夜走矣。明日行人見屍，喧傳道路。里甲以報官。官蒞場驗，遍問居民，不知所對。顧巷中民居十數戶，暨如意庵諸尼，聞官至時，莫不啓門出視，在場聽候。發落獨鳳池庵重門緊閉，一似不見不聞者。疑寶所在，不言可喻。官捕尼亟而小馥適自外歸，蓋小馥先應他庵之招爲城中臨頓路一新喪家嗒經往承其乏已三日不歸矣。迨經畢歸來而縣差已在門首，不分皂白，不問情由，與庵中尼共繫到案。其於殺客事固茫然無所知。刑具森然，官勢可畏，惟有嚶嚶啜泣，默然不能出一言。縣官將小馥與他尼分別管

押以庵中虛無人。派差爲之看守。而織機者於前夜歸家後。悶臥至日暮。猶不知尼之悉已被逮也。乘夜到庵扣門而入。則啓門者赫然其爲縣差。差知來人之必有關於是案也。立即押赴案下。官升堂問織機者。直認不自諱。惟力辯其不與中年尼同謀。而反扳誣小馥耳。意者自與中年尼通好。後愛情激發。以不忍加害故。而故作此狡獪也。官亦以織機者與小馥年相若。遂照錄其口供。不待小馥置喙。即以疑獄爲信讞。逐庵中尼籍沒庵產。且於後庭得窖藏銀千五百圓。悉充諸公而定織機者罪。並加罪小馥焉。究之小馥自捉將官裏去。後與案中一千人分別管押。禁不與他人通一語。其於全案之底蘊。小馥且到死不能明冤哉。冤哉。人有見小馥其人者。謂年不過二九外。體態苗條。丰神韶秀。留海髮黝然。覆額一可人也。

洞庭山湘公庵阿巧

蘇州吳縣治西南。汪洋三萬六千頃。卽太湖是。中有洞庭山。山水清絕。山分東西。東山多尼庵。湘公庵者。洞庭東山尼庵之最著名也。阿巧湘公庵尼也。余友

張君建亞知阿巧歷史綦詳。建亞曾充某學校教員。其同校某君洞庭東山人也。以阿巧生平述之於建亞。一日建亞爲余言曰。君知洞庭東山之尼庵乎。是處尼庵之規則。與他處絕不同。他處女尼。或爲鄉里雛鶯。因貧而賴以育養。或爲人家別鵠。因寡而藉以清修。或爲貞潔不字之閨娃。或爲伉儷不睦之怨耦。以故不守清規者。雖容或有。究未有公然賣笑如洞庭東山之尼。旣曰尼矣。何嘗祝髮霧鬢。雲鬟如故也。何嘗弛足蓮鈎。羅襪如故也。濃妝淡抹。各擅勝場。徵歌而侑酒也。纏頭擲到。姍姍其來。亦聽客之所爲耳。比之平康里中。殆有過而無不及也。阿巧本農家女。七歲喪母。湘公庵某尼。與其母爲姊妹行。憐阿巧幼無依。挈而留養於庵中。及長。有殊色。今年二十一。二矣。善應酬。工度曲。風神綽約。雅韻欲流。所謂穠纖得中。而修短合度者。喜作時世妝。髮黝黑。而可鑑。雙鉤瘦削。如束筍。然菴中故多佳麗。環肥燕瘦。美不勝收。妙雲蕩逸。飛揚愛寶。孤高坦率。各享盛名。然以視阿巧之風致。嫣然不覺瞠乎後矣。洞庭多富室。水陸出產尤夥。四方商賈雲集其間。顧問柳尋花不少。崔張之俠客。而倡條冶。葉郤無。

趙李之名。姝既有我佛之藏。嬌遂憑行人以訪。豔况阿巧爲東山翹楚乎。湘公庵自有阿巧其人。生涯頗不落寞。禪房曲徑。修葺一新。有治遊其人者。莫不以未到湘公爲憾。並莫不以一見阿巧爲幸。由是阿巧積資富厚。釧金環翠。羅綺生香。大家閨秀。不啻焉。建亞旣爲余言如此。復誦其友贈阿巧一絕云。爲尋春色到伊家。認取仙桃爛若霞。怪煞維摩太多事。東風一夜亂飛花。余聞其詩。謂建亞曰。此君詩亦平常。然似覺別有命意。不知命意之所在。不識詩中之奧妙。建亞笑曰。余亦云然。余友曾言。昔年阿巧患天花。一月而瘳。面上癍痕點點。幸尙瑕不掩瑜耳。詩言蓋指此也。然而惜矣。建亞又言。阿巧自得痘疾後。丰姿仍不稍減。有某客過其處。巨賈也。一見而豔之。欲以巨金聘阿巧。未之許。客且以千金贈客。固俠者而阿巧身價之高可想也。此亦建亞之友所言。而建亞轉述於余者。

洞庭山湘公庵妙雲愛寶

妙雲蕩逸飛揚。愛寶孤高坦率。一以流動。勝一以閒靜。勝同隸洞庭東山湘公

庵。妙雲年二九。愛寶齒微穉。皆足爲湖山生色焉。湘公庵阿巧。風神綽約。雅韻欲流。穠纖得中。修短合度。爲尼界中翹楚。山中訪豔。無口不碑。妙雲愛寶兩人。與阿巧同庵舍。儘情摹訪。類多效阿巧之所爲。談笑妝束。一舉一動。閒皆阿巧所涵育薰陶。而習與俱化者。特兩人賦性不同。不免毗陰毗陽之憾。然其天真所流露。不假矯揉。造作風流。自賞動中。天然生民以來。未有孔子。子夏。子游子張。皆有聖人之一體。阿巧固集大成者。全材難得。妙雲愛寶各擅一長。亦足多矣。妙雲本毘陵小家女。家有姊妹五。雲爲最幼。其母以提挈之難。週也於雲。二三歲時。寄養毘陵某庵。轉輾而入湘公。時年尙八九齡。愛寶則爲湘公某尼私生女。洞庭尼庵。雖稱方便。然既假我佛以爲名。究之佛門清靜。蒲團禪版。陳設儼然。則呱呱而泣者。不得不爲掩人耳目計。以故愛寶甫生時。卽寄乳鄰媼家。免懷而歸。纔四五歲。禪宗家法。凡皈依三寶者。不以行年長幼爲次序。而以入門先後爲次序。畧如官場所謂資格者然。愛寶實穉妙雲二歲。妙雲之來湘公。後愛寶者二年。故妙雲照例稱愛寶爲師父也。夫所謂蕩逸飛揚者。眞妙雲的。

稿不磨之定論。妙雲性流動。略不自知。檢束體微。胖軀幹不甚長。姿容豐潤。穠
豔如春海棠。喜作學生妝。烏雲委地。時易釵而爲弁。善飲酒。對客輒以拇戰角
勝負。醉則或作蹋搖。或作胡騰兒舞。嘗語人曰。余之歌於女學生之琴歌。
如何。余之舞於女學生之體操。如何。其流動蓋如此。人以其豪爽也多。願與之
親。妙雲固易與相親者。菩薩低眉禪。歡喜銷魂真箇比。比而然尋常視之耳。
愛寶以孤高坦率。故頗不善妙雲之所爲。時以微詞相諷勸。雲若充耳不之聞。
愛寶無如何。聽之而已。然有知愛寶隱事者。謂亦與西山某氏子有齒臂盟蹤
跡。甚秘密。特以芳齡尙穉。儼然待字。閨中年已破瓜。初非完璧。春風豈蕊誰曰
含苞。櫛翠庵本非妙玉終身地。靜俟其所爲可也。然性閒靜。鮮嗜好。好清潔。茶
鑪經卷不染纖塵。動用器具不用他人物。人亦無敢用其物者。褰衣被褥間日
一易衣。不御羅綺。以布質易於洗濯。故裼以淺淡洋花之布衣。三日一澣。三四
澣輒給諸人。蓋其生性使然也。又喜規人過。如妙雲之放浪。輒諫之以直言。雲
雖不之聽。第以情詞柔婉。亦未嘗怨之也。至於陌頭楊柳。綰起春心。未免有情。

誰能遣此人之多言。亦可畏其愛寶之謂乎。湘公庵除阿巧外。原以妙雲愛寶兩人爲特色。秉性縱相異。而小鸞慧業。則又異曲而同工。其伶俐俊俏之神情。斯固尼界中所罕見者。建亞張君先以其友所述阿巧告余。余已爲之書其事矣。妙雲愛寶之梗概。亦建亞轉述於余者。梵門綺語。因復合而書之。

震澤新庵連生

江震間女尼。大都自幼受育於尼庵。絕無自願爲尼而皈依佛法者。問有四蘊非有。五大皆空。百人之中。鮮一二焉。其妝束亦與蘇杭間女尼異。十三四歲時。名爲雍度。其實不過頂心雍去一團。約略不及銀錢大。長髮雖經翦去。然前後留海髮。徧覆四圍。茸茸然隨風飄動。黝黑豐潤。光可以鑑。甚有至三十餘歲。尙是烏雲滿額。勤施膏沐。對鏡自憐。傅粉添香。爭妍鬪異。綺羅被體。衣裙一似俗家。惟襟領間。則變圓爲直。而緣飾之鑲嵌甚華也。震澤鎮新庵連生。年已及花信。娟娟自好。善於修飾。身軀在不長不短間。肌膚雪白。斌媚動人。其嫣然一笑時。微過淺暈。姿態韶秀。一尼界尤物也。豐容盛鬋。髮光澤如髥漆。方之古玄妻。

或有過無不及。豔名噪遐邇。羣以活觀音呼之。其服御尤極講究。冬裘夏葛。色色生新。禪榻之旁。箱籠以數十計。有見其冬月應里中夜懺之招者。披一出鋒銀緞白狐斗篷。飄飄乎如凌虛仙子焉。以故冶容。既不免於誨淫。而慢藏尤不免於誨盜。昔年梟匪橫行江浙間。杭滬小輪且遭堵截。新庵亦被搶劫。庵故無長物。惟連生衣服甚夥。傾筐倒篋。搜括一空。連生匿鄰家。僅僅得免。盜黨以衣付質庫。斜襟直領。無不知其爲尼家物。且無不知其爲連生物者。而盜案亦因之而破。鵲梁不稱。至於不敢領賊。連生自被劫後。頗自勘破紅塵。薄命自嗟。諸般懊惱。適聞蘇城某僧寺傳戒。大有祝髮焚修意。拚擋行李。屏去鉛華。與一老尼借布衲一襲。方擬將八千煩惱絲連根削盡。行有日矣。忽爲小病所纏。遷延數日。致於不果。青鸞音杳。裘葛三更。人有自笠澤來者。詢之。皆以人面桃花對名花有主。殆已與有情人成眷屬矣。

震澤新庵五寶

五寶亦震澤新庵尼。年已三十外。風姿稍覺黯澹。而氣韻自不可掩。居恆不事

修飾無尋常脂粉氣。顧、覆、額、之、髮、黝、然、布、帔、青、衫、裝、束、尤、極、淡、雅。見人則清談
娓娓。令人爲之神移。坦直豪爽。胸中無城府。風騷由其天性。亦生而成者也。新
庵女尼七八輩。故多妙年俊俏之流。盛鬻修容。都是一時之秀。然震澤一鄉鎮。
無有肯鬱鬱久居者。有女懷春。感標梅之迨吉。茵溷不可知。禪門寂寞。逃而入
者。復逃而出。此往彼來。曾不知其凡幾。獨五寶自幼隸新庵。垂垂三十年。秋月
春風等閒過去。頻年梵貝一若深奧。我佛有緣者。不知者。幾以爲桃李其容。冰
霜其性。懷乎其不可犯。雖愛慕之。而無如何。殊不知五寶固別有深意在。特行
爲秘密。雖同居伴侶。亦幾不能知其詳妙。常自有意中人。潘氏子其庶幾乎牆
裏杏花。關滿園之春色。風前楊柳。漏大地之春光。消息相傳。非特屬垣之有耳。
蓋有防不勝防者也。余故人子汝南生。世居震澤。家與庵爲鄰。所居第一巷。隔
其讀書之樓。有百葉牕二。適與庵之後窗對。一日夜深。人靜。生尙挑燈作手札。
忽聞對面窗呀然作聲。傾耳聽之。則又似男女喁喁私語者。遂潛息。几上燈將
窗上百葉片抽起。而竊窺之。則其同學友潘某正與五寶並肩坐。几上壺觴。

具在旋復見五寶樓潘某於懷中屢剝西瓜子以櫻脣相喂飫潘某嘻嘻頑笑若嬰兒之取媚慈母者然蓋潘某年尙少約穉五寶者十歲股掌翫之實面首充之也時值孟夏天氣漸熱迨午夜而窗猶未閉則是夜褻狎情形歷歷在生兩目中的一幅秘戲圖殆實父得意之作也生擬推窗呼喚警以深宵風露男女衛生諸說預爲異日要約酒食地步繼思一池春水甚事干卿驚散鴛鴦必招尤怨且一經揭破兩人之名譽蕩然攻發陰私賢者所戒因之收拾歸寢惟有咄咄稱怪而已越日見潘某生爲之述聊齋陳雲棲事潘爲紅漲於面囁嚅不能作一語生曰余不過以君亦榮陽華胄故假留仙筆墨作談助非有他意幸勿多心彼此知交萬勿以疑誤相罪責反以他言亂之而後已次日潘某忽過生齋力邀生赴新庵且願爲先容生意此必潘某之與五寶欲兩相詰責而僞爲剖辨也承諱兩不便當境將何措辭再三婉謝固辭不敢往潘堅邀之遽拉生行情辭哀懇婉轉作乞憐狀生不得已姑偕潘去則五寶已治具待盤殮羅列推生上座酒次語生曰飲食男女大欲所存僧俗當無二致但僧家格於佛

教不能暢所欲爲耳。卽如几上粗肴肉膾魚羹。非盡蔬菜。亦豈不在禪門禁令之內。則飲食既未能免俗。而男女之道何必不然。講學家輒斷斷以氣節責人。抑何少見之多怪耶。在開通者當不若是之固執也。生唯唯不能置一詞。生以五寶之言雖多含蓄不盡。然明明爲潘某自承。明眼人不待多言。況前夜之溫犀秦鏡耶。爲前日之所諷於潘某者。當已爲潘某轉罄於五寶無疑。五寶本聰明人。並不究生之所自知。而若能知生之所自知。當時五寶諄諄言之。生默默聽之。潘某在座。則局促不自安。深有難乎其爲情者。酒數巡。生不能久留。告謝而歸。他日見潘。始知五寶果以爲既已隱瞞之。不終不如披露之爲愈。強潘邀生。實非潘願。潘忸怩甚言之。頗呈愧色。生故開通。亦並不與多言。然五寶之坦直豪爽。非特尼界中不可一得。卽求諸尋常巾幗。日以平權自由作口頭禪者。當又頰首下風。萬不能及。余聞生言。亦不禁爲之歎慕不置。而潘某者。無論其家法之如何。乃與五寶年相懸。自無得成眷屬理。在五寶固守不嫁主義者。聞至今年近不惑。潘仍皈依女菩薩。關係殊密切。寶則仍在新庵。爲毘邱班首云。

震澤老太廟阿文阿禎

阿文名安文。阿禎名瑞禎。皆震澤老太廟尼也。阿文齒稍長。約在二十左右。身苗條。纖腰如弱柳。阿禎則年方二八。明眸皓齒。身體稍短於阿文。然妙在不長不短間。二人皆丰容俊美。清秀無塵俗氣。一時盛名鼎鼎。咸以姊妹花稱之。阿文善烹調。尋常齋蔬。咄嗟可辦十餘桌。預先訂定。尤爲精美。以豆豉麵筋。幻成魚肉雞鴨形。置諸席間。幾不可辨。眞贗嘗之。味絕佳。若易素菜爲葷。殺亦無不芳馨可口。盤殮精潔。彷彿吳中船式之菜。一席償四五金。即可飽嘗。香積風味矣。老饕好事。至奉以禪門。絡秀之號。文曰。旣爲禪門。非是屠門。君等時來大嚼。其何說之辭。余友汝南生答之曰。卿眞欲放下屠刀。立地成佛。耶。然磨刀霍霍。爲諸檀越執庖丁之役。眞太苦卿也。言訖相與一笑。阿禎伶俐俊俏。頗通文理。且精會計。常住之中。出入簿記。皆阿禎一手之筆。鈎稽精確。累黍無差。先是老尼某收阿禎爲徒。以阿禎性質明敏。愛之如掌上珠。老尼小有積蓄。去年老尼病。悉以所有給阿禎。老尼死。阿禎居然有地有田。有現銀。人心勢利。羣相趨奉。

顧阿禎頗能以小惠籠絡人。冬令租息所出往往以大半分潤同輩鄰里之窮苦者。亦時時有所周卹。故人稱阿禎爲慈善家。云阿禎性好潔淨。先本與老尼同室。臥老尼沒後。將舊室修葺一新。淨几明牕。十分幽雅。經卷文牒之類。摺疊齊整。香爐茗具。陳設位置井然。秩然。平日喜作小楷。簪花妙格。娟秀可觀。阿禎既爲同輩所推重。而阿文尤與之相善。江震間女尼多污點淫靡之風。習爲固然。惟阿文阿禎兩人差無瑕疵之可指。阿文年齡長大。確能自守清規。阿禎知識已開。獨得自完。太璞汗泥中有青蓮花亦難得也。

嘉興南庵淨芳

禾中唐泰階孝廉少負不羈名。丰容修美。未弱冠補博士弟子員。有聲庠序間。旋食餼。歷任學使。按嘉郡試。輒冠曹輩。顧性挑達。漫不自檢。攝與里中紈袴子酒食遊戲。相徵逐。飲博無虛日。南庵尼淨芳年二九。豔名噪遐邇。遊人到其庵者。無論其爲訪豔而來。爲禮佛而來。莫不以一見淨芳顏色爲幸。淨芳聲價頗自高。潛心繡佛。岑寂自安。恆不肯輕見人。一聽老嫗離娃。應酬檀越而已。南庵

距城十里許乘興而往。未得盡興而返。如入寶山空手還。人咸引以爲憾。惟孝廉至則淨芳淪苦茗進香果。咄嗟治具肴核紛陳。一若常爲預備者。故人之欲見淨芳必以孝廉作先容。否則不能如願也。孝廉到南庵每爲平原十日之遊。老母家法嚴。輒託辭於文會。此間樂不思蜀。向之相與飲博者。因之日以疏。且不復如從前之遊戲徵逐矣。禪房幽邃。竟藉以爲藏修地。文學由是而大進。時或以韻語教淨芳。故淨芳善作詩。皆孝廉所授也。會值大比年。孝廉僞以避暑讀書擬偕同人先事赴省垣。預爲舉業地步者。請之於堂上。老母許其請。遂得公然下榻於南庵。淨芳添香佐讀。倍極殷勤。女貌男才不免爲愛情所激。觸閨房甚於畫眉。外人那得知其隱富貴。母相忘當無待海山盟誓焉。迨試期至。淨芳送之行。眠早起遲。再三珍重。試畢歸家。頗以思念情人爲苦。不數日又以赴省候榜。辭老母其實則仍往南庵也。重陽節後省中撤闌揭曉。鹿鳴報捷。急足到禾中。孝廉固已高中。經魁合家大慶。喜然孝廉則未之回家中。以其尙在省垣。想不日必當旋里。不意忽忽一月。音耗杳然。里巷喧傳。詫爲異事。老母憂疑。

殊甚。然亦無法尋覓。徧問親朋。無有知者。南庵地本幽僻。幾與城市相隔絕。況儒佛異教。又若漫不相關。孝廉又以場後小病。足不出南庵門者累月。而心耽禪悅。功名事幾已付之九霄矣。時已孟冬。朔風告警。檢點行篋。薄棉不足以禦寒。乃作書致家中。取衣遣香傭往。僞爲自省中來者。家中得書。覺書中詞意恍惚。深有可疑之處。一經根究。香傭無可隱瞞。鄉愚本慧直人。遂不禁和盤託出蹤跡。而往乃得尋之歸。孝廉始知己名之已登賢書也。亟赴省料理一切。幸尙不嫌太遲。明春計偕北上。聯捷成進士。以知縣分發直隸。即用衣錦歸鄉。時而淨芳已呱呱在抱矣。孝廉本未有子。告諸高堂。喜出望外。且孝廉自與淨芳遇。一改從前挑達之性。杜門攻苦。因以成名。其先後影響未始不可爲淨芳德。爰納淨芳作小星。需次北直。携之同行。堂上春秋高。板輿並未迎養。夫人某本賢淑。願在家侍奉老姑。以婦職兼子職。姑媳甚相得。孝廉到直後十餘年間。歷任煩劇。牛刀小試。頗著政聲。宦囊雖不豐然已脫盡寒酸味矣。年來告終養歸禾中。孝廉年僅四十許。子已將近舞勺。淨芳則甫三十歲。娟好不減疇昔。見之

者猶疑其爲天仙化身。解組歸來。一家團聚。母慈子孝。妾美妻賢。修到幾生。得此清福。午橋如意曲。豈真盡屬寓言耶。

嘉興南庵小芸

小芸隸嘉興南庵。宣統紀元夏。余有事武林。道出禾中。於城南親串家見之。親串語余曰。此吾禾盛名鼎鼎之小芸師太也。工文翰。通經典。詩詞尤擅勝場。君盍坐而與之語乎。卽而視之。年約二十許。神姿淡雅。娟好異常。玉立亭亭。神仙不啻焉。小芸聆余親串語。余言若謙不自勝者。寒溫數語。已覺吐屬不凡。余問所作詩詞有存稿否。芸曰。方外之人。粗知韻語。有作輒卽焚去。不欲以雪泥鴻爪留痕迹於人間。供識者訕訾也。余又問曰。經典詞旨深奧。吾輩鈍根。不能領略其妙。究竟啐經者能深通其理否。芸曰。禪理與儒理相表裏。初無難解之處。其顯而易明者。尤莫如多心經。語。君知禪家之妙乎。六根未淨。無怪五蘊難空。欲識本來。自必先除魔障。則以心經之無眼耳鼻舌身意數語盡之。余曰。如何是無眼法。曰。皎潔坐忘中。夜月繁華夢醒。四時花如何是無耳法。曰。悉憑鳥語。

喧春樹不覺泉聲答晚鐘。何如。是無鼻法。曰。鴨鼎空教焚。永晝麝煤何事煖。春宵如何。是無舌法。曰。辨論千般。都是假旨。甘百和總非真。如何。是無身法。曰。痛癢不關。同木石寒溫一任遇。冬春如何。是無意法。曰。澄水不波。清湛湛長空無月淨。沈沈。凡人不見。可欲心如止水。一見可欲心如沸水。魔障從生。浮雲忽起。故一切人間之色相。宜以定識。定力制之。則劍斫亂絲。都不碍。冰銷熾炭。自無煙矣。余聆其言。謂其如生公說法。當是確有所得。非僅習口頭禪者比。而且舌妙蓮花。亦復才工柳絮。問諸近世比邱中。固是得未曾有。向讀葉小鸞受戒及沈綺琴皈依佛二記。錦心繡口。雲詭瀾翻。爲之合十頂禮。小芸現身說法。香口親聞。琴操參禪。想見坡公當日矣。語次。時計已指十二句。滬杭火車行且過禾。惟恐趕程不及。不得再有後言。遂作別云。

嘉興桂林庵月輪

翠袖多情紅顏薄。命彩雲易散。恨月難圓。則嘉興桂林庵月輪事有可述也。嘉興某紳之夫人。素與桂林庵住持尼某相友善。住持尼卽月輪師。師以月輪幼

慧故。歡愛倍至。夫人有子。小名善生。愛憐少子。則又婦人之常。夫人到庵。隨喜時。必與善生偕住。持尼往夫人家。亦必與月輪偕。夫人以善生寄名於尼。尼報之以月輪。因亦寄名於夫人。兩相過從。親暱之情。若戚串焉。時善生與月輪皆僅數齡耳。同居長千里。兩小無嫌猜。郎騎竹而妾折花。見者爲之生羨也。祇以格於僧俗。又不無門第之嫌。即使月下紅絲。亦不能有此權力。不然。天生嘉耦。真是一對玉人焉。嗣後善生在家讀書。夫人又督責嚴。不聽時常出外。月輪偶隨其師往夫人家。善生攻苦頻年。閉門誦讀。亦難得與一面。隔花人遠。天涯近。付諸思慕而已。光陰荏苒。年已皆十五六。善生丰容修美。有衛玠璧人之目。月輪則修容盛鬢。俊俏絕倫。會夫人病歿。住持尼偕月輪往弔。生見月輪風神綽約。不禁爲之神移。祇以苦占之中。居喪守制。禮之所在。不得與之通。一言月輪歸後。亦頗思念善生。不置。未幾。生以七事告終。假嗒經爲名。特至桂林庵。得與月輪話積懷。數年契闊。情致備極纏綿。自夫人故後。月輪於生家蹤跡。日以疏。生讀書之暇。輒一訪月輪。顧生雖年少。頗能以禮自持。雖與月輪友愛深。而終

不。及。於。亂。及。生。服。闋。親。友。有。爲。生。議。婚。者。生。雖。有。月。輪。在。然。究。以。門。第。攸。關。斷。無。娶。月。輪。理。婚。姻。不。自。由。是。亦。無。可。如。何。事。月。輪。亦。知。其。故。從。未。一。吐。其。隱。衷。而。情。之。所。鍾。則。又。無。可。自。禁。是。雖。有。千。百。女。媧。不。能。補。此。情。天。缺。陷。也。及。生。娶。而。月。輪。病。生。爲。之。譬。喻。百。端。慰。藉。萬。狀。月。輪。反。以。爲。病。不。由。此。以。之。應。付。生。有。言。輒。亂。之。以。他。詞。惟。雙。淚。盈。盈。自。嗟。薄。命。而。已。藥。石。不。足。醫。心。病。卒。以。一。病。不起。不。數。月。後。玉。碎。香。銷。矣。生。以。爲。伯。仁。由。我。死。引。爲。生。平。憾。事。以。月。輪。肖。像。縣。齋。壁。作。記。念。且。撰。敗。徵。詩。並。乞。人。祗。寫。曇。花。一。現。意。幸。勿。攔。入。褻。語。觀。於。此。生。可。謂。能。知。月。輪。也。夫。兩。人。固。所。謂。深。乎。情。而。止。乎。義。者。然。而。月。輪。良。可。憐。也。

平望雨珠庵蓮因

蓮。因。今。居。平。望。雨。珠。庵。年。纔。二。九。向。隸。禾。中。某。庵。其。師。本。出。良。家。精。通。文。翰。幼。時。深。受。教。育。中。年。守。孀。祝。髮。焚。修。蓮。因。自。幼。時。其。師。挈。而。養。之。教。以。書。史。授。以。詩。詞。以。故。長。於。吟。咏。獨。得。乃。師。衣。鉢。顧。性。好。清。潔。不。肯。與。凡。人。伍。昔。年。其。師。圓。寂。以。禾。中。妙。同。志。因。來。平。望。平。望。屬。震。澤。縣。治。鎮。東。有。巨。澤。即。所。稱。鶯。脰。湖。雨。

珠庵濱湖而居。推牕望之水天一色。浩瀚無涯。幾點風帆。夕陽送影。數聲漁笛。新月弄秋。庵中祇一老尼與一老嫗。香烟寥落。門設常關。其於蓮因本性。則適得其宜。暮鼓晨鐘。蒲團且坐。偶拈韻語。輒作小詩。積日稍久。裒然成帙。自號蓮花頭陀。有蓮花移詩一卷。余友吳次公世居鶯湖。風雅士也。今年與余同客吳中。偶或過從。嘗爲余誦蓮因所作自悼一律云。畢竟桃花薄命同。年年飄泊怨東風。鎖來寶鏡眉彎黛。拋去冰壺淚點紅。玉臂餘寒雙釧卸。瓊腰瘦盡半衾空。佛燈未燼長明火。寂寞禪關曉霧籠。又望月一律云。玉宇無塵夜色闌。銀潢洗出水晶盤。諸天色相空中現。大地山河鏡裏寬。今夕自然千里共。此生能得幾回看。琉璃世界光明藏。問說何人在廣寒。余聆其詩。覺其詞怨而不怒。極得風人之旨。而細味其意。則未免有情。誰能遣此。知蓮因真是可人。但偶託於禪悅耳。幾生修到。不知阿誰有福。可以消受。曾託次公轉丐全稿一讀。久之未之得。後知次公屢向丐取。蓮因以其饒舌。故頗以豐干相恨。靳而不之。與余與蓮因深。以未得一面爲憾。而其生平梗概。則亦次公爲余言也。

盛澤大悲庵順寶

盛澤鎮屬吳江縣治。明高士卜孟碩居此。高士名舜年。故亦曰舜湖。舜湖者。俗稱西蕩。是湖濱大悲庵。尼庵也。屋宇不甚多。顧山門佛殿。粗具規模。曲徑通幽。禪房花木。清流繞門外。浩渺無所際。西望洞庭諸山。隱約在目。蓋據一鎮之勝。概焉。光緒甲辰乙巳間。有幼尼順寶者。居是庵。時順寶纔十五六齡耳。余於是二年間。適賦閒居。余家在鎮之東。炎熇天氣。家居憚暑。輒蕩一小舟。容與西蕩中。爲作招涼計。沈瓜浮李。擬厥南皮。雪藕調冰。方諸丈入。興之所至。放舟泊庵前。招順寶來舟中。招之無不至者。劇談對飲。了不欲歸。順寶飲量雅稱。大戶一飲。累觴略無醉意。尤善以鮮花作釀。最佳者以白玫瑰珠蘭花合浸而成。醴郁作沈碧色。芳冽不可名狀。嘗以一罇勸余。飲開樽相對。香沁心脾。不暇顧婦人醇酒之譏也。順寶盛鬢修容。清潔可愛。依依小鳥。言語頗解人頤。初不過略識之。無向余問字者數月。竟爾粗通韻語。時有某武員汛地來盛。慕順寶名。挽余作紹介人。帶師船數艘。誇張聲勢。直至庵前。至復自恃能力。以一拳搥碎其山。

門之壁順寶聞而出。曼聲而言曰。槌碎山門。容易補損。將佛法最難修。某武員聞言深滋不悅。擲四餅金作賠償。費鼓櫓去。順寶喚香傭追還之。蓋其狷介有如是者。後某武員又盛飾至其庵。以巨金示住持尼。欲以順寶充下陳。順寶堅不願。致作罷論。某武員旋以狂悖。鑄其職。甚至流落無所歸。人服順寶之有先見焉。順寶本農家女。幼失怙恃。大悲老尼育諸庵。長而聰穎特甚。好潔由其天性。煙筒茗碗。不令人共。直一女倪迂也。余年來館食吳門。不至其地者數年。偶問諸人。不知順寶蹤跡矣。落花茵溷。俱不可知。放櫓湖濱。時當不勝人面桃花之感云。

盛澤白廟喜貞

白廟在舜湖之濱。疇昔故多佳麗。厥後風流雲散。相率而行。近有喜貞者。豔名噪遐邇。余於去年耳其名。第以作客他鄉。歸里日少。亦幾淡焉忘之矣。今年新正月。與一二朋輩。携小舟於湖濱。訪紅梨渡。木蘭洲。諸古蹟。順道詣白廟叩關而入。卽由應門。嫗延至大殿。坐住持尼出而應客。年可三十許。小鸞受戒風韻。

猶存蓋亦似曾相識者。照例作寒暄語而已。惟不見喜貞其人。竊恐其新年因事他出。不能達我輩此來之目的。其如聞所聞而來何。卽而詢之。則曰。小病乍起。不可以風。禪房卽在殿西。臨湖一楹。貧尼殊不妨導貴客入。但藥鑪茗碗與衾枕共狼藉。亂頭蠹服不足當青眼。一顧耳。語次。卽囑老嫗瀹茗。甌偕果盒。携西楹來。余深喜住持尼之頗解事。遂相將至喜貞房。喜貞果依依病燕。露一種可憐之態。而風姿掩映。斌媚天生。玉蕊瓊枝未足方喻。梨花一枝春帶雨。信乎名花有眞色。相脂濃粉膩。下乘禪也。吐屬之間。倍臻風雅。余友問其識字否。曰。旣會啖經禮懺。自然識字。知文。但如白香山七月時。不過略辨之無而已。又問年幾何矣。曰。纔過二八。又問來此幾何時矣。曰。不過一年。余視其纖腰束素。正欲有以相問。喜貞已覺余目光之所注。不待啟口。卽爲余語曰。上年在震澤某庵。因師父圓寂。庵中食指多效老僧。卓錫他方。特來貴地耳。余嘆喜貞之善伺人意。其聰明有不可及者。又曰。此地頗清淨。頂禮蓮花座下。齋魚粥鼓。亦並不思他行也。余笑領之。時老嫗捧茶果來供客。住持尼偕幼尼數輩來應酬。正擬

一一問詢舟人以風急日暮促解維乃償茶資二餅金偕余友作歸計喜貞力疾牽帘出且殷殷訂後會焉

盛澤淨明庵小金

小金梨里人。父母早亡。故家貧無所賴。幼育里中之西庵爲尼焉。梨里屬吳江縣治。風俗淫靡。諸尼庵多污點。會有奸拐事。里紳懇諸官縣令驅捕。亟小金由某紳家女傭引至盛澤鎮。寄住鎮北之淨明庵。淨明房舍十數椽。不甚修葺。顧地境僻靜。門前流水一泓。市聲不到庭中。雜植花木。四時不斷生香。西偏有樓數楹。小金所居頗軒敞。推牕遠望。翛然出塵。以故小金安居之初。淨明庵既在市杪。住持尼又不善供應。諸檀越幾皆裹足。自小金至。香火之盛。勝於曩昔者幾十倍。蓋小金媚容修鬢。風趣天然。言語之妙。尤能得人意也。鄉鎮俗例。凡人家新喪。必延女尼唵經禮懺。且卜夜而不卜晝。通宵達旦。事苦而酬微。住持尼以小金荏弱。故且因小金而香金夥。乃不使小金應經懺約。小金得以優游自在。齋魚粥鼓之外。時從事於針黹。一寸之縑。人爭購之。償其值者且數金。余由

太原公子先容。得有數面之緣。見其舉止嫺雅。初無一點俗塵。房中陳設清潔。補壁書畫極精。小金指一聯問余曰。此聯佳否。余視之。則爲肯爲寶釵離淨土。好從月鏡證良因。二語。蓋小金小字寶月也。余笑領之曰。佳。小金兩頰微頰。俯首無語。詢之。則曰。王某謔人太甚。重違其意。特未之棄耳。乃知卽爲太原公子所題贈者。余笑曰。凡事祇要重違其意。其庶幾也。小金解余言中之意。頗露嬌嗔之色。時正暮春。天氣。牕外垂柳二三。燕語鶯啼。大好風景。余偶誦王少伯。閨怨一絕。尙未及陌頭楊柳句。小金遽曰。誰爲少婦。其儼不於倫否。余與太原公子皆笑不止。小金誠可人哉。後余館食吳中。與小金不見者。年。去歲聞太原公子來吳中。僦屋居。偶過其齋。見小金在。吳下寓廬。蓋金屋焉。

盛澤淨明庵天錦

天錦盛澤鎮淨明庵尼也。余見時。在光緒二十三年間。天錦年已三十餘矣。顧其體態。苗條丰姿。綽約一頭。留海髮。尙未度。盡其光黥黑。而可鑑。略不諦審。幾以爲二十以內。人性好清潔。元裳縞衣。一塵不染。又復精通內典。大家閨閣。

多有喜聽其講經者。余友隴西生所居。與淨明庵僅一水隔。生中年喪偶。抑鬱無聊。賴招提紅板數武。可通積日。既久。過從遂密。生以不得於父母。甚至不容於其家。遂以禪房爲下榻所。幾欲終老柔鄉矣。究以人之多言。彼此皆關名譽。生故設一藥肆於市上。乃借懸壺名。獨遷居肆之中。生偶撻疾。天錦必日數至。泊生病篤。肆中無備人。天錦侍奉湯藥。衣不解帶者數閱月。生死。天錦啜泣生之側。焚衣疊鏹。如家人然。生父母至。義天錦之所爲。反感悔。平日之不以子爲子。遂亦並不加斥。生喪舉。而天錦歸。天錦病。天錦死。嗚呼。天錦殆有情人歟。余聞人言。天錦三十歲以前。頗以清修爲職分。長齋繡佛。了無塵心。眞所謂五大皆空。四蘊非有者。淨明故多俊尼。標梅迨吉。皆不免於懷春。天錦獨心非之。晨鐘暮鼓。靜掩禪關。蓋已心如古井矣。顧何以一遇生而不自禁。竟大反其初衷。情網所纏。至於身殉。其眞晚節之不終哉。或亦前緣之未了也。天錦之死。距生死不十日。有人作一聯以爲輓曰。塵世茫茫苦海慈航能渡否。板橋寂寂春風流水究云何。用意頗覺含蓄不盡。夫朋友之墓。宿草不哭。余雖與生交最深。而

身。偶。一。追。憶。耿。耿。不。忘。質。之。我。佛。如。來。後。果。前。因。不。知。當。作。何。說。也。
生。之。死。已。十。有。餘。年。矣。獨。不。解。天。錦。之。一。生。貞。白。忽。爲。生。破。其。戒。復。爲。生。殉。厥。

琴譜序

貴筑王 錦季湘著

貴筑王季湘女史錦。爲薛照南刺史德配。淹雅多才。尤精音律。性癖琴。重訂春草堂琴譜。審音定徽。多所正誤。余尤愛其自序駢體文一篇。徵引精詳。詞格華妙。其詞云。

粵自湘妃寫怨。蒼梧留帝子之音。蔡氏知音。淥水盡中郎之妙。攷新聲于北魏。艷說虞妃。紀韻事于西京。爭誇趙后。郵亭女子。譚楚國之明光。上景仙姝。倡漢宮之絕調。拍成雅操。癖有落霞。譜入樂章。歌新子夜。故絃調九弄。香閨大有傳人。亦琴鼓三終。正坐猶嚴女訓。然而文君心蕩。綺靡相沿。于嫂音微。箏琶莫辨。鳴鸞寡和。嘯環珮之迎風。舞鶴不來。空絲桐之伴月。洋洋盈耳。半屬淫哇。詡詡師心。殊乖古法。安絃操縵。堪羞艷李穠桃。累牘連篇。祇誚災梨禍棗。求其曲操雅正。音律詳明。則春草堂原譜一書。固後學之津梁。元音之真訣也。所惜者徽分一間。尙誤曲中。絃審五音。微差位表。吾師祝桐君先生爲當時伯牙。將取此

卷正之。乃倉皇戎馬。未操郢上之觚。况瘁征鴻。早返閩中之駕。余也撫琴動操。指訓親承。屹雅揚風。心傳願紹。因女紅之餘暇。細校徽音。合元律之精微。詳加刪訂。神來意會。每觸類而旁通。激濁揚清。務纖毫之無憾。經年綺閣。既告成功。反命絳帷。用謀鋟板。所冀三聲類聚。與古爲徒。若云千載賞音。則吾豈敢。

代少年謝狎妓書

公安袁中道小修著

萬曆丁酉冬。公安袁小修客金陵。新安一少年。游太學。狎一妓。情好甚篤。遂傾囊娶之。其人久失怙。兄主家政甚嚴正。遣書切責之。必欲遣去。否則不復相見。且理之官。少年憂懼。不能措辭裁答。因謂小修曰。事已如此。可奈何。但我兄亦知讀書。頗愛才。若得數千言一書。以感動之。吾事濟矣。才思蹇澁。求先生爲我捉刀。使此人不。去帷。當效環草之報。小修爲作一書。淋漓數千言。才氣可喜。達之于兄。月餘。晤少年欣然曰。我兄有字致云。與弟別未數年。筆下便已如此。既有讀書之志。卽攜新婦歸。余不以一眚蓋平生也。卽束裝偕歸。因置酒爲小修壽。令姬捧觴爲歌一曲。友人笑謂小修曰。相如作長門賦。得千金。今子得聞此人歌一曲。勝相如千金多矣。明晨送之江干。揮淚而別。其書曰。

信來得奉嚴教。感激慙慙。不可勝言。自先人沒後。得吾兄提携。以有今日。某雖

不才沾雨露之潤。獲教誨之益。亦既有年。雖有童心。粗知名教。若夫逐野水之鴛鴦。忘沼上之鴻雁。賦花間之曲。背霜後之筠。卽死不爲也。但一時迷昧。忽忽如夢。今事定情牽。有不能頓遣者。緣斯人十七。自離陽昌酒壚。卽永居竹橋旅廨。不意入室之柳葉。遂成結子之桃花。懷孕已經四朔。念烏衣之派不蕃。青箱之望尙杳。兄與弱弟。皆難嗣息。設得一兒。蒸嘗有託。如莫愁之產阿侯。胡婢之生遙集。亦爲幸事。且近日維揚間。有以紅粉妖姬。育青雲上客者。兄所目擊。天下事不可知。淤泥出蓮花。糞土產芝菌。此其未能頓遣者一也。斯人雖在烟花。志堅松柏。勉離舊巢。彼阿母本重惜錢樹。恨切肌骨。大罵分袂。恩斷義絕。設令再入故棧。顏面何容。磨折何堪。恐登車之日。卽畢命之時。昔嚴武與妓俱亡。追者繼至。殺之滅迹。後崇不止。我雖不殺。由我而死。恐倩女相逐。出有芳魂。小玉不仁。能爲厲鬼。此其未能頓遣者二也。斯人自入門。改去鈿蟬。卸下墮馬舞衣。歌扇。付之塵土。縞衣綦巾。晨起操作。言不出戶。苦不惜身。宛似良人。克相婦道。且夜勤刀尺。相伴膏火。相勉吾以致終宵。此其未能頓遣者三也。邸中所藏。雖

乏長物。尙有博山舊爐。雀尾遺鼎。砂象斑斕之器。牙玉輝映之章。畫則爲小李將軍。書則爲海岳外史。皆令之收藏。司其管鑰。設爲德不終。將燕鶯化爲鷗鷺。恐付之祖龍。盡成灰燼。則先代所遺。皆爲烏有。此其未能頓遣者四也。自吾兄嚴命一到。斯人卽泣曰。微豸小生。亦知護子憐兒。妾雖烟花下賤。幸已有身。設欲逐我。候分娩之日。爲君家存此一脉。然後自覓白練。永赴黃泉。弟聞之。亦自傷心矣。卽欲處之。亦須少緩。今蘭玉幾何。豈稻麻也哉。而弁髦之乎。此其未能頓遣者五也。處此五不能頓遣之勢。卽弟之宜遣而不卽遣者。亦畧有可原矣。至兄責弟以罪。罪何敢辭。生平讀古人書。見夫桃根桃葉。同登子敬之舟。阿田阿錢。共列稼軒之帳。白太傅之小蠻。樊素。蘇學士之朝雲。榴花集中。皆不自諱。誤信古人風流。沿習未能頓除。尤而效顰。此其罪一也。歲月如流。未必吾與開口而笑。甯有幾時。一席多姿。忘同安石之癖。千金喪盡。甯甘太白之貧。遂使班嗣之賜書。僅存。陸賈之遺產。漸罄。此其罪二也。古人有云。文有仗景生情。托物寄興。麗人燃燭。遠山磨墨。千古一道。弟每遇枯坐。文思不屬。微聞香澤。倚馬萬

言出鬼入神。驚天動地。兩儀發耀于行中。列星迸落于紙上。此其罪三也。江左烟月繁華。六朝金粉舊地。謝家調馬之蹊。尙餘芳草。王氏鼓楫之所。仍有文波。土風習俗。偶而相沿。此其罪四也。近日文人。槩多勝事。如某某皆少年冶游。目爲蕩子。一旦騰蛟變化。立致青雲。豈留連烟月。卽屬塵土下士乎。弟不肖。謬有此見。此其罪五也。弟又有味死一言。世間亦惟英雄豪傑。能爲格外之事。財色小失。自當赦除。天下有事。正賴命世長才。曲謹小廉。豈能成事。當北宋與契丹爲鄰。大小七十餘戰。屢致敗北。而能大破之者。乃欲娶薛居正子婦之張齊賢也。澶淵之役。宋幾不保。而能擁駕渡河。重造社稷者。乃溺愛舊桃之寇萊公也。宋旣南轅。金兵破竹而下。而能于黃天蕩上。幾制兀朮之死命者。乃娶妓女梁氏爲妻之韓蘄王也。宋時止有此三大偉人。皆能造非常之功。而亦未必無非常之過。彼恂恂謹飭如張德遠輩。終身無聲色。如王安石輩。何益于敗亡之數。弟雖不才。設國家有事。寄之一面。尙能談笑却虜。樽俎破敵。自信才略。不後古人。不能自致其身。而輕作此語。以示長者。此其罪六也。抑情忍事。本非易易。古

人云不邇聲色。今不幸邇之矣。邇之而能不溺。非聖賢不能。樊通德有言。夫淫于色。非慧男子不至也。慧則流。流則通。而淫生焉。自古英雄。不能不牽情于帷幙。蘇武于囓雪吞氈之時。而猶有胡姬之娶。瞿曇氏不云乎。一切有情。皆因情慾而正性命。卽參禪上士。亦虞習氣難除。尙借安般數息之禪。白骨流光之觀。然後暫能驅遣。假使兄富盛年。有多情女子。苦相流連。以死自誓。不出兄門。兄遽能以慧劍斬之乎。弟不能如柳下惠坐懷。頭陀一宿。而致墮落有情之痴。此其罪七也。有此七罪。弟何以見我兄哉。惟兄見其七罪。察其不能頓遣之情。而解三面之網。令弟得遂私願。同歸舊居。絕意鉛華。精心竹素。發二酉之藏。竟三餘之秘。見子雪之腸。反思王之胃。三年之後。不弋取大物爲一家光寵者。願兄擯絕之。以爲蕩子之戒。皇天厚土。實聞斯語。勿勿言辭無叙。幸惟原宥。

卷二

六

集

小脚文

曠望生

脚以小傳。昭其美也。夫脚非盡人能小也。自有纏之講究者。其小遂盛傳於人口耳。且白宵娘作俑。而纏脚之風。遂遍於古今天下矣。然傳其風者。或未必能共得其法。而大小之見出焉。於是婦女苦矣。而取法乎下者。評鷺亦從此起矣。今夫物之以小爲貴者。非婦人之脚乎哉。脚之小者。其形必尖。尖而瘦焉。斯愈形斌媚矣。脚之小者。其氣必鬱鬱而臭焉。則別饒風味矣。其爲初纏之脚。歟。一缸之淚。嗟其苦。三角與拐肖其形。側目而過之可也。其爲半攔之脚。歟。穿條焉而笑其軋傷。木礮焉而憐其受累。談笑而去之可也。或謂寧波之脚。不過一拳。然而裙底評量。恍若猪啼之擁腫。取其短而損其美。其亦何以饜閱者之心。或謂廣東之脚。不盈三寸。然而燈前玩視。儼同雞距之零丁。強而致亦勉而行。其亦何足娛游人之目。故夫脚之纏者。以小爲歸。而脚之小者。以纖爲度。是蓋俗尙之所趨焉。夫唐虞之世。不聞英皇二女。裂帛而束。雙趺蠻貊之邦。不聞閨閣羣娃。製履而成。一握迄於今。中原弱質。偏欲爭奇。競勝於跬步。而別妍媸。襪之

細也。裏以輕雲弓之纖也。彎以新月。無大家亦無小戶。寢成風會。雖迫以有司。禁令而難裁。落落寔區。殆於梳頭穿耳之餘。尤爲注意者爾。是又人工之所致焉。夫閨媛驕縱性成。或以慈母愛憐。反致蓮船之盈尺。村女。簪貧自守。或以萱親懈惰。遂令鴉轡之生塵。及夫觀繡闥。離姬莫不茹苦含辛。爭束縛以成婉麗。踵之平也。分重臺之瓣趾之銳也。若解結之錐短合度。而纖得中。穩其步趨。雖例以掌上之輕盈。而無愧娟娟此豸。其惟鍾阜邗溝之地。別有傾心者爾。

冷廬雜識節錄

桐鄉陸以湑敬安著

首飾

毛詩副笄六珈傳云。副者后夫人之首飾。編髮爲之。首飾二字始此。劉熙釋名有首飾篇。凡冠冕弁幘簪纓笄瑱之屬皆列焉。是統男婦而通名曰首飾矣。今獨以號婦人釵鈿等物。蓋猶沿詩傳之說。

漢口竹枝詞

餘姚葉茂才調元。漢口竹枝詞三百首。述人情風土。俚語居多。其賦後湖詞有云。散步人來遠市闌。一回心境得寬閒。眼光直到天窮處。夕照黃陂數點山。筆意獨俊逸可喜。

勺藥椒

勺藥香草也。而贈之于相諶之日。椒芳物也。而貽之于饯邁之時。人汨其情。物亦違其用矣。世之治也。禮教隆而婦職修。草木皆得其所。周南所以次采芣苢。

南所以次采蘩也。

湘江竹枝詞

吾邑費春帆中丞。琅由明經起家縣令。歷官至湖南巡撫。自幼卽耽吟咏。在長沙節署時。築校經堂課士。嘗以湘江竹枝詞命題。自賦十二絕。極綿邈悽惻之致。錄二首于此。斑竹涓涓淚尙零。望湘亭上吊湘靈。孤篷聽雨巴陵岸。一夜愁心滿洞庭。三十六灣蘆荻秋。飛花如雪撲郎舟。請看今夜灣灣月。雙宿鴛鴦已白頭。

虞鳳娘

明義烏虞鳳娘姊嫁徐明輝而卒。明輝聞鳳娘賢。懇其父欲聘爲繼室。女知泣謂父母曰。兄弟未嘗同妻。姊妹可知。父執不聽。女絕口不言。自經死。余謂女之死。徒以傷親之心。史傳載之。豈但以其志之潔。爲末俗所難能而書以示風歟。

露筋祠詩

王阮亭題露筋祠詩云。翠羽明璫尙儼然。湖雲祠樹碧于煙。行人繫纜月初墮。門外野風開白蓮。論者推爲此題絕唱。按米襄陽露筋祠碑云。神姓蕭名荷花。詩不即不離。天然入妙。故後來作者。皆莫之及。

卷面題詩

咸豐壬子浙江鄉試第二場。山陰某生闈中發狂病。曳白而出。卷面題二絕句云。記否花前月下時。倚闌偷賦定情詩。者番新試秋風冷。露濕羅鞋君未知。黃土叢深白骨眠。淒涼情事渺秋煙。何須更作登科記。修到鴛鴦便是仙。歎書山陰胡佃娘。某生旋卒于廩所。輕薄之報。可不畏歟。

顧亭林母

顧亭林先生之母王氏。崇禎時旌表節孝。卽明史列女傳所稱王貞女也。先生有與葉詡菴書辭薦舉云。先妣國亡絕粒。以女子而蹈首陽之烈。臨終遺命。有無仕異代之言。載于誌狀。故人人可出而炎武必不可出矣。記曰。必貽父母令名必果。將貽父母羞辱必不果。七十老翁何所求。正欠一死。若必相逼。則以身

名一
六
集
殉之矣。一死而先妣之大節愈彰于天下。使不類之子得附以成名。此亦人生難得之遭逢也。蓋其辭決而其志彌可哀矣。

白衣送子觀音殿聯

天竺白衣送子觀音殿楹聯甚多。皆庸淺不足道。惟錢塘魏春松侍御成憲所題。裁對自然。不失讀書人吐屬。句云。白衣仙人瓶中水。楊柳朱芾男子天上石麒麟。

朱綠筠女史

錢塘朱綠筠女史璘。聰慧能文。矢志不嫁。當代聞人。欲見一面不可得。家貧。售詩畫以自給。余嘗見其扇頭畫菊題詩云。無心開爾後。風雨已重陽。醒却繁華夢。甘爲冷淡妝。有心難向日。無骨不凌霜。底事踟躕蝶。猶思挹晚香。是真能孤芳自賞者。

醵錢啓

同邑沈芝岩秀才逢源。天才亮特。爲督學山陽汪文端公廷珍所賞拔。少訂姻

於張氏家貧力學。銳志進取。誓不登科不娶。年逾三十。猶未售。親戚勸其畢姻。爲似續計。而子然一身。家無擔石。乃爲釀錢以成婚焉。既屢不得志于有司。益縱于酒。每當夜深人靜。持杯獨酌。狂呼慟哭。輒驚其四隣。遂以是得病。卒年三十有六。無子。遺藁散佚。錄其釀錢啟云。伏以納幣無過五兩。判于周官。有財振人。八廚茂于漢紀。謝公移帳。助隱之爲周旋。僕射營婚。致子琮無暇日。盖合獨以時者禮也。假人以德者義也。自來逸軌。多載前聞。源束髮受經。早諳昏義。弱冠弄翰。間肄閨辭。慕鮑宣之風流。企何曾之酬酢。素門合牀。訂兩姓于朱絲。張姓連天。繫一紗於玉臂。固已姻聯白建。喜得勝流。緣合老人。卽期報板矣。然以爲情縈兒女。懼累英雄。肘繫香囊。恐妨書史。求凰有曲。不驚在御之聲。特雉無媒。未設早婚之令。以故涼宵弋雁。星剩匏瓜。春社飛鴛。風虛少女。乃者仲卿龍具。京師棄其無才。昭諫白衣。雲英笑其未脫。十年不字。負此韶華。三星在天。歌殘邂逅。歷姹紫嫣紅之候。春事已闌。開口脂面藥之頌。癡情漸悔。滿身風露。識季迪之欲婚。一闌朝飛。笑牧子爲未達。夢已徵于桑下。曲待奏夫房中。所慮縑

練繭綢。難捐嘉飾。方櫟牢燭。不少門財。在戴良有布被之將。亦希高隱。而裴航無杵臼之聘。終隔仙源。庫乏男錢。罌乾女酒。蓋幾幾乎泥中有絮。春風徒吹。洞口無桃。胡麻空熟矣。于是草元弟子。戴笠故人。將使鳬不單行。心成一袂。集千狐之腋。暖到鴛幃。分一葉之陰。春回鸞樹。烏瑤十事。不令貽笑純材。玉鏡一枚。即可相攸溫嶠。是則長源迎婦。供帳遍于北軍。賓戚欲妻。平章待平管子。阮修婚費。歛自名流。黃姑聘錢。貰從天帝。以今擬古。足可軒渠。故乃灑墨管城。命詞側理。抒予結約。告爾苔岑。類杲卿索花粉之需。異吳市競金錢之擲。行見兩行花燭。悉有耀之自他。一色祿紗。等解衣之惠我。有情誰能遣此。且慰目前介特之心。此事使卿有功。預防他日。揶揄之語。

一日不見如三月兮

一日不見。如三月兮。采葛詠之。見讒謗交構之際。猶不忘君也。讀之。可以怨。子衿詠之。見學業廢衰之時。尤亟須友也。讀之。可以群。

梳銘

明詩綜七十一卷。項真名下靜志居詩話云。予嘗見其爲閨人銘梳奩曰。人之有髮。旦旦思理。有身有心。奚不如是。筆法極其飛舞。繹其語。殆亦非眞狂生也。予按銘乃盧仝所作。見唐文粹云。人之有髮兮。旦旦思理。有身兮。有心兮。胡不如是。項蓋減易其字而書之耳。

七夕詩

餘杭陳燁卿女史爾士。錢新梧給諫之室也。習經史。工吟咏。賦七夕詩。命意最高。梧桐金井露華秋。瓜果聊因節物酬。却語中庭小兒女。人間何事可干求。

周孟侯先生宮詞

吾邑周孟侯先生拱辰。明季貢生。吾母之七世祖也。先世累著清德。母夫人夢硯生花。而生公。比長。聰穎絕人。又勵志于學。嘗坐小樓去梯三年。讀古今文五千篇有奇。由是才藻艷傳。名噪一時。吳興莊廷鉞將刊明史。以厚幣聘公。先一夕。公夢其父。畀以一合。啟視之。則赫然一人頭也。驚而寤。適莊使至。有警。于是夢峻辭却之。及明史禍發。諸名士株連被戮者多。公獨脫然無累。識者謂世德

之報。屢不得志于有司。牢騷抑塞之氣。悉寓于文辭。著有聖雨齋集。其宮詞八十首。寄興無端。尤足令才士讀之。同聲感喟。摘錄五首。以當嘗鼎一臠。露痕高漾。月痕低。六院笙歌五院迷。莫道襄王惜香夢。巫山只在畫欄西。垂楊深閉畫樓春。花送黃昏鶯送晨。三十六宮閒似水。水平明。催送虢夫人。金鈴獨踏落花泥。輦路苔痕旋欲迷。誰道舉頭剛見日。鳳樓疑在十洲西。碧簫吹破思依依。聽盡宮鶯半掩扉。最是無聊看不得。桃花片片背儂飛。翠鬢寶鬟玉膏新。一對菱花一愴神。無恨蛾眉綠如許。不如影裡李夫人。

何間婦傳

柳子厚河間婦傳。遣詞猥褻。昔人曾譏之。然其文固有爲而作。其記遊戲之所。一則曰浮圖。再則曰浮圖。可知佛廬之貽害甚烈。而婦人之喜入廟者。可以警矣。

琵琶亭

琵琶亭在九江府城外江邊。乾隆癸亥觀察潘陽唐公英重修。增建高樓。題額

曰江天遺韻。壁刊白傳遺像。是南薰殿本。嘉慶中欽人方體所摹。登樓四望。前臨大江。後對廬山。左則古木千重。右則人烟萬井。樓上迴廊旋繞。境極幽曠。遊人題詠甚多。觀察有句云。今古商船多少婦。更誰重此聽琵琶。殊寓感慨。

錫奴銅婢

溫足瓶名錫奴。蘇州薛一瓢雪鏤銅杖字曰銅婢。此可以爲對。

李易安朱淑眞

德州盧雅雨。齋使見曾作金石錄序。力辨李易安再適之誣。謂德父沒時。易安年四十六矣。又六年始爲是書作跋。是時年已五十有二。匪似之三少等。季隗之就木。以如是之年而猶嫁。嫁而猶望其才地之美和好之情。亦如德父昔日。至大失所望。而後悔之。又不肯飲恨自悼。輒譟譟然形諸簡牘。此常人所不肯爲。而謂易安之明達爲之乎。觀其泮經喪亂。猶復愛惜一二不全卷軸。如護頭目。如見故人。其惓惓德父不忘若是。安有一旦忍相背負之理。此子輿氏所謂好事者爲之。或造謗如碧雲駮之類。其又可信乎。陳雲伯大令亦云。宋人小說。

往往污穢賢者。如四朝聞見錄之于朱子。東軒筆錄之于歐陽公。比比皆是。又謂去年元夜一詞。本歐陽公作。後人誤編入斷腸集。漁陽山人亦嘗辨之。遂疑朱淑真爲佚女。皆不可不辨。按去年元夜詞。非朱淑真作信矣。李易安再適趙汝舟事。詳趙彥衛雲麓漫抄。諸家皆沿其說。盧氏獨力爲辨。雪其意。良厚。特錄之以俟論世者取裁焉。

金史猥褻

昔人謂金史叙次明淨。勝于遼元。然如后妃傳後所載海陵私其從姊妹莎里古真。餘都莎里古真。在外爲淫佚。海陵聞之大怒曰。爾愛貴官。有貴如天子者乎。爾愛人才。有才兼文武如我者乎。爾愛娛樂。有豐富偉岸過于我者乎。又海陵嘗曰。餘都貌雖不揚。而肌膚潔白可愛。此等猥褻語。亦皆采述。殊失體裁。

明公主郡主

明公主郡主。無再嫁者。卽此可見宮幃禮法之肅。視唐世迥殊矣。

昭君詩

詩人之思。日出不窮。卽如詠昭君者。唐宋以來。佳篇不少。近代更有翻新制勝者。略識所見于此。天低海水西流處。獨有琵琶堪解語。斷絲枯木本無情。猶勝人心千百許。威胡稱君王重信不重色。玉貌三千替不得。穹廬若使詔留行。金屋歡娛豈終極。一傳禍水入後宮。燕燕盡啄皇孫空。自謀則過君。謀忠畫工母。乃眞國工。沈沈一辭宮闕出秦關。長得丹青識舊顏。爲報君王休愛惜。漢家征戍幾人還。顏光漢主曾聞殺畫師。畫師何足定妍媸。宮中多少如花女。不嫁單于君不知。劉敏廷遠嫁呼韓豈素期。請行似怨不逢時。出宮始覺君恩重。臨去猶爲斬畫師。趙翼胭脂零落倍銷魂。急雪嚴霜泣暗吞。敢向琵琶傳怨語。至今青塚亦君恩。那彥戰骨填沙草不春。封侯命將漫紛紜。當時合把毛延壽。畫作麟台第一勳。許宗無金贈延壽。妾自誤平生。沈德潛

子衿非淫詩

子衿非淫詩。蕭山沈補堂豫引晉書左貴嬪離思賦。彼城闕之作詩兮。亦以日而喻月。如謂果褻狎之什。豈有椒壁之寵。而寫諸彤管者乎。證據甚確。

房暉遠

隋高祖嘗謂羣臣曰。自古天子有女樂乎。楊素以下莫知所出。遂言無女樂。房暉遠進曰。臣聞窈窕淑女。鐘鼓樂之。此卽房中之樂。著于雅頌。不得言無。高祖大悅。暉遠此言。根據經術。又能導君以正。深得獻替之義。五經庫之譽。良不虛也。

趙儀吉女史

上海趙儀吉女史。葵歸安汪參軍延澤之配也。天性高朗。有丈夫風骨。博習經史。兼工吟咏。著有瀟月軒詩集。句如殘紅盡落啼鶯老。衆綠新生好雨多。五夜懷親空有夢。十年遣日只憑詩。春晚云。纔脫春衫換夾紗。東皇何事便思家。杜鵑聲裡斜陽暮。深閉幽牕避落花。俱娟妙。

顧橫波小像

程春廬京丞。博雅嗜古。所蓄書畫甚多。余常于其侄銀灣參軍世樾處。見顧橫波小像一幅。丰姿嫣然。呼之欲出。上幅右方款二行云。崇禎己卯七夕後二日。

寫于眉生樓。玉樵生王樸左方詩二首云。腰妬楊枝髮妬雲。斷魂鶯語夜深聞。秦樓應被東風誤。未遣羅敷嫁使君。淮南龔鼎孳題識盡飄零。苦而今始得家。燈煤知妾喜。特著兩頭花。庚辰正月廿三日。燈下眉生顧媚書。

田田錢錢

女子雙名最多。獨辛稼軒妾田田錢錢。因其姓而名之。與其他雙名者異。

竹夫人

保抱携持。朕不忘五夜之寵。輾轉反側。爾尙動四方之風。宋李公甫所作竹夫人封詞也。工妙鮮匹。朱瓣香同年又仿毛穎之例。作倚玉山房夫人鮑璫瓏傳有云。夫人撰有抱青集。子夜歌云。感郎綢繆意。許儂情久長。郎意雖云熱。儂心祇自涼。肯以雨露濃。而忘抱冰雪。郎自竭郎歡。儂自盡儂節。蘭蕙有幽香。桃李多豔姿。阿儂無他好。虛心是郎師。寓意深婉。得風人旨。

麗詞

趙清獻公詩。有春牕惱春思。一枕杜鵑啼之句。司馬溫公詞。有相見爭如不見。

無情還似有情之句。范文正詞。有眉間心上無計正迴避之句。韓文公詞。有愁無際武陵凝睇人遠波空翠之句。林和靖詞。有羅帶同心結未成之句。後學每以之藉口。競作麗辭。不知惟立品如數公。乃可偶一爲之。若後生小子。沾沾焉于此求工。鮮不爲心術之累。

採芳集

平湖錢孝廉步曾。曾刻其五世祖起隆制藝一卷。名採芳集。皆摘四書中艷麗字句。游戲成文。嘻笑怒罵。無所不有。如灼一字題文云。宿瘤也以爲仙姬。姣儻也以爲嬌客。在媒或以衆見共聞。尙存廉恥。而灼乃備極其形容。優隸也以爲俊秀。貧窶也以爲豪華。在媒早以微言溫語。任意相欺。而灼乃更從而點綴。又云。本以婦人輕信之耳。灼復鼓彼如簧。遂使母氏專權。父雖欲禁之而不得。本以深閨獨處之嬌。灼竟誘諸覲面。遂使高堂未許。女先遙慕之。而如迷。灼之巧者。意僅切于肥囊。灼之拙者。幻亦生于閱歷。倘以彼列諸冠蓋。即是蘇張游說之儔。灼之老者。口舌既堪惑女。灼之少者。容貌并可悅男。故以彼略試逢迎。遂

韻蘭序并引

錢唐梁紹王應來著


韻蘭者。京師春臺部中名旦也。色藝冠絕一時。顧性傲睨。少所青眼。孝廉某君。極眷戀之。形予色授。頗見妬于同儕。而月下盟言。誓同枯苑。蓋不僅被中之鄂。花底之秦焉。年十九。以療卒。某君哭之慟。賦惜蘭詞二十章。徵同人哀詠。而屬余爲之序云。


桃開千歲。人間爲短命之花。曇現刹那。天上乃長生之樹。從來朝露。本苦無多。況屬彩雲。尤其易散。然而水蓮泡幻。達觀久付虛空。泥絮沾濡。情種能無抑鬱也乎。如春臺部蘭郎者。泥巢乳燕。花苑靈狸。家住玉鈎斜。騎鶴下翩翩之影。善歌金縷曲。轉鶯聞嚶嚶之聲。芳名則雅愛蘭香。絕調已盛傳楊叛。固已蜚聲樂籍。馳譽燕台矣。爰有浙西名士。久噪雕龍。日下寓公。新來鳴鶴。偶顧綠么之曲。頓生紅豆之思。于是衆裡目成。暗中心許。赭白馬城頭蹀躞。公子相逢。金錯刀袖底鏗鏘。美人贈我。每見潘車擲果。携手相將。保母鄂被薰香。銷魂眞箇。妒之

者以爲失身之鳳。愛之者以爲比翼之鸞。而乃長樂難期。短緣已促。杏林深處。難探及第之花。芍藥開時。原是將離之草。于是數聲杜宇。一闌陽關。方期玉玦之分。以翼金環之合。孰意楊花命薄。桐樹生孤。蓮菡儺心。菖蒲郎面。此也秋雨。臥相如之病。彼也秋風。作王粲之遊。既而長劍歸時。大刀唱後。不惜黃金似土。來作纏頭。豈知紫玉成煙。已傷委骨。用是愴懷珠璧。墮淚瓊瑰。猶思人約黃昏。去年元夜。依舊門臨碧水。今日桃花。早已平量恨海之波。待涸愛河之水矣。然而空誰非色。短豈殊修。使問天果屬有情。得知己死可不恨。向使郎果金臺終老。落拓梨園。玉籍長留。沉浮菊部。將春殘楊柳。飄零京兆之眉。秋後蓮花。憔悴昌宗之面。未必鬢鬢潘老。能消黯黯江魂。則與爲彌子瑕之色衰。母甯作衛叔寶之看殺。而况櫻桃一曲。芳名總在人間。霓羽千秋。舊譜已歸天上。以視桃笙秋老。斷袖先涼。蕭瑟風悲。買絲誰綉者。一則名花似草。一則弱絮留萍。如彼如斯。孰得孰失。乃我友憐香情重。破壁情傷。纏綿則玉藕牽絲。惆悵而金荃賦什。顧或者謂終宵角枕。空生秋士之悲。一集香奩。終傷冬郎之德。既蜂腰之中斷。

何雀腦之思。深豈知釵挂臣冠。宋玉原非好色。酒黏郎袖。歐公亦自多情。而況
書劍飄零。檀槽知遇。豈有生前倚玉。曾留春帳之情。歿後沉珠。不弔秋墳之魄
者乎。由是敷陳麗藻。抒寫哀思。乞我弁言。題之卷首。化筆墨烟雲。而如畫。請看
北苑春山。悟迷離撲朔之非真。試讀南華秋水。


香艷叢書六集卷二終





香艷叢書

第六集




香艷叢書

六集卷三

迷樓記

唐



煬帝晚年。尤沉迷女色。他日顧詔近侍曰。人主享天下之富。亦欲極當年之樂。自快其意。今天下安富。外內無事。此吾得以遂其樂也。今宮殿雖壯麗顯敞。苦無曲房小室。幽軒短檻。若得此。則吾期老于其中也。近侍高昌奏曰。臣有友項昇。浙人也。自言能構宮室。翌日詔而問之。昇曰。臣乞先進圖本。後數日進圖。帝覽大悅。即日詔有司供具材木。凡役夫數萬。經歲而成。樓閣高下。軒窗掩映。幽房曲室。玉欄朱楯。互相連屬。回環四合。曲屋自通。千門萬牖。上下金碧。金虬伏於棟下。玉獸蹲于戶傍。璧砌生光。瑣窗射日。工巧之極。自古無有也。費用金玉帑庫爲之一虛。人誤入者。雖終日不能出。帝幸之大喜。顧左右曰。使真仙遊其中。亦當自迷也。可目之曰迷樓。詔以五品官賜昇。仍給內庫帛千疋賞之。詔選後宮良家女數千。以居樓中。每一幸。有經月而不出。是月大夫何稠進御童女

車。車之制度絕小。祇容一人。有機處于其中。以機礙女之手足。女纖毫不能動。帝以處女試之。極喜。召何稠謂之曰。卿之巧思。一何神妙如此。以千金贈之。旌其巧也。何稠出。爲人言車之機巧。有識者曰。此非盛滿之器也。稠又進轉關車。車周挽之。可以昇樓閣。如行平地。車中御女。則自搖動。帝尤喜悅。帝謂稠曰。此車何名也。稠曰。臣任意造成。未有名也。願賜佳名。帝曰。卿任其巧意。以成車。朕得之任其意。以自樂。可名任意車也。何稠再拜而去。帝令畫工繪士女會合之圖數十幅。懸于閣中。其年上官時。自江外得替回鑄烏銅屏數十面。其高五尺。而闊三尺。磨以成鑑。爲屏。可環於寢所。詣闕投進。帝以屏內迷樓。而御女於其中。纖毫皆入於鑑中。帝大喜曰。繪畫得其象耳。此得人之眞容也。勝繪圖萬倍矣。又以千金賜上官時。帝日夕沉荒於迷樓。罄竭其力。亦多倦怠。顧謂近侍曰。朕憶初登極日。多辛苦無睡。得婦人枕而藉之。方能合目。纔似夢。則又覺。今睡則冥冥不知返。近女色則憊何也。他日矮民王義上奏曰。臣田野廢民。作事皆不勝人。生於遼曠絕遠之域。幸因入貢。得備後庭掃除之役。陛下特加愛遇。臣

當自宮以侍陛下。自茲出入臥內。周旋宮室。方今親信。無如臣者。臣由是竊覽書殿中簡編。反覆玩味。微有所得。臣聞精氣爲人之聰明。陛下當龍潛日。先帝勤儉。陛下鮮親聲色。日近善人。陛下精實於內。神清於外。故日夕無寢。陛下自數年聲色無數。盈滿後宮。日夕游宴。自非歲節大辰。何常臨御前殿。其餘多不受朝。設或引見遠人。非時慶賀。亦日晏坐朝。曾未移刻。則聖躬起入後宮。夫以有限之體。而投無盡之慾。臣固知其竭也。臣聞古者野叟。獨歌舞於磐石之上。人詢之曰。子何獨樂之多也。叟曰。吾有三樂。子知之乎。何也。人生難遇太平世。吾今不見兵革。此一樂也。人生難得支體完備。吾身不殘疾。此二樂也。人生難得壽。吾今年八十矣。此三樂也。問者歎賞而去。陛下享天下之富貴。聖貌軒逸。龍顏鳳姿。而不自愛重。其思慮固出於野叟之外。臣叢爾微軀。難圖報効。罔知忌諱。上逆天顏。因俯伏泣下。帝乃命引起。翌日召義詔之曰。朕昨夜思汝言極有深理。汝眞愛我者也。乃命義後宮擇一靜室。而帝居其中。女皆不得入。居二日。帝忿然而出曰。能悒悒居此乎。若此。雖壽千萬歲。亦安用也。乃復入宮。宮女

無數。不得進御者。亦極衆。後宮侯夫人有美色。一日自經於棟下。臂懸錦囊中。有文。左右取以進帝。乃詩也。自感三首云。庭絕玉輦迹。芳草漸成窠。隱隱聞簫鼓。君恩何處多。欲泣不成淚。悲來翻強歌。庭花方爛熳。無計奈春何。春陰正無際。獨步意何如。不及閒花草。翻承雨露多。看梅二首云。砌雪無消日。捲簾時自顰。庭梅對我有憐意。先露枝頭一點春。香清寒艷好。誰惜是天真。王梅謝後陽和至。散與羣芳自在春。粧成云。粧成多自惜。夢好却成悲。不及楊花意。春來到處飛。遣意云。秘洞扃仙卉。雕窗鎖玉人。毛君真可戮。不肯寫昭君。自傷云。初入承明日。深深報未央。長門七八載。無復見君王。春寒浸入骨。獨臥愁空房。颯履步庭下。幽懷空感傷。平日新愛惜。自待聊非常。色美反成棄。命薄何可量。君恩實疎遠。妾意徒徬徨。家豈無骨肉。偏親老北堂。此方無羽翼。何計出高牆。性命誠所重。棄割良可傷。懸帛朱棟上。肝腸如沸湯。引頸又自惜。有若絲牽腸。毅然就死地。從此歸冥鄉。帝閱其詩。反覆傷感。帝往視其尸曰。此已死。顏色猶美如桃花。乃急召中使許廷輔曰。朕向遣汝擇後宮女入迷樓。汝何獨故棄此人也。

乃令廷輔就獄。賜自盡。厚禮葬侯夫人。帝日誦詩。酷好其文。乃令樂府歌之。帝又於後宮親擇女百人入迷樓。大業八年。方士進大丹。帝服之。蕩思愈不可制。日夕御女數十人。入夏。帝煩躁。日引飲幾百杯。而渴不止。醫丞莫君錫上奏曰。帝心脉煩盛。眞元太虛。多飲卽大疾生焉。因進劑治之。仍乞置冰盤於前。俾帝日夕朝望之。亦治煩燥之一術也。自茲諸院美人各市冰爲盤。以望行幸。京師冰爲之踴貴。藏冰之家。皆獲千金。大業九年。帝將行幸江都。有迷樓宮人抗聲夜歌云。河南楊柳謝。河北李花榮。楊花飛去落何處。李花結果自然成。帝聞其歌。披衣起聽。召宮女問之云。孰使汝歌也。汝自爲之邪。宮女曰。臣有弟在民間。因得此歌。曰。道途兒童多唱此歌。帝默然久之。曰。天啓之也。天啓之也。帝因索酒自歌云。宮木陰濃燕子飛。興衰自古漫成悲。他日迷樓更好景。宮中吐豔戀紅輝。歌竟。不勝其悲。近侍奏無故而悲。又歌。臣皆不曉。帝曰。休問。他日自知也。後帝幸江都。唐帝提兵起義。入京見迷樓。太宗曰。此萬民膏血所爲。乃命焚之。數月火不滅。前謠前詩皆驗矣。方知世代興亡。非無自也。

劉無雙傳

唐 薛調

唐王仙客者。建中中朝臣劉震之甥也。初仙客父亡。與母同歸外氏。震有女曰無雙。小仙客數歲。皆幼稚。戲弄相狎。震之妻常戲呼仙客爲王郎子。如是者凡數歲。而震奉孀姊及撫仙客尤至。一日王氏姊疾且重。召震約曰。我一子之念可知也。恨不見婚宦。無雙端麗慧聰。我深念之。異日無令歸他族。我以仙客爲託。爾誠許我。瞑目無所恨也。震曰。姊宜安靜自頤養。無以他事自撓。其姊竟不痊。仙客扶柩歸葬襄鄧。服闋。思念身世孤子如此。宜求婚娶以續後嗣。無雙長成矣。我舅氏豈以位尊官顯而廢前約耶。於是飾裝抵京師。時震爲尙書租庸使。門館赫弈。冠蓋填塞。仙客旣覲。致於學舍弟子爲伍。舅甥之分依然如故。但寂然不聞選取之議。又於窗隙間窺見無雙。姿質明豔。若神仙中人。仙客發狂。唯恐姻親之事不諧矣。遂鬻囊橐得錢數百萬。舅氏舅母左右給使達於廝養。皆厚遺之。又因復設酒饌。中門之內皆得入之矣。諸表同處。悉敬事之。遇舅母

生日。市新奇以獻。雕鏤屬玉以爲首飾。舅母大喜。又旬日。仙客遣老嫗以求親之事。聞於舅母。舅母曰。是我所願也。卽當議其事。又數夕。有青衣告仙客曰。娘子適以親情事言於阿郎。阿郎云。向前亦未許之。模樣云云。恐是參差也。仙客聞之心氣俱喪。遲旦不寐。恐舅氏之見棄也。然奉事不敢懈怠。一日震趨朝。至日初出。忽然走馬入宅。汗流氣促。唯言鏤却大門。鏤却大門。一家惶駭。不測其由。良久。乃言涇原兵士反。姚令言領兵入含元殿。天子出。北門。百官奔赴行在。我以妻女爲念。畧歸部署。疾召仙客與我勾當家事。我嫁與爾無雙。仙客聞命。驚喜拜謝。乃裝金銀羅錦二十駄。謂仙客曰。汝易衣服押領此物出開遠門。覓一深隱店安下。我以汝舅母及無雙出啓夏門。遠城續至。仙客依所教。至日落城外店中。待久不至。城門自午後扁鏤。南望目斷。遂乘驄秉燭遠城。至啓夏門。門亦鏤。守門者不一。持白棓或坐或立。仙客下馬徐問曰。城中有何事如此。又問。今日有何人出此門者。曰。朱太尉已作天子。午後有一人重戴領婦人四五輩。欲出此門。街中人皆識云。是租庸使劉尙書。門司不敢放出。近夜追騎至。

一時驅向北去也。仙客失聲慟哭。却歸店。三更向盡。城門忽開。見火炬如晝。兵士皆持兵挺刃。傳呼斬斫。使出城。搜城外朝官。仙客捨輜騎。驚走歸襄陽。村居三年。後知尅復。京闕重經。海內無事。乃入京訪舅氏消息。至新昌南街。立馬彷徨之際。忽有一人馬前拜。熟視之。乃舊使蒼頭塞鴻也。鴻本王家生。其舅常使得力。遂留之。握手垂涕。仙客謂鴻曰。阿舅阿母安否。鴻云。並在興化宅。仙客喜極云。我便過街去。鴻云。某已得從良客戶。有一小宅子。販繪爲業。今日已夜。郎君且就客戶一宿。來早同去。未晚。遂引至所居。飲饌甚備。至昏黑。乃聞報曰。尙書授僞命官。與夫人皆處極刑。無雙已入掖庭矣。仙客哀冤號絕。感動鄰里。謂鴻曰。四海至廣。舉目無親戚。未知託身之所。又問曰。舊家人誰在。鴻曰。唯無雙所使婢採蘋者。今在金吾將軍王遂中宅。仙客曰。無雙固無見期。得見採蘋。死亦足矣。由是乃刺謁以從姪禮。見遂中。具道本末。願納厚價以贖採蘋。遂中深見相知。感其事而許之。仙客稅屋與鴻蘋居。塞鴻每言郎君年漸長。合求官職。悒悒不樂。何以遣時。仙客感其言。以情懇告。遂中遂中薦見仙客於京兆尹李

齊運。齊運以仙客前銜爲富平縣尹。知長樂驛。累月。忽報有使押領內家三十人往園陵以備洒掃。宿長樂驛。氈車子十乘下訖。仙客謂塞鴻曰。我聞宮嬪選在掖庭。多是衣冠子女。我恐無雙在焉。汝爲我一窺可乎。鴻曰。宮嬪數千。豈使及無雙。仙客曰。汝但去。人事亦未可定。因令塞鴻假爲驛吏。烹茗於簾外。仍給錢三千。約曰。堅守茗具。無暫捨去。忽有所覩。卽疾報來。塞鴻唯唯而去。宮人悉在簾下。不可得見之。但夜語諠譁而已。至夜深。羣動皆息。塞鴻滌器。篝火不敢輒寐。忽聞簾下語曰。塞鴻塞鴻。汝爭得知我在此也。郎健否。言訖。嗚咽。塞鴻曰。郎君見知此驛。今日疑娘子在此。令塞鴻問候。又曰。我不久語。明日我去。後汝於東北舍閣子中紫褥下取書送郎君。言訖。遽去。忽聞簾下極開。云。內家中惡。中使索湯藥甚急。似無雙也。塞鴻疾告仙客。仙客驚曰。我何得一見塞鴻。曰。今方修渭橋。郎君可假作理橋官。車子過橋時。近車子立。無雙若認得。必開簾子。當得瞥見耳。仙客如其言。至第三車子。果開簾子。窺見。真無雙也。仙客悲感。怨慕。不勝其情。塞鴻於閣子中褥下得書。送仙客。花牋五幅。皆無雙真跡。詞理哀

切。敘述周盡。仙客覽之。茹恨涕下。自此永訣矣。其書後云。常見敕使。說富平縣古押衙。人間有心人。今能求之否。仙客遂申府請解驛務。歸本官。遂尋訪古押衙。閑居於村墅。仙客造訪見古生。生所願必力致之。繪綵寶玉之贈。不可勝紀。一年未開口。秩滿。閒居於縣。古生忽來。謂仙客曰。洪一武夫。年且老。何所用。耶。君於某竭分。察郎君之意。將有求於老夫。老夫乃一片有心人也。感郎君之深恩。願粉身以荅效。仙客泣拜以實告古生。古生仰天以手拍胸。數四曰。此事大不易。然與郎君試求。不可朝夕便望。仙客拜曰。但生前得見。豈敢以遲晚爲恨。耶。半歲無消息。一日扣門。乃古生送書。書云。茅山使者回。且來此。仙客奔馬去。見古生。古生乃無一言。又敗使者之爲何人也。生云。且吃茶。夜深謂仙客曰。宅中有女家人。識無雙否。仙客以探蘋對。仙客立取而至。古生端相且笑。且喜云。借留三五日。郎君且歸。後累日。忽傳說曰。有高品過處。置園陵宮人。仙客心甚異之。令塞鴻探所殺者。乃無雙也。仙客號哭。乃歎曰。本望古生。今死矣。爲之奈何。流涕歔歔。不能自已。是夕更深。聞扣門甚急。及開門。乃古生也。領一簋子入。

謂仙客曰。此無雙也。今死矣。心頭微暖。後日當活。微灌湯藥。切須靜密。言訖。仙客抱入閣子中。獨守之。至明。遍體有煖氣。見仙客哭一聲。遂絕。救療至夜。方愈。古生又曰。暫借塞鴻。於生後掘一坑。坑稍深。抽刀斷塞鴻頭於坑中。仙客驚怕。古生曰。郎君莫怕。今日報郎君恩足矣。比聞茅山道士有藥術。其藥服之者立死。三日却活。某使人專求得一丸。昨令採蘋假作中使。以無雙逆黨賜此藥。令自盡。至陵下。託以親故。百緡贖其屍。凡道路郵傳。皆厚賂矣。必免漏泄。茅山使者及舁殯人在野外處置訖。老夫爲郎亦自刎。郎君不得更居此。門外有檐子一十人。馬五匹。絹三百疋。五更挈無雙便發。變姓名浪跡以避禍。言訖。舉刃。仙客救之。頭已落矣。遂并屍蓋覆訖。未明發。歷西蜀。下峽。寓居于渚宮。悄不聞京兆之耗。乃挈家歸襄鄧別業。與無雙偕老矣。男女成羣。贊曰。人生之契闊會合多矣。若罕有斯之比。嘗謂古今所無。無雙遭亂世籍沒。而仙客之志。死而不奪。卒遇古生之奇法取之。冤死至十餘人。艱難走竄。其後歸故鄉爲夫婦五十年。何其異哉。

步非烟傳

唐皇甫枚撰

臨淮武公業。咸通中。任河南府功曹參軍。愛妾曰非烟。姓步氏。容止纖麗。若不任綺羅。善奏聲。好文墨。尤工擊甌。其韻與絲竹合。公業甚嬖之。其比鄰天水趙氏子。曰象。纔弱冠。端秀有文。于南垣隙中。窺見非烟。神氣俱喪。廢食息焉。乃厚賂公業之閹。以情告之。閹有難色。復爲厚利所動。乃令其妻伺非烟閒處。婉述象意。非烟聞之。但含笑凝睇而不答。門媼盡以語象。象發狂心。蕩不知所如。乃取薛濤箋。題絕句曰。一觀傾城貌。塵心只自猜。不隨蕭史去。擬學阿蘭來。以所題密緘之。祈門媼達。非烟。烟讀畢。吁嗟良久。謂媼曰。我亦曾窺見趙郎。大好才貌。此身福薄。不得當耳。蓋鄙武生麤悍。非良配也。乃復疇篇。寫于金鳳箋。曰。綠慘雙蛾不自持。只緣幽恨在新詩。郎心應似琴心怨。脉脉春情更泥誰。封付門媼。令遺象。象啓緘。吟諷數四。拊掌喜曰。吾事諧矣。又以剡溪玉葉紙賦詩以謝。曰。珍重佳人贈好音。綵箋方翰兩情深。薄于蟬翼難供恨。密似蠅頭未寫心。疑

見落花迷碧洞。只思輕雨洒幽襟。百迴消息千迴夢。裁作長謠寄綠琴。詩去旬日。門媼不復來。象憂懣。恐事泄。或非烟追悔。春夕于前庭獨坐。賦詩曰。綠暗紅藏起暝烟。獨將幽恨小庭前。重重良夜與誰語。星隔銀河月半天。明日晨起吟際。而門媼來傳非烟語曰。勿訝旬日無信。蓋以微有不安。因授象以連蟬錦香囊。彩箋小簡。詩曰。無力嚴粧倚繡籠。暗題蟬錦思難窮。近來贏得傷春病。柳弱花欹怯曉風。象結錦囊于懷。細讀小簡。又恐烟幽思增疾。乃剪烏絲簡爲回紮。曰。春日遲遲。人心悄悄。自因窺覲。長役夢魂。雖羽駕塵輕。難于會合。而丹誠皎日。誓以周旋。况又聞乘春多感。芳履違和。耗冰雪之研姿。鬱蕙蘭之佳氣。憂抑之極。悵不翻飛。企望寬情。無至憔悴。莫孤短韻。寧爽後期。恂悅寸心。書豈能盡兼持菲什。仰繼華篇。詩曰。見說傷情爲見春。想封蟬錦綠蛾頻。叩頭與報烟卿道。第一風流最損人。門媼既得回報。徑齎詣烟。武公業時爲府掾。屬公務繁夥。或數夜一直。或竟日不歸。是時適值武入府曹。烟折書得以欵曲尋繹。既而長太息曰。丈夫之志。女子之心。情契魂交。視遠如近也。于是闔戶垂幌。爲書曰。下

妾不幸。垂髫而孤。中間爲媒妁所欺。遂匹合于非類。每至清風朗月。移玉桂以增懷。秋帳冬缸。泛金徽而寄恨。豈期公子。忽貽好音。發華緘而思飛。諷麗句而目斷。所恨洛川波隔。賈午牆高。聯雲不及于秦臺。薦夢尙遙于楚岫。猶望天從素懇。神假微機。一拜清光。九殞無恨。兼題短什。用寄幽懷。詩曰。畫簷春燕須同宿。蘭浦雙鴛肯獨飛。長恨桃源諸女伴。等閑花裏送郎歸。封訖。召門媼令達于象。象覽書及詩。以烟意稍切。喜不自持。但靜堂焚香。虔禱以俟。忽一日。將夕。門媼步而至。笑且拜曰。趙郎願見神仙否。趙驚連問之。傳烟語曰。今夜功曹府直。可謂良時。妾家後庭。郎君之前垣也。不渝惠好。專望來儀。方寸萬種。悉俟晤語。旣嘿黑。象乃躋梯而登。烟已令重榻而下。旣下。見烟靚粧盛服。立于花下。拜訖。俱以喜極不能言。乃相携自後門入房中。背缸解衿。盡繾綣之意焉。及曉。鐘初動。復送象于垣下。烟執象手泣曰。今日相遇。乃前生姻緣耳。勿謂妾無玉潔松貞之志。放蕩如斯。直以郎之風調。不能自持。願深鑒之。象曰。挹希世之貌。見出人之心。已誓幽衷。承奉歡狎。言訖。象踰垣而歸。明日。托門媼贈烟詩曰。十洞三

清雖路阻。有心還得傍瑤臺。瑞香風引思深夜。知是蕊宮仙馭來。烟覽詩微笑。復贈象詩曰。相思只怕不相識。相見還愁却別君。願得化爲松上鶴。一雙飛去入雲行。封付門媼。仍令語象曰。賴妾有小小篇詠。不然君作幾許大千面目。茲不盈旬。常得一期于後庭矣。展微密之思。罄宿昔之心。以爲魚鳥不知。神人相助。或景物寓目。歌詩寄情。來往更繁。不能悉載。如是者周歲。無何烟數以細過。撻其女奴。奴陰銜之。乘間盡以告公業。公業曰。汝慎言。我當伺察之。後至直日。乃僞陳狀請假。迨如常人。身遂潛于里門。街鼓既作。匍伏而歸。循牆至後庭。見烟方倚戶微吟。象則據垣斜睇。公業不勝其憤。挺前欲擒。象覺跳去。搏之得其半襦。乃入室呼烟詰之。烟色動聲戰。而不以實告。公業愈怒。縛之大柱。鞭楚流血。但云生得相親。死亦何恨。深夜。公業怠而假寐。烟呼其所愛女僕曰。與我一杯水。水至飲盡而絕。公業起將復笞之。已死矣。乃解縛。舉至閣中。連呼之。聲言烟暴疾至殞。後數日葬于北邙。而里巷間皆知其強死矣。象因變服易名。遠竄江浙間。洛陽才士有崔李二生。常與武擡遊。處崔賦詩末句云。恰似傳花人飲。

散。空拋牀下最繁枝。其夕夢烟謝曰。妾貌雖不逮桃李。而零落過之。捧君佳什。愧仰無已。李生詩末句云。豔魄香魂如有在。還應羞見墜樓人。其夕夢烟戟手而言曰。士有百行。君得全乎。何至自矜片言。苦相詆斥。當屈君于地下。面證之。數日。李生卒。時人異焉。

附錄江南詹詹外史跋語

非烟自傷非偶。踰節被殺。傳者傷之。雖然公業粗悍矣。未甚也。有杜大中者。自行伍爲相。與物無情。西人呼爲杜大虫。雖妻有過。以公杖杖之。有愛妾才色俱絕。大中箋表。皆出其手。嘗作臨江仙詞。有彩鳳隨鴟之句。一日大中見之。怒曰。鴟且打鳳。掌其面。折頤而斃。以一語之忤。遂至殺身。較之非烟。不十倍冤乎。雖然猶有忤也。齊文宣寵幸薛嬪。忽疑其與清河王岳通。無故斬首。藏之于懷。出東山宴。勸酬始合。忽探出頭。投于杵上。支解其屍。斷其髀爲琵琶一座。莫不喪膽。爲之寵者。不亦難乎。雖然猶有疑也。晉石崇每使美人勸飲。不能勸。則殺之。丞相導量不宏。每每過醉。大將軍敦獨不肯飲。已殺二人。

矣。導勸使速盡。敦曰。彼自殺人。于我何與。王愷嘗置酒。女妓吹笛。小失聲韻。便令黃門敲殺之。一座改容。爾朱文畧豪縱不遜。平秦王有七百里馬。文畧敵以好婢賭取之。明日平秦王致請文畧殺馬及婢。以二銀器盛婢頭馬肉遺之。夫小村市民求一妻女。千難萬難。幸不致無鹽嫫母。鄉黨爭慶。以爲五百年修德所致。而此數人者。視朱顏綠髮。曾苦營之不若。其真無人心者哉。

譚節婦祠堂記

明慈溪烏斯道繼善著

譚婦死節。久未有祠。四明烏斯道蒞政永新之二年。爲洪武十年丁巳五月十有一日。乃擇泮宮興文閣西南辟大池上。建祠設主以補缺典。蓋以婦死而聖人是依。今祠而依乎聖人。庶以妥其靈焉。婦姓趙氏。名逸。不聞古廬陵之永新。人生有淑質。嫁同里譚氏子。年廿有七。至元十三年丙子。江南內附。越一歲丁丑。宋丞相文天祥志恢復。有書約女弟之婿彭震龍起兵。以是歲七月十有九日。兵內外合發。震龍亦永新人。盟同邑張履翁顏司理。先一月起。與降將江西運使鑑槃併槃之裨將蕭明合戰永新。而丞相之兵不至。遂敗。北軍突入城。城中大亂。民咸負携逃遁。婦抱所乳子與舅姑倉卒走縣庠。聖人殿庭。軍羣逐至。殺死人。且犯人妻女。不畏忌。軍欲犯節婦。婦罵曰。吾舅姑死于汝。吾保身以生。且不可。况辱身以覲生乎。固不屈。軍怒。因併乳子殺死殿庭中。時有屠者避殿庭楣梁上。下視婦死事爲詳。遂傳聞至今。逾百有餘歲。而婦與子之形在殿

庭土磚上。鉅細畢具。後有守土者弗信。以沙石盪磨。或煨以烈火。試之形影愈見。於乎。當宋季時。朝廷培植人物。皆以科第進。崇爵厚祿。至白首者。孰不以忠烈事。講之稔而責之深哉。及乎版圖失守。神器徙焉。而向之崇爵厚祿者。乞降走匿不暇。其肯死節者。曾幾何人哉。茲以一婦人。能慷慨死節。與同郡文文山。光燄相照。垂名史冊。豈不重其慕耶。且其生時。精氣素已貫諸金石。不可磨滅。況死于聖人殿庭。聖人之靈尤表而出之者哉。若是祠而歲時祀之宜也。用祠于郡府。轉聞于上。冀褒異錫號。使風俗益以有勵焉。祠成越十日。從仕郎知吉安府永新縣事四明烏斯道撰并書篆蓋。復弔以詩曰。

城破兵連遠近村。皇皇趨入泮宮門。且從烈士捐生義。不學降臣負主恩。氣逐彩雲隨劍化。形摹青血與磚存。我來感悼前朝事。爲立穹碑慰古魂。

月夜彈琴記 附譚節婦對詠三十首

四明烏斯道博洽君子也。洪武初除吉安永新知縣。到任三日。祇謁先聖。顧見殿楹礎邊。有一女形悲泣之狀。怪而問之。儒生賀仲善進曰。此宋譚節婦趙氏影也。元下江南。此地既歸附。文丞相起兵勤王。復之未幾。鎬鑿引元兵陷城。城中死者大半。譚氏一家亦倉卒避難學宮。節婦匿大成殿。亂兵追及。見其年少色美。欲犯之。婦大罵曰。吾貴宗女。名家婦。豈汝犬彘耦哉。且吾舅死于汝。吾姑又死于汝。恨不磔汝肉喂烏鳶。吾有死而已。豈耦汝犬彘哉。兵怒。并其懷抱中二歲兒殺之。血沁入磚之上。自宋元至今。久已淹沒。迨烏公謁聖之夕。援琴而鼓者久之。公忽訝指下之音不律。遂鏗爾寂坐。謂宮商錯亂。必有邪祟。盜聽吾琴者。語甫畢。節婦正色歛衽登堂而揖。備訴以致死顛末。公達旦輒舉磚磨以沙石。煨以烈火。愈見明瑩。邑人義之。而未有祠之者。烏公乃歎曰。此吾爲令者之責也。乃捐俸構其堂於泮池之上。刻其影於碑石之陰。仍作文刊諸廡下。讀者爲之毛髮森竦。涕泗交頤。而節婦之名愈彰矣。公之子熙光。字緝之。尤尙風

槩。且精於琴。見節婦車。喑喑嘆慕。作貞松操。寫之絲桐。一夕天空月明。夜涼人靜。獨坐軒中。拂琴拭徽。調絃轉軫。忽見美姬自外入。緝之問曰。何物女子。輒此來耶。姬歛衽拜曰。妾姓鍾。名碧桃。宋譚節婦侍兒也。主母貞節。上帝嘉之。已位高仙。見蒞南嶽。太上以其影留下界。恐人褻慢。將命六丁取之。未免隨以風雷驚駭先聖。莫若留在人間。永爲激勸。令本學地靈常加守護。若其親近。宜用舊人。以妾幸無罪戾。夙奉教言。授以薄職。俾見衛焉。但視事以來。依栖無所。欲乞於主母坐側。別設一位。題曰故侍兒鍾氏之主。則身無所苦。獲燕雀之帡幪。鬼有所歸。免魚龍之混雜。如蒙矜憫。卽賜施行。緝之許焉。因問曰。節婦仙居南嶽。亦頗至祠中否。姬曰。不來也。自尊公大君子。構祠之後。覽一下降。是夜萬籟無聲。月色如晝。主母臨眺舊鄉。人非物是。不勝令威華表之感。因援琴鼓悲風一曲。妾聽淒然。雙淚雨落。主母顧謂曰。汝尙淹滯鬼籙。無以相慰。可取紙筆來。妾如言以進。卽濡毫集古句。七言近體詩二十首。以賜擲筆凌空。以去。緝之曰。詩何在。姬曰。妾寶之若珙璧。元本不可縱觀。且仙書雲篆。公亦不能識。但可誦耳。

宜卽錄焉。詩曰。

其一

花壓闌干春晝長。溫飛卿

雲飛雨散知何處。溫飛卿

已托焦桐傳密意。胡宿

江南舊事休重省。李玉

其二

魂歸冥漠魄歸泉。朱褒

自是桃花貪結子。王建

風流愧落他人後。李太白

何事黃昏尙凝睇。崔珣

其三

寒蛩唧唧樹蒼蒼。李涉

清歌一曲斷君腸。沈雲卿

天上人間兩渺茫。宋 邕

不將清瑟理霓裳。宋 邕

桃葉桃根盡可傷。宋 庠

却恨青娥誤少年。無名氏

只應梅蕊故依然。陳簡齋

哀樂猶驚逝水前。許 渾

孤燈挑盡未成眠。白樂天

城上高樓接太荒。柳宗元

五夜漏聲催曉箭。杜甫

滿庭詩景飄紅葉。崔陶

舞袖弓鞋渾忘却。畫美人

其四

雲想衣裳花想容。李太白

功名富貴若長在。李太白

窗裏日光飛野馬。韓偓

身無彩鳳雙飛翼。李商隱

其五

應笑無成返薜蘿。談用之

時攀芳樹愁花盡。溫飛卿

桂嶺瘴來雲似墨。柳宗元

人生富貴須回首。薛能

六街春色動秋光。張泌

此地悲風愁白楊。李太白

人間惟有鼠拖腸。歐陽修

青春已過亂離中。劉文房

得喪悲歡盡是空。溫飛卿

巖前樹色隱房櫳。王維

油壁香車不再逢。晏殊

年年惆悵是春過。羅鄴

寒戀重衾覺夢多。溫飛卿

蜀江風濤水如羅。溫飛卿

世事無成奈爾何。司空圖

其六

家在寒塘獨掩扉。劉文房
不將脂粉污顏色。杜工部
歸目併隨回鴈盡。柳宗元
東風吹淚對花落。趙嘏

其七

有時顛倒着衣裳。杜甫
豔骨已成蘭麝土。皮日休
漢朝冠蓋皆陵墓。彥謙
滿眼波濤終古事。薛逢

其八

一寸思想一寸灰。李商隱
月明古寺客初到。項斯

高情雅淡世間稀。劉夢得
惟恨緇塵染素衣。陳簡齋
離魂潛逐杜鵑飛。章莊
惆悵朱顏不復歸。宋邕

萬轉千迴懶下牀。崔鶯鶯
蓬門未識綺羅香。秦幼玉
魏國山河半夕陽。李蓋
離人到此倍堪傷。羅鄴

且將團扇暫徘徊。王少伯
風靜寒塘花正開。劉滄

綠水青山雖似舊。耿 漳
無情不似多情苦。晏 殊

其九

形容變盡語音存。蘇東坡
閑結柳條思遠道。范 頤
窗殘夜月人何在。胡 曾
今日獨經歌舞地。趙 嘏

其十

風火年年報劫塵。李嘉祐
明眸皓齒今何在。杜工部
幾樹好花閑白晝。吳 融
狂風落盡深紅色。杜牧之

其十一

紅顏白髮遞相催。劉 滄
肯信愁腸日九迴。崔 曾

地迴難招自古魂。崔 曾
欲書花葉寄朝雲。李商隱
樹蘼蕪香鶴共聞。陸龜蒙
娟娟霜月冷侵門。康伯可

每因回首卽長顰。李羣玉
異服殊音不可親。柳子厚
數株殘柳未勝春。劉禹錫
水遠山長愁殺人。李 遠

絃管遙聽一半悲。司空曙

鳥啼花落人何在。崔珣

鵬上承塵纔一日。許暉

綠雲斜鞞金釵墜。晏殊

其十二

烟郊四望夕陽曛。陳尙美

內屋金屏生色畫。李賀

葦葭漸瀝含秋雨。柳宗元

舊業已隨征戰盡。唐晉

其十三

愁心一倍長離憂。李賀

雨冷香魂弔書客。李賀

山中老舊依然在。蘇東坡

羅衾滴盡淚胭脂。康伯可

節去蜂愁蝶未知。鄭谷

雪殘鳩鵲亦多時。杜甫

獨立蒼茫自咏詩。杜甫

世路干戈惜暫分。李商隱

粉霞紅綬藕絲裙。李賀

銅雀荒涼鎖暮雲。溫飛卿

獨留青塚向黃昏。杜工部

到處明珠是暗投。鄭谷

夜深燈火上樊樓。劉子暉

檻外長江空自流。王勃

明月易低人易散。蘇東坡

其十四

葉滿苔階杳滿城。盧 鉞

瓊枝璧月春如昨。張仲宗

往事悠悠增浩歎。薛 能

豈知一夕秦樓客。李義山

其十五

芙蓉肌肉綠雲鬟。元 稹

歌管樓臺人寂寂。王介甫

千年別恨調琴懶。談用之

回首舊遊真是夢。蘇東坡

其十六

一見清明一改容。鄭 華

寒鴉飛盡水悠悠。嚴 維

登高望遠自傷情。武元衡

冰簟銀牀夢不成。溫飛卿

清愁冉冉帶餘醒。蘇子由

腸斷綠荷風雨聲。吳商皓

泣雨傷春翠黛殘。王真白

山川龍戰血漫漫。胡 曾

幾許幽情欲活難。薛 逢

寒潮惟帶夕陽還。皇甫茂政

每驚時節恨飄蓬。來 鵬

風塵荏苒書音絕。杜甫

荒墟暗鷄催曉月。王介甫

玉環飛燕皆塵土。辛稼軒

其十七

處處斜陽草似苔。韓偓

侍臣最有相如渴。李義山

絃管變成山鳥弄。李遠

情知到處身如寄。高士談

其十八

落落疎星滿太清。儲光義

長疑好事皆虛事。薛能

且盡綠醪消積恨。紀唐天

秋來見月多歸思。雍陶

人物蕭條市井空。張泌

野花黃蝶領春風。王仲初

只有襄王憶夢中。李義山

野塘晴暖獨徘徊。韓偓

欲賦慚非宋玉才。溫飛卿

屢廊空信野花埋。皮日休

莫遣黃金謾作堆。張祜

寒江近戶漫流聲。戎昱

道是無情却有情。劉禹錫

休將文字占時名。柳宗元

斜倚薰籠坐到明。白樂天

其十九

繞門清樅絕塵埃。韓偓

酒力漸消風力軟。蘇東坡

一泓海水杯中瀉。李賀

世上英雄本無主。李賀

其二十

門前不改舊山河。趙承祐

墜葉飄花難再復。楊思中

魚龍寂寞秋江冷。杜工部

窮巷悄然車馬絕。杜工部

白石蒼蒼半綠苔。許渾

桃花淨盡菜花開。劉夢得

萬里銘旌死後來。張祐

爭教紅粉不成灰。張建封妾

蓮渚愁紅蕩碧波。許渾

浮雲流水竟如何。李商隱

鴻雁不來風雨多。趙承祐

磬聲深處出煙蘿。司空圖

錄既畢。仍指各句之下。使細註作者名氏。緝之奇之。因曰。節婦仙居。既已聞命。其姑舅夫子。抑又何如。姬曰。天醫傳以立洲不死之膏。賜以完形復體之藥。一門百口。往梯仙國矣。曰。何謂梯仙。姬曰。凡初得道者。皆送此修行。然後漸登品。

位猶登梯然。故曰梯仙。緝之又曰爾何不偕往。姬曰緣妾前世爲女醫。誤投人藥。致損貴胎。以故再世罰爲女身。以償。坐此少緩。尙隔兩塵。緝之曰然則汝亦良家子乎。姬曰妾幼時父母以貧故。鬻妾於趙氏。趙故宋宗室也。售妾以媵其女。女卽節婦。與妾年相若。蒙其憐愛。視猶骨肉。及歸譚氏。妾從行焉。時譚方門庭鼎盛。珪組蟬聯。祿隱繡芙蓉。極一時之富貴。硯寒金井。水瀝萬斛之珠璣。所見所聞。罔非禮義。若長若幼。皆擅才華。主母又聰明賢懿。不出閨門。雅善歌詞。仍工筆札。每有吟詠。錄以示主。一覽之餘。輒焚其藁。蓋以非婦人事。不欲使人知也。我主君亦英邁夙成。風流倜儻。文章水湧。倒三峽之詞源。議論風生。驚四筵之雄辨。妾侍左右。飽聞訓言。雖在微賤。頗習詩禮。不幸宋錄旣訖。元運方興。草昧英雄。起空憐文相之勤。王江山雲霧昏。實恨鑼槃之賣國。我主母潔身就死。而婢子忍耻偷生。顛沛流離。竄伏林莽。主恩難報。徒懷結草之心。女質易殖。竟作翳桑之鬼。物情愚衰。歎誰招碧玉之遊魂。吾道屬艱難。孰葬綠珠之弱骨。萬言莫盡。大概若斯。遂去。明日緝之白諸父。烏公以爲詩雖奇妙。而怪誕不經。

不許越兩月。一夕緝之被酒。不能寢。起出軒前縱步。挹天香於丹桂。玩月影於素娥。已而前姬又進拜。且言曰。妾向所求。幸蒙允諾。意公仁者見義勇爲。而側耳踰時。未聞施設。君何憚而不果乎。緝之謂曰。吾父弗汝信。奈何可取當時無人知者。一兩事語我。我白之家。君庶幾有証。或可就也。姬曰。記文丞相起兵時。永新七大姓。皆在勤王之列。而我主君。與東門張御帶家爲之首。城復日。人皆相慶。獨主母有憂色。告主君曰。城雖云復。戎馬必再來。城中之人。定遭毒手。我夫婦生死。未可知。萬一不幸。惟死而已。誓不辱也。主君姑爲好言以解之。主母不以爲然。主君又舉司馬溫公語曰。天若祚宋。必無此事。主母搖首長嘆。數聲取衣裙。題詩十首于其上。亦古語也。詩曰。

其一

高髻雲鬟宮樣粧。
杜鴻漸
寧知草動風塵起。
詩統

嫁來長在舅姑傍。
唐音
墜素翻紅各自傷。
宋所

其二

雙鬟慵整玉搔頭。唐 音

富貴榮華何處在。詩 統 統

其三

夫子紅顏我少年。唐 音

於今拋擲長街裏。劉禹錫

其四

殘粧滿面淚闌干。崔 珏

不見玉顏空死處。白樂天

其五

潮生滄海野棠春。嚴 維

青血化為原上草。馬子才

其六

百年世事不勝悲。杜 甫

百感中來不自由。杜牧之

夕陽西下水東流。杏壇吟

嫁來不省出門前。詩 統 統

萬古知心只老天。葉紹翁

鬢亂釵橫特地寒。王介甫

故園東望路漫漫。李 遠

劍逐驚波玉委塵。唐 音

人生莫作婦人身。白居易

大廈原非一木支。王廷珪

慷慨西風淚橫臆。范 領

其七

血。迸。金。鎗。臥。鐵。衣。薛 能
舊。時。王。謝。堂。前。燕。劉禹錫

其八

不。見。人。烟。空。見。花。嚴 維
人。生。自。古。誰。無。死。蔡 襄

其九

側。垂。高。髻。挿。金。鈿。詩統統
今。日。亂。離。俱。是。夢。宋 庠

其十

起。看。天。地。色。淒。涼。王介甫
血。汗。遊。魂。歸。不。得。杜 甫

此心惟有老天知。晏 殊

江。山。猶。是。昔。人。非。詩統統
更。傍。誰。家。門。戶。飛。詩統統

烟。籠。寒。水。月。籠。沙。杜牧之
莫。怨。東。風。當。自。嗟。歐陽修

閑。過。春。風。六。六。年。詩統統
英。雄。無。策。庇。嬋。娟。薛 能

塵。夢。那。知。鶴。夢。長。宋 龔
新。墳。空。築。舊。衣。裳。韓 偓

主君讀之曰。若然。吾何恨也。而主母又指所抱兒曰。我則死也。如此何。主君曰。吾固知之。付之造物。因以一金錢繫之項上。弄之曰。若遇兇人。兒以此買命也。遂相視泣下沾襟。後遇害日。金錢不知所在。惟血漬成錢影一枚印兒傍。第觀者不諦視。故不知也。詩亦維妾記憶耳。若此二事。皆世所未知者。緝之錄以呈父。烏公尙未深信。卽命騎往文廟取水洗磚而驗焉。則見兒影之傍錢迹宛然。在衆始驚愕。公乃如言。題其主設於節婦神座側。緝之又以酒殽祭之。其夕姬來謝曰。感君設位兼辱祭儀。無以爲報。公平生好琴。但廣陵散一曲。世久失傳。妾承教主君。尙憶之耳。願以相授。乃出其譜於袖中。曰。公善。自愛。妾不復來矣。倏然而去。由是緝之彈琴大進。獨步浙中。靳秘此書。弗以傳人。緝之死。譜亦竟絕焉。

醋說

了緣子

陰山之北。色界之西。有優曇花焉。蓋因果樹也。植以香田之泥。灌以醋海之水。後爲天女散落。春婆得其味者。爲麗娟之肌。得其色者。爲絳仙之面。惟恨生雖情種。終嫌質有酸根。故古今來之紅袖黃裳。風塵中之青樓紫陌。任是交深。鴛頸不聞豆蔻相思。仍教爭妬蛾眉。每帶楊梅滋味。此吳次尾所以有潑醋之詠。管夫人所以有唆醋之稱也。於是而有美而醋者。搜金釵於枕畔。輕罵梅癰。碎玉鉤於燈前。嬌啼梨泣。有醜而醋者。強宋玉以登徒之好。獨霸卿呼嫌西施之先。我而輦轉防郎。看有情而亦醋者。蝶帳銷王昌之夢。仍愁別有高唐駢車隨高。適之遊不使久居洛下。有惡而且醋者。偶向南樓低語。卽折欄來打鴨之聲。倘教北里私遊。則束帛有化羊之苦。別有多端觸慮。無故生疑。一語偶輕。卽命與花同睡。兩情已固。尙嫌被鏡分妍。可知女子善懷。愈覺丈夫難做。凡此皆由陰性易伏。機心原爲脂粉叢中釵裙隊裏生。而卽具毫無足奇者。也不謂身是男兒。竟至心如婦女。豈向微生行乞。仍與其醯。因而劉婦誤交。何妨當酒。故以有。

形之酸味。特作爲無謂之禍端。耶噫嘻。儻父真愚庸人。自擾矣。且夫五百冤家。最難得者。濃投鷁鱗。萬千佛鉢。最難釋者。拆散鴛鴦。向使待聘綠珠。早歸石氏。多情碧玉。已屬喬郎。而趙王倫故意強求。武承嗣忍心篡取。則當彎弓而窺德裕。懷刃而俟燕公。甯爲美人復讐。何作懦夫蓄怨。抑或錢塘蘇小。雖隸平康。要之虎阜真娘。終歸白下。則當鏡臺納聘。金屋藏嬌。俾有主者。芙蓉城於以求之。桃葉渡此時。柳氏深入侯門。往日蕭郎。都成陌路。豈不勝於燕爭舊壘。蜂奪香衙。祇因爭夕之微嫌。等於戴天之不共哉。於斯二者。無有一焉。則是殊討乾氣。且種仇根。庸何益乎。徒自苦耳。嗟嗟春眼。誰開休亂。錯呼雲之夢。白頭雖訂。無非送流水之情。將覩柳絮之沾泥。何用葫蘆之倒醋。大抵紫綃眼。巨旣鍾情於崔氏兒郎。則必紅拂心生。已割愛於楊家故主。縱使危絲強續。舊鏡重磨。而絃有外音。卽琴無真韻。憶昔于頔解意。裴度推誠。能以愛姬贈於良友。却教刺史真個魂消。寄語司空休嫌見慣。而況雙鬢度曲。未偕之渙。同聽少女當爐。只是遠公獨醉。則擲以纏頭之錦。怎知爲上手之珠。加以此日。劉郎原是去年崔護。

襟痕尙在。乍記前遊。衣扣畧鬆。轉驚今瘦。則是燕曾相識。初非蟬曳殘聲。何怪乎女悅男歡。卿憐我愛。試聽秋娘度曲。惟在春風未老之年。非關季子多金。始棄滄海難爲之水。獨是歡能買恨。痴則多愁。休誇面似蓮花。衛叔寶終慙看殺。曷若手除藤蔓。王摩詰悟破情禪。既能逃蝶浪之名。又不失鶯求之誼。亦既陸游豔福。畫扇家家。趙勝風流。買絲處處。愛河測透。孽海應回。不然者。互爲爭歡。各不相下。必至焚琴煮鶴。打草驚蛇。使猴猿逐牝之徒。蟋蟀爭雌之輩。鎮日而口銜酸鉢。畢生而胸亘橫針。於汝安乎。先生休矣。

戲擬青年上政府請弛禁早婚書

失名

政府王爺大人座右。敬稟者。竊以男子生而願爲之有室。女子生而願爲之有
家。父母之心。盡人皆有。況我輩。養精蓄銳。年已成丁。正宜婚姻。及時得達。製造
國民之目的。倘或遲之又久。始准成婚。竊恐電力既足之餘。無所洩發。其願違
禮教者。將如桑間濮上矣。其假冒維新者。謬稱自由結婚矣。種種怪劇。固不勝
言。卽或人言可畏。畏子不敢。畏子不奔。而男則目送手揮。廢精神於無用之地。
女則春心暗動。抱疾病於深閨之中。甚且男與男同居。斷袖餘桃。以爲樂。女與
女相處。迷離撲朔。以爲歡。將見情竇既開。色心莫遏。凡此弊端。當較早婚爲甚。
政府此舉。名爲強種。實則弱種而已。如謂壽元短折。體魄不壯。皆歸咎於早婚。
然則男子之貧而久鰥。女子之自願不嫁者。必將壽逾彭祖。體堅金石矣。何以
若輩並不聞有特別之壽元之體魄也。昔英儒哲學家斯賓塞爾有言曰。男子
二十。女子十七。八年已成丁。體格一定而不變。可知體格既定。牀第之事。必無
碍其衛生。今乃限以廿四之期。母乃太不近人情乎。哀哀諸公。其亦幸而過此。

時。期。耳。然。回。思。少。年。時。其。急。於。求。匹。之。心。想。亦。與。我。輩。相。等。胡。爲。情。遷。境。過。漫。不。記。憶。竟。強。人。以。所。難。也。至。謂。男。女。早。婚。有。礙。事。業。然。以。朝。中。大。老。任。大。責。重。自。應。愛。惜。精。神。乃。諸。公。當。垂。暮。之。年。猶。且。左。擁。右。抱。而。我。輩。血。氣。方。盛。竟。不。能。卜。室。家。之。好。何。其。責。人。則。嚴。責。已。則。恕。耶。嗟。夫。人。非。草。木。誰。屬。無。情。色。慾。關。頭。最。難。看。破。彼。夫。世。間。腐。物。生。而。天。閹。猶。有。育。不。忘。視。跛。不。忘。履。之。心。况。當。弱。冠。之。年。正。好。及。鋒。而。試。而。乃。故。爲。限。制。不。得。一。逞。其。忤。忤。欲。動。之。雄。心。豈。非。一。般。青。年。之。大。不。幸。歟。區。區。之。忱。尙。祈。原。宥。務。求。如。越。王。當。日。辦。法。丈。夫。二。十。不。娶。女。子。十。七。不。嫁。罪。其。父。母。庶。幾。標。梅。迨。吉。不。怨。愆。期。青。年。幸。甚。大。局。幸。甚。臨。池。瀟。墨。無。任。傍。徨。待。命。之。至。支。那。一。份。子。青。年。仝。披。露。

自由女請禁婚嫁陋俗稟稿

失名

稟爲婚嫁陋俗大碍自由乞切實禁革以維女權事竊吾鄉女子出閣怪象固多新婦回門燒猪尤重禮循來往本好事之所爲籍判貞淫乃解人之強作遠稽古籍近攷歐風婚禮無此明文蠻例遂爲僅見賤夫作俑純是徧心習俗移人是眞愚劇夫國家律例弗設專條閨閣英雄不拘小德眼孔豈宜太小面皮尤要包羞日蕭牆之隱患一生衽席之危機徧伏其或蜚言誤聽蠅玷妄加既無卻扇之情遂作回爐之貨蛇影貽忌幾同問道於盲雀角敗爭遂致當堂出醜閨房曖昧卽有錢難買證人鄰里沸騰恐無頭祇成公案妄攬老青之號不知厚顏慘蒙不白之冤可憐弱質甚或愛憎頓易藉勢吹求捫擋已窮借題搪塞犧人私德快己陰謀煽平地之風波等親家於陌路有甚求全之毀是真無恥之尤顧此泯絕良心僅居少數太璞既堪問世無瑕不易戮人但念女權墮落纔出生天俗例奇嚴宜留餘地方今新風輸入貿易亦講自由好事既諧責備豈宜太甚雌風苟競小節奚拘矧婁豬爲淫婦之稱臭猪亦賤娼之號借爲

取。締。實。不。雅。馴。而。其。利。於。男。子。之。專。制。侵。及。他。人。之。自。由。尤。非。文。明。之。正。軌。也。
伏。乞。徧。諭。鄉。愚。禁。揚。家。醜。虛。文。既。革。惡。感。全。消。從。此。內。外。平。權。共。樂。男。家。女。室。
便。宜。行。事。無。非。王。道。人。情。切。候。鈞。批。曷。勝。私。祝。謹。稟。

婦女贊成禁止娶妾律之大會議

失名

修律大臣會議禁止娶妾問題。有贊成者。有反對者。而其結果。當必以娶妾爲是。禁止者爲非。惟女界開通中之個人。聞此消息。欣然贊成。特派傳單。東請一班閨秀。開大會議。研究此問題。屆時赴會者數千萬人。異常踴躍。公舉自由女。爲臨時主席。先由會長宣佈開會理由。畢。主席登壇。畧謂婚姻之制定。自義皇。不過一夫一婦。并無妾媵。名詞厥後。唐堯以娥皇女。英下嫁。有鰥遂爲二妻之祖。然當時平體相待。亦無所謂妾也。夏殷德衰。人主流於逸欲。遂以女戎賈禍。已開御妻妃嬪之階。周代尙文。其制益燦然大備。朝廷倡之於上。草野自行之於下。於是嫡庶分而名分嚴。歷久相沿。成爲習慣。始尙藉口於嗣續。繼惟貪戀於歡娛。左擁南威。右抱西子。在男子樂則樂矣。其如不平等何。今國家有禁妾問題。實行與否。雖未可知。正宜乘此時機。要求政府。尊重女子之人格。上相有調燮陰陽之責任。當不敢恣然置之也。故請各姊妹到來。一爲研究等語。茲將議案錄下。

一禁妾問題。不獨於大婦有益。於侍妾亦大有益。蓋侍妾平日備受大婦之苛待。已屬屈鬱不平。一旦湯網宏開。正如非洲之放奴。各尋生路。不必受他人氣。可否將此意宣佈爲人妾者知悉。使有贊成。而無反對。請公議。衆議應速行宣佈。

一大婦贊成禁妾。並非因吃醋問題。蓋存一點慈愛之心。尊重女子人格起見。同胞姊妹。宜認定此宗旨。庶外界不能以蜚言中傷。衆贊成。

一凡事高以下基。洪由纖起。各姊妹贊成此舉。自當設一禁妾會。箝束丈夫。不得再行娶妾。以身作則。然後人多樂從。衆贊成。

一此舉事體重大。當聯絡女界。要求政府。以達目的。衆贊成（電文如下）北京憲政館王大臣修律大臣鈞鑒。閱報知朝廷擬定禁妾律。女界會議。贊頌王大臣文明。請速定切盼。自由女等電稟。各人議畢。茶會而散。

擬王之臣與其友絕交書（集經詩）

吳山秀

鳥鳴嚶嚶。猶求友聲。矧伊人兮。不求友生。維予與汝。德音莫違。寤言不寐。願言則懷。如何如何。忘我實多。知我如此。永矢弗過。昔我往兮。八月其穫。女子善懷。泣涕如雨。童子佩觿。童子佩鞶。邦人諸友。莫肯朝夕。睠睠懷顧。我是用憂。祝爾友君子。我卽爾謀。摻執子之手兮。摻執子之祛兮。同我婦子。言就爾居。與子成說。實獲我心。以望楚兮。悠悠南行。適彼樂郊。築於楚室。以遨以遊。不日不月。室家之壺。君子所依。飲之食之。安且燠兮。江漢湯湯。道阻且長。言念君子。曷云能忘。北風其喈。雨雪載途。我征聿至。日月其除。婦嘆於室。憂心惻惻。閔予小子。首如飛蓬。冬日烈烈。無衣無褐。每食不飽。載飢載渴。爾不我畜。亦已太甚。室人交徧。謫我謂爾不信。豈曰無衣。狐裘蒙戎。我有旨蓄。亦以禦冬。日用飲食。無不爾或承。有踐家室。寧不我矜。人之無良。胡甯忍予。嗟我婦子。縞衣茹蘆。靜言思之。其毒太苦。嗟爾朋友。不可與處。無我有尤。維予之故。始者不如。今逝將去。汝維彼忍心。胡不自替。信誓旦旦。曾莫知其玷已。焉哉。自詒伊戚。謂之何哉。自今伊

始。莫。往。莫。來。

代某校書謝某狎客饋送局帳啓

失名

綺窟沈愁。金閨寫恨。團圓天上。惆悵人間。歎纏頭之不來。怨客心之易舛。買脂
乏力。供黛誰人。環綺障於花叢。築債臺於香國。金釵耿其欲拔。錢樹鬱其將枯。
茲者春鳥忽來。飛蛺迭賜。婢媼感德。巾櫛銘恩。異域金錢。與恩膏而俱下。殊方
鈔幣。隨咳唾以偕來。頒百琲之眞珠。香塵待步。受一規之青玉。嘉惠難酬。妾聞
醴泉無源。流膏靡既。漢川有女。贈珮亦仙。遂使姊妹。開顏鄰家。歆羨起南都之
頌禱。勝北里之歡聲。從茲瓊笈珠囊。蓋藏孔厚。琪花瑤草。枝葉皆春。綃淚千行。
感裴公之心印。辦香一炷。拜管氏之留貽。妾惟有對月輸誠。臨風泥首。化蓬萊
謝恩之雀。白玉四環。作漢水報德之蛇。明珠一寸。妾再拜。

懺船娘張潤金疏

失名

伏以空空塵世。曇花之隱現何常。渺渺梵天。甘雨之霑濡彌廣。人多夙業。亟賴懺除。佛本慈悲。尤垂解脫。洪惟大覺世尊。西方設教。東土傳經。久超最上之乘。用闡真如之諦。花拈信手法相。莊嚴石盡。點頭頑靈。感悟洵迷津之寶筏。亦苦海之慈航。茲者張姑潤金。生小蘇臺。沈淪花國。數芳齡而屈指。纔踰二九年華。抱愁緒以縈心。獨異三千佳麗。雖緣遲婚。媾原非南陌。羅敷詎禍起狂且。自道東鄰。宋玉何來。惡謔本失雅觀。旁人之幻說。無憑。鶯簧舌鼓。當局則真持有定。鳩毒心甘。玉容頓化浮烟。三更夢冷。珠佩忽埋荒塚。四大皆空。嗚呼返魄。無香銀海。茫無所際。招魂有賦。瑤池渺不可期。爰集緇流。宏宣法事。闡天宮之妙理。手繙貝葉之經。引地府之芳魂。頂禮蓮花之座。彌空法雨。我佛如來。永庇慈雲。伊人必喜。庶幾七心盡悟。從今覺路之宏開。二諦俱融。自此轉輪而不滯矣。謹疏。

卷三

六

集

冶遊自懺文

失名

金閨韻事。香國新談。孤塚荒郊。盡變繁華之地。層樓高閣。大開歌舞之場。於是
有女詩賡。館娃宮築。鶯鶯燕燕。鬪時世新妝。翠翠紅紅。現諸天色。相袖薄迎風。
鬢低歛。霧波興。孽海豔萃。章臺則有五陵豪客。三河少年。選色徵歌。尋花問柳。
始逢場而作戲。繼久假而不歸。雀自投羅。魚來吞餌。不惜千金。擲去聊作纏頭。
那知半面逢時。已經失足。鏡中索笑。幻蝶方痴。絃外知音。鷗漸狎。每有雕欄。
倚玉含笑。相將能無翠被薰香。銷魂真個芙蓉花底。臥兩兩之鴛鴦。豆蔻梢頭。
巢雙雙之翡翠。春宵苦短。好夢難長。白眼頻逢。春衫易濕。或鷓鴣之饒舌。或鸚
鵡之嗔人。或言比鋒尖。或面如冰冷。絕似鏡河秋早。團扇先捐。儘教寶鼎香溫。
伊人不見。枉說情深。如許一旦都拋。凭憑此地。重來半文不值。移宮換徵。任彈
別調。琵琶送舊。迎新又作誰家眷屬。贏得心神俱瘁。浪子名傳。可憐妻妾交摧。
家人卦變。癡成鴉片。衣作鶉懸。冀北誰空。江東難返。嗚呼。往事已隨流水逝。此
心惟有落花知。君不見。貞孃墓側。烟鎖荒臺。蘇小坟邊。風淒古樹。一覺揚州之

夢。雲。散。風。流。千。年。杜。宇。之。魂。香。銷。粉。歇。花。真。解。語。難。招。潘。岳。之。魂。命。也。何。如。悟。
徹。莊。周。之。旨。情。禪。勘。破。管。他。臨。去。秋。波。色。界。參。空。幸。我。已。醒。春。夢。理。宜。自。省。言。
盡。於。斯。從。此。琴。心。挑。處。休。誇。同。調。以。求。皇。篷。脚。收。來。好。趁。中。流。而。轉。舵。

問蘇小小鄭孝女秋瑾松風和尚何以同葬於西泠橋試研究其命意所在

招招舟子

鳴呼綠楊春雨。扁舟鳴漁父之榔。黃葉秋風滿路。壓樵夫之擔。弔芳魂於何處。明月三更。話舊夢於當年。暮烟一縷。馮小青本爲情死。李香君尙以名傳。而況檢點香車。盛稱油壁。纏綿畫舫。別築歌場。若蘇小小者。非足增色西湖。揚徽北里者耶。考其墓址。寔在西泠橋畔石柱欲圯戶坏畧封淒涼埋玉之鄉。惆悵銷金之窟。荒唐杜牧已醒。揚州落拓香山空談。湓浦指江山而屢幻。問城郭以皆非。數百年來。幸留斯塚。孰意結閨中之伴。雅願效顰。聯方外之緣。亦思接武。附姓名於息壤。留事跡於穹碑。孝女鄭氏。實彰彰者。溯其轢釜晨炊。鳴機夜績。首雖螭而不飾。手已龜而忘疲。一畝相依。自傲黃花之節。十年不字。羞題紅葉之詩。女本湘人。瘞此未久。踵而起者。厥惟秋俠。秋以不羈之才。罹無端之獄。紅線久居於記室。文姬何憚乎征塵。詎知緹騎來催。竟目爲鈎黨。遂令爰書驟定。同殉於市曹。天果閔如人眞愁煞桐城吳芝瑛女士。乃携其柩而卜葬焉。松風雖

沒亦傑。寓學以禪。得解脫於刹。那付身軀於泡幻。萋宏血冷。已登無上之天。先軫元歸。預卜大幽之宅。厥惟和尚。亦託西冷。愚謂一節之長。固宜取善。三代而下。不外好名。鄭有表貞之心。秋寓呼冤之隱。而松風則學人提倡。釋子繼承。是可慕也。不誠傳耶。惜乎鑑湖東望。已返靈輻。秋社暮開。僅存尺碣。荒亭落寞。榮陽之聲價。如何隙地。迷糊普陀之名譽。老矣而獨此蘇小者。一隄常駐。百劫不磨。薄關盼之樓臺。笑薛濤之門巷。莫說美人黃土。當徧歷海奇。觀願留老衲。青山永澈。悟彭殤小劫。

冶遊賦

(以傷心三字點燈籠爲韻)

陳寅生

客有居於邗上者。乏林泉以遣興。鮮巖壑之徜徉。蕭齋寂處。孤影旁皇。乃向城
闐而徐步。過梵舍以翱翔。覺塵囂之燕雜。悲古刹之荒涼。曷不邀兩三之知己。
選佳麗於平康。遣興閒居。聊以爲樂。尋歡客邸。亦曰何傷。有茗可煮兮。有酒能
斟。釋我憂思兮。盪我胸襟。儂無愁兮。調素琴。我何恨兮。揮黃金。人既靜兮。漏復
沈。月又明兮。情轉深。流蘇帳疊。鴛鴦衾盤。雲髻插鳳凰簪。睹茲豔質。銷盡雄心。
隔一日而不見。將兩地之難堪。回思情話。欲共清談。如桃花之解語。恍諫果之
回甘。開瓊筵以坐花。柔情漸密。飛羽觴而醉月。春色偏酣。顧我傳情。雁柱音挑。
廿四背人。寄意蛾眉。樣畫初三。爾乃意若痴心。若醉情蜂。媒央蝶使。看花霧之
迷離。愛韶華之明媚。紫雲乍遇。發杜牧之狂歌。碧玉初逢。動蕭郎之遐思。明來
暗去。途中成僕。僕勞人意。蕩神馳枕畔。喚卿卿小字。歲月忙忙。流光冉冉。幾度
低徊笑語。醉折花枝。此時綽約。柔情香濃。枕簟醉中。神女不嫌。洛水瀾翻。夢裏
襄王。豈識巫山路。險金粉。南朝佳麗地。明月二分。枇杷門巷。阿儂居。落花萬點。

由是子夜四時。賸有百番愁緒。丁簾一曲。何嫌十束吳綾。頻揮買笑纏頭。山盟有約。可奈銷金窩子。海誓難憑。垂柳沿隄。任行人之攀折。落花臨水。依遯客以頻仍。劇憐紅粉情懷。依稀紅袖。誤卻青雲。遂路辜負。青燈幾見。繡虎才華。一時魄落。雕龍品譽。垂老途窮。博成浪子。頭銜向侯門。而零涕贏得。美人心。肯顧茅舍之長空。將取舍之都難。不堪回首。問歡娛之有幾。應恤吾躬。所冀鳳立丹山。漫棲枳棘。最好鴻翔天外。莫下樊籠。僕也半生落寞。自嗟浮梗之飄。十載羈棲。已得空花之悟。歎往事都成陳迹。賸有徐娘。問當年底事。閒遊誰憐。崔護桃花。三月流鶯。枝上朝啼。楊柳千條。風絮天涯。春暮鏡花水月。將同面壁。以參禪流。水行雲。敢向臨崖而作賦。

閨中十二曲

如夢令

閨閣女郎年。幼十五心頭春。門怕的見絲鞭。躲向窗前。佯綉休。驟休驟。儂要伴他消受。

長相思

蜂也歡。蝶也歡。姊妹撩人語太煩。多言怒小鬟。花一團。錦一團。不識于卿甚的。于低頭故不看。

菩薩蠻

于歸漸近情如掬。粧匿瞥見縈心曲。先意代郎看。般般愜意難。心酸深有爲。怨及懷中妹。添索嫁衣裳。含羞低問娘。

昭君怨

寶馬香車儂嫁。且喜還羞。又怕鶻突。此時心。不分明。不識今宵緣故。畢竟怎生發付。吃緊在心窩。堵如何。

浣溪紗

燭影花光耀錦屏。翠幃深處可憐生。桃花着雨不勝情。
羞未便囑輕輕牙根時度一聲鶯。偷覷已成心。可可含

巫山一段雲

寬綽因房喜。生疎爲路愁。人來瞥見一含羞。佯整玉搔頭。
認帳鈎。生憎婢子展衾裯。羅帕小姑偷。有意防油枕。無聊

減字木蘭花

曉妝特艷。夜飯台前生怕勸。佯換衣裳偷隔羅幃。飽看郎。
鞋燈影背枕上柔聲索喚。情哥未肯應。夜深羞睡斜脫鳳

風蝶令

囑堦防金鑰。呼鬟整玉珈。箱囊收拾上香車。歸去迎門笑語鬧。腮紗。
新壘簾前認舊花。晚來閒坐話郎家。羞向娘前低喚一聲他。壁上驚

小闌干

傳言郎至特嬌癡。忍笑把頭低。聽得娘呼還理。鍼綫故故出來遲。瞥看旋轉。整羅衣。默默坐多時。待得無人偷來檻外私語。定歸期。

虞美人

香車歸去銀燈掌。綉戶經蛛網。拂塵拭鏡見顏酡。不禁春心先已到衾窩。薰香。叫婢嗔他懶。怒語因郎軟。背燈微笑轉秋波。試問個人今夜欲如何。

南鄉子


午夢忒嬌愁。睡折雲鬢白玉簪。情態近來渾不解。貪酸愛煞青梅。不是饒個裏事難參。玉洞桃花虛度。三怪底。腰把羞舊影。宜男佩在深深。着裏衫。

尾聲

報產麟兒。牕前笑語喧農壻。一聲娘至戚喜堆眉。際罷洗金盆。抱上床兒。慰言農。寢地十六年前事。

原評 妮妮兒女語令讀者醉心

香艷叢書六集卷三終



香豔叢書

第六集

香艷叢書

六集卷四

盤珠詞序

吾鄉莊盤珠夫人蓮佩其名也箸有盤珠詞一卷行世苦無刻本曾記得盛氏思補樓有排版刷印不多罕見於書肆乃蘭閨愛盤珠詞者輒借讀傳觀祕之寶笈內子傅湘蘋檢出舊時錄本付鏤願持贈海內同嗜倚聲之學者劒門病客跋於情長閣時己亥孟冬病發不眠五日矣攤衾默坐一鐙熒然

盤珠詞

莊蓮佩盤珠

南蘭陵

傳湘蘋潤南校
董倩芳笑薇校

浣溪沙

甲寅元旦

似雨如塵舊歲華。晨雅聲動隔天涯。又分新歲到農家。
曉枕暗占寒夜夢。殘鐙猶賸去年花。算增算減總由他。

蘇幕遮

早抽條。遲作絮。不見花開。只見花飛處。繞砌縈簾剛欲住。打個盤旋。又被風吹去。
野棠邨。荒草渡。離卻枝頭。總是傷心路。待趁殘春春不顧。葬爾空池。恨結萍無數。

南柯子

豆蔻風難定。梧桐雨易稠。兩般滋味兩心頭。因甚殘春同病到殘秋。
彊把前塵憶。難將去日留。一尊也擬共清遊。又怕酒闌時候轉添愁。

玉蝴蝶 立夏

喚起眉閒幽恨。簾芳草滿地斜陽。燕子銜泥重到綠徧池塘。乍離魂殘花戀樹。還顧影弱絮縈窗。怪東君將春歸去。忒也怱忙。堪傷韶光九十。蜂黏屐影。蝶趁衣香。誰把濃煙暗雨。盡付空江。算前宵春和夢斷。到今日愁比春長。漫銷凝。一年一度。惱亂人腸。

意難忘 重遊近園

桂粟凝黃。記鐙然蘭檻。月漾銀塘。紅牙低按曲。鳥舫競傳觴。吹鬢影。送衣香。風也忒怱忙。問此生開懷有幾。忍負秋光。者番重到淒涼。似舊巢燕子。更過空梁。梅還如我瘦。草竟比人長。待去也。轉徬徨。住又費思量。只任他柴門深鎖。一片斜陽。

朝中措 天竹子

膽瓶淺水伴青松。也當一花紅。爲怕鴉銜雀啄。會教幾日紗籠。疑珠疑豆。羣芳歇後。別有神工。多少爭時。梅杏偏他不受春風。

滿庭芳 殘雪

瓦棱全融。牆陰還賸。幾回凍住斜陽。早梅枝上猶壓一分香。晨起圍爐小坐。聽簷溜細響。晴窗寒消到今番。向盡畢竟冷於霜。池臺如古畫。粉痕界處脫落微茫。記小鬟驚報。庭院銀裝。多少瓊林玉樹。能幾日如此荒涼。憑欄久回頭。欲誤殘月下空廊。

百字令

寄懷虞山大姊

重陽近矣。聽淒淒蟲語。豆花籬落一片殘。秋煙雨底更比去年。蕭索蘭槳牽愁。菱湖悵遠。辜負題糕約。誤傳歸信。幾番空憶簷鶻。可記疏影簾櫳。微霜池館。玉盞曾雙酌。屈指舊遊經六載。花氣酒香如昨。料得而今。青山紅樹。倚檻嫌衫薄。懷人天暮。冷生江上樓閣。

醉花陰

清明

春好翻愁春欲去。燕子銜飛絮。何處響錫簫。楊柳門前幾點清明雨。紙灰飛過棠梨樹。斜日無情緒。芳草古今多。誰定明年重踏青郊路。

清平樂

暮歸

月痕纔上。暝色和煙漾。撲簌沙鷗驚打槳。趁溜鳥篷剛放。溪流曲曲斜斜轉。過蓼蘆花一點紅。鐙漸近小橋竹屋人家。

一叢花 衰草

生於煙雨死於霜。爾壽比花長。青山絕少埋愁地。待呼起酒籍琴康。鴻去楚南。馬嘶塞北。人世忒淒涼。尋鈿拾翠幾回忙。舊夢隔斜陽。天涯無限愁無限。賸多少冷蝶寒釐。誰信後來春風吹轉。別有好時光。

剔銀鐙 螢火

牆角乍驚星墜。剛待起。又遭風挫。倦憇花心。涼依豆葉。弄影輝輝漸大。幾時添個巫山客。憶滄江我。又向檐牙小坐。似怕蛛絲難過。隋苑流光車囊照。讀計罪論功。都可只應猜做。含恨死美人。燐火。

踏莎行 春柳

曉月離亭。斜陽古渡。有時遮斷行人路。桃花作伴過清明。誰家池館藏煙雨。拂岸千絲。縈橋萬縷。影隨流水何曾去。笑他無計綰東風。東風吹起漫天絮。

南柯子 送呂氏姊赴山左

枕上眠離著。樽前淚不收。夕陽無奈上扁舟。料得舟行十里九回頭。須寄東風恨未休。落花紅影蕩簾鉤。不管簾兒底下有人愁。

南雁書

青玉案 秋雨

溟濛絲雨黃昏後。道似無卻還似有。冷逼銀釭紅暈久。遙天鴻斷。空階蟲響。夜漸長時候。香閨人醒。閨檐漏。怕黃菊今年更消瘦。開也定過重九後。那堪鄰院攪風鈴鐸。又幾聲相湊。

長相思 秋夜

一更更一聲聲。蟋蟀催秋雨。易成殘鏡。今夜青酒初醒。恨難平。月近中秋分外明。人閒何處清。

漢宮春 春日雨後游陽氏廢園

幾日濃陰。早柳隄作絮。菜圃堆金。傳是前朝貴冑。舊闢園林。池荒路古。客來過幾徧沈吟。薜蘿雨。摻摻細落。錫簫響斷春深。卻憶昔年游賞。有成行翠袖。滿

座朋簪。儘曾宴花醉月。誰料而今。枯松無伴。立斜陽。獨自傷心。好分付。鄰家燕子。莫還枉費追尋。

一籀金 春晚

春色拋人何處去。若向天涯。定有人曾遇。燕子如何銜得住。柳條已放漫天絮。幾夜愁聽簾外雨。夢斷羅衾。梅子青如許。雲脚不開開又聚。便天也恁無情緒。

離亭燕 秋思

靜掩重重門戶。不覺人來何處。半夜涼生白紵。夢裏忽收殘暑。露白一蟬吟。秋在碧梧高樹。曉月簾梢斜度。早有暗蟲無數。到此時。心兒便覺。先挨恁般滋味。定說不悲秋也。自無情。無緒。

清平樂 春夜聞笛

溶溶漾漾。一笛清宵響。鐙盡小樓人。再上月在柳梢惆悵。梁間燕子驚猜也。教伴我徘徊。不聽怎生便睡。聽時春恨偏來。

醉紅妝 秋暮

不知何處響。砧聲到。儂心分外清。斷鴻叫落一天星。雲點點。雨冥冥。問秋可肯再消停。放楊柳。幾枝青。卻儘西風吹個飽。全不用。半些情。

踏莎行 大兄寄示京口懷古詞

白日西馳。大江東注。朝朝暮暮相逢處。其旁坐老有青山。不愁不笑看今古。渡口帆檣。波心鐘鼓。後人又逐前人去。莫將詞句擲寒濤。多情恐惹蛟龍怒。

粉蝶兒 游絲

似雨疑煙。飛來忽到簷外。漾晴空春光如海。問攔春歸去。路柳絲。可礙替東君。劃個蝶。疆蜂界。道天沒情。不該有恁牽掛。散愁絲。乾坤偌大。比柔腸。同宛轉。一般情態。怪東風吹去。卻還仍在。

一籊金

得晴幾日天難料。月照金樽。且賞今宵好。梧葉不堪秋鬧吵。五更聲比三更少。問舍求田人易老。若有輪迴。忙到何時了。怪殺霜鐘敲不覺。人在邯鄲道。

前調 殘菊

絕似佳人支病骨。又似寒儒憔悴。衣結曉怕濃霜。昏怕月重陽。以後傷離別。
蘆簾紙閣塵清。絕占斷秋光也。算花豪傑。未脫塵根。終有劫。爲花懊惱多時節。

蘇幕遮 落葉

露寒煙通曉。日幾徧飄零。漸放山窗白。滿地殘秋。蟲唧唧。埽處和愁。愁處重堆積。
乍蕭蕭。還撼撼。疑雨。疑人。一夜空猜測。已是枝頭。停不得。鐘斷鴉驚。恨殺西風急。

採桑子 奉和外祖南莊先生草堂卽事韻

風吹軟草纖纖影。綠到橋邊。暝放遙天。明滅孤花弄野煙。
只容琴鶴三閒屋。恰對青山。老去方閒。乘興扁舟獨往還。

感恩多

獨憐人影悄。羅袂生涼早。竹梢新月明。近黃昏。
豆葉搖風。蛩絮盡秋聲。盡秋

聲隔個窗兒。怎教人不聽。

菩薩蠻 春蘭

羣芳逞媚韶光裡。一花秀影偏無比。草綠不逢人。空山忽見君。立驚遺世獨。獨抱幽香宿。春淡只如秋。芳心不貯愁。

前調 社日

溟濛雨歇雲猶聚。杏花紅過鞦韆去。閒立又閒行。香閨鍼線停。鬢絲釵影亂。午夢風吹轉。燕子到簾前。綠拖桑柘煙。

探芳訊 絡緯

冷消息到曉。露牆根晚煙。籬隙正繡衾。夢斷豆花。又風急殘燈窗裡明。還暗月在窗前白。忽驚猜巷北街西。那家宵績。何日便成匹。怪響引絲長。緩憐絲澀。靜夜寒閨幽韻。雜刀尺亂愁。誰漾千千縷。爭把秋心織。便無愁也。自聽他不得。

菩薩蠻 秋曉

曉寒茅屋吟蟲寂。竹梢澹影秋煙白。籬角上牽牛。花明露未收。天涯荒草路。

燕子辭巢去。老父未還鄉。鄉書又幾行。

前調 秋曉

涼天雁響。西風冷。海棠脈脈。憐秋影。不斷藥鑪聲。紅欄誰更憑。慈親眠漸貼。稍展眉頭結。曉色尙模糊。簾痕淡欲無。

探芳信 重九前一日大兄赴城北買菊歸各賦小詞記事

向城北。問野圃濃霜。者番消息。道寒花都放。莫遲去尋覓。攜奴荷鍾隨黃蝶。踏斷殘蕪碧。忽驚看一簇斜陽滿籬霜色。金盞爲君拭。有疏影疏香。移來書室。幾日簾前。經歲又相憶。忍寒翠。衰燈光下一一重搜剔。趁重陽。細雨輕煙。淡白。

清平樂 水仙花

凌波顧影。偶爾游塵境。一笑春風心自警。夢比梅花易醒。冰姿淡雅天然。含情欲化湘煙。未許仙山峽蝶。相尋相見相憐。

探芳信 寒蟲

晚雨歇。聽斷續蟲鳴。聲連墮葉。恰豆棚纔作牆根。又相接。柔腸量爾多曲。有者。

些愁說絮叨叨慘慘悽悽悲悲切切。長夜轉幽咽。算千徧濃霜百回涼。月數
盡殘更。捱過菊花節。寒蟬賸蝶都仙去。抵得昆明劫。賸秋心不死。哀吟欲絕。

朝中措 端午

滿城簫鼓競豪華。今歲數誰家。續命鬢邊綠縷。照人窗下榴花。蒲觴弔屈。痴
兒駭女。儘也由他。誰放瀟湘恨水。年年流徧天涯。

金縷曲 蜻蜓

紅藕香殘早。獨飄然飛來亭館。無人秋悄。纖雨垂垂痴呆久。尙立荒蒲池沼。似
也有幽懷愁抱。斷岸暝煙剛做冷。戀斜陽無奈停枯蓼。紅影掛水心小。回思
炎夏天初曉。喜湖邊晴波空闊。一竿嫋嫋。亂織幾番閒庭院。開雨前頭先到。又
各處遠縈低繞。怪底著驚驚不定。觸簾旌響惹堦前草。疑墮葉被風掃。

一籊金小飲石榴花下

紅榴還比儂眉繡。花會添肥儂郤添消瘦。更看來朝花落否。不愁底事難長久。
萬事無過杯在手。難定明年人與花依舊。常向花前澆濁酒。怕他酒醒黃昏。

後。

一翦梅 向山草堂聽雨

儂欲留花不肯停。早也飄零。晚也飄零。銜泥燕子過空城。草忒青青。樹忒青青。
輾轉羅衾夢未成。今夜三更。昨夜三更。殘春不耐雨聲聲。春也無情。雨也無情。

醉桃花 漁家

無拘無束野神仙。扁舟不記年。得魚不換酒家錢。今宵換醉眠。
涼雨後。晚風前。蒲帆閒未閒。蓼花開近夕陽邊。網拖紅影天。

前調 田家

村醪肯費賃春錢。農夫幾日閒。許多野雀啄空田。斜陽笠影偏。
逢父老。話豐年。桃源別有天。人家一簇小橋邊。鷄豚聚晚煙。

菩薩蠻 酒家

雪消來問旗亭價。踏青人立秋千外。珠濺臘槽香。春風引夢長。
三閒茅蓋屋。

門對清溪曲。帘影半低遮。繞村紅杏家。

前調 山家

千盤石磴千竿竹。不知中有幽人屋。夜月響瑤琴。空山太古心。階前松子落。倚樹調雙鶴。日日得清閒。何須更學仙。

沁園春 元夜侍祖父母家宴

桂魄初圓。綺席開時。華鐙共輝。正簾櫳寒悄。柳條綠淺。池臺雨潤。草色青回。葉衣香。珊珊佩響。同上高堂捧玉卮。還思想。願年年。今夕長是如斯。椿萱遞慶。齊眉算我。著萊衣。最後隨聽紅牙拍徧。鶯喉宛轉。紫簫吹徹。蝶夢驚疑。錦袖圍風。翠屏障曉。莫放城頭畫鼓催。梅花睡。被歌聲喚醒。伴我徘徊。

長亭怨慢 送春

晚鶯喚道。留春住。沒個商量。許多飛絮。幾日輕寒。淡煙遮斷。隔江路。對花無語。怨昨夜。瀟瀟雨。綠草滿汀洲。料此際。春歸難阻。何處有。錫簫宛轉。過盡綠楊門戶。閒行小立。甚春恨。上儂眉。嫵儘他去。於我何干。便來也。關誰情緒。只一度。

春歸空費殘紅無數。

梁州令

問春來幾日。與蝴蝶。纔相識。風風雨雨。太顛狂。梨花。彊笑。桃花。泣。可憐楊柳。依依色也。自無人惜。阿誰昨夜。橫腔笛。愁心散滿江南北。

蘇幕遮

夏日荷亭卽事

水亭開槐晝永。貪看游魚。又怕危欄凭。響雨欲來風片緊。紅藕花梢無數。蜻蜓影。瓦松明。階蘚潤。瀉玉濺珠。不許圓荷定。一霎涼雲還捲。盡梧葉含秋。簾角斜陽冷。

前調

繡毬花

綠侵簾。紅糝徑。穀雨梢頭。花聚春心冷。圓月飛來池館靜。攢簇梅花欲鬪。嬋娟影。雨盤旋。風撲打。數了周遭。重數還難定。懊惱殘春拋未肯。蝴蝶成團。香夢何曾醒。

前調

紅蓼花

照清溪明野徑。如此秋光。只在無人境。惹個蜻蜓飛不定。紅飈波心閒弄。西風影。隱盟鷗。牽斷荇。淑轉汀迴。花底藏漁艇。宿雨初收江岸淨。客夢驚秋爛漫。斜陽冷。

滿宮花 秋夕

吹井梧。風漸緊。落葉吟蟲相迸。許多時。節病慊慊。那更曉來濃冷。月華明。更鼓定。可有玉樓人醒。小窗關了。又推開。犬吠一簾花影。

風入松 秋蝶

重尋斷夢到天涯。不見昔時花。殘春去後。心情嬾怕。經過燕壘蜂衙。獨自小停瓜架。依稀認得山家。滿身文彩向誰誇。風露怎周遮。蘼蕪十里凋殘盡。只東籬瘦菊藏他。一霎秋魂欲化。又驚落葉寒鴉。

菩薩蠻

慎皆大弟齋頭堆菊戲柬小詞

底須彊把殘秋闋。看來不是陶家種。籬落一枝黃。茅檐幾夜香。此花天與瘦。氣味宜重九。霜露聚秋心。幽人只獨尋。

前調 舟赴青霄里

兒家生長香閨住。出門便是天涯路。何處午鷄曉。炊煙碧一溪。西風吹漸急。帆影搖空立。樓閣斷斜陽。丹楓幾夜霜。

訴衷情 枯荷

再來池畔。忽然秋已。如此斜陽。冷貼煙波。還記小荷未放。誰料酒人都去。賸箇蜻蜒立。西風呆想。收蘭槳。甚處吳娃越舫。折枝殘葉。幾日空凝望。湖隄上一宵冷雨。瀟瀟不住。又添清響。再也休惆悵。（按此調非訴衷情）

金縷曲 九日

待覓秋蹤跡。問疏花。可還記。與蝶兒相識。一例西風。無今古。吹盡年年過客。有幾個龍山暇日。休道昔人悲歎事。算人間悲歎何時畢。絲雨細。曉煙溼。明朝亂葉階前積。被頑冬催秋早去。欲留不得。客去山靈應笑也。此輩登高癡極。著得破幾雙游屐。酒不。斷愁。斷酒。聽哀鴻。叫月三更白。檐鐵驟。曉霜急。

滿庭芳 秋日寄懷凝暉大姊

鐘送窗明。霜欺燈小。醒來冷壓重衾。況今回數。閨閣幾知音。繡帳春前尙共拈。
鈿葉鴉髻分簪。誰曾料玉梅樹下一別到而今。天涯芳草外。雲來雁去。事事
關心。記當年閒說。門對遙岑。偏我夢魂無據。鄰鷄唱幾度難尋。知何日雙眉翠
暖。綠酒與同斟。

浪淘沙 送春

簾外雨初晴。草色青青。飛花不肯再消停。幾日魂銷無數蝶。無數啼鶯。扶病
送春行。悄悄冥冥。人生何苦忒多情。不見海棠容易睡。容易飄零。

賀新涼 元夕

簾幕春寒峭。見疏梅數枝開也。試鐙風早。第一回圓今夜月。難得人天兩好。只
可惜好光陰少。畫鼓敲開銀世界。儘相持不放。鷄催曉。深院靜。漏聲悄。誰將
明鏡當頭照。記難真。唐歌漢舞。幾番喧鬧。此地卻除風雨外。少也千回會到。怕
桂樹婆娑漸老。月是主人儂是客。見嫦娥向我盈盈笑。斜陽掛海山小。

百字令 送大姊歸虞山

荼蘼香謝。怕春消眼底。歸期重誤。眞個今番攜素手。也算深閨長聚。柳外催歸。花邊送別。幾偏回頭覷。難留征棹。一宵空費風雨。依舊闌茗窗虛。敲棋院靜。牘我無情緒。便到清宵眠不得。誰與共翻新句。萬疊離心。半江秋影。忽被雲攔住。月明風細。只除魂夢來去。

虞美人 中秋夜聽雨寄冰懷大姊

角聲催夢清宵斷。翠被和愁捲。瀟瀟風雨響窗櫺。忽憶去年今夜月華明。別來兩葉眉長縐。可也慳慳瘦。秋光疆半已難留。記取雁來時節少登樓。

多麗 春日懷七姑母

又慳慳。過了清明時節。憶西園杏花落後。昔年於此曾別。見無情繡帆掛也。到黃昏斷淚凝睫。萬種離愁。飛鴻難寄。擬攜羅袖。剪鐙細說。恨當日舊栽楊柳。飛絮已如雪。長條盡。何時待得。玉腕輕折。幾多徧柔腸宛轉。隔雲山萬千疊。步香閨一鈎羅襪。夢裏行來也生怯。剗地相逢。碧紗窗外。無端啼斷數聲鶯。乍驚起。畫簾垂地。何處更尋覓。簷鈴響。紅雨飄愁。再沒休歇。

浣溪沙 初夏

睡起紅留枕上紋。病餘綠減鏡中雲。畫簾率地又斜曛。
倦蝶分明尋斷夢。浮萍容易悟前因。無聊天氣奈何人。

菩薩蠻 冬夜

梅枝正壓垂垂雪。梅梢又上娟娟月。雪月與梅花。都來作一家。
也知人世暫。有聚翻成散。月落雪消時。梅花賸幾枝。

畫錦堂 秋日病起

最是今番。慵尋繡線。筆墨那更還拈。懊惱秋來情緒。卻似春三。翠鎖眉痕愁對鏡。
煖融酒力。嬾添衫。閒庭院落葉響多。黃昏淡月疏簾。更點聽漸永。鐙影動深宵窗隙。風尖閣外哀鴻聲急。曉枕慄慄。不知消瘦今何似。恁般滋味我偏諳。
流光換。多少暗蟲吟斷。淚雨廉纖。

風入松 秋柳

樓頭望遠最神傷。昨夜又微霜。秋心搖落應難盡。賸疏疏挂住斜陽。忽憶漫空。

飛絮天涯斷夢茫茫。重來倚櫓向銀塘。無復舊風光。煙痕欲補如何補。費寒蟬百徧思量。知有而今憔悴春隄。悔種千行。

浪淘沙 雙峰書屋海棠盛開作小詞以誌感

夢斷小紅樓。宿雨初收。開晴蜂蝶上簾鉤。一院海棠春不管。儂替花愁。吟賞記前遊。轉眼都休。風前扶病彊擡頭。知道明年人在否。花替儂愁。

前調落花

斜日滿空墀。妝閣開遲。無聊風影弄晴絲。昨日醉眠今日醒。懊惱多時。蝶也似儂癡。抱蒂尋思。明年能否見繁枝。無限闌干無限恨。幾個人知。

鵲橋仙 春暮

昏昏曉曉。重門悄悄。雨意和煙做暝小樓。又到捲簾時。恰燕子飛來花頂。淚珠滾滾。那禁他不住。況欲留春可肯些些。多在柳梢頭。只絮墮尋春無影。

鳳凰臺上憶吹簫 夏日驟雨

岸草搖薰。衢塵漾暖。梅天十日長晴。自楝花開後。午倦難醒。彊把雕闌閒凭。又

宛憶去夏蟬聲。轟雷驟。滿庭跳雨。砌響檐鳴。神清暑歸甚處。更幾陣橫風。衣袂涼生。趁畫簾半颺。撲入蜻蜓。多少華堂綺閣。拋紈扇。玉腕初停。穠雲散。斜陽影底。屋角猶明。

清商怨 聖女古祠

神鴉啼散古廟靜。只晚風未定。零亂斜陽。紅灰飛沒影。秋花狼藉滿徑。蚤遠樹野煙催暝。跨鶴歸來。雲深環佩冷。

菩薩蠻 七夕

片雲一霎還收雨。瓜筵銀燭秋光聚。人影玉階多。天孫肯渡河。暗蛩驚淡月。忽憶兒時節。塵世太怱怱。雞冠花又紅。

踏莎行 青霄里舟中夜歸卽事

待放蘭橈。重過菊徑。人和涼月同扶病。輕帆未掛恨行遲。掛時又怕西風勁。翦燭嫌頻。推篷怯冷。荒涼野岸三更近。草梢露重寂無聲。孤螢照見秋墳影。

臺城路 寄外

昨宵猜著。今宵雨。今宵月。華翻皎。露白。蟲驚風。疏雁響。是我關心。偏蛋爲誰懊。
惱。問消瘦。緣由。便天難曉。有甚方兒。可將儂病。竟醫好。和衣連悶睡。倒正朦。
朧。著枕。忽又驚覺。池閣殘荷。門喧。葉尚有秋聲。多少難禁。自笑怎剛怕秋來。
便悲秋。老病裏。年光也拋人去了。

七娘子 秋夕

怕聽向晚西風緊。護銀鐙。夜久光纔定。燕怪簾虛。蟲驚砌冷。空庭露白。秋無影。
近來更苦清宵永。又添個雁兒催迸。怯凭紅欄。慵行香徑。春花不病。秋花病。

天僊子 春暮送別凝暉大姊

蝶到花閒。飛不去。人在花前。留不住。春歸人去。一時同春也。誤人也。誤無數。落
花。攔去路。昨夜同聽簾外雨。梅子青青。幾許留人不住。奈春何。行一步。離
一步。怎怪鷓鴣啼得苦。

婦人嬌 寒鴉

一帶疏楊。飛起三三兩兩。正人倚小樓凝望。荒村野店。記初交霜降。風信緊。雜

葉蕭蕭。響樹黑。爭呼煙青並颺。離不了。愁人頭上。悲筇落日爲殘秋。摩蕩誰
潑墨。畫幅塞垣圖樣。

醉花陰

小雨乍晴。天氣冷。漸漸清明近。斷夢去無蹤。似趁游絲飛過秋千頂。年時只
恁懨懨病。更舊愁新恨。人靜一庭閒蕩破。斜陽響落風箏影。

洞仙歌

寒蟬

西風近遠。在柳條池館。幾抹晴煙樹催暗。怯寒鴉小歇。又續殘聲。聲已斷。尙有
游絲難斷。蛻前原是夢。身世蒼茫。驚醒空枝夕陽滿。記槐陰翠葉。葉底初聞。
歎轉眼炎涼更換。似扶病騷人更哦吟。怕苦調淒音。聽時也暫。

清平樂

秋夕有感

暝煙欲上。蟲在籬根響。幾許亂鴉風底颺。笛冷秋門巷。柳梢一箇明星。欄
干短倚長憑。若要心兒不轉。除非沒有黃昏。

如夢令

初夏

簾外青梅如豆。簾底燕聞人瘦。纔待展雙蛾。又被晚風吹皺。非舊。非舊。不是傷春病酒。

滿庭芳 題汪氏姑小照

恨殺人生。髻齡易過。幾年同笑同顰。征帆開後。閒想到黃昏。多少香閨舊事。空贏得歲月猶存。消魂處。柳棉蕩日。病起見殘春。何人傳妙筆。月添丰采。花助精神。道夢裡常逢。畢竟非真。此際披圖見也。憶當日未埽眉痕。雲山外。近來樂否。無計共芳樽。

卜算子 游春

曉雨弄新晴。蝶夢花梢醒。一路垂楊到畫橋。過盡春衫影。日暮卻歸來。風約虛簾定。花頂泠泠月一痕。還怯黃昏冷。

前調 秋日

秋色著人濃。門外鴉啼曉。幾葉疏楊幾個蟬。各爲秋煩惱。煩惱幾多時。賸我長煩惱。不是斜陽便是霜。多少青山老。

新雁過妝樓 中秋對月

不醉如何金樽滿。擡頭且勸嫦娥看。今看古爲問可也愁麼。我踏紅塵纔廿載。已難禁蟋蟀聲多。況來宵一分月缺多半秋過。空將流光擲卻。但有誰綠鬢不受消磨。斷碁零葉催送急景如梭。年年願攜此月長留照。當筵金縷歌。瑤臺近任夢魂飛度。疏星淡河。

踏莎行

雨。惱。鶯。閒。煙。催。蝶。醒。逢。春。怎。更。慙。慙。病。縈。簾。弱。絮。已。無。聊。又。被。晚。風。吹。不。定。瘦。怯。憑。欄。慵。嫌。對。鏡。夢。魂。也。怕。空。廊。冷。溼。雲。慘。慘。夜。深。深。春。星。逗。出。梨。花。影。

長亭怨慢 除夕

又過卻小除夕了。爆竹桃符。那家春早。細雪霏霏。黃昏未歇。打窗鬧。一鐙相照。看隔歲鐙花小。翠黛未曾描。偏此夜。愔愔天曉。誰料。冷清清屋角。尚有老梅含笑。朝來夜去。甚新歲。恁般囉咍。把時序。草草開除。不愁教乾坤不老。但有底方兒。能閨窮冬都好。

柳梢青 清明

風聲鳥聲者番病起。不似前春。鍼又慵拈。睡還難著。賸箇愁人。
隔簾幾日濃陰。恰放出些兒嬾晴。薄命桃花。多情楊柳。依舊清明。

(完)

鬢華室詩選序

抱朴子有言無仙骨者不能成仙惟女多仙骨嘗從洪學得度者四十九人徐芝紫爲大弟子云半溪子喟然曰豈獨長生久視迺藉仙骨哉惟詩亦然曠代逸才未有抱俗骨以名家者也鬢華室鬢仙主人入智慧海現天女身咳唾隨風都成珠玉謝家道韞應是前身班氏婕妤茲爲後勁顧以虛懷雅量執贄余門刊削羣言進參上乘大千世界中此其鸞鳳乎維時余方屏丹經開蓮社說無生忍法啓不思議門女弟子十有三人咸侍函丈清風徐來默然神契鬢仙避席請曰先生下大梵天住震旦國法輪妙轉福不唐捐顧弟子有少分相應否先生莞爾答曰汝饒仙骨不餽佛心再轉軟紅方許證道羣弟子猶豫徘徊未領師旨鬢仙悠然以思愉然而悟曰然則弟子以詩證三昧可乎先生曰可光緒壬辰三月旣望半溪子許善來序

卷四

六

集

鬢華室詩選

清溪徐曼仙女士著

題蓼州漁隱圖

一曲漁家樂。西風繫釣艖。秋痕如畫好。人影映波雙。流水碧千里。蓼花紅半江。滄浪憑寄跡。塵念早全降。

別意

驪唱何堪聽。長亭客路遙。波痕春水浦。鞭影夕陽橋。黯黯人千里。依依柳萬條。雲山空極目。此際最魂消。

寒鴉

樹色千重暝。煙寒淡有痕。凍雲流水渡。衰柳夕陽村。風冷江鄉暮。天低墨點翻。秋陰飛木葉。幾陣噪黃昏。

睡起

大地春如繡。東風怕倚樓。年華流水送。愁緒落花勾。瘦骨憐仙鶴。塵心淡海鷗。捲簾人睡起。鸚鵡喚梳頭。

舟中用步弟韵

西風動林木。景色莽蒼蒼。黃葉打秋。雨。白蘋開夕。陽。鷗情何閑適。雁字自縱橫。
萬里碧天淨。水雲無限涼。

病起用步棣韵

簾垂已無賴。况聽雨聲加。愁重損眉翠。眠多亂髮鴉。消磨三月病。辜負一春花。
漸覺情懷減。敲詩興不賒。

夏夜次逸仙如妹韵

庭靜日云暮。風蟬響乍停。林深數歸鳥。簾捲入流螢。蕉色補天綠。桐陰鋪地青。
涼情好如許。清簟睡初醒。

四時閨詞

垂楊低拂竹闌斜。燕剪雙飛掠茜紗。一夜東風春似錦。隔簾紅遍碧桃花。
攜來小扇受風斜。稱體衫輕白雪紗。一笑芳塘採蓮去。教郎莫折並頭花。
彎彎眉月玉鉤斜。桂子香清透碧紗。笑向嫦娥低首拜。廣寒分我一枝花。

漫空雪影正橫。斜寒逼文窗六扇。紗獨撫清琴。忘漏永銅瓶相伴。有梅花。

春日口占

一簾雨細又風斜。幾縷輕寒上畫叉。啼斷鷓鴣春似夢。小窗紅煞碧桃花。

春日偶成

鶯聲啼徹百花叢。勾起春愁小院中。病後自憐無健骨。怕他料峭剪刀風。
桃花燦錦柳垂絲。肯負春光大好時。寂靜明窗誰作伴。黃庭臨罷自敲詩。
鴨爐煙盡自添香。半捲疏簾日乍長。燕子也憐春色好。爭銜花片補巢忙。

春日感作

如水春寒綉懶拈。博山親自把香添。露痕紅暈桃花醉。烟縷青牽柳葉尖。破夢
鶯聲催午枕。低飛燕影掠丁簾。可憐辜負韶華好。無那愁多病又兼。

春日偶遣

春日遲遲詩懶刪。金籠鸚鵡共清閒。苔痕新長埋幽徑。柳影低搖露遠山。偶拾
落花排壽字。戲吹烟篆作連環。畫堂一任簾垂地。不放雙雙燕子還。

春寒

春陰漠漠釀輕寒。芳事須遲幾日看。底事東皇不呵護。海棠無力殢雕闌。

春雨

絲絲細雨潤琴臺。壓樹雲陰鬱不開。贏得小庭生意滿。草痕分綠入簾來。

春雪

二月春陰雪尙飛。欸關頓覺故人稀。灞橋多少尋詩客。驢背衝寒歸未歸。

春愁曲

春陰漠漠春如夢。鶯語含春隔花送。夕陽庭院悄無人。東風習習簾波動。東風如剪不剪愁。杜宇聲中獨倚樓。滿塔芳草可憐碧。一樹梨花空自幽。花開花落真容易。鏡裡容華忽憔悴。月圓花好不開尊。浮生幾度花前醉。韶光逝水感流年。往事回頭盡化烟。恨海茫茫鵲難補。玉琴撥斷鴛鴦絃。垂楊萬縷絲腕地。苦把憂思牢綰繫。斷腸心事阿誰知。冰壺空積胭脂淚。

初夏偶成

三疊清琴一卷書。落花如雨閉門居。匆匆又送春歸去。蠶豆鶯桃四月初。

消夏詞

榴花猶剩一分紅。斷續蟬聲綠樹中。水閣安排堪避暑。湘簾斐几竹屏風。
樹影嵐光綠門濃。柴門臨水少人踪。北窗一覺羲皇夢。夢入壺天第幾重。
九曲闌干百葉窗。延涼更捲碧紗幢。珠蘭壓架清香吐。忙煞堦前蝶一雙。
屋外山環更水圍。晚來涼翠欲侵衣。一聲漁笛烟波綠。驚起鷗拍拍飛。
槐陰綠滿草堂西。冰簟銀床夢欲迷。睡起不知天已暮。一聲知了夕陽低。
閒將雀腦隔花薰。清絕簾櫳月二分。仙鶴一雙猶未睡。滿階桐影綠成雲。
一庭蕉影月留痕。薜荔陰濃綠到根。料得嫦娥當此際。廣寒應亦敞重門。
十里銀塘夜放船。蘭橈劃破鏡中天。碧筒吸盡梨花釀。一醉休辭抱月眠。
風搖窗影亂花梢。一卷黃庭手自鈔。分付簷前白鸚鵡。柴門不許俗人敲。
松聲謾謾捲青濤。笑說能將熱地逃。偶有客來留小飲。一盤生菜綠葡萄。
梧桐庭院早涼賒。雨過芳塘處處蛙。收得白荷花上露。一瓶蟹眼自煎茶。

好風送到芰荷香。竹影青中一味涼。閒倚石床無個事。看他飛鳥逐雲忙。
涼露無聲濕素馨。綠天深處敞疏櫺。張琴彈出瀟湘調。贏得幽禽隔樹聽。
堆盤喜有玉壺冰。一室涼生暑不蒸。翻得時新好花樣。風前親自鏤瓜燈。
闌干徙倚夜涼侵。露滿瑤堦月滿襟。螢火幾星吹不滅。隨風點點入花陰。
雨過涼添夏亦秋。生涯都付釣詩鉤。醉眠蕉影夢俱綠。一卷離騷當枕頭。

白蓮

凌波態欲倩風扶。不染泥淤品自孤。隔着水晶簾一桁。月明清影淡疑無。

秋聲

敲窗桐葉送清音。颯颯蕭蕭擾客心。四壁疏風數聲笛。一天涼月萬家砧。霜嚴
唳雁驚羈夢。露冷啼螿伴苦吟。最是離人聽不得。滿懷愁思感難禁。

秋色

西風昨夜到山家。暮色蒼涼感物華。秋水蘆花兩岸雪。夕陽楓葉半林霞。烟凝
冷翠螺鬟秀。雲蔚輕藍雁影斜。極目江村圖畫裏。勾留有客正停車。

秋柳

新霜幾夜減青青。憔悴腰肢瘦影伶。秋雨秋風渭城路。不堪攀折短長亭。

秋宵口占

雁聲斷續奈愁何。檢點情懷付咏歌。對影自憐詩骨瘦。悲秋常覺淚痕多。半彎新月窺朱幌。一抹微雲鎖絳河。人事那堪回首憶。浮生若個醒春婆。

秋日游道場山

道場山在茗溪曲。山光俯映碧湖綠。今朝我踏白雲來。遺跡追維蘇玉局。長松夾道翠參天。山鳥一聲啼破烟。峭壁倒瀉飛瀑冷。野亭開徧芙蓉妍。眼前秋光如畫好。雁排人字南來早。撫松坐嘯山之巔。放懷天地愁全掃。夕陽明滅半塔紅。鐘聲一杵搖晴空。洞庭山遠浮天際。太湖一勺環疑弓。西望龍溪亘長帶。東望菰城如斗大。平田千頃界棋枰。舉頭圓戴天如蓋。耳邊謾謾松濤聲。到此頓覺塵心清。怪石碍步薜斑駁。秋風捲地黃葉鳴。游歸倦倚蓬窗坐。笑看新月輕雲鎖。白蘋香裡放船回。一路青山如送我。

冬夜

梅花瘦影一枝春。雪月光中絕點塵。鸚鵡禁寒言不得。可憐渾似息夫人。

梅花

別墅孤山放鶴亭。逋仙眷屬住西冷。風催庾嶺春先到。雪滿羅浮夢未醒。三弄閒情橫玉笛。二分瘦影供銅瓶。高寒色相難摹寫。贈爾維詩祇性靈。疏疏清影瑣窗寒。綽約丰神畫亦難。老幹冰霜經閱歷。空山風雪任闌珊。凍雲鎖處迷難認。明月光中冷耐看。相對忘言成古契。濁醪澆盡酒杯寬。新向園林剪一枝。詩心冰骨兩相宜。竹筇徙倚人同瘦。苔徑荒寒客到遲。上界神仙姑射降。此花因果放翁知。頻頻索笑何爲者。鎮日巡簷意大痴。

對雪短歌

玉龍酣鬥紛無已。素甲翻空走千里。乾坤一片白茫茫。置身恍在琉璃裡。寒逼簾櫳風力催。窗前一樹紅梅開。花光雪色兩輝映。對此快倒流霞杯。瓊樓玉宇人間有。莫羨神仙九天九。新愁舊恨且拋開。醉看雪花大如手。

雪彌勒

搏成雪。佛曉寒凝。銀界三千色相激。萬點天花成妙諦。一輪霜月認傳燈。菩提果證清涼境。冷淡禪參最上乘。誰謂慈悲腸。總熱如來心地淨。如冰。

醉後

半窗梅影月如烟。倒盡金樽夜未眠。一縷輕寒禁得住。強扶殘醉坐燈前。

感作

風雪蕭疎逼歲闌。流光付與指輕彈。煩憂瑣瑣凋雙鬢。生死茫茫付一嘆。淚酒桃花渾是血。心如梅子祇餘酸。雁聲慣作淒涼韻。不管愁人夢不安。梅花紅破向南枝。瘦倚闌干月上時。舊跡模糊襟上淚。新愁憔悴鏡中姿。瑤琴久斷和鳴軫。玉管空題懊惱詞。回首前游渺如夢。淒涼只許一燈知。無賴愁魔復病魔。藥爐茶鼎日消磨。萍蹤身世嗟無定。茶味光陰喚奈何。解脫自然成佛易。聰明畢竟誤人多。軟紅十丈難飛越。空對清流感逝波。

漫成

又見庭梅壓雪新。風光惱煞捲簾人。有情歲月愁中老。無主烟花夢裏春。白到
鬢絲羞鏡影。紅多血淚浣衣塵。小窗悄擁寒燈坐。無那淒涼祇影親。

偶成

閒居寂寞悵離羣。花影疎簾月二分。笑拂霜鋒光比雪。愛看烟篆淡如雲。千秋
長恨金釵句。一卷清心玉笈文。領取靜中真意趣。白荷香勝麝蘭焚。

閑中自遣

境入黃梁太渺茫。秋蘋一葉證行藏。煨來爐芋烟俱淡。聽到窗蕉雨更涼。庭靜
日長延鶴夢。簾疏風細透花香。閑中大有仙機在。領略壺天歲月長。

偶作

銀箭丁丁隔院聞。香消寶鴨懶重薰。二分別恨三分病。添上清愁更十分。
月扶梅影上闌干。花下尋詩翠袖單。一樣痴情有仙鶴。伴人偏亦耐宵寒。

感作

桐陰如水掩重門。香篆消殘鴨尚溫。詩寫四愁學平子。琴傳一曲陋王孫。三

因果從何證。兩字淒涼易斷魂。回首前塵疑是夢。羅巾怕檢舊啼痕。

閒作

愁病年來百事刪。任他鶴睡掩柴關。竹爐火活烹新茗。香篆烟殘冷博山。往事已隨流水去。此心更比白雲閒。風吹如雨桐花落。添得苔階點點斑。

自感

彈指雙丸迅速更。卅年如夢夢魂驚。秋雲擬命三分薄。止水爲心一片平。莫遣愁冤情抑鬱。追思往事淚縱橫。可憐天定偏難挽。着着輸人不必爭。

惱農曲

漠漠春寒簾不捲。養花天氣風如剪。小樓妝罷怯衣單。柳絲搖曳鶯聲軟。春山如畫對粧樓。偷樣描眉空鎖愁。彈指年華流水逝。斷腸情緒落花鈎。浮生若夢原虛幻。自悔樽前惆悵慣。團圓鏡影破雙鸞。悽楚琴聲悲獨雁。腰圍已覺瘦難支。況是東風病起時。紅雨一庭春寂寞。淒涼試譜惱農詞。

思親

寂寞清宵百感生。珠簾掩映月三更。欲從夢裡尋親去。無奈傷心夢不成。

乙酉冬侍 親旋里過采石磯登太白樓

吟懷豪放海天空。千古詩人總讓公。此日登樓獨憑吊。青山依舊夕陽紅。釣魚石畔水潺潺。憶昔詩豪此泛船。浪說錦袍空捉月。酒中仙是水中山。

懷人詩二十首

春陰如夢燕語催。愁歡會難常。鶯鳴興感空埽落花三徑舊。雨不來自思潦草半生故人。有幾凡屬苔岑之契。以及萍水之交。今皆黯黯分襟。或已深深埋玉。青琴在抱。有曲誰聽。紅豆相思無時。或釋爰作懷人短句。聊誌知己深情。

朱琴香如姊

工詩畫篆楷。攻經史善文字。少寡課子有歐母風。著有凝翠館詩詞鈔待梓。

傾倒班昭續史才。十年別夢繞蘇台。記儂學製椒花頌。曾向璇閨問字來。

姚月湘如姊

知書早寡無子

花下。初。逢。各。少。年。一。痕。塵。夢。已。如。烟。離。鸞。君。更。悲。無。子。如。此。遭。逢。絕。可。憐。

王楚香如姊

少孀撫孤有賢行

五夜篝燈晝荻灰。歐家賢母衆爭推。如儂應許賡同調。一樣傷心碎鏡台。

管詠棻如姊

靜淑寡言卒年三十二

聰明早悟幻中因。一霎曇華小謫塵。留得風流遺韻在。吳興爭說管夫人。

王貞卿如姊

結縞未久遽淡塵。緣因愛武林山水佳勝遂結精廬長齋綉佛焉。

天教管領好湖山。小結精藍屋幾間。解脫我教輸一著。龕深佛火掩禪關。

倪琳仙如妹

少孤貧遇人不淑藉筆耕。局活耽吟工愁著。有鵲血吟草。

雲林家世本清貧。嫁得蕭郎等路人。一卷苦吟詩太瘦。杜鵑啼血不成春。

蔡清仙如妹

健談善飲知文翰。卒年三十四歲。

七年文字締交深。記得愁澆酒勸斟。今日鳴琴人已杳。閨中何處覓知音。

周蘅仙如妹

知書明禮早孀無子事姑至孝

不忍磨笄遽殉夫。祇因堂上有慈姑。萊衣能代承歡子。賢孝如君畢竟無。

徐碧仙如妹

重交誼有熱腸襟期曠達喜弄柔翰

徐淑清才第一流。別來忽忽幾經秋。天涯芳草無情碧。畫出江淹一段愁。

嵇逸仙如妹

明慧爽直能爲小詩予弟婦也

翰墨論交總角年。聰明應是掌書仙。綠窗譜出雙聲調。艷福闔房羨阿連。

談靜仙如妹

雅淡卓犖。解詩畫音律善。飲有山水癖。恬恃均失守。貞不字。

水月襟期絕點塵。女貞傲雪不知春。條然獨抱烟霞癖。約我西湖共結鄰。

王樹蕙如妹

賢淑明禮至。性和婉愛品。簫笛。

生小嬌愁不解愁。今生慧福幾生修。回頭十四年前事。明月瓊簫共倚樓。

鈕華仙如妹

明達安貧賦性渾樸。

敦厚溫柔本性成。能安裙布與釵荆。寒燈壓線秋風冷。辛苦年年玉剪聲。

邵湘梅如妹

敏慧善談兼工詩畫。迴文織恨有蘇氏悲。

莫問支機石上緣。媧皇待補有情天。春愁一掬無人買。收入蘇娘織錦篇。

趙筠秋女史

技擅三絕並工寫照未婚夫卒苦節事親

江南傳遍姓名香。三絕蘭閨盡擅場。湘管有花雖艷絕。含毫獨不畫鴛鴦。

趙芝雲女史

能詩精書畫母卒廬墓西湖誓不字人每爲男裝以自韜晦

湖濱廬墓聽松風。至孝真能媲美宮。千古木蘭今再見。迷離誰復辨雌雄。

沈紫瑛女史

耽吟豪飲喜讀史

吳羌山下卜幽居。種得梅花半繞廬。中有風流女博士。竟能卓犖讀羣書。

曾楚香女史

耽吟詠解書畫文正公猶女也

江花艷入夢魂中。才德人爭仰女宗。不愧故侯家世好。瓣香我願拜南豐。

陸費穉香女史

嘉禾玉泉中丞女孫家叔祖姑嫜猶女也少孤寄生吾家著有佩蘭吟
草

笙詩補咏淚全枯。弱質依人痛少孤。回首門庭太零落。一樓煙雨夢鴛湖。

湘卿

硯香

外姑母

瓊卿

硯姑適錢塘許氏著有研香吟草湘姑適金華鮑氏抱秋扇悲著有辟
囂館詩草瓊姑自經殉母著有如璧軒詩草

當年曾共角詞場。今日回頭合斷腸。天上人間各離別。塵緣如此太淒涼。
別後寄懷徐碧仙如妹

艷說吾宗大有人。知君徐淑是前身。笑儂一樣耽吟咏。怎及清詞不染塵。
容易東風又一年。別情苦被柳絲牽。鵲啼花落春如夢。一段離愁絕可憐。
渺渺長波悵若何。魚書打疊寄離歌。春江一水碧如許。怪底文通別恨多。
不堪回首短長亭。何日挑燈雨共聽。身爲尋君拚化蝶。夢中山隔幾重青。

寄琴香盟姊

浙水吳山有夢通。倩他雙鯉遞詩筒。身因閒絕翻多病。心到愁深轉覺空。感別怕看春草綠。思君況見落花紅。何時重放蘇台棹。剪燭西窗聚首同。

寄諸譜妹

拚負秋光懶倚闌。別來愁病減眠餐。菊花比骨何妨瘦。梅子爲心總是酸。放眼乾坤宜痛飲。側身天地自長嘆。酒酣忽灑千行淚。不爲知音不肯彈。

寄懷同譜

無那懷人獨倚樓。十分涼意沁簾鉤。梧桐一葉落金井。秋雨秋風愁復愁。雲山自斷憶知音。怕向風前鼓玉琴。一點秋燈蟲四壁。惱他擾碎別離心。

寄靜仙西湖

夢痕約畧憶杭州。往事如烟付水流。欲買青山未償願。雲天回首不勝愁。白鷗點點下橫塘。幾樹垂楊鎖夕陽。萬柄風荷搖不定。水天深處十分涼。

贈邵湘梅女史

風流久仰女中師。夢奪江淹筆一枝。花月有情閒作畫。茶煙無語靜敲詩。清才

拔俗如君少。著意工愁笑。我痴記得水萍初聚首。瘦梅香冷歲寒時。

邵靖之女史于歸詩以催粧

一堂絃誦聚羣仙。盡是翩翩女少年。試問個中誰領袖。邵娘風度獨清妍。肯將新學讓檀郎。象數歐文各擅場。不作尋常兒女態。何須梅萼助新粧。聰明慧業證三生。藉甚才名早歲成。今日閨房添韵事。琴歌新譜合歡聲。女兒有願去浮槎。求學情殷志足誇。三島來年春似海。雙雙攜手看櫻花。流蘇寶帳鏤金箱。雲錦衣裳燦七襄。笑我添妝無別贈。新詞學譜賀新郎。

詩草承安定胡士蘭女史題詞步韵謝之

薦地傳來絕妙辭。鹽薇百讀謝娘詩。璇閨卓犖才如此。訪遍江南竟未知。巴詞可許共賡酬。傾倒清才第一流。多謝吟箋遙寄贈。憐儂薄命替儂愁。風調超然迴軼羣。清名恨未早知聞。楓橋水色碧於酒。買得扁舟擬訪君。水萍風絮聚何年。欲向三生問夙緣。字格簪花詩燦錦。料君三絕定兼全。

游龍華寺

有情芳草碧連天。三月韶華分外妍。指點仙源疑宛在。桃花紅煞石橋邊。
舟行卽景

數間矮屋一茅亭。蘆荻蕭蕭草不青。水接凍雲天欲墮。雁行點點下寒汀。
一尊濁酒倚蓬窗。劃破煙波畫槳雙。古樹寒鴉棲不定。雪花如絮撲輕艫。
武林道中口占

紅蓼青菱鏡裡天。波搖橋影半弓圓。忽聽欸乃漁舟出。白鳥一雙飛破煙。
草痕黃界路三叉。臨水柴門四五家。怪底風來香不斷。岸邊開遍欸冬花。
西湖

六橋垂柳鎖輕煙。雨後新晴放畫船。指點西冷蘇小墓。美人香草自年年。
孤山隱隱白雲遮。來訪風流處士家。放鶴空留亭子在。詩魂千古證梅花。
辛卯仲秋重游西湖

西子仍無恙。依稀憶舊游。水清魚逐隊。天闊雁鳴秋。塔影隨波活。鐘聲帶月流。
聯吟有佳侶。容與一扁舟。

處士忠臣聚。林家大有人。漪園參月老。閨苑拜花神。鴻爪同留印。烏私苦憶親。丙戌會侍先君來游忘機羨漁父。煙水靜垂綸。

雲影峯頭幻。湖光鏡面平。荷殘猶戀蝶。柳老不聞鶯。品茗泉親瀹。探幽酒共傾。歸途誰送我。明月最多情。

游慈相寺

極目長松一碧連。青山繞寺黛痕鮮。清幽不讓三天竺。名勝爭傳半月泉。

半月泉如

半月雖三五之夕池中月亦不圓有東坡題碣在雲影白迷飛瀑冷。日光紅襯野花妍。塵襟滌盡憑闌立。靜聽東風鳥語圓。

棠溪觀水嬉歸途口占

絲絲新柳不藏鴉。風送輕舟綠水涯。一幅鄉村好圖畫。菜花黃入野人家。夕陽簫鼓畫船過。桑柘青濃影蘸波。燕子一雙掠春水。篷窗亂撲落花多。

漫成

清琴瘦鶴共盤桓。秋月春風指一彈。芳草綠。雲低壓。徑落花紅雨。亂敲欄。酒因

解恨傾杯易。詩到無題下。筆難多少青山環屋外。恍疑風景畫中看。

漁家

煙波深處寄生涯。水國蒼茫泛釣槎。四壁晚霞明蓼穗。一船晴雪壓蘆花。夕陽柳岸謳歌起。秋雨篷窗笑語譁。賣罷銀鱸歸去候。滿船涼月冷魚叉。

山居

萬山青裏讀書樓。飛瀑當門聲瀉秋。松影一庭延鶴夢。花光三徑膩鶯喉。蒼苔滿地涼雲鎖。紅藥翻堦宿雨收。飽領煙霞閒趣味。翠屏掩映畫簾鉤。

隱者

青捲松濤雲萬壑。藥苗採罷閒調鶴。月明樹底撫清琴。風過刺桐花亂落。

題任叔田廣文循垓采蘭圖

戀戀烏私託咏歌。芳馨采擷向巖阿。騷經哀怨傳蘭芷。小雅悲懷廢蓼莪。空谷雨風悽欲絕。終天霜露感如何。孝思取認餘圖畫。補出笙詩淚點多。

題寫南山樓圖

道場聳翠苔溪曲。鎮日相看看不足。愛山更勝蘇玉局。丹青一幅恣收束。滿帟雲煙揮斷續。圖成一笑傾醺醑。軟紅洗盡俗塵俗。山光撲入樓頭綠。

題半日醉齋主人閒居自遣圖

汶上高風譽早馳。披圖今日仰英姿。鄭虔絕技花生筆。阮籍清狂酒滿卮。一院桐陰閒弄笛。半簾花影靜敲棋。文章蓋世橫行久。不論尖團總入時。公善畫蟹
花木深深屋幾椽。閉門未許俗緣牽。結來翰墨三生契。公與外子同譜參透推敲兩字禪。世事不須求甚解。人生最好是隨緣。明年得意槐黃後。忙煞長安十里鞭。

題畫

青山無語暮雲流。瘦柳疎煙無限秋。柔櫓一聲聲欸乃。灘頭驚起睡沙鷗。

題月湖漁隱圖

萬頃琉璃波渺渺。乾坤一葉扁舟小。鱸魚風起釣絲涼。濁世浮名淡鷗鳥。

自題二十五歲小影

錦瑟年華彈指過。眉山曲曲奈愁何。怪他天上團圓月。慣照秋思入髮多。

罡風吹墮小瑤天。回首瓊樓夢亦仙。底事橫琴偏不鼓。要從琴外悟真筌。

題俞慶曾女史綉墨軒詩後

女史字吉初。德清俞曲園太史女孫也。適宗氏。其姑遇之虐。女史曲意承順。嗣其姑爲子置妾。妾有惡瘡。女史親調湯藥。姑猶謂其妬也。日怒詈之。女史不能安作書致太史。尾隱一死字。遂仰藥卒。年僅三十有三。太史爲作傳傳其詩。

坐聽梅雨愁清夕。蕉窗燈影耿涼碧。一卷新詩讀百回。蘇娘字字皆瓊璧。羨君清才女謫仙。聞君四德羣推賢。紅閨賭韵花生筆。聰慧深邀大父憐。于歸夫婿亦時彥。玉堂人物世爭羨。萊舞娛親兩璧人。綠梅花下開清醺。奈何姑惡朝暮啼。鴉聲聒耳風淒淒。傷心掩泣言不得。十年血淚凝幽閨。曲意承歡輒逢怒。託之歌詠愁難訴。自從桃葉渡江來。醫藥親調反云妬。生成薄命復何爭。敢怨姑心太不明。一笑九京尋樂土。恨深自覺死生輕。隱語家書傳死字。未忍重傷重聞意。纔逾三日噩音來。一樹瓊英竟萎翠。吁嗟乎淑媛底事偏坎壈。豈真才人

例折磨。碧海青天自千古。儂亦爲之抱恨多。

偶書石頭記後

情天同是謫仙人。兩小無猜鎮日親。記否碧紗廚裏事。戲呼卿字作顰顰。
又送春歸感歲華。阿儂生小恨無家。傷心一樣同飄泊。淒絕東風葬落花。
菊花香裡快飛觴。門酌分箋粉黛場。試問清才誰冠首。當時獨讓病瀟湘。
涼月模糊香不溫。懶調鸚鵡掩重門。窗前悔種千竿竹。贏得斑斑漬淚痕。
藥爐茶鼎篆煙浮。風雨幽窗一味秋。知否多情天亦妬。罰卿消瘦罰卿愁。
兒家因果自家知。作繭春蠶自縛絲。了盡相思還盡淚。三生誤煞是情痴。
梨花落盡不成春。夢裡重來恐未真。漫道玉郎真薄倖。空門遯跡爲何人。

月月小說題詞

稗官漫說總荒唐。摘異搜奇各擅場。知否歐西能進步。全憑一曲荔枝香。
文明我國尙胚胎。幸有文豪共騁才。欲藉生花三寸管。夢中驚起睡獅來。
喚醒同胞志願奢。他年或免化虫沙。狂瀾今日憑文挽。此是批茶五月花。

任烈婦詩

蔡家有女淑且賢。幼嫻詩禮四德全。於歸任氏年十五。和鳴韵叶鴛鴦絃。夫婿
髫齡芹早采。雲煙揮灑才如海。得意旋分貢樹香。登堂偕舞萊衣綵。不圖天忽
召修文。鏡掩孤鸞遽破分。妾心既碎妾腸斷。哀猿啼慘凝愁雲。自愁妾命薄於
帛。從夫誓願同生死。觸石血濺桃花紅。飲剪舌破蓮花紫。奈均被阻苦爲防。寸
心至此轉徬徨。上有白髮下黃口。安排一一費思量。抱兒因向小郎託。高堂更
賴歡時博。仰事俯畜既有人。問心已安死亦樂。空閨黯淡月黃昏。杜宇聲淒靜
掩門。一燈燐火耿寒碧。冰綃三尺騰冰魂。停屍暑月色不變。蓋棺依舊如生面。
凜然正氣炳千秋。合列吳興節烈傳。吁嗟乎士夫偷息生草間。視此烈婦應汗
顏。

讀小青傳書後用琳仙如妹韵

小劫華鬢下碧城。到頭可悔誤痴情。多愁轉覺難爲死。照影空憐太瘦生。倚竹
有人吟月冷。落花無主逐風輕。淒涼夜雨幽窗裡。一豆燈紅獨伴卿。

折蕙摧蘭太可傷。喘絲扶起尙新妝。詩吟紈扇悲秋月。淚洒胭脂化海棠。安得
鷓鴣療妬婦。詎因獅吼誤痴郎。珍珠小字紅箋認。忍讀焚餘稿數章。
長夜淒清靜掩門。眼枯拭盡淚無痕。支離病骨怯秋冷。寂寞傷心愁雨昏。空剩
殘詩傳恨事。竟無慧劍斬情根。一尊酒濁澆卿墓。流水斜陽欲斷魂。
漫說情多悞此生。千秋贏得競傳名。青天有缺嗟難補。碧海無邊恨莫平。倩影
桃花魂亦瘦。芳心冰雪跡同清。年年春雨棠梨落。悽絕孤山杜宇聲。

雪窗和步棣韵

寒窗潑墨倒金壺。摹出王維本色圖。萬樹梅花一天雪。乾坤贏得點塵無。
閉門風雪樂清貧。一枕梨雲夢裏身。輸與當年袁處士。空山高臥伴無人。
料峭尖風透碧紗。匆匆歲暮感年華。算來畢竟天公巧。一夜能開萬樹花。
紅爐煮雪滌詩腸。金鴨消殘幾縷香。最是寒宵聽不得。雁聲斷續不成行。

蘆花用查菴齋侍御韵

晴雪叢叢夾岸鋪。漁艖紅透一燈孤。低迷遠渚疏還密。倒映寒流有亦無。素影

欲遮煙雨艇。白描寫出水雲圖。花開不借東風力。玉骨珊珊傲五湖。
曾泊潯陽送別船。琵琶彈醒野鷗眠。半江月冷聞漁笛。兩岸花飛逐客鞭。一片
潮聲催遠浦。十分秋色淡平川。此中記有英雄隱。古壘依稀不計年。
迷離一望白紛紛。色與遙天淡不分。點點寒光吹作雪。重重涼影釀成雲。聲傳
月夜驚羈客。迹隱煙波傲此君。占斷秋風來水國。蕭疏紅蓼共斜曛。
古渡蒼涼昔景非。夕陽紅上釣魚磯。月明淺水羣鷗宿。霜冷荒江一雁飛。畫盡
寒灰書草草。聽殘羌管思依依。漫言難敵春棉煖。曾作當年孝子衣。

弔小青

冷雨幽窗腸斷時。聰明悔作有情痴。空將心事留圖畫。付與痴郎恐未知。
獅吼朝朝幾度驚。女兒命薄可憐生。挑燈洒盡紅冰淚。忍聽中宵杜宇聲。
小劫華鬢絕可憐。妬花風雨奈何天。情緣一笑今參破。莫作他生并蒂蓮。
亭亭瘦影照春波。憐我憐卿喚奈何。悽絕孤山舊游處。埋香塚畔落花多。
清才國色本難兼。愁重何堪病更添。一盞梨漿難續命。淒風冷雨不開簾。

輓瓊卿從姑

姑叔祖翁泉生公女也。年十九失怙事叔祖姑陸費夫人至孝。越五年叔祖姑卒。遽仰藥爲家人所持不得死。卒投繯以殉。爲絕命詩數百言。尤殷殷以附葬母傍爲屬。時光緒庚子十月廿一日也。年僅廿四歲事

上得 旌表如例

純孝爭誇婉北宮。承歡曲意廿年中。無端一夜萱花萎。雪樣麻衣淚染紅。絕命詞成血淚枯。寒燈冷月影模糊。捐身一死尋常事。如此從容畢竟無。閨閣咸欽咏絮才。料應此去返蓬萊。梅花依舊開如雪。可有芳魂月下來。侍母重泉誓不歸。人間天上願相依。遺詩怕向寒窗讀。南望瀟湘空淚揮。

長白惠興女史以身殉學詩以悼之

茫茫大陸化虫沙。白禍侵尋未有涯。記取有人先覺任。女豪生近帝王家。國勢存亡爭一着。最先教育重家庭。苦心興學犧生命。女界沉沉此喚醒。

金釵典盡力難支。慷慨捐軀諫以尸。賴有姚黃能繼起。

姚君發起中國公學黃君發起競存公學皆以

學身殉不然。愧煞此鬚眉。

學子莘莘澤莫忘。先生此舉破天荒。千秋學界傳佳話。俎豆湖山姓氏香。

鬢華室詩選題詞

字裡行間氣似蘭愁腸宛轉觸無端錦囊佳句搜羅富白璧微瑕指摘難吐盡
春蠶絲未斷吟成別鵠無空彈一般茆屋牽蘿恨日暮天寒翠袖單
茗溪一水隔盈盈展卷疑通咳唾聲畫荻他時酬苦志頌椒早歲擅才名茗岑
聚首情如昨花月聯吟夢易驚幾度焚香三復誦雪泥鴻爪感平生

琴香女史朱月蓮題

絕妙無慚是好辭修眉未畫早工詩挑燈細讀銷魂句人似梅花瘦可知
拈韵分牋互唱酬清才如水自風流可憐一管生花筆不寫關雎只寫愁
工愁善病孰如君哀艷詞華不忍聞江北江南衆閨秀新詩一卷獨超羣
柏舟早賦正華年六載匆匆悵短緣薄命紅顏原有例從來福慧不雙全

安定女史伯荃胡士蘭題

右爲吾鄉徐曼仙女史所作女史學通新舊善畫工書曾任天足會學堂教
員桃李盈門極一時之盛所擬紅樓夢葉戲譜已列入本編三集中茲讀其

詩纏綿往復神韻悠然雅近晚唐風格附錄莊詞後珠聯璧合旗鼓正自相
當耳宣統二年四月皞皞子附識

宣統二年五月付印

六月出版

香艷叢書六集

(四冊定價大洋一元)

上海棋盤街平和里內

國學扶輪社

上海六馬路吉慶坊內

國光活版部

上海棋盤街平和里內

國學扶輪社

廣東會文書局

漢口廣益書局

長沙鴻文書局

南京啓新書局

杭州德記書局

蘇州振新書局

湖州羣益書局

安慶波神報分報

版權所有 翻印 禁止

外埠分發行所

成都 北都 北京 天津 保定 山西 燕湖

粹源 記書 官書 各書 官書 各書 文書 匯海 總發行所 印刷所 校輯者

國朝文匯

百册洋三十二元

吳擘甫詩集

一册洋五角

翁山文外

五册洋五元

全謝山文鈔

八册洋三元

翁山詩外

十二册洋五元

汪大紳羅臺山合鈔

四册洋一元五角

王壬秋全集

十二册洋二元

彭尺木薛家三合鈔

四册洋一元五角

錢牧齋文鈔

四册洋二元

隨園文鈔

二册洋四角

顧仲忝文集

二册洋一元

章太炎譚復生合鈔

五册洋一元五角

諸大名
家評校龔定盦全集

七册洋二元

林琴南嚴幾道合鈔

四册洋一元二角

魏默深文集

四册洋二元

香豔叢書

四十册洋十元

胡天游文集

四册洋一元五角

佛爾雅

二册洋六角

校正
再版聊齋文集

二册洋六角

明宮史

二册洋一元

戴南山
方望溪合鈔

八册洋二元

青樓小名錄

四册洋一元

春酒堂文集

一册洋八角

古今說部叢書

六十册洋十六元

吳擘甫文集

五册洋一元

